

9/839/B

A. xxx Toz

47406
L U C Æ
T O Z Z I
NEAPOLITANI
IN RELIQUOS

HIPPOCRATIS APHORISMOS
COMMENTARIA.
PARS TERTIA:

UBI UNIVERSÆ MEDICINÆ,
tum Theoreticæ, tum Practicæ celebriores Quæ-
stiones perpenduntur, atque nedùm Recentiorum
inventis, sed & genuinæ ejusdem Hippocratis menti
congruentes, quàm dilucidè explicantur.

TOMUS QUARTUS.

*Cui accessit Appendix ad Commentarium
Aphorismi III. Libri I.*



VENETIS, MDCCXI.
Apud Nicolaum Pezzana.

SUPERIORUM PERMISSU, AC PRIVILEGIO.

THE UNIVERSITY OF
NEWCASTLE
LIBRARY
HISTORICAL MEDICAL
LIBRARY

THE UNIVERSITY OF
NEWCASTLE
LIBRARY
HISTORICAL MEDICAL
LIBRARY



THE UNIVERSITY OF
NEWCASTLE
LIBRARY
HISTORICAL MEDICAL
LIBRARY

TYPOGRAPHUS LECTORI SALUTEM.



N lucem tandem omnium votis expetitur, & iam-
diu desideratum incomparabilis ingenii Viri D. Lu-
cæ Tozzi Operis Complementum proferimus, quo fi-
dem suam liberans Author, reliquos tres Aphorif-
morum Hippocratis libros publici juris facit, eaque
majori qua potuit solertia, ac perspicuitate inter tot
temporis angustias, & corporis aegrimonias quibus
afflictor, doctissimis, luculentissimisque commen-
tariis illustratos. Protractum hucusque opus, qui Authoris laborio-
sissimas occupationes agnoverit, facillimè excusabit, quibus distentus
presentem excussionem adornare, summamque illi manum imponere non
valuit: Post quatuor enim priorum librorum editionem, à Summo Pon-
tifice INNOCENTIO XII. initio anni MDCXCV. Neapoli Romam ac-
censitus, ut sibi esset à Cubiculo Medicus, tantaque vitæ curam adhi-
beret, huius negotii absolvendi facultas ipsi nulla fuit: dum enim il-
lum senectute confectum, vehementer, crebròque egrotantem, diligen-
tia exactissima sustentat (sinistro namque latere debilis factus fuerat ob
gravem casum, femorisque luxationem usque è primis sui Pontificatus
temporibus) atque assiduus chirurgicis, podagricisque fluxionibus ob-
noxium, & labentem vitam, ut diu produceret insudat, hac animo
versandi, nedum perficiendi, non fuit ipsi datum. Sed cum fine Se-
ptembris anni MDCC. post diuturnum alvi profluvium, & purulentas
sedes, stomacho prorsus resolutus ciborum, & cuiusvis liquoris fasti-
dio affectus, tandem exactio octuaginta septem annorum curriculo ille su-
preum diem obiverit, vix ab hoc negotio expeditus, extemplo Madri-
tum proficisci, vocatus à recolendæ memoriæ Catholico Rege CAROLO
II. Hispaniarum Monarcha suo Domino (recusato, quod à Sacro Car-
dinalium Collegio ipsi fuerat oblatum, Primarii Medici Conclavis mu-
nere) obstrictus est; cuius nutibus obtemperans, nulla interposita mora,
omniaque postponens, illicò, commutatis ad celeritatem equis usus, ala-
criter se in viam dedit. At verò cum Mediolanum pervenisset, accepto
infausto mortis ejusdem Regis nuncio, Romam, unde profectus erat, re-
gredi coactus est; Ibi quoque aliquo temporis spatio immoratus, præsertim
ut Sanctissimi Patris nostri CLEMENTIS XI. tunc noviter ad Summi
Pontificatus apicem evecti, qui semper illum singulari humanitate, cum
ad huc Cardinalis esset, summaque beneficentia fuerat prosecutus, pedes
exoscularetur, ejusdem humanissimis invitationibus, ut Romæ permane-
ret,

ret, quàm molestissimè recusatis, minimum, aut nihil curans primaria Medicina Cathedra, quam in Inclyta Urbis Universitate (Sapientiam vocant) obtinuerat, iacturam facere, & vela vertere, Neapolimque repetere voluit, ut tandem post tot exantlatos labores requiesceret, & procul negotiis, omnibusque curis solutus, sibi paterno sublare posset vivere, & in amatissima patria, suorumque gremio consenescere. Sed nec otio, quod illi Deus fecerat, omnino uti, aut studiis, & Minervæ vacare licuit: turbata perditissimorum quorundam hominum facinore iam patria, & sceleratissimis commotionibus concussa, cum iam toto fureret Mars impius orbe, & tremebundam diffidiis, ac furoribus vexaret Italiam. Hoc tamen interea temporis Protomedici Generalis Regni munus obiens, quamei dignitatem memorati Catholici Regis CAROLI II. munificentia adjunxerat, nihil pro Rei Medicæ incremento, & quo salutis, utilitatique publicæ prospiceretur, intentatum reliquit, omnia, quæ ad Medicam praxim faciendam pertinent, suo ordine componens, & in numerum digerens, nova, atque efficaciora medicamenta loco antiquiorum substituens, atque ideò Petitorium, quod vocant, ac Antidotarium medicamentorum, iuxta Recentiorum usum, confectioni apprime necessarium, promulgans, redegit ad regulam, normamque Pharmacopolarum. Itaque ejus diligentia, atque vigilantia factum est, ut horum Officinæ hæc in Urbe tam perbellè, ac magnificè ornata, omnibus, quibus humanæ vitæ succurritur, affluentes conspiciantur, & nullo medicaminum genere tam simplicium, quàm compositorum, careant: ut facile animadverti possit, quo studio, atque industria semper Author animum attenderit, ut magis, magisque hic Ars Medica excelleret, & nostra Neapolis tam ob illius peritiam, quàm ob remediumrum composituram, inter alias Urbes caput exereret, atque extolleret. Hæc te monitum volebam, ut causam scires protractæ hucusque Commentariorum impressionis, ad quos componendos, inter tot maximas curas, vix furtim otia captans Author animum advertere potuit: in quorum, aut ipsius Authoris commendationem, ut multa, aut pauca dicam, ne exspectes; etenim nec meum est illum laudibus ornare, cum satis Sol luce se prodat sua, nec hi alienis indigent encomiis, quibus emptores alliciantur. Nostris interea Tu laboribus frui, fave, & vale. Neapoli VII. Kalendas Decembris MDCCIII.



A P P E N D I X

A D

COMMENTARIUM

APHORISMI TERTII

LIBRI PRIMII.



Uamvis hætenùs recensita, atque è medicis fundamentis eruta satis esse potuissent, ut quemlibet præjudiciis exutum facile persuadere valerent, ut in hac, & quidem magni momenti, re, cautius se gererent; quia tamen nec his adhuc plerique Recentiores acquiescunt, quinimmò vetustam fortassè cupientes in re medica mittendi sanguinis consuetudinem sustinere, illam è Mechanicis, secundùm regulas motuum, suffulcire nuperrimè conati sunt: atque statuta in primis, juxta moderniorum Anatomicorum observationes, Cordis primi Impellentis putati, musculari structura, deindè verò Arteriarum, mox etiam muscolum adjacentium, atque motum

sanguinis per suos ductus coadjuvantium pressione, acutè quidem, & ingeniosè nimis, persuadere fatagunt, plurimùm in sanguinis, aliorumque liquorum cum sanguine commiscendorum vitiis, & partium solidarum ægitudinibus, venarum, atque arteriarum sectiones, sed earumdem curationes conferre, & tum (ut Veteres consueverunt) è directo, tum ex opposito partis laborantis latere, atque ex locis tam remotioribus, quàm vicinis, & tum gratia motus sanguinis promovendi, tum etiam refrigerandi, ipsumque vel quantitate excedentem, vel qualitate vitiosum diminuendi, depurandi, invertendi, aut alterandi, illas commendant: quamobrem in omnibus ferè ægitudinibus illas prodesse posse se firmiter ostendere arbitrantur. Sed & (quod majus)

ex iisdem legibus Mechanices, etiam finopifmos, ac phenigmos, cauteria, & fonticulos, setones, cucurbitulas, ac quodcumque aliud ex Chirurgico fonte petitum auxilium, in idem adjumentum revocant, ac ritè, rectèque revocandum demonstrare conantur; proinde si hæc alia adiiceremus, operæ pretium nos facturos esse existimavimus.

Et sanè, si liberè licet in hac re fieri, quod præjudiciis exuto probabile magis videtur, etsi quæ à Mechanicis desumuntur, verissima in se ipsis sint, & firmis, solidisque demonstrationibus, ac experimentis stabilita, cum nimirum Mechanica, ut Ars ipsa suggerit, purè considerantur; si tamen illa eadem ad viventia corpora, eorumque physicas operationes reducantur, mirum quàm longè varient, ac deficient, cum ab ipsis plurimum alterari, ac permutari possint, immò veluti labe quadam erroris inficiantur, ut propterea à præconcepto fine declinent, & multoties penitus aberrant. Ea siquidem est Physices, & physicarum rerum conditio, saltem respectu nostri, ut cujuscumque aliæ facultati si jungantur, illam coinquant, ac deturpent. Quare licet multum conferant, quæ à Mathematicis, Opticis, Dioptricis, Hydraulicis, Mechanicis, cæterisque sumuntur, ad explicanda phænomena Naturæ, quibus scilicet melius nos valeamus illa percipere, & nostris sensibus adaptare; nihilominus, quòd inde possimus sine ullo penitus errore de iisdem indubiè, & evidenter concludere, non est quod sperare liceat. Ita quidem licet Astronomi, ut mentibus nostris quaqua ratione Cœlestia phænomena, ac syderum motus aptarent,

ad regulas quasdam à Mathesi petitas, quo fieri posset congruentius, redegerunt, finxeruntque motus circulares in Epicyclis, Excentricis, Concentricis, aliisque deferentibus circulis, & orbibus; & Ingeniosissimus Cartesius per vortices, partesque varias, primi, secundi, & tertii, ut ipse vocat, elementi; unde commodè nostris observationibus congruerent, & intelligenda insinuarent: ex hypothesi tamen hæc omnia proposuere, quia revera nulla sunt, & mente solummodò conficta. Sic etiam multa in physicis per Sal, Sulphur, Mercurium, Phlegma, Terram damnatam, & similia, itemque per Acidum, & Alkali conantur Physiologi per experimenta nostris sensibus exhibere; sed an revera viventium corporibus hæc insint à prima sui constitutione, penitus ignoramus, nec cerrò statuere valemus. *Quemadmodum enim* (scitè advertit, licet ad rem aliam, acutissimus Bernardus Connor) *qualibet pars Terræ, Aquæ, aut Aeris, vel alterius, sive simplicis, sive mixti, & compositi Corporis, mutatis figuris, quæ salinæ erant, sulphureæ fieri possunt; hoc est, quæ acuminatis cuspidibus salēs referebant, rotundatæ, aut pyramidales reddite, evadunt sulphuræ; & vicissim, ut propterea iuxta variam earumdem proportionem, ac texturam, transeant, & commutentur in Arbores, Plantas, fructus, semina, flores, adeoque in vinum, panem, aliaque alibilia; ita vicissim ista, eversa figura, & mole, in alias res transmutari possunt. Sic Carnes, Panis, Fructus, aliaque edulia nobis usitata, brevi spatio intra Ventrículum assumpta dissolvuntur, & in fluxilem succum, nempe chylum, commutantur,*

tur, quippe alimenta ista salibus acidis, & alkalicis redundant, qui deinde in stomacho, ac postmodum in sanguine, toti convertuntur in Alkali: quod patet, quia, si pluries, & pluries sani Hominis sanguinem distillaveris, ne guttulam quidem salis acidi, sed copiosum salem alkalinum inde colliges. Et mox: Spiritus vini, cornu Cervi, salis ammoniaci, aqua fortis, spiritus vitrioli, sulphuris, salis communis, aluminis, & reliqui liquores salini, ac sulphurei, repetitis distillationibus acrimoniam exuunt, & in aquam insulsam convertuntur, mutata scilicet eorumdem salium figura: Aqua ipsa, teste Boyle, lenissima distillatione, per triennium super ignem in vasis vitreis strictissime clausis, in terram elementarem transmutatur, servato ferè eodem pondere. Sic pariter commisti liquores extra nos aliud quid omnino peragunt, ac cum intra ventriculum fuerint assumpti, utpotè in eodem infracti, inversi, permutati ab aliis humoribus ibidem stagnantibus, aut aliunde transfusis; unde ab illis ad istos non licet congruenter inferre. En igitur quam facilis, & prompta mutatio in rebus physicis, quæ in Mathematicis neutiquam contingit. Hinc Cartesius ipse, qui primus Animantia, veluti Automata, contemplatus est, & per regulas Mechanicas multa in operationibus eorumdem scite admodum dilucidare est adnitus, nonnisi hypotheticè solum illa consideranda proposuit; quod & alii plures post ipsum confirmare non sunt veriti. Itaque commendabilia planè sunt, quæ ex Mechanicis ad nostrum captum de prompta, pro explicandis rerum naturalium proprietatibus, proponuntur, sed non

inde tamen licet certò concludere, illas ita se prorsus habere, parique ratione in cunctis aliis re ipsa prosequi posse. In hunc eundem modum se habet Boyle, cæterique omnes post ipsum, quoniam benè norunt Mechanicæ documenta, ac præcepta in Artificialibus, si rectè aptentur, infallibilia evadere; in Naturalibus verò non æquè, nec ad amissim congruere, licet similitudine quadam nos doceant id ipsum à Natura, vel non multum dissimiliter peragi posse, sicut in Artificialibus usuvenire comperimus: & quidem ratione clarissima, siquidem in Artificialibus, quæ aptantur ad opus, & operis executionem omni ex parte noscuntur, & ut expedit, ac opus est, ita prorsus disponuntur, & adaptantur, ut nihil lateat, quod eidem conferre queat; at verò in Naturalibus, pleraque omnia recondita sunt, & penitus occulta, quæque potissimum ad opus ipsum adimplendum præcipua sunt, & necessaria. Sic ad exequendum motum arbitrarium muscutorum, licet sciamus inservire musculos, & nervos, ac motrices eorumdem fibras diversimodè inflecti oportere, itemque extendi, contrahi, tendi, laxari, atque in diversas figuras Mathematicas adaptari, latet tamen, qua ratione, quibus mediis, qua vi, aut imperio superioris virtutis opus illud peragatur, ut ad simplicem Arbitrii nutum multifariam expeditissime disponatur, perficiaturque. Hinc jure optimo dixerim Mechanicæ Leges, & Instrumenta assimilari quidem posse, sed non æquè, ac ad amissim comparari operibus Naturæ, quæ cum nobis ignota sint, nisi iam poterunt ad certas leges redigi. Ut autem, quæ generatim dicta

sunt, ad nostrum propositum, tam in statu sano, quàm in morboſo Corporis humani, contrahamus, placeat Lectori hæc mecum ſigillatim perpendere, & examinare, ut omni exutus præjudicio de propoſita quæſtione decernere poſſit, num ſcilicet, quæ ex Mechanicis petuntur, exactè conſonent phyſicis Animalium operationibus, & pariſormiter quadrent motui cordis, & ſanguinis, cæteriſque muſculorum, & membranarum motionibus.

Dubio procul eſt, Pulſum, ſeu motum Cordis, & ſanguinis, localem eſſe, atque ad ipſum perficiendum requiri in univerſum movens, mobile, ſpatium, terminos motus, motum ipſum dirigentia, ac denique eundem coadjuvantia, ut ritè, rectèque peragatur, ac certa, ſtabilique regula, ſtatutoque ordine rhythmo, ac uſu convenienti moderatus, perennis fiat. Hæc ſanè in manufactis, ſecundum regulas Mechanicæ, ritè, rectèque diſpoſita cùm fuerint, fieri nequit, quin motus inde exigitur, omni ex parte abſolutus, ac directu, minimèque in interruptus conſequatur: quamobrem, ubi quis hæc omnia benè, exactèque diſpoſita noverit ſecundum Mechanicæ regulas, ita ut nil quidpiam deficiat, aut excedat, nilque intermiſſum, interjectumque ſit, quod poſſit pervertere, impedire, celerrare, aut retardare mobilis locomotionem, proſectò concludenter, & ſcitè poterit de motu ipſo, & motus operationibus determinare. At verò, ſi fortè fortuna aliquid accedat, quod unum ex iis, quæ ad motum ipſum perficiendum concurrunt, perturbet, aut dimoveat, planè motus ipſe devius fiet,

aut deſinet. Quoniam ergo in Naturalibus, & præſertim in Viventibus ſenſitivis, hæc omnia tam alterabilia, ac mutabilia ſunt, ut planè dixerim, nunquam in ſe ipſis æquabiliter conſtare, propterea qui fieri poterit, ut exinde certæ leges, aut inconcuſſæ regulæ colligi queant. Sed &, quod gravius, non dum plenè de illis hucusque conſtat, quo pacto in Animalibus peragantur, cùm univerſæ operationes Naturæ hætenùs nobis incompertæ ſint, nec quiſpiam poſſit per mille ſæcula gloriari, ad certam notitiam illas redegiffe. Etſi enim plurimùm in his ſit allaboratum, multaque per accuratiſſimas obſervationes Anatomicorum, & alia per Phyſicorum ingenioſiſſima excogitata, ac experimenta, inventa ſint; illa tamen nonniſi probabiles conjeçturas ad ſummum attingunt, captui noſtro magis aptabiles, haudquaquam verò certas, de quibus jurare poſſimus.

Et quidem, poſt tot, tantaque in Rem Medicam promovendam ſolertiſſimè introducta, neſcimus adhuc qua vi, quibus modis, aut instrumentis, motus iſte Cordis, & ſanguinis abſolvatur, & num revera Cor primum, ac præcipuum ſit hujus motus Movens, & Impellens, an potiùs ex adverſo ſanguis ſit cauſa proxima, & immediata ejuſdem motus, & impulſus? Etenim in primo illo puncto ſaliente Embryonis, cum vix tenuis bullula ſenſibus noſtris conſpicua ſit, ejuſcemodi motus percipitur, eodem prorsùs ordine, ac rhythmo, quo in adultis obſervatur, ſibiſque tunc ſanguis viam facere videtur per exiguos arteriarum, & venarum tabulos, quouſque vas Ovale, ſiniſtrum-

que

que Cordis ventriculum subeat : neque id absre dictum , quoniam à sanguine partes cunctas corporis vigere , ac nutriri , & vitales operationes sustinere , plerisque non irrationabiliter putatur . Sed etsi Cor sit primum movens , primumque impellens , in controversiam adhuc est positum , num ab interna facultate , eaque sive naturali , sive vitali , sive etiam animali , motum hunc tam regularem peragat , & num etiam electiva , ac cognoscitiva , immò cum advertentia , ad instar cæterorum muscutorum ; an verò ab usu , & consuetudine contracta per iteratos actus ab initio vitæ . Sic pariter dubitare licet , num tam accurata , & exacta Cordis structura , constructa sit propter ipsum motum , an potius ad robur solum , & fortitudinem ejusdem , ut huic perenni motui resistat , cum in plerisque animalibus talis , ac tanta illa non sit , immò etiam dissimiliter disposita . Ingressus prætereà , & egressus sanguinis à Corde , nec in cunctis animantibus uniusmodi est ; quin & in ipso homine tam adulto , quàm nuper nato , intra , & extrà uterum varius . Dubio etiam vertitur , num motus ejusdem compositus ex diastole , & systole , sit uterque ab interno principio , an alteruter solum ; & alter quidem à mera gravitate , sive introrsum , sive extrorsum concidente . Quæ insuper , qualis , & quanta sit universim , tam in statu sano , quàm in morbo vis , & facultas solidi impellentis in fluidum impulsus , & num semper , ac perpetuò æquabilis in utrisque sit illa in impellendo , hæc in obsequendo , debita convenientique proportionem , quis unquam poterit certa metho-

do determinare ? Planè ista captum nostrum penitus effugiunt . A musculis etiam per universum corpus dispersis vis quoque plurima potest sanguini circumeunti impertiri , quippè qui , ex doctrina Helmontii , peculiari quadam vi motrice sunt præditi , ut aliàs innuimus . At verò , posito quòd partes Corporis universæ simul unà in generatione præjectæ sint , ut aliàs à nobis est ostensum , nec una ante aliam sit formata , etiam ex documento Hippocratis , proculdubio una alteram in suis operationibus juvabit , nec una dici poterit reipsa ab alia pendere , sed potius simul omnes consentire ad corporis molem , vitaliter sustinendam , & conservandam : Reciproca enim , & æquè potens esse debet vis , & influxus unius in alteram , atque adeò potestas , & impetus solidi in solidum , & solidi in fluidum vicissim proportionaliter æqualis ; cum solidum à fluido vigeat , sustineatur , & conservetur , ac fluidum ex adverso à solido reparetur , repurgetur , ac reflorescat ; ut propterea alterutra ex parte vis ista si deficiat , aut vacillet , Motus , Movens , Mobile , à consueto , & naturali statu sano plurimum deficient . Etsi deinde quidpiam mali ab illis emergat , haudquaquam sciri poterit cujus vitio , aut defectu , id accadat , cum conjecturæ utrinque desumi , & utrimque desumptæ , fallaces esse possint .

Neque prætereà solidum semper in fluidum actionem exerit in motu promovendo ; cum ex adverso sæpè sæpius experiamur fluidum in solidum potius eandem excitare ; etenim in febribus quibuscumque , prima actio videtur esse à liquidis in motum fermentatio-

tationis indebitum adaētis, unde postmodum partes solidæ in suis operationibus depravantur. Sic pariter fibræ nerveæ, membranæ, musculi, nullatenus in Epilepsia, cæterisque affectibus spasmodicis contorquerentur, nisi à proritante aliquo liquore in motum illum forent laceffitæ. Idemque dicendum in Tussi, Empyemate, Stranguria, Dysuria, Dysenteria, & similibus. Vitia insuper, quæ solidis primò tribui videntur, nonnisi à fluidis multo antea vitiatas, promanant: nam cum à se ipsis lædine queant, profectò ab aliis, & quidem liquidis, afficientur, siue causæ externæ, siue internæ ad id ipsum accussentur; siquidem solida quæcumque, siue laxa, siue contracta, siue tensa, & dura, siue mollia, aut aliter affecta dicantur, nonnisi per actionem liquidorum talia fiunt, cum membranæ, musculi, nervi, fibræ, glandulæ, aut si mavis alia solida, in corporibus viventium considerata, sua natura non arida, exucca, rigida, inflexilia omninò sunt, sed convenienter mollia, illita, irrorata, humefacta; quamobrem cum præternaturam contrahuntur, tenduntur, obrigescent, vel plus iusto mollescent, & laxantur, ab aliquo humore proculdubio corrugante, irritante, vel contra distendente, & emolliente, aut aliter præter naturam afficiente, læduntur: & cum in statu sano in Athleticis firmanantur, roborantur, consolidantur, nonnisi per alimentum ejusdem generis, & conditionis, ob exercitia affluentius suggestum, & melius elaboratum, ita afficiuntur; ut propterea quæ partes magis exercentur, majus quoque, abundantius, solidiusque nutrimentum suscipiunt: qua ratione experimur in cunctis,

etiam natura languidioribus, dextrum brachium majoris molis, & robustioris virtutis evadere, quàm sinistrum; quia per assiduas exercitationes, pori illius magis dilatati, majus quoque alimentum recipiunt, magisque compactum, ac solidum in posterum fortiuntur. Itaque innumerabilia propemodum sunt, quæ dubiam, atque incertam hanc de primo Movente positionem reddunt.

At verò Cor ipsum (dato quòd sit primum movens) multifariam præcæteris turbari, adeoque impulsum varium excitare potest, tum causa sui diversimodè affecti, tum causa aliorum ad ejusdem impulsum concurrentium, ut sunt nervi, ac spiritus animales dicti, in Cor ipsum influentes, nec non Phantasia ex diversis objectis; & phantasmatibus commota, per innumerabiles animi passiones. Quare, cum nunquam Cor in eodem statu permaneat, sed diversas assiduò subeat, etiam in statu salubri, perturbationes, profectò non semper eodem modò æquabiliter movetur, & impellit; eoque magis quia in sanguinis, & chyli per venam cavam ascendentem receptione, modò in diastole, modò in systole, modò in utrisque, diversimodè se habet; unde postmodum pulsationes variæ; sicut etiam variæ quoque in motu, ac in quiete corporis, in somno; ac in vigilia, vacuo, aut repleto ventriculo, cæterisque mutationibus, præter ea, quæ casu, aut inopino eventu, Corporibus accidunt.

Secundò Mobile, idest sanguis à Corde impulsus, perpetim quoque variat, tum ratione sui; interius in suis particulis commoti, & à rementis repurgandi; tum ratione aliorum humorum cum ipso permixtorum,

storum, aut permiscendorum, qui varii, ac multigeni esse solent, sive in statu naturali, sive præter naturam, ex innumeris fere ægritudinibus contingentes; unde multoties, qui exinde secerni, ac repurgari debebant, non secernuntur, nec repurgantur; aut mali, ac vitiosi cum ipso commiscuntur. Spiritus item, seu potius pars ejusdem sanguinis vivida, semper in eodem variat, aut immodica exsolutione, aut non convenienti refectione; idque potissimum in ægris. Pars etiam glutinosa nec semper uniformis est, neque chylus, qui eidem suggeritur, ut & lymphæ unde quaque variabilis, tam in quantitate, quam in qualitate, cæterisque. Aer pariter inspiratus per pulmones, aut circumambiens per poros corporis, mirum quantam etiam varietatem in corporibus faciat: itemque vapores, aut halitus perspiratione dissolvendi, tam in sanis, quam in morbois: motus item pulmonis, ac diaphragmatis, & musculorum intercostalium, simulque cum his alia plura, quæ nos latent, à quibus mobile istud diversas subire potest mutationes, ut propterea non æquè semper moveatur, nec ejusdem virtutis, energiæ, aut elateris, neque certa lege, aut periodo comprehensibilis.

Idemmet quoque sanguis, sive in statu secundum naturam, sive in statu præter naturam, aliquandò plus justo rarefcit, aliquandò densatur; interdum parte florida abundat, aut deficit, interdum fibrosa; alius est jejuno stomacho, & alius à pastu; alius in quiete, alius in motu; unde & aliquandò latius spatium, aliquandò angustius, nonnunquam concitator in suo circuitu fit, quandoque tardior, crebrior, aut ra-

rior; idque passim singulo quoque die, & in individuis, adeò inter se differentibus. Sive insuper sanguis à se ipso moveatur, ac veluti unda tim suum gyrum absolvat per arterias, & venas; sive à corde impellente, ut in motu projectorum, vel à comprimentibus arteriis, per eandem fortassè vim utrisque insitam; vel ob texturam fibrarum oscillantium, aliudve simile, semper in suo motu inæqualem subibit varietatem: in motu siquidem projectorum, quo magis à propellente projectum distat, eo debilius; ac debilius evadit, ut tandem in quietem desinat. Si verò à sanguine ipso motus hic habeatur, quia in ipso itinere semper consumitur, & tenuiore sui parte fatiscit, aut etiam in robur, & nutrimentum partium transit, tractu temporis remotiores partes pertingens, in arteriis hebescit; mox etiam in venas transfusus, magis, magisque lentescit, adhuc ex valvulis earundem impredientibus; unde non rarò fit, ut in eisdem pariter concreseat, veluti in varicibus, deficiente simul una impulsu, & pressione arteriarum, & crassescente pariter sanguine, vi ejusdem non leviter imminuta, quam obrem certa lege hæc omnia ad normam invariabilem redigere, impossibile videtur.

Per venæ sectionem præterea, sanguis exiliens non nisi ab arteria, quæ in venam sectam influit, egreditur, adeoque, lege circulationis, sanguis arteriosus aliquantulum dumtaxat mutatus inanitur: eo autem diminuto, minuitur deinceps quoque impulsus in venas adjacentes, & successive in reliquas superiores, atque in ramum venæ cavæ ascendentis, quæ sanguinem in Cor reducit: Hinc impetus in idem Cor, & vigor à san-

à sanguine promanans, pariformiter imminuitur. Celeratur autem per aliquod tempus motus in pulsu, & in arteriis, quia ob earundem depletionem coguntur in supplementum inaniti sanguinis, à superioribus arteriis, & à Corde, novum, & novum alium excipere, atque in detracti sanguinis, arteriarumque inanitarum auxilium, frequentiori nisu, reliquum sanguinem propellere, qui tandem iteratis circuitibus sensim deficit, postquam scilicet ab adstricta vena secta paulatim substituerit.

Tertiò Spatia, seu Cavitates, per quas mobile, idest sanguis assiduò movetur, & circuit, quales sunt Ventriculi cordis, Arteriæ, & Venæ, varias subire possunt mutationes: & quidem hæ cum suis fibris sint intertextæ, quæ nunc molliores, nunc duriores, modò laxæ, modò rigidæ; proindè fit, ut aliquando latiores, aliquandò angustiores illæ evadant, præsertim in morbis, atque in diversis eorumdem temporibus, tum universalibus, tum particularibus; undè aliter se habent inter initia accessionum, aliter in augmento, & aliter in statu, ac declinatione; idque potissimùm ex varietate humorum illas afficientium, acrium, acidorum, aliorumq; nec non ex diversa eorumdem motione, ut & à causis externis, ambiente aere, cibo, potu, medicamentis assumptis, cæterisque; itemque cùm per viscera malè affecta recurrunt, quæ in ægris quoque multum variant, & magis, magisque in glandulis, & apicibus arteriarum, quæ ex observatione plurium Anatomicorum, non pulsant: qua etiam de causa diversimodè pariter per poros partium percolantur, & ab oscillis venarum excipiuntur, indeque in

vasa majora, ac in jecur, cæteraq; viscera. Simul cum his variant etiam spiritus è sanguine elicti, qui vel dissipantur plus justo, & evanescent, vel concresecunt, acescunt, & in alios omninò degeneres permittantur; quemadmodum, & halitus, sive evaporationes, quæ diutius retentæ sanguinem inficiunt, & in suo motu plurimùm perturbant. Quòd si tubercula, abscessus, alique tumores in glandulis, cæterisque partibus, ingenerentur, ut non rarò fieri solet, quàm graviora, & pejora contingant, nemo planè ad dubitabit. Quamobrem neque ex hoc certæ leges hauriri poterunt.

Quartò Interstitia, seu intermedia arteriarum, & venarum, quàm etiam ignota sint, quisque novit. Si enim per intermedios poros partium, proculdubio in his moram aliquam contrahens sanguis, sive ut partes ipsas nutriat, sive ut easdem vivificet, & roboret, multum à priori, per arterias impulso deficit, tam ratione sui, parte aliqua depauperati, quàm ratione impellentis, nequeuntis pari impetu, sicut in arteriis, eundem promoveri; cùm sanguis in arteriis inclusus, è latiori semper loco in angustiore deferatur; & contrà in venis ex angustiori traducatur in ampliorem. Si verò per Anastomosis, quam plerique habere ajunt arterias cum venis; plane constat, exiles arteriolas in apicibus non pulsare, adeòque nec æquabili ratione propellere susceptum sanguinem. Neque præterea plene liquet, num indiscriminatim plures venulæ ab una arteriola; an plures arteriolarum in unam venulam impulsus sanguinem transfundant, & quo pacto per venas perpetuò majores, ac majores, suis etiam valvulis interseptas, motum

eundem continent, cum in latiori spatio motus, ac impulsus lentescat. In Arteriis insuper contentus sanguis lymphæ, & sero scatet, quibus resumptis à vasis lymphaticis, per interjacentes glandulas, magna ex parte destituitur, cum in venas traicitur; unde non eandem omnino tenuitatem, fluxilitatemque in iisdem retinet: quamobrem diversus à cunctis ponitur sanguis, qui in venis est, ab illo, qui per arterias excurrit. Quod si in glandulis, intermediisque ejuscemodi spatiis, seu interstitiis, aut etiam in apicibus arteriarum, vel venarum impedimentum aliquod, fortassis præternaturam, acciderit, quam varia adhuc, interrupta, & vitiosa fiet sanguinis trajectio? ut non raro contingit in febribus acutis. Quid si insuper vitium sit in lymphæ, & vasis lymphaticis, itemque in nervis per eas partes perreptantibus, aut etiam in adjunctis, & circumjacentibus partibus, quæ pressæ, constipatæ, obstructæ, tumefactæ, aliterve affectæ, plurimum possunt circumgyrantem sanguinem, & lympham incommodare? præter innumera alia accidentia, quæ vix mente concipere valemus, sed tamen anatomicis cadaverum dissectionibus non semel inventa, & observata sunt.

Quintò Adjuvantia, aut dirigentia motum, ut præsertim sunt Musculi, eorundem fibræ motrices, ac Viscera, diversimodè quoque circumpellunt, cum proritata, gravata, constipata, impedita non uniformiter moveant, & moveantur, tum multoties vitio sui, tum non raro vitio nervorum, & spirituum animalium in eos influentium; unde sæpenumerò laxitates, contractiones, tensiones, durities, compunctiones, dolores, imbecillita-

tes, torpores, aliaque innumera accidentia illis contingunt: quæ de re, nec æquabilis semper in eisdem compulsio, aut in motibus sanguinis adjumentum fit, cum omnia ferè in ægrotis permutari soleant; (præterea, quæ sanis quoque frequenter accidunt) nam bonum, & sanum ex integra causa, malum, & morbosum ex singulis defectibus evenit.

Quantum præterea ista varient in cunctis individuis, non est, quod multis persuadeam; etenim constat ex corporum constitutionibus, ætatibus, habitibus, regionibus, vitæ ratione, exercitiis, temporibus, & tempestatibus Anni, cæterisque hæc omnia ita diversificari, ut quo pacto uni accidunt, alii aliter contingant. Hinc pulsus quibusdam sunt perpetuò magni, quibusdam parvi, nonnullis celeres, & frequentes, aliis rari, & tardi, immò etiam pusilli, & debiles: Sed & aliquibus non raro intermittentes, exiles, obscuri, vix perceptibiles. Quapropter quis unquam certis legibus, aut invariabili, constantique rationi illos restringere valebit? En igitur, quomodo fieri poterit, ut possint Mechanicis regulis, certisque demonstrationibus, physicæ in hominibus habitæ operationes congruenter aptari, aut ex illis istæ certò sanciri?

Sed & ulterius quis unquam pro certò definiet, num impulsus Cordis in sanguinem æquè fiat in Ramum Aortæ descendens, ac in Ramum Aortæ ascendens, cum in Ramo ascendente consideranda sit major resistentia ex parte sanguinis impulsæ, quod sursum sit ascensurus; quam in descendente, qua propria gravitate, fluxilitateque, faciliùs movetur, & profluit.

fluit. Et quamvis à proportionemajoris capacitatis in Ascendente, perquam major sanguinis impulsi quantitas traducitur, comparatione habita ad ramum descendente angustiores, minoris quantitatis susceptivum, quaque ratione evinci possit, æqualem in utrisque fieri propulsionem, quemadmodum in Hydraulicis per varios ductus, latiores, angustioresque, aquam fundentibus, experimur; non tamen id ipsum omninò contingit in Aorta ascendente, ac descendente; nam una fursum, altera deorsum vergit; nec deinde per equales tubulos, aut conformes semitas, sed omninò varias, diversasque, adeò ut licet impulsus in descendente Aortam, ob angustiores, ac perimetro minorem locum, major evadat; sanguis tamen, veluti in angustiori loco receptus, paucior est, qui deinde per plures, & plures ramulos tortuosè admodum diffusus, & quantitate minutus, ac impetu deinceps relentescente, non leviter retardatus, comparari haudquaquam proportionaliter poterit sanguini abundantiori, per ampliore Aortam ascendente fursum excurrenti. Quin & Sanguis per Aortam ascendente majori quantitate assurgens, quàm per descendente, remoram sibi faceret ob sui ipsius pondus, quod pondere sanguinis descendente majus esset.

Id ipsum considerare est in ramis, & canalibus Arteriosis, per quos in aliquibus partibus recta, in aliis verò tortuosè admodum, & in quibusdam aliis partibus spatio ampliori, in aliis arctiori, & vix conspicuo, sanguis diffunditur; unde qui, qualisve impulsus in his accidat, quis unquam divinabit? In iis præterea, qui Aneurismate laborant, ubi veluti in altero Corde, im-

pulsus sanguinis vehementissimus percipitur, qua methodo ista peragantur, saltem in partibus infra partem affectam fitis, vereri quoque subit. In Arteria similiter Cœliaca hypochondria affectorum, pulsus observantur elatiores, & crebriores, licet in aliis arteriis exiliores sint: contrà verò in varicosis, hemorrhoidibus affectis, aliisque, quibus sanguis inter valvulas venarum hæret. Quæ igitur uniformitas motus in cunctis concipi poterit, ut exinde certæ regulæ deduci possint, quales in Mechanicis? Si enim corpus humanum sua natura perpetuò mutabile est, & mille propemodum alterationibus obnoxium, quomodo fiet, ut in ipso unquam stabiles, & immutabiles leges stabiliri queant, cum ex quacumque, etiam levi, causa mutetur, & licet nostris sensibus id conspicuum aliquandò non sit, re ipsa tamen tale est; atque de momento in momentum variabile, potissimum verò in statu morbofo, cum scilicet causæ morborum occultæ sunt, & partes affectæ nullatenus determinabiles, sed solum dubiis conjecturis nobis suspectæ.

Sed quid quæso, unquam ponderis addit, vel detrahit ictus Scorpii, vel Viperæ, aliisque venenosi animalis? cujus causa sanguis momento temporis veneno infectus statim à sua crasi naturali declinat, & à suo motu desciscit, adeò ut paulò post demorsus vita defungatur. Quid etiam ponderis exquirendum in peste, cæterisque contagiosis affectibus, ex infecto aere; atque in animi defectionibus, ex pravo halitu, ut & in præfocatione uterina, aliisque similibus? Quid in his, quæ extrinsecus admota corpori, ut emplastra, olea, caustica, præsertim carpis pedum, & tarsis manuum,

num, momento fere temporis sanguinem inficiunt, ejusque motum perturbant, & in magnam virium jacturam patientem coniiciunt? Similiter fumus mercurii, sulphuris, & salis ammoniaci, nec non pleraque alia sive benè, sive malè olentia, à quibus non leviter sanguis, & corpus universum alteratur, & vel benè, vel malè afficitur, quid ponderis adiiciunt, vel adimunt? Animi quoque pathemata inducta ex solo aspectu, vel nuncio, objecti tristici, aut voluptuosi, adhuc in sanis, quantum sanguinem perturbant, & immutent, nemo est, qui non sciat, cum tamen nihil illi adiiiciatur, vel detrahatur.

Sed etsi certò sciretur, sanguinis detractionem alicui ægrotanti profuturam, adhuc tamen de quantitate évacuanda dubium maneret, quousque scilicet demenda foret, & quo tempore; quidque in detracti sanguinis supplementum esset adiiciendum, ut meliorem, in relicto sanguine crasim, introduceret. Cum naturæ, ætates, & cujusque ægrotantis corporis constitutiones (præter regiones, & anni tempestates) variæ, diversæque semper sint, atque in posterum futuræ; cum tamen ex regulis *Mechanices* ista essent indiscriminatim peragenda. Quamobrem prudenti Medico non tam facile licebit, in remedio tantoperè ancipiti, certam jacturam facere per balsami vitalis detractionem, ac vitalium spirituum dispendium, in humanæ salutis, & vitæ manifestissimum periculum. Accedit, quòd plerique ad simplicem sanguinis aspectum repente animo linquntur, alii evomunt, aut alvo turbantur, & alii alias subeunt, sive animi, sive corporis, afflictiones.

Præterea, à misso sanguine, & multoties meliori, puriorique, tendæ vitæ magis necessario, spiritus, seu partes tenuiores, & volatiles aliquatenus diminuuntur; unde sicut in ipso defectus aliquis emergit, ita & in corde motus, ac impulsus aliquantulum pariter, ut elangueat, necesse est: languente autem motu cordis, sanguis quoque minus impellitur; diminuto impulsu, facile sanguis lentescit, crassescit, hæret, adeoque momenta virtutis impulsus, & gravitatis, penitus mutantur, præter alia mala, & non rarò etiam graviora. Nec satis est dicere, refici illicò utrumque posse ex novo cibo assumpto, aut pretiosis medicamentis: Nam hæc, eadem ratione, qua sanguis deficit, etiamsi convenienter assumantur, nunquam restaurare poterunt; siquidem non æquè benè in ventriculo, cæterisque visceribus, in chylum, & sanguinem commutabuntur, ad eam exactè refectionem, quæ necessaria est; nam à languente sanguine deficiunt quoque succi digestivi, & reliqua fermenta viscerum, immò quidquid ad ciborum, & sanguinis elaborationem, repurgationemque requiritur.

Neque insuper perpetuò verum est, à sanguinis missione motum ejusdem citatiorem fieri, atque adeò successivè lentescentem, & crassum sanguinem attenuari, & exolvi. Quoniam non rarò contrarium potius evenit, siquidem educta per venæ sectionem parte sanguinis tenuiori, floridiorique, qui remanet, magis, magisque crassescit, atque spiritibus magna ex parte depauperatus, fibras, & cavum Cordis minus expandit, ac sollicitat, minusque pars ejusdem sanguinis vivifica in glutinosam, fibrosamque impetit, aut attri-

attritione rarefacit; unde pulsus tardior, rarior, & imbecillior fit. Atqui præterea cavitates Arteriarum, & Venarum inanitæ, minùs etiam per compressionem residuum sanguinem propellunt; itemque fibræ motrices, tum cordis, tum earundem, laxiores redditæ, minùs aptæ evadunt coarctationi, pressioni que, quæ major solum accidit à sanguine uberiori, & vividiori illuc appellente, ac opplente, & veluti per iteratos cuneos amplificante. Constat autem hæc omnia potius deficere, quàm augeri à sanguine misso, quàmobrem non est, quòd citatior pulsus exinde perpetuò haberi possit.

Majus certè periculum ulteriùs accidit à sanguine misso in febrientibus, quæ sæpenumero à particulari fermento alicubi hærente contingunt, quemadmodum in panariis, in spina digito infixæ, vulnere, ulcere, abscessibus, tumoribus, carbunculis, anthracibus, cæterisque; unde sanguis subinde in motum præternaturalem adactus, etiamsi totus educeretur, febrem non solveret, neutiquam scilicet educta materia illa febrem excitante. Et quidem pleræque febres omnes hujus generis esse solent, ut ex dissectis cadaveribus innotuit. Quæ igitur, aut qualis unquam futura erit utilitas à sanguinis missione, quocumq; tempore, aut modo peragatur in febrientibus? Hinc propterea satius, tutiusque visum accuratioribus, prudentioribusque Medicis, in morbis, & præsertim cum febribus junctis, ab hoc ancipiti præsidio, immò tot, tantisque periculis implexo, abstinere, quod vitæ, & vitali fomiti directè nimis insidietur, per virium, & vitalis roboris detractionem, cui semel infracto, aut languen-

ti, non tam facilè deinde succurritur, etiamsi pretiosa adhibeantur.

Quòd si dicatur per missionem adaugeri in sanguine motum fermentativum ob indebitam fermentationem febrilem inductum, qua scilicet partes tenues coguntur seipsas à crassioribus, & heterogeneis extricare, adeoque ex fermentatione ipsa fieri expansionem majorem in sanguine, qui in angustis cavitatibus arteriarum, & venarum veluti incapacibus, coactionem quandam patitur, ideoque exigere sui diminutionem, ut possit melius deinceps amplificari, subigi, & extricari, immò etiam in suo motu celerari, obicibus per missionem ablatis, vel saltem imminutis. Contrà est, quia si fermentatio illa in sanguine major, proficua est, eo quòd per eam nititur Natura partes impuras à sanguine segregare, haudquaquam est impedienda. Per sanguinis missionem præterea vel fermentatio diminuitur, vel augetur: si minuitur, impeditur proculdubio beneficium sequestrationis, quæ subindè speratur: si augetur, inutilis planè fiet missio, quæ ad sedandam febrilem fermentationem ab ipsis creditur conducibilis. Sed & in canalibus angustioribus, vel nifus liquidorum est major, quàm sit in canalibus amplioribus, vel est minor: si major, benè poterit vi sua in spatium latius adigi, atque adeò sine missione ampliorem locum exquirere; si minor, longè debilior, & minor fiet, facta ex venis detractione, quia per ipsam multum diminuetur nifus in sanguine inibi contento. Sed nec quis sibi fingat per missionem augeri fermentationem, ac subinde mox mox esse sedandam, facta nimirum sequestratione: Nam cum sequestratio motus Naturæ sit

fit, isque tempus plurium dierum exigat, planè fieri non potest, ut tam brevi tempore illa per missionem futura sit, quæ potius confundit, & turbat sanguinem, excreta scilicet parte tenuiori, fluidiorique tanquam faciliùs excurrente, & reliqua commota remanente cum crassa. Quin & contrarium sæpè sæpiùs experimur factis præsertim inter initia febrium, sectionibus, in quibus impossibile est coctionem, secretionemq; in humoribus haberi, quæ nonnisi ad statum earumdem comparere solet. Quæ prætereà vis ex missione ista sanguini inferri potest, quæ valeat bonum à malo sanguine secerere? cùm contra in motu liquidorum confusio potius inducatur, & inæqualis permixtio, à commotione, & pressione varia, quam subeunt partes illorum tenuiores, & crassiores: & si unquam cœnosæ subsident in ductibus, liquentes solum, & fluide egredientur, quod nocuum.

Iisdem omninò ambiguitatibus subiiciuntur reliqua omnia, quæ pro sanguinis missione à suis Fautoribus proponuntur: & quidem quod primò dicitur de majori velocitate sanguinis aucta in venis, à quibus sanguis mittitur, non est universaliter verum, quin plerumque infractis momentis contractionum, & pressionum, in fibris cordis, arteriarum, & musculorum adjacentium, contrarium evenit. Quippè universus sanguis, & totus quantus est, in suis ductibus suscipiat impulsus à corde, & partibus circumambientibus, & coadjuvantibus ejusdem motum, sive modicus ille sit, sive multus. Finge per synopen Cor stetisse; stat quoque & sanguis: cum verò Cor in suo motu redit, totus etiam sanguis pariformiter successivè commovetur.

Tozzi Op. Med. Tomo IV,

Sed & contra, sit sanguis sua quantitate minutus, quia præcedentem nisum Cor amittit, ut nequeat tam valdè continuum in venas commendum impellere, ex resistantia majori contracta in iisdem, proculdubio velocitas illa prior sensim hebetatur, & languet. Unde sanguis in Animalibus tantum impellitur, quantum impellit, promovetque cor ad motum, & pulsum sui; ut observare est in pulsu myuro, & deficiente. Pulsus quoque formicantes dicti, velocissimi, & creberrimi sunt, cùm tamen pusilla, & multum infracta vis, seu vigor, & calor in corde, & sanguine est. Quamobrem non est considerandus sanguis in arteriis, & venis, velut purus, & simplex liquor fluens per vasa, sed velut humor heterogeneus compositus ex multis partibus, & spiritibus quoque plurimis abundans, qui cum per emissionem resolvuntur, ac dissipantur, reliquum in venis ineptum, effœtumque relinquunt, ut nequeat deinceps Cor, & reliquas partes corporis vivificare, atque ad motum sollicitare; undè postmodum universalis languor, atque in pulsu, & motu ejusdem ingens varietas. At verò, si verum simpliciter esset, quòd ex missione sanguinis, motus ejusdem velocior fieret, proculdubio data proportionem, ex majori detractio- ne, longè major velocitas oriretur, quod contrarium evenit, languesciente potius pulsu. Accedit, quòd ex missione sanguinis, venæ inanità admittunt majus spatium sanguini circumfluenti, ut propterea non multum turgeant; indeque etiam arteriæ nec multum etiam amplificentur, unde pulsus, qui primùm fortè erat elatus, & magnus, fiat humilis, & parvus, & velo-

B

citas,

citas, quæ exurgit ex missione, fiet solum causa majoris, & citioris spirituum dissolutionis, ex illo motu magis concitato. Hinc tandem fit, ut licet per modicum illud tempus, quo sanguis educitur, velocior motus in eodem habeatur; paulo tamen post idem subsistit, & æqualiter per arterias, & venas mole, & virtute diminutus, hebescit, & languet; quoniam universus sanguis intra horam suum circuitum per totum corpus absolvit: & licet nifus sanguinis in arteriis major sanè fiat, quia in ipsis, vegetior, tenuior, & spirituosior est; attamen, quia per accessum illius ad varias partes corporis multum de sua vi amittit, fit, ut qui superest, per venas remeandus, lentescat nimium in motu, utpotè crassior, & parte sui puriore diminutus; ubi verò vitium aliquod contraxit magis, magisque in arteriis, profectò longè minor vis, ac nifus habebitur in venis.

Quod insuper subditur, sanguinem in vasis, post missionem relictum, minùs coactum remanere, & vasa ipsa minùs etiam infarcta; verum esse poterit in sanis, in quibus sanguis nullo vitio infectus esse solet; secùs verò in corporibus morbofis, in quibus plerumq; sanguis coagulationi subiicitur, & per detractiorem magis, magisque concrefcere, & coarctari solet. Arteriæ pariter magis contrahuntur ex defectu sanguinis missi; quia quanto minùs attolluntur, tanto magis contrahuntur. Neque momentum contractionis in Corde potest esse idem ante, & post missionem: quoniam sanguis appellens in Cor non idem est neque mole, neque virtute, ob præcedentem evacuationem. Solet prætereà sanguis in statu morbofo ejus esse conditionis, ut licet ratione quan-

titatis resistere magis, vel minùs possit impulsui, non tamen id ipsum valeat proportionaliter efficere præ sui pravitate; etenim in statu morbofo omnia planè permutantur, etiam in partibus solidis, secundum texturam, porositatem, fermentorum energiam, &c. Sed & contra fieri potest, ut resistentia hæc minor fiat mole, sed major evadat impetu, atque virtute, inducæa nimirum in sanguine majori commotione, ac fermentatione. Hinc etiam nec momentum Cordis impellentis fingi potest idem ante, & post detractiorem, nec minùs canales eandem servabunt rationem ut priùs.

Nec insuper ex sectione venæ ampliori, aut angustiori motus, ac impulsus sanguinis habitus à pressione circumambientium partium quidquam conferre potest, ut minor, vel major resistentia habeatur in sanguine mittendo, adeoque majus, vel minùs incommodum corpori patienti inferatur; siquidem non in omnibus, credibile est, ut sanguis sit uniformis, cum in aliquibus tenuior, in aliis crassior inveniat; sed & textura, compositio, magnitudo, robur partium, & ipsarum præsertim venarum, variat in individuis; undè difficilè admodum est divinare ubinam sectio amplior, aut angustior sit profutura: Non enim quæ mente à Nobis utiliter successura concipiuntur, in actum practicum deducta juxta propositum finem solent evenire, quinimò speculationes metaphysicæ plerumque non congruunt physicis experimentis. Sic in libra prægrandi e. g. exactè ad æquilibrium posita, quisque proculdubio crederet quodcumque corpus adhuc minimum ad alterutram lancem adjectum, ad eandem partem pondus adde-

addere, atque deorsum ducere, quod sanè mens, ac ratio concludenter, infallibiliterque futurum suadere videtur, cùm tamen ex adverso duas, tres, quatuorque muscas, & fortè etiam plures, ad alterutram partem superincumbentes, haudquaquam physicè pondus majus adicere experiamur, licèt proportio unius lancis ad alteram exillarum adjectione, major fiat. Ita prorsus, quod ex præmissis quibusdam futurum quid putatur tutum, utileque; ex adverso nocuum, vel infructuosum eveniet, ut millies expertum in praxi.

Quoniam insuper nifus sanguinis per venas continuus est nifui sanguinis per arterias, fit, ut per sanguinis emissionem ex venis, dimotio ejusdem sanguinis per arterias succedat minor, quia minor nifus sequitur post missionem: id quod in statu morbofo graviùs contingit, quoniam sanguis cùm mittitur, non solum quantitate diminuitur, sed etiam viribus infirmatur ob dispendium partium tenuium, & mobilium, seu spirituosarum; hinc fieri nequit, quin officiat, licèt sensibus externis minimè percipiatur. Quòd si dicatur nullam sensibilem mutationem exindè succedere, adeòq; eandem majorem sanguinis velocitatem haberi in arteriis, quàm in venis; proculdubiò nec juvamentum ex ipsa missione sequuturum dicendum erit, cùm in tantum juvamen ex missione speretur, in quantum mutatio aliqua in sanguine exindè successura speranda sit. Nequit autem intelligi, quo pacto per missionem sanguinis, velocitate motus ejusdem per arterias majori affecta, calor diminuatur pro ratione emissi sanguinis, cùm calor in sanguine à motu ejusdem haberi dica-

tur, ob attritionem partium calorem comprehendentium, & per ejusdem emissionem, motus ejusdem velocior subsequatur. Si enim calor per missionem minuitur, proculdubiò motus in sanguine tardior erit: vel è contrà, si motus post missionem velocior succedit, calor exindè resultans ad augeri simul unà dicendus erit. Quæ verò de cohæsione, & contractu partium inter sese proponuntur, quis unquam ad amissum ariolabitur? Sed nec omninò verum, quod per attritionem partium in motu calor habeatur, cùm pleraque stagnantia calorem ingentem contrahant, quem in motu posita non proferrent, immò mota potius refrigerescunt, ut in fimo, fœnu, aqua stagnante, & similibus: Sanguis ipse alicubi hærens inflammationem parit, & ardorem vehementissimum. Hinc concludendum missionem sanguinis non semper calorem imminuere, sed aliquando etiam augere; nisi cùm vires infirmat, & in exitium ducit: Tutum igitur non est quibus in corporibus, qua in ætate, loco, victu, aut ægritudinibus, id uniformiter possit accidere.

In obstructionibus prætereà habitis in orificiis arteriolarum, ubi plerumque contingunt, nifus iste sanguinis ex arteriis in venas longè admodum variabit, quippè ex ejusmodi impedimento ab obstructione habito, nifus hic debilior, & tardior fiet, adeòque motus sanguinis per venas lentè admodum peragetur; qui deindè per sanguinis detractionem ab iisdem, multò adhuc tardior, & debilior subsequetur, ac successivè etiam in arteriis, in quas nifus ex venis in Cor, assiduò fit; quàm obrem ubi ante missionem nifus,

indeque velocitas, obstructionem in apicibus arteriarum inductam minimè poterat dimovere, longè minùs poterit post emissionem: idque magis cum obstructiones accidunt in intimioribus partibus corporis, in glandulis, & in capillaribus arteriis, in quibus nullus pulsus, nullusque nifus, vel saltem debilissimus, & tardissimus, omninò improporcionatus hærenti humori, plerumque etiam tenaci, acido, rebelli, maligno, qui non solum obfistit sanguini circumfluenti, sed quod gravius, eundem inficit, & circumjacentes partes hebetat, & inquinat. Accedit, quòd etiam si per missionem, sanguis, qui in arteriis hæsit, per dimotionem loco moveatur, ille in venas ipsis continuas intrudetur, & vitium in se ipso contractum reliquo sanguini communicabit; undè noxa major; quoniam semper faciliùs vitiabitur exindè bonus, qui superest sanguis, à malo, qui hæsit, licèt modico, quàm malus à bono, in seipsum intrusus, in meliorem statum reduceatur; à privatione enim ad habitum non datur regressus. Si prætereà id quod hæsit, præsertim in magnis vasis, indebitam fermentationem in universo sanguine, adeoque febrim excitet, proculdubiò nequibit missionem auferri, nisi totus sanguis infectus educatur, exemplo vini acescentis. Sed poterit, inquires: ergo non certè, igitur dubitas: Ergo sicuti in bonum, ita & multò magis, in malum cedere poterit; in dubiis autem non licet tam facilè de vita periclitari, præsertim per sanguinis, idest vitalis thesauri detractionem, ne præsertim illud Plinii nobis obiiciatur, *Negotiantur animas nostras, & experimenta per mortes agunt.*

Ambiguitatem auxilii quoque probat, quod à nonnullis subditur, si morbus exigit missionem sanguinis, sed non ejusdem mutationem, prævideri oportere num illa officiat morbo, an secus; & si morbus distributus sit per omnia vasa, an alicui solum parti hæreat; idq; genus alia. Etenim ad hæc prævidenda exquiruntur Vates, qui ariolentur de statu sanguinis, de morbo, de causis, cæterisque morbum comitantibus, ex quibus sanè in re Medica difficultates oriuntur innumerabiles.

Quare licèt, quæ de motu ex Mechanicis deducuntur, verisimilitudinem pariant; in praxim nihilominus medicam translata, non nisi magna cum difficultate, & gravi periculo duci poterunt. Atqui si sanguis in omni morbo salubriter mitti potest, ob innumera, quæ affert beneficia, cur est, quòd prævidentiis istiusmodi indigeamus? proculdubio si minùs uno, saltem altero modo, certò proficiet. At id non ita evenit, nec semper ex voto respondet: ergo dubium. Si dicatur non in omnibus easdem circumstantias debitas inveniri. En denuò ambiguitas, & periculum. Sed & in dijudicandis circumstantiis, & opportunitatibus mittendi, quis ignorat, quàm anxix occurrant difficultates, quoniam conjecturæ, quibus nitimur, fallaces sunt, & innumeris dubietatibus implicitæ. Et licèt medicamenta ad correctionem perturbati sanguinis exhibeantur, quæ fortassè necessaria fuerint præcognita; quis subindè tutus fiet, num illa pro opportunitate in ventriculo mutantur, an potius in malos succos degenerent, & num alios ductus pervadant, quàm quòd necesse est. Neque verò liquida statim, & tutò in alias partes corporis perpetuò fluitant, cum
non

non rarò accidat, ob pravitatem humorum, & ventriculi indispositionem ibidem inverti, & depravari, quandoque etiam concrefcere, & inhærere, aut paulò post per vias urinæ deduci, aut cum fæcibus intestinalibus commisceri.

Quod ulterius afferitur de selectu venarum consentientium cum parte affecta, aut inflammata, veleidem eppositarum, neutiquam deduci poterit in praxim, quando inflammatio est interna: tunc enim trunci venarum consentientes, utpote interni, seligi non possunt, multoties etiam ignorantur, quales sint, neque tam patens, ac perspicuum esse poterit, ubi nam propriè inflammatio contracta sit, ut inde coniecere liceat, quænam possit esse vena consentiens cum parte affecta. Sed & non rarò fit, ut nihil prorsus ex inflammata parte deduci possit, quin potius contra in eandem magis confluat ex venæ sectione commotus, cum ibi sanguis in suo motu præpediatur ob impedimentum inflammationis, & venarum, atque arteriarum angustiam; nisi etiam propter languorem partis inflammatae facilius ibidem deponatur, & hæreat; & si fortassè aliqua portio ejusdem ulterius promoveatur, & effluat, sanè tenuior, serosior, acrior, ac plurimum infecta in alias partes promanabit, non sine totius corporis incommodo. Et dato, quòd sanguis exindè influat in partem laborantem minori quantitate, quàm per oppositam, quo tempore sanguis immittitur, quia tamen subindè velocior redditur motus ejusdem ob usum circulationis, cujus causa, quo sanguis minor quantitate fit, eo celerius commovetur, ad supplendam motus cordis, & vitæ indigentiam, sequitur proindè, ut

paulò post impetuosius ille irruat in partem inflammata, utpotè debiliorem, undè compressio major in eadem. Sed neque tollitur exindè vitium in sanguine introductum, cujus causa hæsit, puta inducti acoris, aut lentoris; quin missio sanguine tenuiori, reliquus crassior, & hærentior remanebit, unde tam inflammatio, quàm febris illam comitans adaugebitur. Difficile insuper admodum est tempus inter noscere, quando ex venis oppositi lateris, & quando lateris ejusdem, missio facienda sit, cum conjecturæ dubiæ semper utrinque sint, unde ignorabitur, num pressio, & contractio potius, quàm expressio, & propulsio sit successura. Accedit, quod per sanguinis detractionem maturatio apostematis, quæ tamdiu desideratur, plurimum impeditur, proindèque recrudescente illo, majus, & periculosius damnum insequetur. Atqui licet rami aliqui venarum consentiant magis cum parte affecta, quia tamen sanguis brevissimo temporis spatio totus circuit, per missionem æqualiter etiam ex toto corpore diminuitur, & quod vitium in ipso est, aut ex parte inflammata contractum, toti pariter corpori communicabit, atque ex reditu per eandem partem inflammata, veluti debiliorem redditam, & fermentanti humori magis subditam gravius inficiet, hebetatis intereà per missionem viribus. Inflammationes prætereà sunt à sanguine hærente in poris partium, vel etiam in glandulis, aut in intertextura earundem non sine vi coagulante illum in apicibus arteriolarum, quæ non pulsant; quamobrem sanguis, qui mittitur à venis sive consentientibus, sive non, nullimodè poterit hærentem

dimovere, nam nifus qui fortè fit, vel concipi potest à sanguine per missionem velociori reddito, fiet primum in ramis venarum cum vena secta consentientium, qui quousque pertingat ad Cor, & arterias, indeque ad illas, quæ inflammatae parti subiiciuntur, vix sensibilis erit, propter virium deperditionem, unde major semper erit resistentia hærentis sanguinis in parte inflammata, quàm nifus ejusdem ex velocitate habita per missionem, & licet inanatur aliquantulum vena inflammatae parti attigua, arteriolæ tamen illæ, & pori partium oppleti, nulla ratione deplebuntur: idque etiam si venæ per circuitum inflammationis sitæ aperiantur, ut promptius, ac proximius inflammata pars inanatur, quoniam non semper ac minuitur quantitas, pari ratione minuitur pressio, & crescit velocitas motus sanguinis, cùm possit id totum impediri à conditione partis inflammatae, & à vitio sanguinis magis, magisque concrefcentis, ut in malignis tumoribus, anthracibus, furunculis, carbunculis, aliisque similibus, in quibus ubi semel nifui sanguinis, & cordis impellentis, necnon pressioni partium circumambientium, quod alicubi hæsit, obstitit, nusquam tractu temporis poterit loco dimoveri, & alio propelli, sed sola maturatione subigi, & evinci; quæ tamen per missionem potius retardatur, & impeditur. Sed & per circuitum partis inflammatae quis unquam ausit sanguinem educere ob periculum mali gravioris, & gangrenæ? Verumtamen si unquam sanguinis missio speranda foret profutura in inflammationibus; planè magis per arterias in partem inflammataam influentes, quàm per refluentes venas esset fa-

cienda, ut minus sanguinis in eadem conflueret, ne scilicet inflammatio mole augeretur: at per eam desinente impulsu in venas necessario, facilè qui in venis adjacentibus est intromissus, subsisteret, nec in superiores venas adigeretur, adeoque facilè posset per moram ibidem concrefcere, & corrumpi, non sine graviore partis inflammatae periculo, quæ per concretionem ejusdem sanguinis gangrenæ subiiceretur, id quod non ita pridem in nobili quodam Viro visum. Verùm Arteriotomia jamdiù è Praxi Medica exulavit ob innumera alia, ac subitanea vitæ pericula.

Quod tandem dicitur sanguinis missionem in omni morbo esse conferentem, sive ad diminuendam sanguinis quantitatem, sive ad velocitatem sanguinis adaugendam, sive ad refrigerandum, & humectandum, sive ad dimovendum, id quod sanguini circumeunti remoram præbet, sive ad quæcumque sanguinis vitia præter naturam inducta removenda, vel corrigenda; planè, si verum, hinc fiet in omni morbo, & quocumque tempore indifferenter administratam, esse perpetuò profuturam, adeoque remedium universale, & indubitatum, quo scilicet juxta corporis laborantis indigentiam si non uno, saltem alio, atque alio modo certò proficiat. At verò id experimentis non cohæret, cum sæpe sæpius officiat, etiam si omnis diligentia in ipsa adhibeatur. Si dicas id evenire, quia non semper inveniuntur illæ circumstantiæ ad missionem rectè peragendam requisitæ, vel ex parte nifus sanguinis, & cordis, vel ex parte adjacentium membrorum coadjuvantium, & comprimentium, vel ex parte resistentiarum, aliorumque: Id planè decernit dubiam illam

illam esse, atque variis difficultatibus implicitam, & nonnisi ambiguis conjecturis innixam, adeoque sub dubio nimis eventu ducendam in usum, quod hic probandum intendebatur.

Sed & consideratione quoque dignum, arbitror non esse prætereundum, quàm facilè nunc sit factum, ut Mechanicam corporis constructionem unusquisque sibi talem fingat, qualem ex arbitrio præconceperat, ut proinde super una, eademque re tot, tantæque, inter se plurimum differentes, audiantur meditationes, immò in ipsismet partium, & viscerum sectionibus, discordes nimium opinionationes, & sententiarum varietates, adeò ut quæ unus affirmat, alter neget, & quos meatus, poros, fibras, glandulas hic statuit, immò pluries observasse testatur, alter ex adverso implexus alios, penitusque diversos, & contrarios refert; quin & pro certò nonnulli stabilire conantur, itaque structuras partium omninò differentes, & non rarò etiam è diametro oppositas constituunt; unde postmodum origines, nexus, communiones, tendentiæ, influxus, refluxus, & usus earumdem omninò varii, & vicissim contradicentes decernuntur. Hinc suspicari fas est non procul abesse, ut quæ hætenus tam improbo labore, ac solerti industria, etiam in rebus minutissimis pervestigandis, à Recentioribus Anatomicis in publicum sunt pro certis prodita, sint brevissimè penitus ruitura, vel in contrarios usus extorquenda. Atqui, si unquam debeant in minutissimis hisce rebus firmiora corporis humani fundamenta stabiliri, pro Mechanicis ejusdem operationibus enucleandis, quis planè ex adverso inficiari verebitur, quòd alia quam-

plurima, & innumerabilia ferè minutiora corpuscula, inconspicuique ductus, exilissimæque glandulæ corporibus insint, quæ adusque latere, attamen Mechanicam hanc corporis Oeconomiam regunt, & conservant, sintque fortè fortuna in posterum patefacienda? cùm jam satis superque fuerimus edocti, non omnia simul Naturæ Authorem Deum voluisse humanis ingeniis patefacere, ac præmonstrare, & qui *mundum tradidit disputationi hominum, ut in suis operibus occu-*

Ecclesiæ.
3. & 8.

parentur, sed nunquam inveniant, successoribus nostris ad aliud tempus esse ostensurum.

Quare quæ, & qualis revera sit completa humani corporis fabrica, & œconomica compages, semper semperque in posterum ambigere erit, ut nec post mille sæcula sciatur exactè. Quæ prætereà detectæ de his observationes, ac ope microscopiorum, peractæ, referuntur, quæque videntur plurimum ponderis exco- gitatis istiusmodi superaddere, suspectæ nimium sunt, etenim ab his non leves fallaciæ exoriuntur, pro lentium eorumdem varia figura (si quæ fieri possint) majori, vel minori convexitate, aut concavitate; siquidem ad harum diversitatem variant admodum inter sese representationes, apparitionesque rerum, tum in magnitudine, tum in figura, tum in situ, tum in coloribus, cæterisque, ut propterea ipsis non omninò fidendum sit, cùm facillimè decipiant, & sensibus nostris imponant: nam vel moles, & magnitudo illa taliter figurata, & circumscripta, reverà talis, ac tanta est, qualis, ac quanta microscopiis spectatur, & ita nos in cunctis rebus dijudicandis per naturales sensus hallucinari dicemur, cùm tales, ac tantæ nostris sen-

fibis non appareant; adeoque fatendum esset, Naturam ipsam nimium defecisse in animalium, & præsertim hominis creatione, qui artis beneficio, per conspicienda, & microscopia, egeat, ut ad amussim de reliquis corporibus dijudicet, tum in magnitudine, tum in figura; Vel contra moles, & amplitudo illa rerum per microscopia apparens, & fictitia est, & jam exinde affirmabimus ejusmodi apparentiis non esse fidendum: & quidem ita putandum; siquidem apparens illa quantitas ope microscopiorum adaugetur, si re ipsa talis fieret, amplius spatium pariter exigeret, quod sane nullum per ejusmodi apparentias progigni potest, cum & ex altero capite omne spatium sit jam occupatum. Sed & magnitudo ipsa apparens fallax etiam est; siquidem uno microscopio minor videtur, altero major pro varietate, & multiplicatione lentium, & eò magis si in ipsis figuræ haberentur ellipticæ, parabolicæ, aut hyperbolicæ, perimetri latioris, aut angustioris, quibus etiam colores multi, & varii, instar Iridis apparerent. Quòd si dicatur nil per ipsa revera adaugeri, aut in figura mutari, sed tantummodò apparenter talia fieri, ac videri, planè concludendum sensus nostros in iis decipi, & plurimum hallucinari; ut propterea sicut major illa quantitas re ipsa nulla est, ita vacuitates, meatus, pori, & reliqua per microscopium visa, apparentia solum esse, sed revera nulla ibidem inexistere.

Non dissimiliter de sinapismis, phœnigmis, cauteriis, cæterisque stimulis, motum in liquidis corporum, & succorum expressionem, evacuationemque promoventibus, putandum, quòd scilicet illa iisdem

ambiguitatibus sint implexa, cum nec dum benè pateat, num illa re ipsa detrahant, an aliquid potius in corpus immittant, adeoque alterent, perturbent, depravent, ac scindant quidquid glandulis, & cute subest, aut quòd vasa lymphica, nervea, & sanguifera permeat: num etiam stimulas partes contrahant, & corrugent, vel potius delaxent, inficiant, & corrumpant; siquidem ab aliquibus densatio, & eschara ab aliis pororum obstructio; ex aliis diffractio, & laxitas; à nonnullis cutis elatio, tumefactio, rubificatio; ab aliis stupefactio, frigefactio, mortificatio, idque genus alia exoriuntur. Sed & non raro tantum abest, ut à stimulis istiusmodi citatior motus fiat in humoribus, ut potius illi in parte stimolata concrecant, & hereant, veluti in tumoribus, gangrænis, & membrorum inustionibus. Per id ipsum quoque, quòd varia, & multiplicia beneficia hæc corporibus male affectis afferre dicuntur, dubia, & suspecta fiunt; cum fortasse id applicata peragant, quod minimè desideratur, & utile non est: Illud namque remedium tutum, & salutare solummodò putandum, quod id dumtaxat agit, quod prodest; & agere natura aptum est: cum autem varium est, & in operando multiplex creditum, ex illa eadem varietate periculosum, & nocuum plerumque fit; quàm obrem à peritioribus tutiora semper sunt habita, quæ specifica nuncupantur, atque ad unum solummodò opus addicta. Cæterum de vesicantibus, cauteriis, ustionibus alibi à nobis fusiùs actum est.

Innumera propemodum alia in hanc rem afferri possent difficultates, sed satis sit has breviter præmonstrasse, ut incertitudinem, nimiamque dubietatem istius magni-

& in-

& ingentis auxilii in Medicina faci-
cienda, putati, cognitam faciant;
cautosque reddant Medicos, ne tam
fidenter à concredito Mechanices
sustentaculo, illi in curandis ægro-
tantibus incumbant: Etenim ab his
tam dubiis, & opinabilibus solum,
quid unquam certi poterit universa-
liter concludi, quemadmodum ex
Mechanicis proponitur sperandum,
immò evictum, stabilitum, ac de-
terminatum? Hæc planè omnia du-
bia sunt, ut & quæcumque alia in
Re Physico-Medica. Sed quid in his
diutius immoror? Res Medica, ut
& Philosophica, atque Anatomica
quæcumque, eo nunc devenit, ut
post tot, tantaque magnorum Viro-
rum excogitata, adinventæ, & com-
muni omnium plausu probata, ac
recepta, magis adhuc jam claudi-
cet, tam sunt ista à nuperrimis Pro-
fessoribus excussa, quassa, inversa,
& præsertim, quæ hætenus summa
industria, ingentique labore à Bar-
tholino, Vvillisio, Malpighio, Bel-
lini, cæterisque, in opem Medicam
invecta erant.

Pro coronide adiicere juvat, quod
in Philosophia Burgundica to. 3. Phy-

sica Generalis tract. 2. disp. 1. qu. 1.
concl. 1. dicitur: *Corporis Mathe-*
matici notione, tanquam physici,
plerique abutuntur. Id enim sefellit
Cartesium Geometrie assuetum,
quod res physicas, more mathemati-
corum, consideraverit; cum cor-
pus physicum sit actuosum, & prin-
cipium motus, non item Mathe-
maticum. Et in Thesis, ex Universa
Philosophia, in Regia Burgundia
propugnatis, Quarta hæc ex Physi-
cis fuit apposita: *Principia rerum*
Mechanica, ut minimè sunt conte-
mnenda, sic nec prima dici possunt,
nec viventium conformationi, &
functionibus explicandis sola suffi-
ciunt. Quamobrem jure optimo
Simplicius vetustissimus Aristotelis
Interpres, in 3. de Anima, Geome-
triam, ut & cæteras Mathematicas,
abdicandas à Philosophia censuit.
Postremò concludamus cum Eccle-
siaste Cap. 8. *Intellexi, quod omnium*
operum Dei nullam possit homo in-
venire rationem eorum, quæ fiunt
sub sole, & quanto plus laboraverit
ad querendum, tanto minùs inve-
niet, etiamsi dixerit sapiens se nos-
se, non poterit reperire.



LUCAE TOZZI

In Quintum librum Aphorismorum

HIPPOCRATIS COMMENTARIA.

APHORISMUS PRIMUS.

Convulsio ex elleboro lethalis est.



Libi, *Aphorismo* xvi. *Quarti*, dixerat Hippocrates, elleborum facere convulsionem: Nunc convulsionem ex ipso

inductam lethalem esse pronunciat.

An autem de albo, vel de nigro intelligat, dubitari primum hoc loco potest. At si in memoriam revocentur ea, quæ ab eodem pluribus Aphorismis scripta sunt *eodem lib. 4.* sanè afferere non dubitabimus de albo elleboro esse intelligendum, quemadmodum fatetur etiam Gal. *in comm.* tum quia ejus usus præ cæteris apud Veteres erat frequentissimus; tum quia de eo expressè meminit cit. *lib. 4. Aphor. tex. 13. 14. 15. & 16.* ubi, cum de elleboro ad vomitum inferendum verba fecerit, non nisi album intellexit; quippè albus fursùm movet, deorsùm niger: tum etiam quia convulsio, quæ hic ab usu ellebori notatur, facilius ex albo, difficilius ex nigro contingere solet.

Afferit autem convulsionem elleborus albus, non tam evacuatione per vomitum excitata, quàm irri-

tatione, punctioneque nervis per stomachum dispersis, inducta, ob illius acritatem nervorum fibris insensissimam. At si prætereà hypercatharsim promoveat, quia tunc præter evacuationem humorum in ventriculi cavum derivantium, etiam exsolutionem roridæ substantiæ, & liquoris nervorum, non sine eorumdem molestia inferet, convulsionem longè facilius succedentem excitabit.

Sed an reverà convulsio, quæ retractio est nervorum, & musculorum ad propria capita, an potius motus convulsivus, ex elleboro immoderatam evacuationem promovente, subsequatur, adhuc subdubitare est. Et licet ferè communiter ab expositoribus de convulsione propriè dicta aphorismus exponatur, cum in Græco Codice *σπασμὸς* scriptus sit; videtur tamen dicendum, incipere primum motum convulsivum, seu convulsionis prodromum, subsequi verò convulsionem. Etenim inverisimile videtur posse tam subito convulsionem exoriri ex vomitionibus ab usu ellebori, cum non statim nervi, & musculi contrahantur, & contracti remaneant, nisi postquam iteratis motibus convulsivis fuerint irritati, concussi, ac tandem obrigefacti. Crediderim ea propter ab usu ellebori motus con-

vul-

vulsivos, seu inæquales, irregularesque contractiones primùm inferri, mox verò, nisi opportunis remediis occurratur, aut compunctio nervorum sedetur, exoriri convulsionem; quemadmodùm aliquando meminime observasse ab hypercatharsi virulenti cujusdam medicamenti purgantis; & aliàs ab importuno usu pulveris Algorethici, seu mercurii vitæ dicti, ex quibus primùm motus convulsivi, postmodùm re ipsa convulsiones subortæ sunt. Id ipsum etiam expertum non semel est in his, qui venenum assumpserunt, præsertim Mercurium sublimatum, aut Arsenicum; nam cum præirritamento vomitus foret excitatus, motus convulsivi, non vera convulsio inducta est. Hoc idem observare est in singultu, qui ad motus quoque convulsivos refertur: quin & singultus sæpè sæpiùs fit à re stomachum vellicante, unde non convulsio, sed motus convulsivus insequitur. Verumtamen cum diutius isti perduraverint, in veram denique convulsionem definere solent, quemadmodùm in epilepsia, quæ non rarò transit in apoplexiam, vel commutatur in convulsionem; unde tandem exitium.

Sed quod Hippocrates de elleboro scribit, an dici quoque possit de cæteris catharticiis tum per superiora, tum per inferiora plus justo momentibus, in controversiam revocari potest: & dicendum Hippocratem ellebori, loco exempli, meminisse, adedque id ipsum referri quoque posse ad cætera pharmaca, si modum exceßerint, & hypercatharsim promoverint. Nam quæcumque possunt roridam nervorum substantiam extenuare, & eorumdem fibras laceßere, irritare, & extorquere, poterunt quoque motus con-

vulsivos, & convulsiones ipsas parere. Quin & humores ipsi præter naturam affecti, ac maligni, deleteriique reddituri id ipsum possunt excitare, quemadmodùm Galenus in *somm.* refert de eo, qui humorem æruginosum evomens, toto corpore convulsus est; illo autem excreto, & penitus educto, à convulsione liber evasit. Itaque etsi Hippocrates convulsionem ex elleboro lethalem dixerit, non tamen ex cæteris catharticiis inductam exemptam ab hoc eodem periculo putavit, ut idem habet 7. *aphor. text.* 25. cætera cum paria esse possint; potissimum autem cum ob sui acritatem, ac vehementiam, præter dejectionem, vomitum etiam exciterint, quippè per vomitum plurimum stomachus laceßitur, ubi nervi plurimi in consensum quoque spinam, & cerebrum contrahunt.

Cur autem omninò lethalis dicatur ex elleboro convulsio, non æquè apud omnes convenit. Galenus, & cæteri Expositores ad siccitatem in nervis inductam ex immodica inanitione causam retulere. Nam cum convulsio ab eodem Hippocrate dicatur vel inanitione, vel repletionem fieri, curabilem fore illam existimarunt, quæ ex repletionem est, incurabilem verò, & penitus mortalem, quæ ab inanitione. Attamen cum non adeò facile sit tantam siccitatem in nervis excitari, quanta satis sit ad vitam destruendam, cum alioqui toto corpore tabefacti, & marasmo affecti, licet summò perè extenuati, non tamen in convulsionem incidant. Hinc probabiliùs creditum, eam, quæ ex repletionem fit, convulsionem, faciliùs sanari, quia nervorum fibræ ab humore quodammodò crassescunt, & tumescunt; quæ verò ex inanitione fieri dicitur, cum

cum ab acritate, & virulentia succorum, nervorum fibræ contorqueantur, & obrigescant, nec tam facile in pristinum statum restitui possunt; sed læsione cerebri medullæ communicata, talis noxa inducitur, quæ à compage, & naturali constitutione cerebrum ipsum deturbet, proinde fieri, ut illa insanabilis evadat; cum & difficillimum sit dissolutum erveum liquorem restituere, & fibras convulsione distortas, ac retractas denuò mollicicare, atque in naturalem statum restituere. Verum, quoniam usus ellebori albi apud nos jam exolevit, & cathartica quæcumque tam bene ope chymica corriguntur, ut omne virulentum exuant, immò & ista rarenter ducantur in usum, ejusmodi incommoda nulla fiunt, nec ullatenus formidanda. Cæterum si unquam id accideret, remediis oppugnandum foret sistentibus hypercatharsim, humefacientibus, & retundentibus acritatem, atque postremò vomitum sedantibus, de quare actum à nobis est in expositione Aphorismi I 6. libri iv.

APHORISMUS II.

Convulsio ex vulnere lethalis est.

QUOD de convulsione ab assumpto elleboro præcedenti aphorismo dixerat, nunc de eadem ex vulnere subjungit. Et quidem pariratione, ac antea est animadvertum, dicendum hic etiam, ex vulnere eam non rarò subsequi post iteratos motus convulsivos. Contingit autem sæpenuerò convulsio ex vulnere, vel ob vulneratam partem nervis plurimis contextam, quemadmodum in spina, in membranis, in musculis, & tendinibus eo-

rundem; vel ob ingentem inflammationem vulneratæ parti supervenientem; vel ob indebitam acrium, & irritantium medicamentorum applicationem, quemadmodum aliquando memini me observasse ex importuna trochiscorum de minio in partem vulneratam immisione.

Sed & sæpissimè quoque accidit sine ulla evidenti causa vulneratam partem subire convulsionem, immò & alias quoque partes in consensum trahere, ob solam nervi punctiōnem: ea enim est nervorum conditio, ut cæsi, atque omninò resecti minùs periculi afferant, puncti verò sæpissimè exitium inferant irreparabile: quod & notatum à Galeno lib. *Artis medicæ*; siquidem cæsi, & resecti nervi æqualiter in suis fibris coafficiuntur, & commodè per convenientia medicamenta conglutinantur; at verò punctis non æquè fibras affici contingit, undè fit, ut illarum aliquæ retrahantur, aliæ resolvantur, ideòque inæqualiter in se ipsis contorqueantur. Hinc consueverunt peritiores Chirurghi ad inhibendam ejusmodi inæqualem nervearum fibrarum commotionem, punctum nervum penitus rescindere, ac resecare.

Quoniam verò convulsio ex vulnere orta arguit ingentem nervorum læsionem, ob quam etiam cerebri medullæ coafficiatur, idcirco fit, ut lethalis evadat: Cerebri enim læsiones potissimùm in medullæ, atque in nervorum originem inflictæ periculosa perpetuò sunt, & sæpissimè in mortem desinunt, dissipatis subindè spiritibus, & rorida nervorum substantia, vel corrupta, vel exsoluta: atqui etiam constat Anatome, cor pariter ejuscemodi spiritibus egere, ut suum motum,

motum, & vitam tueatur: deficiente autem cordis motu, vita ipsa definit.

At quæri hîc potest, num etiam ex ulcere convulsio lethalis sit. Et dicendum sæpissimè quoque fuisse observatam exitialem, an quia inflammatio ibidem suborta est, & non raro cum gangræna, & sphacelo; an etiam quia sanies ex ulcere prodiens tantam aliquando acquirit pravitatem, ut sive halitibus, sive continuata per partes virulentia, cerebrum, cerebrique functiones deturpet, unde postmodum animales, & vitales operationes læsæ consequantur. Verumtamen est, quòd non semper convulsiones ex ulcere inductæ lethum afferunt, potissimum cum ejusmodi sunt, ut à sorditie ulceris proficiantur; etenim absterfis sordibus, & ulcere mundificato, facile solet convulsio desinere. Expertum quoque est, convulsionem ex punctura nervorum desisse, ad motis medicamentis motum illum fibrarum inæqualem sedantibus; quemadmodum ab usu olei terebinthinæ. Id ipsum dicendum in convulsione ex ictu, contusione, hæmorrhagia, aliisque, quoniam ad motis remediis, quæ contusioni, aut hæmorrhagiæ opitulantur, solet statim convulsio desinere, nisi tamen talem illa fecerit in nervis, & cerebro impressionem, ut non tam facile sit emendabilis. Sic quoque pro partium vulneratarum varietate, varius quoque esse solet eventus, cum aliqua facilius, aliæ difficilius restituantur. Quandoque etiam loco convulsionis accidit resolutio, quæ comparata ad convulsionem, minoris solet esse periculi. Cæterum quæ his conferunt, petenda erunt à Chirurgis, qui fusè nimis de his agunt.

APHORISMUS III.

Ubi sanguis plurimus fluxerit, singultus, aut convulsio superveniens, malum.

UBi antea lethale dixit, hîc malum dumtaxat pronunciat Hippocrates. Neque verò malum cum lethale confundit, quemadmodum existimat Galenus in comm. nam non adeò funestus est exitus ex convulsione, aut singultu ab hæmorrhagia, uti ex convulsione ab elleboro, & vulnere. Visum enim pluries est ab his ægrotantes convulsi, ab illis verò rarerè admodum, vel nunquam. Attamen levis momenti negotium putandum est, cum non solum ob convulsionem, & singultum, vitæ periculum involvat, sed, quod gravius, ab immoderato sanguinis fluxu, cum hîc vitæ thesaurus sit, quo exhausto vita ipsa deficit.

Quoniam verò Hippocrates indefinitè dixit, ubi sanguis immodicè fluxerit, neque locum exitus sanguinei determinaverit, proculdubio intelligendus ille erit de sanguinis evacuatione undecumque contingat. Quare sive ex ore, naribus, & partibus supernis, sive ex alvo, viis urinæ, aliisque partibus infernis prodeat, semper ac singultus, aut convulsio succedat, vitæ periculum minabitur: quamquam coherentè Aphorismo præcedenti, manans solum ex vulnere à quibusdam exponi soleat.

At qua de causa periclitentur ægrotantes ex singultu, aut convulsione post immodicam sanguinis profusionem; & undè contingat singultum, aut convulsionem oriri ex immoderato sanguinis fluxu, gravis est hujus loci difficultas. Omnes In-

terpretes cum Galeno utriusque causam referunt ad immodicam ipsam sanguinis evacuationem, per quam nervi, & muscoli inaniti, & exsiccati contrahantur. Verum qui convulsionem non nisi à causa irritante progenitam admittunt, non bene his conveniunt, neque ad solam causam inanitionis illam referunt, & eo magis, quia præter convulsionem, singultum quoque hic memoraverit Hippocrates: modò cum singultus ventriculi læsionem arguat, & hic non tam facile ab ejusmodi inanitione afficiatur, propterea fit, ut ad aliam causam confugere sit necesse, ut ratio scilicet utriusque probabilior eluceat. Crediderime apud propter convulsionem, & singultum, non propriè oriri ex ipsa sanguinis evacuatione, sed consequi antecedentem illam causam, quæ talem, ac tantam evacuationem promoverit. Cum enim sanguis è suis vasis non profiliat, nisi post contractam acritatem, venenatamque conditionem valentem erodere, & referare vasa, sanè quæ in causa est, ut sanguis prodeat, erit quoque, ut nervorum fibræ proritentur, & convellantur; atque in ventriculo singultus concitetur: postquam enim sanguinem infecerit, etiam nervos, & nervorum liquorem depravat, undè postmodum convulsio, aut singultus. Vitium autem sanguini illatum acorem plerumque refert, qualis in aqua stygia: at verò ab acidis facile nervi proritantur, & convellantur, atque eo magis, magisque, quo per hæmorrhagiam citatior fit sanguinis motus, & acidum oberrans impetuosius furit, & quoquo versum irruiat. Non est autem necesse, ut junctim convulsio, & singultus immoderatam sanguinis evacuationem consequantur; sed satis est, si

alteruter contingat; etenim pro majori, vel minori hujus, vel alterius partis affectione, modò una, modò altera convellitur; atqui convulsio ventriculo contingens, singultum parit: Quin apud plerosque contriverti solet, num singultus ad ventriculum, an verò ad septum transversum potius referri debeat, ob fibrarum communem utriusque texturam; quamobrem si ventriculi revera affectio sit, difficultatem omnem elidet, ut propterea convulsio, quæ musculorum ægrotudo est, ad ventriculum referri non possit per singultum, cum ventriculus musculosa pars non sit. Verum etsi ventriculus propriè ad musculos non referatur, fibris tamen carneis est intertextus, quemadmodum plerisque Anatomicis est animadversum.

Sed quamvis ad sanguinis acritatem, convulsionem, ac singultum ex immodica sanguinis evacuatione proveniente retulerimus, subest nihilominus alia causa, ob quam nervorum principium ab istiusmodi evacuatione coafficiatur: quippè ubi sanguis plurimus profusus est, nervorum liquor fatiscit, & rorida illa substantia, qua eorundem fibræ irrorantur in statu sano, ex non suggesta materia à sanguinis glutine dependente, facillimè contorquentur; & eo magis quo partes sanguinis aciores redditæ sint, ut dictum.

APHORISMUS IV.

Ex nimia purgatione, convulsio, aut singultus superveniens, malum.

Hoc alio Aphorismo Hippocrates generaliori sententia, quod

quod de evacuationibus ab uno, vel alio medicamento genere promotis retulerat, ex quacumque evacuatione immoderata edocet, ut propterea videatur præcedentium aphorismorum ratio, & causarum inferentium convulsionem epilogus, & corollarium. Quoties enim ex nimia purgatione convulsio, aut singultus accidit, semper arguitur interna aliqua causa nervos, & nervorum principium afficiens, ita ut quæ nimiam evacuationem promoverit, eadem convulsionem, & singultum afferat, & sive evacuatio sponte naturæ suborta sit, sive à cathartico vehementi sit excitata. Quoniam verò dixit ex nimia purgatione, indicare videtur non quamcumque evacuationem, ex quibusvis ductibus corporis habitam, sed tantummodò per alvum, & intestina; etenim usus est voce græca, καὶ διάρρηξις, quæ propriè alvi dejectionem significat. Attamen visum aliquando est ex mictu sanguineo à cantharidibus excitato, motus convulsivos prodiisse. Verùm facilius, frequentiusque contingunt convulsiones ex superpurgatione, quam ex alia quacumque evacuatione; immò singultus, qui ad ventriculum pertinet, non nisi ab immodica evacuatione per alvum oriri potest, ob communem nervorum, & membranarum texturam. Sed & non rarò sanguis ipse ex hypercatharsi funditur, & eliquatur; undè postmodum, præter virium jacturam, fit quædam acritas in omnibus humoribus à sanguine procedentibus, quæ convulsionis causa est, ut antea dictum. At verò ex cunctis partibus corporis magis afficitur ventriculus, & cerebrum; Ventriculus quidem ab acri cathartico, ejusque immoderata evacuatione: Ce-

rebrum verò ob peculiarem sui imbecillitatem, & succi nervicei exhaustionem, undè postmodum singultus ex uno, convulsio ex altero oriatur.

APHORISMUS V.

Si ebrius quispiam repente obmutuerit, convulsus moritur, nisi febre corripiatur: aut ubi ad horam pervenerit, qua solvuntur crapule, vocem recuperet.

INter cæteras causas convulsionem inferre valentes, recenset speciatim hoc loco Hippocrates ebrietatem, per quam cerebrum, & nervi proximè affecti soporantur, cum omnibus notum sit exindè cerebrum vacillare, & corpus universum in sensu, motuque animali vehementer offendi.

Quamvis autem ebrios hic memoret, non tamen explicat, undè ebrietas ipsa contingat, nam licet plerumque ex immodico usu vini illa oriatur, passim tamen eandem fieri experimur ab aliis liquoribus in fermentationem adactis, quemadmodum de cerevisia satis notum est, itemque de succis fructuum, præsertim Dactylorum, Fragorum, Pomorum, facile fermentescentium. Aliquando etiam observatum, ab immodico usu lactis, potissimum acescentis, inductum fuisse soporem; quin & non aliundè fit, cur pueri lactentes faciliè in somnum delabantur. Quamobrem crediderim, Hippocratem consultò tacuisse liquoris potionem, sed indefinite ebrietatem undecumque provenientem, referre voluisse, modò talis sit, ut aphoniam, ac deindè convulsionem pariat. Sed ne dum ex assumptis liquoribus, verum etiam

ex plerisque vaporibus, halitibus, benè, vel malè olentibus, ebriorum ad instar, somnum induci posse compertum est; sic plerique memorantur ex moscho, ambra, croco; alii ex peto, carbonibus; alii aqua ardente, similique spiritu soporati. Idipsum ex cellis vinariis, ex mephitibus, fodinis, crypta Angujana propè Puteolos, aliisque, ut cunctis notum, observatur. Quare quæcumque possunt nimia, ac subita evaporatione cerebrum gravare, aut excursiones spirituum, & roridæ cerebri substantiæ irrigationem intercipere, poterunt quoque soporem, & aphoniam inferre. At quamvis hæc ita sint, specialius videtur hic intelligendus Hippocrates de ebrietate ab epotis liquoribus induta, potissimum autem à vino, eoque meraco, cujus usubibaces Græci sæpè sæpius nedum ebrii, sed etiam convulsi supremum diem obire consueverant; undè deductum videtur verbum illud *græcari*, & *pergræcari*, hoc est Græcorum more bibere. Cùm igitur ex ejusmodi ebrietate repentina contingit aphoniam, edocet Hippocrates futuram paulò post convulsionem, ut proindè ebrius aphonus, non apoplecticus, sed convulsus moriatur.

At qua de causa convulsio ebrietatem subsequatur, si illa aphoniam attulerit, non est levis momenti difficultas, & quamvis veteres omnes Interpretes cum Galeno ad vim vini, conditionemque retulerint, quippe illud cerebro infensum dicitur, non tamen benè evinci potest, quamobrem soporem, & aphoniam inferat, attentè præsertim vini natura, quæ calida à Galeno, cæterisque ponitur. Quò fortassè respiciens idem Galenus 2. *de causis morborum*, ut hanc difficultatem solveret, scri-

psit, vinum moderatè sumptum naturalem calorem augere posse, immoderatiùs verò potatum, frigidus morbos excitare. Et 3. *de Temperam. cap. 3.* subdit, non semper illud calefacere, sed ubi plus fuerit epotum, quàm evinci possit à calore naturali, frigidus morbos gignere, puta apoplexiam, carum, convulsionem, & tetanum. Verumtamen neque his satisfacit difficultati propositæ; nam si moderatè sumptum calefacit, certè à fortiori magis calefaciet immodicè potatum. Sunt etiam, qui solo ejusdem odore inebrientur: sunt & alii, qui ex ejusdem usu immoderato vigilant, febri-citent, ac delirent, ut propterea non perpetuò verum sit vinum refrigerare, atque adeò soporem inferre. Sed etsi vinum immoderatiùs epotum sopores afferat, maleficio vaporum cerebrum occupantium, & gravantium, cur est, quod convulsionem etiam afferat, & motus convulsivos, qui non sine acritate, & vellicatione contingunt; quin & plerique per ebrietatem fiunt phreneticis similes, ac delirantes, quousque vinum edormierint, quemadmodum testatur de suis popularibus Hollerius hic.

Probabilius ea propter dicendum vinum, cæterosq; liquores ad caput facile effumantes, fermentatione indebita in ventriculo promota, a-
corem talem, ac tantum contrahere sulfureo-narcoticum, ut halitus, ac vapores illuc pertingentes, non solum cerebrum, ejusque roridam substantiam infarciant, & obtundant, verum etiam figant, hebetent, ac stupefaciant, unde primùm aphoniam; siquidem rectè Seneca *Epist. 83.* vinum opio, eleboro, & veneno comparat, quòd
nimirum mortiferum, somniferum-

Vide etiam Pl.
lib. 4. c. 5.

que

que sit. Et Lucretius *lib. 3. de Natura rerum*.

.....*Cum vini vis penetravit
Acris, & in venas discessit di-
ditus ardor:*

*Consequitur gravitas membro-
rum, præpediuntur*

*Crura vacillanti, tardescit lin-
gua, madet mens,*

*Nant oculi, clamor, singultus,
iurgia gliscunt.*

Et quoniam per ejusmodi acorem fibræ nervorum vellicantur, & compunguntur, propterea fit, ut post aphoniam convulsio subsequatur, qua nervi ad suum principium retrahuntur, idque speciatim facta transpositione in nervos, & musculos subjectos, potissimum cervicis, & spinæ, veletiam labiorum, & mandibularum, ut in spasmo Cy-
4. tusc. nico. Testatur autem Cicero eos, qui reliquis potionibus inebriandi vim habentibus replentur, in omnem partem, & in dextram, & in sinistram, & pronos, & supinos cadere, qui verò sunt vino inebriati, retrorsum solum, atque supinos decumbere: nervis scilicet per cerebellum præcipue ad cervicem, & spinam pertinentibus affectis. Accidit itaque aphonía, seu vocis privatio, quoniam nervi potissimum vocales afficiuntur, qui per guttur, & fauces, aliasque partes circumjacentes diffunduntur, unde etiam lingua in suis musculis, & nervis offenditur. Et quamvis aphonía proximè accedat ad apoplexiam, non tamen omninò cum illa confundi debet; etenim per apoplexiam respiratio graviter læditur; at verò per aphoniam illæsa illa remanet, offensis dumtaxat musculis, & nervis vocalibus: Sed & apoplexia desinere solet in paraly-

Tozzi Op. Med. Tomo IV.

sim; aphonía verò potius in convulsionem. Adnotat autem Hippocrates in tex. repentinam obmutescentiam, siquidem ista omninò morbosa est, & convulsionis prodroma: nam si fortassè sensim ebrius obmutesceret per soporem, qui ex ebrietate plerumque contingit, certè in convulsionem non desineret. At verò cum repentè obmutescit, convulsus moritur: significatur etenim vitium tale ex ebrietate cerebro, cerebrique medulla fuisse illatum, ut spiritus animales, & roridam nervorum substantiam violenter admodum figat, atque coarctet, ut propterea fibræ nervorum postmodum contrahantur, & convulsione fatiscant ab acore eorundem vaporum: quippè partes vini acriores in nervorum substantiam repunt, & contorquendo fibras convellunt. Accescere autem in his vinum ostendunt ructus, & vomitus plerumque ab ebrietate evenientes; ex acore verò nervorum, membranarumque fibris inducto caput vacillat, trepidant artus, oculi rubent, & coarctantur, pupilla constringitur, lingua contrahitur, & titubat. Sed & spiritus ipse è vino elicitus ope destillationis, acidus in se continet particulas, quibus corrugandi, atque roborandi vi pollet; unde vulneratis partibus ad motus nedum sanguinem sistit, sed & fibras discissas conglutinat, suppurationem prohibet, ac tandem vulnera ad certam, tutamque cicatricem perducit.

Hanc autem lethalem ex ebrietate convulsionem sola febris prævertere potest: quippe per eam facillimè, atque citissimè dissolvitur quidquid in nervis, ac musculis coagulatione concretum est. Hinc idem Hippocrates pluries etiam advertit, tum in Aphorismis, tum in

C

Coacis

Coacis prænotationibus, convulsionem superveniente febre desinere, ut & nos aliàs adnotavimus. Debet autem febris superveniens non omninò levis esse, sed aliquam præferre magnitudinem, qua possit compactam in nervis materiam a core vitiosam dissolvere, immò etiam per sudorem, aut urinam expellere. Verùm non dixit Hippocrates omninò per febrem convulsus ex ebrietate convalescere, sed dumtaxat non ex convulsione perire: fieri enim potest, ut adhuc per febrim intereat nulla adhuc convulsione detentus; siquidem si febris talis sit, quæ causam convellendi deprimat, neque vitium aliud in cæteris humoribus præsupponat, proculdubiò & convulsionem tollet, & ebrium in pristinum salutis statum revocabit. Si verò febris superveniens ex malo fortassè corporis apparatu alios humores inficiat, & alia insuper pariat symptomata, etsi convulsionem auferat, poterit ex alio capite mortem inferre, cum acidi, vitiosique succi convulsionem afferentes, in alias partes delati, benè possint febrem mali moris excitare. Itaque conferet febris superviens convulsioni, sed nihilominus poterit ex alio capite nocere. Et quidem plurimùm verendum, si febris, quæ supervenerit, intrà triduum, vel quatrimum ad summum non contulerit, nec intrà idem tempus desierit, quemadmodùm idem Hippocrates admonuit in *Coacis prænotationibus*.

Adjecit Hippocrates in aphorismo, posse convulsionem ex ebrietate inductam amoveri ex spontanea ebrietatis solutione; undè inquit: *aut ubi ad horam pervenerit, qua crapula solvuntur, vocem recuperet*. Quamobrem etsi febris nulla su-

perveniat, si tamen per id temporis, quo crapulæ solvi solent, loquela restituatur, convulsus ex ebrietate convalescet. Hinc notare est, convulsionem non statim supervenire aphonix ex ebrietate, sed post aliquot horas, aut etiam dies integros: nam tunc affectio in nervis, & cerebro firmiter hærens designatur, quam nullatenus potuerit Natura vincere, & debellare. Quantum autem temporis videatur posse exigi ad ebrietatis solutionem, dubium esse potest hoc loco. Et quamvis Galenus in *comm.* pro vini conditione, & corporum affectorum habitudine, aliquos dicat postridiè, alios sequenti die, alios etiam tertio ex ebrietate resipuisse; id tamen fortassè verum in vino potentiori, crassiorique, quod fortassè sua tempestate erat in usu; at verò ex usu adhuc immoderato nostratium vinorum nunquam non ante unum diem crapula soluta visa est, fortè quia nostratia vina non tam crassiora sunt; neque tam difficilis dissolutionis: quamquam non his assueta corpora gravius subindè afficiantur, quemadmodùm experimur in Teutonicis, cæterisque Septentrionalibus. Conducit in hoc idem varia corporis textura: nam pueri, feminae, debile caput habentes, & quicumque sunt texturæ mollioris, rariorisque, facillimè ebrietatem incurrunt, etiam ex usu vini levioris, cum contra, texturam nacti duriorum, exercitati, assueti, merum etsi biberint, difficiliùs inebrientur.

Qua autem ratione his succurrendum sit, ne in convulsionem incendant, & ex ebrietate liberati vocem recuperent, scitè quidem edocet Hippocrates 2. *de morb.* ubi hanc eandem sententiam repetens, sic inquit:

quit: *Si quis ex ebrietate voce pri-
vetur, & statim sanè ipsum febris
corripiat, sanus fit, si verò non cor-
ripuerit, die tertia moritur. Si itaq;
in sic affectum incideris, multa cali-
da lavato, & spongiis calida aqua
madefactas capiti apponito, & cepas
decorticatas in nares indito. Siqui-
dem si apertis oculis loquatur, & ad
se redeat, nec deliret, hac die sopore
pressus jacet, postridie sanus exur-
get; si verò surgens bilem vomuerit,
insanit, & moritur, maximè in
quinque diebus, si non dormierit.
Huic igitur hac facere oportet, mul-
ta calida lavato, donec ad se redeat:
deinde copioso oleo illitum mollibus in-
stragulis reponere, ac contegere cum si-
lento, & in tenebris, ut plurimum
enim ex balneo dormit, & si dormie-
rit sanus evadet. Postquam autem
redierit, primis tribus, aut quatuor
diebus milium tenue, aut ptisanæ
succum sorbeat, & vinum mellis spe-
ciem referens bibat. Deinde cibus u-
tatur mollissimis, ac paucis primum.
Et iterum lib. 3. subdit. *His validas
sternutationes excitare convenit, &
clysterem bilem ducentem, & ipsum
validum inucere. Quod si sensum
eger receperit, thapsiæ succum in
multa aqua calida dato, quo quam-
citissimè revomat. Postea attenuato,
& à cibo abstineto usque ad septem
dies. Detrahendus est, & à lingua
sanguis, si venam comprehendere pos-
sis. Verum nos pluries vidimus se-
datas ejusmodi ebrietates iteratis
lotionibus pudendorum ex aqua ge-
lida: mirum enim, quàm istæ par-
tes cum cerebro consentiant, & ma-
dorem, frigefactionemque eidem
communicent. Sunt & alii, qui à
fumo tabaci id ipsum assequuntur, &
alii sternutationem moventibus. Sed
præstaret vomitum incitare statim,
ac immodicè vinum fuerit epotum,**

& antequam temulentia sit confir-
mata: Quod & ab Athenæo memo-
ratum inveni lib. 11. cap. x. in fin. Cæ-
terum ebrietatem præcavere refe-
runtur allium, & amygdalæ ama-
ræ, si antea sumantur. Et quidem
de allio extat auctoritas Hippocra-
tis 4. de ratione victus in acutis,
dum inquit: *optimum est ipso* (idest
allio) *vescisci, qui crapulæ se datu-
rusest, & futurus ebrius.* De a-
mygdalis verò amaris præter graves
alios Auctores, testatur Plutarchus
lib. 1. symposiacorum quæst. 6. ubi
Medicum memorat in comitatu
Drusi Tiberii Cæsaris filii, qui cum
quinque, vel sex amygdalas ama-
ras ante computationem edisset,
omnes bibendo superabat: sed de-
prehensa fraude, prohibitus ne id
faceret, facillimè à vino devictus
fuit. Unde autem id fiat, curiosè à
plerisque quæritur. Novi & ego a-
lium, qui se ipsum ab ebrietate fri-
gidæ aquæ haustu paulò ante co-
messationes præmuniebat, & qui-
dem felicissimo successu. Apud A-
thenæum lib. 1. cap. 30. Brassica,
ejusque femina commendantur,
quòd præcomesta potatores ebrios
fieri non patiantur, quin & in qua
vineâ nascuntur brassicæ, vinum
progigni debilius dicitur. Multa
alia ad ebrietatem arcendam recen-
set Zacutus Lusitanus lib. 3. Præ-
admir. observat. 123. Mercurialis
variar. lect. lib. 4. cap. 6. & Joannes
Langius Epistol. lib. 1. Epist. 30. præ-
ter alios.

Pro coronide tandem advertere
non pigebit, cautos, attentosque
oportere esse Medicos in ebriis inter-
noscendis, & judicandis, ne illos
cum apoplecticis confundant, & uti
apoplecticos tractent, magno cum
salutis egrorum detrimento, & non
sine sui ipsorum honoris infamia. Me-

Vide
Vvecker
lib. 5.
Secr.

mini ebrium quendam ab ignaro quodam Medico, qui illum apoplecticum existimaverat, adeò perperam tractatum frictionibus, cucurbitulis, vesicantibus, immò ad verticem capitis ignito ferro cauteriatum, ut postquam experrectus se tam afflictum, tortumque vidisset, Medicum ipsum, nisi fugam arripuisset, veluti sui tortorem, ac hostem permisset. Id ipsum non ità pridem mihi retulit dignissimus quidam Prælatus evenisse Romæ cuidam suo famulo, & non nisi magno cum Medici derisu. Equidem apoplectici præter soporem, respirationem habent graviter læsam, pulsum inæqualem, pallentem vultum, vel plus justo rubentem, & tumidum: Ebrii verò somnum suavem dormiunt, in cunctis benè se habent, & si convelluntur, ab ipsis motibus nonnumquam excitati, statim exsolvuntur, & valent.

APHORISMUS VI.

Quicumque Tetano corripuntur, in quatuor diebus pereunt, si verò hos effugerint, sani fiunt.

DAt in hoc Aphorismo Hippocrates exemplum Tetani, ut inde terminum convulsionis in interitum desinentis coniiciamus. Refertur quippè Tetanus ad convulsionem, velut species ad genus, siquidem Tetanus est nervorum tensio æqualiter in toto corpore facta, per quam illud rigidum, & immobile remanet, cum partes anteriores æquè, ac posteriores contrahantur; unde Galenus *in comm.* inquit, illum esse affectum compositum ex Emprothotono, idest tensione ad anteriora, & Opisthotono, idest tensione ad posteriora.

Cum ergo contingit aliquem Te-

tano corripì, idest æqualem pati ad anteriora, & posteriora contractionem, facile est, ut intra terminum acutissimorum morborum, qui est quartus dies, intereat. Arguitur enim ex æquali, & vehementi nervorum per partes anteriores, & posteriores excurrentium affectione, plurimum gravari Naturam, & multam, potentemque esse causam, quæ potuerit cunctos utriusque partis nervos afficere, unde postmodum omnes ferè operationes, & potissimum vitales offendantur. Si verò terminus quatuor dierum transigatur, quia sensim morbosam causam cedere indicio est, ac pedetentim concoctione dissolutam sensibilibiter, aut insensibilibiter expurgari, proinde si hunc terminum ægrotantes evaserint, nullo negotio revalescent.

Verùm animadversione dignum est, non dixisse Hippocratem quarto die Tetano affectos interire, sed infra hoc tempus posse periclitari; unde & prima, & secunda, & tertia die etiam obire poterunt: quamquam & plerosque novi etiam ad septimum periisse, qui nimirum viribus, & ætate præpotentes, violentiam morbi diutius sustinere potuerunt.

Verisimile autem est ex majori, vel minori vitiosi humoris aciditate, ejuscemodi varietatem Tetano affectis evenire: ubi enim aciditas pontica nervos affecerit, & præter contorsionem, ac rigiditatem, stuporem attulerit, certè mors citius accidet, atque inevitabiliter; ubi verò potius corpulentia, quam acore summo nervi fuerint divexati, non solum in longius tempus Tetanus protrahetur, verùm etiam paulatim remittetur, & in salutem desinet.

Et si insuper Hippocrates dicat post quar-

quartum diem Tetano correptos sanos fieri, non tamen credendum est statim, & absque ullo auxilio medico illos sanari, cum nervi, & musculi affecti non subito in pristinum salutis statum remitti possint, absque eo, quod humores per illos diffusi sensim dissolvantur, & evanescant. Quare exponendus aphorismus est, ut licet post quartum diem Tetano correpti mortem evadant, post longius tempus tamen in pristinam salutem restituantur. Sed & neque perpetuò verum est, quod post quartum diem mortis periculum effugiant, cum aliquando observatum sit, etiam in septimo, atque etiam post septimum illos esse periclitatos. Fortè autem, tempore Hippocratis citius sanabantur, si-ve ob salubriorem incolatus constitutionem, si-ve ob fortiores corporum temperaturas, si-ve etiam ob temperatiorem victus rationem.

Quod denique pacto isti juvari possint, ut saltem post quartum diem mortem effugiant, & in salutem revocentur, inquisitione dignum. Et quoniam musculorum, & nervorum affectus dependentes ab humoribus, vel sudore copioso, vel abundantiori urina solvi consueverunt; proinde opportunum erit utroque hoc præsidiorum genere in illis uti. Verumtamen vitanda erunt ea, quæ acriorem conditionem nata sunt, & volanti alkali prædita; ne scilicet ex his nervi, & musculi proritentur, & convulsione impensius afficiantur. Conferunt ea propter, quæ molliter laxando, blandè admodum humores alliciant, & educant, unde decocta, leu poriones quidem humefacientes, ex medicamentis tamen

dissolventibus, & roborantibus paratæ, proficua erunt; itemque sudores proliciantur ex balneis vaporosis, quibus & pori cutis leniter laxentur, & humores in musculis, & nervis impacti molliantur, ut sine noxa fluitent. In eundem usum sæpius contulere unctiones ex oleis, & linimentis emollientibus simul, & roborantibus: quod sanè perpetuò observandum in omnibus affectionibus nervorum.

APHORISMUS VII.

Quibuscumque morbi comitiales fiunt antè pubertatem, mutationem accipiunt, quibuscumque autem vigesimo quinto. ferè commoriuntur.

Dixerat *Aphor. 45. Secundi* Hippocrates, juvenes morbo comitali correptos, mutatione maximè ætatum liberari; ubi pro juvenibus, juniores exposuimus; nunc eandem sententiam clariùs explicans, inquit, ante pubertatem mutationem illos accipere, post vigesimum quintum annum verò, ferè semper commori solere.

Comitalis morbus idem est ac Epilepsia, quasi supra captio, quoniam Epileptici veluti à superis, seu divinitus capti, ac fulmine icti videntur, vel quod supernis partibus, idest cerebro, afficiantur; cumque publicè, & in comitiis plerumque corripentur, perterritis adstantibus, iisque mox etiam abscedentibus, comitia finiebantur, Comitalis morbus appellatus est. Hinc Quintus Serenus cecinit.

Est subiti species morbi, cui nomen ab illo est,

Quod fieri nobis suffragia iusta recusat.

Sepè etenim membris atro languore caducis

Concilium populi labes horrenda diremit.

Is ergo si ante pubertatem accidat, mutationem, & quandoque etiam sanationem facile sortietur; ineunte nimirum ætate juvenili. Est autem pubertas, ætas illa, quæ à decimoquarto ad vigesimum primum, vel vigesimum quintum annum extenditur, & quamquam plerisque visum sit à decimo octavo anno ad vigesimum quintum, non puberes, sed adolecentes esse appellandos, attamen pubertas hæc, & adolescentia simul unà confunduntur. Itaque si contingat puberes intra hoc tempus, & ante vigesimum quintum annum corripì morbo Comitiali, in ætatem vegetiorem, puta juvenilem progressi, mutationem in melius subibunt.

Sed qua de causa id accidat, non benè convenit inter Interpretes. Major autem illorum pars cum Galeno existimat id illis benè succedere, quia pueritia, & pubertas propter humiditatem, & cruditates, in ea ætate faciles, obnoxia est Epilepsiæ, ut propterea Puerilis morbus sit etiam appellatus; facta autem mutatione in juventutem, humida illa temperies in siccam, magisque calidam transmutatur, indeque fieri, ut mutationem in melius subeat. Verùm crediderim id potius evenire ex solidiori, consistentiorique fibrarum nervearum textura, quippè quæ, per ætatum mutationem, magis, magisque confirmantur, & exoluta illa acri sanguinis serositate, non tam facile deinceps nervi proritantur, nec aliunde vitium in reliquis humoribus inductum, adeò contumax, & pertinax erit, ut perejusmodi ætatis mutationem nullatenus

infringi, ac tandem subigi possit: verumtamen neque dixit Hippocrates revera post pubertatem Epilepsiam sanari, sed in melius solum abire: fieri enim potest, ut epileptici insultus adhuc post pubertatem repetant, non sint tamen adeò insensibiles, ut violenter adhuc extorqueant, & convellant; quinimmò & rarius, & per longiora intervalla molestant, quemadmodum pluries à nobis est observatum. Jure ergo scriptum est, tum hæc, tum *aphor. 45. secundi*, mutationem solum accipere. Sed & aliquando contigit mutationem hanc epilepticos subiisse in aliam ægritudinem aliquantò degenerem. Novi quemdam, qui cum epilepticus in pubertate fuisset, post vigesimum quintum annum non amplius epilepsia, sed palpitatione, & cordis oppressione laboravit, citrà sensibilem mentis læsionem; sed & plerique status mutatione, uti puellæ ab erumpentibus menstruis, aut inito connubio, promptè admodum convaluere.

Advertere tamen est, quòd ejusmodi mutationes in melius, facilius contingunt servata simul exacta victus ratione; unde si fortassè puber epilepticus errata in victus genere perpetim committeret, proculdubio etiam post vigesimum quintum annum eundem comitiales morbum esset perpeffurus. Hinc qui mutationem in melius etiam sub spe recuperandæ salutis sunt opperituri, exactam victus rationem servant oportet, & cum illa salubrioris quoque aeris incolatum, quemadmodum ex *cit. aphor. 45. secundi* colligere est.

Quoniam verò post vigesimum quintum annum epilepticos interire scribit Hippocrates, dubitari proinde potest, num de illis intelligat, qui

qui in pubertate epilepsiam contraxerunt, an verò, qui post vigesimum quintum annum epilepticos fieri contigerit, ac propterea his recuperandæ salutis spes omnis absit. Et ad primum, putaverim eos intelligi interituros, vel saltem cum epilepsia commorituros, qui licet ad senium perducti, post vigesimum quintum annum in epilepsiam inciderint; secus verò, qui ex pubertate affecti beneficium mutationis post vigesimum quintum annum non sunt sortiti: etenim hi plerumque consenescent, & sensim, ac pedetentim mutatione aliarum ætatum in melius semper abeunt; Qui verò post vigesimum quintum annum morbum comitalem incurrunt, duplici ex capite videntur difficulter convalescunt, uno quidem, quia in juventute corripuntur, unde is causam proculdubio præpotentem arguit, cui ætas juvenilis obsistere non potuit: altero, quòd nullam in melius mutationem sint in cæteris succedentibus ætatibus speraturi, quippe per has semper in pejus ruunt, fatiscente natura per sanguinem, cæterosque liquores, qui semper, semperque hebetiores, acidioresque evadunt: Quamquam, si fortasse ex male ante acta vita morbus comitalis acciderit, possit usu medicamentorum, & salubriori regimine instituto, in meliorem etiam statum ille revocari. Verùm Hippocrates de ea epilepsia videtur hic loquutus, quæ ab his, quæ sponte per ætates homini accidunt, provenire solet, nulla propemodum externa causa perspecta.

Sed an revera simul una illa affecti commoriantur; ulterius ex textu addubitare licet. Verùm cum Hippocrates scripserit illos, *ferè commori*, id est simul una consenescere, &

ad interitum perducere, propterea probabilius est dicere, non omnino, & infallibiliter ad mortem usque patientes comitari, sed ut plurimum solum. Quo pacto non semel vidimus etiam in ætate consistenti, & in prima senectute, epilepsiam defuisse, superstiti adhuc patientis vita. At verò non inde deducendum est, eos qui ultra vigesimum quintum annum sunt hoc morbo correpti, esse in senio commorituros, nam ineunte virilitate, plerumque visi sunt periisse, commutata præsertim Epilepsia in Apoplexiam. Quare verbum illud *commori*, non debet referri ad ætatem senilem patientis, quasi verò ad ultimam ætatem morbus ipse protrahatur, & tandem desinente vita, desinat; sed debet referri ad ipsum morbum comitalem, qui cum non amplius patientem deserat, eò illum deducit, ut tandem interficiat, adeoque simul cum ejusdem interitu desinat, ut propterea videatur quodammodo dici posse commori morbum cum interitu ægrotantis.

Quibus denique præsidii ejusmodi ægritudini, tam ante, quam post pubertatem, occurrendum sit, latè à nobis enarratum in *parte Medicinae practica*.

APHORISMUS VIII.

Quicumque morbo laterali laborantes, in quatuordecim diebus non repurgantur, ii ad suppurationem vertuntur.

DE pleuritidis progressu, & eventu agit hoc aphorismo Hippocrates, illamque intra quatuordecim dies non repurgatam, in suppurationem tendere docet. Verùm ad exactam aphorismi intelligentiam,

gentiam, oportebit plura primùm examinare .

Et primò, cùm de pleuriticis agat, qui intrà quatuordecim dies non repurgantur, in dubium verti potest, an computus istorum dierum fieri debeat ab initiante, & cruda pleuritide, an verò à pleuritide ad maturationem, declinationemque perducta. Pro cuius difficultatis solutione meminisse decet, pleuritidem esse speciem inflammationis factam à sanguine alicubi in vasis sanguiferis pleuræ, vel etiam pulmonis (qua parte præsertim pulmo superiori pectori alligatur) hærente. Non enim videtur hic Hippocrates de pleuritide, quam spuriam vocant, sermonem fecisse, quippè cùm is subdat, ad suppurationem verti, & non nisi quæ exquisita dicitur, ut potè à sanguine facta, in suppurationem verti possit, proculdubio quæ exquisita est, videtur hic specialiter adnotata. Cùm ergo inflammatio à sanguine facta egeri nequeat, priusquam maturitati subjecta fuerit, id quod circa statum accidit, proinde probabilius videtur dicendum de pleuriticis sermonem habuisse, qui jam ad declinationem morbi pervenire; quam obrem computus dierum quatuordecim repurgationis, à fine status, vel ab initio declinationis delumendus est; atque adeò illi pleuritici in suppurationem deducuntur, qui post statum, & maturitatem pleuritidis per dies quatuordecim in posterum non repurgabuntur. Et quidem inflammatione jam edomita, & concocta ejusdem materia, illam dirumpi necesse est, & paulatim per sputum expurgari; cùm verò contingit ejusmodi expurgationem intercipi, aut impediri, fortè ex imbecillitate naturæ expellere nequeuntis per tussim,

vel ob multitudinem peccantis humoris, vel ob craffitie ejusdem, vel ob viarum angustiam, vel ob loci distantiam, vel ob thoracis, aut pulmonis impotentiam, vel ob aliam similem causam, profectò detenta materia suppurabitur, indeq; commutabitur pleuritis in empyema; unde etsi prior morbus desinat, novus, & quidem pejor superveniet; id quod ab Hippocrate tum hic, tum clariùs infrà manifestissimè declaratur. Itaque cum pleuritis ad declinationem perducta, & sanguis illam faciens jam fuerit maturatione subactus, si per succedentes quatuordecim dies non fuerit integrè repurgatus, ac per anacatharsim excretus, certè commutabitur in pus, & morbus in empyema degenerabit.

Dubitari præterea potest, cur Hippocrates terminum ejuscemodi repurgationis dies quatuordecim constituerit, cum cæteroqui Anaxion pleuriticus relatus ab eodem 3. *epid.* non nisi à die, qua cœpit expuere, nempe à decima septima usque ad trigesimam quartam, qua judicatus est, fuerit repurgatus. Et dicendum quatuordecim dierum terminum fuisse hic ab Hippocrate constitutum, quia ex eodem *lib. 2. aphor. tex. 23.* omnes acuti morbi in quatuordecim diebus judicantur, facto tamen initio à die, qua revera acuti evaserunt; hinc non absre in hoc aphorismo dixit, *in quatuordecim diebus non repurgantur*. Anaxion verò pleuriticus memoratus in Epidemiis, cœpit decima septima die pauca dumtaxat expuere, & deinceps abundantius. Quinimmò nisi sudore fuisset judicatus, proculdubio in longiùs tempus agrotasset. Quare suppuratione facta à sputo abundantiori, verè intrà quatuordecim dies fuit repurgatus,

tus, ac postremò etiam sudore iudicatus; Atqui si hunc terminum transegisset, in aliam planè ægritudinem lapsus esset.

Ulteriùs dubitari potest, num revera de pleuritide mens Hippocratis sit exponenda. Nam in vulgata latina versione scribitur, *quicumque morbo laterali*: morbus autem lateralis latiori significatione aliam pectoris ægritudinem referre potest. Verùm dicendum in græco Codice scribi pleuriticos, qui propriè pleuritide, seu membranæ succingentis costas inflammatione correpti sunt; in quam sanè expositionem reliqui omnes Interpretes conveniunt. Neque enim, si de morbo laterali, qui costis, & musculis intercostalibus externis accidit, sermò foret, posset indè anacatharsis, & repurgatio per sputum expectari, quæ hic ab Hippocrate memoratur: modò sputum, & anacatharsis sperari potest dumtaxat in morbis pectoris, partes internas, non externas afficientibus.

Adnotat etiam, & rectè Heurnius materiam debere esse expectorabilem, nam si fortassè præ sui crassitie, & viscositate, non facilè concoqueretur, & longius tempus exquireret ad subeundam maturacionem, profectò tempus hoc loco assignatum ab Hippocrate dierum quatuordecim sufficiens non esset peragenda repurgationi. Verumtamen cum de pleuritide loquatur Hippocrates, & hæc plerumque, cum præsertim exquisita est, à sanguine concreto fiat, facile suppurabili, idcirco non absq; ratione terminus dierum quatuordecim est adiectus, quo planè spatium verisimile est, posse materiam jam concoctam expurgari: humor autem crassus, & viscosus non nisi in pleuritide spuria observa-

ri solet, qui longius tempus exoptulat.

Deniq; ut ejusmodi incommodo futuræ suppurationis, & imminentis empyematis occurramus, juvabit toto hoc spatio dierum quatuordecim, ea adhibere medicamenta, quæ anacatharsim promoveant, & faciliunt, cujusmodi sunt, quæ ex hyssopo, hyperico, hedera terrestri, tussilagine, & similibus parantur, aquæ, syrupi, extracta, tincturæ. Confert etiam in idem balsamum Peruvianum, spermaceti, elixir proprietatis Helmontii, balsamum sulphuris, præsertim terebinthinatum, & his similia.

Si hæc repurgatio fortassè deficiat, consueverunt practici in opem diuretica sufficere, quoniam non raro expertum, materiam in pectore collectam, aut in pulmonibus herentem, fuisse per vias urinarias educam; quamvis hoc non tam facile sit, nec dum benè constet apud Anatomicos per quos ductus eò ferri possit. De qua re alibi.

APHORISMUS IX.

Tabes fiunt præcipue ætatibus à decimo octavo usque ad trigesimum quintum.

QUoniam à pleuritide suppurata, nec deinceps sufficienter repurgata empyema fit, cui postmodum Tabes adjungitur, idcirco referens Hippocrates damna ex non repurgata in pleuriticis materia, subdit in hoc aphorismo, Tabem, seu græcè Phthisim, exoriri, eamque potissimum à decimo octavo anno ad trigesimum quintum.

Et quidem quotiescumque materia, quæ pleuritidem faciebat, ad suppurationem perducta est, nec deinde intrà spatium quatuordecim die-

dierum repurgetur, in thoracis cavo colligitur, & mox tum pravo halitu, tum corpulentia pulmonem, indeque circumgyrantem sanguinem inficit. Quoniam verò ab infecto pulmone, immò etiam à præsentia puris exulcerato, simulque unà vitiato sanguine, accidit febris, quæ hæctica naturæ est, proindè fit, ut tabes oriatur, seu universalis corporis consumptio. Cùm enim sanguis pure infectus salinam acritatem nanciscatur, indeque plus justo dissolvatur, & glutine privetur, quo scilicet partes cunctæ corporis nutriuntur, fit propterea, ut sensim illæ macrescant: quippè pus sanguini communicatum, tam potenter illum vitiat, ut partibus accedens, loco nutrimenti, acre venenum evadat.

Sed cur scriptum sit in hoc aphorismo id potissimum evenire à decimo octavo ad trigessimum quintum annum? Neque solum in casu pleuritidis non repurgatæ, sed etiam si ex quacumque alia causa tabes oriatur, ut propterea videatur indiscriminatim locutus Hippocrates de facili hujus ætatis contabescencia ad trigessimum quintum annum usque, reliquis ætatibus exceptis. Immo, ut ex græca voce Phthisis deducitur, speciatim videtur voluisse designare illam speciem tabis, quæ ex ulcerato, vel aliter affecto pulmone contingit. *Fuchs* in *comm. istius aphor.* rationem deducit ex Galeno, qui in *comm. 29. lib. 3.* exponens ægritudines juvenilis ætatis ibidem ab Hippocrate enarratas (ubi præ cæteris sputa sanguinis, & tabes referuntur) non ad ætatis rationem, sed ex accidenti, adolescentiæ, & juventuti tabem evenire interpretatur, quia adolescentes, & juvenes plerumque saliant, currunt, cla-

mant, digladiantur, belligerant, venationem, aliudve genus laboris, vel exercitii immodici exercent. At causæ istæ, ut alibi quoque à nobis est dictum, communes esse possunt reliquis ætatibus. Sed & neque Hippocrates eorum, quæ ex accidenti eveniunt, hic habuit in animo meminisse, sed dumtaxat, quæ ratione ætatis contingunt, etenim limitavit tempus à decimo octavo ad trigessimum quintum: quod sanè non fecisset, si id ex accidenti tantum evenire putasset. Crediderim eapropter ego id potissimum ea ætate contingere, quia sanguis tunc etiam in sua constitutione permutatur: cùm enim in præcedenti ætate puerili pars ejusdem glutinosa, & auctifica prævaluerit, sensim postmodum incipit pars vivifica virtute præcellere, & acrior, tenuiorque fieri, quæ propterea orgasmum in arteriis, & venis efficit, ut facile oscilla vasorum aperire queat; hinc sanguinis sputa, & partium spiritalium erosiones accidunt, potissimum verò pulmonis sua natura laxioris. Sed & propter ipsius acritatem, nutritiones non tam benè fiunt, quemadmodum in ætate præcedenti; unde etiam fit, quamobrem per ætatem juvenilem contingant facilius febres ardentes, vulgò ex bile fieri putatæ, sive potius ex sanguine acriori, summopere ad fermentescendum idoneo.

At verò neque dixit Hippocrates tantummodò in hac ætate tabem accidere, *præcipuè* solum; nam possunt quoque tabes in aliis ætatibus evenire, & non solum ex præ-narrata causa, verum etiam ex aliis innumeris, potissimum ex distillatione ferina, ex tussi vehementi, ex pleuritide suppurata, ex angina, aliisque, quæ sanè sunt præsentia apho-

aphorismo comprehensa ex ejusmodi ætatis adolescentis, & juvenilis constitutione. Non tamen hinc negaverim specialius tabem notare voluisse, quæ ex pleuritide suppurata, nec deinde repurgata procedit, de qua præcedenti aphorismo mentio facta est, ut antea pariter animadversum.

APHORISMUS X.

Quicumque ab Angina liberantur, iis ad pulmonem vertitur, & in septem diebus pereunt; Si verò hos effugerint, suppurantur.

Non facile quis huic aphoristicae sententiæ assentietur, si superficie-tenus solum, & ut verba textus sonant, illam accipiat; etenim qui fieri potest, ut ab angina liberatus incidat in pulmoniam, & deinde in empyema; si ab angina liberati, penitus sanati dicendi sunt: si ergo omnino sanati, proculdubio nequibunt ex præcedenti morbo in alium delabi, qui causam, & originem à priori mutuetur. Verum huic difficultati facile fiet satis attenta Hippocratis elocutione, is siquidem dixit: *qui ab angina liberantur*, id est vim, violentiamque illius effugiunt, ob quam periculum suffocationis incurrissent, eo quod musculi laryngis inflammati intercipiunt aeris ingressum, egressumque, remanente interea causa materiali inflammationis. Hinc genuinus Hippocratis sensus erit, quod illi, qui ex angina videntur liberati, sed citrà inflammationis maturationem, aut resolutionem, & sine ulla manifesta materiæ expurgatione, cum humor ille inflammationem faciens aliò transferatur, & in pulmonem promptissimè decumbat, sequitur, ut ex

una ægritudine, nempe ex angina, incidant in peripneumoniam, seu pulmonis inflammationem: sunt enim partes istæ, per quam inter se contiguæ, & tum per musculos, asperam arteriam circumtegentes, tum etiam per arterias, aliosque inconspicuos ductus mutuò consentientes, unde promptè admodum humor inflammationem in gutture faciens, sponte sua potest in pulmonem decumbere; quamobrem ex illius translatione desinit inflammatio in musculis gutturis, & consequenter desinit angina, sed supervenit pulmonis inflammatio, ac peripneumonia. Appositè igitur Herurnius aphorismum hunc ita legit: *Qui ex anginosis fiunt peripneumonici*: quandoquidem non semper ex angina contingit peripneumonia; sed si fortassè, qui anginosi erant, videantur ab angina evadere citrà suppurationem, & purulenti humoris evacuationem, cum non possint tam repentè, & salubriter ab illa sanari, nisi humor, qui inflammationem faciebat, aliò trāsferatur, benè proinde scriptum est, in peripneumoniam illos delabi. Ex transitu autem isto, etsi patientes ab angina, seu ab inflammatione gutturis, & faucium liberentur, non tamen vitæ periculum effugiunt, quippè peripneumonici facti, intra septem dies, adhuc periclitabuntur: etenim non minoris acutiei, & malitiæ est peripneumonia, quàm sit angina, cum ob maximam respirandi difficultatem, febrem acutam, ac continuam, contracta in laxa pulmonis substantia inflammatione, facillime ægrotantes mortem incurrant. Id quod clariùs expressit Celsus lib: 2. cap. 7. *Si angina subito finita est, in pulmonem id malum tran-*

transit, idque saepe intra septimum diem occidit.

Statuitur autem ab Hippocrate istius exitii terminus septima dies, non quòd propriè ad septimum diem peripneumonia protrahi debeat, ut interitum afferat, sed quòd intra hoc temporis spatium mors contingere possit; unde non dixit septimo die pereunt, sed in septem diebus, sive ut clariùs explicat Fuchsius, Celsum in hac parte secutus, intra septem dies, cum & ante septimum, quarto scilicet, quinto, aut sexto die, peripneumonia interimere possit.

Sed quamvis facillimè interire possint ægrotantes ex humore in pulmonem translato, tum ratione ipsius partis affectæ respirationi destinatæ, tum etiam ratione febris adjunctæ acutissimæ, non tamen omninò necesse est, ut subindè pereant, quasi quòd inevitabiliter sint ex peripneumonia interituri; unde meritò subjunxit Hippocrates: *Si verò hos effugerint, suppurantur;* idest, si spatium septem dierum transiliant, quia humor in pulmonem delapsus mitioris naturæ significatur, facilèque subigibilis, & ex altero capite natura præpotens denotatur, quæ potuit tanti morbi impetum, & violentiam sustinere, profectò delapsus humor in suppurationem in posterum vertetur, atque adeò prior morbus commutabitur in alium, atque ex peripneumonia fiet empyema: sanguis enim ibidem hærescens, & qui inflammationem excitavit (ut superius etiam notatum est) maturitati subiectus vertetur in pus. Quare semper ac inflammatio in sui augmento necem non attulerit, sed ad statum perducta, naturæ concoquenti subiicitur, desi-

net proculdubio in suppurationem; quemadmodum in externis inflammationibus passim experimur. Est tamen verum, quod aliquando non vera inflammatione, sed potius erysipelate affecto pulmone, fortassè quia sanguis tenuior est, insensibiliter, vel sensibilibiter per sudorem peripneumonia terminari potest: quamquam rarò fiat, ut ab erysipelate pulmonis ægrotantes evadant, cum plerumque phrenetici moriantur, ut pluries expertum in praxi, quod etiam ab eodem Hippocrate memoratur 2. *de morbis.*

Quoniam verò scriptum est ab eodem 6. *aphorismorum* 37. *Angina correpto, si tumor fiat in collo bonum, foras enim morbus deducitur;* fieri potest, ut exindè evitetur peripneumonia, adeoque mors, vel suppuratio, quia scilicet humor anginam faciens non ad pulmonem, sed ad partes exteriores colli deducitur: At nec semper id conferet, nisi solum cum per transpositionem humoris ad partes colli exteriores, interiores affectæ liberantur; Nam si fortassè contingat, quòd tumor in collo appareat, nec subindè musculi gutturis affecti exonerentur, certè majus vitæ periculum imminet, quoniam extramissio humoris ad partes colli externas non sequitur criticam naturæ depositionem, sed potius arguit multitudinem peccantis humoris, qui cum non totus possit in partibus internis gutturis absumi, occupat ulteriùs partes externas, & vitæ periculum non minuit, sed adauget.

APHORISMUS X I.

Qui tabe molestantur, si sputum, quod extussiunt, grave olet injectum carbonibus, & capilli à capite defluunt, lethale.

CUm superioribus aphorismis de quibusdam inflammationibus tum gutturis, tum pectoris, & pulmonis in suppurationem versis egerit, nunc eventus indicia ad prognosim pertinentia tradit, atque generaliter inquit: tabidos in interitum desinere, quoties sputum, quod extussiunt injectum carbonibus malè olet, & capilli à capite defluunt.

Debent autem ista duo simul in empyicis copulari, ut interitum portendant, quandoquidem aliquando observatum est, ex sputo purulento, & malè olente, adhuc plerosque convaluisse. Quare junctim illa retulit Hippocrates, ut certius prognosticum inde deducatur.

Atque hinc clarè etiam colligitur, tabidos hìc illum adnotare, qui ex pulmone affecto, & ex empyemate in tabem sunt delapsi, aliter purulentum sputum hìc non memorasset, neque per tussim excretum, ut ex verbis textus manifestissimè patet. Et quamvis sæpenumero purulentum sputum per se malè oleat, potissimùm cum pravæ conditionis est, & aliquandiu fuerit in pectore detentum; nihilominus non semper in empyemate ejusmodi foetorem referre solet, nisi solum cum pulmonis substantiam ulceratam, & putrefactam redolet, quippe tunc ulcus pulmonis, & sæpissimè etiam sordidum subsequitur. Addidit quoque Hippocrates injectum carbonibus, ut scilicet phlegmatis, &

sputi ordinarii portio, si fortassè cum pure jungatur, vi ignis possit absorberi; & quod purulentum est, in halitus melius diffundatur.

Sed & capilli defluere quoque debent, idest sponte sua è cutis poris decidere: etenim isti nunquam decidunt, nisi poruli cutis fuerint relaxati, & alimentum, quod illis suggeritur, acre, & erodens evaserit. Unde autem hæc in tabidis contingant, dubitari solet. Et dicendum id his evenire ex pure, quod sive præsentia, sive halitu sanguinem circumeuntem inficit, immò dissolvit, eliquat, erodit, suoque glutine privat; quomobrem expertum est, sanguinem in tabidis fluidum plus justo fieri, & omni glutine orbatum apparere, unde partibus accedens, non solum nutrire, & reficere non potest, sed potius acritate infensa, & venenata, illas extenuat, & arefacit, quo deinde fit, ut capilli in suis radicibus erosi, sponte sua decidant. At verò promptius è capite defluunt, quàm ex mento, superciliis, aliisque partibus, quoniam istæ succulentiores sunt, & cutim crassiorem obtinent, at illud ex succum nimis est, & cutim ossi hærentem habet.

Hinc ergo fieri non potest, quin tabidi ad tantam perniciem deducti, non sint paulò post interituri, cum ex pure foetido infectus, ulceratusque pulmo, sanguinem universum, & cor vitæ fontem, virulenta contagione depravet, indeque totum corpus, & alimento, & vita privet. Accedit tussis molestissima, qua coguntur graves molestias, & maximam virium jacturam tabidi subire, immò somno, & quiete privari, & mille alia incommoda pati,

cum

cum quibus vita diù sustineri nequit. His infra additur alvi profluvium, quo naturalis regio omninò labefactata designatur, ut sequenti aphorismo dicitur.

APHORISMUS XII.

Quibuscumque tabe laborantibus capilli à capite defluunt; iis alvi profluvio superveniente, moriuntur.

Postquam præcedenti aphorismo lethale signum esse dixit in tabidis, si sputum injectum carbonibus malè oleat, & capilli à capite defluant, nunc quibus capilli defluunt, si alvi profluvium superaccidat, mortem præstò esse subdit: sed licet utraque mortem portendant, non tamen tempore indistinctam præfagiunt, nam lethale quidem signum est sputum malè olere, & capillos à capite defluere, sed non nisi post aliquod temporis intervallum; at verò cum post defluvium capillorum alvus solvitur, mors brevi imminet, nec ad longum tempus protrahitur, sed intra triduum, vel quatrimum irreparabiliter accidet.

Qua autem de causa post sputum purulentum, & mali odoris, itemque post defluvium capillorum alvus laxetur; facile quis dijudicabit ex corruptione à pure inducta, quæ cum sanguinem, cæterosque liquores corporis pertigerit, unà simul ductus corporis delaxari necesse est, & potissimum, qui feruntur in alvum, puta ex ventriculo, ejusque fermento, liene, jecore, mesenterio, aliisque visceribus imi ventris; Quare ex alvi fluxu certò coniecere poterimus universam corporis economiam esse resolutam, ac proinde extinctis viribus, vitam ipsam esse

omninò desituram. Id totum perbellè expressit Hippocrates lib. 1. de morb. his verbis: *Cum pus ipsum in ventre moram traxerit, totum corpus ab ipso calefcit, tum maxime vicinissimæ partes: calefciente autem corpore, humidum maxime eliquatur, & quod quidem à supernis partibus eliquatur, in supernum ventriculum præcipue confluit; fitque pus, ad hoc, quod jam in ipso est. Pars verò ejus etiam in infernum ventriculum deferitur, & quandoque alvus ab ipsa turbatur, & hominem perimit, nam cibi ingesti secedunt inconcocti, & alimentum ab ipsis corpori non accedit. Et sputi sursum purgatio non equalis contingit, alvo nimirum calefacta, & omnia deorsum trabente in seipsam: Et à sputo quidem suffocatur, & stertit, dum non purgatur: à ventre verò fluente debilitatur, & plerumque perimitur. Cæterum hæc non nisi contingunt tabidis ex diuturno pulmonis ulcere, & febre, ut vocant, habituali emaciatis, quibus nil ultra videtur toto corpore remansisse, quam σκελετός sola pelle contactus.*

APHORISMUS XIII.

Quicumque sanguinem spumofum extussunt, iis è pulmone educitio fit.

Etsi tabidi multifariam fieri possint adhuc ab affectu pulmone, ut antea ostensum est; peculiariter tamen Phthisici fiunt ex præcedente sanguinis sputo, ut dicitur 7. aphorismorum 15. & 16. Quoniam verò sanguineum sputum non semper ex pectore, & pulmone emanat, quamvis per ruffum inde prodeat, idcirco accuratissimus Hippocrates indi-

indicia tradens, quibus ejusmodi eruptionis sanguinis affectas partes internoscere possimus, adicit in hoc aphorismo signum, illudque pathognomonicum prodeuntis è pulmone sanguinis, desumptum à modo ipsius rejectionis, & qualitate sanguinis rejecti.

Et quidem modus rejectionis cum tussi esse debet, etenim quæ in pectoris cavo continentur, non nisi tussi egeri possunt; quamobrem accuratiores Interpretes loco verbi *expuunt*, vertunt (& quidem rationabilius) *extussunt*, sicut & Galenus ipse in *comm.* innuere visus est: Nam simpliciter sanguinem spumofum expuere tribuitur quoque ab Hippocrate in *Coacis prænotionibus* dextro præcordio dolentibus, atque ex hepate; quamvis nec hic spumofus sit ex conditione rutilantis sanguinis, sed ex sola interceptione, permissioneque aeris in ductibus, vel asperæ, vel œsophagi, unde foras profilit, cum per utramque viam è jecore prodire possit, facta scilicet in eas partes irruptione à compresso per tumidum, dolensque jecur, diaphragmate.

At verò, quia non semper sanguis, qui tussi eiicitur, è pectore, aut pulmone prodit, cum fieri possit, ut è faucibus, gutture, aspera arteria, in pulmonis bronchia delabens, tussi pariter egeratur, idcirco ad differentiam istarum expulsionum, adjecta est in textu qualitas sanguinis excreti, ut proinde si spumofus ille sit, floridus, ac rutilans, è pulmone prodire dicatur; qui verò alterius est conditionis, fortasse nigricans, grumofus, minimèque floridus, certè ab aliis partibus, quàm à pulmone prodibit, etiamsi tussi regeratur.

Solius ergo pulmonis erit sangui-

nem spumofum egerere, quoniam in solo pulmone istiusmodi sanguinis qualitas invenitur. Fit autem spumofus sanguis à mixtura illius cum aere, qui cum pulmones dumtaxat ingrediatur pro usu respirationis, idcirco nullibi, quàm in pulmone, spumofus inest.

Et tamen advertendum, quòd tunc spumans è pulmone egressus sanguis apparebit, cum immediatè è suis vasis exilit: nam si fortasse è pulmone sanguis guttatim in pectoris cavum extillet, aut etiam in tracheolis asperæ arteriæ per aliquod tempus detineatur, proculdubio spumis expers extussietur, quandoquidem sanguis ibidem restagnans, mox concrefcit, & grumofus egeri potest; sed & contrà falli quoque contingit in eo, quòd multoties tussi excretum, credatur è pectore prodiiisse, cum tamen ab aliis partibus processerit: Hinc valebit illatio affirmativa, secus verò negativa: Nempè, sanguis spumofus prodit, igitur à pulmone est, at non contrà: sanguis non spumofus egeritur, ergo ab aliis partibus, quàm à pulmone.

Ab ejusdem insuper sanguinis excreti quantitate dijudicare poterimus, num sanguis ab ipsa pulmonis substantia, & à vasis exilibus, per illius substantiam diffusis, egeratur; an verò à vasis majoribus, per quæ sanguis in circuitum adigitur, uti sunt vena cava ascendens, & vena arteriosa, itemque arteria venosa, & bronchialis. Siquidem cum sanguis ex vasis majoribus erumpit, nedum spumofus, sed etiam copiosus erit, quinimmò periculum suffocationis minabitur; at verò cum è pulmonis substantia, & è vasis exilibus prodit, neque multus erit, neque tam proximum vitæ periculum minatur.

An insuper sanguis undecumque
ex

ex ore prodiens è venis, an potius ex arteriis egeratur, controversi potest. Et sanè attenta tum qualitate sanguinis floridioris, tum etiam ejusdem circulatione, verisimilius dicendum ex arteriis prodire, quippè in arteriis floridus magis, & rutilans sanguis invenitur, nec non per arterias ad partes excurrit, per venas verò remeat in cor; immò semel venas ingressus, regredi non potest, impredientibus scilicet valvulis. Solum venæ compati poterunt, si fortassè fuerint erosæ, nam tunc ob erosionem data porta, sanguis exinde manare poterit. Cæterum etsi è reliquis partibus pectoris, immò etiam ex aspera arteria sanguis possit extillare, istamen neque multus, neque spumosus erit: quippè sanguis nullibi præterquam in pulmonibus spumosus invenitur. Ex his tandem admonemur, Tabem, ac Phthisim propriè dictam ab ulcere pulmonis exoriri, idque nonnisi à sanguinis sputo, de quo idem Hippocrates 7. aphor. 15. & 16. scribit: à sanguinis sputo puris sputum, à puris sputo Phthisis, & mors; unde tunc propriè Empyici, & Phthisici morientur ægrotantes, ut præcedentibus aphorismis dictum est, cum sanguinis sputum præcesserit, atque ille è pulmone prodierit.

Denique licet plerique absq; sanguinis sputo, & ulcere pulmonis tabidi referantur, nil tamen huic aphoristicæ sententiæ refragabitur, qua solum Hippocrates edocet sanguinem per tussim excretum tunc revera à pulmone prodire, cum spumosus est, atque hinc necessariò fieri, ut Tabes, & Phthisis oriatur, ac postremò mors. Hinc autem minimè negatur, posse etiam Tabem, ac Phthisim aliunde proficisci, etsi sputum sanguinis nullum præcesserit:

attamen verum semper erit pulmonem in cunctis tam malè affici, ut ineptus evadat sanguini perficiendo, & vitæ, ac motui cordis conservando. Quæ verò sint medicamenta fluentem hunc sanguinem sistere, & cohibere valentia, ex nostra praxi petenda erunt.

APHORISMUS XIV.

Tabe laborantibus profluvium alvi superveniens, lethale.

QUoniam superioribus aphorismis dixerat Hippocrates profluvium alvi cum defluxu capillorum mortem paulò post tabe laborantibus allaturum, cum id ipsum hic ferè repetat, creditum est à Commentatoribus nil prorsus novi in hoc aphorismo contineri, quod superius dictum non sit; at verò non tam temerè de Hippocrate suspicandum, quòd bis idem omninò repetere voluerit; quam obrem putaverim, aut illum voluisse hoc loco tabidos omnes comprehendere, immò etiam alia quacumque de causa, aut ægritudine macie confectos, cum alvi profluvium quibuscumque extenuatis superveniens lethale sit, veluti labefactatæ omninò virtutis indicium; Ve etiam significare voluisse, solam diarrhœam, & alvi solutionem tabidis esse perniciosam, licet cætera alia symptomata antea memorata deficiant; unde quamvis capilli à capite non defluant, & licet sputum purulentum ingentem fœtorem non redoleat, si nihilominus alvi profluvium tabidis superveniat, lethale est, quoniam cum tabidi veluti omninò extenuati nil habeant, quod egerere possint, vel debeant, quin immò indigeant potius restauratione, & carni appositione, proculdubio alvi pro-

profluviosi corripiantur, mortem obibunt, resolutis exinde omnino viribus, & labefactata penitus in ipsis reficiendi facultate. Est tamen verum, quod pro tabidis hic intelligere debeamus, qui diuturna tabe fuerunt affecti, atque extrema macie consumpti; his etenim quaecumque evacuatio superveniens perniciofa est, cum ex quacumque evacuatione penitus deficiant. Neque satis est, si semel tantum alyus laxetur, & excrementa solum deiciat, sed omnino necesse est, ut iterato, & pluries solvatur, & nedum, quae ventriculi, & intestinorum cavita-tem occupant, sed etiam, quae in intimioribus partibus continentur, & intra ductus corporis relictæ erant, affluenter egerat.

Accidit quoque, ut aliquando etiam iterata vomitio necem attulerit, itemque inmodica urinæ profusio, sudor, hæmorrhagia, siquidem istiusmodi evacuationes veluti omnino incompetentes tabidis exitium parant, brevique temporis intervallo, quemadmodum ex superius traditis facillimè deduci potest.

APHORISMUS XV.

Quicumque ex morbo laterali suppurantur, si in quadraginta diebus purgantur, à die, qua fit ruptio liberantur, si verò non, ad tabem transeunt.

E Docuerat aphorismo 8. Hippocrates pleuriticos in suppurationem desituros quandocumque in quatuordecim diebus non forent repurgati, nunc verò eosdem in tabem lapsuros inquit, cum intra quadraginta dies materiam in pectore contentam per anacatharsim

non penitus expurgaverint; unde differt hic aphorismus ab illo, eo quod ibi suppuratio portendatur, materia in quatuordecim diebus non repurgata, hic verò ex eadem præsignetur tabes in diebus quadraginta.

Et quidem cum pleuritis sit de genere morborum acutorum, & morbi acuti vel in quatuordecim diebus terminentur, si exquisitè acuti sint, vel protrahantur ad dies 40. si fuerint acuti ex decidentia, & quodammodò spurii; proinde quandocumque pleuritis ad decimumquartum diem judicata non sit, prorogari poterit ad quadragesimum, præsertim in aliam ægritudinem commutanda; unde si spatium quatuordecim dierum materia pleuritidis per tussim non fuerit expurgata, vertetur in suppurationem, & empyema; à die verò decimoquarto usque ad quadragesimum, nisi suppurata adhuc per anacatharsim expurgetur, à detento pure in pectore, vel pulmone, tabem, & phthisim inferet. Hinc humor, qui faciebat pleuritidem, duplicem subire potest mutationem; alteram quidem, ad diem decimumquartum coctionis, & suppurationis, alteram verò expurgationis, seu expectorationis, spatium quadraginta dierum, quo transacto, quia purulentus humor ob diuturniorè morā pulmonē simul, & sanguinem per cor circum-euntem inficit, planè tabē, ac phthisim, adeoque febrem habitualement, & consumptionem universalem affert.

Quod verò adjectum est in textu, illos liberari à die, qua fit ruptio, manifestè declarat, ob expurgationem in posterum subsequentem, revalescentiam exoriri, quemadmodum contigit Anaxioni, qui trigesimaquarta die judicatus est. Sed non per hoc, quod intra quadra-

ginta dies non sint repurgati, omnino fit, ut tabidi interire debeant, quoniam fieri potest, ut etiam ultra hoc tempus repurgatio protrahatur, & evadant: multoties enim accidit, ut vel ex multitudine, vel ex crassitie materie suppuratæ satis non sint dies quadraginta ad integrè explendam è pectore repurgationem, unde deinceps adhuc expectoratio desideretur, ac perduret.

At verò initium hoc quadraginta dierum, non erit à principio pleuritidis desumendum, sed à quo die maturatio, & ruptio apostematis facta est; etenim inde principium faciendum, à quo tempore puris expectoratio haberi potest: modò ante maturationem, & ante ruptionem apostematis nulla per anacatharsim expectanda repurgatio. Itaque cum inquit Hippocrates à die, qua fit ruptio, certè ab eo tempore computus quadraginta dierum faciendus est. Hinc etiam non nisi post quadraginta dies periculum erit futuræ tabis; quoniam tunc tabes accidit, quando materia purulenta in pectore retenta pulmonem infece-rit, illumque ulceraverit: verisimile autem est intra spatium quadraginta dierum pulmonem ab ulceratione illæsum posse perseverare, ut proinde si totum pus interea fuerit repurgatum, non solum à pleuritide, & à suppuratione, verum etiam à tabe æger facilè liberabitur.

At quo pacto dignosci possit jam apostema ruptum esse, indeque pus fuisse collectum in cavitate pectoris, plenè edocuit idem Hippocrates lib. Prænot. Caterum omnes suppuratos, ex his signis cognoscere oportet. Primum quidem si febris, non dimittit, sed per diem quidem tenuis est, noctu verò amplior, & sudores multi oboriuntur; tussēq;

actussendi promptitudo ipsis adest, & nihil memoratu dignum expuunt, & oculi cavi fiunt, & maxillæ ruborem contrahunt, & ungues quidem manuum curvantur, digiti verò calescunt, & potissimum summi, & in pedibus tumores fiunt, & cibos non appetunt, & pustulæ per corpus enascuntur. Et num in dextro, vel in sinistro latere pus collectum sit, his indiciis tradit. Si verò suppuratio fuerit in altero latere solum, vertere, & considerare oportet in his, num aliquem habeat dolorem in altero latere, & an alterum altero sit calidius, & agro in latus sanum reclinato, interrogare ipsum, an videatur ipsi grave quid ex superno latere incumbere? si enim hoc fuerit, in eo latere est suppuratio, in quo gravitas percipitur. Quod verò non in omnibus æquè suppurationes fiant, & neque suppurata apostemata æqualiter in ipsis dirumpantur, edocet expressè eodem loco, inquiens: At verò alie suppurationes rumpuntur, plurimæ quidem vigesimo die, alie verò trigesimo, alie quadragesimo, aliqua verò ad sexaginta dies perveniunt. Considerare verò suppurationis principium oportet, suppuratione facta a die, qua primum homo febricitavit, aut si fortè ipsum primum rigor apprehendit, & si pro dolore gravitatem sibi factam esse dixerit in eo loco, in quo dolebat. Hæc enim in principiis suppurationum fiunt. Ex his igitur initiis suppurationem juxta tempora prædicta futuram expectare oportet. Denique an citius, vel tardius futura illa sit, sic postremò concludit: Siquidem dolor, & spirandi difficultas ab initio ad sint, & tussis, & sputatio perseverans ad vigesimum diem pertingat, eruptionem tunc

tunc expectare oportet; aut etiam prius: si verò quietior fuerit dolor, & alia omnia pro huius ratione, eruptio posterius expectanda est. Necessè verò est accedere, & dolorem, & spirandi difficultatem, & sputationem ante puris eruptionem. Hactenus Hippocrates.

In calce tandem Aphorismi additur, *si verò non, in tabem transeunt*, hoc est, si spatium quadraginta dierum non fuerint ex toto repurgati, ratione scilicet detenti puris, pulmo inficietur, & ulcus contrahet, atque adeò tabem inferet; quoniam ex diuturna puris per tussim repurgatione, ejusdemque transitu per pulmonem, facilè is eroditur, & ulceratur; ab ipsius autem ulcere contingit tabes, & mors. Sed & insuper quodcumque materia ex pleuritide suppurata intrà hoc tempus expulsa non fuerit, & adhuc perdurat, vereri subit à præcedenti pleuritide, ejusque suppuratione, vomitum quoque in pulmone fuisse contractam, quæ dirupta puris productionem continuò foveat, ut propterea etsi jugiter per anacatharsim illa egeratur, perpetuò tamen alia, & alia ex ulcerato pulmone effluat, unde puris excreationem in longius tempus protrahat, atque perennet.

APHORISMUS XVI.

Calidum, ubi quis sæpius eo utitur, hæc mala affert, carnis effœmationem, nervorum imbecillitatem, mentis torporem, profluvia sanguinis, animi defectionem: quibus mors succedit.

DEtrimenta calidi hîc memorat Hippocrates, relaturus in sequenti aphorismo ea, quæ ex fri-

gido proveniunt. Cùm autem *calidum* dicat, non *calorem*, quæri hoc loco primum potest, quid nomine *calidi* voluerit intelligere; & quidem ex ipsamet voce clarè deducitur, non calorem unde sumptum pro qualitate, ut Scholastici intelligere solent, is acceptum voluit, sed rem potius calidam, potissimum quia, medicè loquendo, quæ corporibus adhibentur calida, nonnisi res calidæ sunt, sive medicamenta, sive alimenta, sive alia quæcumque corpora illa sint, cùm nunquam sensiones in corporibus fiant, nisi à rebus similiter corporeis.

At si rem calidam, calidumque corpus hoc loco designare voluit, videndum de quo specialiter id dictum intelligat. Et benè Fuchsius in *comm.* de aqua calente exponit, quod colligit *ex lib. de usu humorum*, unde præsens aphorismus videtur desumptus; quandoquidem damna, quæ hîc à calido memorantur, nisi illud cum humore conjungatur, neutiquam subsistere poterunt, nam corpora calida, & arfacientia, idest quæ calorem siccitati conjunctum habent, haudquam possunt corporis effœmationem, nervorum imbecillitatem, mentis torporem, profluvia sanguinis, animi defectionem, & alia consimilia mala parere, cùm potius à siccitate, seu rebus siccis, ac exsuccis contrarii effectus oriantur. Igitur probabilius est, voluisse Hippocratem hîc notare calida in humoribus, seu liquoribus quibuscumque, potissimum verò in aquis, quæ inter liquida, humidaque corpora primum locum obtinent: quamquam & usu diuturnus hypocauti, longa insolatio, atque ad ignem immoderata excalectio, & longior sub Sole mora, possit id ipsum afferre,

sed planè diuturniori tempore, ac exitu difficiliori.

Num insuper de calido intrà corpus assumpto, an potius de calido extrinsecùs admoto, potest ulterius dubitari. Et verisimilius videtur dicendum, sermonem hìc haberi de calido exterius admoto, potissimùm de balneis, ac lotionibus aquarum, tam thermalium simplicium, & naturalium, quàm artificialium, & compositarum. Illa enim, ut experientia constat, cutim laxando, & humefaciendo, sudorem promovendo, sanguinem eliquando, & lympham extenuando, bene possunt, ac solent carnes, artus, nervos, & viscera quaecumque corporis diluere, mollicicare, delaxare. Quæ verò interius assumuntur, præterquam quod sæpè sæpius per fermenta ventriculi consentanea, vel dissentanea calorem amittunt, neque tam facilè in totum corpus calefactoriam vim, & calorem, quem actualem vocant, communicare valent, licèt attenuando, dissolvendo, acuendo sanguinem, sint in causa, ut corpus aliquantulum incalescat. At verò passim experimur balnea, tum naturalia, tum artificialia promptissimè solere ejusmodi corporis delaxationem parere.

An præterea calidum intelligi debeat moderatum, vel immoderatum, ulterius quæri potest. Et fanè licèt immoderatum calidum efficacius in his omnibus, de quibus sermo in præsentì aphorismo est, operetur, nihilominus si verba textus attendantur, videtur calidum adhuc moderatum, fuisse hoc loco consideratum; etenim in aphorismo dicitur, *ubi quis sæpius eo utitur*: non videtur autem verisimile, quod quis sæpius utatur calido immode-

rato, quod toleratu non est tam facile. Immo si fortassè Hippocrates voluerit hoc aphorismo morem Veterum vituperare, qui frequenter balneis utebantur, certè, quia usus balneorum non erat, nisi cum moderato calore, dicendum erit moderatum calidum fuisse in hoc aphorismo descriptum. Accedit, quòd calidum hìc contraponitur frigido sequentis aphorismi; at verò in aphorismo sequenti, non nisi frigidum moderatum considerandum exponitur; igitur & moderatum calidum in præsentì hoc aphorismo, erit quoque intelligendum. Verumtamen pro moderato non intelligimus, quod consentaneum naturæ est, & nullum excessum supra mediocritatem habet, sed quod à mediocritate quidem recedit, non tamen extremum frigoris gradum attingit, ut propterea non sit conveniens naturæ, sed nec sit omnino in summo positum. Id ipsum quoque dicendum de calido, quod non sit in excessu caloris urentis, sed à mediocritate naturæ consentanea declinet. Debet autem calidum istud, etsi non multum excedens, diutius tamen, iteratis vicibus, & sæpius adhiberi, ut exinde nocumenta in textu moderata subsequi possint, aliter si semel, & brevi adhiberetur, quia non multam in partibus corporis læsionem induceret, neque posset relata in aphorismo detrimenta afferre. Jure igitur optimo notatum est ab Hippocrate, *ubi quis eo sæpius utitur*: quibus verbis denotatur frequens, & iterata rei calidæ administratio: hac quippè ratione calidum, etsi non multum excedens, potest memorata damna parere, nam quod semel, & brevi inferre nequit, iteratis vicibus, ac frequenti usu, bene poterit excitare.

Damna

Damna autem, quæ hoc loco describuntur, partim spectant ad operationes animales, partim ad vitales, partim denique ad naturales: ad animales quidem nervorum imbecillitas, & mentis torpor: ad vitales profluvia sanguinis, & animi defectiones: ad naturales demum carnis effœminatio, & totius corporis languor.

Qua verò de causa carniū effœminatio à calido proveniat, facile quis dijudicabit, attenta perspiratione copiosiori cutis, & majori laxitate, quæ tum sudore, tum abundanti per poros cutis evaporatione, è corporibus calidis contingit; hinc motus Aristoteles *lib. de long. & brevit. vitæ*, dixit, Æthiopes, & qui Regiones sub Zona Torrida inhabitant, nedum imbecilles, & effœminatos observari, verum etiam brevissimam vitam ducere, languescere nimirum vitali partium calore, & dissipatis ex ambiente calido spiritibus, unde totius corporis, & operationum vitalium languor.

Nervorum quoque imbecillitas ex eadem causa provenit, etenim quotiescumque partes solidæ corporis, & viscera quæcumque languent, tum sanguis, tum omnia fermenta ex illo derivantia, plurimum dissoluta, nequeunt liquorem nervorum suggerere talem, ac tantum, qualis & quantus necessarius illis est. Sed & fibræ nervæ plus justo à calore delaxatæ, neque firmæ, & constantes esse possunt ad pondus partium sustinendum; quomobrem nervorum imbecillitas contingit, unde etiam reliquæ partes, immò totum corpus languidum observatur in omnibus præsertim operibus animalibus. Notavit autem signanter Hippocrates mentis torporem, & nervorum imbecillitatem,

Tozzi Op. Med. Tomo IV.

ut tum ea, quæ ad hegemonicas operationes pertinent, tum etiam, quæ ad operationes sensitivas, & motivas sunt addicta, sub his duabus vocibus comprehenderet. Et quidem mentis torpor, non nisi significat hebetudinem operationum animalium, pertinentium ad sensus internos, scilicet ad imaginativam, æstimativam, & memorativam; nervorum verò imbecillitas complectitur languorem sensuum externorum, & motuum animalium, qui non nisi per nervos in musculis peraguntur. Quòd autem calidum frequenter adhibitum valeat etiam sensus internos hebetare, patet manifestè ex eisdem rationibus superius recensitis, nam ex illo funduntur humores, sanguis dissolvitur, succus nerveus extenuatur, spiritus dissipantur, quibus omnibus deficientibus, necesse est plurimum quoque hebescere, & infringi prædictas operationes animales, quæ absque sanguine vegeto, & nervorum liquore repurgato, itemque sine præpollentibus spiritibus perfici non possunt.

Neque solum læduntur, quæ ad animale partem pertinent operationes, verum etiam, quæ ad vitales, ubi calidum intra fines mediocritatis non fuerit coercitum: etenim cum id ejus sit virtutis, ut rarefaciat, attenuet, dissolvat, aperiat, proculdubio laxatis venarum, & arteriarum osculis, atque eliquato sanguine, facile hæmorrhagias excitare potest, & quidem non solum reperatione, sed etiam erosione vasorum, præsertim cum in aliquibus propter acritatem, promptè admodum in fermentationem adigitur, & partim distendendo, partim etiam proritâdo extrâ sua vasa profluit. Hac porrò ratione fit, ut hæmorrhagiæ

rhagiæ facilius contingant æstate, & in Regionibus calidis, quàm hyeme, & in Regionibus frigidis, quandoquidem per æstatem, & in Regionibus calidis, sanguis rarefcit admodum, & promptè fermentescit, secus verò hyeme, & in Regionibus frigidis. Quia verò non explicuit Hippocrates, unde sanguis ex frequenti usu calidorum profunderet, an sam præbet dubitandi, num ex naribus, ore, hæmorrhoidibus, an ex aliis partibus corporis erumpat. Et quidem credere licet, ex omnibus indiscriminatim posse manare, cùm calor æquè benè universum sanguinem fundendo, possit omnes, & quas cumque venas, aut arterias delaxare, ac aperire; sed tamen specialius poterunt narium arteriolæ, ac venulæ veluti delicatiores, ejusmodi incommoda subire, præsertim in adolescentibus; quamquam in cæteris etiam hæmorrhoides referari possint pro varia corporum affectione, & sanguinis in hanc, vel illam partem irruptione faciliiori.

Ufus est denique nomine profluvii, græcè hæmorrhagiæ, ut nimirum ostenderet non quamcumque sanguinis evacuationem exinde designari, sed largam, copiosam, & fortassè etiam iteratam, ad differentiam illarum sanguinis evacuationum, quæ guttatim solum fiunt, & modica dumtaxat quantitate, quæque stillicidia à medicis appellari solent, cùm paucæ nimirum stillæ sanguinis erumpunt. Quòd autem exitus sanguinis copiosus, & immoderatus hic intelligatur, patet ex sequenti textus dictione: *animi defectionem*; nam animi defectio non ex quacumque sanguinis evacuatione, sed ex immoderata, & incompossibili procedit.

Contingit autem animi defectio tum ex immodica sanguinis eruptione, tum etiam ex spirituum, & partis ejusdem floridæ nimia dissolutione; quamobrem his deficientibus, vivens animo deficit, & perit. Pro animi verò defectione, licet græcè scriptum sit leipothymia, nihilominus cùm exinde dicatur subsequi mors, certè fortis, & vehemens illa intelligenda est, quæ proximè accedat ad syncopem, nisi tamen leipothymia pluries repetat, quo casu, etsi levior, quàm syncope sit, ob repetitionem tamen, facile posset mortem afferre, præsertim ubi quis natura debilis, ex immoderata sanguinis evacuatione nullo negotio à quacumque animi defectione succumbit.

APHORISMUS XVII.

Frigidum autem convulsiones, tetanos, livores, rigores febriles.

Pergit nunc Hippocrates ad enarranda mala, quæ ex frigore viventibus contingunt, & pari loquendi formula, non frigus, sed frigidum recenset, pro quo etiam corpus, & rem frigidam intelligere est, eamque potissimum cum humido conjunctam, veluti, aqua frigida, nix, glacies, aliæ res consimilis, quamquam quodcumque corpus frigidum, etiam durum, solidum, siccum, pro rata sua intelligi possit, quemadmodum de calido superius dictum est; sed & aer ipse, qui inter corpora fluida collocatur, si frigidus plus justo fiat, nive, grandine, gelu, itemque ventis borealibus, pari ratione eadem detrimenta inferre potest, ut propterea quodcumque extrinsecus viventia malè afficiens, frigore cujusvis generis, poterit præ-

prænarrata mala excitare; verumtamen cum frigidum per comparisonem ad calidum, longe admodum infensius sit hominum vitæ, quæ calore fovetur, & conservatur, planè, ut ejusmodi mala corpori incutiat, intensiori gradu molestare debet, etenim ab intraneo calore aliquatenus repercutitur, immò facta constipatione in poris cutis, aliquandò vis illius fortificatur; nisi propter excessum externæ partes hebetentur, & mortificentur.

Cum igitur extrinsecus ad motum, vel diuturniori tempore, vel intensiori gradu, cutis poros constipando, effluvia impedit, & sanguinem circumeuntem in apicibus arteriarum per partes extimas corporis excurrentium, figit, & coagulat, in causa est, ut aliquando etiam mortificatio subsequatur; Hinc ab Hippocrate inter præcipua illiusdamna referuntur convulsiones, tetani, livores. Convulsiones quidem, & tetani, obrigiditatem, & contractionem inductam in fibris nerveis, & congelationem in ipso nervorum liquore, qui propterea nequeat membranas irrorare, & pro rata sua vigorem iisdem impertiri. Convulsiones autem hoc loco memoratæ, non motus convulsivi, sed veræ, & propriæ convulsiones intelligendæ sunt, per quas nervi, & musculi rigidi, immobiles, & inflexibiles redduntur, cum frigoris sit hebetare, obtundere, & motum cuiusque rei adimere. Tetani verò ad convulsiones etiam referuntur, & quidem universales, cum ex illis universum corpus rigidum, & immobile fiat, ut neque ad anteriora, neque ad posteriora flecti possit. Id autem non semel expertum est in his, qui per loca nivosa, & montana, hyemali tempore iter facientes,

ingentis frigoris incommoda subire coacti sunt.

Accidunt prætereà ex frigore livores, seu nigrities, & mortificationes in partibus externis eandem ob causam, quoniam sanguis præ frigore constipante, nequit per eas partes circumire, ut proinde nec illas potest vivificare, unde veluti emortuæ, & viribus, ac calore vitali destitutæ, nigrorem subeunt, ut in cadaveribus experimur. Observatum non rarò etiam est in tantam labefactionem externas partes corporis, potissimum manus, & pedes incidisse, ut gangrænam incurrerint, & deinde à reliquis partibus sejunctæ sponte sua conciderint, potissimum cum ad ignem, aliudque corpus impensè calidum, repente fuissent admotæ. Quo moniti itinerantes per ejuscemodi loca, non statim ad extremum calorem, & ignem se exponunt, sed sensim ac lente pannis laneis, aut tepenti aqua, calorem revocant, quousque paulatim sanguis per suos ductus remeare incipiat, & circuitum pristinum repetere videatur. Addit in textu Hippocrates *rigores*, qui licet in vulgata versionelegantur febriles, revera tamen febriles non sunt, sed tantum per analogiam tales dicuntur, quòd scilicet quemadmodum initiantibus accessionibus febrilibus rigores accidunt cum inæquali corporis concussione, & sensu frigoris, ita ab externo frigore, vel aeris, vel aquæ circumambientis, corpus universum riget, & contremiscit, inita quodammodò pugna inter sanguinem arteriosum, vi cordis, & portione vivifica impulsam, ac frigoris externi vi constipantem, & repercutientem, atque ita inæqualiter cutim commoventem, & contorquentem. In his autem mirum,

quantum valeat iteratus usus aquæ ardentis dephlegmata; etenim ipsa sapius, leni frictione, admota, simul poros constrictos referat, & sanguinem hærentem dissolvit, atque in motum concitat, & partes roborat, ut propterea cutaneos istos livores, per quam optimè deleat, citrà suppurationem, aut ulcerationem. Illam autem, ut efficacius operetur, solent practici vigore, adjecta convenienti portione camphoræ, vel etiam infusis floribus, & summitatibus roris marini ad plures dies in loco calido ad digestionem convenientem detentis, ut in ea, quæ Reginæ Hungariæ nominatur.

Cæterum quòd hæc mala ab externo frigore evenire Hippocrates doceat, palàm fit, ex nuper dictis de rigore, & livore partium externarum; quippe rigor, & livor non nisi ad partes extimas corporis pertinere possunt. Res autem frigidaè interiùs assumptæ non solent ejusmodi mala parere; quin & nostra tempestate gelidæ potiones tam in usu frequenti sunt, ut in deliciis habeantur, & licet procedente tempore cruditates, atque inde alia incommoda pariant, haud tamen memorata hæc in aphorismo mala excitare observantur.

Quo denique pacto inductis ex frigore nocumentis occurrere possimus, non erit abs re hoc loco breviter recensere. Et primùm animadversione dignum videtur, quòd quamvis his ex frigore malis calefacientibus debeamus opitulari, non tamen illa affatim, ac violenter, sed sensim, atque sensim erunt administranda; non minùs enim nocere solent frigefactis partibus calorifica subitò, ac repentè administrata, quàm frigida, quæ antea

læserint: experientia enim cuique notum est, argentes manus igni repentè admotas, longè graviolem molestiam subire. Itaque oportebit paulatim amissum in partibus calorem restituere, pannis laneis excelsa factis, itemque vino calente, aqua ardente, & similibus, cavendo immoderata, humefacientia, & violenter operantia.

APHORISMUS XVIII.

Frigidum inimicum ossibus, dentibus, nervis, cerebro, spinali medulla: calidum verò utile.

R Etulit præcedentibus aphorismis Hippocrates detrimenta à frigido, & à calido universum provenientia, hoc nunc aphorismo recenset partes, quibus frigus specialius noceat, & calidum contrà proficiat: & quidem frigidum inimicum ossibus, cerebro, spinali medulla, nervis, & dentibus; calidum verò eisdem utile esse proclamat.

Rationem ferè communiter Interpretes desumunt à natura, & conditione partium spermaticarum: etenim inquirunt, carnosas partes, veluti à sanguine progenitas, sua natura calidas esse, spermaticas verò frigidas: sicut autem carnosæ partes melius resistunt agentibus frigorificis, ita ex adverso partes spermaticæ ab his plurimùm offenduntur. Verùm id in controversiam vertit jampridem Laurentius Joubertus *lib. 1. Paradoxor*; qui acriter contendit partes spermaticas veluti à semine calidiori oriundas, calidiores carnosis, seu sanguineis debere dici, juxta receptam veterum opinionem, qui existimabunt omnes partes corporis vel à semine, vel

vel à sanguine, ceu duobus generationis humanæ comprincipiis exoriri; cumque ossa, cerebrum, spinalem medullam, nervos, membranas, aliasque partes similes à semine profectas dicerent, propterea spermaticas illas appellarunt. At cum Recentiorum Anatomicorum observationibus compertum jam factis sit, omnes partes corporis primordia sua sumere à materia illa albuginea in ovo contenta, nutritionem verò, & incrementum solum à sanguine, ejusque portione glutinosa, proinde fit, ut ejusmodi partium corporis distinctio vana apud ipsos reputetur, sed solum, quæ irriguum sanguinem affluentiùs excipiunt, sint vivaciores, calidioresque, quæ verò exiles tantum arteriolas, & venulas sortiuntur, debiliores, minusque calidæ observentur; unde quæ carnosæ dicuntur, ab abundantiori sanguine, quo irrorantur, sint calidiores, reliquæ verò spermaticæ appellatæ, ob sanguinis paucitatem, & exilitatem arteriolarum, dicantur frigidæ.

Quo autem pacto frigidum enarratis partibus officiat, breviter hic queri potest, nam etsi hoc apud omnes ratum sit, non cunctis tamen æquè benè videtur explicatum, potissimum quia experimur frigidam etiam aquam quibusdam partibus magnoperè prodesse, unde dentes, & os, frigida aqua abluti firmanentur magis, & oculi pari ratione frigidis lotionibus mirificè vigorantur; unde Q. Serenus:

*Sapè etiam gelida gingivas collue
lympba,*

Dentibus ut possis validum firmare tenorem.

Et Pl. lib. 28. c. 4. inter remedia doloris dentium, numerat collutionem ex aqua frigida matutino tempore.

Verum facile difficultas solvetur, attenta causa, unde calor in viventibus habeatur: is quippè à solo sanguine est, adeoque quas partes sanguis benè irrigat, & affluenter fovet, simul una calefacit, & roborat; at verò ubi nec irrigare, neque fovere potest, non solum frigus per sentitur, sed & gravis noxa percipitur. Cum igitur cerebrum, nervi, spinata medulla, perioestia, membranæ, aliæque partes modico sanguine irroratæ, à frigore offendantur, gravem noxam subeunt, ab impedita in ipsis, vel saltem magnoperè hebetata sanguinis circulatione. Sed nedum in specialibus partibus corporis id evenire experimur, verum etiam in omnibus corporibus debilibus, & extenuatis, quæ vehementer à frigore læduntur, quoniam in his à frigore torpescit sanguis, ejusque circuitus præpeditur, immò aliquoties etiam hæret, unde postea tumores, abscessus, inflammationes exoriuntur. Sed & aqua frigida non dentibus, sed gingivis potius prodest, facta nimirum in ipsis corrugatione, retusisque in ipsas irruentibus acerbis humoribus, ex quibus sæpè numero vacillant. Hinc patet quoque de frigido extrinsecus occurrente sermonem Hippocratem hic habuisse; cum à frigore præsertim ambiente, vel aeris, vel aquæ gelidæ, vel ventorum borealium, cerebrum, spinalem medullam, dentes, & ossa vehementer afficiantur.

At verò quemadmodum à frigore prænarratæ partes graviter lædi solent, ita ex adverso convenienti calore plurimum juvantur; unde Hippocrates in aphorismo subjungit, *calidum verò utile*. Et quidem non hic intelligendum calidum vehemens, & immoderatum, nam ex
supe-

superiùs traditis, non minùs illud nocere potest, cùm repente, & violenter adhibetur, quàm frigidum præcedenter inductum; ideòq; moderatum, & conveniens esse debet. Quamvis comparatione facta inter frigidum, & calidum excedenti gradu applicatum, levior semper noxa à calido, quàm à frigido partibus superiùs memoratis inferatur. Hinc in omnibus affectibus cerebri, spinalis medullæ, nervorum, ossium, aliarumque partium exanguium, uti solemus medicamentis tum extrinsecis, tum intrinsecis, moderatè calefacientibus, quin & pro spina, & nervis inde exorientibus, semper prodesse consueverunt inunctiones ex oleis, ac linimentis calorificis, quibus scilicet modicus harum partium calor reviviscat, & humores, si qui fortasse ibidem hæserunt, leniter digerantur, & extenuentur.

APHORISMUS XIX.

Quaecumque refrigerata sunt, excalefacere oportet, exceptis iis, quibus sanguis fluit, aut fluxurus est.

QUod præcedentibus aphorismis Hippocrates de incommodis calidi, & frigidi, quæque à frigore mala oriri possent, partibus potissimum exanguibus, nunc in correctionem illorum subdit, excalefacienda esse ea, quæ præter modum sunt refrigerata; ut propterea videatur, veluti per corollarium superioris aphorismi, documenta tradere, quo pacto tractanda sint membra à frigore malè affecta: etenim si calidum illis utile est, certè cùm fuerint refrigerata, calorificis erunt in statum naturalem reducenda, adhibita tamen in ejusmodi partibus

malè affectis distinctione; nam alio modo cerebrum, ac spinalis medulla, & alio modo dentes, ac ossa, calefacientibus fovenda erunt.

Quamvis insuper indiscriminatim dixerit refrigerata calefacere oportere, & quidem tum extrinsecus, tum intrinsecus, calorificis adhibitis, nihilominus attentis his, quæ in præcedentibus aphorismis dicta sunt, verisimiliùs videntur extrinsecus calefacientia commendata, quemadmodum sunt foci, unctioes, balneationes, &c. Neque solum earum rerum, quæ virtute, ac potentia calorem in partibus valent excitare; sed etiam quæ actuali, ut vocant, calore, fovere, & in pristinum statum vim, facultatemque illarum restituere solent, quemadmodum superiùs diximus de vino calente, de aqua calida, de balneis aquarum thermalium, aliisque similibus. Id ipsum etiam assequi licebit beneficio aeris, vel natura sua calidioris, vel ope artis excalefacti, ut fieri solet in laconico, ubi etiam aromata diversi generis, suavem odorem spirent, ut exinde & calor, & robur partibus suggeratur.

Generale autem hoc præceptum de calefaciendis partibus refrigeratis in aphorismo traditum, excipit Hippocrates in his, quæ vel sanguinem fundunt, vel fusioni obnoxie sunt, unde in textu subdit: *exceptis iis, quibus sanguis fluit, vel fluxurus est*, vel, ut melius vertit Fuchsius, *unde sanguis profluit, aut profluxurus est*: etenim licet, quæ refrigerata sunt, ut reviviscant, calorifica expostulent, nihilominus indicatione desumpta à sanguine fluente, vel fluxuro, veluti à prævalentiori, atque urgentiori, ejusmodi calefacientium administratio locum habere non poterit, quippe cale-

calefacientia fluentem sanguinem magis funderent, & vasa aperta, aut relaxata latius referarent, quandoquidem calidi, est aperire, attenuare, dissolvere; frigidi verò constipare, & cohibere. Hinc in gratiam sanguinis, ne plus justo fluat; immò potius, ut decet, intra suos ductus detineatur, à calorificis cavendum, & corrugantia frigefacientia administranda erunt.

Cujus autem conditionis ista esse debeant, non admodum difficilè erit determinare. Equidem etsi frigefacientia generaliter sanguini fluenti cohibendo proficua sint, cum subindè sanguinem in suo motu remorentur, & vasa ad aperta corrugent, unde nix sola sæpius fluentem sanguinem cohibuit; nihilominus si præter vim frigefactoriam adnexam habeant facultatem stypticam, & adstringentem, proculdubio efficaciora erunt, cujusmodi sunt, quæ ponticam, austeramque conditionem sunt fortita. Hinc hypocistis, acacia, myrtilli, plantago, centinodium, gallæ immaturæ, cortices granatorum, & alia hujus generis, præsertim albumine ovi excepta, plurimum in his conferre consueverunt. Ex vitriolo etiam, & chalybe conficiuntur alia sistendo sanguini efficacissima, itemque ex alumine, bolo armenia, terra sigillata, cæterisque. Hinc celebris est in usu externo aqua illa ex his composita, arterialis dicta, aqua aluminosa, pulvis sympathicus, vitriolum ustum, cataplasma ex pilis leporinis, albumine ovi, & scoriis ferri, &c. Verùm hæc, & alia plura ex praxi petenda sunt.

APHORISMUS XX.

Ulceribus frigidum quidem mordax, cutem obdurat, dolorem insuppurabilem facit, livorem inducit, rigores febriles, convulsiones, tetanos.

CUM præcedenti aphorismo Hippocrates frigorifica commendavit in his, quibus sanguis fluit, aut fluxurus est, etsi à frigidis videantur lædi posse, nunc usum illorum excipit in illis partibus, quæ ulceratæ sunt; licet in his de sanguinis profluvio timeatur, quoniam, inquit, frigidum ulceribus nocuum est, & valdè perniciosum.

At liceat aphoristicam hanc sententiam clariorem reddere ex *lib. de liquidorum usu*, unde illa desumpta videtur; nam ex versione Leonice-ni, nedum obscura est, sed multis difficultatibus obvoluta. Scribitur autem *cap. lib. de liquidorum usu*. *Ulceribus frigida (id est aqua) mordax est, cutem obdurat, dolorosa non suppurari facit, livefacit, nigrefacit, rigores febriles facit, convulsiones, retro, & ante distentiones.* Vel, ut exponit Cardanus: *Frigidum ulceribus mordax, & obdurat cutem, seu ulceris labia, dolores facit, & quæcumque in ulcere sunt, prohibet suppurari.*

Dicitur primò frigidum mordax, quod num intelligendum sit, ut in causa, an verò potius, ut ex effectu, difficultas esse potest. Etenim si ut causa malorum hic enumeratorum intelligatur, profectò non omne frigidum ulceribus nocuum dicendum erit, sed dumtaxat, quod mordax, pungens, & acutum est; si verò intelligatur in effectu, quodlibet frigidum etiam leve,

leve, mordax, & nocuum fiet ulceribus.

Et quamvis ferè cunctis Expositioribus congruentius videatur, adjectum frigori verbum illud, *mordax*, referendum esse ad effectus ejusdem, ut inter alia illius mala præcipuum illud sit, partem ulceratam mordere, vellicare, ac pungere, quod sanè cuique ulceri valdè nocuum est, cùm ulcus quodlibet sua natura possulet, ut sanetur, à quacumque irritatione, & molestia liberum esse, eo quòd per irritationem facilè ad partem ulceratam humores confluant, & vasa proritata aperiantur; si nihilominus consideretur mordacitas frigoris in causa, ita ut sensus fiat, non omne frigus ulceribus nocere, sed quod mordax, & acutum est, cohærebit planè Hippocratis menti: etenim illud frigus propriè noxium partibus ulceratis percipitur, quod intensum, pungens, & mordax est, cujus causa cutis corrugatur, sanies detinetur, & pars ulcerata compungitur, & elanguet. Sic non rarò à Chirurgis adhiberi consueverunt ulceribus medicamenta tum actu, tum potentia frigida, quæ tamen, quia moderatè talia sunt, nullum incommodum afferunt; at verò si in gradu excedant, molestissima fiunt. Et quidem frigidum immoderatum, quale glaciei, poros cutis discerpit, & extorquet, cutim ipsam obdurat, livores, & rigores efficit, quemadmodum in Aphorismo dicitur. Illud porrò certum omninò erit, frigidum hoc loco memoratum, quod actuale dicitur, potius intelligendum esse, quàm quod potentia est frigefactorium: quamquam Fuchsius, Cardanus, alique plures Interpretes, nomine frigidi hìc memorati, aquam frigidam dumtaxat intellectam velint,

qualis est glacialis, quæ & actu, & potentia frigorifica est, & non minus qualitate, quàm corpulentia, immò mistura salium, præsertim halinitri, partibus viventibus nocua observatur, adeòque longè magis ulceratis, & morbo affectis inimica. Quòd prætereà frigus cutim obduret, patet manifestè, quoniam pori cutis ab illo constipantur, & adeò arctè vinciuntur, ut perspirationi impedimento sint; quamobrem jure optimo sub nomine amicitia à quibusdam fuit appellatum; cùm autem partes omnes strictim uniat, & coarctet, ea ratione simul obdurat, quemadmodum experimur in luto; atqui humana cutis à frigore hyemali adeò constringitur, ut sapissimè obrigescat, & præter duritiem, aliquandò emoriatur. In ulceribus autem frigus, circumposita labia densando, conglutinationem impedit, & sanguini vivificanti obicem facit.

Sed qua ratione scriptum sit *dolorem in suppurabilem* efficere, dubium esse potest. Verùm ex *cap. loco de liquidorum usu* solvitur difficultas: ibi enim scribitur *dolorosa non suppurari facit*: id est ea, quæ circa labia ulceris continentur, & per suppurationem digeri, atque expurgari deberent, admoto frigore detinentur, & suppurationi non subiiciuntur: suppuratio namque ope caloris peragitur, cujus causa partes heterogeneæ ab invicem disjunguntur, & sequestrantur; at verò per frigus unà simul vinciuntur, & commiscentur. Sed & fermentatio, quæ omninò necessaria est in suppuratione, per frigidi administrationem penitus inhibetur; unde qui humor circum labia ulceris detentus, doloremque afferens, in suppurationem desineret, per frigus
in pus

in pus verti nequit, adeoque insuppurabilis fit; Hinc dici quodammodo potest, frigus suppurationem impiedendo, dolorem facere insuppurabilem.

Inducit quoque frigus livorem, & rigores febriles, pari modo, ac superius de effectibus frigoris generatim dictum est. Si enim frigus hebetat, obtundit, & mortificat, planè livorem nullo negotio pariet. Rigores autem febriles induci dicuntur à frigore per analogiam eorum, qui febribus rigorosis contingunt, ut etiam antea notatum est: quamquam possint etiam rigores revera febriles, & febres ipsæ exinde exoriri, quatenus humores in ulceribus detenti, nec benè repurgati, circumeuntem sanguinem inficiunt, & indebitam cum ipso fermentationem excitant; unde postmodum febres rigoribus sociatæ, immò cum aliis gravioribus symptomatibus conjunctæ: ulcera siquidem sordida, & malè affecta, præsertim cum virulentam conditionem nacta fuerint, facili negotio febres acutas excitant, & cum rigoribus malignitatem attestantibus conjunctas. Quòd si fortassè suppurationem intraneam subeant, ut non rarò fieri solet in partibus musculosis, & cavum admittentibus, certè rigor inde sequetur, & febris, juxta dictum ejusdem Hippocratis 2. aphorif.: *... dum pus conficitur, rigores, & febres expectare oportet magis, quam iam confecto.*

Convulsiones denique, & tetanos frigus parit in ulceribus, quoniam ex superius traditis, frigidum nervis, & cerebro inimicum, absque ullo ulcere convulsiones, ac tetanos affert; quanto magis excitabit in ulceribus, ubi nedum saniei ex ulcere prodeuntis pravitate, sed & irrita-

tione in partibus ulceratis inducitur, quam maximè possunt nervi, & nervorum fibræ, saltem per consensum affici, & impensè proritari, cum nulla pars extima sit, quæ sensu suo non sit prædita, adeoque nervis plurimis referta; quandoquidem in ulceribus fieri nequit, quin cutis, panniculus carnosus, musculi, aliæque partes nerveæ collaudantur, ac dissolventur. Sed & mala membris particularibus illata, potissimum ab ulcerum sanie contingunt, quæ si fortassè per cerebri medullam diffundatur, aut etiam in spinam decumbat, planè nedum convulsiones particulares accident, verum etiam universales, quales tetani, in quibus, & ad anteriora, & ad posteriora, corpus redditur rigidum, & inflexibile; atque hinc, ubi in aphorismo scribitur, *tetanos*, in supracitato lib. de liquidorum usu, clariùs exponitur *retro, & ante distentiones*. Cæterum frigus potissimum mordax, & intensum duplici de causa ulceratis partibus obest, altera ex detenta sanie plerumque corrupta, altera ex hebetudine, aut mortificatione; unde partes distentæ, aut resolutæ postremo remanent.

APHORISMUS XXI.

Est autem, ubi in tetano sine ulceratione, juvene benè carnosus, æstate media, frigida aqua multa perfusio calorem revocat. Calor autem hæc solvit.

M Eliùs vertit hanc ex græco Codice sententiam Fuchsius, inquit: *Nonnunquam in distentione sine ulcere, juvene mediocri corporis habitu prædito, æstate media.* Hac quippe ratione coherentius nectitur

Etitur hic aphorismus præcedenti : sed & clarius Heurnius: *Sed tamen fieri potest, ut in tetano ulceris experte*; ut propterea sensus sit, aliquando frigida aquæ usum utilem esse posse; sive, ut mavult Cardanus, existimans tacitæ cuidam objectioni ex hoc aphorismo responderi, si fortasse quis opponeret, frigidam aquam in distentione nervorum aliquando profuisse, sed quidem non nisi ex accidenti solum id evenire, atque in juvene bono corporis habitu prædito, in media ætate, & absque ullo ulcere. Fallitur ea propter hinc Galenus, qui putat id perpetuò agendum in quacumque convulsione, dummodò prædictæ adsint conditiones; nam quod aliquando in usum duci potuit, & ex accidenti tantum proficere, perperam generaliter prolatum, aut in cunctis commendatum, quis audiet? aliter omninò temeraria dicenda foret ejusmodi convulsionis curatio, quæ omni ex parte periculosa, vel admodum dubia est; cum tamen idem Hippocrates in suo Jurjurando se quodcumque dubium omninò vitaturum pollicetur. At singulas conditiones, quas in aphorismo Hippocrates vult esse considerandas, breviter perpendamus.

Inquit primò *in tetano sine ulceratione*: in tetano quidem, in quo tam partes anteriores, quam posteriores sunt æqualiter distentæ, ut propterea uniformiter frigida aquæ perfusio facienda sit, & æqualis. Si aliqua partes tantum forent affectæ, puta anteriores, certè non bene constaret, ubi aquæ frigida profusio facienda foret, & num potius pars sana exinde læsionem subiret, quam laborans juvamentum esset receptura; *sine ulceratione* verò, hoc est, quòd nullum ulcus corpus affe-

tum patiatur, nam ratione ulceris, aquæ frigida perfusio prohiberetur, quoniam frigidum ulceribus nocuum præcedenti aphorismo demonstratum est, unde nullum planè adjumentum in tetano sequeretur, & ex adverso maximum detrimentum ulceratæ parti inferretur, ut patet.

Amplius dicitur: *juvene benè carnosio*; pro quo melius Fuchsius, *mediocri corporis habitu prædito*: etenim in græco Codice legitur *ῥωσῆρος*, quod non carnosum omninò, & obesum, neque gracile intelligendum est, sed quod mediat inter utrumque. Obesa enim corpora propter pinguedinem, & venarum, atque arteriarum exilitatem, non multò potiuntur calore, atque adeò facile succumberent tantæ aquæ gelidæ profusioni; Graciles verò, utpotè excarnes, neque sufferre possent frigoris vim ex aqua gelida, sed nec impetum ejusdem repentinum, utpotè qui non benè resistunt frigidis alterantibus, immò ab his facillimè læduntur. At verò, qui medii sunt inter obesos, & graciles, moderatè carnosii, græcè *ῥωσῆροι*, utrumque multo facilius sufferunt; sed & ob sanguinis floriditatem, indeque vitalem calorem, ac convenientem carniū habitudinem, & fortem viscerum texturam, minimè à frigida profusione debilitantur, sed magis, magisque potius vigorantur, facta in poris partium constitutione; quamobrem præter bonam corporis constitutionem carnosam, additur in textu, esse oportere *juvenem*, cum in hac ætate quæcumque in sanguine, & visceribus necessaria sunt, exquisitissimè inveniantur: senes autem, & pueri, veluti impotentes, ab ejusmodi remedii administratione excluduntur;

tur; & meritò, quia pueri carnes molles admodum habent, ac sanguinem glutinositate potius, quam floriditate præpollentem; & senes in utrisque deficiunt. Jure ergo optimo conjunxit Hippocrates juventutem, & carnosam corporis constitutionem, ut ex utroque capite robur partium, & calor vitalis validus in sanguine præexistat, atque per frigida profusionem vehemens in sanguine fermentatio promoveatur.

Subditur præterea *estate media*, vigente scilicet æstu summo in aere: cum enim eo tempore pori cutis laxiores sint, & transpiratio patentior nimis, ut nedum halitus, & vapores è corpore perspirent, sed etiam sudor sponte sua ubertissimus habeatur, proindè fit, ut frigida aquæ profusione, constipatis poris, atque impedita perspiratione, universus calor repercutiatur ad intima, atque impetu quodam adoria-
tur causam morificam tetani conservatricem. Neque verò aqua, quæ perfunditur simplex, & ordinaria esse debet, sed gelida, etiam nive frigefacta, atque ubertim affusa, ut nimirum subita, ac violenta fiat in omnibus partibus corporis commotio, obrigescente simul, vehementerque densata cute, adeò ut nil perspirare permittat, sed calor universus per sanguinis commotionem vehementiorem, ad intimas partes recolligatur, impetatque in musculos, & nervos tetano affectos. Benè igitur Avicenna 2. *tertiæ cap. 7.* inquit, *hac perfusione obstructis meatibus cutis, & refugiente calore intus, atque collecto, materia illa consumitur, atque diffatur, nervique ad pristinum redeunt statum.* Quod & Hippocrates ipse in aphorismo adjecit inquiens: *frigida*

aque multa profusio calorem revocat: calor autem hec solvit.

Quomodo autem frigida ista perfusio adhibenda sit, idem Auctor explicat 3. *de morbis*, ubi istius morbi curationem proponit his verbis: *Aquam plurimam frigidam superinfundito, & postea vestimenta tenuia, pura, ac calida superintegito; ignem autem tunc non adhibeto.* Hinc superinfundendam aquam frigidam jubet, illamque plurimam; deinde cooperiendum esse ægrotantem vestimentis tenuibus, puris, ac calidis, veluti lineis excalefactis, nullo interea igne admoto, ne scilicet calor intro collectus denuò ad cutim diffundatur, sed per aliquod tempus ita detineatur, quousque materia tetani fuerit subacta, & nervi in pristinum statum fuerint restituti; id quod spatio duodecim, vel viginti horarum ad summum peragi solet.

Verum non est omittenda Pauli Æginetæ in hac re animadversio, qui lib. 3. *cap. 20.* admonet, istam frigida superinfusionem maximè temerariam esse, atque posteris vituperatam, adeoque à seipso damnatam, devitatamque: equidem nisi naturam adminiculantem habeat, quæ subito causam morificam vincat, & dissolvat, in maximo periculo æger versabitur, immò irreparabiliter succumbet. Fieri enim potest, ut calor, qui exinde speratur revocandus ad intima, atque adeò morbum debellaturus frigida aquæ perfusione potius extinguatur; quomobrem factum est, ut nemo amplius in praxi sit ausus ejuscemodi curationem tentare. Sed neque Hippocrates revera illam hic commendat, sed solum inquit, qua ratione, illa si tentetur, conferat, & quibus in corporibus, quibusque conditionibus,

bus, cautè administranda sit, ut etiam antea est animadversum: Id quod semel tantum in foemina quadam 5. *epid.* vehementi dolore ex praefocatione uteri laborante, peractum à seipso memoratur.

APHORISMUS XXII.

Calidum suppuratorium non in omni ulcere, magnum ad securitatem est indicium, cutem molli, extenuat, dolorem sedat, rigores, convulsiones, & tetanos mitigat, capitis solvit gravitatem: plurimum autem confert ossium fracturis, sed nudis precipue, eorumque maxime, qui in capite ulcera habent, & quaecumque à frigore moriuntur, vel ulcerantur, & herpetibus exedentibus, sedi, pudendis, utero, vesicae: his calidum amicum, & iudicans, frigidum inimicum, & perimens.

PLura simul hic Hippocrates de calido, & calidi ulu recenset, & in quibus juvet, aut debeat adhiberi, quibus verò ex adverso noceat, debeatque vitari: itemque quas utilitates afferat, & quibus partibus corporis. Hinc praesens aphorismus videtur omnino directus ad praxim Chirurgicam, & ad rectam rerum calidarum in ulceribus administrationem.

Verum non de quocumque calido corpore, an solum de aqua calida verba faciat, grave dubium est apud Interpretes, quandoquidem usus aquae, non minus quam vini, frequentissimus erat apud Veteres, nedum inter epulas, & interius, sed & exterius, atque in lotionibus, balneis, fomentis, ceterisque, ut propterea pluries utriusque usus sparsim

in suis operibus Hippocrates meminerit. Et quidem Fuchsius pluribus contendit solam aquam calidam hic fuisse ab Hippocrate memoratam, reprehenditque Brasavolum, qui de omni calido illum loquutum arbitratur. At contra Cardanus acriter in Fuchsium invehitur, & multis conviciatur. Putaverim ego, calidum hoc aphorismo indicari moderatum, quia tale est suppuratorium, ut in textu exigitur: etenim si Hippocrates inquit, calidum suppuratorium, & quod suppurationem facit, moderatum est, proculdubio non excedens, sed naturae consentaneum intelligendum est; ejusmodi autem non sola aqua, sed quodcumque intra mediocritatis limites versatur, accipi debet; neque simplex aqua, sed etiam medicata, qualis ex incoctis herbis mollientibus, & anodynis, puta malva, althæa, chamæmelo, parietaria, aliisque. Pari ratione pinguedines, & adipēs animalium, atque omnia linimenta, & cataplasmata ex iisdem composita intelligenda, quibus planè passim utuntur Chirurgi in suppurationibus promovendis. In hanc eandem sententiam concessit Galenus 4. *method. cap. 5.* inquit: *Fomentum multae calidae aquae, & omnia, quae calefaciunt, & humectant celerissime pus movent.* Quamobrem si Brasavolus de omni calido etiam intenso, & vehementi velit hoc loco loquutum Hippocratem, certè falsum erit; si verò de quocumque alio corpore calido, praeter aquam, sed tantum moderato, non erit, quid illi opponere possimus. Quod autem moderatum calidum suppurationem adjuvet, tam manifestè patet experimento, ac ratione, ut longius in his minime doceat immorari: calidum namque excedens

dens potius resolvit, quam suppurat.

Sed cum dicit Hippocrates *non in omni ulcere*, ostendit manifestè, non in omni ulcere calidum istud adhuc moderatum, & suppuratorium, esse adhibendum, puta, ut *in comm.* Galenus explicat, ubi ulcera sordida, & putrida sunt, vel etiam ubi timetur affluxus humoris, præsertim non faciliè suppurabilis, ut in carcinomate, phagedæna, aliisque similibus; itemque in erysipelate suppurato, vel cum circa ulceris labia inflammatio erysipelatodes observatur: in his enim calida sive actu, sive potentia, non ea esse solent, quippè saltem ex accidenti, exasperant ulcus, febrim arcessunt, dolorem inferunt, & in diuturnum tempus illius curationem distrahunt.

Emergit autem exinde magnum ad securitatem salutis indicium, quippè ubi suppuratio fit, ibi quoque præter humorum faciliè subigibilium benignitatem, naturæ concoquentis robur ostenditur, etenim suppuratio opus naturæ est, causam morbificam subigentis. Hinc in praxi Chirurghi omnes salutare signum existimant in ulceribus quibuscumque pus concoctum apperere; contra verò, cum loco ejus sanies tenuis, ichor, aliufve similis humor exudat, malignitatis nota est; & ubi per suppurationem certa promittitur salutis spes ægrotanti, ita ex adverso exitus infestus timetur, vel saltem non facilis ad curationem, & consolidationem ulceris reductio; sed & in ejusmodi pravis ulceribus, in quibus suppuratio nulla apparet, neque in posterum speratur futurum pus conveniens, haudquaquam calido suppurante, sed potius exsiccante medicamento utendum, quod etiam sua ratione detergat, & emun-

det, vel etiam corrigat, temperet, & pravitati resistat.

Dicitur prætereà calidum cutim emollire; nam sicuti superius dictum est frigidum obdurare, & constipare poros cutis; ita nunc à calore eodem emolliri, & relaxari, apertissimè demonstratur. Verum calidum istud, nedum moderatum intelligendum est, sed etiam humori alicui conjunctum; nam calida, quæ suppuratoria sunt, humefacientia quoque pro rata sua esse debent, ut exinde cutim mollificare valeant: quamquam non rarò calidum cuti admotum, evocando ex internis partibus humores, & præsertim ex glandulis subcutaneis, humiditatem sibi associat, si non per se, saltem ex accidenti, attenuando, aperiendo, & dissolvendo.

Pariratione subditur etiam, extenuare: quoniam sive puris egestione, sive insensibili transpiratione, sive etiam dissolutione tenuium partium, ex humoribus, & lymphâ dissolutarum, semper calidum quodcumque extenuat, & extenuando evaporat, saltem tractu temporis longiori. Atqui placuit Heurnio *in suo contextu*, huic dictioni addere *crassam*, sive materiam cuti hærentem, sive ad eandem confluentem, ut propterea legat in sua versione: *crassam extenuat*: equidem sive crassities ista in cute ipsa consideretur, sive in humoribus ibidem hærentibus, planè vi caloris utraque dissolvi, & extenuari bene potest; quamobrem tumidam cutem in ulceribus levi, blandoque calore successivè digeri, & in pristinum statum reduci licet, ut tandem cæteris partibus complanetur, & humores ipsos circa labia ulceris restagnantes, ejusdem caloris, & remediòrum calefacientium

beneficio, paulatim quoque dilui, & per suppurationem expurgari, extenuarique.

Hinc pariter ostenditur qua ratione dicatur dolorem sedare, quemadmodum ex supra traditis, manifestissime deducitur, etenim digerendo ea, quæ circa labia ulceris, immò in ipsa ulceris cavitate continentur, & dolorem inferunt, vel in causa sunt, ut dolor percipiatur, dolorem ipsum rationabiliter sedare dicuntur. Quare sive vacuando, sive rarefaciendo, sive abstergendo, sive temperando, sive discutendo, tum humores, tum flatus, dolorem lenire benè poterit. Sed & licet humores desint, si solum pars ulcerata ab infensa qualitate proritetur, aut à frigore malè afficiatur, solet non rarò calidi alicujus medicamenti beneficio moderari, cum ex antea dictis frigus viventi cuicumque parti, potissimum nerveæ, infensum ex omni parte sit; calidum verò proficuum, & salutare, quin & majora, gravioraque semper detrimenta viventibus accidunt à frigidis, quàm à calidis, præsertim moderatis.

Mitigat quoque calidum rigores, convulsiones, & tetanos, oppositis sanè de causis, quibus frigidum hæc eadem antea afferre dicebatur; etenim extenuando, & dissolvendo vitiosos humores, hæc mala inferentes, sanè conferet calidum in præ-narratis nervorum, & musculorum ægritudinibus; tum quia causam rigoris, & convulsionis adimit, tum etiam quia partes affectas roborat.

Capitis etiam solvit gravitatem, idque non solum ex jam dictis rationibus, verum etiam quia plerumque gravitates fiunt à lymphæ crassiori restagnante in meningibus, vel in glandulis cerebri corticalibus; illa

autem calidis fomentis diluta fluit in partes inferiores, & vel per nares, aures, palatum eiicitur, vel in articulos decumbit, quemadmodum experimur in catarrhis. Neque solum calida capiti si admoveantur in his conferunt, verum etiam si plantis pedum applicentur; experimur siquidem, ut qua ratione humefacti, refrigeratique pedes, cerebrum, & caput afficiunt, & humiditatibus opplent; eadem & opitulentur, si calidis fotibus, ac lotionibus vigorentur. Hinc consueverunt practici ad deducendos humores à capite aqua calida pedes abluere, & in gravedine, stupiditate, aliisque capitis affectibus cum sopore conjunctis plantas pedum aqua ardente sæpius fovere. Experimur quoque per solos halitus, atque odores cerebrum levare, & à confluentibus, aut restagnantibus humoribus, sive sensibilibus, sive insensibilibus exonari, cum suffitus aromatum, odorosa medicamenta, tabaci fumus, itemque gummi animæ, succini, aliarumque rerum similium olfactus, plurimum in capitis affectibus soporosis conferant. Dixit autem signanter Hippocrates *capitis solvit gravitatem*: nam si fortasse alia ægritudinis specie caput, & cerebrum afficeretur, aliter planè res hæc tractanda foret: at verò gravitas in cerebro plerumque à sero, lymphæ, atque consimilibus humoribus humefactibus, & gravantibus dependet.

Præterea calidum conferre dicitur ossium fracturis; & quidem duplici de causa, & quod ossa affecta frigidum habeant inimicum, ex antea probatis, & quod fracta nonnisi calidorum ope glutinari, & cuniri possint, cum alioqui frigidum ulceribus omnibus infensissimum sit. Idipsum expressè etiam edocuit idem

Hip-

Hippocrates *lib. de fracturis*, & *libro de articulis*. Addit insuper, *sed nudis præcipuè, eorumque maxime, qui in capite ulcera habent*; quod etiam testatur *lib. de liquidorum usu*. Nudata enim ossa si frigidus ambienti exponantur, facillimè livescunt, & si fortassè fracturam quoque passa sint, gangrænam incurrunt. Quamobrem periti Chirurghi omnem industriam solent adhibere, ut ejuscemodi vulnera, ulcera, & fracturæ ossium, potissimum cranii, à frigore ambientis, & à quibusvis aliis frigidis alterantibus præcaveantur, per fascias, ligaturas, aliaque similia integumenta: id quod etiam Recentiores agunt fôtu aquæ ardentis, balsami Neapolitani, aquæ vitæ Reginæ Hungariæ, aliorumque medicamentorum roborantium, & calefacientium. Optimè ergo Cardanus hoc loco habet: *Trifariam calor in his necessarius est, & quatenus in ulcere omni calida conveniunt, & quatenus omni ossi denudato, & quatenus cerebro, ne lædatur, consulendum est.*

Nedum autem ossibus fractis, & denudatis, potissimum in capite, confert calidum, sed etiam cunctis aliis partibus, quæ à frigore hebetantur, emoriuntur, aut ulcerantur. Et quidem istæ præsertim censendæ sunt partes nervicæ, & membranosæ, de quibus antea dictum est ab Hippocrate, quòd frigidis admodum lædantur. Artus quoque corporis à frigidis alterantibus offenduntur, ut quemadmodum superius est notatum, aliquandò sponte sua decidere contigerit, uti Galenus etiam meminit *lib. de differ. morbor. cap. 4.* sed quomodo ex frigore ulcerari possint partes, ut in textu dicitur, rectè exponit Fuchs in pernionibus, qui hyemali

tempore accidunt, & sapissimè ulcerantur magno cum dolore, ac difficulter postmodum curantur, atque nonnisi in æstate.

Idem etiam Hippocrates *lib. 6. epidem.* edocet à frigore vehementi non rarò venas dirumpi, indeque ulcera tum externa, tum interna excitari. A nimio quoque frigore passim experimur scindi, & ulcerari partes extimas corporis, quæ magis expositæ sunt aeri, illiusque vehementi alterationi, quam maximè subiiciuntur; unde manuum, & labiorum scissuræ. Porro in his, aliisque similibus, sicuti frigidum in causa est, ut findantur, & ulcerentur, ita ex adverso calidum confrens, & salutare evadit, præsertim si intra mediocritatis limites adhibeatur: nam revera ab uno extremo ad aliud transire, atque adeò applicare vehementer, & repentè calefacientia, etiam periculosum, ut in expositione aliorum aphorismorum dictum est.

Nocet quoque frigidum his maximè, quibus in capite ulcera nascuntur, eadem profectò ratione, qua mox ostensum est frigidum ulceribus quibuscumq; & capiti universaliter officere: cùmque Hippocrates dicat indefinitè de ulceribus in capite enatis, non est, ut id ad hæc, vel illa ulcera coarctemus, quippè cuicumq; ulceri nocuum illud existimandum est; facile enim etiam levia ulcera inde graviter afficerentur, & mortificationem, aut gangrænam subirent, nō sine gravi vitæ periculo. Quamobrem jure optimo conferre his calidum hoc loco memoratur, tum ratione ipsius ulceris, tum etiam ratione partis ulceratæ, atque eo magis, si ad mortificationem vergat, ut ostendunt verba illa, *& iis, quæ à frigore moriuntur, aut ulcerantur.*

Herpetibus quoque calidum prodest: cùmque Herpes, vel simplex sit, & miliaris dictus, vel excedens, & ulcerosus; notatur hìc speciatim, qui excedens est, quoniam ad classes ulcerum revocatur, de quibus Aphorismus hìc specialiter est inscriptus; Quod sanè videtur hoc loco notandum, siquidem herpes vulgò creditur progigni ab humoribus biliosis, & calidis, qui creduntur, sed falsò, indicare refrigerantia, non calefacientia, ut hìc Hippocrates recenset.

Denique inquit Hippocrates conferre calidum *sedi, pudendis, utero, & vesicæ*; & sana quidem ratione, quoniam hæ partes sunt de genere exanguium vulgò spermaticarum: quemadmodum enim superius dictum est, frigidum esse inimicum ossibus, dentibus, nervis, cerebro, spinæ, ita planè nocuum putandum quoque est memoratis in hoc aphorismo partibus, quales sunt pudendæ, uterus, & vesica, ut constat ex Anatome.

Concludit eapropter aphorismum Hippocrates: *his calidum amicum est, & judicans; frigidum inimicum, & perimens*: ut scilicet peroratione aphoristicam sententiam decernat; quòd sicuti prædictis partibus calidum convenire statuitur, sic ex adverso frigidum sit existimandum unde quaq; nocuum, & funestum, ut propterea nulla de causa possit in usum duci frigorificorum medicamentorum administratio, quotiescumque partes istiusmodi laborant, & ulceri, vel præsentì, vel imminenti subjectæ sunt.

APHORISMUS XXIII.

In his frigido est utendum, unde fluit sanguis, aut fluxurus est, non ad ipsa admoto, sed circa ea, unde influit, & ubicumque inflammationes, aut veluti incendia quædam ad rubrum, & floridum, sanguine recenti, tendunt, iis ipsis admoto: nam veteribus nigredinem affert. Erysipelas etiam non ulceratum juvat: nam exulceratum ladit.

al. inflammamina, vel flammei ardores.

QUoniam antea meminerat, calidorum adhibitionem non conferre in his, quæ sanguinem fundunt, ac propterea tacite frigidum commendaverat; hoc proinde aphorismo nedum id expressè memorat, sed etiam addit modum, & locum, ubi frigida admoveere expediat. Primum autem monet utendum esse frigido, unde fluit sanguis, aut etiam unde fluxurus est, ad reprimendum scilicet illius fluorem; ejus namque beneficio sanguis figitur, & detinetur, ac ductus ipsi coactantur. Mox verò adiicit, illud nequaquam adhibendum esse supra ipsas partes sanguinem fundentes, sed juxta, & circa ipsas; siquidem frigidum ulceribus nocuum est, & immediatè parti sanguinem fundenti admotum, sanguinem ipsum cogeret, & cogendo grumefaceret, graviore cum periculo, tum ipsius partis, tum totius. Jure ergo adnotat circa ipsas partes frigidum esse admovendum, ut nimirum sanguinem per sua vasa excurrentem, quodammodò remoretur, crassiori nimirum illo reddito. Verum tamen summoperè expediet, nedum frigefacientibus dumtaxat uti, verum etiam pro rata sua adstringen-

gentibus, quemadmodum antea notatum est. Sed & nedum in ipsa parte proximè sanguinem fundente medicamenta frigorifica applicanda sunt, sed etiam proderunt in aliis partibus, unde fortassè majores arteriarum, & venarum trunci derivant, quod etiam significare voluit Hippocrates per particulam illam *unde*; ut propterea consueverint peritiores Chirurghi etiam frigefacientia, & adstringentia medicamenta adhibere supra jecoris, & lienis regionem, quoties sanguis per venas sedis, aut etiam per vias urinæ exitum habeat. Sic pariter exeunte sanguine per narium hæmorrhagiam, nedum naribus ipsis, verum etiam fronti, cervici, & jugulo medicamenta cum fructu admoventur. Id ipsum quoque operari licebit in partibus, per quas sanguis fluxurus est: etenim quæ fluentem sanguinem cohibent, fluxurum multo facilius anteverunt.

De inflammationibus quoque, potissimum futuris, par ratio militat, ut partes ipsæ inflammationem subeuntes frigidis foveri debeant, ne inflammationem ipsam contrahant: cum enim frigida poros, & meatus corporis coarctent, prohibent proinde, ne sanguis in illis excipiatur, & hæreat, unde vulgò frigida dicuntur habere vim repellendi. At verò, ut tuto ista administrentur, non nisi statim ab incipiente inflammatione partibus sunt adhibenda, antequam inflammatio fiat, & sanguis restagnet. Cæterum post factam inflammationem, locum habere non poterunt, quoniam tunc sanguinem magis, magisque ibidem figentia, vel irresolubilem redderent, vel gangrænam excitarent. Quod de inflammationibus dixit, protrahit quoque ad flammeos ar-

dores, sive phlogosim, & effervescentiam in partibus inductam, ubi nimirum dolor excitatur cum ardore, qui solet esse prænuncius inflammationis. Est tamen summopere advertendum non cuicumque parti, quæ inflammationi, aut phlogosi obnoxia videtur, infrigidantia ista tuto admoventi posse; etenim si partes ignobiles sint, & exinde timeatur repulsum humorem in partes nobiliores vergere posse, proculdubio frigorum administratio periculosa erit. Hinc laborantibus articulis, atque corporis emunctoriis, nemo audet usu frigidorum, humores fluentes, aut fluxuros repellere; solum autem in affectibus capitis, aliarumque partium principalium infrigidantia epithemata tutius admoventur; quamobrem in phrenitide, oculorum inflammatione, aliisque affectibus calorificis, & inflammatoriis partium superiorum, oxyrhodina, stillicidia, lotiones, & balneationes infrigidantes, in praxi adhiberi solent. Addit in textu Hippocrates *ad rubrum, & subcruentum, seu floridum tendentia*, ut scilicet exinde moneamur in tenuiori sanguine, vel etiam acriori, ista locum habere posse, & cum de recenti fluxio facta est, secus verò cum sanguis aliis humoribus est commixtus, & ex diuturniori tempore partibus hæsit; nam ut idem Hippocrates subdit, *veteribus*, seu potius inveteratis, *nigredinem, & livorem affert*, & subindè faciliè gangrænam.

Postremò etiam in Erysipelate non ulcerato frigidum convenire inquit, eadem prorsus ratione, ut nimirum fluentem illum humorem repellat, & per suos ductus in alias partes distrahat. Quod tamen intelligendum, si erysipelas leve sit, & ex tenui humore oriatur, qui faciliè corrigi, &

inverti possit ab usu frigefacientium medicamentorum. Cæterum in aliis periculosa erit ejusmodi infrigidantium administratio, cum crassus, & multus humor, nec tam facile corrigi, aut transferri possit, quin ex adverso facile in partes internas repat, & longè majorem noxam afferat, nam *erysipelas ab extra introverti malum*. Quod denique dixit de erysipelate non ulcerato, excipit omnino in ulcerato erysipelate, tum quia frigidum ulceribus omnibus mordax est, & inimicum, tum etiam quia ulceratum erysipelas plerumq; illegitimum, & spurium esse solet, adeoque non à simplici humore tenui, & volatili, sed à commisto, crasso, & acido progignitur, qui frigefacientium usu magis densatur, & acescit. De qua re legendus est Galenus *lib. 2. ad Glauc. cap. 1. & 14. method. cap. 2. & 3.* At experimentis nunc tandem constitit, spiritu vini erysipelata quæcumque aboleri, sicut etiam beneficio medicamentorum acidum absorbentium, temperantium, aut diffillantium, ad quorum classem infrigidantia hic ab Hippocrate memorata referri possunt.

APHORISMUS XXIV.

Frigida, qualis nix, & glacies, pectori inimica: Tussēs movent, sanguinis profluvium, & destillationes.

DE his, quæ frigida dicuntur præsertim actu, loquitur hic Hippocrates, & nedum si aquea, & liquida illa sint, sed & cujuscumque generis, etiam solida, dummodò frigorificam vim referant, & refrigerare valeant: cumque is utatur exemplo nivis, & glaciei, certè intelligenda quoque illa sunt, quæ

extremè frigida dicuntur, quippè nix, & glacies summè infrigidantia observantur. Et quoniam antea dixerat, frigida convenire partibus sanguinem fundentibus, aut quæ proximè dispositæ forent illum fundere, si nimirum circa illas essent admota, propterea nunc excipit eas, quæ ad pectus pertinent, siquidem summè frigida pectori inimica sunt, ubi tantum abest, ut sanguinem fluentem, aut fluxurum cohibeant, ut potius affluentiùs promoveant, & extimulent, ac prætereà tussēs excitent, & destillationes, ex quibus major fit sanguinis commotio. Et quidem sunt frigida hæc pectori inimica, non solum quia pectus osseum est, & frigidum ossibus hostile observatur, sed etiam ex eo, quòd comprimendo thoracem, & musculos respirationi addictos coarctando, eidem magno impedimento sit; quinimò si fortassè exinde sanguis fundatur, per frigidorum administrationem, facile posset congelascere, atque in pectoris cavo detentus gravem noxam pulmōni, & cordi, immò manifestum vitæ periculum minari.

Frigida tussēs quoque movent, tum asperam arteriam vellicando, tum etiam coarctando illius cavitatem, unde natura sollicitaretur ad expulsionem per tussim, quæ specialis motus pectoris, & pulmonis est, conantis expellere ea, quæ prædictas cavitates occupant, & impediunt. Hac eadem ratione promota tussis sanguinis sputum excitat, & ipsum fortassè fluentem impetu suo magis propellit; præterquamquod frigidum, ut antea ex eodem Hippocrate est notatum, venas dirumpit, & sanguinis exitum inducit.

Denique destillationes excitant, potiss-

potissimum constringendo, & cor-
rugando glandulas capitis, & cer-
vicis, immò cerebrum ipsum, quod
magna glandula ab Hippocrate ap-
pellatur, potenter addensat, que-
madmodum etiam edocuit Galenus
3. *apbor. comm.* 12. Sic experimur in
algenti hyeme catarrhos, & destil-
lationes excitari, easque pernicio-
sas admodum, cum acritate, & sal-
silagine, ex prohibita è poris corpo-
ris transpiratione. Meritò ergo Hip-
pocrates in aphorismo usum frigi-
dorum in his, & consimilibus casu-
bus tacitè vituperare videtur, etiam
si aliundè illa, ratione fluentis san-
guinis viderentur indicata. Porro si
frigida extrinsecus admota nocua
sunt pectori, multò magis eadem
in sensa putanda sunt, cum intrinse-
cus fuerint adhibita, quippè si dum-
taxat laryngem pertingant, solent
sæpissimè tussis molestissimas pare-
re, & alia plurà incommoda ceteris
adhuc partibus inferre; unde aquæ
gelidæ, glaciales, & nivosæ perni-
ciosissimæ esse consueverunt, & qui
populi illis utuntur, internis dolo-
ribus sæpè sæpius primùm affecti,
sputum mox sanguinis, hæmorrhoi-
dum fluxum, obstructions, & in
glandulis coli potissimum tumores
irresolubiles, ac strumosos subeunt.

APHORISMUS XXV.

*Tumores articulorum; atque do-
lores absque ulcere podagras, ac
convulsiones, horum plurima
frigida aqua largè effusa levat, &
extenuat, solvitque dolorem, nam
modicus torpor dolorem solvit.*

Commendat pariter in hoc a-
phorismo Hippocrates usum
frigidorum, & præsertim aquæ in
doloribus, & tumoribus articulo-

rum, etiam si podagricam referant
conditionem, modò sine ulcere illi
sint, verum neque indiscriminatim,
& in omnibus, sed aliquibus tantum,
quemadmodum designant verba il-
la, *horum quidem plurima.*

Et quidem tumores articulorum,
neque omnes, & quicumque articu-
lis accidere solent, sed solum, qui à
calidis, tenuibus, & acris hu-
moribus fiunt; si enim fortassè ab
humoribus crudis, phlegmaticis,
aut lymphicis penderent, procul-
dubio frigida aquæ superaffusio uti-
lis non foret; sed neque in abscessi-
bus, cum scilicet in articulos humo-
res decumbunt. Non quidem in tu-
moribus à causa frigida, & crassa,
quando quidem per frigidorum ap-
positionem, nec ad exsolutionem,
nec ad suppurationem illa dispo-
nere, quin immò crassior, & den-
sior effecta, irresolubilis evaderet,
vel noxam in articulis, & in ossibus
inferret inemendabilem, quemad-
modum contingere solet in ea spe-
cie tumorum, quæ vulgò *spina ven-
tosa* appellatur. Neque in abscessi-
bus, quoniam humores in articulis
depositi, frigidorum admonitione,
possent in partes nobiliores recur-
rere, quemadmodum ab usu repel-
lentium medicamentorum evenire
solet. Itaque in illis dumtaxat tumo-
ribus exponendus videtur aphoris-
mus, in quibus tenues, acies, &
calidi humores peccant: sed & ad-
jecit in textu Hippocrates *dolores*,
quare junctim articulorum tumo-
res, & dolores hic intelligendos in-
terpretabimur; unde frigidorum
administratio, videtur potius in
gratiam doloris sedandi hoc loco
commendata: nemo enim in Arte
medica, vel mediocriter versatus
rationabiliter frigida in tumoribus
articulorum adhibebit, nisi illi fue-

rint cum dolore conjuncti, ad sedandam nimirum molestem illam in articulis sensationem, quoniam dolor est de genere illorum symptomatum, quæ invertunt curationem, & specialius sui remotionem expostulant. Ut autem id expressius adnotaret Hippocrates addidit in textu *podagricos*; quandoquidem in podagra articuli simul tumore, & dolore laborant: cum autem dolor cum tumore jungitur, acritas in humoribus designatur, ad quam retundendam, plurimum conferre solet usus infrigidantium.

Sed num frigida, quæ hic memorantur, *actu*, vel *potentia*, juxta veterum medicorum loquendi morem, talia esse debeant, controversi potest. Verum quia Hippocrates in textu meminit speciatim aquæ frigidæ, idcirco probabilius dicendum videtur frigida, actu talia, esse intelligenda. At verò licet ista manifestius notata videantur, non tamen quis inficiabitur posse etiam potestate talia administrari. Sic passim experimur in doloribus articulorum, etiam podagricis convenienter applicari, & prodesse ad sedandum dolorem, olea infrigidantia, succos plantarum, decoctiones herbarum, itemque cataplasmata, & linimenta ex his composita. Sunt, qui in doloribus podagricis acerbioribus admovent dolenti parti aquam nymphææ, aut succum ejusdem, sperma ranarum, oleum lumbricorum, acetum tum simplex, tum rosaceum, & alia hujus generis. Verum quo pacto ista opus, & actionem exerant, altioris est inquisitionis, de quo alias.

Debent autem dolores isti esse sine ulcere, nam si ex ulcere dependeat, vel cum ulcere sint conjuncti, frigida admota proculdubio nocebunt, nam frigidum ulceribus est

inimicum, atque in his admotum non solum dolores nullatenus sedaret, sed contra potius augeret, & exasperaret. Neque si dolores gravantes sint, ista locum habebunt, sed solum si acuti, pungentes, & vellicantes fuerint, quamobrem adjecit *horum plurima*, quibus manifestè designat, se tantum intelligere velle tumores inflammatorios, erysipelatosos, vigiliam inferentes, adeoque omnino molestos; etenim si leves forent, & tolerabiles, ista tentare tutum non foret. Notissima est historia Maximiliani Imperatoris, qui ut se à doloribus podagricis liberaret, in fluvium gelu frigefactum pedes immergi mandavit, atque ita vita defunctus est.

Eodem modo intelligendæ sunt convulsionem in aphorismo memorata, cohærenter his, quæ antea de tetano dicta sunt. Modò frigide aquæ effusio, & humores acres spasmodum, seu convulsionem inferentes retundit, & membra affecta, per calorem ab intima revocatum, roborat, ut superius de tetano laborantibus est dictum.

At verò in his omnibus multa, ac diuturna tantum frigidæ aquæ affusio juvare poterit; siquidem in textu dicitur *frigida aqua largè effusa levat*: hac enim ratione fieri potest, ut dolor sedetur, & causa illum faciens aliqua ex parte discutiatur: id quod multò clariùs expressit Hippocrates rationem levaminis istiusmodi in tumoribus, & doloribus articulorum afferens, dum in calce aphorismi inquit: *nam modicus torpor dolorem solvit*; quandoquidem ex larga frigidæ aquæ affusione, quodammodo partis laborantis sensus ex ingenti frigore obtunditur, unde torpor fit, & dolor sedatur. Verum advertere est, neutiquam torporem

præsertim extremum induci debere, sed levem, aliter fieret transitus ex uno in aliud extremum, & quidem gravius, maxima cum ægrotantis noxa, quoniam stupefacta omnino parte, gangræna facillimè succederet, & mortificatio cum livore. Quare ad sedandum dolorem satis erit, si frigida aquæ affusione levis torpor inferatur, quantus scilicet satis sit sensum partis aliquatenus hebetare, & causam dolorem inferentem, acrem scilicet humorem, obtundere. Dicitur denique, modicum torporem dolorem solvere, non quod revera dolorem, & causam doloris adimat, sed quod remittat solum, & sedet. Quamquam negari non possit, solum penitus aliquando fuisse appositione frigidorum, licet tumor, qui fortè cum dolore inerat, remansisset, quoniam potuit frigida aqua adeo tonum partis immutare, & acres humores invertere, ut vim eorumdem puncturiam, & dolorificam remiserit, relicta inerti illorum corpulentia.

APHORISMUS XXVI.

Aqua, quæ citò calet, & citò refrigeratur, levissima est.

Hanc eandem sententiam, iisdem omnino dictionibus, profert Hippocrates 2. *epidem. sect. 2.* quam & repetiisse, ni mavis dicere, desumpsisse videtur ex *lib. de Aere Aquis, & locis*, bonarum aquarum recensens qualitates, & quidem istas non aliunde certiores deducendas commonefacit, quam ex cita, promptaque earundem calefactione, refrigerationeque. Etenim bonitatis indicia à leviori pondere desumpta, nedum dubia plerisque sunt, sed vana penitus illa existimat Pli-

nus *lib. 31. cap. 3.* inquiens: *Quidam statera judicant de aquarum salubritate, frustrante diligentia, quando perrarum est, ut levior sit aliqua.* Atque mox inhærens huic Hippocratis sententiæ subdit: *Certior subtilitas inter pares, meliorem esse, quæ calefiat, refrigereturque celerius.* Id ipsum fassus est Celsus *lib. 2. c. 18.* aphorismum hunc ita vertens: *Eo melior quæque aqua est, quo celerius & calefit, & frigescit.* Quod & pluries etiam sentit Galenus, præsertim verò *lib. de ptisana cap. 1.* & *lib. 1. de simplicium medicam. fac. cap. 17.* & in *comment. istius aphorismi.* Sed & Erasistratus apud Athenæum 1.2. c. 2. tali fretos experimento falli ait, qui nimirum de aquarum bonitate, ac levitate iudicium rectum statera ferre putant; siquidem seipsum expertum subdit in Amphiarati, atque Eretriæ aquis, quarum altera pessima, altera optima est, nullum in pondere discrimen deprehendi.

Verum etsi iudicium à gravitate, & levitate aquarum desumptum beneficio stateræ fallax sit, & nullius ferè momenti, non tamen exinde quis deducet illud omnino vanum esse, ut in isto saltem Hippocratis haud aliquatenus includatur, quin potius clarè pateat ex hoc illud fuisse deductum. Quæ enim aqua citò calefit, citòque refrigeratur, nullius impedimenti est, ut utrumque promptè admodum subire queat, quoniam alienæ mixturæ expers omnino est, neq; intermixtum quidpiam habet, quod calefactioni, refrigerationique obicem ponat, quemadmodum sunt aquæ thermæ, nitratae, vitriolatae, sulphureæ, aluminosæ, cœnosæ, aliæque: quæ enim citò calorem contrahunt, & tardè refrigerescunt, aut è converso, à diversa fossi-

fossilium, & salium mistura id habent. Hinc ab eodem Hippocrate *lib. de aere, aq. & loc.* illa aqua, ut purissima laudatur, quæ cujuscunque odoris, saporis, aut coloris experta est, adeoque proximè accedit ad naturam aeris: Cui inhærens Plinius *c. lib. 31. cap. 3.* dixit: Aquam salubrem aeri, quam simillimam esse oportere. Quamobrem sana ratione Celsus, omnes bonæ aquæ dotes comprehendens, *lib. 2. cap. 18.* scriptum reliquit: *levis aqua pondere apparet, & ex his, quæ pondere pares sunt, eo melior quæque est, quod celerius & calefit, & frigescit, quoque celerius ex ea legumina percoquuntur.* Siquidem hujusmodi aquæ extraneorum corporum mistura carentes, levissimæ sunt, & non solum levitate à cita, facilique digestionem, ac permeabilitate desumpta, ut exponit *in hoc comm.* Galenus; verum etiam à levitate ponderi contrapposita, quia nullum extraneum corpus in se continentes, proximè accedunt ad naturam, & conditionem aeris, cum quo illæ symbolitatem retinent, adeoque proximè parem levitatem participant: Aer etenim & levissimus est, & faciliter calore, aut frigore fit alterabilis. Maluit autem Hippocrates bonitatem, simplicitatemque aquarum sumere à facili, citaque calefactione, ac refrigeratione, veluti testimonio è physicis eruto certiori, peneque infallibili, omisso alio ex pondere in statera desumpto, veluti vulgari, cunctis obvio, multumque fallaci, si potissimum se junctim consideretur; quo nimirum rei medicæ professores citrà Mechanicæ leges possent perfacillimè de aquarum bonitate judicare.

Debent tamen aquæ internoscen-

dæ, tum gelidæ, tum calenti aquæ, aliive liquori, igni, aut Soli æqualiter exponi, ut nimirum æquali agentium tum calefacienti, tum refrigeranti subiiciantur; aliter si una efficaciori, altera debiliori, tam in calefaciendo, quam in refrigerando exponatur, rectum judicium exinde ferri non poterit de cita, aut tarda utriusque incalescentia, aut frigefactione, cum ex inæquali agentium vi non nisi inæqualis actio exoritur. Utergo aquarum species inter se invicem distinguantur; & quænam ex illis purior, simplicior, leviorque sit, rectè dijudicemus, simul unà in eandem aquam calentem, aut gelidam, paribus phialis vitreis conclusæ immergantur, atque eodem temporis intervallo, æqualique positu detineantur; mox deindè beneficio duplicis, & consimilis Thermometræ examinentur in gradibus contracti caloris, aut frigoris, pluribus, vel paucioribus. Verum tamen adhuc in his aliquando falli possumus, cum præsertim aquæ non corpulenta materia, sed halitibus solum, seu volatilibus partibus sunt refertæ, ut in plerisque acidulis, nitratis, vitriolatis, & sulphureis nostratibus observamus, quæ etsi levissimæ, ac promptè admodum permeabiles per vias urinæ, mistum tamen quid habent volatile, ac halituosum, sive ex sulphure, sive ex vitriolo, halinitro, cæterisque similibus, ut propterea etiam saporibus diversis nonnullæ distinguantur; pari sanè ratione, qua fit, ut aquæ fontium, cæteroqui purissimæ, paucis guttulis spiritus vitrioli, sulphuris, salis ammoniaci, aliisque medicatæ, vi, atque effectu varient, cum aliunde nil quidpiam ponderis extranei acquirant, aut

amitt-

Hincubi
Aque
bonæ, ibi
Aer pu-
rus.

amittant, nec excalefactioni, aut frigefactioni, pro rata sua, citius, vel tardius subiiciantur.

Sed & sine ullo cujuscvis instrumenti mechanici apparatu, solent nonnulli per solam ovi gallinacei, aut columbini, in simplicem aquam immersionem, brevissimè dijudicare, quæ aqua gravior, vel levior sit; siquidem quò aqua purior fuerit eò Ovum profundius immergitur, & quò ponderosior, eò quoque altius assurgit: idque pro salium permistorum diversitate, & copia. At judicium inde sumendum Delio eget natatore.

Cæterum facilè nunc est, aquarum bonitatem, atque malitiam artis Chymix beneficio detegere tum simplici evaporatione, tum per alembicum destillatione, tum etiam per varios stillatitios liquores commistione; undè quidquid in aquis heterogeneum delitescit, promptè revelatur, & patefit.

Quoniam verò Aquæ omnis odoris, saporis, & coloris expertes esse debent, ut quocumque extraneo corpore sint exutæ, hinc fit, ut aquæ ex montibus stillantes, ac veluti per filtrum trajectæ, cæteris meliores sint, ac levissimæ observentur; itemque aquæ per æstatem cum tonitru decidentés, utpotè è tenuioribus vaporibus altius in aera delatis, atque omni inquinamento terreo depuratæ, ut idem Hippocrates edocet *cit. lib. de aere, aquis, & locis*, si præsertim in bonis deinde locis, politisque cisternis diutius asserventur, ut omnem fæculentiam penitus deponant. Quam Hippocratis sententiam sequutus Vitruvius *lib. 8. cap. 2.* pluvialem aquam cæteris anteponebat, inquiens: *Itaque quæ ex imbribus colligitur aqua salubriores habet virtutes,*

quæque elicitur ex omnibus fontibus levissimis, subtilibusque tenuitatibus, deinde per aeris exercitationem percolata tempestatibus, liquecendo pervenit ad terram. Verum non omnem aquam pluviam æquè commendabilem censet Hippocrates, sed temporaneam solùm, quæ scilicet media æstate decedit, vigente canicula, ut seipsum explicat *6. epidem. sect. 4.* ibi enim aliam facit Temporaneam, aliam Nimbosam, & Procellosam: Temporanea calore Solis magis elaborata, & veluti per alembicum distillata tenuior, leviorque est, omnique impuritate exuta, si præsertim cum tonitru decidat. Procellosa verò, ac Nimbosa ex vaporum, & exhalationum inter se mistorum abundantia generatur, unde calori attenuanti, ac disgreganti neutiquam subest: quamvis in contrarium vernas, & hyernas potius commendet Rufus Ephesus apud Oribasium *5. collect. cap. 3.* sed minus rationabiliter. Quas omnes Aquarum dotes, & bonitatis differentias complexus Celsus ita distribuit *lib. 2. cap. 18.* *Aqua levissima pluvialis est, deinde fontana, tum ex flumine, tum ex puteo, post hæc ex nive, & glacie, gravior ex lacu, gravissima ex palude.* Verum qui de his plura desiderat, legat Hippocratem, ejusque Commentatores super *cit. lib. de aere, aquis, & locis*: id quod & nos alias explicuimus in nostris prælectionibus *super tertium Artis Medicæ Galeni*, de usu sex rerum nonnaturalium agentes.

APHORISMUS XXVII.

Qui noctu bibere appetunt, iis admodum sitientibus, si superdormierint bonum.

EDocet in hoc aphorismo Hippocrates num ex siti nocturna bibendum sit. Bonum autem ait, si sitis illa superdormiendo sustineatur.

Quamvis autem hæc sententia, tum ad prognosin, tum ad therapiam pertinens, clarissima videatur; in ea tamen dubitare primò contingit, de qua siti intelligenda veniat, de naturali nimirum, an de morbofa. Et quidem si de naturali interpretemur, quæ scilicet in statu sano accidere solet, ex cibis solum plus iusto ingestis, vel calorifica vi præditis, quales sunt multo sale, aut aromatibus conditi, alique, nemo planè inficiabitur nullatenus bibendum, sed superdormitione solum sitim illam esse sedandam, cum ea non nisi largiori potu desinat, præsertim quia solius aquæ beneficio, salia illa, aut aromata dilui, ac infringi desiderant. Ita quoque si sitis fiat ab inopia lymphici, vel serosi humoris, ex immodicis fortassè evacuationibus absumpti, cum notissimum cuique sit, ea ratione sitim animantibus datam, ut ipsa, veluti calcari, ad assumendum potum stimulentur, ut & fame, ad cibos capeffendos, ne penitus deficient. Itaque de morbofa potius videtur explicandus aphorismus; quamobrem appositè adjecit Hippocrates *noctu*, & *iis admodum sitientibus*: Quæ sanè ægrotantibus, & morbosè sitientibus contingunt.

At verò quoniam Veteribus in usu erat lautius cœnare, quàm apud

nos nunc fit, facile quoque est, ut de his quoque sententiam hanc Hippocrates protulerit; cum sæpe sæpius accidat à larga, copiosiorique cœna sitim fieri molestissimam, & præsertim si vino meraciori, atque uberius assumpto, fuerit sociata, unde falsa sitis accidit, & potius à concrecente, viscosoque humore ab assumptis cibis progenito: quo casu sitim sustinere, ac superdormire bonum est, ut nimirum crassities illa per somnum extenuetur, ac dissolvatur, quippè sitis licet passio ventriculi sit, atque in stomacho fiat, ut fames, (licet Platoni placuerit illam potius ad pulmones referre) percipitur tamen in faucibus, & in lingua, vel cum saliva convenienti deficiunt, vel cum à lymphâ fluida, dilutaq; nullatenus irrigantur, sed potius à viscosa instar glutinis devinciuntur, ita ut poruli, glandulæque salivales roridum illum humorem effundere nequeant, quemadmodum à pastu largiori, & ab assumptis stypticis cibariis frequentissimè accidit: Tunc enim silere, & superdormire, ad sitim sedandam, optimum remedium est. Dixit autem *bibere appetunt*, non sitiunt: Appetere enim, non est revera sitire, sed quandam aviditatem, & bibendi desiderium habere ex depravato sensu, præsertim in ore, & faucibus inducto, ad lymphæ salivariæ crassioris redditæ perhumectantia dissolutionem: quo etiam fit, ut falsam hanc sitim sæpe numero gargarismis ex aqua ardente, vel vino, sedare soleamus, aut detenta in ore, vel mansa re quapiam salivam, & spuitionem promovente.

Quia prætereà addidit, *admodum sitientibus*, de siti planè immoderata, & excedenti videtur locutus, quæ etsi sanis à pastu contingens naturalis

turalis appellari possit, non tamen quis perperam assereret, si quodammodò præternaturalem illam nuncuparet, veluti inductam à causa vix à morbosa recedente, cum lympham salivariam sua fluxilitate orbatam pariat, & molestiam non levem stomacho, ac toti corpori inferat, eo quòd istiusmodi sitientes irrequieti, & queruli fiant, immò loquela, motuque linguæ plurimum hæsitantes, vix verbum proferre possint, quæ sanè ad symptomata morbosa proximè accedunt. At verò ex hoc non benè Galenus infert, potum his esse statim exhibendum, quasi verò Hippocrates moderatam sitim esse tolerandam, & immoderatam largo potu sedandam esse voluerit; nam ex supradictis contrarium clarissimè evincitur, si nimirum sitis falsa sit, & non ex inopia, sed ex copia, & crassitie lymphæ suboritur.

Subditur, *si superdormierint, bonum*: nam à superdormitione sitis proculdubio desinet, digestis nimirum, dissolutisque cibis ventriculum gravantibus, unde postmodum lymphæ salivariæ dilutior fit. Quòd si causa sitim inferens omninò morbosa sit, ut in febrientibus, à superdormitione etiam mitescet, ac sedabitur; unde adhuc bonum signum erit, denotans illam non esse adeò contumacem, ac malignam, ut remitti, ac domari non possit; quomobrem si somnum admittit, ad meliorem statum, atque ad coctionem reducibilis significatur. Somnus autem hic neutiquam morbosus dici debet, sed naturalis, qui scilicet prodest, tum sedando sitim, tum coctionem causæ illam inferentis promovendo, quæ planè à superdormitione commodè sequitur. At verò non ex eo, quòd Hippocrates dixerit

bonum, si superdormierint, poterit quis è converso inferre malum, si somnus nullatenus insequatur, cum aliundè sitis illa desinere possit, præsertim data mora, atque indicto silentio, admonente ad hoc idem Hippocrate, qui 6. *epidem. sect. 3.* scripsit plurimum conferre ad sitim diminuendam, vel extinguendam, *os claudere, & tacere*, unde salivæ dispendium non fiat. Atque hinc facile deducitur, cur hianti ore dormientibus os amaricet, & sitiat, crassescente nimirum lymphæ in ductibus salivalibus, atque ab aere inspirato, exspiratoque non minimè alterata, obstructis intereà oscillis lymphicis, corrugatisque glandulis palati, faucium, & linguæ, ubi remorata crassescit. Bonum autem exinde portenditur, tum quia causa inferens sitim jam supponitur dissoluta, unde non solum illa sedetur, sed somnus pariter facile concilietur; tum etiam quia pleraque alia incommoda placidissimè evitantur. Porro somnus hic erit naturalis, non morbosus, utpote qui conferat, non lædat, digerendo scilicet, attenuandoque crassiorem salivam, & quietem, ac robur toti corpori impartiendo: neque solum bonum de tempore præsentis, sed etiam de futuro, cum exinde corpus ipsum perquam benè, se in posterum sit habiturum.

APHORISMUS XXVIII.

Suffitus aromatum muliebria ducit: sæpius verò, & ad alia utilis esset, nisi capitis faceret gravitatem.

PER plures aphorismos agit in posterum Hippocrates de illis symptomatibus, quæ feminis tam nuptis, quam innuptis accidunt, & tam tempore gestationis, quam ante, & post,

& post, præsertim verò à partu. Nunc autem generali aphorismo docet, suffitum aromatum muliebria movere, ac deorsum ducere; itemque in aliis quoque ægritudinibus illum utilem esse, nisi tamen capitis gravitas, & dolor timeatur.

Inquit primò *suffitus aromatum*. Num autem naribus, an uterò is sit excipiendus, non memorat, nec explicat, & num aromata ista debeant esse benè, vel malè olentia. Sed ad primum dicendum, utero excipiendum illum esse: naribus quippè fœtida, odora verò utero semper adhibentur. Ad secundum, quamvis Heurnius putet benè olentia, ut est cyperus, calamus aromaticus, cassia *id est lignea*, bezoinum, &c. & Galenus *in comm.* præcipuè intelligi scribat, cassiam, costum, cinnamomum, & amomum; Ipse tamen Hippocrates *lib. de natura muliebri*, Aromata hæc esse inquit thymbram, ericen, hypericon, papaver album, malvæ radicem, urticæ semen, mercurialem, salviæ, dictamnium, amomum, cardamomum, helenium, aristolochiam, carlinam, adiantum, peucedanum, apii, ac fœniculi semina, rutæ folia, ac semen, &c. itemque alibi recenset cyperum, juncum rotundum, & odoratum, calamum aromaticum, myrrham, sisymbrium, anisum, nigellam, quibus & Cardanus addit etiam moschum, & zibethum. Ipse nihilominus crediderim distinguendum esse; & quidem, quæ suapte natura odora sunt, & in ignem injecta odorem quoque emittunt, nullatenus in usum ducenda esse; quæ verò odora sunt, sed per ignem halitus inodoros, vel saltem non vehementer olentes exhibent, qualia potissimum sunt, plantæ, semina, folia, posse tutius adhiberi: exper-

tum enim ejusmodi suffitus odorosos perperam fœminas exagitasse, præsertim à partu, quoniam uterus ex illis gravissimè affectus, adeò corrugatur, & constringitur, ut nil penitus deponat; quo propterea factum, ut ejusmodi suffitus exoleverint, quippè pleræque à partu ex his odoriamentis periere; suffectus autem est in locum suffituum usus pessariorum ex rebus benè olentibus, puta oleo jasmini, florum aranciorum, suaveolentibus tyro, zibetho, aliisque, cum frondibus mercurialis, rutæ, salviæ, & similium, quibus scilicet uterus allicitur, & quodammodò in suis vasculis aperitur, ne utiquam verò nares halitibus odorosis feriuntur: sed & herba fœtida malè olet, at verò injecta prunis nullum exhibet fœtorem. Describitur ab Hartmanno in sua praxi suffitus ex scoriis reguli antimonii injectis in lixivio calenti; & quidem semper tutius in his existimarem prodesse vapores ex rebus humefacientibus, quàm halitus ex rebus exiccantibus: nam quæ humefaciunt, non solum emolliunt, & laxant vias uteri, verum etiam sanguinem grumosum diluunt, & concretos, hærentesque succos lymphicos extenuant, ac dissolvunt. Tria enim generaliter exquiruntur in ducendis muliebribus excrementis, ut quod concretum est, dissolvatur, viæ laxentur, & aperiantur, atque uterus in suis glandulis, & membranis mollescat, ac in orificio interno patulus maneat: quæ sanè à vaporosis, non autem ab halituosis facilius consequuntur.

Dubitare in super contingit, quid nomine muliebrium hic intelligatur. Et licet propriè muliebria sint expurgationes illæ per uterum, quæ accidunt post partum, & lochia, ac puer-

puerperia appellantur; nihilominus à Commentatoribus hoc loco, sub nomine muliebrium comprehendi dicuntur, quæcumque evacuationes ex utero fieri solitæ, etiam extra partum, ut sunt menstruationes, & cum his aliæ evacuationes tum ex utero immediatè, tum etiam ex toto corpore provenientes, cum non rarò accidat corpus universum suis impuritatibus exonerari, facta per uterum depositione, expulsioneque. Hinc Fuchsius pro muliebris scribit *menfes* in sua versione. Secundinæ etiam retentæ, foetus mortuus, molæ, & alia præter naturam in utero genita, muliebria quoque dici possunt, quippè sunt de genere eorum, quæ omninò debent evacuari, & extra uterum expelli. Hæc autem licèt etiam medicamentis per os assumptis educi soleant, promptius tamen, atque ocyùs ab his, quæ utero suffiuntur, haberi possunt.

Nedum autem ad muliebria duenda ejusmodi suffitus prodesse ait Hippocrates, sed etiam ad alia plura, quæ planè intelligenda sunt in cæteris affectionibus ex utero dependentibus, ut sunt suffocationes hysteriæ, uteri inflationes, dolores, &c. sed & ad facilitandam conceptionem non rarò usu venire solent, itemque in fluxu muliebri, ulceribus uteri, dolore coxendico, doloribus lumborum, præsertim ex ligamenti uteri. Vult quoque Cardanus etiam in viris locum habere posse, puta in hæmorrhoidum affectionibus, somno gravi, catarrhis, nervorum ægreditudinibus, aliisque. Verum quia in his sæpenumerò affert suffitus capitis gravitatem, seu dolorem, idcirco adjecit Hippocrates, *nisi capitis faceret gravitatem*, quia licèt suffitus juvamento foret ejus-

modi ægreditudinibus, tamen causa doloris, gravedinis capitis, & læsionis cerebri in usum duci non debet: quippè magis prævalet nocumentum cerebro illatum, quàm quodcumque aliud symptoma, cui per suffitum sit occurrendum, cum & non liceat morbum morbo tollere. Verumtamen in affectibus capitis solemus sæpesæpiùs suffitus elicere ex gummi animæ, balsamo peruviano, roremarino, succino, aliisque, absque ullo metu cephalalgie; quamquam plerique sint, qui ejusmodi odora menta sufferre nequeant, ut propterea necesse sit pro corporum varietate, ac diversa eorundem dispositione, atque habitudine, modò in aliquibus uti, modò in aliis cavere, pro ratione.

APHORISMUS XXIX.

Gravidas purgare, turgentem materiam, à quarto mense usque ad septimum, minùs verò has. Recentiores autem, & seniores foetus cavere oportet.

Quamvis hic aphorismus scriptus quoque inveniatur initio libri quarti, non propterea frustrà hic repetitur, siquidem ibi reponitur desumpta indicatione à purgantium medicamentorum natura, hic verò potius à tolerantia gravidarum, & à tempore gestationis earundem. Dicitur autem purgari posse gravidas, turgente tamen materia, à quarto solum mense ad septimum, at has minùs; in reliquis temporibus tum primis, tum ultimis à gestatione, cavere omninò oportere.

Gravidas oportet purgare, at non ratione graviditatis, sed morbi; nam nisi gravidæ aliquo morbo affi-

afficiantur, purgatio nulla instituenda est, cum purgans medicamentum, ut indicatum, necessario exigat indicans, quod illud exquirat, juxta leges in methodo medendi traditas. Neque verò morbus debet esse quilibet, sed materialis, & ab humore dependens, adeoque cum cacochymia, quæ alio leviori præsidio sit inemendabilis, immò cum turgentia, ut præcipit in hoc aphorismo Hippocrates, cum inquit: *turgente materia*; turgens autem materia humoralis est, & cum impetu delata huc, & illuc, ne scilicet in aliquam partem principem decumbat, ut benè Galenus *in comm. aphor. 10. lib. 4.* & præsertim in uterum, quò irruens abortum simul afferret, & mortem tum fœtui, tum matri.

Sed quo genere medicamenti? Communiter in praxi existimant levioribus; sed Averroes vult cavendum rhabarbarum, & aloem, utpote quæ movent per urinam, & uterum, aperiuntque facile oscula venarum, & arteriarum. Hinc in praxi seligunt mannam, & quæ ex manna componuntur medicamenta. Sed nec ista omninò tuta sunt, nisi exactè castigata, ne flatus, & tormina excitent. Num etiam vomitoria? Affirmativè dixi *in comm. prædicti aphorismi primi quarti libri*, quia pleræque gravidæ solo vomitu, & spontaneo, præcaventur ab abortu.

Non solum autem vult Hippocrates purgandas solum turgente materia, sed etiam tempus limitat peragenda istiusmodi purgationis, nempe à quarto mense ad septimum; tunc enim fœtus tenaciùs hærent utero, nec tam facile vi medicamenti purgantis dissecantur à placenta vasa illorum umbilicalia. Adicit autem *has minus*, idest eas,

quæ septimum mensem attigerint, quoniam eo tempore solent fœtus motionem in utero subire, & quacumque de causa abortiri; quin & tunc grandiores redditæ alimoniam exquirunt abundantiorē, quæ usu medicamenti vel imminuitur, vel depravatur; atqui ex hoc etiam clare deducitur voluisse Hippocratem inclusas gravidas ad septimum perductas, aliter non dixisset, *has verò minus*.

Denique recens concepti, seu juniores fœtus, & seniores, idest adultiores, & maturi, vel clariùs in primis, & ultimis mensibus, cavere oportere concludit, quia tunc facillimè abortus succederet ex purgante medicamento. Fœtus enim à Galeno, quàm appositè comparantur fructibus in arbore pendentibus: sicut enim hi, cum tenelli sunt, & molli pediculo ramulis hærescunt, facillimè quacumque de causa, etiam ventosa aeris commotione, decidunt, itemque cum maturitati sunt jam proximi; ita fœtus pari de causa facillimè evelluntur, & defluunt.

APHORISMUS XXX.

Mulierem utero gerentem capi ab aliquo acuto morbo, lethale est.

A Nacutus morbus utero gerenti superveniens causa graviditatis accidat, & in utero solum, an verò se junctim à causis gestationis, & vitio totius, non meminit in hoc aphorismo Hippocrates: & quamvis utrumque si accidat, semper contingat utero gerentem periclitari; nihilominus quia *aphor. 43.* hujus dicitur: *si mulieri gravidæ in utero fiat erysipelas, lethale est*, ubi uteri affectionem specialius memorat; verifi-

verisimilius videtur dicendum, voluisse hoc loco quamcumque ægritudinem acutam commemorare, quæ utero gerenti accidat, sive illa vitio alicujus partis, & uteri, sive vitio totius fiat, ut propterea non ratione partis affectæ, sed causa acutiei ægritudinis, vitæ periculum contingat.

Et quidem, ut benè Galenus *in comm.* vel acutus morbus utero gerenti superveniens est cum febre conjunctus, vel absque febre; si cum febre jungatur, duplex periculum imminebit, alterum ab ipsa febre, quæ sua vi, atque acutiei, facillimè foetum perimit; alterum ex victu illi indicto, qui si parvus, ratione acuti morbi foetum destruet, cum is tantam diætam ferre non possit; si verò largior, febrem continuam augebit, & gravidam conculcabit. Si autem acutus morbus absque febre sit, veluti morbus comitialis, & attonitus, convulsio, tetanus, aliæve, propter magnitudinem morbi, ejusque vehementiam, impossibile est utero gerentem inde incolumem evadere.

Sed nedum ex his, quæ scitè quidem proponit Galenus, peritura videntur gravidæ, gravi, atque acuto morbo correptæ, sed etiam, quia multa medicamenta, quæ cæteroqui acutis morbis adversarentur, admittere non possunt ratione graviditatis: sic diaphoretica, & somnifera, itemque diuretica, ac dejectoria, immò omnis generis evacuantia medicamenta, in gravidis periculosa sunt, unde vix, ac ne vix quidem à medicis illis præscribuntur. Sunt præterea illæ obnoxia abortui, qui omni, & levi de causa non rarò accidit, potissimum autem ex acuta, ac gravi ægri-

tudine, per quam sanguis indebitè fermentescit, coctiones interturbantur, excrementa detinentur, & cumulantur, quocirca foetus nutritio, & vita graviter afficitur. Insuper uterigestatio comparatur ægritudini, qua multoties utero gerentes nausea laborant, dolent, vigilant, & in cunctis suis operationibus malè afficiuntur, unde postmodum vires debilitantur: si igitur his malis acutus morbus adjungatur, vix fieri poterit, ut illæ evadant. Demùm acutus morbus gravidæ superaccidens magnam, vehementemque causam consequitur, ob quam illæ acutè ægrotant, & symptomata, quæ eundem comitantur, plerumque sunt vehementissima.

Quamvis autem simpliciter dixerit Hippocrates lethale esse utero gerentes acutis morbis corripì, poterit tamen spei aliquid vitæ subesse, si primis mensibus graviditatis illæ acutam ægritudinem incurrant, cum cæteroqui gravius longè sit ultimis mensibus ægrotare: primo enim, aut secundo, & tertio mense graviditatis, semper vires solent esse validiores, multum alimentum foetus haud exigunt, & si fortassis abortus accidat, minùs periclitantur, quemadmodum idem Hippocrates fatetur i. *epidem.* in historia trimestris ægræ xiii. at verò in ultimis mensibus ista omnia graviora sunt, ut patet. Quid verò in alterutrius periculo agere liceat, planè dixerim expedire, servare matrem, licèt foetus sit ex accidenti periclitaturus. De qua re tamen alibi.

APHORISMUS XXXI.

Mulier utero gerens, sanguinem misso ex vena, abortit, & præcipue si foetus sit grandior.

Verisimile admodum est, de utero gerentibus morbo aliquo affectis sententiam hanc fuisse ab Hippocrate prolatam; nam rationabile haudquaquam videtur utero gerentes bene se habentes debere sanguinis detractioe evacuari. Hinc planè dicendum, quòd cum antea scripserit acuto morbo correptas periclitari, si fortasse quis putaret sanguinem illis esse detrahendum, nunc monet, nulla ratione licere, ob periculum manifestissimum abortus. Sed & nullatenus audiendi sunt, qui distinguunt, de sanguine misso ex venis superioribus, & ex venis inferioribus, ut propterea putent abortum futurum ex venæ sectione facta in partibus inferis, non superis; nam præterquam quod Hippocrates indefinite scribit, *sanguine misso ex vena*, unde quamcumque intelligit; neque tamen verum est, quòd ex venis supernis missus sanguis abortum non fit allaturus, cum contrarium ex anatome deducatur, qua pluries constitit, sectis venis superioribus, uterum redditum fuisse patentiorum, & nedum foetum, sed & catamenia deposuisse, cum venæ superiores sectæ circulantis sanguinis motum magis excitent per arterias in uterum sanguinem ferentes: cæterum venarum delectus in sanguine mittendo, vanus quoque existimatur, cum universus brevi temporis spatio per omnes partes circumagatur; siue igitur sanguis mittatur ex supernis, siue ex infernis venis,

semper idem periculum abortus imminabit; ni tamen adeò plethorica sit utero gerens, ut ex sanguinis missione convenienti, & moderata, nullum sit sensibile incommodum subitura, etenim pleræque sunt, quæ ad plures uncias detractum sanguinem bene sufferunt.

Duo itaque mala timenda erunt ex ejusmodi sanguinis evacuatione, alterum quidem universalis commotionis, quæ specialius uterum perturbat; alterum verò detractioe alimenta tum matri, tum foetui; utrumque autem abortus periculum minatur: qua sanè ratione adjectum est, *& præcipue, si foetus sit grandior*, quippe tunc abundantius alimentum exquiritur; quamobrem quæ fortasse detractio foret tolerabilior in primis mensibus graviditatis, omninò nocua est in ultimis.

Sed cur dixit, *sanguine misso ex vena*? fortè quia si ex aliis partibus educeretur, non esset periculosa, utpote quæ commotionem in sanguine, totoque corpore, non excitaret, quemadmodum si cucurbitulis scarificatis ex cute sanguis educeretur, vel etiam ex naribus levi perfrictione, titillationeque. At verò detractio per hirudinum appositionem, etiam ex venis fit, adeoque omninò vituperanda. Verum tamen etiam si sanguis ex cucurbitulis scarificatis educeretur ea quantitate, ob quam utero gerens posset debilitari, vel etiam ex inducto dolore, plurimum commoveri, & exagitari, periculosa quoque existimanda foret, præsertim si ex partibus infernis, aut in cruribus, ut fieri solet, adhiberentur, quippè per eas posset facilimè grvida abortiri.

Addit postremò Hippocrates, *& præcipue si foetus fuerit grandior*, id est

ideſt in ultimis menſibus, & partui proximus: etenim tunc duplici ex capite periculum abortus immineret; uno quidem, quia ſubtraheretur illi alimentum, quod per idem tempus abundantius exquiritur, tum ad nutritionem, tum ad vires, quibus eget pro partu validiſſimis, ad quem promovendum conatus ſuos iteratò foetus adhibet; unde Galenus *in comm.* ſubdit: non modo miſſo ſanguine ex vena, ſed etiam ex longiori inedia, foetus deſtruitur; Altero verò, quia, ut antea dictum, in ultimis menſibus quavis etiam levifſima commotio abortum affert, propter facilem vaſorum umbilicalium, & placentæ, ab utero diſſociationem, ac promptam orificii ejuſdem interni dilationem. Si ergo tunc uterus promptè hiat, & foetus pariturus ad exitum ſponte ſua ſe accommodat, planè à ſanguinis detractiōe commotio in toto corpore inducta facillimè poterit abortum excitare; is autem quàm ſit eo tempore periculofus, cunctis notum.

APHORISMUS XXXII.

Mulier ſanguinem evomenti, menſtruis erumpentibus, ſolutio advenit.

CUm non rarò accidat, foeminas diverſis egritudinum generibus laborare, quarum cauſa malè affectus ſanguis ſurſum impetat, & præſertim in ventriculum, unde vomitus cruentus; conſiderans in hoc aphoriſmo Hippocrates, quo pacto ejuſmodi incommodum deſinere poſſit, citrà cujuſvis medicamenti exhibitionem, nullaque artis opera ſuffragante, docet ſponte ſua vomitum ſanguineum deſitutum, ſi menſtrua purgationes,

quæ forſan antea ſuppreſſæ fuerant, erumpant, quippè ſanguis ille, qui, intercifo per vaſa uteri curſu, aliò diverterat, & in ventriculum irruerat, denuò in conſueta, & naturalia emiſſaria delatus, laxatis, reſeratiſque ductibus, ut decet, per uterum expurgatur.

Quamvis autem effatum hoc ſic generaliter videatur ab Hippocrate pronunciatum, ut quemcumque ſanguineum vomitum menſtruorum eruptio ſolvere valeat, crediderim tamen, ea ſolummodò ſanguinis vomitionem menſtruorum eruptionem eſſe ſoluturam, quæ à ſola eorundem retentione proveniat; etenim ſi fortaſſè alia de cauſa illa habeatur, egrè admodum fieri poterit, ut deſinat per menſtruorum eruptionem. Hinc ſi vomitus ſanguinis contingat dirupta vena, aut arteria, per jecoris, aut ſplenis parenchyma repente, aut etiam è ramulis gaſtricis, aut meſentericis, nequaquam ſuffragabitur ſubſequens menſtruorum eruptio, ſed potiùs morbum morbo addet, fortaſſè ex vitio tali in ſanguine contracto, ut ex pari cauſa tam uteri vaſa, quàm alterius viſceris vene, aut arteriæ aperiantur, vel erodentur. Sæpè tamen accidit, ut ex menſtruorum retentione, ſanguis utiliter per vomitum, aut ſputum egeratur, ob conſenſum, quem inter ſe ineunt uteri vaſa cum mammariis, & jugularibus ſubclaviis. Modò ſecluſis quibuſcumque modis, quibus ſanguis à vitio vel ſui, vel viſcerum egrediatur, menſtrualis intelligenda hîc illius eruptio, ut propterea à ſola uteri obſtructione detentus evomatur. Verùm cum dixit *ſanguinem evomenti*, non ſolum de vomitu propriè dicto, qui peculiaris ventriculi actio dicitur, ſed etiam de ſputo, aut ſimplici ſcreatu, aut etiam cum tuſſi, non tamen

admodum molesta, voluit Hippocrates adnotare, cum per utramque viam plerumque sanguis ex retentis menstruis egeri soleat. Appositè etiam exponunt plerique per verbum *erumpere*, comprehendi non quamcumque menstruorum eruptionem, sed eam solùm, quæ affluenter, & confertim provenit; quoniam per hanc solam evacuationem divertitur motus sanguinis ad consueta uteri emissaria. Porro si menstruæ purgationes erumpant, neque inde vomitus, aut alia sanguinis excreatio definat, indicio erit venam aliquam, aut etiam arteriam, ruptam esse, vel exesam.

Perperam autem solent hinc plerique deducere, licere Medico venam tundere ex venis pedis, quoties sanguis fursùm eiicitur, ac expurgatur, quasi verò Hippocrates ex hoc aphorismo edocere voluerit posse arte id ipsum peragi, quod spontè naturæ plerisque accidit. Sed longè isti, latèque falluntur: alius enim omninò diversus est naturæ motus ab eo, qui arte per venæ sectionem peragitur: quippe qui spontè sanguis per menstruorum eruptionem egeritur, non solùm per loca propria, & consueta fit, per quæ, indicta venæ sectione, neutiquam perficitur, sed ejus etiam humoris fit, qui revera excernendus est; atqui nequit ars, tam dexterè, opportunè, ac salubriter naturæ motum imitari, quin plurimum sæpè sæpius non fallat. Est etiam præterea, quod specialius in menstruorum eruptionibus advertamus, ipsius scilicet uteri, ac totius corporis repurgationem; siquidem passim experimur, omnia propemodum corporis excrementa, ipsiusque sanguinis impuritates, unà simul per uterum deponi, & gravissimas cæteroqui ægritudines exinde finiri, quemadmo-

dum idem Hippocrates pluribus edocet, & in historiis epidemiorum sæpius enarrat. In his itaque casibus, solertis naturæ operam dumtaxat exquiremus, illamque, quoad fieri poterit, per loca præsertim confertia, puta per eundem uterum, adjuvabimus, ut tutò, & sine ulla dubietate, illam exoneremus, ac tandem ab ægritudinibus vindicemus.

APHORISMUS XXXIII.

Menstruis deficientibus, sanguis ex naribus fluens, bonum.

QUo pacto defectus menstruorum aliquando innoxius evadat, atque illius suppressa evacuatio per aliam suppleri possit, docet hoc aphorismo Hippocrates, ubi narium hæmorrhagiam commendat, si fortassè menses in fœminis defecerint. Quamvis autem alibi dixerit, *sanguinem supra ferri, qualiscumque sit, malum*, hanc tamen regulam ipse excipit in fœminis, quæ suppressionem menstruorum patiuntur: neque enim alia melior superabundantis sanguinis evacuatio unquam visa est ea, quæ per narium hæmorrhagiam accidit, quippè per eam solet sæpissimè natura, nedum ab his, quæ uteri sunt, ægritudinibus, sed à plerisque aliis liberari; sic in febribus synochis, & ardentibus, inflammationibus internis, cæterisque, fluens è nariibus sanguis juvamento est: id quod licèt videatur factum per loca distantissima, statuta tamen sanguinis circulatione, facillimè innotescit, qua ratione conferat, cum per arterias partium infernarum promptissimè in venas recurrentes ad partes superas, sanguis influat. Sic anatome compertum, suctis, correctis,

tis, aut propter vulnus fortassè ibi-
 dem inflictum, sectis venis per ube-
 rum substantiam perreptantibus,
 statim ex utero retentas menstruas
 purgationes prodiisse, ut propterea
 nedum ob consensum mammarum
 cum utero, sed etiam ob motum
 sanguinis concitatum, uterinas ar-
 terias promptius relaxari, atque a-
 periri contingat. Modò inter cete-
 ras alias sanguinis è venis supernis
 evacuationes, specialius proficit ea,
 quæ è naribus fit, tum quia nullum
 inde à sanguine extra propria rece-
 ptacula exeunte damnum imminere
 potest, ut facilè evenit, cum ex ore,
 aut pectore prodit; tum etiam quia
 venæ in nares desinentes exiles sunt,
 & non nisi guttatim sanguinem extil-
 lant, nulloque cum impetu, aut ir-
 ruptione, quinimò facile admo-
 tis localibus sisti potest, quod secus
 accidit, cum ex aliis venis erumpit;
 tum denique quia nullius interni vi-
 sceris læsionem significat, cui spe-
 cialius occurrendum sit, uti cum ex
 ore potissimum excernitur, quoniam
 vel pectoris, vel pulmonis, vel eso-
 phagi, aut ventriculi, vel cerebri
 meningum gravem noxam arguit.
 Sed & dixit Hippocrates *bonum*, de-
 sumpta nimirum ratione ab ipsa
 menstruorum suppressione, non au-
 tem à loco: etenim bonum est, gra-
 vatum corpus exonerari, ne scili-
 cet alicubi restagnans excremento-
 sus sanguis, vel aliò fortassè trans-
 vectus, graviolem morbum inferat;
 sed tamen haud omninò bonum est
 per nares egredi, quia consenta-
 neum, & naturale non est, menstruum
 sanguinem in foeminis per nares ex-
 cerni, sed solummodò per uterum,
 veluti per totius corporis emun-
 ctorium; In cunctis siquidem eva-
 cuationibus, ut alibi à nobis est
 notatum, non id solum, quod ex-

cernitur, sed quantitas, qualitas,
 tempus, modus, & locus rei excre-
 tæ considerandus quoque est, ut om-
 ni ex parte salutaris excretio illa
 censeatur: fieri enim potest, ut et-
 iam per nares sanguis convenienter
 excretus ex una profit, sed non pe-
 nitùs ex altera conferat, quia non
 per loca convenientia expurgatur,
 inducta nimirum interea obstruccio-
 ne in vasis uterinis, mox etiam tu-
 more, inflatione, scirrho, aliave
 pejori ægritudine, nedum uterum,
 sed & totum corpus in posterum
 graviter afficiente: Advertit po-
 stremò Galenus *in comm.* quòd li-
 cèt, *quæ per nares fit evacuatio in-
 noxia præ cæteris sit, non tamen si
 aliqua etiam alia evacuatio sine no-
 xa est, propterea aphorismus est
 falsus; neque enim quòd sola per na-
 res evacuatio, deficientibus men-
 struis, bona sit, dixit, sed hanc
 simpliciter laudavit, non adjun-
 cto, quòd sola. Si quispiam igi-
 tur alteram, quæ fit per sedem,
 dixerit ita affectis mulieribus uti-
 lem esse, hoc non adversatur a-
 phorismo; videtur enim aliquan-
 dò Hippocrates per unum, velut
 exemplum, de omnibus aliis simi-
 libus pronunciare.* Hæc Gale-
 nus.

APHORISMUS XXXIV.

*Mulieri in utero gerenti si alvus
 plurimum profluat, periculum
 est, ne abortiat.*

Sicuti ex sanguinis detractione
 per venæ sectionem antea dixe-
 rat, utero gerentem abortire, san-
 guine misto ex vena; ita nunc de al-
 vi profluvio memorat, periclitari
 foeminas utero gerentes, si illo cor-
 ripiantur.

Quoniam verò indefinitè dicitur *mulieri in utero gerenti*, non erit planè coarctandum tempus uteri gestationis, unde & primis, & ultimis, ac mediis mensibus, idem periculum imminebit, si alvus immodicè profluat; quamvis periculosiora semper sint tempora posteriora prioribus, & mediis: Est tamen quam maximè advertendum, differre plurimùm damna imminetia ex alvi profluvio, ab iis, quæ ex sanguinis missione proveniunt; siquidem id quod alvo profluit sæpenumerò solet esse prorsus inutile, excrementosum, ac præternaturale, ut propterea, saltem ratione causæ, ejuscemodi evacuatio bona censeatur; at verò quæ ex sanguinis detractio fit, omninò mala censenda est, cum exinde vitæ thesaurus inaniatur, & vires manifestissimè deficient. Verum tamen nocua existimanda solùm erit evacuatio per alvum, si immodica sit, ac modum non servet, subindeque ventriculi jacturam faciat; itemque si ab iterato transitu humorum per intestina, uterum illis attiguum coafficiat. Quamobrem jure optimo addidit Hippocrates *si alvus plurimum profluat*: quibus verbis, & laxatam plus justo alvum, & præternaturam fluentem denotat; nam si fortassè moderatè exoneretur, nec exinde ventriculus tum in appetendo, tum in digerendo fatiscat, proculdubio malum non erit, quin potius omni ex parte bonum; cum sæpissimè experiamur, utero gerentes ab hujusmodi moderatis egestionibus levari, & ab impuritatibus tum alvi, tum totius corporis antea cumulatis, salubriter vindicari.

Sed de quo fluxu intelligat Hippocrates, dubitari potest; nam alvi profluvia solent esse vel chylosa, vel humoralia; chylosa in lenteria, &

coeliaca passione; humoralia verò in diarrhœa, dysenteria, tenesmo. Et quamvis quodlibet ex his malum semper sit utero gerentibus; nihilo minus videtur dicendum, specialius hic fuisse notatam diarrhœam; nam in diarrhœa potissimùm alvus solet affluentius profluere, quod in hoc aphorismo dicitur; in cæteris autem non item: quippè in dysenteria frequens, & dolorosa dejectio fit, sed non copiosa, sicut neque in tenesmo; in lenteria verò, & coeliaca affectione cibi indigesti egeruntur, vel semimutati, sed nonnisi semel tantum, aut bis in die: at verò in hoc aphorismo dicitur, *si alvus plurimum profluat*: quibus verbis, & quantitas excretionis, & modus ejusdem præternaturalis significatur. Verum nocent adhuc ex alio capite utero gerenti, atque abortus periculum minantur, coeliaca passio, & lenteria, quia per chyli dejectiones corpus tum matris, tum infantis alimento privantur, & viribus deficient. In dysenteria quoque, & tenesmo, frequens illa, & dolorosa dejectio molestissima est, ut propterea ab iterato infestis uteris, quam maximè comprimatur, & doleat, propter consensum, viciniamque ejusdem cum intestinis affectis. Sed & cum his intestinorum ægritudinibus ferè semper conjunguntur febres, ciborum fastidium, sitis, inquietudo, vigiliæ, symptomata planè molestissima, & gravidis potissimùm perniciofa. Quamobrem semper malum erit utero gerentem quocumque alvi fluxu molestari, cum exinde abortus facilè subsequatur.

Debent autem istiusmodi alvi fluxus per multum tempus perdurare, ut abortum inferant; nam si fortassè intra biduum, vel triduum desinant, citrà abortus periculum salubriter

briter non rarò contingent, quemadmodum pluries in praxi experti sumus. Qua forsan ratione factum, cur Hippocrates dixerit, solùm periculum esse, ne abortiat; equidem non omninò utero gerentes ex hac dumtaxat alvi turbatione aborientur, si tempore modico duret, & cum sola excrementorum, aut malorum humorum exoneratione, constantibus viribus, & stomacho benè valente, ac postremò sponte sua desinat, quod sanè, quàm in omnibus ægritudinibus prodesse possit, clarè liquet.

APHORISMUS XXXV.

Mulieri, quæ uterinis molestat, aut difficulter parit, superveniens sternutatio, bonum.

Sternutationis juvamenta in fœminis recenset hoc aphorismo Hippocrates, & quidem in iis, quæ uterinis molestantur, quæque difficulter pariunt. Quid autem *pro uterinis* intelligat, pluribus examinat Galenus *in comm.* Quoniam verò in græco Codice scriptum est *ὁσπερὶ κῶν*, videtur congruentiùs exponendum, de uterinis, & hysterici affectionibus, potissimùm verò, quæ præfocationes appellantur, in quibus fœminæ nodum quandam in gutture percipiunt, & videntur quodammodò suffocari ob defectum anhelitus: in his quippè sternutatio summè proficit, ob concussionem totius corporis à sternutamento inductam, sed præsertim in utero. Verùm quia multoties vehementi, atque iterata sternutatione, adhuc quæ in uterico cavo continentur, facillimè eiiciuntur, verisimile quoque est, in his pariter sternutamentum esse profuturum; unde suppressa lochia, re-

tentæ secundinæ, & sanguinis grumi, aliaque similia, promptissimè expelluntur, vi, atque impetu à sternuendo; quatenus per ejusmodi concussionem non solùm excutitur uterus, deponitque id, quod intra se continet, verum etiam vasa ejusdem facilè dilatantur, ac aperiantur: cùmque sternutamentum fiat ab irritatione mamillarum cerebri processuum, & meningum, quæ conantur expellere, quod ipsis infensum est, planè ob uterico cerebro consensum per nervos, facile etiam is proritatur, expellitque quod ibidem congestum est. Quamvis autem quæcumque detinentur intrà uterico cavum, possint sternutamento superveniente promoveri, & expelli, nihilominus magis propriè hoc loco conferens sternutatio præfocationi uterinæ dicenda est: cùm enim ex ea fœminæ patientes mente quodammodò abalienentur, & cerebro hebescant, si his sternutatio accidat, fieri necesse est, ut cerebrum ipsum concutiat, & quodammodò resipiscat, atque adeò excutiat quidquid ex utero malè affecto illi infensum evaporarat, sive per nervos, sive per arterias. Videtur id ipsum rectè colligi posse ex contextu verborum ipsius aphorismi, quippè in eo dicitur, *quæ uterinis molestat*, modò mulier tunc potissimùm toto corpore afficitur, cùm hysterici affectionibus extorquetur.

Nedum autem proficere dicitur sternutatio in affectionibus hysterici, & uterico præfocatione, sed etiam in partu difficili, modò is ex imbecillitate fœtus proveniat: etenim, ut benè advertit Heurnius, si partus difficultas fortassè habeatur ex mala conformatione corporis ejusdem met parientis, aut ex prava fœtus pariendi dispositione, cùm vel in

pedes, vel in latus prodit; certè tunc nihilum prodesset sternutatio, immò potius obesset. At verò si fœtus debito modo se aptet ad exitum, sed præ sui infirmitate conatus non adhibeat, tunc summè proderit sternutatio, per quam motus expulsiuus uteri plurimùm sollicitatur, quoniam diaphragma ex impetu sternutationis validè propellit, ac comprimit epigastrium, & cum epigastrio uterum.

Denique licèt dicatur in textu, supervenientem sternutationem, id est sponte naturæ contingentem, proficere, nil tamen vetat, quin etiam arte si promoveatur, idem quoque beneficium non sit fœminis laboriosè parientibus affuturum. Hinc licebit in partu difficili, vel in fœtu mortuo, sternutamentum excitare, ad adjuvandum uteri conatum, ut utrumque ad exitum facili-
tetur. Profunt eapropter in hanc rem piper, galanga, euphorbium, el-leborus albus, nigella, nicôtiana, & quodcumque nares impensè proritare valet. Verùm enim verò semper modus aliquis in his adhibendus, pro parientis habitudine, ut nimirum citrà cerebri læsionem id peragatur.

Conferet quoque multùm per idem tempus, quo sternutatoria adhibentur, vel paulò ante, potionem aliquam exhibere, qua uteri conatus promoveatur, ductusque laxentur, ut ex utroque motu facili-
or habeatur partus propulsio. Mirè autem in id conferunt trochisci de myrrha, rubia tinctorum, castoreum, borax mineralis, cinnamomum, cassia lignea, crocus, dictamnium, valeriana, schœnanthum, matricaria, artemisia, atque ex his eliciti sales, spiritus, syrapi, elixires, vel se soli, vel cum aliis composti, ut in praxi,

Hæc eadem valent ad expellendas secundinas, ac placentam, si fortassis ab edito fœtu retineantur, nec promptè post partum exeat.

APHORISMUS XXXVI.

Mulier mensēs decolores, nec per idem semper tempus venientes, purgationem indicant esse necessariam.

Menstruas purgationes corrigendas hic proponit Hippocrates, præcipuè cum decolores sunt, inordinatæ, ac irregulares. Et quamvis Galenus dicat, in aliquibus exemplaribus, loco mensium decolorum, haberi *mensēs tardos*; nihilominus communior lectio videtur magis consentanea, tum quia tardi mensēs non omninò exigunt purgationem, utpote qui etiam attenuante diætâ possint promoveri, tum etiam, quia tardi mensēs, quam maximè conveniunt cum inordinatis, quippe qui plerumque etiam tardi sint: Sed etsi tardi mensēs hic legantur, neque tamen repugnabit, quod in aphorismo dicitur, necessariam fore purgationem, cum non rarò tarditas evacuationis istius ab humoribus crassis, & obstruentibus habeatur, vel etiam ab ipsomet sanguine glutinosiori, qui non tam faciliè per uteri ductus meare queat. Attamen communior versio retinenda, qua decolores mensēs leguntur.

Et quidem cum decolores sunt menstruæ purgationes, indicant sanguinem sero plus iusto scatentem, qui propterea debeat hydragogis medicamentis repurgari, quæ nedum serum superabundans educant, sed etiam humores, fortassè crassiores, detentos in glandulis uteri, vel menses incidunt, attenuent, & solvant.

vant. Verùm quia Hippocrates in hoc textu conjunxit menses decolores cum irregulari eorundem apparitione, ac reditu, proinde crediderim utrumque exigì pro recta purgantis medicamenti exhibitione, etenim cùm ejusmodi purgationes menstruæ decolores sunt, & debitam, consuetamque periodum non servant, non solum feri copiam, facile inedia, & potus abstinentia emendabilem, verùm etiam crassitiem humorum uteri ductus obstruentium arguunt, ut proinde serosiores dumtaxat humores permeent, tenaces verò, & hærentes retineantur, qui nisi convenienti purgante medicamento dissolvantur, proculdubio in longius tempus retenti, alia graviora mala inferent, tumores scilicet, abscessus, cachexiam, hydropem; dicuntur autem non per idem perpetuò tempus accidere, cùm modò præcurrunt, modò cunctantur, & modò in medio cursu intercepti, protrahuntur in aliud tempus. penitus incongruum, ut propterea inconstantes sint, certam, statutamque periodum non servantes. Sed & pro *tempore* legit Heurnius *modum*, qui proinde in sua versione habeat, qui *nec eodem modo benè respondeant*: juxtà quam Heurnii lectionem comprehenderetur sub hoc menstruorum vitio, non solum periodicatio varia, sed etiam modus excretionis assiduò differens, ut si purgatio menstrua uno tempore fuerit quinque, vel sex dierum, in alio sit unius, vel duorum, & ubi aliquando modus expurgationis guttatim fuit, aliàs sit affluentior, & tardius, & celerius, & continuatim, & interruptim, & magis, & minus, sine ullo ordine, aut respondentì quantitate, & qualitate evacuationis.

Cùm igitur hæc ita se habent, do-

cet Hippocrates purgandum omnino esse corpus ab humoribus vitiosis ejusmodi irregularitatem efficientibus, attenta tamen ætate, habitudine, & temperatura patientis, num scilicet efficaciori, an debiliori cathartico uti debeamus, incidente simul, & evacuante, potius serosos, quàm crassos succos educente, permittis medicamentis etiam uterinis, & antihystericis dictis, aut aliis, aliisque pro ratione. Conferunt autem plurimum in hunc usum pilulæ foetidæ, ut & aleoticæ, aleophanginæ, & de rhabarbaro, cum tartaro vitriolato, myrrha, dictamno, gentiana, croco, rubia tinctorum, aristolochia, & similibus ad dr. j. circiter pro virium, & humorum evacuandorum ratione. Cæterum his conveniens diætâ sociari debet, quæ simul unà attenuet, & incidat crassos, tenacesque humores, ac per uterum, vel per urinarias vias illos deducat. Valet etiam ad idem hiera cum diacalamentho, absynthium, senna, tartarus, atque ex his composita medicamenta, quæ plurima in Pharmacopœis descripta inveniuntur.

APHORISMUS XXXVII.

Mulierì utero gerenti si mammae graciles repente fiant, abortit.

QUanta sit inter uterum, & mammas connexio docemur ex hoc aphorismo, quo monitos nos facit Hippocrates, foetum in utero contentum, adhuc benè valentem, facile abortiri, si mammae in utero gerente repente gracilescant. Inquit autem, *repente*, idest nullo præcedente morbo, aut symptomate, & sine ulla aliqua causa manifesta, ob quam graciles illæ evaserint;

ferint; siquidem cum sensim graciles fiunt, & post longum temporis intervallum, fortasse ex morbo, aut extrema diæta, aliaque causa consimili, nil mirum erit, si graciles evadant, tabescente paulatim prægnantis corpore, ad cuius extenuationem illas macrescere contingat: at verò cum repente detumescunt, & ubi turgidæ, duræq; erant, extenuantur, ac flaccescunt, omnino ex languore, & à laxitate vasorum umbilicalium, uterique ægritudine, illæ contabescunt, unde postmodum abortus præstò erit. Attamen hæc potissimum accidere solent post quartum mensem, nam antea vix, ac ne vix quidem turgidæ mamillæ fiunt. Provida namque Natura per id tempus incipit alimentum in mammis disponere, ac præparare, ut de futuro extra uterum alimento provideat, quamobrem si fortasse ex aliqua, vel ejusdem uteri, vel foetus ibidem geniti, ægritudine contingat eundem deperire, quia cessat finis nutritionis illius, desinit quoq; futuri alimenti ad mamilla transmissio, interrupto simul una mutuo vasorum inter sese respondentium commercio.

Sed notare est, quod Galenus memorat *in comm. hujus aphorismi*, *trahere* scilicet *foetum ad se id, quod in sanguine dulcissimum est; simul autem, & lactis parte aliqua frui*: equidem anatome compertum est, ultimis mensibus inveniri in ventriculo infantis substantiam quandam albicantem lacti non dissimilem, quam ore sugi constat, atque supeditari à membrana illa, quæ immediatè foetum ipsum cingit, & Amnios græcè appellatur; sicut autem ista sensim imminuitur in ultimis mensibus; sic alia consimilis in mammis adaugetur, ut propterea

soleant non raro istæ, levi compressione, veletiam sponte sua, lacteum humorem exstillare. Atque hinc fit quamobrem foetus in lucem editi, mox fæces, quas meconium vocant, egerant, ac, ut notavit Hippocrates *lib. de natura pueri*, statim à partu lac è mammis sugant, quia videlicet intra uterum multò antea fugere à provida Natura edocti fuerant: de qua re alibi à nobis est actum.

Pro coronide tandem deducendum, admoneri hoc aphorismo Medicos, ne in ejusmodi mammærum extenuationibus remedia adhibeant; inde enim, futurum ut succedens abortus illis culpa cedat apud ignarum vulgus, quod sine ulla difficultate existimabit ab ejusmodi importuna medicamenti administratione, promotum fuisse negligenter abortum, qui tamen sponte naturæ superventurus erat.

APHORISMUS XXXVIII.

Mulieri utero gerenti, & geminos habenti, si altera mamma gracilis fiat, alterum abortit; Et si quidem mamma dextra gracilis fiat, marem: si verò sinistra, foeminam.

QUod dixerat Hippocrates de abortu unius infantis, ex extenuatione ambarum mammærum, in præsentì aphorismo asserit de alterutro, si gemini sint, cum alterutra pariter mamma gracilescit; sed tanto insuper cum consensu, ut si fortasse dextra mamma gracilis fiat, qui foetus in dextra uteri parte est, abortiatur, quique ex sententia ejusdem Hippocratis mas erit; si verò sinistra extenuetur, foemella, quæ in sinistra

stra quoque uteri parte concepta erit, sit abortitura.

Sed quamvis id tam clarè, certòque sit ab Hippocrate ex Veterum sententia sancitum, qui, ut inferius dicetur, existimarunt mares in dextra, foeminas verò in sinistra uteri parte generari: apud Recentiores tamen parem assensum non meruit; quoniam ex anatome jam constitit, indifferenter & in dextra, & in sinistra uteri parte tum mares, tum foeminas concipi, & generari posse.

Sed & neque tam facilè est, ut alter foetus, altero superstitè, abortiatur, quippe ad conatum uteri pro unius foetus exclusione, alterius expulsio facillimè haberi potest, cum non in diversis cellulis, ut aliquibus est creditum, foetus in utero contineantur, sed in una eademque cavitate, qua hiante, quidquid ibidem continetur, facilè deponitur. Verum tamen quia Hippocrati non semel innotuit possibilem esse superfœtationem, adeoque unum foetum jam extinctum excludi posse, alterum viventem detineri, planè poterit eadem lege alter abortiri, alter conservari; at verò quòd eadem conditione accadat, ut gracilescente dextra mamma, mas, gracilescente sinistra, foemella excludatur, nullus unquam vidit; unde demiror, qua ratione ductus Hippocrates scripserit, ita inter sese mammas cum foetibus respondere, ut non solum, qui in dextra uteri parte continetur, sed etiam qui masculus est, occidat, altero in sinistra superstitè. Sed & nec ex alio capite verum est, quod mares semper in dextra, foeminae verò semper in sinistra generentur, cum indifferenter experiamur tum in dextra, tum in sinistra gestari foetus, alterutrius

si fuerint sexus, ejusdemque maturitatis, & roboris.

Hinc decepti plerique fuere, qui cum viderent foeminas, dextera uteri parte plus justo tumefactas, judicarunt de maris gestatione; id ipsum quoque accidit illis, qui ex documento Avicennæ, conjectarunt de masculo, quòd in prima, & spontanea utero gerentis motione pedem, & crus dextrum prius locomoverunt. Atqui Anatome comperit, gemellos unica, & communi exteriori membrana, Chorion dicta, comprehendi, licet interior, Agninam vocatam, distinctam habuerint; unde cadit eorundem opinio, quòd in partu gemino, mares in dextra, in sinistra foeminae sint progeniti, cum gemini foetus unico Chorio contineantur. Non tamen penitus negaverim, accidere aliquando potuisse, ut ex extenuatione dextrae mamillae, mas perierit, & ex extenuatione sinistrae, foemella; verum id non certa lege stabilendum, ut perpetuò verum sit, & infallibile. Quò fortassè exemplo motus Hippocrates, quòd aliquando ipse vidit, in aphorismum redegit, veluti rem notatu dignam, & ratam, suoque tempore communiter receptam. Cæterum quæ raro eveniunt, licet sint admiratione digna, non tamen in exemplum ducenda sunt, ut regulam valeant generalem, & infallibilem constituisse. Ita quidem ab eodem Hippocrate dicitur, foeminas podagra non laborare, ut & eunuchos, & pueros: id quod licet plerumque verum sit, falsum nihilominus aliquando est animadversum.

APHORISMUS XXXIX.

Simulier, quæ neque gravida est, neque peperit, lac habet, huic menstrua defecerunt.

QUOD lac gignatur in mammis ex uteri gestatione, saltem in ultimis mensibus, quando infans partui proximus est, cunctis notum, veluti quotidianis experimentis comprobatum, ut propterea inter indicia gestationis, præcipuum hoc à Medicis afferatur, lac è mammis erumpere; & contra, nullum lac apparere, etiam si uterus, totusque venter tumeat, ut in falsa graviditate sæpissimè contingit, manifestum indicium sit, nullum foetum in utero contineri, atque morboſis aliis de causis illum inflari. Quòd insuper lac habeatur in his, quæ mox parere, immò quòd aliquandò ex lactis copia, ad plures, & plures menses, lactare illæ possint, certò certius est, ut nulla proinde egeat probatione: quamquam & aliquandò visum, foeminas tum utero gerentes, tum enixas, nullum omninò lac protulisse, idque sine ullo vitæ incommodo. Frequenter autem in cæteris omnibus lac post tertium, aut quartum diem à partu prodire, illudque ad plures hebdomadas perdurare communius accidit, cum manifesta mammarum tumefactione. Hinc in præſenti aphorismo considerans Hippocrates, quod frequentius utero gerentibus, & enixis accidit, inquit, plerumque fieri, ut menstrua defecerint, si neque gravida, neque enixa mulier lac habeat; ad eòque solere lac in mammis comparere ob solam menstruorum deficientiam, exinde verò potissimum confirmatum iri connexionem ma-

ximam mammarum cum utero, ut ex istius purgationibus suppressis, facile fiat, ut ubera lactificent. Quamvis & aliquandò visi sunt viri etiam lactificasse.

Verùm ut hæc accidant, necesse primum est, ut menstrua defecerint, neque solum per unicum, sed per plures, pluresque menses: si enim semel tantum menstrua deficiant, haud necessariò fiet, ut lac in mammis compareat, cum de facili possit sanguis, vel sensibilibus per alios ductus corporis amandari, vel etiam insensibilibus dissolvi, & repurgari; quo fit, ut in exercitatis mulieribus, etiam si menstrua deficiant, lac nullum habeatur, quoniam per exercitia, præsertim laboriosa, adhuc insensibilibus per poros cutis sanguinis impuritates discuti, & repurgari possint; quin & ab exercitiis semper major fit sanguinis, & partium solidarum resolutio.

Sed & secundò necesse est, ut nulla alia manifesta evacuatio per id tempus habeatur; unde si fortassè suppressis menstruationibus, hæmorrhagia è naribus accidat, vel sanguinis per os excreatio, aut per hæmorrhoidas, vel etiam sudoris, & urinæ copia, aliudve simile, proculdubio lactis apparitio nulla sequetur, excretis nimirum per alios ductus corporis superfluitatibus humorum.

Insuper necesse est tertio, ut menstruorum defectus accidat, benè se aliunde habente foemina; nam si fortassè ægrotaret, præsertim acuta febre, aliove morbo simili, valente corpus, & humores extenuare, ac absumere, certè nulla ratione lac è mammis prodire posset. Experimur etiam in dies obstructis, hystericis, scirrhis, aliove tumore affectis, in quibus menstrua

strua nulla sunt, lac nullatenus comparere.

Denique debent menstrua omnino deficere: si enim diminuerentur solum, vel per intervalla parcè prodirent, non esset, cur lac in mammis progigni deberet. Equidem lactis generatio non aliunde in his provenit, quàm ex impedito exitu sanguinis per vasa uteri; unde secundum sui partem albicantem potest, cum per vasa mammaria remeat, in earundem glandulis deponi, & lactis conditionem induere. Quo pacto poterimus Veteres cum Recentioribus conciliare super illa tandiù agitata disceptatione de materia lactis, quam illi sanguinem, isti chylum voluere: cum enim chylus non statim, sed repetitis circuitibus in sanguinem vertatur, ac sensim, sensimque repurgetur, & perficiatur, planè poterit, cum per vasa mammaria circuit, & per glandulas prædictas percolatur, secundum eandem portionem detineri, & in lac verti: nisi etiam dicere velimus, re-cta è canali thoracico partem illam chylosam vergere in mammas, ut plerisque anatomicis est creditum, de qua re præter alios legi merentur Thomas Bartholinus, & Isbrandus de Diemberbroeck.

Est tamen advertendum, id facilius contingere posse nuptis, aut viduis, quàm virginibus, etsi defectum menstruorum patiantur; etenim in nuptis, ac viduis, quæ tamen antea pepererint, ductus illi longè patentiores sunt, & ex præcedenti lactificatione jam consueverit Natura materiam lacti generando accommodam illuc transferre; at verò in virginibus viæ illæ sunt admodum angustiores, neque tam promptè excipiendo lacti dispositæ; quin etiam ante juventutem

majori planè alimento illæ egent pro suimet corporis nutricatu; unde si fortassè sanguis exuperet, facilius in carniū incrementum tendit, quàm in lactis generationem. Legendus in hanc rem Galenus 6. *de locis affectis* cap. 5. ubi aphorismum hunc recitat, & examinat.

APHORISMUS XL.

Quibuscumque mulieribus ad mammas sanguis colligitur, furorem significat.

DE veritate istius aphorismi valdè dubitat Galenus in *comm.* Inquit propterea: *Et quidem nondum hoc accidisse vidi, & si quando eveniat, ex iis est, quæ rarò eveniunt;* subdit tamen, id fuisse ab Hippocrate scriptum, quia observatum: Siquidem Hippocrates quod vidit, scripsit. Verum quomodocumque res se habeat, videamus quo pacto sententiam hanc rationibus congruentem adaptemus.

Et quidem in illis feminis id accidisse credendum, quæ menstruorum diuturnam passæ sunt suppressionem; unde postmodum sanguis in mammis feratur, atque in propriis earundem glandulis colligatur: cum enim, ut superius dictum, magna sit inter mammas, & uterum connexio, proculdubio cum diuturno tempore uterus supprimitur, ut sanguinem, quem egerere deberet, non fundat, is per totum ferè corpus fertur, sed diu restagnat, colligiturque potissimum in illis, propter copiam glandularum molem mamillarum constituentium: diutius autem ibidem detentus, fieri nequit, quin ex mora, malaque ejusdem habitudine non concreseat, acescat, & tumorem scirrhum excitet, de genere carcinomatum.

Quamo-

Quamobrem usus est Hippocrates voce *colligitur*, quæ significat ex longo tempore congestionem sensim, sensimque factam. Ex hac autem acidi, & concreti sanguinis congestionem duplici ex causa cerebrum afficitur; altera quidem ex circum-eunte sanguine illud inficiente per arterias, altera verò ex communione nervorum, qui plurimi per mammæ diffunduntur à pari vago costali: quo circa facillimè cerebrum in suis operationibus inficitur.

Sed & ex utero quoque malè affecto id ipsum magis, magisque adaugetur, quippè experimur ex affectibus hystericis, retentis, vitiatisque menstruis, furorem exoriri, uterinum dictum, quo miserrimè mulieres mente abalienantur, ac furunt, veluti maniacæ, manibus, pedibusque impetentes huc, illucque; ut nuperrimè in quadam nobili muliere sumus experti.

Dixit autem Hippocrates ejusmodi sanguinis in uberibus collectionem, furorem significare, non efficere, non enim per id, quod sanguis sit collectus in mammis, furor oriatur, quasi verò is sit causa effectiva furoris; sed solum significat, sanguinem, qui non potuit per uterum evacuari, adeoque in mammis collectus, & in tumorem versus, denotet succedentem in nervis, & cerebro læsionem, unde postmodum furor, ac delirium.

Sed num verus furor inde oriatur, an solum mentis motio, absque violento, atque impetente motu patientis, licet hic etiam dubitare. Et quamvis in græco codice scriptum sit *Mania*, quæ à quibusdam putatur coincidere cum furore, qui delirium dicitur cum impetu, & audacia; nihilominus crediderim, largam tantum significatione, delirium

hoc loco sumendum esse, & quidem potissimum mentale, quo patientes licet absurda non loquantur, aut agant, mente saltem, ac cogitationibus vana meditantur, quemadmodum nostris temporibus vidimus in alia foemina per Urbem vagante.

Sed præterea exponendus videtur aphorismus per verbum *significat*, quod potest accidere, licet non semper necessum sit, ut eveniat: nam signum istud est de genere eorum, quæ non sunt inseparabilia, & propria, sed solum ut plurimum ostendentia, scilicet cum sanguis vitiosus cerebrum infecerit; Nam si fortasse foemina ejus sit constitutionis, ut non tam facilè mente moveatur, aliud quid patietur, quàm delirium. Novi porrò nobilem quandam scirrhus in mammis ex diuturno tempore laborantem, qui tandem cancerosus factus mortem intulit, cum tamen nunquam mente illa mota esset.

APHORISMUS XLI.

Si velis noscere an conceperit mulier: cum dormitura est, ei aquam mulsam potandam da; & si alvi termina patietur, concepit, si minus, non concepit.

PRæsens aphorismus pertinet ad partem medicinæ diagnosticam, ad dignoscendam nempe graviditatem. Cum enim aliquando femina, vel ex tumefactione, ac lactificatione mammarum, de qua antea, vel ex suppressis menstruis, vel etiam ex aliqua alia ægritudine malè se habeant, & medicamentis egeant vel per unam, vel per aliam corporis viam ducentibus; immò, quod sæpius fieri solet, per uterum, & timor aliunde est, ne utero gerant, & in
abor-

abortus periculum incidant; docet in hoc aphorismo Hippocrates, quo pacto Medici dignoscere possint uteri gestationem, & foeminam, jam antea revera concepisse, adeoque medicamentis evacuationem promoventibus tractandam non esse, ne utero gerenti damnum, sibi verò infamiam pariant. Proponit autem leve quoddam medicamentum, & omni periculo vacuum, quo foeminae certae fiant, an non utero gerant, ac propterea possint, nec ne medicamentis subjacere. Illud verò est aqua mulsa, idest aqua melle adjecto medicata, quam vult exhibendam antequam somno se disponat: si enim exinde alvi tormina patiatur, jam concepisse indicio est; si secus, non concepit.

Vult primò aquam mulsam esse exhibendam, quæ scilicet ex mistura mellis flatus valeat excitare. Fit autem aqua mulsa, græcè *μελικράτον*, ex una parte mellis crudi cum decem, vel duodecima aquæ: & deinde ad convenientem dosim exhiberi debet post cœnam; nam cum Hippocrates nullam faciat mentionem de modo ejusce exhibitionis, certè debet intelligi juxta morem consuetum hominum; & quoniam dicitur in textu, cum dormitura est, proculdubio supponitur cœna ante acta. Si verò absque ulla cœna exhiberetur, profectò etiam absque graviditate tormina afferret, quia mel crudum cum aqua exhibitum flatus excitat.

Sed quo tempore graviditatis velit Hippocrates melicratum hoc exhibendum, dubitari potest. Et quidem verisimile admodum est inter initia graviditatis, atque adeò primo, vel secundo mense: his enim temporibus dubia videtur posse esse graviditas, cum tunc foetus nulla

de se prodat indicia; nam tertio, quarto, & sequentibus mensibus, tum motu, tum vomitu, tum uteri agglomeratione manifestatur; in principio verò graviditatis ista vel nulla sunt, vel ambigua. Itaque primis mensibus cum de graviditate ambigitur, tentanda hæc sunt; sed neque tam certi erimus ex his, quippe fieri potest, ut aliis ex causis tormina contingant in intestinis, cum tamen conceptio nulla facta sit; vel contra, etsi graviditas habeatur, nulla tamen tormina fiant ex peculiari quadam utero gerentis constitutione, vel etiam quia ejusmodi generis medicamento, aut rebus ex melle compositis uti consueverint, sine ullo ventris incommodo; nam quamvis plerumque his, quæ melle, & mellitis utuntur, tormina ista accidunt, fieri tamen potest, ut in aliquibus nulla fiant. Atqui ex altero capite periculosum in aliis esse potest, ob metum colici doloris, aut fluxus, aliussve mali gravioris, cum plerosque noverim pessimè se ab ejusmodi rebus mellitis habuisse. Quare prænoscenda primum est cujusque natura, & constitutio, ne in hac melicrati exhibitione Medicus decipiatur; proindeque sciat, num tormina alvi sequantur revera uteri gestationem, ut ex hoc aphorismo dijudicandum Hippocrates proponit.

Qua autem de causa tormina ista accidunt ex uteri gestatione? Putaverim, quia uterus, postquam genituram comprehenderit, undique clauditur, & in molem attollitur, quo fit, ut intestina præsertim Ileum, & Colon comprimantur, atque adeò nequeant flatus, ex aqua mulsa excitatos, per alvum discutere, qui retenti tormina excitant. Si autem nil intrà se uterus contineat, cavita-

vitates intestinorum liberiores bene poterunt excitatos flatus protrudere, & eventare, undè nullum incommodum exinde suborietur. Efficaciùs autem mulsa flatus excitabit, si anisum addatur, ut dicitur *lib. de sterilibus*; unde aphorismus hic est desumptus: ibi enim ita scribitur: *mel, & anisum tenuissimè tritum in aqua diluito, & exhibito, post dormire finito: & si tormen circa umbilicum fiat, pragnans est, si non, non.*

Verùm quamvis hæc ab Hippocrate, veluti à seipso observata, notentur, ut infallibilia, non tamen inconsideratè à Medicis in usum ducenda sunt, ob periculum, quod imminet acerbioris doloris in intestinis, indeque etiam in utero ob consensum, & viciniam, quam cum illis habet, & eo magis, si cœna aliquanto lautior fuerit, & mel non sit coctum, ac despumatum, facillimè noxa gravior ex doloribus, & torminibus orietur. Quo sanè factum, ut in praxi nemo audeat de his periculum facere, cùm aliundè nec certum, aut infallibile indicium ex eo sumi possit. Potiùs itaque contenti sunt Medici dictis, factisque obstetricum fidem præstare, quam ejusmodi medicamentis fidere: quamquam sæpe sæpiùs & istæ fallant, & fallantur.

APHORISMUS XLII.

Mulier gravisda si marem concepit, benè colorata est; si verò fœminam, malè colorata.

NEdum Hippocrates signa conceptionis tradidit, ut ex præcedenti aphorismo, sed etiam num marem, aut fœmellam mulier conceperit hoc alio aphorismo subjun-

git, quo ex bono, vel malo gravisda mulieris colore, facilè id posse judicari proponit, nam si benè colorata sit, marem, si verò sit malè colorata, fœminam concepisse decernit. Attamen ut exponit *in comm.* Galenus, *quod hic scribitur, ex eorum numero est, quæ sæpiùs eveniunt*, etenim aliquando fit, ut etiam quæ marem conceperit, sit malè colorata, & è converso.

Verùm ad intelligentiam hujus aphorismi plura notanda sunt. Primò quidem, quòd bonus, vel malus color mulieris utero gerentis referendus est ad eum, qui consuetus eidem est in statu naturali, & sano, citrà graviditatem; quamobrem si fœmina in suo statu sano non boni coloris fuerit, neutiquam fieri poterit benè colorata in statu graviditatis, & cum utero gerit. Præterquamquod quævis utero gerens ex causa gestationis fit perpetuò seipsa decoloratior, cùm uteri gestatio sit species quædam ægritudinis ex Galeno, ut aliàs monuimus, per quam semper fœminæ à suo meliori statu declinant, & nedum colore, verùm etiam carnibus, & operationibus cunctis quodammodò deficiunt, cùm utero gerunt.

Comparatio insuper facienda est inter colorem consuetum haberi à fœmina in gestatione maris, & eum, qui eidem accidit in gestatione fœminæ, ut propterea quamvis extractione graviditatis semper utero gerentes decolorentur, nihilominus in gestatione fœmellarum longè decoloratiores appareant.

Præterea in cæteris omnibus, quæ cum uteri gestatione contingunt, par ratio esse debet: nimirum, ut iisdem alimentis utero gerens alatur, eundem aerem, & regionem incolat, iisdem utatur

tur exercitiis, & reliqua omnia æqualiter se habeant, tam in gestatione maris, quam in gestatione fœmellæ: nam si fortasse, cum utero gerit fœminam, aerem, & regionem inhabitet calidiorem, vescatur cibis aromaticis, & floridiorem sanguinem gignentibus, seque plus solito exerceat, & alia peragat, ex quibus coloratio fieri possit; contra verò cum gestat marem, contrariis omninò rebus nonnaturalibus utatur, proculdubio indicium hinc allatum fallax erit: quippè in priori casu coloratio apparebit, etsi fœminam conceperit; in posteriori verò, penitus decolorata videbitur, licet marem gestet. Ita quoque dicendum in reliquis, quæ fœminis utero gerentibus, pro varietate graviditatis, accidere possunt: aliquando enim marem gestantes inappetentia tenentur, evomunt, bibulæ sunt, acida, & acerba appetunt, comedunt cruda, & excrementosa; unde nil mirum, si compareant decoloratæ; contra verò gerentes fœminam, si in his omnibus cautiores sint, & eduliis vescantur melioribus, sanè coloratiores observabuntur. Quare remotò quocumque dispari accidenti, ac seculis quacumque ægritudine, aliave causa externa, varietas ista colorum in gravidis, nonnisi ex ipsamet conceptione, & causis ad conceptionem concurrentibus petenda solùm erit.

Ratio autem istius varietatis desumitur ex varietate principiorum ad maris, ac fœminæ generationem concurrentium: Mares enim fieri perpetuò dicuntur ex fœcundiori, ac robustiori femine, fœmellæ verò ex debiliore, laxiorique: sanguis etiam, qui ad vitam illorum promovendam à matre influitur, in masculis vividior, floridiorque est; dilu-

tior verò, & inefficacior in fœminis, quæ eadem ex causa excrementosiores esse consueverunt. Uterus pariter in conceptione masculorum calidior, & vegetior esse solet; frigidior verò, & imbecilior in formatione fœminarum. Quamobrem ex his omnibus meritò coloratiores videntur utero gerentes in maribus, quam in fœminis præconceptis. Porro semper ac ista omnia simul in graviditate concurrunt, fieri nequit, quin etiam totum corpus utero gerentis floridius, vegetiusque appareat, juxta commune Medicorum effatum ex Galeno, & Hippocrate depromptum: *qualis color apparet in facie, talis humor abundat in corpore*: atqui color floridus, vividus, roseus in cute, nonnisi ex sanguine puriori, floridiorique in venis, & arteriis contento, procedit, ut patet; unde communiter fatentur Medici sanguineos ad purpureum, cholericos ad flavum, pituitosos ad album, & melancholicos ad nigrum, fuscumque colorem inclinare; sicut ex adverso cute nigricantes, melancholicam, albicantes, pituitam, flavescences, bilem, rubentes, sanguinem in venis prædominantem significare.

Quod hic Hippocrates generaliter dixit de gravidarum colore meliori, vel deteriori, ad dijudicandam maris, vel fœminæ gestationem, alii ad lentigenes, & maculas in facie apparentes revocant; inquit enim, fœminas utero gerentes masculos, faciem habere nedum coloratiores, sed etiam nitidas; gestantes verò fœmellas, lentiginibus, & maculis cutaneis esse refertas. Alii ex coloribus papillarum in mammis id ipsum prælagiunt, credentes, albicantes, vel flaventes papillas, fœminam, rubentes verò, vel etiam fuscas,

fufcas, mafculum fignificare. Ple-
rique his non fidentes, potiùs ex
tumoremamillarum, dextræ vel fi-
niſtræ, & motu agiliori, vel tardio-
ri utero gerentium, in incefſu pri-
mo inopinanter habito, ac motione
dextri cruris, vel ſiniſtri; itemque
ex urinistenuioribus, vel craſſiori-
bus, magis, minusve coloratis,
crudis, vel coctis, necnon ex pul-
ſibus maioribus in dextro, quàm in
ſiniſtro brachio, aliisque ſimilibus,
idipſum præſagire fatagunt.

Sed quàm vana iſta ſint, & futi-
lia, quiſque veſtrum benè noverit,
quippe, quæ ſolidiſſationibus non
fulciuntur, experimentis non reſ-
pondent, & falſò à vulgaribus Me-
dicis ſunt conficta. Atqui, ſi verum
fateri licet, neque quod hic ab Hip-
pocrate traditur, veritati perpetuò
conſonat, & quod ab Expoſitoribus
adiicitur, longè magis erroneum eſt.
Etenim nuperrimis obſervationibus
Anatomicorum detectum, aliter
prorſus generationem in viventibus
haberi, ac ab antiquioribus Medi-
cis eſt putatum: ubi enim ab his cre-
debatur, mafculeum, & fœmi-
neum ſemen ſimul unà commiſceri,
& cum ſanguine menſtruo in unam
maſſam intrà uteri cavum coaduna-
ri, & pro illorum varietate, atque
efficacia majori, vel minori, u-
nius, quàm alterius, mafculum, aut
fœminam exoriri, magis ſimilem
uni, quàm alteri; jam nunc ſatis, ſu-
perque innotuit, nullum ſemen re-
vera à fœminis ſuggeri, ſed ſolùm
materiam quandam albugineam, al-
bumini ovi, per quàm ſimilem, mol-
li, ſed duplici pellicula obvolutam,
quæ ex earumdem fœminarum ova-
rio per tubas Falloppianas, cum fœ-
cundata eſt, in uteri cavum dela-
bitur.

Sed adhuc etiam à nobis aliàs

eſt oſtenſum, præexiſtere in ovis
mulierum rudimenta fœtuum; qua-
re hæc referenda potiùs erunt ad
materiam in ovariis præjacentem,
atque ad rudem illam membrorum
diſpoſitionem, quæ multò antea ibi-
dem congenita eſt ex varia corpo-
rum habitudine, & partium gene-
rationi deſtinatarum conſtitutione,
ut propterea, quæ diſpoſitio ſexus,
& organorum, huic vel illi ſexui
addictorum præjacta eſt, ita in ma-
rem, vel fœminam procreatio de-
ſinet: Id enim in multiparis ani-
mantibus tam patens eſt, ut lon-
ga probatione non egeat. In fœ-
minis etiam humanis, quæ gemi-
nos, vel trigeminos pariunt, uni-
co Chorio contentos, non aliunde
fit, ut aliqui mares, aliæ fœmellæ
oriantur, quàm ex præexiſtente in
organis diverſi ſexus diſpoſitione.
Sed & Gallinæ unico Galli concubi-
tu plurima quoque edunt ova pari-
formiter fœcundata, ex quibus &
mares, & fœminæ progignuntur,
nonniſi ex vario præjacentium orga-
norum apparatu: quod & in cæteris
oviparis evenit.

Neque verò, quòd fœtus dica-
tur genitus ex ſemine, ac ſanguine
calidiori, ſequi exindè neceſſariò
debet, fœminam utero gerentem
coloratiorem apparere; quin po-
tiùs contra, non rarò viſum eſt, u-
tero gerentes mafculum, longè ad-
modum ſeipſis decoloratas, ac de-
fœdatas evaſiſſe; immò & nonnul-
las cœpiſſe ſtatim à primis menſibus
cibos ſaſtidire, vomere, dolere, &
alia plura, ac diverſa incommoda
pati, unde poſtmodum valetudina-
rii, imbecillesque mares orti ſunt:
quæ ſanè in geſtatione fœmellarum
ſecùs evenere. Id ergo ſolùm in ma-
ribus fieri poteſt, quòd ſanguis, per
vaſa umbilicalia nutritui eorum-
dem

dem accedens, floridior, vegetiorque sit, designetque utero gerentem bona valetudine frui, ad eoque roseus, ac venustus color vultus exurgat: Hinc autem robustiores solum, vel contra debiliores partus, prægnoſci poterunt. Verumtamen, ne fidem Hippocrati derogemus, dicere fas erit, id nonnunquam evenire, & quod ipse aliquando vidit, posteris tradidisse; cum revera partus foeminei excrementosiores esse soleant, ob reſectam in utero, atque in toto ferè corpore, crudorum, & lymphicorum humorum saburram, unde sanguis serosior, minusque rutilans in causa esse potest, ut in foemellarum gestatione, cutis universa, saltem in ultimis mensibus, defœdata palleſcat.

APHORISMUS XLIII.

Si mulieri gravida in utero fiat erysipelas, lethale.

CUM Hippocrates hic junxerit cum erysipelate uteri graviditatem, ut de eventu lethali iudicium ferri posset, anſam præbet dubitandi, an erysipelas in utero perpetuò lethale sit: etenim si perpetuò lethale eſſet, profectò non fuisset necessarium adiicere mulieris graviditatem, cum & citrà graviditatem quoque erysipelas utero contingens lethum afferre possit, tum ratione sui, quia morbus acutus est, tum etiam ratione partis affectæ, nempe uteri, qui ob consensum, quem retinet cum omnibus partibus principalibus corporis, quamcumque de causa afficiatur, periculosissimas ægitudines affert. Et quidem Cardanus non inutiliter adjectam putat graviditatem, quin

tria illa simul conjungenda existimat, erysipelas utero contingens, & quo tempore foetus geritur, nam subindè futurum inquit abortum, cujus causa mors postmodum succedet.

Crediderim tamen ego, etiam sine graviditate, si revera erysipelas internum fiat, & substantiam uteri occupet, lethale esse, nam affecto erysipelate utero, secundum propriam substantiam, nedum febris acutissima exoritur, verum etiam gravissimis symptomatibus sociata; qualia præsertim sunt in illius ægitudinibus, delirium, vel lethargus, difficultas respirandi, & vomitus, consentientibus nimirum cerebro, pulmone, & ventriculo. At verò quamvis morbus hic utero contingens lethalis sit, non tamen necessario, & inevitabiliter mortem affert, cum fieri possit, ut in salutem adhuc desinat, etiam si uterus pessimè afficiatur; etenim à malè affecto utero vivere quoque possunt animalia. Cum autem erysipelas infestat uterum in gravidis, non solum damna imminent gravissima ex ipsomet erysipelate, sed etiam ex abortu, qui proculdubio exinde accidet; utrumque autem difficillimè, immò haudquaquam superabit utero gerens, ut patet. Quod si erysipelas non internam partem, sed cutaneam, & externam uteri regionem occupet, facilius semper erit resolutionis, dummodò in suppurationem non desinat, aut in gangrænam.

Sed quod dictum de erysipelate, an non idem accidat quoque ex inflammatione, si fortassè hæc in utero fiat? Et quidem dubitat Galenus, *inquisitione enim dignum* hoc in comm. ait, sed in neutram partem inclinat. Dubium autem augeri potest

ex maxima differentia, quæ intercedere ponitur erysipelas inter, & phlegmonem, seu inflammationem: illud enim fieri dicitur à bile, seu ut probabilius est, à sero sanguinis acriori; inflammatio verò à sanguine blandiori, temperatiorique.

Verùm inflammationem (si utero forsitan contingat) adhuc periculosam fore, nemo equidem dubitabit, attentis nimirum nedum iis, quæ inflammationem ipsam comitantur, nempe ardore, dolore, tumore, febris, cæterisque symptomatibus, sed etiam, & potissimum supuratione, quæ exinde suboriri solet, unde postmodum ulcus. At verò, quia inflammatio in utero rarior esse solet, cum non tam facile sanguis in ejus substantia hæreat, sed promptè per internam cavitatem egeratur, vel sursum in alios ductus recurrat, propterea factum, cur Hippocrates erysipelatis solum hic meminerit, illam verò tacuerit. Cæterum scirrhi, alique tumores, in longum tempus protrahi solent, & non nisi cum ulcerantur, lethales fiunt.

APHORISMUS XLIV.

Quacumque præter naturam tenues existentes utero gerunt, abortiunt, prius quàm crasse sciant.

Non convenit inter Auctores, qui nam sit genuinus sensus hujus aphorismi, cum & Galenus ipse multiplicem ejus referat expositionem, sed anceps deinde in quem flectat, non explicat. Et quidem num tenues, seu graciles natura, an potius ægritudine, ut adjectum illud *præter naturam* indicare videtur, & num ex causis externis, puta inedia, exercitiis, vigilia, an ve-

rò ab internis, nempe à vitiato sanguine, graciles evaserint, non satis apertè edocet Hippocrates. At quamvis sub multiplici interpretatione, veritati adhuc consentaneus possit explicari; menti tamen Hippocratis consentiet magis, si dicamus illum hic loquutum de extenuatis, & gracilescentibus, non quidem ex morbo, sed ex causis externis, potissimum extrema diæta, aut ex aliquo accidente, quod mox à conceptu supervenerit: etenim cum agat de gravidis, quibus, nisi benè valeant, concipere non contingit, profectò sanas, non autem morbo affectas, ipse comprehensas voluit. Et licet Galenus *de dieb. decretoriis* asserat, adhuc uteri gestationem quandam esse speciem ægritudinis; id tamen procedente graviditatis tempore solummodò intelligendum, haud tamen ipso primo, cum concepturae sunt, momento. Extenuatas itaque hic sumere fatius est, quæ à causis externis, potissimum ex longa inedia, marcorem hunc contraxerunt, minimè verò ab internis causis ægrotare facientibus, quemadmodum recensentur humores acres, acidi, alique, quamvis & ab his quoque non rarò illas extenuari contingat, & abortiri. Cum ergo accidit feminas, cæteroqui benè valentes, utero concipere, mox verò inedia, aliave causa externa, à naturali, convenientiq; corporis habitudine deficere, & macerari, ut sensim extenuentur, & contabescant, planè fit, ut in longius tempus conceptum fætum ferre non possint, sed ante tertium gestationis mensem abortiantur, illumque deponant. Causa autem ejusmodi depositionis multiplex sanè esse potest, potior autè erit nimia uteri coarctatio, & contabescencia; siquidem etsi is primo gestationis mense nullam

nullam sui expansionem subeat, ut conceptui, atque embryoni locum faciat, vix tamen fieri potest, ut succedentibus mensibus, non unde quaque amplificetur, ac tumeat, quin etiam habitudine propria pinguefiat, & crassescat, esto reliquum totius corporis non pari molè adaugeatur, quemadmodum experimur in his, quæ nausea, aut ciborum fastidio, vel etiam iteratis vomitionibus, ad plures hebdomadas, postquam conceperint, gracilescent, utero interea sensim intumescente, atque citrà noxam foetum conservante. At verò cum extenuatio talis est, ut etiam illum in marcorem deducat, planè fit, ut convenienti expansioni minimè cedat, & foeturam ipsam comprimatur, ac suffocet. Compertum autem est Anatome, uterum in gravidis sensim, sensimque nedum amplificari, sed evidenti magnitudine crassescere in suis membranis, glandulis, ductibus, cæterisque. Insuper post unum, aut alterum mensem à conceptu, ubi vasa umbilicalia nexum per placentam cum utero subierint, necesse omninò est, ut per arterias ubertim sanguis maternus, isque purus, & alibilis, in illius incrementum deferatur, qui si deficiat in matre jam extenuata, planè nequibit accedens foetui vitæ favere, unde propterea exarescet, & decidet. Hinc non tam paucus sanguis, quàm malus, & ineptus causa marcoris existimandus, quippe tunc potissimum animalia macrescunt, & extenuantur, cum sanguis in illis dulci glutine privatus partibus nutrandis minimè appingitur, quin potius veluti dissolutus, & acris redditus respuitur ab iisdem, ut aliàs à nobis est animadversum; quamobrem tenello foetui omninò incongruus cum sit, abortum parit.

Tozzi Op. Med: Tomo IV.

Sed quomodo fit, quæret aliquis, ut sanguis gignendo foetui sit aptus, nutriendo verò ineptus, ac nocuus omninò? Verùm fallitur, quicumque suspicatur sanguinem generando foetui inservire, cum is ex præjacente ovo, à maris semine fecundato, progignatur, & ut observarunt cum Harveo reliqui omnes Anatomici, nonnisi post vasorum umbilicalium productionem, per placentam in foetum diffunditur, quod nonnisi secundo mense accidit, ut proinde falsum sit, quod Antiquioribus creditum, sanguinem concurrere ad generationem embryonis, cum ad incrementum illius tantummodo, atque ad motum cordis, & vitam conservandam, conducere, sit jam satis, superque perspectum.

Abortiunt igitur non immeritò, quæ in ipso primo conceptu extenuatæ inveniuntur, cum conservando, atque alendo foetui pro dignitate sufficere non possint: Sed cur secundo mense, quod incautè fuit à Leoniceno prætermisum? Ratio in promptu redditur, quia per vasa umbilicalia, ut dictum, tunc in eum à matre sanguis influitur, qui cum quantitate modicus, & qualitate nocuus esse soleat, tantum abest, ut foveat, ac proficiat, quin potius officiat, & vasa prædicta, si fortasse per placentam utero sint alligata, dirumpat, ac dissociet; unde postmodum abortus. Neque tamen omninò necesse est, ut secundo solum mense abortus insequatur, cum & ante, & post hoc tempus is accidere possit, prout major, vel minor, gravior, vel levior fuerit mala utero gerentis habitudo: plerumque autem evenit, ut circa hoc tempus istiusmodi foetus abortiatur, cum primò à matribus sanguinem per vasa umbili-

calia suscipiunt, ni tamen recta virtus ratione usæ, & meliori salubritate potitæ, illæ præcaveantur. Verumtamen Hippocrates non temerè adnotavit *priusquam crassescant*; siquidem arduum planè videtur posse tam citò extenuatas gravidas puriori, abundantiorique sanguine refici, & carnibus impleri.

Quamvis autem antea dictum sit, graciles potissimum à causis externis redditas, hoc aphorismo comprehensas videri, si tamen à morbo, & causis internis extenuatas fœcundari, & concipere contigerit, eidem incommodo obnoxias fieri procul dubio credendum, cum utræque causam abortus ab una emaciatione fortiantur; neque enim illæ abortiunt aliunde, quàm quòd plurimum macruerunt; quare si causa in utrisque communis est, idem periculum timendum, quamvis verisimiliùs videatur, quæ nondum ægrotaverint, quàm quæ nuper à morbo convaluerint, concepere posse.

APHORISMUS XLV.

Quæcumque mediocriter corpora habentes abortiunt secundo, aut tertio mense, sine occasione manifesta, iis acetabula uteri plena mucoris sunt, & non possunt propter pondus fœtum continere, sed dirumpuntur.

QUod de gravidis emaciatis, & gracilescentibus, citrà morbum, superior aphorismus scriptus sit, sequentes hi duo clarissimè demonstrant; in hoc enim de prægnantibus mediocriter carnosus; & in alio de obesibus verba facit; siquidem triplex in universum est corporis habitus, gracilis, obesus, & carnosus. Et quamvis in hoc textu

dicat, *mediocriter carnosas*, has tamen ita vocat, uti differentes ab obesibus, quæ nimirum crassæ appellantur, ut in *sequenti aphorismo*. Itaque si carnosas mulieres contingat concipere, & postmodum, sine manifesta occasione, secundo, aut tertio mense abortire, illas ait id speciatim pati; quia acetabula uteri plena mucoris sunt, & non possunt ex pondere, fœtum grandiolem redditum, diutiùs continere, sed dirumpi omninò necesse sit. Verumtamen debent carnosæ istæ mulieres esse aliunde aptæ, tum ad concipiendum, tum ad pariendum, quæ propterea aliàs conceperint, & salubriter pepererint; unde ea est differentia inter admodum graciles, & obesas, ut illæ non pariant, quia fœtum ad maturitatem non perducunt, istæ verò non concipiant; & quidem vitio totius, & partium generationi dicatarum: mediocriter autem carnosæ abortiunt solum ex accidenti, cum cæteroqui benè conceperint, & conceptum fœtum, cum membrorum exacta dispositione compleverint.

Has igitur ait, si contingat secundo, aut tertio mense abortire, & quidem citrà quamcumque causam manifestam, aut ægritudinis, aut violentæ alicujus commotionis, id sanè ad acetabula uteri mucore plena referendum est. At quid pro uteri acetabulis intelligere voluerit Hippocrates, non benè constat apud Interpretes, cum in græco textu scribantur *Cotyledones*. Galenus in *comm.* auctoritate Praxagoræ pro his explicat, *ora venarum, & arteriarum, quæ feruntur ad uterum*: Cardanus placentulam carneam, per quam vasa umbilicalia fœtus utero adnectuntur: Alii vasa ipsa umbilicalia: & alii universum uteri

uteri cavum innumeris glandulis interspersum. At appositè magis ex Anatome, Cotyledones, seu Ace-
tabula uteri intelligenda sunt oscula illa ex glandulis ejusdem hiantia, aut quo tempore menstrua repurgari debent, aut tempore conceptionis, cum placenta utero adnascitur, ut umbilicalibus vasis adnectatur pro sanguinis circuitu in fœtu. Cum enim Hippocrates, nedum in gravidis mulieribus, sed extra graviditatis tempora de uteri cotyledonibus meminerit, planè constat, neque placentam, neque vasa umbilicalia, aliave, tempore conceptionis prodeuntia, intelligere pro ipsis voluisse, quemadmodum deducere est ex primo *de morbis mulierum*, unde desumptus quoque videtur hic aphorismus: ibi enim dicitur, *si acetabula pituita plena fuerint, menses fiunt pauciores; & si utero generat foemina, fœtus non corroboratur, sed corrumpitur, ac defluit, &c.* Quin & *lib. de locis in homine*, & *lib. de articul.* in ossum commissuris Cotyledones quoque considerat. Verumtamen etiam placenta, vasa umbilicalia, uterus ipse, & quæcumque ad conceptum, & nutritionem fœtus faciunt, si quoquomodo infarciuntur, & tumeant, abortus pari de causa subsequi poterit. Hinc nedum mucus, idest crassus, lentus, & viscosus humor partes has si oppleat, & infarciat, in causa erit, ut abortus insequatur, sed etiam sanguis, si crassior plus justo sit, & glutinosior, aliudve vitium contraxerit, quo potius hærescat, quàm diffuat; licet in moderatè carnosus, veluti Eufarchis, non tam facile ista contingant.

At unde est, ut à cotyledonibus mucore oppletis, abortus accidat, inquisitione ulteriori dignum vide-

tur, cum pauci sint, qui ejus causam afferant: & Galenus *in hoc comm.* ne verbum quidem facit ejusmodi abortionis, & nonnulli ad relaxationem ligamentorum, aut vasorum umbilicalium: quidam ad gravamen, quod uterus, ac fœtus ipse à lentis, crassisque succis patitur; alii verò ad defectum alimenti, cum sanguis propter ejusmodi succorum lentorem, non benè possit permeare, & in fœtus nutritionem subire, causam referunt. Verum crediderim ipse non unam semper, eandemque in his esse abortus causam; nam moderatè carnosæ foemine cum conceperint, non eodem perpetuò, statutoque tempore abortiuntur, sed quandoque secundo, aliquando tertio, aut etiam quarto mense, ut adnotat Galenus 6. *de loc. affect. cap. 5. & lib. de uteri dissectione*; unde fit, ut ab ejusmodi crassis, glutinosisque humoribus, diversimodè uterum, & fœtum incommodantibus, abortiendi occasio oriatur. Primo etenim, & secundo mense, impedimento sunt Placentæ (membrana siquidem Amnios, & Chorion, circumvestientes fœtum, sunt in ovo, unde fœtus prodit) ne utero veluti fungus adnascatur, & adnata firmiter hæreat cum suis vasis umbilicalibus. Tertio mense, ne sanguis convenienter depuratus deferatur per arterias umbilicales in fœtus corpusculum, aut etiam detineatur, & restagnet in Placenta ipsa ad ejusdem perniciem, impedita quoque plurimum sanguinis per venam umbilicalem remeantis circulatione: Quarto tandem mense præter hæc, etiam alimenti defectus accedet, ob superincumbentis placentæ ab inutilibus humoribus obstructæ, ac tumefactæ gravamen, nec non uteri ad sui expansionem, cæteroqui pro-

grandiori foetu summoperè necessariam, non exiguam resistantiam, immò evidentem repugnantiam, ut scitè etiam advertit idem Hippocrates *lib. de sterilibus, & lib. de natura muliebri*.

Neque verò quis hinc existimet, perpetuò in his futurum abortum uno, vel altero ex memoratis mensibus, ab ejusmodi crassis, viscosisque succis; nam Hippocrates non nisi ex conditione loquitur, si medio-criter carnosæ abortierint, & nulla alia causa pateat, ob quam abortus acciderit, sive externa, sive interna, asserit esse acetabulorum à mucosis humoribus oppletionem, ut propterea hoc aphorismo occultam causam talis abortus aperiat, cui prudens medicus cautè opituletur, & opportunè succurrat, vel saltem in posterum succedentibus conceptibus illam præcaveat, ne simili infortunio immaturè delabantur; hinc aphorismus, quòd ad causam est dignotivus, & quòd ad abortum est prognosticus. Mucosi autem isti humores plerumque in gravidis gignuntur à mala victus ratione, qua ipsæ utuntur, cum & cibariis non raro vescantur acerbis, & crudis, & portionibus largioribus, ac gelidis indulgeant. Quomodò tandem acetabulorum uteri laxitas, ac mucositas dignosci, & curari possit, docuit idem Hippocrates *cit. lib. I. de morbis mulierum, & lib. de natura muliebri*.

Ab acetabulis mucore oppletis aliam deducit in hoc aphorismo Hippocrates abortus causam, quia inquit, *illa non possunt ex pondere foetum continere, sed dirumpuntur*. Siquidem cum acetabula viscosis, lentisque humoribus opplentur, nedum mollescunt plus justo, & delaxantur, sed tumescunt, & gravitant, unde faciliè simul cum placenta dis-

fociantur ab utero, adeoque foetum eidem adnexum sustinere nequeunt, quin immò nimio pondere superincumbentia illum jam primis mensibus tenellum, suisque secundinis inclusum comprimunt, & suffocant, adultum verò in cæteris præ molli-tie, & nimia laxitate, firmiter utero alligatum continere non possunt, ut exemplo fructuum suis pediculis arboribus adhærescentium perbellè quidem edocuit Galenus *4. aphor. comm. primo*.

APHORISMUS XLVI.

Quaecumque præter naturam crassa non concipiunt utero, iis omentum os uteri comprimit: & prius quàm extenuentur, non concipiunt.

DE obesitas nunc differit, atque in illis causam exquirat quomobrem concipere non soleant, nam haudquaquam simpliciter inquit illas non concipere, cum & aliquando concipiant, ac salubriter pariant. Sed solum edocet, unde sterilitatem in illis conicere possimus, si cæteroqui benè valentes, citrà quamcumque causam manifestam, steriles observentur. Hinc non abs re addit, *non concipiunt utero*, ut nimirum ab utero solum hic causam deducat. Et quamvis sterilitatis causæ plures aliæ esse possint, de quibus idem Hippocrates *lib. de sterilibus*, hic tamen illam duntaxat memorat, quæ ex habitu corporis dependet, pari ratione, ac de cæteris habitibus antea meminerat.

Quoniam verò corporis habitus crassus, seu obesus, duplex esse potest, ut docet idem Hippocrates *c. lib. de sterilibus, & de superfetatione*, atque advertit etiam Galenus *in comm.* alter ex propria natu-

ra, alter ex vitæ ratione, distinguere sanè oportebit, de quo speciatim fit hoc loco intelligendus. Et quidem propria natura crassæ, seu obesæ, non semel concepisse, ac vitaliter peperisse visæ sunt, satagentem nimirum natura, ut partes corporis universæ convenienti mole ita construantur, & incrementum, ut altera alteram in suis operationibus non impediat. At verò, quæ supra modum, & citra naturalem constitutionem pinguiore evaserunt, puta à ciborum ingluvie, potibus immoderatis, somno, otio, cæterisque, difficulter concipere consueverunt. Quam eandem sententiam clariùs idem Hippocrates expressit *cit. libr. de superfetatione*, his verbis: *Mulier, quæ præter naturam crassa est, ac pinguis, & pituita repleta, non concipit hoc tempore; quæ verò ex natura talis est, horum gratia concipit, si non aliud quidpiam ipsam impediat.*

Quamvis autem totius corporis obesitas conceptioni promovendæ impedimento esse possit ob nimiam vasorum exilitatem, & sanguinis crassitiem; speciatim autem illi officit partium in abdomine contentarum, & præcipuè omenti immoderata pinguedo: id enim sua natura in cunctis animantibus multa pinguedine refertum, longè admodum corpulentius, & pinguius in obesæ fœminis evadit; unde fit, ut ingenti mole nedum tumeat, & elongetur, sed plurimum quoque subjecta viscera aggravet, & comprimatur; cumque inter hæc uterus sit, planè præ cæteris, si potissimum emineat, ejusmodi patitur incommodum, adeoque feminis receptioni, retentioni, & conceptioni ineptus evadit, neque solum, ut hic Hippocrates recenset,

ab illius internæ valvæ compressione, quasi verò hac de causa fecundantis feminis vim, atque efficaciam is excipere non possit, cum & undique comprimatur, & coarctetur; sed etiam ex eo, quod ovarium in ipsis multa pinguedine oblitum, neque grandescere, neque per tubas in uteri cavum elaboratiora ova deponere possit, quemadmodum experimur in gallinis, quæ pinguiore plus justo redditæ, ova nec gignunt, nec pariunt. Constat insuper in obesæ sanguinem majori ex parte in pinguedinem verti, nec tam vividum esse, ut in gracilibus.

Subdit tandem Hippocrates id illis accidere, priusquam extenuatæ fuerint, & quidem sive medicamentorum usu, sive alimentorum inopia: Quod latè edocuit *lib. de natura muliebri*, inquit: *si præter naturam crassa facta fuerit mulier, non concipit in ventre, nam omentum multum, & crassum incumbens uteros deprimit, & genituram non suscipit. Hanc igitur attenuare oportet, & medicamentum per inferna purgans bibendum dare: uteris verò apponere, quod illos purget, & flatum inducat.* Hinc edocemur fœminas ejusmodi obeso corporis habitu præditas, ut ad conceptionem, & generationem disponantur, oportere prius extenuari, atque in meliorem, moderatioremque statum reduci, non solum victu frugaliore, & vim extenuandi habente ipsis indicto, itemque exercitiis, consuetis evacuationibus, & aeris tenuioris incolatu, sed etiam medicamentis crassos, glutinososque succos incidentibus, atque per alvum, & urinam potissimum evacuantibus, iisque pariter, quæ uterum repur-

gent,

gent, & capaciorem reddant: quamvis ista aliquandò etiam opportunè præstita, neque satis esse soleant. Porro haud inutile erit advertere, quod in hanc rem Lucretius admonet 4. de Natur. Rer. propè finem, dum inquit:

*Nam steriles nimium crasso sunt
semine partim:*

*Et liquido præter iustum, tenui-
que vicissim*

*Tenue, locis quia non potis est
adfigere adhæsum*

*Liquitur extemplo, & revocatum
cedit abortu;*

*Crassius hoc porro, quoniam con-
cretius a quo*

*Mittitur: aut non tam prolixo
provocat ictu:*

*Aut penetrare locos æque nequit:
aut penetratum*

*Ægre admiscetur muliebri semine
semen.*

*Nam multum harmoniæ Veneris
differre videntur,*

*Atque alias aliocomplent magis:
ex aliisque*

*Suscipiunt aliæ pondus magis, in-
que gravescunt:*

*Et multe steriles Hymeneis ante
fuerunt*

*Pluribus: & naçte post sunt ta-
men, unde puellos*

*Suscipere, & partu possent di-
tescere dulci:*

*Et quibus ante domi secunde sæ-
pe nequissent*

*Uxores parere, inventa est illis
quoque compar*

*Natura, ut possent natis muni-
re senectam:*

*Usque adeò magni refert, ut se-
mina possint*

*Seminibus commisceri genitaliter
apta,*

*Crassaque convenient liquidis,
& liquida crassis,*

*Quæ cui juncta viro sit femina
per Veneris res.*

*Atque adeò refert, quo victu vi-
ta colatur:*

*Namque aliis rebus concrescunt
semina membris;*

*Atque aliis extenuantur, ta-
bentque vicissim, &c.*

Verum Hippocrates lib. de super-
fetatione, ut obesæ mulieres ferti-
les reddantur, hæc etiam à viris exi-
git, ut non sint ebrii, neque vinum
album bibant, sed quod fortissi-
mum est, ac meracissimum, item-
que edulia fortissima, & calida
non lavent: robusti autem sint, &
fani, & à cibis abstineant ad rem
non conferentibus, & ubi marem
generare voluerint, mensibus desi-
nentibus, aut defectis, misceantur,
& quàm penitissimè intrudant, do-
nec desæviant. In idem facit, quod
idem Auctor edocet. lib. de aere, a-
quis, & locis, ubi crassas mulie-
res (quales Scythas esse ait) non
concupere subdit, quia os uteri
propria pinguedine ita coarctatur,
ut nequeat suscipere, aut admitte-
re semen. Quæ denique sint in uni-
versum ad concipiendum aptiores,
vel ineptiores, idem Auctor edo-
cuit 2. libr. prædictionum in-
quiens: Parvæ ad conceptionem
præstantiores sunt majoribus, te-
nues crassis, albæ rubicundis, ni-
gre lividis. Quæ item venas con-
spicuas habent, meliores sunt, quàm
quibus non apparent. Carnem au-
tem uberiores habere, anicula
malum est: Mammæ autem tumi-
das, ac magnas, bonum. Confe-
renda his quoque erunt, quæ idem
Auctor latè congerit pluribus aliis
in locis, præsertim verò primo de
morbis mulierum, de natura mu-
liebri, & lib. de sterilibus, unde
plurima, quæ conceptionem retar-
dare,

dare, vel promovere possunt, quis utiliter deducet.

APHORISMUS XLVII.

Si uterus in coxam vergens suppuratur, necesse est, linamentum fieri.

Non unius, sed multiplicis diffensionis causam præbuit Expositoribus hic aphorismus. Sunt, qui volunt, non fuisse hoc loco reponendum: Alii nullatenus uterum in coxam vergere posse contendunt: Quidam, rem nimis vulgarem, & lippis, ac tonforibus notam continere autumant, veluti ad curationem suppurationis ejusdem pertinentem. Reliqui demum omnes sensum illius in varias, diversasq; sententias ita distrahunt, ut nedum mentem Hippocratis nullatenus assequantur, sed nec quid voluerit per ipsum edocere percipiant, quin potius alter in alterum conviciis, & exprobrationibus invehatur, præsertim, ut exponant dictionem illam *linamentum*, quod græcè *ἐμμοτον* scriptum est. Verum nulla erit in aphorismo difficultas si anatomen, & experientiam attendamus.

Et quidem licet ipse in illorum sententiam non iverim, qui putant uterum loco moveri posse, cum satis notum sit, eum quatuor ligamentis, iisque validissimis utrinque alligari, quia tamen ex his anteriora ligamenta in inguina, adeoque in utramque coxam protenduntur, facile fit, ut alterutrius oppletionem, tumefactionem, relaxationem, aliave simili ægritudine, procumbat in alterutram partem, & tumorem, inflammationemque ibidem pariat, transpositis una simul ex-

inde diversi generis recrementis, præsertim ex impuro sanguine, fortasse nec convenienter per menses repurgato, procedentibus. Quamobrem fieri subinde potest, ut postmodum ibidem restagnans sanguis in fermentationem indebitam deducatur, computrescat, & suppuretur, & simul etiam uteri substantiam putrefaciat. Rectè igitur inquit Hippocrates, *si uterus in alterutram coxam vergat* à delapsu scilicet vitiosorum humorum, necesse est *Emmoton* fieri, à suppuratione ibidem contracta.

Sed quid pro *Emmoton* intelligere voluerit, in hoc graviora litigia: siquidem Interpretes inter se nullimodè conveniunt. At ipse nullo negotio Hippocratem cum Hippocrate interpretabor; Is enim *libr. de Articulis*, qui ulcus cavum, & exesum ex suppuratione contraxerunt, quod scilicet curationem per linamenta expostularet, Emmotos appellat; ut propterea hinc deducere fas sit, Emmoton fieri uterum, cum in coxam vergens suppurationem subierit, quoniam inde necesse est, ulcus cavum, & sinuosum exoriri, quod non nisi penicillis, seu pessariis exconcerptis, & contortis linteis, tractari, & curari potest. Itaque voluit potius Hippocrates hoc aphorismo Medicos docere, cujusmodi sit ex uteri suppuratione futurum ulcus, non autem curationis methodum, aut medicamentigenus, quod pro curatione ipsa sit adhibendum: nam præterquamquod ista non videntur hic opportunè, aut convenienter memorata, sunt planè omninò indigna, ut inter aphorismos recensentur, ut proinde aphorismus dici debeat prognosticus potius, quàm curativus. Cæterum istiusmodi

v. Gal.
Comm.
3. 55. e-
jusdè lib.

modi ulceris curationem proponit idem Hippocrates *lib. de superfetatione*.

APHORISMUS XLVIII.

Fœtus, mares quidem in dextris, fœmina verò in sinistris magis.

Sententiam hanc veluti a Vetusioribus communiter receptam placuit Hippocrati inter aphoristicas referre, utque illam non perpetuò veram designaret, non irrationabiliter addidit adverbium *magis*, cum non semper mares in dextra, & fœminæ in sinistra uteri parte gignantur, licet id ratum omninò fuerit Anaxagoræ, & Empedocli, quos tamen redarguit Aristoteles 4. *de gener. animalium* cap. 1. & 7. *de hist. eorumdem* cap. 3. At verò huic sententiæ conatus est Hippocrates ad iicere rationem 2. *epidem. sect. 6.* & 6. *epidem. sect. 4.* illamque referre in vigorem, caloremque partis dextræ, sinistræ præpotentiorē; unde etiam semen in dextro teste contentum vividius, & efficacius quoque existimavit: quamobrem *lib. de superfetatione* consulit ad gignendos mares conferre plurimū, si sinister testis obligetur, ut totum semen in concubitu è dextro, non è sinistro, in uterum effluat; quin & cuncta viscera in dextra corporis parte posita, cæteris robustiora existimavit *cit. 2. epidem.* inquiens: *secundum naturam plurimam vim habet mamma dextra, oculus dexter, & quæ intra sunt hac parte.* At ista non tanti sunt, ut contrarium sæpe numero minimè successurum evincant, cum sæpissimè sit expertum, & fœminas, & mares indifferenter genitos, & gestatos fuisse in alterutra uteri parte; quo factum, ut ple-

rique Medicorum in præfagiendis ejusmodi partibus, non sine eorundem derisu, falsi fuerint, hoc aphorismo confisi. Neque prætereà verum est, fœminas in generatione semen effundere, quod cum semine maris commistum, pro varia utriusque vi, atque efficacia, modò masculum, modò fœmellam efformet. Nam ex Anatome satis superque jam constitit, illas non nisi ovum suis pelliculis obvolutum, in quo rudimenta fœtus præjecta manent, in uterici cavum deponere; mares verò suo solum semine illud fœcundare, atque in motum, expansionemque membrorum adigere, ut aliàs est quoque à nobis explicatum. Si itaque contingat ex ovario abruptum, semotumque ovum in uterum deponi per dextram, sinistramque ejusdem tubam, quod jam masculini sexus dispositionem fuerit præfortitum, atque à robusto semine maris fœcundatum, masculus orietur; contra verò fœmella; nihilum ad id conferente loci conditione dextra, vel sinistra, cum utraque, & pari calore, & non dissimili venarum, ac arteriarum propagatione, foveatur. Fortè autem accidit, ut ova vividiora, meatus latiores, & dextra uteri pars robustior evaserint, quia universa pars dextra corporis, brachium, latus, crus, pes, horumque muscoli, veluti magis exercitata, grandiora, agilia, & in omnibus operibus efficaciora præ cæteris fuerunt. Hinc levis omninò est conjectura illa, quam plerique deducunt à pondere, motu, calore alterutrius lateris, ut fœtum masculinum, aut fœmininum in utero gestari præfagiant, sicut & aliæ plures ad hoc idem à pluribus aliis adhibitæ, utpotè quæ falso innixæ fundamento sæpissimè fallant. Porro

non

V. etiam
Hipp. de
Nat. puer
& Gal.
14. de
usu part.
c. 7.

non irrationabiliter credere est, plurima istorum, quæ in aphorismis continentur, licet in operibus Hippocratis scripta inveniantur, non fuisse tamen ab eodem inter aphoristicas sententias redacta, sed ab aliis successoribus recollecta, huc illucque sparsim fuisse interposita.

APHORISMUS XLIX.

Ut secunde procidant, sternutatorio appposito, nares comprime, & os.

Sicut antea dixerat *Aphor. 35.* Mulieri difficulter parienti sternutatio superveniens bonum; ita nunc ad deturbandas secundinas illam arte excitandam admonet, & quidem auxilio cunctis obvio, ne scilicet illæ diutius intra uterum ab edito foetu detentæ, repurgandis inde recrementis impedimento sint, ac mox putrefactæ, nedum gravia inferant symptomata, sed & mortem inevitabiliter, nisi penitus depellantur: comparatum namque Natura est, ut ad maturitatem perductus fetus jam jam se partui accommodet, ac deorsum in uteri valvam procumbens, disruptis jam spoliis, proprio nisu, & ipsius parturientis valido conatu efferatur in caput, mox verò secundinæ procidant cum sanguineis superfluitatibus; quamquam, & non rarò accidat, simul unà foetum suis obvolutum involucris in lucem prodire. Sunt autem ista in hominibus *Amnios*, & *Chorion*, cui adnexa est Placenta uterina; Vasa verò umbilicalia sunt duæ arteriæ, una vena, sed major, & *Urachos*. Quoniam verò in umbilici, seu umbilicalium vasosum resectione, non levis error quandoque ab obstetricibus committitur, puta si intempestivè, si inæqualiter, si

non debito modo, aut loco refecentur; proinde fit, ut illa retracta, atque contorta in uteri cavum revolvantur, aut etiam fortassè dirupta, secundum partes utero alligata remaneant, unde postmodum incommoda plurima, immò manifestum vitæ periculum. At verò neque salubriter egeruntur, si primo loco, & ante partum prodeant, exarefacto nimium utero ab intempestiva illarum ejectione.

Cùm ergo contingit illa à partu detineri, omnis industria adhibenda est, ut quo citius fieri possit, expellantur; in quam rem plura solent à Medicis commendari, nedum ad exturbandas secundinas, sed etiam ad expellendum foetum mortuum; verum hoc loco ab Hippocrate proponitur facilè, ac promptum auxilium ab incusso sternutamento desumptum, etenim per sternutationem totum corpus vehementer concutitur ad expulsionem ejus, quod nares, & processus mamillares molestat, atque proritat, ex cuius vehementi concussione uterus non leviter commotus, facillimè deponit, quod interius reconditum, eique alligatum est.

Sed quid est, quod Hippocrates in hoc aphorismo vult observandum, ut imposito sternutatorio nares deinde apprehendantur, & os claudatur? Neutiquam planè, ut à plerisque putatur, quia detentus spiritus per œsophagum inferius protruditur, & uterum comprimens, ad sui exonerationem, foetusque depositionem, eundem compellat. Id namque nullatenus crediderim, cùm neque aer per eas partes ferri, neque eò delatus vim, aut impulsus utero tribuere possit. Existimaverim proinde potiùs impetum ea industria afferri majorem pectori,

tori, ac diaphragmati, quod propterea expansione majori comprimat, impellatque subjecta viscera, præ primis autem uterum mole sua, & à retentis secundinis tum turgidum; Quin & obturatis naribus, & ore, vis medicamenti sternutationem moventis penitus se inferit, atque nedum nervos per nares diffusos, sed etiam, qui è vaga conjugatione promanant, vehementius laceffit, atque motum quendam, ferè spasmodicum, per subjecta viscera, & uterum ipsum excitat, quo tandem detentæ secundinæ extrudantur. Neque enim sternutatio levis motus concussivus est, aut naturalis, sed violentus, ac præternaturalis, saltem à causa irritante, & vellicante meninges, ut quod noxium est, & cerebro infensum, expellatur; quamobrem Galeno 2. de symptom. causis cap. 3. dicitur quidem sternutamentum promotum à natura, sed non sine vi, atque irritamento causæ morbosæ, excitatum, ut propterea aliquando acciderit, ex quadam pestilentia, egrotantes iteratis sternutationibus infelicitè periisse, quippe quæ designabant causam illarum adeò malignam, & deleteriam, ut non solum naturæ expellenti minimè cederet, sed cerebrum ipsum prava contagione depravaret, ac tandem in exitium deduceret.

Quibus denique medicamentis id peragi debeat, quamvis hoc loco Hippocrates non explicet, alibi tamen illa describit, ex pulveribus nasturtii, hellebori albi, piperis, sinapis, pyrethri, nigellæ, & similibus acrimia medicamentorum, tenellas narium membranulas, ac meninges ipsas cerebri proritare valentium; quod nunc, nostra ætate, usu tabaci passim fieri solet, adjecto

præsertim, si libuerit, modico pulveris cyclaminis leni calore siccati, atque ad clibanum leniter etiam torrefacti. Sunt etiam succi herbarum, qui id ipsum potenter efficiunt. Sed & Hippocrates ipse potiones quasdam exhibet ex succo artemisiæ expresso cum vino albo: quod efficacissimum remedium est ad expellendas secundinas, foetumque mortuum; Dictamnium quoque creticum, & album, sæcula bryoniæ, borax mineralis, extractum granorum chamæactes, & alia hujus generis plurima, in idem conferunt, ut apud Medicinæ practicæ Professores passim est legere.

APHORISMUS L.

Mulier, si velis menstrua cohibere, cucurbitulam quam maximam ad mammas appone.

Maximum, quod faultrix Natura mulieribus ad salutem largita est, auxilium, Catameniorum est lunari revolutione repurgatio, quæ, non aliter, ac in reliquis consuetis evacuationibus, debitam quantitatem, convenientemque modum servare debet, ut juvet, ac nullatenus officiat; siquidem omne nimium Naturæ inimicum est: iisque plus justo fluentibus morbi eveniunt, ut dicitur ab eodem Hippocrate *hoc eodem 5. aphor. 57.* Et quidem aliquando ita immodicè fluunt, ut exanimæ non rarò deferant mulieres, vel saltem illas in pessimas ægritudines deducant, potissimum cachexias, hydropes, apoplexias, &c. Dicuntur autem immodicè fluere, vel cum singulis mensibus, servata temporis opportunitate, ad certos dies affluenter erumpunt; vel cum continuatis diebus, nulla, vel mo-

dica

dica intermissione data, profluunt, ut in profluvio muliebri, quin & aliquando, non sine molestiis, torminibus, & præcordiorum anxietatibus. Verumtamen in utrisque purus, syncerusque sanguis egeritur; nam si fortasse serosus, aut lymphicus, aut etiam mucosus, & albicans appareret, vel si loco sanguinis, perpetim expurgeretur ichor, sanies, aut pallidus humor, ut in fluore muliebri, sicuti evacuationes istæ per uterum nullum sanguinis vestigium referrent, ita nec ad immoderatas ejusdem evacuationes, neque ad sententiam hanc aphoristicam pertinerent, in qua solum immodica mensium quantitas, non qualitas consideratur.

Præterea, quia multum, & paucum ad aliquid referuntur, attendenda quoque erit cujuslibet menstruantis mulieris constitutio, & habitudo corporis, itemque consuetudo, & mos excretionis, vita antea acta, idque genus alia: nam succiplenis, otiosis, opiparis, vinosis, largior semper esse solet ejusce modi expurgatio; contra verò parcius exercitatis, debilibus, frugalemque vitam ducentibus. Hinc pleræque solent ad integras hebdomadas menstruare citrà ullum vitæ incommodum, immò salubriter; aliæ verò vix uno, aut altero die.

Contingit autem istiusmodi mensium immoderata evacuatio, aut vitio sanguinis, aut vitio vasorum uteri, unde is effluit. Et quidem vitio sanguinis, si ex propria sui constitutione, ac natura, plus justo per id temporis, quo in motum, & exitum adigitur, in suis particulis vividioribus, ac volatilibus turgeat, & ampliorem locum exquirens, facta in eum impetuosa irruptione, diffundatur; vel si adepta, à non bene

repurgatis sui recrementis, acritate, latiore vasorum anastomosim sibi faciat, ac factam occludi non permittat. Quam verò Veteres inculpabant plethoriam, & immodicam in vasis sanguinis superabundantiam quis unquam admiserit? Si præsertim consideraverit sagacem Naturæ solertiam, quæ sicut in necessariis non deficit, ita nec in superfluis abundat, nisi ex accidenti, aut quia vasa reddita sunt incapacia, aut quia non mole, seu quantitate, sed euphoria, ac orgasmo, ab intruso chylo fortassis energetico, & particulis plus justo mobilibus saturo, tumultuaria commotio in eodem excitatur, cum turgentia, seu potius vehementiori fermentatione, ut proinde vasa ampliora fieri necesse sit, & tantum non dirumpi: quòd & aliquando contingit, non solum in apicibus, ac osculis arteriarum, aut venarum, verum etiam in ipsis meatibus, & glandulis, si præsertim aliqua de causa flaccescant, aut laxiorem naturam sortitæ sint structuram. Atque hinc alterum in eruptionibus immoderatis vitium exurgit ex defectu vasorum uteri, vel ut plus justo laxa, distenta, aut aliter malè affecta, facile aperiantur, vel etiam, ut erodantur, & difficulter nimis deinde coarctentur. Seclusa ergo cujusvis alterius humoris, quam sanguinis, evacuatione, undecumque illa proveniat, consulit hic Hippocrates, in omnibus immodicè fluentis sanguinis vitiis, cohibentia, & sistentia medicamenta esse adhibenda, è quorum numero nunc speciatim meminit cucurbitularum, veluti, quæ externè adhibitæ, citrà magnum corporis incommodum, & absque, eo quòd humores, & sanguis ipse, interiùs perturbentur, aut alterentur, promptè, ac faciliter fluentem san-

sanguinem sistere possunt. Neque verò vereri est, quòd vitiosus, acris, aut acidus fortassè sanguis intra venas, aut arterias detentus, viscera ipsa inficere, & alias ægritudines excitare possit; siquidem in his longè magis prævalet desumpta indicatio ab immoderata sanguinis evacuatione, unde vires repentè concidunt, ac syncope, & mors certò certius imminet: Ab immodica namque sanguinis effusione, cujuscumque conditionis ille sit, aut undecumque effluat, effractis viribus, partes cunctæ corporis collabascunt, atque interrupto cordis, & arriarum motu, vita ipsa deficit. Ut autem hanc evacuationem ab aliis excrementorum expurgationibus sejungeret Hippocrates, illamque non alteriùs ægitudinis ratione, vi, aut violentia inductam, sed consueto tempore, & cum debitis circumstantiis prodeuntem per catamenia speciatim designavit, quæ nonnisi comprehendunt mensuram per uterum purgationem, eamque opportunam, convenientem, & salubriter à Natura institutam, ut corpora fœminarum à suis impuritatibus repurgentur, & uterus veluti per ipsam irroratus, & ablutus, ad fœcunditatem, conceptionem, generationemque sit dispositus; unde si contingat excedenter fieri, & ultra id quod usus postulet, cum vitæ perniciæ, consulit esse cohibendam. Quamobrem non immeritò inquit, *si velis cohibere*: id est si plus justò fluant, atque ex immoderato profluvio expediat cohibere; nam id velle debet prudens Medicus, quod rationabiliter agendum expedit, ne ab evacuatione, quæ cæteroqui salutaris esse solet, in morbum, aut vitæ periculum, patiens adigatur, quemadmodum in catameniis im-

moderatis, non rarò mulieribus accidit.

Admonet eapropter cucurbitulam magnam ad ubera esse apponendam, tum quia hoc medicamenti genus promptè potest adhiberi, ne fluenti sanguini induciæ præbeantur in vitæ perniciem, tum quia apud Veteres frequens erat illarum usus, ut deducitur ex eodem *libr. de prisca Medicina, & de Medico*; tum etiam quia medicamentum est de genere eorum, quæ extrinsecus adhibentur, & momento ferè temporis opitulantur; unde Avicenna 21. 3. *tract. 3. cap. 4. ventosam magnam*, inquit, *sanguinem in una hora retinere*; & licet unius, sed magnæ cucurbitulæ hic meminerit Hippocrates, ut exinde maxima sequatur ad mammas retractio, & vasorum inde perreptantium compressio, & constrictio; nil tamen vetat, quin etiam plures, & minores admoveri non possint, si fortassis major, & amplior timeatur: Atqui cum ad mammas hic dicat, & 2. *epidem. sect. 6.* (unde aphorismus hic fortassè desumptus est) scriptum sit, muliebribus menstruis cohibendis cucurbitulam maximam juxta mammam adhibendam; ansa plerisque data est, num supra, vel infra mammas admovendæ illæ sint. Et quidem Galenus in *hoc comm.* & Avicenna *cit. loco* infra, & sub mammas interpretantur, ubi venæ mammaria cum uterinis conveniunt, & majorem videntur inter sese inire consensum. Verum ex hoc non rectè evincitur, quamobrem non etiam supra mammas illæ possint admoveri, præsertim cum consensus hic non per venas, sed per arterias potius habeatur, ut ex Anatome jam satis constitit; quinimò sanguis, post detectam ejusdem circulationem, per arterias

ad uterum defertur, non per venas, quæ deinde in jecur omnes continent. Attamen notabilis est observatio Jo: Ferdinandi Hertodii memorata in *Ephemeridibus Germanicis Anno 1. obs. 6.* qua uteri cum mammis consensus apertissime detectus est. Sed & cunctis notum, à mammarum iterata, assiduaq; contrectatione uterum ad sui repurgationem sollicitari, unde etiam experimur enixas à suctu lactis, atque à fomentis uberibus applicitis, plurimum juvari ad puerperiorum evacuationem, indeque etiam exoriri majorem in natos affectum, ac nutrimentum in lactentes suos, etsi non à seipsis genitos, parem matribus amorem, ac benevolentiam, à frequenti, & diuturna per illos mamillarum contrectatione, suctioneq; ob quam voluptuosam illæ in utero percipiunt sensationem. Hinc quoque fit, cur ad unius defectum, altera evacuatio promoveatur, & supervenientibus menstruis lactis profusio diminuat, aut etiam desinat. Cæterum, cum occasio tulerit, ut ad mammas cucurbitulæ sint apponendæ, convenientius longè erit, atque securius, infra, non supra mammas illas admoveere, ne subinde mammæ ipsæ tumefiant, aut inflammentur, non sine graviore periculo; neque in super scarificentur, ne ulcera exinde orientur, quæ pectori, & costis plurimum officerent. Per id temporis verò, quo cucurbitulæ mammis admoventur, sunt qui velint, etiam obligandos esse poplites, cum brachiis, subjecta eisdem lana; fortè quia per has ligaturas sanguinis motus aliquantulum impeditur, ne vehementius per corpus excurrat. Unde idem Hippocrates 6. *epidem. sect. 7.* edocuit, *sanguinis venarum suppressiones faciunt animi deliquium, figura*

Tozzi Op. Med. Tomo IV.

alterata, interceptio, linamentum intortum, appositio, ligatura. Ac utilius erit iis interea medicamentis uti, quæ sanguinem fluentem sistere valent, quemadmodum ex Galeno est succus plantaginis, & in praxi sunt in usu pulveres ex C.C. usto, coraliis rubris, bolo Armenia, lapide hæmatite, colchotare vitrioli, croco martis adstringente, atque ex opiatis innumera.

APHORISMUS L I.

Quæ utero gerunt, iis uterios comprimitur.

PLura referuntur à Medicis signa, quibus conceptio, atque uteri gestatio dignosci possit, sed fallacia admodum. Hoc autem, quod ab Hippocrate hic proponitur, quaquam ratione fidelius videtur, eoque ductæ peritæ obstetrices de graviditate certius solent vaticinari, si nimirum os internum uteri occlusum tetigerint, atque universam illius regionem molliter tumefactam percipiant. Ea namque est Naturæ in omnibus suis operibus solertia, ut, quoad fieri possit, quod ipsa molitur, perficiat, & ab externis injuriis alterantibus tueatur, atque in suo robore custodiat, foveatque, potissimum autem in hominis generatione, unde non solum foetum suis involucris obtectum, & utero circumvallatum à quocumque externo alterante tutatur, sed interno quoque uteri ore occluso, ab ambientis aeris ærumnis defendere satagit. Et quamvis in superfœtantibus aliquandò hiarè à plerisque sit creditum, id tamen ipse nulla ratione crediderim, sed potius, quando hoc acciderit, præ nimia delectatione ex iteratò

H con-

concubitu leviter aperiri, ut vim prolificam fecundantis seminis interiorius admittat, pro nova alterius foetus conceptione, si fortè alia, quæ à foeminis suggeri debent, parata sint, beneque disposita, ut etiam advertit Hippocrates *l. de superfoet.* Quod autem à Leonico scriptum est *uteri os comprimitur*, melius ab aliis vertitur, *connivet*, *constringitur*, aut *corrugatur*; quippe re ipsa compressio nulla fit, sed sola interioris oris corrugatio, & coarctatio, sed adeò stricta, & occlusa, ut neque specillum admittat, ut alibi Galenus adnotavit ex Herophilo *3. de naturalibus facult. cap. 3.* Quamquam hæc pro varietate muliebrium constitutionum, soleant, ac possint, non leviter etiam permutari.

Sed quomodo fit, ut nonnullæ adhuc post conceptum, ad plures menses soleant menstruare, si uteri os internum occluditur? Planè per alios ductus menstrua per id temporis prodire manifestè deducitur ex Anatome, qua constat, alias venas, aliasque arterias ad uteri cervicem protendi, unde sanguis tempore gestationis prorumpit, veluti sunt venæ illæ, quæ hæmorrhoidas uteri non rarò excitant, si à glutinosiori, crassiorique sanguine tumescant, & in suis valvulis distendantur, quemadmodum in varicibus: quod tamen rarum.

Postremò tumefactio ista uteri, ejusque oris occlusio in gestatione, longè admodum differt à tumoribus præter naturam, qui utero contingere solent, ut est scirrhus, phlegmon, &c. nam in his tumet uterus cum durtie, & non rarò etiam cum dolore, ac ingenti calore; in iis verò cum mollitie, & citrà cujusvis sensationis molestiam.

APHORISMUS LII.

Mulier utero gerenti si lac multum è mammis effluat, foetum imbecillum significat. Si verò mamme solidæ fuerint, foetum significant saniores.

ADnotat, & rectè Galenus *in comm.* non quocumque mense, ex prodeunte plurimum è mammis lacte, indicium imbecillitatis foetus esse desumendum, sed eo tempore, quo solet effluere. Lac autem in mammis comparere solet circa postremos menses, cum jam foetus adoleverit; & licet in nonnullis illud observetur circa quartum mensem, fortè quia robustiores sunt, & copiosiori alimento fruuntur, plerumque tamen non nisi post quintum, vel sextum mensem lac è mammis prodire solet, cum jam foetus per os fugere incipit contentum illum in Amnio liquorem. Hoc igitur tempore si flacciscentes ^{V, Gal. 14. de usu part. c. 8.} mamme lac effundant, fluidum nimis, ac multum, foetum indicant fore imbecillum. Debet autem lac multum, & fluidum, seu serosum effundi, nam si modicum, & consistens exprimatur, valentioris foetus indicium erit; Hinc *effluere* dixit Hippocrates, quod est sponte sua prodire, nulla adigente vi mammas ad illius exitum comprimente; hac siquidem ratione indicatur lac serosum nimium esse, adeoque malum, ut signum, & ut causa: ut signum quidem, quia inde arguitur simili alimento nutriri in utero foetum, quod cum inutile sit, & fluidum nimis, ad maturitatem illum perducere non poterit; ut causa verò, quia lac non ex sanguine, ut Antiquioribus creditum,

ditum, sed à chylo provenit; hic verò effœtus, vapidus, ac serofus plus iusto, veluti ex languidis coctionibus, malisque secretionibus dependens, non tam matri utero gerenti officit, quàm foetui, cui in alimentum cedere debet; is autem seroso hoc, inutilique alimento nutritus, necesse est, ut sensim elangueat, immò etiam superfluitatibus aquosis opprimatur. Perperam autem putarunt Veteres lac malum è mammis effluens, indicium esse foetus imbecilli, quia cum nonnisi paucum sanguinem in sui alimoniam præ imbecillitate attrahat, majorem ejus partem inconcoctam deserit, quæ ad mammas confluens in lac commutetur, & effluat; alioquin si multum traheret, atque in sui nutrimentum converteret, modicus remaneret ad mammas transferendus, adeoque multum lac gignere non posset. Hæc sanè commenta sunt, & falsis hypothesebus innixa, immò Anatomicis observationibus omninò contraria.

Cum dixerit præterea Hippocrates in secunda parte aphorismi, solidas mammas fortiolem foetum significare, proculdubio tacitè quoque subintelligere voluit, non solum lac serosum nimis, sponteque suæ effluxurum, sed etiam mammas ipsas flaccidas, ac nimium laxas esse oportere, fieri enim vix potest, ut lac multum serosum effluat, quin etiam glandulæ, quæ majorem in mammis structuram faciunt, laxæ quoque non sint, ut propterea lac ipsum continere nequeant, quemadmodum etiam in lactantibus istiusmodi experimur: sed neque *duras*, dixit, sed *solidas*; nam durities morbosam plerumque tumefactionem, ut in phlegmone, & scirrho, arguit: quamquam

Celsus lib. 2. cap. 7. duras mammas cum solidis confundere non sit veritus, cum hunc aphorismum referens dixit: *Mulieri gravida si lac è mammis profluit, imbecillum est, quod intus gerit; dura mamma sanum illud testatur.* Atque hinc fit quamobrem Hippocrates in hac secunda parte, nihilum meminerit lactis multum fluentis, sed solum dixerit, *si mammae solidæ fuerint*: siquidem in priori aphorismi parte, cum lacte fluente tacitè comprehensam quoque voluit mammarum laxitatem, ac flaccescentiam; in secunda verò parte expressit mammarum soliditatem, nulla facta lactis fluentis mentione, quia illam implicitè subintellectam existimavit; nam subdit: *foetum significant saniolem*, per comparisonem scilicet ad imbecillum antea memoratum; siquidem mammae flaccescentes, & laxæ, lac serosum effundentes, imbecillum simpliciter foetum arguunt; solidæ verò licet lac pariter effundant, saniolem designant: At sanum profectò ostenderent, si solidæ simul forent, & lac nonnisi expressum emitterent, illudque crassiusculum; unde robur mammarum lactificantium, & alimenti perfectio, ac elaboratio significatur. Porro lac, quod primum compareret propè partum, purum omninò non est, sed Colostrum, dictum, quemadmodum appellavit Plinius, & Phavorinus apud Gellium. Hinc deducere fas est, consensum uterici cum mammis, non per venas, sed per arterias, & nervos haberi, qui per glandulas vim, facultatemque sibi invicem communicant, ut propterea non solum liquorum irrorantium energia, sed etiam partium componentium valida, firmaque constitutione ful-

ciantur, & mutua, ac reciproca affectione consentiant.

APHORISMUS LIII.

Quæ corruptura sunt fetus, iis mamme extenuantur. Quod si rursus duræ fiant, dolor aut mammas, aut coxas, aut oculos, aut genua infestabit, & non corrumpent.

NEdum à lactis fluentis copia, & mammarum laxitate, fœtum imbecillum fore præfagiendum, sed accedente earundem mammaram extenuatione ipsum aborturum significari, hoc aphorismo subdit Hippocrates, quemadmodum *Aphor. 38. huius* quoque dixerat, alterutra mammarum gracilescere, alterutrum pariter geminorum fœtum abortiri. Sed expressius *libr. I. de morbis mulier.* edocuit: *Quibus in utero habentibus circa septimum, & octavum mensem repente tumor mammarum, & ventris concidit, nec non mamme gracilescunt, & lac non apparet, asserendum est, puerum, vel mortuum esse, vel vivere, sed debilem.* Ex quibus deducere nunc licebit mammas non solum flaccescere, sed extenuari, cum abortus imminet, & quidem cum antea intumuerint, & lac in seipsis colligere cœperint, quod non nisi ultimis mensibus graviditatis accidit. Id quod manifestius videtur comprobatum ex adjecta secunda aphorismi parte, ubi dicitur: *si verò rursus duræ fiant*; quò patet, illas antea solidas, durasque fuisse, aliter qua ratione gracilescere, & extenuari dici possent, nisi prius intumuisent? Unde autem tumor illarum, & soliditas, indeque ex mala fœtus, & uteri habitudine, laxi-

tas, & extenuatio insequatur, jam supra est expositum. Verumtamen gracilitas hæc, & laxitudo mammarum comparanda erit ad statum graviditati præcedentem, cum præque mulieres natura parvas, gracilesque sortitæ mammas, non multum tumidas illas habeant, etiam si præsignantes sint, benèque valentes; at verò ex imminente abortu multo graciliores illæ fient. Parum autem refert, an multo antea ejusmodi mammarum incommodum patiantur; an etiam ipso abortu, aut propè; quamvis Galenus *in comm.* semper illarum extenuationem præcessisse se compertum fateatur.

Quod ad secundam aphorismi partem, putat Galenus verisimilius dictionem græcam *παλιν* exponendam esse pro, *secus*, aut *contra*, ut sensus sit: *si verò contra mamme duræ fiant*, ac propterea, ut ipsemet subdit, *quod in toto dicitur aphorismo sit tale: mamme quidem tenues omnino præcedunt fœtum corruptionem, & non possunt isti corrumpi sine earum extenuatione præcedente; duræ verò corruptionem quidem non significant, sed dolor quidem dictarum partium ad ipsas consequitur.* At oporteret non solum dictionem hanc variari, sed totius orationis sensum, nam si supra scribitur *mammas extenuari*, proculdubio antea tumidæ esse debebant; & si solidæ, ac duræ sunt, antea flaccidæ erant. Si prætereà duræ persisterent in utroque casu, quomodo simul etiam extenuatæ, & graciliores fierent, attenta potissimum earundem mammarum glandulosa constitutione, ac textura?

Quòd si revera duræ fiant mamme, duritie penitus morbo-
sa, qualis in tumoribus præter
natu-

naturam, tunc alia de causa, & fortassis etiam in mammis particulatim hærente, dolores accident, adeoque utero benè se habente, neque abortus consequetur. Cæterum comparata in universum mammarum soliditate, cum earundem laxitate, ac extenuatione, gravior semper hæc ad partum, levior illa censenda est.

A recurrente autem mammarum duritie, dolores accident, vel easdem infestantes, vel coxas, vel oculos, aut genua, sicque abortus non sequetur; quoniam pravi humores ab utero in has partes, veluti per metastasim delati, immunem illum deserunt, & alias partes sua corpulentia deturpant, & quidem in eas potissimum, quæ specialius cum eodem consensum ineunt, vel aliqua ratione cohærent, aut propter languorem excipiendis humoribus consentientia fiunt, ut experimentis constat, atque ex Anatome palàm fit: quamobrem idem Hippocrates pluribus in locis recensuit pravorum istiusmodi humorum decubitum modò in coxas, ut 1. & 2. de morbis mulierum, & libr. de Natura muliebri; modò in genua, poplites, & crura, ut eodem 2. de morbis mulierum, & libr. de superfætatione; quandoque etiam in oculos; ut dicitur eodem libro de superfætatione, & de Natura muliebri, & alibi. Eiusmodi autem reciprocum affluxum è visceribus naturalibus ad articulos, musculos, & nervos, ac viceversa, jam satis ostendunt colicæ, hypochondriacæ, atque hystericæ passiones, mutuo cum articulariis doloribus respondentes. Porro uterus speciatim per carnosas fibras, peritonæo alligatur, per ligamenta lumbis, coxis, & inguinibus, per nervos tum è vago

pari, tum è vertebra ossis sacri, & per arterias, ac venas, & vasa lymphica, cum reliquis omnibus partibus corporis, consensum init, ut liquet ex Anatome.

APHORISMUS LIV.

Quibus os uteri durum est, iis uteri os comprimi est necessarium.

Cum antea dixerit Hippocrates in utero gerentibus os uteri internum comprimi, ac corrugari, ne quis inde putaret ex illius compressione, occlusionemque, perpetuum, atque infallibile conceptionis indicium esse deducendum, subdit nunc ex illius duritie solam compressionem necessario esse colligendam, quæ si præextiterit, conceptioni impedimento erit; quamobrem, ut antea etiam est animadvertum, nisi uteri occlusio fiat cum ejusdem mollitie, & citrà quemcumque dolorem, conceptum foetum nullatenus indicabit; itaque si durum, ac renitens admodum illud percipiatur, alia de causa occlusio illa procedet, adeoque morbosa esse poterit. Fit autem durum os uteri internum, non raro ex tumore præter naturam ibidem inducto, potissimum autem ab inflammatione, & scirrho, aut etiam à callo, vel ulcere calloso, ut dicitur in lib. de sterilibus. Unde deducere est, occlusum uteri os conceptum designare; si cum naturali ejusdem partis mollitie jungatur, citrà dolorem, ardorem, aliudque simile symptoma; contra verò cum duritie, memoratisque symptomatibus conjunctum tumorem præter naturam, aut etiam callum significare; quamobrem licet compressionem,

occlusionemque ejusdem necessario arguat, non tamen perpetuò ab uterigestatione orietur. Sed & in obesis plus justo, quibus omentum pinguius redditum elongatur, procidit in anticam uteri regionem, illius os præcluditur, ut antea dictum est; itemque in hydrope uterino affectis, aliisque similibus; verum in his, aut uterios non omninò occlusum est, aut molle nimis, & aquoso fluctuantique humore repletum, ideòque tactui prementicedens, præter alia plura indicia, morbosam constitutionem attestantia, de quibus hic sermo non est.

APHORISMUS LV.

Quaecumque utero gerentes à febris corripuntur, & fortiter calefiunt sine occasione manifesta, difficulter pariunt, & cum periculo, aut abortum facientes, periclitantur.

A Liàs dixerat *utero gerentes acuto morbo corripì, lethale*; nunc de febris, si illis accidant, verba faciens inquit, difficulter parere, aut abortientes periclitari, fortè ibi specialius in utero, hic ex reliquo corpore ægritudines gravidarum perpendens ab utero remotas. Quoniam verò ibi lethale, in hoc autem aphorismo periculosum, inquit, crediderim, propterea non de febris ardentibus, quæ acutissimæ sunt, sed de aliis levioribus loquutum, in quibus licet difficultas pariendi, aut abortus timendus sit, non tamen mors certò immineat; quemadmodum de acutis ægritudinibus meminerat, & ab ardentibus febris proculdubio sequeretur. Hinc sententiam hanc congruentius exponerem cum iis, qui loco *fortiter cale-*

fiunt, potiùs legendum suadent *fortiter extenuantur*: Hac enim ratione melius explicabitur, quomobrem non penitus sint peritura, & quomodò absque manifesta occasione incalescant, & qua de causa distinctis dictionibus excalefactionem immoderatam à febris sejunxerit. Miror autem, unde sibi persuaserit Cardanus, robustas mulieres facile epialas febres sufferre posse, quas inter graviores, periculosioresque recensuit Galenus 6. *epidem. comm. 1. tex. 29.* illas cum hemitritæis, & continuis enumerans. Itaque longè rationabilius erit si dicatur, utero gerentes febris correptas difficulter parere, & periclitari, si simul unà magnopere extenuentur, & absque ulla manifesta occasione, puta, inedia, vigiliis, evacuationibus, aliisque extenuare valentibus: Hac quippe ratione planè constabit tum à febris ad plures dies producta, tum à causa interna extenuante, nedum utero gerentem, sed & fœtum ipsum vehementer debilitari, unde partus deinde difficilis consequatur, ac propter virium languorem, non sine vitæ periculo: Quòd si fœtus ferendo non sit, ut in tempus partus producat, proculdubio abortietur, & simul cum illius interitu pariens ipsa periclitabitur.

Ex his modò deducere licebit, febres hoc loco memoratas, de genere earum existimandas esse, quæ à materia humoralis dependent, exceptis solum ephemeris simpliciter dictis, quæ cum non nisi ad diem unum, aut alterum perdurent, profectò ingentem noxam utero gerentibus afferre nequeunt, aut cum extenuatione citrà causam manifestam copulari, quare à pravis humoribus progenitæ, utero gerenti, & fœtui detrimento sunt; unde idem Hippo-

Hippocrates 2. *aphor.* 28. animadvertit febricitantium corpora, plusquam ratio postulat, contabescere, malum esse; quippe quia imbecillitatem, vel, ut aliis placet, pravitatem significat.

APHORISMUS LVI.

In fluxu muliebri si convulsio, & animi defectus advenerit, malum.

NUm revera de fluxu muliebri propriè dicto, an verò de copioso menstruorum fluxu scriptus sit hic aphorismus dubitare contingit apud Expositores; & quidem in utramque partem propendere, suis non caret argumentis. At verò quoniam *Aphor.* 3. *hujus* dixerat: *ubi sanguis multus fluxerit, singultus, aut convulsio superveniens, malum*: probabilius videtur, non hic quamcumque ex utero sanguinis evacuationem illum intellexisse, sed eam speciatim, quæ non sinceri sanguinis, sed corrupti, ac saniosi humoris est, qualem descripsit Aetius *Tetrabibl.* 4. *ser.* 4. *cap.* 65. atque ex Archigenis sententia uteri destillationem appellavit, eaque Galenus Boethi uxorem affectam retulit *lib. de præcognitione ad Posthumum*. Ut cumque autem se res habeat, planè fit, ut quamcumque immodicam evacuationem undecumque procedentem, consequens convulsio, animi defectus, malum sit; & longè deterius censeatur, si ab utero plurimis nervis referto, atque cum principalioribus corporis partibus consentiente, proveniat; nam morbi isti suapte natura perniciosi sunt, ut qui vitæ custodes malè affectos arguunt, quin immò vires infringunt, ipsumque vitæ fomitem perdunt. Rectè autem monitum est à Galeno

in comm. non statim hæc in recenti fluore advenire, *sed cum vel vehementior fuerit, vel diù perduraverit.*

APHORISMUS LVII.

Si menstrua plura fiant, accidunt morbi; & si non fiant, ex utero morbi contingunt.

MEdiocris cunctis in rebus laudabilem, nemo est, qui non fateatur, ac magnis laudibus non deprædicet, unde effatum illud notissimum Terentii: *Ne quid nimis*, atque illud Horatii:

Est modus in rebus: sunt certi denique fines,

Quos ultra, citraque nequit consistere rectum.

Eamdem autem pluribus in locis ad Naturæ tuitionem, & salubritatis incolumitatem, servandam, passim quoque commendavit Hippocrates, ut propterea scripserit 6. *epid. sect.* 6. *labor, cibis, potus, somnus, Venus, omnia mediocria*: Quod & pluries repetit in libris aphorismorum. Hic verò speciatim in fœminis menstruas purgationes considerans, illas modum non servantes omninò vituperat, & cum affluenter prodeunt, & cum penitus supprimuntur, ea tamen differentia, ut si largè profluant, morbos indefinitè succedere, si detineantur, ex utero particulariter provenire decernat.

Eveniunt planè morbi, fluentibus largè menstruis, plerumque vitio totius, quoniam malam sanguinis diathesim sæpius consequuntur: non enim alia de causa sanguis affluenter funditur, nisi quia vitiosus est, puta acer, acidus, salus, ferrosus, qui propterea, impetu in

vasa uteri facta, viam sibi aperit, & quandoque, nedum oscula vasorum laxat, dilatatque, verum etiam erodit, & tantum non dilacerat; cumque vitiosus iste sanguis per universum corpus excurrens, impetum deinde speciatim faciat in uterum, proinde est, cur Hippocrates indefinitè dixerit, morbos exindè suboriri, nulla de particularis visceris dyscrasia mentione facta. Verum non hinc uterum quis ab istiusmodi labe immunem opinetur, cum adhuc solius ipsius vitio id ipsum haberi possit; si potissimum peculiari aliqua ægritudine sit affectum, aut occulta sui fermenti depravatione contaminatum, quam obrem sæpius uteri scirrhus laborantes, aut ex glandulis ejusdem tumefactis, obstructis, laxatis, erosive, malè se habentes, profluvio sanguinis ad annos integros vexatas vidi, immò doloribus vehementissimis, & spasmodicis affectionibus cruciatus. At verò in menstruum suppressione, defectus hic videtur omninò adscribendus utero, aut quia illabentem sanguinem non admittit, aut illapsum excipit, detinetque: non admittit autem, quia in suis vasis obstructus, aut debito fermento privatus repurgationi, secretionique ineptus evasit, cum alioqui velut sentina totius corporis exitum sanguineiscrementis debeat promptissimè exhibere; quapropter si illa recirculent, & aliorum remeent, ejus defectui jure optimo consequentes ægritudines tribuuntur. Quòd si illa excipiat quidem, sed præcrassitie, ac lentore deponere postmodum non possit, proculdubio ibidem hærentia graves ægritudines excitant, quæ sedem in eodem habentes, ab illo malè affecto pro-

cedere dicentur, ut in obstructionibus, tumoribus, aliisque uterini affectibus experimur. Et quamvis menstruum repurgatio impedita, magna ex parte, sæculento sanguini tribui possit, debet tamen utero adscribi, qui cum sua natura sit repurgandis mensibus destinatus, quoties hoc munere defungitur, ejus culpæ istiusmodi defectus attribui debet, quia deficit in eo, quod debet: deficit autem, ut dictum, vel fermenti sui inertia, vel vasorum exilitate, aut compressione, vel denique mala constitutione, ac textura, aliave indispositione nobis adhuc inconspicua.

Quinam verò sint morbi tum ex fluentibus plus justo, tum ex non fluentibus menstruis oriundi, non facile est omninò determinare, cum & Hippocrates ipse, licet plurimos recensuerit in *lib. de morbis muliebribus* & 2. *epidem. sect. 3.* & alibi; non tamen omnes penitus est complexus, nam nulli non sunt, qui ex ipsis immodicè fluentibus, vel diminutis, aut omninò suppressis oriri non possint, ut experientia demonstrat; unde jure optimo scripsit ad eundem Hippocratem Democritus *Epistola de Natura humana*, innumerabilium ærurnarum author esse uterum, cum & revera dolores capitis acerbissimi, epilepsia, apoplexia, lethargi, convulsiones, catalepses, phrenitides, cæcitates, surditates, angina, asthmata, hæmoptyses, peripneumonia, palpitationes, vomitus, & alia plurima mala ex illo proficisci consueverint, ut historiis, & anatomicis observationibus est compertum. At verò quamvis innumera sint mala ex utero progigni solita, specialiora tamen Hippocrates

tes *cit. lib. de morbis mulieb.* recensuit, five copiosius quam par sit, effluant, five diutius remorentur, & suppressi menses sistant. Ut autem quis de eorumdem immoderato exitu iudicium ferre possit, statuit ibidem in omni muliere sana duarum heminarum Atticarum mensuram excedere non debere, idque ad duos, vel tres dies, longius autem, aut brevius tempus morbosum esse; Verumtamen hæc plerumque variant etiam salubriter, pro varia foeminarum habitudine, ætate, victus ratione, exercitatione, & similibus; nam plerasque videre contingit, quæ ad plures dies abundantius menstruare solent, & maxima cum corporis euphoria, ut etiam Hippocrates ibidem innuere videtur. Facta autem comparatione inter eas, quibus menses affluentius prodeunt, ac profluvio sanguinis affici contingit, aut ex adverso suppressi sunt; longè periculosius ægrotant primæ, quippè quæ immodicam evacuationem sanguinis ferre nequeunt, tandem decolores redditæ, cachecticæ, aut hydropicæ, vel, quod gravius, syncope affectæ, brevi succumbunt, & vita deficiunt. Contrà verò, quibus sanguinis menstrua purgatio supprimitur, licèt in eadem, & consimilia mala procedente tempore incidant, in longius tamen protrahuntur, adeò ut idem Hippocrates scribat famulam quandam 4. *epidem.* septem annis mensibus caruisse. Porro mirari subit quomobrem Hippocrates *cit. lib. de morbis muliebr.* scriptum reliquerit: *detenta per sex menses menstrua incurabilia fieri*; Cum cæteroqui ex praxi pluries innotuerit, nonnullas ex adverso convaluisse, aliàs etiam concepisse, & vitales partus edidisse, nisi aliunde uterus in sua consti-

tutione laxatus, ineptus evaserit conceptioni, & graviditati. Memini me aliquando observasse mulierem quadragenariam Ascite laborantem, quæ tamen suo foeta marito, non solum foetum maturavit, sed non sine admiratione puellum exactè formatum peperit, licèt tandem non repurgatis sufficienter lochiis, & aqua in abdomine retenta, post plures hebdomadas perierit.

Pro coronide tandem animadvertendum, morbos à non fluentibus mensibus tunc solum evenire, cum aliàs illi fluere deberent. Incipiunt autem naturaliter fluere cum Mulieres conceptioni, generationi quæ aptæ sunt, id, quod plerumque accidit circa decimum quartum annum; & licèt aliquibus ante, & post hæc tempora eruperint, nam aliquando statim ab incunabulis, quandoque verò post vigesimum primum annum apparuerunt; hoc tamen illis præter morem, atque ex ægritudine aliqua accidisse dicendum. Ita quoque desinere consueverunt septimo, aut (quod summum) octavo annorum septenario, quamvis pleræque ad sexagesimum annum, & ultra menstruas purgationes subiisse perhibeantur. Quare pro diversa foeminarum constitutione prudens medicus de ejuscemodi mensium eruptione, aut desitione, promotum, vel impedita, coniiciet, num morbosæ sint, aut proximè in ægritudines sint lapsuræ; atqui certiora indicia desumet ab his, quæ idem Hippocrates memorat *cit. libr. de morbis muliebr.* puta doloribus, tumoribus, obstructionibus, febribus; contrà verò spontè Naturæ desuisse pronuntiabit, si citrà quamcumque uteri ægritudinem, & nulla subsequente febre, aliave cordis, cerebri, aut stomachi molestia, certa præser-

præsertim ætate, sensim, sensimque defecerint. Quæ denique purgationes à partu fiunt, & propriè lochia, aut puerperia dicuntur, longè admodum à mensstruis differunt, adeoque ad præsentem hunc aphorismum nullatenus pertinent.

APHORISMUS LVIII.

Recto intestino, aut utero inflammationem patiente, urinæ stillicidium accidit, & renibus purulentis urinæ advenit stillicidium: Hepati autem inflammationem patienti singultus advenit.

A Suppressis mensstruis, si fortè sanguis ita in utero restagnet, ut excitet inflammationem, non solum inde febres, dolores, anxietates, aliaque id genus communia symptomata inflammatorias febres comitantia orientur, sed compatientibus vicinis, adjunctisque partibus, alia specialiora suscitabuntur, quæ eorundem nexum arguunt, & partem specialiter affectam designant. Quamobrem hoc aphorismo Hippocrates ab inflammato recto intestino, aut utero, urinæ stillicidium evenire animadvertit, sicut pariter à purulentis renibus: ab hepate verò inflammato, singultum.

Et quidem urinæ stillicidium advenire, recto intestino, aut utero inflammationem patiente, affecta inde vesica, quæ utrique proxima, & conjuncta est, palàm fit ex Anatomie, qua constat vesicam uteri cervici superincumbere, atque intestino recto alligari, ut propterea ad utriusque partis læsionem promptè quoque ipsa compatiatur: quamobrem experimur in gravidis à tumefacto utero, vesicam comprimi, at-

que urinam in illa collectam diutiùs asservari non posse, sed statim egeri, quocircà utero gerentes micturire coguntur. In sæcum autem, præsertim duriuscularum, egestione, ex nimio, frequentique conatu, etiam vesica crebriùs sollicitatur, ut modicam adhuc urinam quantociùs expellat. Si ergo hæc citrà morbosas causas, & vesicæ morbos, accidunt, ut urinæ stillicidium oriatur, quàm graviùs, & molestiùs affici continget, cum partes illæ inflammatione laboraverint, non sine pravorum succorum acritate, atque irritatione?

Id ipsum evenire observamus à renibus purulentis, cum nimirum urina inde transcolata, & pure suapte natura mordicante, acribusque particulis muriatico-acidis referta, in vesicæ cavum deponitur, & stillicidium excitat. Animadversione dignum est, quod Hippocrates non inflammatos, sed purulentos renes hic notaverit, seu ex contracto ibidem ulcere, suppuratos, quoniam ab inflammatione renum potius Dysuria, vel Ischuria fit, quàm Stranguria, quippe ab inflammatis renibus, coarctatis scilicet, occlusisque ductibus, præterfluenti sero transitus omninò denegari solet, unde Ischuria; Et si fortasse adhuc illud effluat, collectum deinde in vesicæ cavo, per urethram commodè, atque affluenter reddetur, non autem stillabit, ut in Stranguria fit, de qua hic sigillatim Hippocrates meminuit. Quin & rarissimè accidit, utrumque renem inflammari, ut exinde urinale vitium contrahat, & stillicidium pariat; At verò ab alterutro rene suppurato, ac purulento, urina manabit multo, crasque pure saturata, unde haud liberè per angustum urethræ orificium ferri poterit; adeo-

adeoque guttatim educetur; simulque sua acritate sphincterem musculum vellicabit, & ad micturiendum laceffet.

Verum quamvis Hippocrates hic dicat, ab inflammato recto intestino, aut utero, necnon à purulentis renibus urinæ stillicidium exoriri, non tamen deducere licebit è converso urinæ stillicidium, ac stranguriam ab utero, & recti intestini inflammatione, aut à suppuratis renibus perpetuò proficisci, cum illa plures alias causas consequi possit, quamobrem ex uno in aliud vicissim inferre non licet. Hinc stranguria veluti symptoma superveniens ob affectæ partis viciniam, non propriè indicabit annexarum partium inflammationem, sed solius vesicæ læsionem, quæ cæteroqui aliis de causis haberi potest, ut patet ex praxi.

Sicut à recto intestino, aut utero inflammato stranguria, ita ab Hepatide, seu Hepatis inflammatione singultus, qui licet inter symptomata ejusdem minimè referatur, præsertim cum fit, aut recens est, supervenit tamen cum diù increbruerit, & malum signum ab eodem Hippocrate reputatur 7. *aphor.* 17. Creditur autem ferè communiter id fieri propter consensum jecoris cum stomacho, cui dicitur singultus convenire, cum is veluti convulsivus stomachi motus appelletur. At ipse crediderim potius ad diaphragmatis vitium pertinere, quod propter ingentem jecinoris inflammationem contrahatur, & in suis expansionibus impediatur, quin & irritetur, molesteturque non leviter à contractu tumefacti, inflammatique jecoris, quod eidem alligatum, plus justo præponderans, gravi incommodo est. Coafficitur simul una pa-

riter stomachus, & quia sub septo transverso proximè jacet, & quia per pylorum ab inflammato jecore phlogosim subire solet. Cæterum quamvis non audeam inficiari singultum speciem quandam esse convulsionis, haud tamen admiserim ab inanitione, atque adeò ab immodica siccitate stomachi tunicas contrahente, illum revera provenire posse, cum tanta siccitas, vivente animali, partibus accidere nequeat, ut aliàs ostendimus; quamobrem Galenus ipse *in hoc comm.* Hepati inflammationem patienti propter nervorum communicationem singultum supervenire, subdit; *non quidem semper, sed quando ad maximam attollitur inflammationem.*

APHORISMUS LIX.

Si mulier non concipit, scire autem velis, si conceptura sit, pannis circumtectam desubter suffias, & si odor videatur per corpus ire ad nares, & os, scitò, quod ipsa non ex se ipsa sterilis est.

DEmiror valdè quomodò factum, ut levem hanc explorandæ foecunditatis in mulieribus conjecturam inter aphorismos retulerit Hippocrates, cum & suo nomine penitus indigna videatur, quippe quæ nulla ratione, nulloque videtur experimento suffulta. Sed & quis unquam tam arctè poterit pannis feminam explorandam circumtegere, ut desubter suffitam, nares bonus, vel malus odor non feriat, isque sit totus per corporis meatus interiùs excipiendus, vel saltem nullatenùs infractus, retusus, aut inversus in tot viarum, & viscerum anfractibus. Sterilitatis præterea causæ in feemi-

foeminis multæ sunt, quas idem Hippocrates recensuit *lib. de sterilibus*, & *de morbis mulier*. unde facile est, ut ex una, aut altera ipsarum, sterilitas proveniat, quamquam impedimento non sint, quominus per uterum odor nares, aut os pertingant, adhuc in bene valentibus, ut Interpretes hic adnotarunt. Neque densitas, aut raritas uteri, ut commentatur Galenus, quidquam facit in conceptione, & speciei propagatione, cum satis superq; constet ex Anatome, non per inconspicuos uteri poros, sed per patentes meatus, tubasque Falloppianas, ex ejusdem ovariis albugineam substantiam molli putamine obvolutam, in ipsius cavum pro conceptibus deponi; quin & experimentis liquet, duriori, densiorique textura præditas, quemadmodum sunt exercitatae, & frigidas, siccasque regiones incolentes, longè fecundiores esse otiosis, obesis, & laxiorem nactis constitutionem. Quamvis insuper viæ exquirantur patentes, ac liberae, ut semen è maribus ejaculatum ab utero excipiatur, & fecundatum ovum ab ovario sepositum in ejusdem cavum delabatur; non tamen necesse est, ut reliquum corporis ita permeabile sit, & reſeratum, ut odores inde exceptos admittat, atque ad nares, & os evehat, ut ex inde judicium certæ fecunditatis deduci possit, quasi verò foeminæ fecundæ solum illæ sint, quibus corpus universum patulum, perviumq; est. Rectius propterea idem Hippocrates *aphor. 62. hujus* sterilitatem à particulari uteri vitio deduxit: inquiens: *Quaecumque frigidos, & spissos uteros habent, non concipiunt, &c.* ubi nimirum universum fecundationis opus peragitur, ideòque opus est, ut is sit optima constitu-

tione præditus, in suis ductibus patulus, & in graviditate amplificationi facile cedens, atque tuitioni infantis accommodus, ac peropportunus.

Quamvis autem ex his plurimum de veritate istius aphorismi suspicari fas sit, quia tamen Hippocrati fuit in animo, eam hic potissimum conjecturam de judicanda in foeminis fecunditate proponere, quæ unicuique obviàm foret, & promptè reducibilis in usum, quemadmodum mos Antiquis erat; propterea hoc loco illorum ejusmodi internotionis recensuit, ac methodum, proximque exhibuit; ut saltem quid ex parte deduci posset, citrà grave foeminarum incommodum, & solum ab extrinsecis coniiciendum edoceret: quod & aliàs *lib. de sterilibus*, alii suis exuviis exuti, integri, ac purgati in uteri vaginam inditi beneficio, cum foemina ita dormitum, experiendum admonuit, idque à plerisque obstetricibus non semel ipse gestum audivi, nec irritò successu; quippe inutilem mucorum, seu crassæ pituitæ saburram sensim, sensimque uterus hac ratione deponere consuevit.

Ut igitur, quæ hic proponit Hippocrates in usum commodè duci possint, ad internoscendam foeminarum pro conceptione aptitudinem, conducibilius erit, ut non solum illæ pannis circumtectæ suffiantur, ne dispersus odor nares potius exterius pertingat, quam per uterum; verum etiam ope convenientis infundibuli exceptus illac solum tendere cogatur, aliàs frustra nea esset operatio. Sed & horum nescia necessum est, ut sit sufficiens mulier, eorumque simul, quæ suffumigari debent, ne scilicet sua malitia propriam sterilitatem tegat; quin

al. μετώ-
πιον, aut
γέτωπον.
V. Mer-
curial.
variar.
lect. 1. 2.
c. 19. Lag.
1. ep. 49.
Foesium
econom.
Hipp.

quin etiam oportet, ut odor aroma-
rum ad foeminæ os delatus, post a-
liquod tempus ab ostetrice perita,
admoto ejus orinafo, percipiatur:
quod sanè Platoni animadversum,
maximum illarum opus dicitur. Qui-
bus verò foeminæ sint suffiendæ, li-
cèt Hippocrates hic non meminerit,
refert tamen *in comment.* Galenus,
oportere esse, quæ ejus naturæ sunt,
ut suffitui apta sint, quemadmodum
thus, myrrha, styrax, & quæcum-
que sunt valdè odorata. Insuper
idem Hippocrates *libr. de sterilibus*
metopum unguentum lana excep-
tum, uti pessum, utero imponen-
dum jubet, & si subditi odorem per
os manè olfecerit, mulierem fecun-
dâ fore, & concipere posse sub-
dit. Admirabilius verò est, quod
idem Author ad hoc idipsum inter-
nosendum proponit, illinendos ni-
mirum esse oculos mulieris humore
aliquo, quem si iidem combibant,
fecundam illam esse testatur; id
quod etiam confirmat Plinius *libr. 7.*
cap. 16. dum ait: *fecunditatis in fe-*
minis prerogativam accepimus, in-
unctis medicamine oculis, salivam
infici: quod & antea Aristoteles
adnotaret *2. de generat. animal. cap.*
5. & 4 sect. problemat. 2. juxta ex-
positionem Theodori, ut benè et-
iam advertit Langius *lib. 1. epist. 49.*
ubi aliud ex galbano orificio uteri
incluso experimentum affert, adhuc
ex Hippocratis auctoritate desum-
ptum, ut apud eundem est lege-
re. Plura alia ad hoc idem con-
ferentia Authores hic memorant,
quæ unicuique experiri pro arbi-
trio licebit. Neque verò penitus
rationi dissentaneum existimare est,
quomodo fieri possit, ut halitus, ac
vapores odori ex utero nares, & os
pertingere possint, si nimirum con-
sideremus maximum, quem ille per

nervos, cæterosque ductus consen-
sum habet cum cerebro, & parti-
bus caput componentibus; quamo-
brem benè poterunt halitus isti, im-
mò tenues, volatilesque aromatum
particulæ, per patentes uteri mea-
tus nervos subire, & sensim per fi-
bras, ipsorumque substantiam, pe-
nitius intromitti, & ad usque cere-
brum pervadere, sine ulla earun-
dem volatilium partium refractione,
quippe experimur moschum,
ambarum, zibethum, idque genus
alia, ita rebus cunctis commisceri,
ac pertinaciter hære, ut non so-
lùm diutissimè perdurent, atque ir-
refracta perseverent, sed, quod ma-
jus, adhibita quavis industria, dif-
ficillimè postmodum deleantur. Qui
præterea alimenta, aut medicamen-
ta assumpserunt, ejuscemodi rebus
odoriferis confecta, ad longum tem-
pus illa eadem olere solent. Quin
& plurima sive benè, sive malè olen-
tia, clysteribus injecta, caput, &
cerebrum afficiunt. Aliquando et-
iam observavi ex indito clystere, in
quo opium fuerat dissolutum, cere-
brum ad longissimum tempus fuisse
soporatum. Unde qua ratione o-
pium per vapores ab intestinis cere-
brum gravat, & ad soporem addu-
cit, non dissimiliter odorifera ab u-
tero per nervos, nares, & os impe-
tere possunt.

At verò præter ea, quæ hic com-
memorat Hippocrates de conjectura
à suffitu subtus admovendo, oport-
tebit peculiarem foeminarum con-
stitutionem, ac totius corporis stru-
cturam, ventris, & hypogastricæ
regionis habitudinem intimius per-
scrutari, quo nimirum modo ista se
habeat in suis operationibus, excre-
mentorum repurgationibus, aliis-
que, & si graciles, an obesæ foeminæ
sint, si hypogastrion amplum, spa-

spatiosum, an verò angustum, & arctum, aut exsuccum habeant: quamobrem sagax Medicus ex his omnibus simul junctis de bona, vel mala uteri dispositione, non irrationabiliter deinde coniiciet.

Quibus verò medicamentorum generibus, quæ steriles creduntur, foecundæ fieri possint (si tamen defectus generationis ab ipsis sit) pluribus tentare ausi sunt periti Professores, industriæque obstetrices. Sunt, qui ope pomorum mandragoræ, de quibus latè inter cæteros meminere Delos Reies, Vallesius, Sennertus, Savanarola, Mercurialis: alii moscho, zibetho, ambra grysea, cæterisque aromatibus sæpius iteratis: nonnulli nuce-moschata; plerique testiculis animalium, aliisque similibus. Verùm hos fallere, & falli contingit, nisi prius re benè perspecta, ac maturius pensitata constiterit, qua de causa infœcunditas procedat, & num vitio formationis, & structuræ uteri, ejusque vasorum, an potius defectu sanguinis, & glutinosæ illius substantiæ in ovariis adnatæ, & ad formam ovi adultæ, cujus potissimum ratione nuperrimè patuit infœcundas evadere mulieres, quibus nimirum datum non est ejusmodi ovis abundare, aut ad justam magnitudinem illa perducere, vel etiam perducta perficere, sed potius corrumpere, fortè quia ab ovariis seponi, atque in uterum delabi nequeunt, nimio adipe stipata, & circumducta, ut plerisque anatomicis dissectionibus est observatum. Quamobrem pro varia harum causarum conditione, oportebit diversis auxiliorum generibus foecunditatem in illis promovere, fœtis nimirum partibus generationi destinatis, aut etiam remotis impedimentis, ex quibus foecundatio, & conceptio retar-

detur, quæ propterea sagax Medicus, ubi sedulò perquisierit, atque in deficientis naturæ auxilium promoverit, proculdubio sui voti compos fiet. Cæterum de his consulendi sunt practici, apud quos magna sylva horum medicamentorum, pro diversitate causarum proponitur.

Illud tandem ex his omnibus colligere nunc licebit, perperam à quibusdam in praxi omnem odorum usum in affectibus mulierum indiscriminatim vituperari, cum tamen is à primis Medicinæ proceribus, summo perè multis in casibus commendetur, neque solum externè, sed etiam internè.

Et quidem licere quandoque in affectibus muliebribus, medicamentis uti, nedum aromatum mixtura conditis, sed & fragrantibus, ac odoris, nempe moscho, ambaro, zibetho, nuce myristica, calamo aromatico, cæterisque, dosi tamen convenienti, ac moderata, pluries & ab Hippocrate, & à Galeno, cæterisque, non temerè edocemur. Iis enim, non solum cerebrum, & cor momento ferè reficiuntur, & in suis operibus vigorantur, si fortasse sopore, vertigine, apoplexia, syncope, ac leipothymia fœminæ laboraverint, sed speciatim uterus exinde suaviter allectus, seipsum impuritatibus statim exonerat, ut etiam foecundari subindè facillè possit. In quam rem legi merentur præ cæteris Sennertus *lib. 4. sue prax.* & Laurentius 7. *Anatom.* itemque Langius *epistola 23. libr. 1.* Gaspar à Rejes in *suo Campo Elysio iucundarum questionum, quæst. 84. & 93.* Vivit adhuc Neapoli nobilissima quædam Matrona, quæ diù sterilis cum foret, & prolis avida, tandem impatiens (temerario planè ausu) plura, & plura moschi grana iteratò sumpsit,

psit, atque voti compos, gravis paulò post effecta est, & masculum peperit, qui nedum feliciter, salubriterque degit, sed validos, robustos, & eufarcos filios, ac successores habet. Notum insuper est de Hispanis fœminis non solum nobilibus, sed plebeis, quibus frequens in usu est acutus, ac vehemens moschi, & ambari odor, ut etiam præter vestimenta, ac chirothecas, inter tabaci delicias, quotidie illum indiscriminatim habeant. Qua de causa crediderim, iis solummodò frequentes odores speciatim obesse, quæ insuetæ sunt benè olere, ut de Septentrionalibus ferunt. Moschi quoque usum internum non solum approbant, sed admiranda ex ipso prædicant Horatius Augenus *lib. 12. epist. 6.* Solenander *cons. 15. sect. 4.* Riverius *cent. 1. obs. 65. & lib. 15. Prax.* Rodericus à Castro, Mercatus, Zacutus, Montagnana, Platerus, Varandæus, Chesneau, alique plures, quos in unum recollegit clarissimus Vir Lucas Schrockius in *sua Historia moschi.*

Hinc ergo deducere erit, ex mente Hippocratis, non omnino expellendos esse odores ab usu medico in fœminis, cum hoc loco expresse præcipiantur; quin contra objurgandi sunt ii, qui indifferenter præfocatas mulieres, & penè exanimas vehementius extorquere, ac affligere adnituntur fœtidis, ac malè olentibus rebus, quæ planè benevalentibus, ac robustis adhuc infensæ forent. Et quamvis aliquando experiamur mox à partu enixas odoramentis graviter affici; id tamen iis evenit ex subita illa commotione, quam uterus ab ipsis tunc temporis patitur, nimium allectus, atque in seipso corrugatus, unde excrementorum repurgationi sibi obicem facit;

siquidem tunc illius papillæ, & hiantes cotyledones coacti, atque in suis porulis adstricti, nequeunt lochia, & impuritates à partu deponere, quæ detenta, & cum remeante sanguine commista, reliquum corporis inficiunt, unde postmodum animi defectiones, nervorum contractiones, sopores, deliria, febres, aliaque symptomata perniciosissima insequuntur.

Acuta igitur, & suaveolentia cerebro solum infensa sunt per nares olfacta, cum immoderata fuerint, quatenus nimirum nervos, & nervorum fibrillas plus justo exagitant, & laceffunt, & quandoque etiam stupefaciunt, & offundunt: qua sanè ratione plures quoque mares iisdem plurimum offenduntur, & cephalalgis, vertiginibus, motibus epilepticis, aliisque, haud rarò, velutebrii, vexari solent, ut non semel experti sumus. At contra uterus, cum præsertim vacuus fœtura est, ipsorum halitu vigoratur potius, benèque afficitur, ut propterea facta subindè quadam expansione, sui que amplificatione, facile hiet, adaperiatur, exultet, & quod in sui cavo superfluitatum hæsit, promptè admodum expellat: quamobrem pleræque mulieres in hunc finem, moschum, zibethum, aliaque odorata, sacculis inclusa, & coxis interius alligata, gestare consueverunt. Hinc proindè demirari subit, unde factum, ut ex Medicis in vulgus jam abierit, uterum odores percipere, quasi is olfactus capax foret, adeòque enorme piaculum nunc sit, in morbis muliebribus odorata quæcumque præscribere, cum tamen halitibus blandè admodum olentibus, seu particulis tenuioribus, & volatilibus in seipso exceptis, hærentes in glandulis noxios, crassosque succos, fibrarum,

rum, & glandularum coarctatione, aut laxitate uterusexprimat, ac deponat. Verùm in his cautio aliqua adhibenda, ut odorosi halitus nares, & cerebrum minimè pertingant, ne scilicet ingenti copia, & sulphurea, qua pollent, ac inebriativa conditione, illud aggravent, & obtundant, aut etiam vellicent, & discerpant, orgasmo in humoribus induto. Cæterùm benè olentia, etiam ex moscho, & ambaro, cum aliis commista, & in bolos, vel pilulas redacta, ac interiùs assumpta multum proficient, ad viscerum, potissimum cerebri, cordis, ac uteri robur, viresque adaugendas, quemadmodum plurimorum authorum testimonio latè nimis comprobat præ cæteris *in sua Historia Moschi* præcitatus D. Lucas Schrockius Medicus Augustanus, nunc Præses meritis Academicæ Curiosorum.

V. etiam
Gal. I. ad
Glauc. c.
14.

APHORISMUS LX.

Simulieri utero gerenti purgationes procedant, impossibile est fœtum esse sanum.

Consuetas sanguinis purgationes, quæ singulo quoque mense fœminis benè se habentibus salubriter accidunt, tempore graviditatis desinere in fœtus alendi, & fovendi gratiam, cunctis est notum, ut propterea inter cætera conceptionis, & gestationis uteri signa specialiora, illud potissimum recensatur, ut etiam docetur ab Hippocrate *hoc eodem lib. aphor. sequenti*. Quamobrem si utero gerenti purgationes procedant, jure optimo præfagire licet, impossibile esse genitum fœtum esse sanum. Ut autem id omni ex parte verum sit, necesse est, ut non semel, neque modicè, purga-

tiones istæ prodeant, sed iteratò, & affluenter; cùm aliàs fieri possit, ut ex modica, nec iterata menstruorum expurgatione, utero gerens potius relevetur, & melius se habeat, deposita nimirum aliqua sanguinis portione in suo cursu præpedita, uterum gravante, & infestante. Hinc non abs re adjectum *in aph.* sub plurali numero *purgationes*, quæ planè designant consuetam in menses singulos evacuationem, quemadmodum idem Auctor expressius edocet *lib. I. de morbis muliebr.* cùm cæteroqui *lib. de natura pueri*, scriptum reliquerit, nil penitus graviditatem incommodare, si uno, vel altero tantum mense modicum sanguinis profundatur. In hoc autem speciatim considerata erunt, utero gerentis habitudo, ætas, regio, consuetudo, victus ratio, quæ præcessit, atque alia universa, quæ graviditati obesse, vel prodesse possunt: siquidem plethoricæ, robustæ, juvenes, otiosæ, benè altæ, & abundantem menstruorum evacuationem sortitæ, nullum planè patientur ab ejusmodi per primos graviditatis menses purgatione superabundantis sanguinis incommodum; contra verò exiles, imbecillæ, exercitæ, & pravis eduliis nutritæ, & non nisi tenuem sanguinem expurgare solitæ. Sunt etiam, quæ nihilum in consuetis menstruorum expurgationibus perturbantur, sed potius seipsis leviores, hilariioresque fiunt; contra aliæ nedum utero dolent, & cruciantur, sed & viribus, & stomacho deficiunt, ut penè langueant, & molestiis innumeris affectæ vix non ægrotent. His ergo potissimum si accadat à graviditate catamenia pati, fieri nequit, ut fœtum gestent sanum, quippè qui non benè valens, viribus, & nutri-

catio-

catione deficit, vel in posterum ægrotabit, & abortietur.

Sed præterea perpendere oportebit, unde sanguis immodicè, inconvenienterque profusus prodeat, an non ex uterico cavo, an potius ex vasis uterum circumperreptantibus, aut etiam ab his, quæ hæmorrhoidas uteri concitare solent: etenim Anatome compertum est, tria hæc vasorum genera uterum pertingere, & sanguinem profundere solere. Et quidem in utero gerentibus sæpè sæpius ex iis, quæ cervicem ambiunt, sanguis sponte sua, ac salubriter prodire consuevit, neque solum primis mensibus, sed etiam ultimis, immò per periodos toto ferè gestationis tempore, ut historiis proditum, & à nobis non semel observatum. Igitur ex vasis solum, quæ uterico cavum pertingunt, sanguis si effundatur, valetudinarium foetum, imbecillum, ægrotantem, & facillimè abortiturum indicabit: de qua planè purgatione intelligendus hic Hippocrates, si tamen, ut dictum, ubertim, & iteratò profluat; cum cæteroqui levis, & modica quæcumque evacuatio non tanti sit, ut uteri gestationem incommodare, & foetum labefactare valeat, præsertim in plethoricis, in quibus etiam si ex internis uteri partibus sanguis prodeat, à conceptu, ejusque placenta sejunctis, nihilum planè officere, consuevit, modò non repetat; cum aliunde effluat, quàm ex vasis foetus nutritui, & vitæ dicitis: Siquidem non tam ejus exitu, atque alimenti defectu, infans à fluentibus purgationibus periclitatur, quàm orgasmo, & commotione sanguinis, uterum in ejus eruptione concitantis, & relaxantis, unde postmodum illius imbecillitas, dissolutio, & abortus.

Tozzi Op. Med: Tomo IV.

Hinc modò tacitè admonentur Medici, quomodò in ejusmodi expurgationibus, sive sinendis, sive cohibendis gerere se debeant, attendita nimirum sanguinis excreti quantitate, qualitate, tempore, & loco, ac potissimum utero gerentis habitudine, & constitutione.

APHORISMUS LXI.

Si mulieri cessent purgationes, neque febris, neque rigore superveniente, & fastidia cibi incidant, iudica ipsam in utero habere.

Sicuti à fluentibus menstruis tempore gestationis procreatum fetum imbecillum dixit, sic nunc ex adverso ab iisdem retentis, citrà manifestam ægritudinem, conceptionem jam factam, atque uteri gestationem præsentem pronunciat. Et sicut menstruæ purgationes, si utero gerentibus superveniunt, sæpè numero minantur abortum, utpotè, quæ foetum debilem, nec benè valentem præfagierint, ita vacuis, minimèque gravidis, si cessent, postquam per lunares periodicationes ritè, convenienterque antea fluxerint, conceptionem jam sequutam portendunt; quamobrem inter signa specialiora graviditatis id præcipuum communiter recenseatur. At verò ne Medici in hoc judicio fallantur, advertit hic Hippocrates ejusmodi desitionibus menstruorum, neque febrim, neque rigorem supervenire debere, sed potius ciborum fastidia, ut certior conjectura uteri gestationis depromatur.

Et quidem humanis fœminis inditum à Natura est, ut in singulos menses à secundo annorum vitæ septenario per uterum sanguinis purgationes subeant, quibus

I is con-

is convenienter irroratus (non secus ac fecunda tellus ab ingruentibus imbribus) statuto quodam tempore fecundus, & fertilis evadat, indeque foetum concipiat, ac edat. Et quamvis nonnullæ referantur etiam sine ullo menstruorum indicio concepisse, & salubriter quoque suo tempore peperisse, id tamen perrarum planè est, & insuetum, atque humanæ conditioni valde dissentaneum, quod non nisi quibusdam brutorum generibus solummodò permissum est. Itaque ut humanæ fœminæ concipere, & utero gerere possint, menstruas purgationes subire debent, quæ cum sponte sua desierint, nulla præexistente morbosa causa, nullaque ægritudine divexante, graviditatis instantis, vel præsentis indicia sunt. Et quamvis pleræque omnes ferè ægritudines, eæque potissimum, quæ sanguinis vitium, & partium imventris, ciborum confectioni, & chyli distributioni dicatarum læsiones consequuntur, conceptioni, & generationi impedimento esse possint; speciatim tamen quæ uterum in sua structura, & ductibus afficiunt, illas perturbare consueverunt, ut cunctis notum. Fluentibus autem mensibus per suas statas, determinatasque periodos, fieri nequit, quin cætera quoque ad conceptionem, generationemque destinata, benè, salubriterque se habeant, ut uteri gestatio naturaliter contingat; quamobrem non immeritò solius febris, & rigoris hic dumtaxat meminit, quamvis alia quoque accidentia retentorum menstruorum retulerit i. *de morbis*. Accidit autem febris à retentis, suppressisque mensstruis (citrà graviditatis suspicionem) quia irruens per arterias sanguis in uteri glandulas, sive

Experi-
mento
Harv.
exer. 64.
constat
arterias
uterinas
multo

cotyledones, cum non æquè à venis planè minoribus, & angustioribus subinde excipitur, fit, ut data mora fermentescat, nec per fermentum uterinum, qua decet energia, subigatur, ut ad apertis osculis foras amandetur, unde remeans per venas uterum externè ambientes, universum sanguinem, totumque corpus inficiat, & febrim excitet, quæ eousque perdurabit, quousque sanguis universus indebita partium alienigenarum mixtura exutus, & à prædicta commotione liber redditus evaserit. Quòd si præterea lymphicis, crudisque impuritatibus onustus, atque ab obstruente glutine, viscosoque succo, plerumque acido-pontico depravatus itidem prodierit, & per reliquum corporis recurrerit, planè cunctæ aliæ ejusdem glandulæ, itemque glandulola viscera contaminabuntur, unde postmodum malæ nutritiones, cachexiæ, atrophie, chlorosis & febris, veluti è genere hecticarum, exorientur, si potissimum his consentiant vitia, quæ ab ovariis turgentibus, & malè affectis prodire solent, de quibus non est, ut hic edisseramus. Rigor verò, vel ut aliis placet, horror, accidit à concussione, irritationeque sensilium uteri partium ab indebita illa fermentatione laceffitarum, ut etiam ab excursu irregulari sanguinis, & lymphæ sursum in reliquas corporis partes perreptantis; quin etiam lumbi, quibus ligamenta uteri lata, & posteriora, alligantur, non dissimiliter percelluntur, & non rarò etiam dolent, ut & scapulæ, dorsum, pectus, mammae, sicuti experimentis notum. Sed & ab uno utero malè affecto cætera viscera naturalia pariformiter coafficiuntur, & in suis operationibus non leviter sæpè sapius gravium vitæ incommodo colladuntur.

numerosiores esse, quam venas, cum advehendi quàm revehendi major sit usus; unde sanguis menstruus fluit ex osculis arteriolarum, à turgentia sanguinis dehiscentibus.

Itaque

Itaque cū mulieri cessant menstrua purgationes, nec subinde febris, aut horror supervenit, ut ex his occulta saltem causa morboſa, vel ægritudo aliqua, ob quam illæ defierint, conjectari poſſit, atque ex alio capite ciborum fastidia ſuperaccidant, proculdubio de uteri foetatione, atque adeo de conceptu præſente, vel inſtante, judicandum erit. Ceſſare autem, ſeu penitus deſinere illas oportet, veluti in alium uſum deſtinatas; nam ſi per aliquod tempus detineantur, mox verò redeant, haudquaquam deſiſſe, & ceſſaſſe dicendæ erunt, idque ſive eodem, ſive ſubſequenti menſe: Fieri enim poſteſt, ut ex aliqua externa cauſa, potiſſimum verò ab animi pathematibus, timore, atque mœſtitia, repente affecta mulier iſtiusmodi ſuppreſſionem patiatur, ut de Phaetusa, & Namyſia meminit Hippocrates *6. epidem. ſect. ult.* Superveniunt prætereà gravidis ciborum fastidia, ob conſenſum uteri cum ventriculo, qui propterea vel cibos conſuetos naſceat, vel penitus inſuetos appetit, unde morbus ille Malacia, & Pica, dictus.

At verò quo pacto utero gerentēs à vacuis internoscendæ ſint, commemorare hic haud inutile erit, ne ſcilicet hac in re, quæ plerumque magni negotii eſſe ſolet, Medici fallantur. Et quamvis pleraque fallacia ſint, ac peritos in Arte non raro etiam decipiant, probabiliora tamen eſſe conſueverunt, quæ mox referuntur. Primum autem ex his, quæ ſenſim utero gerentibus accidunt, atque citrà quamcumq; cauſam manifeſtam ſuperveniunt, eſſe ſolet, ut cibos quosdam conſuetos fastidiant, & naſceant, vel etiam evomant, alios verò inſuetos, &

malos avide appetant, & comedant; id quod ſub nomine Malaciæ, ſeu Citiæ, morboſæ nimirum famiſ, appellatur, & aliquando toto tempore geſtationis, aliquando verò ad primos tres, vel quatuor menſes durare ſolet. Mamme etiam plerumque ipſis obdureſcunt, exuberant, atque impenſè dolent, etiam ſi leviter contrectentur, illarumque papillarum color è purpureo in ſuſcum mutatur: pectoris venæ ampliores redditæ nigricant: cervix calidior obſervatur, nec non colli venæ, arteriæque attolluntur, ac turgent; ſed & aliquibus maculæ ruſæ, veluti lentigenes, in facie apparent, quinimmo vultus ipſe paululum à ſua ſpecioſitate demittitur, conniventibus non nihil oculorum palpebris, cum albugine eorundem permutata, præter capitis graviditatem, aut hebetudinem, totiusque corporis gravamen, pulſum celeritatem, atque frequentiam, cū ex doctrina Galeni graviditas, temporanea quædam ægritudo appelleſtur. Quòd ſi poſtremo menſtrua purgationes penitus detineantur citrà manifeſtam, ſenſibilemque egrimoniam, atque ſubinde illa tumeant, venter ſenſim, ſenſimque attollatur, ac rotundetur cum naturali mollitie, haudquaquam de graviditate vereri amplius licebit.

Quibus igitur à retentis conſuetis menſtruationibus in ſceminis ſalubriter degentibus, hæc ſigna accidunt; planè de uteri geſtatione veriſimiliter judicare fas erit; at verò ſi poſtea menſes prodeant, ſuumque curſum ad multum tempus ſervent, impoſſibile ait Hippocrates foetum in utero genitum ſanum eſſe. Et quidem fieri nequit, ut foetus ſanus ſit, cui uteri os internum hiat, & vaſa ſanguifera,

cum placenta ipsa laxantur, & sanguinem fundunt: constat enim ex Anatome, Placentam uterinam, ita tenaciter utero hæere, ut universum sanguinem per vasa umbilicalia in vitam, & nutritionem foetus transferat: cum ergo sanguis ex his funditur, proculdubio ipsum laxari, aut etiam discindi necesse est, quod sine ejusdem interitu fieri nequit. Necesse est autem, ut sanguis affluenter, atque ad multum tempus prodeat; quamobrem si modicè tantum, & non diutius effluat, citrà periculum detineri foetus poterit. Sed & ab internis uteri venis cavum ipsius pertinentibus profluere sanguis debet, nam si fortassè (ut non rarò in praxi expertum) è collo uteri, atque ex venis, vel arteriis ejusdem externis emittatur, citrà ullum incommodum gestationis, immò & utiliter prodibit, quemadmodum etiam à Galeno, cæterisque vetustioribus Medicis est animadvertum, utpotè ex venis, quas crurales appellant, quæ non rarò in quibusdam succiplenis mulieribus, ac sedentariam vitam ducentibus, varicosæ etiam fieri solent.

Cæterum intelligendus aphorismus de his, quæ menstruas purgationes, juxtà consuetam Naturæ legem, in singulos menses subeunt; nam sicut in plerisque brutis animalibus illæ nullæ sunt, ita in nonnullis humanis feminis accidisse memoratur, quòd nunquam menstruas evacuationes passæ, nihilominus conceperint, & sanos, vegetosque pepererint filios; quamvis id per rarum.

APHORISMUS LXII.

Quaecumque frigidos, & spissos uteros habent, non concipiunt. Et quaecumque præhumidos uteros habent, non concipiunt: extinguunt enim in his genitura. Et quaecumque siccos multum, & præcalidos: nam ex defectu alimenticorruptur semen. Quaecumque verò ex utrisque mediocrem habent temperaturam, eæ fecunda sunt.

QUoniam uterus, locus continendo foetui destinatus, plurimum confert ad illius conceptionem, & si benè, vel malè conformatus est, illam vel promovet, & adjuvat, vel contra impedit, & extinguit; propterea hic Hippocrates considerans ejusdem aptitudinem, & ineptitudinem, inquit, frigidos, & spissos uteros habentes non concipere, ut & neque præhumidos, & laxos, aut siccos, & adurentes; benè verò fortitas moderatos, & medios inter utrosque.

Et quidem frigidos ineptos esse generationi palam est, cum vita in animantibus potius calore, seu vi, & spiritu quodam calorifico fermentante, inferatur, & conservetur cordis motus; à frigore verò, & frigoricis, vel nullus fit, vel factus torpet, & emoritur; unde dicebat Aristoteles 2. de gener. animal. c. 3. *inest in semine omnium, quod facit, ut fecunda sint semina, videlicet, quod calor vocatur, idq; non ignis, non talis facultas aliqua est, sed spiritus.* Spissos verò, ac densos intelligere oportet, non tantum quos plerique in suis ductibus impervios, ac impermeabiles interpretantur, quique scilicet genituram

ram tum masculinam, tum femininam admittere nequeant, sed præterea, qui in suis porositatibus, glandulis, ac textura, patentes, molles, atque expansioni, amplificationique faciles non sunt; siquidem non solum per arterias, ac venas, sed multo magis per tubas, Falloppianas dictas, per cotyledones, glandulasque, & per hiantes porulos, convenientemque texturam foeminarum uteri ad conceptionem conferunt. Nuperis namque observationibus Anatomicorum, ad peragendam conceptionem, debent primum ova ex ovariiis abrupta, atque foecundo maris semine fetata per alterutram tubarum in cavum uteri deponi, ibique per molles, sed turgentes ejusdem glandulas alligari, ut ope Placentæ uterinæ foetus intra propria involucria, seu secundinas, efformatus, alimentum, & incrementum suscipere possit. Quare nisi hæc omnia in utero convenienter adaptata, ac disposita pateant, conceptio, & efformatio proculdubio nulla fiet. Itaque cum uterus spissus, ac densus est, ut mollem, & patulam in suis vasculis texturam, facilemque adhærescentiam non habeat, nullatenus conceptioni promovendæ aptus erit. Sic pariter siccos, exsuccos, & multo magis adurentes uteros habentes, idem infortunium sortiuntur, cum ab ariditate, ingentique calore, longè majora, & graviora incommoda suboriantur, præter ea, quæ de defectu alimenti, & seminis corruptione hic ab Hippocrate memorantur, ut liquet.

Oppositis verò de causis, quibus uteri præhumidi sunt, & mucositatibus oppleti, infœcundæ fiunt; etenim non solum in his (ut notat Hippocrates) genitura extinguitur, verum etiam ova, aut utero non coalescunt, aut mollia, & flaccida dis-

solvantur, aut etiam multo humore obruta suffocantur, aut interno uteri cavo non adhærescentia, exoluta diffluunt, & evacuantur; unde frequens in istiusmodi foeminis à primo conceptu defluxus. Accedit, quod semen ipsum virile ab ejusmodi præhumidis impuritatibus oppressum, adeò retunditur, & hebetatur, ut inefficax deinde redditum, non solum ovum foecundare non valet, sed simul cum eo dilutum effluit, & foras educitur. Hinc in universum conceptum vel adimunt, vel recusant, uteri imbecilles, frigidi, extenuati, adiposi, præhumidi, distorti, occlusi, angusti, laxi, torpidi, insensiles, plorantes, nimiumque aridi, præfervidi, ex succi, semperque patuli, aut facile dehiscetes.

Mediæ igitur, & moderatæ constitutionis uteri esse debent, ut conceptui promovendo, itemque sustinendo, fovendo, & alendo, ad maturitatem usque habiles sint, benèque valentes. Quare quæ ejusmodi beneficium sortitæ sunt, & mediocrem in omnibus constitutionem, temperaturamque adeptæ, hæc foecundæ sunt, idest foecundari aptæ, concurrentibus simul unà cæteris aliis ad conceptionem requisitis, jam antea memoratis. Cæterum notas uteri benè, vel malè affecti, exactè præ cæteris investigat peculiari quodam opusculo Marcus Antonius Ulmus; Et quidem frigidi, inquit, esse pubem raram, menstrua tarda, ingrati Venerem, difficilem conceptionem, uterum parvum, pudendum molle, frigidum, & exile, lac modicum, & facile coagulabile: calidi verò ex adverso.

APHORISMUS LXIII.

*Similiter autem & in maribus .
Aut enim propter corporis rari-
tatem spiritus extra fertur, ita
ut semen non transmittat ad os,
vel propter spissitudinem humor
non exit foras, vel propter frigi-
ditatem non concalescit, itaque
in eo loco concrevit, vel propter
caliditatem hoc idem accidit.*

SIve hic Aphorismus inter genui-
nos Hippocratis referri debeat,
sive inter spurios, non multum hic
intererit disceptare; nam licet in eo
memorata Hippocraticam doctri-
nam sapere non videantur, utile ta-
men quid continent, & saltem Me-
dicos admonent, solere nonnun-
quam sterilitates non à foeminis, sed
à maribus provenire: & quidem non
fatis est ad conceptionem, forma-
tionemque foetus peragendam, ute-
rum in foeminis aptè dispositum, be-
nèque esse conformatum, juxta ea,
quæ præcedenti aphorismo explana-
ta sunt, sed prætereà necesse esse, ut
semen, quod à maribus suggeritur,
prolificum, foecundumque sit, va-
leatque foemineum ovum, & rudi-
menta foetus in eo prædisposita in
motum deducere, atque ad nutri-
catum, debitumque incrementum
suscipiendum habilitare, ut inde vi-
talis foetus exorians, cunctas ope-
rationes exercere, ac tandem in lu-
cem prodire queat. Quamobrem
sana ratione, quicumque is fuerit,
qui sententiam hanc aphorismis in-
terferendam existimavit, Marium
vim, facultatemque considerans,
similiter in generatione deficientem
esse posse adicere voluit, illamque
in sterilitate considerandam pari ra-
tione, ac de foeminis dictum est, &

præsertim vitio seminis, quod, vel
ob defectum spirituum, foecundum,
& prolificum non est, vel ob crassi-
tiem, & spissitudinem ejaculari ne-
quit in uterum, vel quia ob frigidi-
tatem inconcoctum, dilutumq; est,
vel denique quia ob caliditatem fa-
cilè extenuatur, & evanescit: quip-
pè semen, ut foecundare, ac gene-
rare valeat, debet esse spumofum, ac
spiritibus redundans; tenax, & con-
sistens, ut hæreat; non verò crassum,
spissum, ac durum, ut torpeat, &
lapidescat; neque frigidum, ut cru-
dum, dilutumque sit; neque adeò
calidum, & acre, ut exolvatur in au-
ras, & uterum vellicet potius, quàm
alliciat. Attulit autem hic Auctor
has speciaticim seminis conditiones,
veluti magis proprias, magisque ad
generationem promovendam requi-
sitas, omittens alias has consequen-
tes, vel ad istas facilè reducibiles, eo
potissimum ductus argumento, quo
cunctis notum, semen virile, ut gene-
rationem promoveat, debere omni-
nò in uterum primò ejaculari, deinde
retineri, mox diffundi, ac tandem
foecundare: quæ planè conditiones in
adjecto aphorismo comprehendun-
tur, ut consideranti patet. Cætera,
quæ ad pudenda pertinent, sive eja-
culantia, sive præparantia, & perfi-
cientia, sive conservantia semen, ve-
luti instrumenta eidem gignendo,
vel immittendo prærequisita, tacitè
sub illis comprehenduntur, ut pro-
pterea ad conficiendum semen præ-
dictis conditionibus præditum, faci-
lè quis præsupposita credat.

Quamvis autem Lucretius *lib. 4.
de Natura rerum* dicat dissentanea
cæteroqui semina, posse tamen con-
sentanea fieri, atque adeò generatio-
ni idonea, & peropportuna, si nimi-
rùm, quod in semine foemineo frigi-
dum, torpidumque est, à masculo
inca-

incalescat, & vigoretur, cum sæpe-
sæpius visum sit, steriles creditas,
fecundas ex aliorum concubitu eva-
sisse, atque vitaliter peperisse; si o-
vum nihilominus, quod ab ipsis sug-
geritur, aptè temperatum, & in ru-
dimentis foetus ritè, rectèque præ-
dispositum non sit, proculdubio à
virili semine, cujuscumque condi-
tionis illud sit, fecundari non po-
terit, ac propterea frigus illius nul-
la ratione ab alterius calore foveri, &
vigorari; vel contra acritas, & fer-
vor opposita virtute temperari; si-
quidem facilitas, vel difficultas u-
triusque in conceptione neutiquam
dependet à seminum tenuitate, vel
crassitie, aliave qualitate, sed ab
aptitudine, vel ineptitudine par-
tium in eisdem conformatarum, at-
que ab invicem agentium, & subi-
gentium promptitudine, habilita-
teque. Qua propemodum ratione
fit, quamobrem aliquorum anima-
lium semina mutuo inter sese commi-
ssa concipiant, & generent, alio-
rum verò minimè: quod & in plan-
tarum insitione, atque in vegetabi-
lium omnium seminum satione simi-
liter experimur; ubi scilicet plantæ
ipsæ inter sese, vel earundem semi-
na, cum tellure consentiant, vel dis-
sentiant, uti apud Phytologicos est
legere.

APHORISMUS LXIV.

*Lac dare caput dolentibus, malum:
malum verò & febricitantibus,
& quibus hypochondria suspensa
murmurant, & siticulosi: ma-
lum autem, & quibus in feбри-
bus acutis biliosæ sunt dejection-
es, & quibus sanguinis multi
dejectio facta est. Convenit au-
tem tabidis dare, qui non valde
multum febricitant, & in fe-*

*bribus longis, & parvis, si
nullum ex supradietis signis af-
fuerit, & præter rationem con-
sumptis.*

L Actis usum considerans in hoc
Aphorismo Hippocrates ea po-
tissimum commemorat, quæ ab illo
abstinendum suadent, ne scilicet pro
beneficio, quod subindè ab eodem
speratur, grave damnum corpori ac-
cidat, & majora mala assumentibus
inducat: quippe ejus est lac condi-
tionis, ut quemadmodum salubre
admodum est, & conducibile satis
iis, qui benè stomacho valent, nullif-
que pravis humoribus sunt referti;
ita ex adverso maleficientissimum e-
vadit, quibus malus inest corporis
apparatus, & stomachus in alibilem
succum commutando non est ido-
neus. Sic planè experimur in lacten-
tibus puellis, salubritati, nutritio-
ni, ac augmento ipsorum facilè con-
ferre, si ventriculus omninò repur-
gatus inveniatur; at contrà penitus
officere, iminò corrumpi, aut ac-
scere, & mille alia propemodum ma-
la deinde afferre, si is alienis, aut
degeneribus succis infarctus sit, cum
cibis potissimum heterogeneis vesci
ceperint; unde postmodum, tormina
ventris, dolores, febres, alvi flu-
xus, vomitus, lumbrici, motus epi-
leptici, idque genus alia iisdem su-
peraccidunt.

Quoniam verò frequentissimus a-
pud Veteres erat lactis usus, consue-
tusque innumeris propemodum ægri-
tudinibus adhiberi, ut ex eodem
Hippocrate deducitur, ne proinde
damna ex temeraria, atque impor-
tuna ejusdem exhibitione imminen-
tia provenirent, admonet hic, qui-
bus in corporibus evitari debeat, &
specialius recenset capite dolentes,
febricitantes, hypochondriis affe-
ctos,

ctos, crudos, flatuosos, fiticulosos, & larga hæmorrhagia divexatos. Commendat verò tabidis, neque multum febricitantibus, sed potissimum in febribus diuturnis, & parvis, minimè verò acutis, & vehementibus, & denique iis omnibus, qui præter rationem consumpti, & extenuati facti sunt.

At statim quis hic addubitabit, quomodo fieri possit, ut lac innocuæ propemodum, temperatæque naturæ, blandæ, & suavis conditionis, atque in alimentum primum cunctis animantibus concessum, facilis digestionis, & prompti, consentaneique alimenti, tam malum, & omnino nocuum his omnibus evadat, qui cæteroqui istiusmodi cibis indigent, ut citò reficiantur, humectentur, temperentur, citrà ullam ventriculi validam actionem, passionemque; præsertim quia ipsemet Hippocrates 1. *aphor.* 16. edocuit febricitantibus omnibus cibum humidum convenire, qualis profectò lac est. Insuper quamvis lactis natura, materia, & generationis modus nondum satis perspecta sint, cum Veteribus sit creditum à sanguine; aliis cum Prospero Martiano ex chylo; Vvarthono, aliisque ex commistione chyli cum liquore nervorum illuc corrivantium; & Hieronymo Barbato ex sanguinis sero proficisci; undecumque tamen illud oriatur, nil videtur mali quidpiam in se continere, quod istis in aphorismo memoratis nocere possit, cum conducibilis semper sit alimentum præparatum, concoctum, benèque dispositum, quale lac est, quam impræparatum, & indigestum. Analysi prætereà lactis instituta, cunctis patet, in tres partes dissolutum illud abire, nimirum in serosam, butyrosam, & caseosam, quarum quæ-

libet summo cunctis commodo esse solet; sed & febrientibus ipsis serosa humectando, ac temperando, butyrosa impinguando, & caseosa nutriendo, plurimum conferre potest, quibus planè tria hæc necessaria videntur; quin & diarrhœas, dysenterias, aliasque similes morbosas dejectiones in epidemiis curare pluries satagit idem Hippocrates lactis beneficio, & quod majus 2. *epidem. sect.* 5. ad aurium dolores, lacte utendum inquit; & *lib. de internis affectionibus* ad plures alias ægritudines adhibet, ut cætera hic omittam, quæ à plerisque aliis experimenta referuntur, lactis ope utiliter, & salubriter diversis in ægritudinibus observata, ut propterea nil mirum, si illud Veteribus tantoperè fuerit in usu, quemadmodum ex eodem Hippocrate pluribus in locis colligere est. Quin immò solo lacte plurimò totam vitam sustinuisse scribunt Athenæus, & Plutarchus, ac de Massasi-
liis Africæ populis meminit Strabo; unde Ovidius 4. *Fastor.*

Lib. 2. 40.
Sympos.
Lib. 17.

Lacte mero Veteres usi narrantur, & herbis.

Galenus etiam Rusticum quendam memorat, qui plusquam centum annos vixerat, lacte usus. Fuere & alii, Getæ, Scythæ, Nomades, ob id Galactophagi dicti, ut & nunc Belgæ, Helvetii, Septentrionalesque populi, qui in deliciis illud habent, & cum omnibus ferè cibariis commiscent.

Verum per hoc idem, quod lac temperatæ naturæ est, atque primum Animantium alimentum, facile subigibile, & alterabile, magna est cum præmeditatione exhibendum, & nonnisi iis, quibus metus omnis abest, ne ace scat, corrumpatur, atque in deleteriam naturam habeat, juxta vulgatum illud philosopho-

sophorum, *corruptio optimi pessima evadit*; quocirca scitè admodum scripsit Hippocrates *lib. de alimento*, sanis corporibus alimentum fieri, at verò morbosis ex adverso venenum evadere. Atque hinc animantibus omnibus in prima ætate pro alimento à Natura concessum, quoniam per id temporis mandendo inhabilibus, ventriculi fermentum lenè admodum est, & temperatum, duriorisque texturæ cibos dissolvere potens non est, & ubi primum, editis dentibus, illos conterere valent, lacte destituuntur: quæ verò animalia statim, ac in lucem edita, hos capere, & conficere possunt, lactificatione privantur. Neque alia de causa infantes, & nuper editi, cruditatibus, ac vermibus obnoxii fiunt, ad eoque ventris torminibus, dejectionibus, ac motibus epilepticis afficiuntur, cum nondum ab uberibus depulsi alterius conditionis alimenta assumere incipiunt, nisi quia ex mala eorundem cum lacte miscela, utrumque corrumpitur, & acescit, ut ex praxi ipsa satis clarè patet. Hippocrates autem cibum humidum, seu liquidum febricitantibus commendavit, sed neutiquam tam facile corruptibilem, atque in pravos humores transmutabilem, qualis lac est, sed potius, qui febrili causæ, atque indebitæ ejusdem fermentationi convenienter adversetur. Auribus verò dolentibus lac extrinsecus admotum, aut inditum, non verò assumptum is commendavit, quem admodum Galenus ipse utendum admonet *3. de compos. medicam. secund. loca*. Atqui coctum lac pluries exhibitum invenitur, non crudum, apud Veteres, nisi solum ad alvum subducendam, & in iis, qui febre caruissent: lac etenim decoctum, utpotè suo sero orbatum, vim

quamdam adstrictoriam adipiscitur, unde fluenti alvo plurimum opitulatur. Qui verò lacte à prima ætate pasti sunt, ac pro cibo usi, ex consuetudine contracta nullum planè incommodum perceperunt: & ò utinam lac solummodò in cibum sumere cuncti homines contenti forent, profectò non tam facilè tot, tantisque egritudinibus, à multitudine, & varietate ciborum, laborarent; quamquam Galenus *cap. 5. de san. tuend. c. 7.* quosdam alios memoret, agricolam illum sub spe longævitatatis prorogandæ imitatos, ab usu ejusdem graviter affectos. Cæterum etsi lac ex chylo, aut sanguine oriatur, longè tamen ab illis differentem sortitur conditionem, ut ex inita eorundem analysi satis notum; præterquam quòd ab his, quæ intra corpus fiunt, ad ea, quæ foris accidunt, aut peragi possunt, non valet illatio, mutatis, variatisque subinde componentibus, aut concomitantibus corporis cujuscumque compagem: id quod perspicuum in lacte est, nam è mammis elicatum, atque aeri expositum, statim alkalinum spiritum amittit, cæterarum lactis partium moderatorum, ut in sanguine educto quoque accidit.

Hinc modò facilè deducitur, quare capite dolentibus nocuum lac esse dicatur, quoniam cum dolor plerumque fiat ab acri, acido, pungenti, vellicanteque humore, qui sæpè sæpius è ventriculo, cæterisque naturalibus visceribus malè affectis dependet, is proculdubio usu lactis augeretur potius, quam retunderetur. Lac insuper sua natura fumosum, vaporibus caput, & cerebrum plus justo replet, immò & sopore aggravat, ac inebriat, unde rectè Lucretius illud vino comparans *1. de Naturarum rerum*, ait:

Hinc

Latitat
etiam in
lacte,
quidpiā
acidi.

..... Hinc nova proles

*Ludit, lacte mero mentes percus-
sa novellas.*

Quamobrem ex mora, contractio ibidem acore, graviora proculdubio damna inferet. Neque distinguere hic licebit, num caput idiopathicè, vel sympathicè doleat; nam cum indifferenter ab Hippocrate scriptum sit, *caput dolentibus*, planè de utrisque intelligendum erit, cum in utrisque causa dolorem excitans æquè foveatur, & increbrescat, ab acore scilicet in humoribus excitato; unde Galenus 3. *de aliment. facult. cap. de lacte*, sumptuos lac, dixit, indiscriminatim oportere capite præstare, ac præpotentes esse, nulla facta eorundem distinctione. Haud tamen inficias iverim, longè magis lædi eos, qui idiopathicè capite dolent, quàm qui sympathicè, quoniam illis, præter dolorem, caput imbecille esse solet, & malarum impressionum promptius susceptivum. Etsi prætereà de capite dolentibus specialiter meminerit, non tamen aliis ægritudinibus capitis affectos exclusit; unde delirantes, lethargicos, epilepticos, vertiginosos, adhuc vigiles, eandem ob causam hoc loco comprehensos, sub capite dolentibus, intelligere oportebit; siquidem his quoque contingit nimis vaporibus caput gravari, & offendi, atque humorum acritudine compungi, & vellicari. Porro licet lac universum, & secundum omnes sui partes acorem contrahat, & ejusmodi mala inferat, magis tamen per butyrosam, & caseosam nocet, quoniam ex his concrefcit, atque partibus hæret, aut in deleterios humores corruptum abit. Quamobrem, quod serosum magis est, quale Asininum, ab Auctoribus, ubi in ægris convenit, commendatur,

ad eluendum, scilicet, detergendum, & laxandum, nitrosa, qua pollet, conditione.

Obeffe quoque lac dicitur febricitantibus, & quidem iis, qui humoralibus, & putridis, ut vocant, febribus corripuntur, cum infra dicat, illud convenire tabidis, & non multum febrientibus, quales hectici, & marasmo affecti, ex longis, diuturnisque pusillis febribus. In illis etenim tum ob febrilem indebitam, excedentemque fermentationem, tum ob sanguinis vitiosam diathesim, qua digestivum stomachi fermentum pari vitio affectum est, tum ob excrementorum, pravorumque humorum apparatus, coctiones, secretionesque nullæ, vel malæ fiunt, idcirco promptè admodum lac in nidorem, aut acorem vertitur, adeoque corruptum, ac in alienam naturam degeneratum, præter febris, & febrilis causæ augmentum, mille alia symptomata parere potest, vomitus, cardialgias, singultus, diarrhœas, dysenterias, intestinorum tormina, aliaque febrientibus perniciosissima.

Malum prætereà dicitur lac iis, quibus *hypochondria suspensa murmurant*: Nomine autem hypochondriorum intelligenda sunt viscera omnia in imo ventre utrimque posita, jecur, cystis, lien, pancreas, pylorus, ventriculus, uterus, intestina; ab his enim malè affectis, tumidis, elatis, tensis, duris, obstructis, aut inflammatis, planè constat lac assumptum facile vitiari, & vel acescere, & coagulari, vel corrumpi, & putrefieri, unde postmodum mala innumerabilia: Signanter autem hic meminit eorundem *suspensorum, & murmurantium*, quoniam hæc duo solent esse specialiora malè affectorum hypochondrio.

driorum symptomata, de quibus latè ex Diocle Galenus 3. *de locis affect. cap. 7.* & ante ipsos Hippocrates *lib. 2. de morbis*; & alibi.

Siticulosus pariter lac obesse solet, sed non quibus sitis ex humidi absorptione orta creditur, nam his, ut infrà constabit, suapte natura convenit, & confert; sed quibus vel à febre, vel à corruptis cibis, pravisque succis in ventriculo congestis, saliva crassiori, aut falsa reddita, cæterisque similibus, frequens, ac diuturna sitis infensa est; hi etenim revera vocantur siticulosi, siti equidem morbofa, & molesta, quæ nec largis potationibus, nec frigefacientibus, & humectantibus remediis infringitur, aut sedatur, nisi causa illam efficiens, ac fovens, penitus fuerit prius abolita.

Neque quis putet supervacaneè adjectum, etiam siticulosus, lac esse nocuum, quod fortassè poterat implicitè sub febrientibus contineri: nam adhuc sine febre, molestissima sitis non rarò urget, ut in Hydropicis, & Scorbuticis. Picrocholis item, & biliosis, sicuti Hippocrates ipse *lib. de ratione victus in acutis* dulcia omnia inimica esse dixit, & sitim movere, ita quoque lac interdictum credere est, quod facilè in his amarescat, & acrem, felleamque induat conditionem; quare his sitim potius augeat, quàm minuit.

Eadem de causa obesse dicitur his, qui febrientes biliosas patiuntur dejectiones: Adjunxit autem febribus acutis biliosas dejectiones; non quòd febrientibus acutè conveniat, quibus malum jam antea dixerat; sed quòd magis noceat, si biliosæ dejectiones cum illis conjungantur. Verùm biliosas hinc dejectiones intelligere erit, non quæ solo croceo colore tales videntur, quales in lacten-

tibus, sed quæ re ipsa acres, & acidomuriaticæ sunt, ventriculi, & intestinorum labem attestantes; quibus verò ob peculiarem ciborum, aut medicamentorum qualitatem flaventes dejectiones accidunt, ut ex malis persicis, peponibus, croco, rhabarbaro, cæterisque passim experimur, veletiam ex speciali quadam ventrium constitutione, à Natura inditum, fæces croceas, aut aliter coloratas egerere, lactis usus obesse non poterit, si cætera non dissentiant, & stomachus benè se habeat. At verò vomitus qualiscumque ille sit, lactis usum prohibet, & languente præsertim ventriculo.

Nedum autem, cum biliosæ instant dejectiones, lac dare malum; sed etiam ubi multi sanguinis dejectio facta est: siquidem à sanguinis immodica evacuatione, non solum languent vires, & digestivum stomachi fermentum hebescit, unde facilè lac acescere potest; sed multo magis illud acidum, depravatumque indicatur, veluti à sanguine vitiatum, malèque affecto proveniens, qui planè talis erit, si hæmorrhagiam intestinalem excitat, de qua proculdubio intelligendus hinc Hippocrates, multi sanguinis dejectionem memorans, ab aperto nimirum sanguifero vase, ut in fluxu hæmorrhoidali dicto: cui inhærens Celsus *lib. 3. cap. 22.* lac his pro veneno esse ait.

Haftenus quibus lac noceat; nunc quibus conveniat, exponit. Et quidem iis primùm, qui tabidi sunt, sed non tamen multum febricitant. At qui pro tabidis hinc intelligendi sint, prænosse primùm oportebit, nam tabidos multifariam intelligi solere, apud Medicos palàm est: quin & plerique atrophiam, marasmo, similique emaciatione confecti, non rarò tabidi

bidì quoque appellari consueverunt; quamobrem non immeritò Mercurialis *variarum lection. lib. 6. cap. 22.* etiam ex Hippocratis doctrina, indiscriminatim pro tabe insignem quamlibet corporis emaciationem, ac consumptionem apud Græcos, & Latinos scriptores acceptam interpretatur; sed & multò antea Celsus *c. lib. 3. cap. 22.* ad tabem retulit quòq; Atrophiam, & Cachexiam. Verùm ex Græco Codice Phthisi laborantes ii intelligendi sunt, quibus ex pulmonis ulcere tabescere contigit: nam Phthisis strictè sumpta communiter à Medicis describitur totius corporis extenuatio cum febre lenta, ex ulcere pulmonis proveniens, quam & specialius Athenienses Phthoen appellare testatur Galenus *7. aphor. comm. 16.* Quamquam non me lateat etiam generalius acceptam significare consuevisse quamlibet corporis extenuationem, à quacumque causa, & cuiusvis partis affectione procedentem; unde multoties confusa ponitur cum marasmo, marcure, atrophia, & tum ab aliarum partium ulcerationibus, tum ab immoderatis evacuationibus quorumcumque humorum, aut inutilium excrementorum retentionibus, obstructionibus, tumoribus, ossium luxationibus, cæterisque; quemadmodum præ cæteris neperimè collegit Mortonus *libello de phthisi*; quin & Galenus ipse non solum totius corporis, sed & solius pupillæ oculi corrugationem, & angustiam cum exsiccatione, phthisim appellare non est veritus *10. de usu partium cap. 5. & 3. aphor. comm. 16.*

At mirum, quomodo Hippocrates phthisicis, ex pulmonum ulcere, lactis usum commendat, cum ceteroqui ulcus quodlibet, non hume-

statione, sed exsiccatione egeat, ut scilicet pus inde emergens detergatur, & pars ulcerata consolidetur, ut pluribus ostendit Galenus *in methodo medendi*. Quamobrem & plurimos novi à lactis usu copiosius pus expuisse, & ulcus pulmonis sorduisse magis, citiori cum ægrotantium internecione. Verùm commendatum Veteribus lac in phthisicis crediderim, non quòd omninò profuerit, sed quòd creditum iis sit, desumptis ex phthisi indicationibus convenienter satisfacere posse, cum alia per id temporis medicamenta simul unà iis conferentia minimè innotuerint: cum enim phthisim ab ulcere pulmonis tria comitentur, pus, ulcus, & marcor; inde fit, ut tria quoque ad illius curationem expostulentur: nimirum pus detergentia, ulcus conglutinantia, & marcorem restaurantia; quæ planè ope lactis specialius consequi posse videntur; quippè serosa sui parte, pus in pulmonibus collectum abstergitur; parte caseosa ulcus conglutinatur, atque ad cicatricem perducitur; & parte butyrosa marcore confectum corpus reficitur, & impinguatur; quamobrem lactis usum ad phthisim curandam, non immeritò summis laudibus extollebant, atque unicum ejusdem remedium existimabant, ut & ad usque nostra tempora actum, putatumque est. At nunc cum vulnerariis, balsamicis, resumptivis propemodum innumeris scateamus, ex vegetalibus, animalibus, & fossilibus petitis, sub forma elixirium, electuariorum, extractorum, pulverum, pilularum, & similium, quibus citrà quamcumque noxam empyicis, & phthisicis opitulamur, lactis usus non benè apud Recentiores audit, eo quòd majora semper incommoda ferat, nec

nec re ipsa in salutem ægrotantium cedere observetur. Hinc ergo norint, qui nequidem latum unguem à vetustioribus rei Medicæ cultoribus recedere audent, quàm fuerit illis curta supellex, cum jam nostris temporibus, sagaci Recentiorum industria, tot, tantorumque medicamentorum simplicium, & compositorum numerosa accessione, nimium locuples Medicina evaserit. Quòd si unquam lac phthificis videatur exhibendum, sit illis stomachus benè valens, omni impuritate vacuus, ætas patientis puerilis, alvus adstricta potius, quàm laxa, sputum purulentum, vel nullum, vel modicum, itemque febris nulla, vellevisissima, citrà viscerum obstructionem, duritiem, vel tensionem, præter ea, quæ in his considerata notavit idem Hippocrates *lib. 2. prædictionum*.

In præferendis lactis speciebus varii sunt inter se Dioscorides, Aetius, Varro, Plinius, Avicenna, &c.

Cæterum inter lactis species præcellit humanum, utpotè magis naturæ nostræ consentaneum, quod cum etiam proximè à mammis exsugatur, proculdubio conducibilius est, nihilum scilicet evolante parte illa volatili, & alkalina, quæ cæteras moderatur, & temperat, immò ab acore, & putrefactione tutatur, & ventriculo concoquenti mirum quantum opituletur: necesse autem est, ut lactans mulier, nedum optimis, & conferentibus eduliis vescatur, verum etiam omni animi pathemate vacua sit, juvenis, catameniis libera, sanæ constitutionis, & quæ à tribus, vel quatuor ad summum mensibus pepererit: Quamquam Helmontius non irrationabiliter contendat, illud præ cæteris, nedum adultis, sed & recens natis, valdè nocuum existimandum esse, eo quòd magna incommoda subeat, & inferat,

ob varias nutricum animi perturbationes. Humano lacti succedit Asininum, quoniam serosius; post ea Caprillum, aliquantò consistentius, conferente in id quoque plurimum loci conditione, tum ob aeris, tum ob pascui salubritatem, quemadmodum de nostris Stabiis speciatim meminit Galenus *5. meth. cap. 12*. Ovilum denique, Vaccinum, Bubulum, Equinum inferioris notæ sunt, licet ob caseosæ partis abundantiam magis nutriant, & impinguent; unde priscis temporibus Athletas caseo ex calathis victitatos refert Pausanias ad robur, & corporis nitorem augendum; & Scythas equorum lacte coagulato, & in caseum redacto (Hippacen vocant) ali, tradit Hippocrates *lib. de aere, aquis, & locis*: Camelorum verò lac omnium dulcissimum, suavissimumque esse scribit Plinius *lib. 28. cap. 9. & lib. 11. cap. 41*.

Addit insuper Hippocrates convenire lac tabidis dare, dummodò non valdè multum febricitent: equidem si ii vehementi febre corriperentur, lac prodesse non posset, quoniam ex gravi illa febre proculdubio lac ejusmodi beneficio detergendi, & conglutinandi ulcera orbaretur, cum vix in ventriculo receptum vi febris, & fermenti febrilis, in nidorem, vel acorem penitus abiret: non rarò enim fit, ut phthifici, nedum febre lenta, & pusilla, quam habitualement vocant, sed etiam acuta, & gravi, quam dicunt humoralem, & putridam, afficiantur, ob cumulata potissimum excrementa ex malis coctionibus, & secretionibus suborta, vel etiam ex intruso pure in pulmone coacervato per arterias in sanguinis massam, unde is plus justo fermentescit, & exolvitur: Quamobrem sana ratione antea dictum est, purulentum sputum,

vel

vel nullum, vel modicum illis inesse oportere, ut lac prodesse possit. Ita pariter conjectabimus. ulcus neque magnum, & profundum, neque fordidum esse, adeoque facile in conglutinationem redire, & sanguinem in suam naturalem crasim lactis beneficio revocari posse.

Similiter in febribus longis, & parvis adjecit, lac conducibile esse, in quibus scilicet ob diuturnitatem corpus extenuari, atque ob humorum tenuitatem, & virium languorem, pusillas febres evadere contingit: in his enim, desumpta indicatione à corporis marcore, de quo aliàs scripserat, *quæ longo tempore extenuata sunt corpora, lentè reficere oportet*, lac videtur omni ratione convenire, nihilum ex adverso repugnante febris conditione, quæ pusilla, & parva ponitur. At quoniam non rarò cum his diuturnis febribus jungi solent obstructions, & viscerum tumores, propterea non temerè addidit, *si nullum ex supradictis signis adfuerit*: nam si fortassè hypochondria tumerent, obstructa, aut inflata forent, lac nulla ratione conveniret: itemque si ingens sitis, biliosa dejectio, aut sanguinis evacuatio conjungeretur, ut antea dictum. Sed & id ipsum non inutiliter repetendum existimavit, ut nimirum ostenderet, quàm cautè lac exhibendum sit, ut si fortassè unum, vel alterum illorum contraindicatorum adsit, ab illius usu penitus abstineamus; unde non satis esse putavit, illa antecederet recensuisse, nisi etiam id ipsum nunc denuò rememorasset. Hinc monitos nos voluit, & cautos esse in lactis exhibitione, quoniam indebitè, & inconvenienter epotum plurimum nocet, & officit; quamobrem rectè Galenus advertit, *non semper Hippocratem servare brevitatem, sed*

in quibus magnum aliquod periculum imminet, si negligentius, quod ab ipso docetur, audiat, bis, terve repetere eadem non vereri.

Postremò cæteris quibuscumque præter rationem consumptis, lac utile esse docet; quemadmodum sunt atrophiam, marasmo frigido, tabe dorsali, aliave simili ægritudine affecti, citrà febrim, aut aliam evidentem consumptionis, & extenuationis causam. Quo fortassè motus argumento Galenus usum lactis approbat senibus marasmo frigido laborantibus *libr. de Marasmo, & 7. methodi cap. 5.* Quin & plures legimus solo lacte vitam incolumem conservasse, ut de Agricola superius memorato scribit Galenus *c. 5. de sanitatè tuenda cap. 7.* & de aliis narrant Athenæus, Plutarchus, Plinius, Leo Aphricanus, aliique.

Coronidis tandem loco subjungere non erit incongruum, ad prohibendam lactis coagulationem conferre plurimum, si eidem admisceatur saccharum, aut mel; sed & Galenus *in huius aphor. comm.* serum lactis sale, & melle conditum se etiam flatuosis exhibuisse testantur: attamen, ut lac minus noceat, immò ut melius nutrire valeat, sit recens mulctum, album, medium inter tenue, & crassum, sapore dulcissimum, omni alio sapore vacuum, ab animante elicatum florentis ætatis, & plantis, in opportunum usum conferentibus, nutrita. Verùm de hac re consulantur præ cæteris Claudinus *Append. de ingressu ad infirmos. sect. 8.* Primerosius *lib. 3. de vulgi erroribus. cap. 11. 12. & 29.* & noster Santorellus *12. de san. nat. c. 10.* ubi latè admodum commoda, & incommoda lactis refert, & examinat.

APHORISMUS LXV.

Quibus tumores in ulceribus apparent, non admodum convelluntur, neque insaniunt; verum his evanescentibus derepente, illis quidem quibus à tergo, convulsiones, & tetani fiunt; quibus autem à fronte, insania, vel dolor lateris acutus, vel suppuratio, vel difficultas intestinorum, si tumores sunt rubicundi.

Aphorismus hic ad partem Medicinæ chirurgicam pertinens, prognosticus totus est, eoque Hippocrates futura, & imminetia, ex ulceribus mala prædicenda docet, & Medicos quoque præcautos esse oportere admonet, ut internoscere simul, & illa præcavere valeant. Desumptus autem ille est ex 2. *epid. sect.* 3. licet parumper immutatus, sed tamen ita, ut facile unus alterum exponat.

Solent equidem ulceribus, ab inflicto potissimum vulneribus, tumores supervenire, & præsertim phlegmonodes dicti, ab impedito nimirum remeantium humorum circuitu, eo quod interruptis, atque intercisis semitis discurrentis sanguinis, & lymphæ, hi spontè sua ad labia vulneris hæreant, & restagnent, unde postmodum tumores: Et licet Hippocrates in textu dicat *œdemata*, ista tamen, ut interpretatur Galenus, omnem tumoris speciem apud Veteres comprehendebant; quamobrem sive sanguis, sive lympa, aliufve humor præter naturam ibidem congestus, ex mora facile fermentescens, acore, atque irritatione; nedum partem ipsam ulceratam tumefacit, & extorquet, verum etiam membranas, & nervos circumjacen-

tes, tum corpulentia, tum acritudine coarctat, comprimit, vel etiam inflat, & dilaniat, indeque convulsiones, & mentis abalienationes exoriuntur. Hæc autem esto indiscriminatim quibuscumque partibus vulneratis, ulceratisque accidere possint, specialius tamen plurima, varique nervorum ramificatione refferas, afficiunt; & ubi extrema musculorum sunt sauciata: talia enim vulnera, & ulcera prava sunt, ut dicitur *aph. sequenti*: si igitur ejuscemodi vulneribus, aut ulceribus tumores superveniant, inquit Hippocrates, neque convelli, neque insanire. Tunc enim verendum de convulsione, aut insania, cum humores commoti, & per corpus debacchantes, ad cerebrum afferuntur, atque nervorum principium occupant, & divexant; at verò in partem vulneratam delati, illud indicant immune ab ejusmodi lésione manere, adeoque neque convulsioni, neque dementiæ obnoxium fieri, quas produl dubio intulissent, si in cerebri meditullium decubuissent. Atqui dixit Hippocrates *non convelluntur maxime*: quoniam fieri potest, ut etiam cum ejuscemodi humorum depositione, & tumorum in ulceribus apparitione, convulsiones, & insaniæ habeantur, vel ob consensum earundem partium sauciatarum cum cerebro, aut cum spinali medulla; vel quia non integrè mali humores in ulceratam partem depouuntur, sed alii in hanc, alii in cerebrum sunt translati; vel quia aliunde contingit, cerebrum, & nervos unà simul affici; sed profectò magis, magisque læderentur convulsione, & insania correpti, si à depositis pravis humoribus in partem ulceratam, tumores non apparerent: Etsi igitur alia de causa delirium, aut convulsio accadat, non maxime, nec vehementer,

ter, & continuè molestabunt, si ulcerata pars tumida apparebit, & ea mole, ac magnitudine, quæ proportionem servare visa fuerit ad humorum copiam, & ulceris amplitudinem, ac profunditatem.

Quoniam verò humores isti in ulceratam partem depositi facilè loco moveri possunt, & aliò transferri; promptiùs planè in cerebrum veluti in partem sua natura debiliorem, & magis cum fauciatâ consentientem, efferentur: id quod cùm acciderit, convulsiones, & distentiones nervorum evenire palam est; quamobrem rectè idem Hippocrates subdit, tumoribus hisce repentinè evanescentibus quibusdam à tergo convulsiones, & distentiones fieri; aliis verò insanias, laterum dolores, aut intestinorum difficultates, prout humores ipsi commoti in hanc, vel aliam partem decubitum fecerint: quod expressiùs idem Hippocrates declaravit *cit. 2. epid. sect. 3.* ubi: *His autem*, inquit, *evanescentibus repentinè, quibus quidem in posteriores partes, convulsiones cum doloribus; quibus autem in anteriores, aut insaniam, aut dolores lateris acuti, & dysenteria rubra*: Siquidem ad posteriorem cerebri partem spinalis medulla, ejusdemque nervi potius afficiuntur; ad anteriorem verò mens, ejusque phantasmata; & si inferiùs adhuc deferantur, ac decumbant, & thoracem, aut imum ventrem petant, lateris dolores, aut dysenteria exorientur. Quin Galenus, reprehensus tamen à Cardano, *in comm. hujus aphor.* ab ulceratis partibus posterioribus, vel anterioribus, deducit convulsiones, vel manias, cæterasque affectiones fore sequuturas. *Si verò*, ait, *tumores de repentinè evanescant. convulsiones, ac tetani, quando in partibus posterioribus, hoc est in dorso, ulcera fuerint:*

quæ verò deinceps dicuntur, si in partibus anterioribus fuerint, consequi dicit. Et rationem addit; *Posteriora siquidem nervosa sunt, anteriora venosa, atque arteriosa.* At historiæ duæ relatæ *hoc loco* ab Heurnio de vulneratis in humero, & scapula, nullo intereà apparente tumore, in insaniam potius ductis, quàm in convulsionem, contrarium evincere videntur. Quamobrem hæc indiscriminatim quoque exoriri posse fatendum est.

Sed ut hæc mala eveniant, non satis est, ut tumores dispareant, & evanescant, sed necesse etiam est, ut repentinè, & citrà manifestam, evidentemq; causam. Ita enim fit, ut certò judicare liceat, humores aliò fuisse delatos, non autem revera evanuisse, aut fuisse resolutos, ac dissipatos: siquidem quæ resolvuntur, aut certa ratione dissipantur, sensim, sensimque fiunt, præcedentibus signis attenuationis, coctionis, & evacuationis. Hinc jure optimo idem Hippocrates eodem *2. epid. sect. 3.* docuit: *Quæcumque sine signo judicationis judicatorio dispareant, malè judicata sunt, velut erysipelas ancillæ Polemarchi;* & quemadmodum contigit Calvo Larissæo *3. epid.* Sed nec quis ambigat, quo pacto humores à partibus ulceratis subitò, ac repentinè dispareant, aliòque ferantur, quoniam corpulentissimi sunt, & plerumque crassi. Siquidem id ope circulantis sanguinis, & lymphæ, facilè accidere potest, resumptis nimirum iis per venas, aut lymphicos ductus, qui non rarò plus iusto, vel repellentium medicamentorum molimine, vel laxantium linimentorum amplificatione, hærentes cæteroqui humores excipiunt, & deducunt, circumpellentibus undique partibus adnexis: quod si fortassis tenues, & serosi illi fuerint, adhuc prom-

promptius per poros partium, atque per substratas, adjacentesque glandulas absorbentur, & in ordinarios, propriosque canales, adjacentium partium, & præsertim musculorum nisus, coadjuvante plurimum calore, & fermentatione ibidem excitata, aliò adiguntur, & profluunt. Verumtamen neque solum in cerebrum possunt loco moti à tumefactis partibus humores transferri, & convulsionem, aut maniam excitare, sed alias quoque consimiles ægitudines juxta partium affectarum conditionem. Quare nedum morborum cerebri, & nervorum meminit hic Hippocrates, verum etiam pleuritidis, peripneumoniæ, empyematis, si ad pectus; atque etiam dysenteria, si ad imum ventrem, & intestina humores illi transferantur, & decumbant. Adjecit autem in textu, *si tumores sint rubicundi*; quoniam pleuritis, & peripneumonia de genere inflammationum sunt, & non nisi à sanguine, vel cum sanguine restagnante, contingunt, atque ab istius putrefactione empyema. Dysenteria verò hic intelligitur cruenta, quam rubicundam *cit. 2. epid.* appellavit, cujus etiam meminit *lib. de nat. humana, 3. epid. & lib. de Articulis*, & Galenus *3. de sympt. causis cap. 8. & 5. de locis affect. cap. ult.* immò lienosis supervenientem salutarem censet *6. aphor. 48.* veluti sine intestinorum ulcere, & nullo alio gravi symptomate sociatam, immò criticè, Naturam à bono sanguine separante, promotam. Quod sanè, si pari modo contingat ex tumoribus subito evanescentibus, translatis interea pravis humoribus in patentiores ductus, unde facilius possint evacuari, vel saltem in ignobiliores corporis partes deponi, cum virium levamine, & symptomatum

remissione, proculdubio neque penitus ejusmodi translatio vituperanda erit, ut non rarò podagricis accidit. Contigit etiam mihi Romæ aliquandò experiri in quadam nobili muliere, cui tumor ingens ad clunes acciderat, ex ulceribus ibidem antea contractis, illo repente evanescente, atque exarefactis omnino ulceribus, subortum ad femora latum, oberansque Erysipelas, non solum permisisse ulcera brevissimè sanari, sed etiam febrim cum adjunctis symptomatibus desisse. Hinc pariter deducere est (ut etiam advertit Mercurialis) non modò hæc, quæ retulit in aphorismo Hippocrates mala, ab evanescentibus repente tumoribus exoriri, sed & surditates, lippitudines, asthmata, cardialgias, dysurias, ischiades, idque genus alia, quæ fortassè reticuit, contentus generaliora solummodò attulisse, quæ fortassè frequentius observaverat. Denique si tumores isti à lymphâ, aliisque humoribus, præterquam à sanguine orti, subito evanescant, ab illorum in aliis partibus depositione, congeneres morbi excitari poterunt, qui scilicet analogiam cum iisdem retinebunt, ut ex praxi.

APHORISMUS LXVI.

Si in vulneribus fortibus, & pravis, tumores non appareant, ingens malum.

UT ostenderet Hippocrates solere ferè semper vulneribus, atque ulceribus tumores supervenire, adeoque non inutiliter præcedenti aphorismo dictum, malum esse, si illi repente dissolvantur, & evanescant, in ejus argumenti confirmationem nunc adiicit, oportere iisdem tumores superaccidere, si præsertim fortia

illa sint, & prava. Atqui parum refert, num vulnera recentia sint, aut antea contracta, & in ulcus degenerata, cum ista Hippocrati non raro confundantur, dummodò ab externa causa processerint, ut deducitur ex *lib. de ulceribus*: Et licet hoc loco scriptum sit per *Τραῦμα*, quod propriè continui solutionem à re incidente factam significat, nil tamen repugnat, quin etiam ad ulcera inde progenita id ipsum extendamus, & siue punctim, siue cæsim, & siue à re contundente, siue frangente, & secante, sint inducta. Igitur ubi in vulneribus, aut ulceribus vehementibus, & magnis, tumor nullus apparet, qui cæteroqui ad vulneris magnitudinem consequi deberet, ingens malum significatur, saltem imminens, & futurum.

Vocantur autem vulnera fortia, quæ magna, & hiantia, ac profunda sunt, vel in partibus principalibus inflicta, ut docet Galenus 4. *meth. c. 6.* & 6. *eiusdem operis cap. 4.* quomobrem vel ob partis præstantiam, vel ob rescissæ carnis nimiam molem fieri nequit, quin multa, & ingentia vasa sanguifera sint pariter vulnerata, & resecta, unde sanguis inde præterfluens, cum nequeat suum circuitum recta peragere, necesse est, ut in adjacentes partes effundatur, ibique stagnet, & hæreat, proindeq; tumorem ingentem, & magnum pariat; quare si fortassè nullus appareat, indicio erit, vel introrsum, in partes scilicet corporis intimiores excurrisse, ibiq; corruptionem subiturum; vel sanguinem ipsum adeò effretum, & ineptum evasisse, ut lentè admodum moveatur, si bique remotam faciat, neque partes, ut decet irriget; vel denique tantam fuisse factam ex vulnere illius effusionem, ut vix reliquus superfit, qui cordis motum, & vitam tueatur.

Quòd si præterea nedum magna, & fortia sint vulnera, verum etiam prava observentur, hoc est maligna, & cacoethica, longè magis deteriora erunt, & vitium in sanguine ex partibus vulneratis deleterium denotantia, quemadmodum in gangræna, & sphacelo. Istius autem conditionis esse solent vulnera capitibus, & finibus musculorum, maximè nervosorum inflicta, ut observat Galenus in *comm.* quippe illa non sine ingenti dolore, inflammatione, convulsione, virium dispendio, cæterisque pessimis symptomatibus contingunt; quæ cerebrum, cor, aliasque principes partes collæsas, malèque affectas arguunt; unde si fortassè in his tumor nullus appareat, quoniam ex vulneratarum partium, earumque fibrarum coarctatione, corrugationeque affluens sanguis excipinequit, sed ad alias partes principes, & mutuò consentientes, impetu quodam effertur, & irruit, vel ex virium languore, in suo motu præpeditur, & hæret, proculdubio ingens malum sequitur, & sæpissimè etiam interitus. Atqui id ipsum non raro quoque imperitia Chirurgorum accidit, quemadmodum scitè hic etiam adnotat Galenus, cum scilicet influxus sanguinis in partem vulneratam valdè infrigidantibus, aut adstringentibus medicamentis reprimatur, repugnante interea ex adverso nervearum partium natura, & conditione, quæ, ut idem Galenus ibidem subdit, *medicinas calefacientes, atque exsiccantes desiderant*. Ex his ergo planè nunc sequitur, ingens malum subinde portendi, ut, etiam edocuit allegato 2. *epid. sect. 3.* quod suo more complexus Celsus *lib. 5. cap. 26.* eleganter scripsit: *Nimis intumescere vulnus, periculosum: nihil intumescere, periculosissimum*.

iffimum est: illud indicium est magnae inflammationis, hoc emortui corporis.

Quamvis autem hæc in universum vera comperiamus, accidit tamen aliquandò, ut in corporibus salubri constitutione potitis, rectaq; victus ratione usis, ob quam pravos, aut excrementosos humores nullatenus cumulari contigerit, inflicta vulnera, alioqui magna, nullum, vel levem admodum tumorem adjunctum habuerint, sine ullo tamen vitæ periculo. Quamobrem confert plurimum bona corporis habitudo, & humorum puritas, ad evitandum ejusmodi in vulneribus incommodum: contra verò novi plerisque cacochymos, cachecticos, aut lue venerea infectos, qui etiam ex levibus vulneribus, & ulceribus, à suppuratis tumoribus subortis, vitæ periculum subiere, vel difficulter, & non nisi post diutissimum tempus, convalere. Juvat pariter in his attenta Medicorum assidentium cautio, atque animadversio, qua scilicet præcaveatur per convenientia, & opportuna medicamenta, pravorum humorum ad partem vulneratam affluxus, ut propterea nullus, vel saltem levis, aut insensibilis tumor sit compariturus. Cum igitur hæc ritè, rectèque peracta sunt, nihilum de tumoribus non apparentibus pertimescendum.

APHORISMUS LXVII.

Molles boni, crudi verò mali.

QUandoquidem ad ingentia, & magna vulnera Tumores consequi bonum, ex præcedenti aphorismo tacitè subinfertur; docet in hoc alio Hippocrates, quales ipsi esse debeant, aitq; molles illos esse oportere, nam crudi, & duri alia de causa

mali censendi sunt. Molles autem, si-
ye, ut scribitur eodem 2. *epidem. sect.*
3. *laxi tumores*, intelliguntur, qui prementibus digitis promptè cedunt, veluti oppositi crudis, duris, ac renitentibus digitis, ut colligitur *ex primo in primum epidemiorum*: & quidem tripliciter tales esse possunt, vel ex conditione humoris tumorem facientis; unde qui ex phlegmate, aut lymphæ, mollis est; qui ex terreo, concretoque humore, durus: vel ex ejusdem humoris cruditate, vel coctione; quamobrem tumores inter initia, ob humorum cruditatem, duri observantur; cum verò coctionem subierint, molles fiunt: vel denique ex partibus affectis; quæ enim partes natura sua molles sunt, laxæ, & spongiosæ, ut adenes, sæpe sæpius cum tumescunt, molliorem quoque, laxioremque retinent conditionem: Modò molles hæc tumores in vulneribus apparentes, cujuscunque generis sint, relati ad crudos, & duros, semper meliores existimandi sunt; quoniam molles ex ratione materiæ lymphicæ, aut pituitosæ, utpote nullum, vel levem dolorem, aut irritamentum inferentes, minoris sunt malitiæ, quàm si à materia consistentiori, acidiorique sint progeniti: molles verò ex prompta, faciliq; coctione, proculdubio meliores sunt, quàm si illa contumax, & rebellis foret: & denique molles ex natura partis affectæ glandulosæ, utpotè sensus expertes, molestia quoq; carent dolorifica, & vellicante, cujus rationem specialem habendam voluit Hippocrates in vulneribus, & ulceribus quibuscumq; ex quibus antea convulsionem, maniam, cæterasq; ægrotudines acutiem præferentes, metuendas dixit. Porro perperam egisse videntur illi, qui Aphorismum hunc de tumoribus universis indiscriminatim sunt interpretati.

pretati, in quibus etſi nonnunquam mollities longè admodum melior ſit, duritie, & cruditate, cum ſcilicet illa ab imminente, ſacilique coctione humorum procedit; multoties tamen Medicos curantes fallit, & multò gravior, ac periculoſior obſervatur, quemadmodum palàm ſit in œdemate, atheromate, ſteatomate, meliceride, vomica, cæteriſque tumoribus flatulentis, & aquoſis, potiffimum in corporibus cachecticis, atque ad hydropem diſpoſitis, cum cæteroqui phlegmon, durus, ac renitens tumor, ſaciliùs ſubigatur, & curetur. Atque hinc etiam ſacilè exponitur, quod 2. epid. ſect. 3. de iſdem tumoribus, ſub alia phraſi, ſcripſit Hippocrates, ubi ſurſum repentes contrapopſit mollibus, & laxis: Surſum autem repentes intelliguntur, non ſolum, qui circà vulnera comparent, & partem ulceratam tumefaciunt, ſed aliorſum, ac præcipuè ſurſum attolluntur; atq; vel ob multitudinem humorum, eorundemq; pravitatem, aut propter partis affectæ contractionem, compulſionemque, nobiliores partes petunt, & introrſum repunt. Cæterum crudi tumores, ideſt coctionem minimè admittentes, nec à natura ſubigibiles, ſemper mali ſunt, & periculum vitæ minantur, quales ſcirrhi, ſtrumæ, carcinomata, exoſtoſes, ut ex praxi Chirurgica cunctis notum; ſicut contra molles ad ſuppuratorem vergentes, minùs mali, immò plerumque ſalutares exiſtimantur.

APHORISMUS LXVIII.

Dolente parte capitis posteriore, in fronte recta vena inciſa prodeſt.

V. Gal.
comm. 2
in 6. epi-
dem. 27.

QUod experimento juviſſe compererat 6. epid. ſect. 2. Hippo-

crates in eo, cui *dolente capitis parte posteriore, recta vena in fronte ſecta profuit*, in aphoriſmum redegit, & hic appoſuit, ut vel hinc certò nobis conſtaret, ab experimentis, iteratiſque obſervationibus ſententiarum iſtarum ſeriem compilari, ac ſicuti in memoriam caderent, ſtato quodam ordine, diſpoſuiſſe, non tamen ea lege, ut præcepta poſteris traderet irrefragabilia, ſed ut potiùs moneret, qua methòdo ſibi medicam facultatem comparaffet, eademque poſteri poſſent ſuis obſervationibus illam magis, magiſque confirmare, ac locupletare, juxta illud Manilii:

Per varios uſus Artem Experientia fecit;

Exemplum monſtrante viam:

quippe non ex uno, aut ex altero experimento, ſed ex pluribus, iteratiſque, atque eodem modo contingentibus exurgit Experientia, quæ propterea ſcitè admodum deſcribitur à Galeno lib. de optima ſecta ad *Thraſybulum*, memoria ejus, quod ſæpiùs, & eodem modo viſum eſt. At verò experimentum propriè dicitur, ejus, quod nondum conſtat opore, attentatum; ſeu alicujus medicamenti dubia attentatio: unde experiri idem eſt, ac rei alicujus periculum facere, ac tentare, quod ſanè eventus ambiguitate, & periculo non caret.

Id itaque proponere videtur in hoc aphoriſmo Hippocrates, ſe nimirum aliquandò expertum, juviſſe venæ frontis ſectionem in vehementi occipitis dolore; ut hinc cæteri, ſi prudenter viſum fuerit, idipſum experiri valeant in conſimilibus doloribus, num fortàs è ex iteratis obſervationibus generale, quoad fieri poſteſt, documentum elici, & experientia ſolidior deduci queat. Inutiliter ergo allaborant, qui hoc Hippocratis eſſatum ad rectam, perpetuamq; meden-

Cap. I.

medendi rationem reducere conantur per ambages illas evacuationem, quæ Revulsoriæ, & Derivatoriæ appellari consueverunt: siquidem istæ jamdiù à recta medendi Methodo, post detectam sanguinis circulationem exularunt; nisi solum vocabula ista, in gratiam venerandæ vetustatis, retinere velimus, ut cum ejusmodi missiones fiunt inter initia ægritudinum, Revulsiones; constantibus verò, aut invalescentibus iisdem peractæ, derivationes appellentur: ea planè ratione, qua fortè creditum; fluentes inter initia inflammationum humores intercipi, & in suis motibus præpediri; in augmento verò, & statu earundem, cum jam factæ illæ sunt, diminui, atque in motum denuò adigi hærentes partibus humores: quod tamen non facile plerumq; est, immò sæpè sepius nocuum, ac periculosum, ut aliàs dictum. At verò, citrà ejusmodi inutiles animadversiones, potest dolori occipitis venæ frontis sectio prodesse, cum is ex immoderato, impetenteque sanguine in illius foramina, angustiora reddita, non tam promptè subeunte, provenit, quocircà vel hærens aliquantisper, vel irruens, & impetuosius excurrens pericranium, duramque meningem gravat, aut vellicat, unde postmodum dolor, qui deinde sedatur, promota, per frontalis venæ amplioris sectionem, illius circulatione; quippe jam satis constat, non aliud beneficium ex venarum sectionibus corpori exoriri, quàm sanguinis motum, juxtà Mechanicæ leges, nonnihil aliquandò accelerare, ob diminutam ejusdem quantitatem. De reliquo, id indiscriminatim in cunctis capitis doloribus experiri velle, valde periculosum; cum ex Galeno *in comment. aphorismi primi*, experiri ea, quæ non sunt longa experientia

Tozzi Op. Med. Tomo IV.

comprobata, non est citra periculum, cum mala experientia ad totius animalis interitum terminetur. Atqui, præter alia graviora pericula, quæ ex intempestivis, importunisque detractionibus sanguinis incurritur, illa specialius in venæ frontis sectione contingunt, quòd collum undequaq; circumligari debeat, & caput ad supercilia, fascia obduci, ut vena illa turgat, & intumescat, ne pro vena arteria incidatur, & citrà periculum punctiōis, aut vulneris pericranii. A devinctis autem jugularibus vasis facilè hydrocephalon, & à puncto, vulneratoque pericranio, convulsio non rarò accidit. Hinc propterea factum, ut jamdiù ejusmodi venarum sectiones ab aula medica exulaverint; nec sit amplius, qui eas tentare, aut in praxim deducere audeat.

APHORISMUS LXIX.

Rigores incipiunt, mulieribus quidem ex lumbis magis, & per dorsum percurrunt ad caput; sed & viris parte corporis posteriore magis, quàm anteriore, veluti ex femore, & cubito. Sed & cutis rara: indicio autem est pilus.

Quamvis plerique Expositores memoratos hoc loco rigores nolint de veris rigoribus, febres præcedentibus, interpretari, sed solum de refrigerationibus, aut horripilationibus, ab externa causa inductis, veluti à gelu, & à Borea; ipse tamen non video, cur illis nequeat hæc sententia adhuc rationabiliter adaptari, immò multò magis, quàm aliis; cum experimentis compertum habeamus, rigentes à febribus secundum posteriora potius conqueri, ac molestari, immò quosdam etiam febre tertiana affectos noverim, qui in-

regumenta multa, ac lanea, adhuc etiam ponderosiora, & excalefacta, ad eas partes exquisierint, ut levamen aliquod, atque adjumentum à concutiente, & molestante frigore persentirent: Advertit pariter Galenus nullibi Hippocratem rigoris meminisse à febre sejuncti, ut propterea illum sine febre novum, & peregrinum symptoma, suo tempore fuisse scribat *lib. de rigore, tremore, & palpitatione cap. 7.* Verum utcumque res hæc habeat, & sive rigores propriè dictos, sive simplices refrigerationes à rigido ambiente illatas, intelligat Hippocrates, docet hic à lumbis magis in fœminis per dorsum in caput excurrere; in viris verò, etiam partes posteriores potius quam anteriores, atque ex his magis extremas: Quod & repetitum bis adhuc invenitur, 2. scilicet *epidem. sect. 3.* & *6. epid. sect. etiam 3.*

Et quidem, quod in febrientibus rigores incipiant à partibus posterioribus, atque in fœminis magis à lumbis, clarè deducitur ex nupera Recentiorum Anatomicorum doctrina, qui multis rationibus, atque experimentis evincunt, rigorificam illam concussionem ab indebita succi pancreatici cum felleo fermentatione proficisci, adeoque circa lumbos, & glandulas lumbaras persentiri, unde postmodum spinalis medulla, ductus thoracicus, pulmo, cor, totumque corpus, inæquali frigore contremiscat. In fœminis insuper, ligamenta uteri rotunda ad easdem quoque partes protenduntur, ac proinde major afflictio ex tot nervorum, & partium nervearum compassione; si quidem inter cæteras istæ magis à rigorificis, sive internis, sive externis, afficiuntur, ex eodem Hippocrate *aphor. 17. & 18. hujus.* Dixit autem *magis*, non quòd omninò ex lum.

bis, sed quòd præcipuè ab his ostenderet rigores incipere solere, cum tamen reliquæ etiam partes extremæ corporis, manus, pedes, ingenti frigore molestantur; rigore verò, idest inæquali illa concussione cum sensu intensi frigoris, solum internæ partes nerveæ ad lumbos, & præcordia sitæ divexentur. In maribus quoque posteriora magis, quam anteriora frigere incipiunt, cum rigor illos invadit, non quòd impari ratione hic illis accidat, cum idem sit in utrisque febris fomes, & focus, unde *6. epidem. sect. 5.* dicitur, *rigorem omnem à superiore ventre inchoare*; sed solum, quia in fœminis frigus ex lumbis per dorsum ad caput fertur; in maribus verò extimas potius partes pervadit: halitus enim ex fermentantibus præter naturam succis in regione lumborum, per nervos potissimum in maribus divexant, qui ex lumbis, & ossæ sacro, atque adjacentibus imi ventris partibus, ad inferiora protenduntur, & per femora excurrunt, cum in fœminis, ob eorundem cum utero, & cerebro consensum, per dorsum caput potius feriant, quòd planè in ipsis mollius est, & imbecillius. Verum tamen etsi hoc plerumque fœminis accidat, non est, ut omninò immunes exinde mares ab ejusmodi molestiis existimemus; quamobrem appositè adjecit Hippocrates adverbium *magis*. Nonnullos equidem novi è classe illorum, qui hypochondriaca affectione laborant, id ipsum omninò ex rigorificis febribus passos, quod de fœminis hic memorat Hippocrates, ut propterea etiam mente titubarent, & secum ipsis obloquerentur; & alios qui aliquantulum convellerentur, ac contremiscerent. Adjecit tandem, *veluti femorum, & cubiti*, loco exempli, ut cum posterioribus postremas quoque, & exteriores

res partes intelligamus, quod clariùs expressit *cit. 6. epid. sect. 3.* inquiens: *Horremus enim magis exterioribus, quàm interioribus corporis partibus, velut cubitis, femoribus.* Porrò si hæc manifesta sunt in rigoribus, & horroribus, multò sanè patentiora fiunt in refrigerationibus extrinsecùs inductis, aut in defluxionibus humorum præsertim lymphicorum, per spinam, & artus; quippe partes posteriores corporis frigidiores sunt anterioribus, quoniam illæ magis ossæ, & nervosæ, istæ verò majores, & numerosiores venis, ac arteriis sunt refertæ; sicut etiam interiores, exterioribus, ut patet. Quòd denique anteriores partes calidiores sint posterioribus, indicare subdit cutem illarum partium raram, atque facilem pilorum generationem: rarior enim cutis, & facilis pilorum generatio, caloris, seu rei calidæ, unde pilus oritur, abundantiam indicat. At verò raritas cutis debet esse moderata, quæ scilicet satis sit ad haliuosa excrementa excipienda, atque in pilum prolonganda, non autem tanta, quæ laxior nimis, & multum patula, illa retinere, & concreescere non sinat, sed potiùs evolare, ac dissipari permittat; siquidem quemadmodum adstricta nimium, & densa cutis pilorum generationi impedimento est, ita ex adverso rarior, & patentior plus justo glabra remanet; igitur moderatè raram esse oportet.

APHORISMUS LXX.

A quartanis capti, non admodum à convulsionibus capiuntur; si verò prius capiuntur, & quartana supervenerit, liberantur.

SI unquam licuit à contextu aphorismorum mentem Hippocratis

explicare, & clariorem reddere, certè ex hoc luculenter patet; rigores antea memoratos, febriles potiùs intelligere voluisse, quàm alios; quoniam nunc de quartanis febribus verba facit, quæ rigoribus, aut potiùs horroribus molestissimis ægotantes cruciant, iisdemque veluti signis pathognomonicis sociantur. Sed ista utcumque sint, docet Hippocrates, Quartanis febribus correptos non admodum convulsionibus affici; immò his fortassis antea correptos, superveniente quartana liberari. Multum autem allaborant Interpretes, num propriè de convulsione, græcè *σπασμῶ*, an de convulsione epileptica, ac de ipsamet epilepsia, exponendus sit; siquidem Galenus *in comm.* excipit convulsionem factam ab inanitione, & illam solùm, quæ à repletionem fit, atque ab humoribus lentis, & pituitosis progenitam intelligit, qualis in morbo comitiali: cui sententiæ inhærentes plerique alii in probationem adiiciunt eundem Hippocratem *6. epid. sect. 6.* dicentem: *A quartana correpti magno morbo non corripuntur; si verò corripiantur prius, & succedat quartana, liberantur.* Pro magno autem morbo epilepsiam intelligi nemo est, qui ambigat. Et quamvis nonnulli, inter quos Cardanus, de omni magno morbo illum interpretentur, id tamen veritati, atque experimento non cohæret; siquidem nulla ratio suppetit, quamobrem quartana correpti, à cunctis aliis magnis malis præserventur, aut liberentur; quin immò experimentis pluries constitit apoplexia, asthmate, cordis palpitatione, hydrope, cæterisque magnis ægritudinibus eos laborasse, ut fileam scirrhus, obstructions lienis, renum calculos, ischurias, strangurias, aliasque, quibus obnoxii sunt.

sunt. Sed & Hippocrates ipse 3. *epid.* 3. complures quartanarios memorat in constitutione illa pestilenti simul cum aliis periisse. Hinc falsum quoque dicere est Celsum, hac ductum Hippocratis auctoritate, qui quartanam febrim docuit ab aliis magnis morbis liberare. Verum tot ambagibus, & tricis exolvemur, si juxta Recentiorum dogmata, & observationes, considerentur omnes istiusmodi nervorum ægri tudines à vaporibus, aut humoribus acidis provenientes, qui cum sedem suam in imo ventre habeant, à vitio viscerum naturalium malè affectorum, præsertim verò pancreatis, lienis, ventriculi, & glandularum circumjacentium, propterea fit, quòd illis per indebitam cum cæteris succis, porissimum felleo, in gracilibus intestinis fermentationem febrilem subactis, ut speciatim in quartana febre fit, desinat in nervorum, & musculorum fibræ proritatio, & convulsio, ut aliàs quoque dictum est; vicissim enim acidum quodcumque, felleo, & amaro liquore retunditur, ac domatur: cumque quartanæ febres cæteris longiores esse soleant; inde etiam sequitur, ut iteratis invasionibus, tum per vehementes illarum horrificas concussiones, tum etiam à diuturna perduratione, omnis acor ex humoribus absumatur, vel infringatur, removeaturque causa irritationis, & convulsionis nervorum. Huc etiam facit, quòd idem Hippocrates 6. *epidem. sect. 7. circa finem*, scribit: *melancholicos fieri epilepticos, & è converso*; quoniam humor melancholicus acidus, utriusque morbi causa, si in cerebrum, & mentem feratur, melancholiam, in principium verò nervorum, & nervos ipsos, epilepsiam excitat; atqui febre superveniente, idest per fe-

brilem fermentationem subacto istiusmodi humore, uterque vel desinit, vel remittit. Denique advertendum superest, Hippocratem non penitus dixisse quartanis captos convulsionibus nullatenus corripì; sed *non admodum* solum; siquidem fieri potest, ut alia de causa illis afficiantur, vel etiam eadem non penitus per febrim disculsa, potissimum cum convulsiones, & epilepsie fuerint inveteratæ, adeoque diutius protractæ, languorem in nervis consequantur: quo casu etsi omnino non desinant, latis tamen est si admodum, aut violentius non affligant, sed rarius solum, & mitius quam consueverant.

APHORISMUS LXXI.

Quibus cutes circumtenduntur aridæ, & siccæ, sine sudore moriuntur: quibus verò laxæ, & raræ, cum sudore moriuntur.

TRanscriptus est hic aphorismus ex 6. *epidem. sect. 6.* ubi per eadem verba scribitur, nisi quòd clarius ibi, cutes aridæ, ac duræ, pro aridis, & siccis memorantur. Notat autem cutes aridas, & duras, quæ scilicet simul unà exsiccæ sint, ac densæ, quemadmodum in coriis animalium ad Solem exsiccatis, ut nimirum pororum confipationem, coarctationemq; designet, & cujusvis humoris absorptionem, unde tactu duræ, distentæ, & aridæ, adeoque etiam scabræ, & asperæ, percipiuntur: Neque solum unius, aut alterius partis meminit, sed universalis integumentum totum circumambientis, & circumvestientis corpus: id enim sonat verbum illud, *circumtenduntur*, quæ scilicet cute universum corpus circumtegatur, & convestitur. Quibus igitur

igitur cutes tales sunt, vel natura, vel temporis progressu, forsan ex ægritudine, veluti ex marasmo, sudor nullus fieri potest, etiamsi febribus afficiantur, quoniam vel humor deest propter ariditatem, vel extramitti, atque exudare nequit propter cutis densitatem, exarefactis præsertim glandulis subtercutaneis dictis, unde lymphæ, sudoris materia, proximè solet extillare; quemadmodum evenisse scribit idem Hippocrates Dealcis uxori, & Adolescenti in Melibæa, ægrotis xv. & xv. 3. *epid. sect. 3.*

At verò qui cutem fortiuntur laxam, & raram, nimio sudore perfusi in febribus, aliisque similibus ægritudinibus, decedere solent; quoniam scilicet, qui humores prævi per coctionem subigi non potuerunt, & criticè protrudi, sponte sua inter mortis confinia, inutiliter, immò etiam maximo cum virium dispendio, erumpere consuecunt, & sudores pariunt, diaphoreticos dictos, præsertim si cacoethiam conjunctam habeant, ut in malignis, & pestilentibus febribus.

APHORISMUS LXXII.

Qui Regio morbo laborant, non multum ventosi sunt.

I Cterum aliàs diximus, vel à veneno sanguinem, & lympham corrumpente, vel à crassis, lentisque succis fellei humoris in tenuia intestina transpositionem ex ductu cystico, & cholidochæ impredientibus, exoriri. Primum, plerumque malum, itemque exitiosum experimenta plurima contestantur, de quo etiam Hippocrates pluries in hisce aphorismis, præsertim si ante septimum apparuerit, aut tumido, ac duro existente jecinore: Alterum diuturnum

quidem, sed minimè periculosum passim experimur, & sæpissimè etiam sine febre. Cujus autem hic meminere, ut eo affectos non admodum ventosos esse dicat, vereri subit. At de primo effatum hoc veritati non consonat, repugnante quoque eodem Hippocrate, qui Apollonium ægrotum xlii. *sect. 3. 3. epidemiorum*, auriginosum simul, & flatulentum fuisse memorat. A tumefacto prætereà jecore facile subsequi solet Tympanitis, in qua flatus prævalent adeò, ut universum ventrem distendant, & inflent. Ictericos itaque, ab impedita fellei humoris in gracilia intestina depositione, hic intelligere oportebit, quibus nimirum alvus styptica esse solet, & fæces, si quæ egeruntur, albicantes, accineritiæ observantur. Quoniam enim in his bilis consistentior, ac inertior reddita, minimè in tenue intestinum deducta, nequit suo sale volatili viscosam pituitam, hærentesque in intestinis succos, etiam ab acido pancreatis fortasse austeriori, itemque ex ventriculo delatentem chylum convenienter diluere, ac moderari; propterea fit, ut flatus, vel nulli, vel tenues admodum progignantur; sed & fæces inde provenientes mucosæ plus justo, & felleo istiusmodi liquore privatae, diu retinentur, atque postmodum non nisi ingenti conatu egestæ, cineritiæ observantur: constat autem felleum hunc humorem pancreatici vim retundere, chylum ab inutilibus partibus repurgare, tenaces, hærentesque succos ab intestinis incidendo, detergere, necnon clysteris vicem gerendo, flatus discutere, & alvi excrementa ad exitum provocare. At verò adiecit Hippocrates *non admodum*, cum fieri possit, ut aliquando, leviter saltem, flatus, aut ructus ab Ictericis

ricis emittantur, cum scilicet aliqua ex parte felleus humor ad intestina delicitur, fortè quia non omninò cholidochus ductus obstruitur, ut omnem ejus partem remoretur, vel etiam quia ab oleosa, tenacique bile cystis ipsa sola infarcitur, indeque Icterus exurgit, libero intereà cholidochus ductu remanente. Sed & contingit pariter nonnullos flatibus vexari, ventris murmura excitantibus, & inflantibus intestina, illos autem nequaquam depellere posse: his equidem facilè accidit, ut Ictero corripiantur, & Tympanitici prætereà fiant. Novi quemdam, optima cæteroqui sanitate fruentem virum, qui cum ingentes flatus ma-

gno sanè impetu per tempus, cum luberet, edere consuevisset, mox factus Ictericus flatus ipsos per ventrem obmurmurantes discutere nequivit, & post aliquod tempus Tympanitico-asciticus periit.

Romæ cum degerem, contigit pariter experiri Ictericum quendam, inconvenienti tamen methodo tractatum, flatuosum, ructuosumque per totum ferè morbi decursum extitisse, sed tandem stomacho, & viribus exolutum, cum nil amplius retinere, nec digerere potuisset, ultimum suum clausisse diem; tumefacto intereà Jecore, & Ictero in hepatidem scirrham commutato.



LUCAE TOZZI

In Sextum librum Aphorismorum

HIPPOCRATIS COMMENTARIA.

APHORISMUS PRIMUS.

*In longis lævitatibus Intestinorum
si ructus acidus superveniat, qui
prius non erat, signum bonum.*



Extus hic Liber Aphorismorum varius est, proindeque utilis simul, & maxime commendabilis: continet enim sententias ad Praxim Medicam summopere conferentes, præsertim in his, quæ accidentium morborum proprietates comprehendunt: sumptoque initio ab infima corporis regione naturali, primum considerat Hippocrates acidum ructum ex Ventriculo proveniente in diuturnis lævitatibus Intestinorum, aitque si is, veluti ex inspirato superveniat, qui prius nunquam extiterit, bonum signum esse.

Est autem lævitas Intestinorum, græcè Lienteria, ægritudo illa, in qua assumpti cibi celeriter, & præproperè nimis, omnisque concoctionis expertes, ac nullatenus immutati, egeruntur. Et quamvis inter Lienteriam, & Coeliacam passionem, ea ab Authoribus differentia statuatur, ut in Lienteria statim, ac nullimodè permutati; in Coeliaca verò parumper detenti, & solum

aliquantulum dissoluti deiiciantur, non tamen illa tanti est, ut sub nomine lævitatibus Intestinorum hoc loco prior solum, & non etiam posterior affectio comprehendi possit, cum unam, eandemque causam utrisque communem sortiri soleant. Quæ enim à Veteribus de ejusmodi ciborum dejectionibus sunt excogitata, de debili concoctrice, aut imbecilla Retentrice, vel plus justo lacescita Expultrice, quarum culpa ingesti cibi debito tempore non retinerentur, vel ante necessarium tempus expellerentur, ideoque coctionem non subirent, nupera Anatomie facilius explicantur per comprehensionem, coarctationemque tunicarum Ventriculi suis fibris intertextarum, dissolutionemque ciborum à succis, è glandulis lenticularibus earumdem, in Ventriculi cavum exudantibus; quamobrem cum ejusdem tunicæ delaxantur, & succi ipsi digestivi hebetes fiunt, aut in alienam naturam degenerant, coctio nulla fit, vel admodum imperfecta; unde postmodum facilis eorumdem delapsus ad intestina, subitaque depositio: cumque iisdem tunicis Ventriculus, & intestina convestiantur, atque humores secretionibus additi, Felleus scilicet, & Pancreaticus, parem sortiantur in hoc affectu conditionem à naturali statu degenerem;

nerem; proinde fieri, ut quod in Ventriculo dissolvi, & concoqui non potuit, multò minùs dilui, & discerni queat in Intestinis, potissimùm gracilibus. Quin & hæc, tum vitio, & inefficacia eorundem humorum, tum defectu, ac laxitate glandularum miliarium, quibus interiùs referciuntur, tum denique lactearum venarum excipere nequeuntium obstructione, plerumque etiam male affecta, in causa sunt, ut quantocyùs pariter ad alvum inconcocti cibi deturbentur, & expellantur. Hinc Lienteria, nedum lævitas Intestinorum, sed & cibarius fluxus, seu diarrhœa stomachica plerisque appellatur, quoniam stomachus, seu Ventriculus, & Intestina cum suis tunicis, fibris, glandulisque, necnon cum liquoribus in eorum cavum extillantibus, simul unà in hoc affectu læsa conspiciuntur.

At verò non solum hinc considerat Hippocrates Lienteriam, seu lævitatem Intestinorum quamcumque, velex modico tempore inductam, sed speciatim adjecit, ex diuturno tempore molestantem; siquidem *in diuturnis* dixit *lienteriis*. Si namque Lienteria recens foret, profectò, quod de acido ructu superveniente recenset, foret infidum, quia fortassè semper adfuit, & sicut is à principio Lienteriam concomitans non magni æstimandus, ita nec Lienteria ipsa plurimùm esset magnificienda, utpote quæ non altas fixerit radices. Jure ergo hæc ambo animadvertenda scribit, *in longis*, seu diuturnis *lienteriis*, in quibus graviùs de vita verendum, & *ructus acidus superveniens*, qui longè magis utilis existimandus est. In his etenim ructus acidus superveniens recuperatum iri ægrotantem porten-

dit, ob restauratæ coctionis indicia, quippe succi illi digestivi, ciborum dissolutionem promoventes, amissum acorem referunt naturali statui debitum, quo antea orbat, inidonei evaserant, & ventriculus ipse ad pristinam fibrarum texturam, sui que coarctationem quandatenus revocari prædemonstratur. Atque hinc palam fit, quàm longè aberraverint veteres Interpretes, ex ructu acido coctionem renovari existimantes ex eo, quòd ructus acidus indicium foret inchoatæ coctionis, vi caloris perfici consuetæ; cum ructus acidus ex *Galeno* frigidam intemperiem consequi dicatur, & coctio ex eodem, à calore moderato fieri putetur. Equidem ructus acidus inchoatæ coctionis indicium est, sed ex restauratione, ac reditu succorum Chylificationi inservientium, quoniam succi isti sua natura acido-acres esse debent, & ubi antea per Lienteriam hebetes, ac inertes, omnique acore, dissolvendi vim habente, orbat fuerant, cum in pristinum restaurari, & ex acui coeperint, futuram in posterum meliorem ciborum coctionem pollicentur.

Addidit præterea, tunc ructum acidum signum esse bonum, cum antea non extiterit, fortè quia succi illi digestivi hebetes, & effœti, vel propter commistionem aliorum succorum præsertim phlegmaticorum, vel ob mucorem in tunicis, & glandulis Ventriculi hærentem, vel propter eorundem inertiam, ac inefficaciam, veluti à sanguine vapido dependentem, vim, actionemque nullam in cibos assumptos exerere potuerint, qui mox repurgato per iteratas egestionem corpore, acutiores, efficacioresque reddit, deinceps valeant eorundem dissolutionem,

nem, Chylificationemque peragere. Quamobrem, qui succi ciborum dissolutioni dicati, nulli, vel ineffaces erant, comparente ructu acido, illoque perseverante, restituti designantur, unde signum bonum. Necessesse est autem, ut perseveret, nam si momentaneus fortassè foret infidele signum esset.

Sed quid, si ructus acidus adhuc antea per initia levitatis Intestinarum extiterit? Certè ex mente Hippocratis nil boni exinde prælagiri posset: tunc enim acidus ructus potius à cibis ipsis malè digestis proveniret, quàm à succis digestivis in meliorem statum redeuntibus; quamobrem non immeritò Lienteriam ipsam comitaretur, non superveniret. Atqui fieri etiam potest, ut succi ipsitalem, ac tantum acorem nanciscantur, ut longè admodum à naturali conditione declinent, adeoque referant vim, acutiemque Aquæ Stygiæ, proximè ad veneni naturam accedentes, quocircà nedum cibos diluant, ac plus iusto extenuent, sed & tunicas ipsas Ventriculi, ac Intestinarum proritent, & compungant, undè postmodum citissima, ac præproperea nimis in alvum depositio, quemadmodum ex vehementioribus catharticiis, & venenatis quibusdam liquoribus experimur. Sed & insuper à nimia, atque immoderata tunicarum, & fibrarum Ventriculi laxitate id ipsum evenire poterit, qua scilicet fiat, ut assumpti cibi nec comprehendi, nec debito tempore retineri queant, sed sponte sua per pylorum se corrugare nequeuntem in Intestina delabantur, quæ pariformiter affecta, aut premente, ineptaq; istiusmodi mole gravata, foras protrudant. Hinc autem facilè deduci potest evenire quandoque posse Liente-

riam vitio solius Ventriculi malè concoquentis, aliquando verò ex defectu gracilium Intestinarum, succorumq; illuc corrivantium, nō secernentium partes Chyli alibiles ab excrementosis, sed unà simul permistas, ac confusas, ex irritamento statim ad alvum protrudentium, itemque si à tumida, villosaque glandularum substantia quodammodò lævigata, atq; à fibrarum, nervorumq; laxitate, ad debitum tempus continere nequeuntium, indeque fieri, cur aliquando gravior, quandoq; verò mitior Lienteria exoriat, ut exemplis plerisq; compertum est.

Quoniam verò similem sententiam scriptam reliquit Hippocrates 2. *epidem. sect. 2.* his verbis: *diuturnis levitatibus Intestinarum acidum ructum fieri, antea nunquam factum, signum utile, ut Demaneti accidit: fortassè autem est, & arte facere; etenim turbationes huiusmodi alterant: fortassè autem, & acidi ructus levitatem Intestinarum solvunt*; ansam nobis præbet dubitandi, an non æquè expediat Medico ructus acidus excitare, quin etiam & vomitum, cum alioqui nihil de hoc memoratum sit in præsentis aphorismo. Verum Hippocrates *cit. 2. epidem.* hæsitante solum sub particula *fortassè* illum commendat, desumpta ratione ab illa turbatione, seu commotione Ventriculi, qua in eruptione se subvertit, & efflat, ut inde fortassis calor (cujus defectu Lienteria fieri creditur) suscitetur, ac vigeat, & frigidi, tenacesque humores Ventriculi fundo hærentes, submoveantur, & expurgentur; quamobrem cum certum omnino non sit, ex ructu arte promotò Lienteriam fore desituram, proinde factum, cur in aphorismo nil tale retulerit, veluti nondum experimentis

comprobatum. Sed & in diuturna Lienteria affectis, adeoque toto corpore languentibus, nec videtur tam facile ructum acidum, & vomitum tutò excitari posse, nisi dumtaxat ex accidenti, quatenus per medicamenta aromatica, & roborantia Venter, vigor in fibris, & tunicis ejusdem, se quodammodò corrugantibus, promoveatur. Et licet vomitus in alvi fluxibus ex eodem Hippocrate à plerisque Auctoribus commendetur, istamen non nisi inter initia convenit, valente nimirum Natura ejus impetum sustinere, quæ cum ex adverso valde imbecillis esse soleat in diuturnis lenteris, propterea haudquaquam tutum erit ad ejusmodi commotionem illam laceffere. Quod autem ex angustio alicujus vasis orificio potando, creditur promotum ructum prodesse posse, vanum omnino existimaverim, cum non nisi ab interna causa excitatus ructus, isque similiter acidus, in Lienteria commendabilis sit, & signum bonum esse possit.

V. de
hoc Gal.
comm. 2.
in 6. epi-
dem.
tex. 32.
referen-
tem Sa-
binum,
ita con-
sultasse

APHORISMUS II.

Quibus Nares natura humidiores, & Genitura humidior, minus integra sanitate fruuntur: quibus verò contraria, salubrius degunt.

Colligit in hoc Aphorismo Hippocrates ab humidiori, vel sicciori Narium, & Genituræ conditione, meliorem, salubrioremque, vel contra deteriore, insalubrioremque totius corporis constitutionem; simili ferè modo, ac de totius Anni tempestate scripserat 3. Aphorismorum libro, inquit: *Ex constitutionibus Anni siccitates*

sunt imbris salubriores, & minus mortiferae. Et quidem ab humidiori corporum constitutione major excrementorum præsertim crassorum, & phlegmaticorum proventus designatur, quæ partes omnes aggravent, ac hebetent, & sanguinem vitæ thesaurum, sustinendo, fovendoque corpori ineptum, effœtumque reddant; quamobrem majora, & pejora nobis semper accidunt mala ab his, quæ plus justo humefaciunt, ac delaxant: Humidum enim in Viventibus moderatum, balsamicum, & oleosum dictum, minimè verò aqueum, & excrementosum esse debet, quale permucum, & fluentem lympham narium designatur. Scriptum est autem *Natura*, idest à nativitate, atque ex naturali, insitaque corporis habitudine, ad excludendas humiditas illas superfluitates, quæ ex causis externis, vel ab ægritudine aliqua inducuntur, quemadmodum ab aere austrino, cibis excrementosis, potibusque gelidis, ac immoderatis, itemque ex catarrhis, aliisque. In his prætereà arguitur mala, & laxa nimis Cerebri (quod pituitæ metropolis Hippocrati dicitur) constitutio, quæ & lymphicas, ac serosas sanguinis superfluitates facile suscipiat, & susceptas moderare nequeat, sed per nares, cæterasque adjacentes partes sponte sua defluere sinat. Id ipsum quoque indicat Genitura humidior; illa quippe tenax, spumosa, & consistens esse debet; unde cum humida, & fluida nimis est, à consimili sanguinis conditione progenita designatur; Modò ex utriusque partis humida, laxaque constitutione, cæteras quoque omnes pari vitio affectas coniecere licebit, adeoque coctiones omnes, cunctasque operationes inertes, languidasque fieri, ex quibus

nec

nec integra, nec perfecta sanitas exoritur, sed valdè debilis, & contrahendis ægitudinibus multum obnoxia; quandoquidem Cerebrum, & Testes videntur esse præ reliquis, præcipuæ, ac prevalentiores partes, ad vim, vigoremque toti corpori impertiendum, quippe quia ex Cerebro spiritus animales, atque ex Testibus masculeum robur cunctis aliis communicatur. Hinc experimur, Spadones, illosque omnes, qui ejuscemodi aqueis humiditatibus, atque serosis humoribus abundant, esse perpetuò valetudinarios, ingenio hebetes, sensibus obtusos, languidos, excrementosos, & ad quæcumque opera, aut exercitia, tum mentis, tum corporis minùs idoneos. Cæterum comparatè solùm illos his minùs salubres esse dixit, cùm & non minùs sicciore constitutione præditi, suis quoque subiiciantur ægitudinibus. At verò animadvertendum hic est, quòd junctim Hippocrates memoravit *Nares, & Genituram humidiores*, ut ex utriusque complexu de totius Corporis salubritate rectum judicium ferri possit; nam si una, vel altera solùm pars humidior foret, non de toto, sed solùm de illa parte malè affecta, ac debili judicabitur; unde si Nares solùm humescant, cerebrum malè affectum, & imbecillum designabitur; si verò Genitura dumtaxat fluxilior, ac serosior observetur, Testes solummodò, aliæque partes circumjacentes languidæ, & laxæ significabuntur. Debent igitur hæc duo simul jungi, ut de totius corporis constitutione conicere possimus. Id ipsum quoque per eadem ferè verba scriptum est *6. epidem. sect. 6.* unde excerptus videtur præsens Aphorismus, nisi quòd Genitura nedum humidior, sed copiosior quo-

que adiciatur, non minimum scilicet ad causariam valetudinem conducente copia. Hac etiam de causa idem Hippocrates 2. *Aphor. 44.* adnotavit crassa, atque obesa admodum corpora citius interire, quàm gracilia; quoniam facilius in gravissimos, & lethales affectus incidunt, quales sunt Apoplexia, Lethargus, Carus, Paralysis, Oculorum suffusio, Asthma, Hydrops, Lienteria, Diarrhœa, Dysenteria, aliique similes. Contrà verò sicciore, solidiorique Corporis constitutione potiti, salubriorem vitam degunt, utpotè qui puriori, floridiorique sanguine sunt præditi, & partes ad robur, & operationes Vitæ destinatas, solidiores, firmioresque nacti sunt: quod pariter confirmat Celsus *lib. 2. cap. i.*

APHORISMUS III.

In longis difficultatibus Intestinarum cibi fastidium malum, & cum febre pejus.

A Libi Hippocrates 2. *Aphorif.* *In omni morbo dixit, benè se corpus habere ad ea, quæ offeruntur, bonum esse, contra verò malum.* At hic specialius in Dysenteriis, ciborum fastidium adnotat, veluti signum prostratæ virtutis appetitivæ, atque adeò malum, & cum febre pejus.

Verùm animadvertere oportebit, non dixisse Hippocratem in Dysenteriis, seu difficultatibus Intestinarum simpliciter, sed notanter adjecit, *in longis, seu diuturnis*: etenim initiantibus Dysenteriis, ex malo fortassè corporis apparatu, atque ex humoribus acribus, aut oleosis, quales plerumque sunt, qui biliosi vulgò appellantur, non rarò fit, ut statim

statim appetitus langueat, & ciborum fastidium, ac nausea inferatur: illud tamen non tanti existimandum, ut spes omnis absit recuperandæ in posterum appetentiæ, postquam scilicet humores illiacres, & oleosi edomiti, vel evacuati fuerint. At verò cum inter initia Dysenteriae, appetitus non est omnino prostratus, si deinde temporis processu, ægritudine nimirum increbrescente, ille penitus deficiat, & ciborum omnium fastidium insequatur, proculdubio pessimum indicium erit, veluti non à solis humoribus ventriculi tunicas laxantibus progenitum, sed à labefactata ejusdem actione, atque ab emortuis, exsolutisq; succis eidem addictis, dependens. Neque enim tam facile deinceps est, exsolutos ejusmodi succos restaurare, & labefactatas vires reficere, postquam diu cum torminibus alvus egresserit, & Intestina tam malè affecta fuerint; unde & sanguis, & vita ipsa, proximè est, ut tandem deficiat. Accedit, quòd ad reficiendam consumptam ex immodica egestionem substantiam, necessaria omnino est ciborum ingestio, pariterq; conveniens eorundem digestio, & chylicatio, quæ, nisi ventriculus benè se habeat ad appetendum, & concoquendum, nullatenus haberi poterit; quamobrem de omnimoda virium deficientia subindè adhuc verendum erit.

Sed quomodo fieri potest, ut in Dysenteria, etiam ab initio appetitus ciborum habeatur, procedente verò tempore deficiat? Ratio petenda videtur ab ipsismet Intestinis malè affectis sive superioribus, & gracilibus, sive inferioribus, & crassis: læsis namque Intestinis solum crassis, & potissimum Recto, benèque se habentibus superioribus, &

gracilibus, facilè est, ut appetitus ciborum habeatur, qui tamen nullus, vel valdè imminutus erit, cum superiora, & gracilia Intestina, quibus ventriculus proximè alligatur, afficiuntur; Et quoniam procedente, productaque Dysenteria, erosiones, aut ulcuscula adhuc in Intestinis crassis contracta, sensim, sensimque repere possunt in partes superas, & nedum Intestina gracilia, verum etiam ventriculum ipsum contaminare; propterea fieri potest, ut Dysenteria inter initia appetentiam non lædat, progressu verò temporis nauseam inferat. Adde quòd morbi omnes initiantes debiliores semper sunt, sensim verò invalescentes graviores fiunt attritis viribus, & languescente natura.

Quod diuturnis Dysenteriis ciborum fastidium superveniens malum hætenus dictum est, longè pejus erit, si cum febre conjungatur; & quidem, sive febris à principio Dysenteriam comitetur, sive in ejusdem decursu superveniat: etenim ratione febris vitium quoque in sanguine inductum designatur; atqui longè gravius erit, si febris, quæ à principio deerat, vel levis admodum videbatur, mox cum ipso ciborum fastidio supergrediatur, aut increbrescat; quippè tunc vel inflammationem, vel mortificationem ibidem factam designat. Id quod etiam notavit idem Hippocrates 6. *epid. sect. 7.* his verbis: *In longis Dysenteriis cibi fastidia mala, tum aliàs, tum si in super febrierint*: ubi duo notabiliora commemorat: primum, quòd ciborum fastidium non semel, sed pluries, & diu perstiterit, nam usus est plurali numero, *cibi fastidia*: alterum, quòd tum aliàs, tum si in super febrierint, ubi per particulam *in super* supervenientem febrem designat.

Neque

Neque hoc novum in praxi, quæ pluries constitit Dysenteriam citra febrem accidisse, sed & nedum absq; febre, verum etiam absque cruentis egestionibus visam gravissimi Doctores attestantur, illamque epidemicam, & populariter grassantem, de qua præ cæteris meminere Vvillius, & Sydhenam, itemque Bonetus in suo *Sepuchreto*, alique, ut propterea mirum non sit, quamobrem Hippocrates dixerit *diuturnis Dysenteriiis*, cum tamen Dysenteria inter morbos acutos reponatur: etenim fieri potest, ut illa, potissimum incruenta, in longius tempus protrahatur, utpote in Recto intestino crassiori excitata, quemadmodum etiam in Tenesmis experimur.

APHORISMUS IV.

Ulceræ circumglabra prava sunt.

Ulceræ circumglabra dicuntur, ex quorum ambitu, & circa illorum labia pili decidunt, ac decisi nullatenus renascuntur. Sive autem ulceræ ista à causis internis fuerint inducæ, sive ex præcedenti vulnere relicta, perinde erit, modò ab affluxu pravorum humorum, circumjacentes pili è suis radicibus abradantur, & sponte decidant. Hinc ubi Leonicenus, alique Interpretes scribunt *ulceræ*, Fuchsius mavult legendum *vulnera*, quæ tamen in ulcus desierint, ut proinde non ex vi vulneris, sed ex pravo, malignoque humore in vulneris labiis restagnante, radices pilorum erodantur. Addit etiam Cardanus præter pilorum casum, cutis desquamationem, ut ab iisdem humoribus malignis, & erodentibus, ne dum radices pilorum, sed etiam cutis, & caro subjecta depravetur, & inficiatur.

Tozzi Op. Med: Tomo IV.

Ab ejusmodi igitur pilorum defluxu, & cutis desquamatione, clarissime deducitur, ulcera ipsa evasisse maligna, & cacoethica, vel à vitio ejusdemmet partis ulceratæ corrumpentis alimentum, vel à toto malos humores in eandem partem deponente, quemadmodum observare solemus in corporibus gallica lue infectis. Hinc autem docemur, pro talium ulcerum curatione, corpus omnino esse repurgandum à pravis, deleteriisque succis ulcera ipsa inficientibus, ac prætereà alexipharmacis, ac specificis oppugnandum; nisi enim pravi illi humores eliminantur, & alimentum, quod parti affectæ suggeritur, purum, temperatumq; fiat, proculdubio ulcus nunquam ad cicatricem perducetur. Hanc eandem sententiam scriptam etiam invenies 6. *epidem. sect. 7.* sub his verbis: *Ulceræ circumglabra maligna sunt*; quare hic Aphorismus desumptus exinde videtur.

APHORISMUS V.

Dolores laterum, pectoris, & aliarum partium, si multum differant, sunt considerandi, perdiscendum.

Quo pacto vertit hunc Aphorismum Leonicenus, obscuritatem parit; quare melius legendum cum Fuchσιο, & Cardano, quorum alter è græco Codice transfert: *Dolores, qui fiunt in latere, & pectore aliisq; partibus, num multum prævaleant, differantve, considerandum.* Alter verò, ita scribit: *Dolores, qui sunt in lateribus, & pectore, atq; aliis partibus, an multum varient, perdiscendum*; cui consentit etiam Mercurialis. Et quidem utraque hæc versio clarior est, per quam Hippocrates Medicos consulere videtur, ut

Confer.
Hipp. 6.
epidem.
sect. 7.

L par-

partem affectam in doloribus inter-
noscere curent: nisi enim partes af-
fectæ suis indiciis distinguantur, cu-
ratio haudquaquam prosperè insti-
tui poterit; etenim in doloribus,
non solum distinguenda erit doloris
species, num ille acutus, & pun-
gens, an verò obtusus, & gravans
sit, num tendens, aut inflans, num
pulsans, aut convellens; verum et-
iam à quibus causis potuerit induci,
in qua speciatim parte, cum quo
morbo conjunctus, quo anni tem-
pore, quave tempestatis constitu-
tione contingat; siquidem ab ho-
rum accidentium, & circumstantia-
rum varietate, partes affectæ, illa-
rumque speciales ægritudines cum
suis causis facilius discerni poterunt.
Et quidem pungentes dolores ab
humoribus acribus, gravantes à
crassis, & pituitosis, inflantes à fla-
tibus oriri solent; sicut pariter pul-
sans fit in arteriis, convellens in ner-
vis, & membranis, acutus in par-
tibus sensitivis, obtusus in glandu-
lis, & viscerum parenchymatibus:
qui contingunt æstate, plerumque ab
humoribus tenuioribus, qui in hye-
me, à crassioribus; atque ita de cete-
ris: Modò pro istorum varietate, va-
rianda quoque curatio erit, ut patet
ex methodo medendi. Dat autem
exemplum Hippocrates in hoc tex-
tu, de doloribus laterum, & pectoris;
& pro lateribus intelligit costas cum
adjunctis musculis mesopleuris, &
intercostalibus dictis, prout utrum-
que latus dextrum, & sinistrum occu-
pant; pro pectore verò intelligenda
est pars anterior ejusdem, ubi costæ
sterno adnectuntur, & non solum se-
cundum partem anteriorem, & ex-
ternam, sed etiam secundum partem
internam ejusdem pectoris; nam non
eodem modo dolor in utrisque con-
tingens pectus ipsum afficit; cum

pars interior, & membrana illa;
quam pleuram vocant, sensu exquisi-
tiori communita, acutiùs dolet; pars
verò extima musculis contacta, non
adeò acuto sensu torqueri solet. Ita
quoque dolor aliter afficit pulmonem,
ac pleuram, aut musculos interco-
stales: quamobrem benè constat pro
diversitate partium affectarum cu-
rationem diversimodè esse insti-
tuendam.

Neque solum qualitas doloris, sed
ejusdem magnitudo consideranda
est, num scilicet exiguus, & levis sit,
an verò magnus, & excedens; inde
enim designabitur causa dolorem fa-
ciens, vel levior, vel gravior; vel ab-
undantior, vel parcius; vel tenuior,
vel crassior; vel tenaciùs infixæ, &
recondita, an verò superficie tenus
dumtaxat adhærens.

Considerandum insuper est, num
in longius tempus dolores sint pro-
cessuri, ideòque diuturniores, an ve-
rò sint citiùs desituri; & num per ip-
sam eandem, qua incœperint, anni
tempestatem, puta qui hyeme, intra
hyemale quoque tempus finiri pos-
sint, an potiùs ad aliam sequentem,
nempe vernalem, vel æstivam protra-
hendi sint, ut ex eodem Hippocrate
colligi potest 6. *epid.* ubi de constitu-
tione quadam in Perintho vagata,
sermonem habet. Quare non irratio-
nabiliter quis conjectabitur ex dolo-
rum varietate, diversam morbi cau-
sam, morbi que magnitudinem, mo-
tum, & morem, cum parte specialiter
affecta, ut fusius declarat Galenus 2.
de locis affectis cap. 2. Hinc, quod Hip-
pocrates hic exempli causa de dolo-
ribus pectoris, & costarum protulit,
ut inter se invicem distinguantur, ap-
tandum quoque erit cæteris parti-
bus, si dolore afficiantur, ut ex iis-
dem signis discerni possint, puta cum
dolor divexat Illa, num internæ, an

externæ partes ventris afficiantur, & num Renes, an Intestina, an etiam reliqua viscera adjacentia: quæ sanè, ex documento ejusdem Galeni c. l. à quinque fontibus deducuntur, nimirum à natura, & conditione doloris, à situ, ab accidentibus adjunctis, ab excrementis, & ab operationibus læsis.

Postremò advertit Galenus *in comm.* etiam in pluribus individuis dolores, iisdem in partibus inductos, ex supradictis indiciis posse diversificari; si nimirum considerentur doloris species à vehementia: Etsi enim duo individua costarum dolore crucientur, si fortassè tamen in uno dolor sit pungens, in altero tendens, vel gravans: aut in uno vehementior sit, levior in altero; equidem in illis & causa doloris, & pars affecta variabit, pro eorumdem diversitate.

APHORISMUS VI.

Renum, & Vesicæ vitia in Senioribus difficulter sanantur.

UBi Leoniceus simul unâ Renum, & Vesicæ vitia conjungit, alii Interpretes, & præsertim Fuchsius, & Cardanus disjunctim legunt; unde Aphorismum hunc è græco Codice ita vertunt: *Vitia Renum, & quicumque dolores vesicæ*: quasi verò Renibus accidant quidem morbi, sed non cum magno dolore, quoniam illorum substantia parum sensitiva est; at verò multum sensilis substantia Vesicæ, utpotè membranosa. Verum ista non multum faciunt ad sententiam aphoristicam explicandam; etenim sive aliter afficiantur Renes, ac Vesica, sive etiam diversis morborum generibus divexentur, non tamè Hippocrates ex ipsorum varietate, eorumdem viscerum insanabilitatem,

vel difficilem sanationem desumpsit, quippe qui solum ægrotudines ipsis contingentes considerans difficulter sanabiles in senioribus recensuit, respectu ipsiusmet ætatis. Et quamvis iidem Authores pro Senioribus intelligant, qui in prima senectutis ætate sunt, ut videtur deduci posse ex eodem Hippocrate 6. *epid. sect. 7.* ubi Renum affectiones post annos quinquaginta se non vidisse sanatas scribit; nihilominus quia ibi de ulcere Renum, & Vesicæ, verba facit, non autem de reliquis, Renum, & Vesicæ ægrotudinibus; & aliquando etiam visum, senes inter initia senectutis, à quibusdam Renum, & Vesicæ affectionibus fuisse vindicatos; verisimilius propterea credere licet, istiusmodi morborum curationem in proVectioribus senibus omninò difficilem, aut etiam impossibilem existimasse: modò etiam inter homines in senio constitutos magna differentia facienda est, nam quidam post sexagesimum annum, & ultra, robusti, atque multis aliis, etiam minoris ætatis, fortiores sunt; contra verò alii, ante quinquagesimum adeò imbecilles, & languidi observantur, ut ne dum à Renum vitiis, sed ab aliis multo levioribus ægrotudinibus liberari nequeant.

Sed unde est, quòd senes ab ægrotudinibus Renum, & Vesicæ difficulter liberentur? Omnes ferè vetustiores Interpretes causam ad excrementorum multiplicationem, ad expultricis languorem, & ad meatuum angustiam retulerunt. Sed & Galenus, & cum Galeno Cardanus, quæ Hippocrates indefinite de Renum, & Vesicæ vitiis scripsit, ad ulcera dumtaxat contrahunt; pro quibus curandis quiete inquiunt opus esse, quæ nulla esse potest in Renibus, & Vesica, perpetim addictis secretioni, &

expurgationi urinariæ ferofitatis. Verùm hæc cunctis ætatibus communia sunt: quinimmò multitudo excrementorum, & meatuum angustia, longè manifestior est in ætate puerili, quàm in reliquis. Putaverim ea propter ego curationis difficultatem in senibus specialiore esse à vitio acoris muriatici in sanguine, lymphæ, cæterisque liquoribus temporis progressu sensim, sensimq; contracti, cujus causa urina ipsa acriori sale prædita, & serum, quod à sanguine repurgatur, acidius effectum continuam excitant in urinariis partibus pruritum, & molestiam, unde quidquid vitiosi in corpore exuperat, ad eas partes delatum, ægritudines reddit difficiliore, ut propterea nequeant ab iisdem senes ulatenus vindicari. Renum autem, & Vesicæ morbi senibus contingentes, sunt, dolor nephriticus à calculis, vel arenulis, urinarum suppressio, stillidium, aut ardor, Vesicæ scabies, & urigo, qui sanè pro causa viscosos, acidosque succos recognoscunt difficulter emendabiles, atque inducta semel vitia assiduò foventes, quemadmodum aliàs à nobis ostensum est. Porro si hæc omnia in cæteris quibuscumque, cujusvis ætatis, & constitutionis, difficulter emendantur, quanto magis in Senibus incorrigibilia fient, in quibus omnia languent, & ex ipsa per ætatem mutatione, semper in pejus ruunt, cum & fermenta viscerum in acidum degenerent, ac sanguis ipse sensim, sensimq; vappescat, coctiones omnes infirmæ fiant, excrementa cumulatiora, & crudi lentiq; succi in cunctis visceribus contrahantur, & hæreant: quamobrem idem Hippocrates 2. aphor. dixit *Raucesines, & Gravedines in iisdem difficulter maturari;* sed & articulorum dolores, paraly-

ses, tusses, alvi fluxus, alique morbi insanabiles in ipsis observantur. Meminit autem speciatim hoc loco de Renum, & Vesicæ vitiis, quia ab his, præ cæteris, senes gravius affici solent, tum ob feri urinarii acritatem, tum ob tubulorum renalium laxitudinem, & sphincteris Vesicæ musculi languorem, tum demum quia per hos ductus potissimum cuncta Corporis recrementa, quæ in illis abundantissima sunt, perpetim deducuntur; unde illos experimur assiduis mejendi stimulis infestari, & micturiendo plurimum cruciari.

APHORISMUS VII.

Dolores ventris sublimes, leviores; qui verò non sublimes, fortiores.

Distinguit in hoc aphorismo Hippocrates dolores Ventris in sublimes, & non sublimes, illosq; ait leviores esse, hos verò nedum graviores, sed fortiores. Quid autem intelligat per dolores sublimes ventri contingentes, num scilicet secundum corporis longitudinem, an verò secundum ejusdem profunditatem, controversatur inter Interpretes. Et cõmunior sententia est, loquutū hinc Hippocratem de doloribus secundum Corporis profunditatem consideratis, ut qui subter peritonæum fiunt, longè graviores, & vehementiores sint, leviores verò, qui supra. Atqui Cardanus, solito sui contradicendi animo, cæteris omnibus se opponit, contenditq; debere intelligi secundum Corporis longitudinem, ut nimirum, qui in parte ventris supera, ubi Ventriculus, Jecur, Lien, Duodenum Intestinum, & pars Coli latior continentur, accidunt, non ità graves sint, quemadmodum sunt, qui fiunt in parte inferiori, & in Intestino Illeo, Monoculo, Reni-

Renibus, & Vesica. Sed valdè demior, Cardanum, Virum alioqui solertissimum, voluisse in re tam clara cecutire, & Galeno, cæterisque Interpretibus contradicere, ipsumque se gravissimis difficultatibus implicare, quas profectò cavisset, retenta communi explicatione. Quis enim unquam leviores putaverit dolores Stomachi, & Ventriculi, itemque Pylori, & Duodeni, quæ sanè partes sunt atrocissimis doloribus quam maximè obnoxia, & non sine gravi vitæ periculo contingentes; unde Hippocrates 2. *epid.* & *in prognost.* dixit, dolores, & tumores supra umbilicum periculosiores esse. Quamvis super ratione voluerit, Renes inter partes inferiores collocare, non satis benè constat, cum ex Anatome habeatur sinistrum Renem intestino Colo adhærere. Quæ insuper obiicit de partibus supra Peritonæum sitis, levissima sunt, cum tam muscoli Abdominis, quam cutis ipsa, quæ ibidem crassior sanè est, doloribus multoties afficiuntur acutissimis, & nedum tumoribus œdematosis, verum etiam inflammatoriis molestantur, atque in Tympanite magis cruciantur, quam aliæ partes interiores. Cæterum facta comparatione partium supra Peritonæum cum illis, quæ infra ipsum sunt, quis ignorat, quod longè graviores accidant dolores Intestinis, Mesenterio, Ventriculo, Utero, & cæteris Visceribus hinc inde sitis? Verumtamen pro fortioribus doloribus, congruentius graviores, seu periculosiores, subrogare licebit, cum gravius, periculosiusque sit in interioribus partibus laborare, quam in exterioribus, etiam si dolor hebetior, & obtusior in his percipiatur. Quod si præter dolores adiiciamus quoque tumores, ut plerique expositores ex græco Codi-

ce addendos volunt in Aphorismo, planè cuique perspectum erit sublimes, idest ad superficiem ventris positos intelligi oportere; nisi etiam verbum *Μετέωρον*, quod in textu græco est, suspensum, elatum, pendulum interpretemur, ut dolores hic voluerit Hippocrates intelligendos, qui fixi non sunt, nec partibus tenaciter hærentes, veluti ab humoribus tenuioribus, & facilè exhalabilibus progeniti, ut contradistincti ab his, qui tenacius hærent, nec tam facilè resolvuntur. Quod præterea de ventre dixit, si ad alias omnes corporis concavitates extendamus, proculdubio à veritate alienum non erit; ut sensus fiat, dolores sublimes, seu superficiarios, leviores semper esse, minùsque periculosos ab his, qui in profundioribus partibus accidunt, quippe qui principales corporis partes illi non afficiunt, sicut isti suapte natura graviores.

APHORISMUS VIII.

Aqua intercute laborantibus, ulcera in Corpore facta difficulter sanantur.

DE duobus videtur hinc Hippocrates Medicos commonefacere, primò quidem, quòd ulcera in hydropicorum corporibus enata difficillimæ sint curationis, atq; adeò omninò vitanda, ne fiant, etiam sponte adigente natura: alterum, ut exinde Medici caveant, ne ulcera in ipsis excitent, fortè ad totius corporis repurgationem, inde sperantes ab humoris aquosi per cutim evacuatione, fore illos ab hydropisi liberandos. In id ipsum convenit etiam Celsus *lib. 2. cap. 2.* hanc eandem sententiam ab Hippocrate mutuatus.

Sed statim sese exhibet difficultas enodanda, de quibus Hydropicis hanc sententiam ipse protulerit. Et quidem de ea Hydropis specie, quæ Anasarca vocatur, locutum hic testantur tum rationes, tum experimenta; quamobrem summo iudicio peritiores Interpretes exponere studuerunt è græco Codice non Asciticos, quibus scilicet aqua in abdominis cavo collecta est, sed Anasarca, aut Hyposarca affectos, in quibus aqua per totum corpus diffusa sub cute restagnat, ut propterea Aqua Intercus morbus hic à Latinis appelletur. Cum enim hydropicorum aqua sub cute constiterit, & universum corporis habitum tumidum effecerit, nedum humiditate, & edematosa crassitie cutem ipsam inficit, verum etiam falsilagine muriatica, & acore maligno, circumjacentes partes infestat; unde cum præ nimia distensione cutim extenuaverit, concurrente prava ejusdem humoris conditione, ulcera excitabuntur vix, ac ne vix quidem sanabilia. Atque hinc quotquot hætenus Anasarca laborantes visi sunt cum enatis ulceribus in tibiis, aut cruribus, in mortem tandem concesserunt, omni prorsus curationis spe destituti; immò in aliquibus, ulcera ipsa versa sunt in gangrænam, & sphacelum, non solum ex languore vitalis caloris ibidem contracto, verum etiam, ob virulentam humoris conditionem irrumpentis in cutem. Cæterum etsi in Ascite, ac Tympanite solus imus venter tumeat ab aqua, vel à flatu cum aqua permisto, cæteris partibus corporis pene exarescentibus; si tamen aliquando fiat, ut reliquæ etiam partes, præsertim infernæ, tractu temporis, intumescant, & aqua scateant, idem, ab exorto in illis ulcere, præsagiendum. Porro quod

in Ascite, & Tympanite rarò accidit, frequentius fieri solet in hydrope pectoris, aut pulmonis, in quo pedes, & tibiæ sensim, sensimque intumescunt, ac attolluntur, ut exindè procedente morbo, ulcera etiam erumpant, & enascantur, pari profectò de causa insanabilia. Id ipsum quoque accidere non rarò consuevit ex diruptione vasorum lymphicorum, quæ plurima per articulos pedum disperguntur, si tamen lymphæ ipsa acorem muriatico-salsum contraxerit; siquidem tumores è simplici, & innocua lymphæ procedentes tale quid haud inferunt, & sæpissimè cum laborantibus consenscunt. A prava itaque, & maligna humoris lymphici conditione istiusmodi ulcera insanabilia exoriri dicendum, non verò à sola humiditate, quæ nisi pravitatem adjunctam habeat, facile absumi, corrigi, & exsiccarî tandem poterit.

Hinc igitur clarè admonemur non posse tutò in hydropicis ulcera excitari: nam si sponte naturæ inducæta, insanabilia fiunt, quanto magis difficillima evadent, & periculosa, ab arte promota. Perperam ea propter agunt, qui sibi tibiæ cauteriis inuri permittunt, sperantes exinde omnem serosæ superfluitatis malitiam iri evacuatum; nam præterquamquòd nil peccantis humoris, sed solius particularis laticis, aut alibilis succi portio inde deduci solet, etiam imminenti vitæ periculo se subiiciunt, à gangræna mox mox successura, ut in plerisque observatum. Qui verò referuntur hydropici ab erumpentibus sponte vesiculis, atque ex affluente ab illis sero aliquantulum levati, adhuc etiam postea periere, superstitè nimirum semper causa hydropisim faciente; sed & nonnullos quoque observavi, etiam

etiam ab egesta, & abundanter evacuata per alvum aqua, etsi ventre detumuerint, ac de recuperata salute certam spem conceperint, mox tamen, congesta denuo aqua, irreparabiliter periisse. Denique, quamvis dictum sit, ulcera in Anasarca laborantibus difficillimè sanari, ac de his potissimum mentionem fecisse hoc loco Hippocratem, & quòd sub cute lympham crassam acido-salinam restagnante habeant; non tamen inde deducendum in cæteris Hydropis speciebus, licet cutis externa non tumeat, nec ullam sub se stagnantem aquam contineat, ulcera fortassè ibidem contracta sanabilia reddi; cum cunctorum hydropicorum corpora malam in sanguine diathesim, & pejorem in solidis partibus habitudinem sortiantur, quo circa partes omnes imbecillæ redditæ, & succus alibilis effœtus, atque inidoneus effectus, nutritioni, facile deinceps, quam non habent, subire possunt insanabilitatem. At qui tumores etiam illi, qui crassam lympham, glutinosamque materiam, præsertim folliculis conclusam, continent, inter difficulter sanabiles recensentur, quales sunt Strumæ, Melicerides, Steatomata, Atheromata, & Oedemata, eoque magis cum diuturniora, atque inveterata evaserint.

APHORISMUS IX.

Lata pustula non admodum pruriunt.

HANCE eandem sententiam scriptam habemus 6. epidem. sect. 2. sub his verbis: *lata pustula non valde pruriginosæ sunt*: Inde ergo desumptus est hic Aphorismus, quod docemur non eodem modo se ha-

bere pustulas sublimes, & in altum, five acutum se attollentes, ac sunt pustulæ latæ, & juxta cutis superficiem expansæ. Quamquam enim in cute erumpere soleant varia tuberculorum, & papularum genera, ut sunt exanthemata, & efflorescentie cutaneæ; itemque Pfora, Lepra, Impetigo, Lentigo, Herpes; considerat nihilominus hic Hippocrates pustulas (sub nomine græco exanthematum indigitatas) quæ ad tubercula quidem referuntur, sed haudquaquam in saniem purulentam desinentia: etenim pustulæ potiùs in squamosa quædam, & furfuracea excrementa commutantur, fierique solent ex humoribus tenuioribus, vel acido-acribus, aut acido-salsis. Facta autem comparatione inter eas, quæ latæ, & eas, quæ elevatæ, & acutæ sunt, minùs quidem pruriginosæ observantur illæ, quàm istæ. In latis enim, & expansis pustulis humor peccans ad cutim delatus crassior esse solet, quam obrem non multum attollitur; in montuosis verò, & sublimibus, humor est tenuior; quocirca verisimile admodum est in prioribus lympham, in posterioribus serum sanguinis vitiosum ad corporis habitum extramitti. Id ipsum passim quoque experimur in Variolis, & Morbillis, quippe hi angulosi, ac pyramidales à tenuiori humore progenti, dolorem, & pruritum excitant molestiorem; illæ verò, veluti à lymphæ, aut crassiori parte sanguinis procedentes, sicuti sua corpulentia in latum expanduntur, ita minùs pruriginosæ observantur. Sic scabies, & pfora, cum in exiguas eminentias, sed acutas, erumpit, molestior fit; secus verò cum in laras, & expansas: quod sanè non aliunde provenit, quàm à varietate humo-

riserumpentis tenuioris, vel crassioris. Quòd autem humores acres, acidi, ac falsi pruritus istiusmodi excitent, palàm fit, attenta conditione istorum humorum simul erodentium, & cutim ipsam vellicantium, ea tamen differentia, ut si acritudo prævaleat, præter pruritus, inducatur quoque cutis erosio, aut ulceratio, nisi præ nimia tenuitate, & pororum laxitate, sensim dissolvatur, & evanescat; at verò si prævaleat falsedo præsertim muriatica, pruritus squamulæ furfuræ comitabuntur. Cæterum in utrisque Acidum semper exorbitat, cujus causa humores concresecunt, & cuti adhærent.

Quamquam autem pruritus ab humoribus acris, aut muriaticis, plerumque proficiscatur, observatum aliquando tamen est in cutaneis hisce eruptionibus, præsertim in scabie, herpete miliari, variolis, aliisque, ope microscopii, vermiculos, pediculorum instar, innasce, atq; ab his molestissimum pruritus illum excitari: de qua re libellum epistolarem conscripsit ad Franciscum Redium Joannes Cosimus Bonomo Liburnensis, atque alii post ipsum simili industria, & diligentia idem detexerunt. Atque hinc factum putaverim, non quibusvis medicamentis cutem sordidam mundificantibus cutaneas istas ægritudines, molestosque pruritus cedere solere, sed iis solum, quæ vermiculos istos enecant, qualia sunt, quæ ex mercurio tum crudo, tum sublimato, componuntur, licet ab aliis quoque, puta sulphure, helleboro albo, staphisagria, calce, minio, & similibus vitiosi isti humores corrigi, & emendari possint.

APHORISMUS X.

Caput dolenti, & vehementer laboranti, pus, vel aqua, vel sanguis effluens per nares, aut os, aut aures, morbum solvit.

IN hujus etiam Aphorismi expositione alienus est Cardanus à communi reliquorum versione; etenim ubi cæteri legunt, *Caput dolenti, & vehementer dolenti*, ipse exponit *circumdolenti*; nec malè; ita ut velit intelligendum esse non solum de dolore capitis interno, verum etiam externo, qui scilicet totius capitis ambitum occupet. Sed tamen si præter capitis dolorem simplicem, & tolerabilem, dicamus voluisse Hippocratem vehementiorem designare, non erit, cur communem quoque versionem retinere non debeamus, quippe cum dolor capitis vehemens est, causam arguit materiales, corpulentam simul, & copiosam; quæ non tam facile discuti, & resolvi possit, quemadmodum à tenui humore, halitu, vel vapore proveniens: quomobrem vehemens capitis dolor acutiem simul, & magnitudinem designat, qui propterea manifesta evacuatione curari debeat. De hoc itaque scribit Hippocrates: *si sanguis, pus, vel aqua è naribus, auribus, aut ore effluat, morbum solvit*; evacuatam nimirum materiam, quæ tanti doloris causa erat.

Sunt autem hic duo potissimum advertenda. Alterum ex parte causæ materialis inducentis dolorem, quæ non una, & simplex ponitur, sed varia, & multiplex; puta vel pus, vel sanguis, vel aqua: Alterum ex ratione loci, unde humores ipsi effluere possunt, videlicet ex naribus, auribus, aut ore: etenim hi ductus pa-

Consentit etiam Mercur.

ten-

tentiores sunt, ut per ipsos, quæ continentur intra calvariam, possint educi.

Et quidem causa istiusmodi doloris potest esse primò sanguis, si per plexus choroidem, & reticularem non benè circumire queat, sed fortassè alicubi restagnans, potissimum in meningibus, in causa sit, ut in exilibus illarum venulis, & arteriolis circumquaque diffundatur, & dolorem afferat vehementissimum, tum ratione ejusdemmet sanguinis ob impeditam circulationem indebitè fermentescentis, tum etiam ratione earumdem membranarum exquisitissimo sensu præditarum. Quòd si fortè, restagnans ibidem sanguis, ex indebita fermentatione, computrescat, & in pus vertatur, idem, & gravius certè malum afferet. Si denique simile vitium in lymphâ inductum fuerit, ut ex præpedito sui motu hæreat, & acritatem contrahat, proculdubio vehementem quoque dolorem inferet. Humores siquidem isti per universum ferè cerebri corticem diffunduntur, quocircà in suo circuitu impediti, acritate, aut falsilagine contracta, meninges divexant, & dolorem vehementissimum excitant, totius capitis ambitum occupantem.

Loca verò, per quæ humores isti exitum habere possunt, non nisi Aures, Nares, & Os sunt, quoniam per ista, veluti emunctoria Cerebri, solet Natura, omnes illius superfluitates crassiores repurgare, quemadmodum Anatome etiam detectum. Excreto autem sanguine, pure, aut lymphâ, nedum dolor capitis desinit, verum etiam alius quicumque morbus, qui exinde posset imminere, protinus solvitur: At verò ex adverso ipsis detentis, & per cerebri substantiam diffusis, Apoplexia, Convulsio, Lethar-

gus, Phrenitis, aliq; gravissimi morbi suboriuntur, & sæpissimè cum patientis interitu. Quare jure optimo dixit Hippocrates, sanguine, pure, vel aqua effluente, non solummodò dolorem, sed morbum solvi; quia ex his non solum dolor, sed alius morbus capitis evenit, vel imminet, qui simul cum dolore desinet, quandoque detenti illi humores fuerint excreti. Excipiuntur autem Oculi: quoniam minimè consentaneum Naturæ foret, tam corpulentos humores, nempe sanguinem, pus, aut lympham per angustissimos oculorum canaliculos expurgari, nisi cum maximo eorumdem detrimento; quin & neque oculi ipsi tantam humorum colluviam excipere possent, cum cæteroqui glandulæ in eorumdem angulis sitæ vix, ferofiores, & tenuissimos liquores admittant. Cæterum crassiores alii humores, si fortassè eas in partes deferantur, damnum potius, quàm levamen afferunt. Id ipsum pariter accideret, si in spinam, in guttur, in gulam, palatum, & venas deponerentur, in quas etiam partes, ex doctrina ejusdem Hippocratis *lib. de glandulis*, solet Natura cerebrum à suis superfluitatibus repurgare; quandoquidem, ut evacuatio quælibet salutaris sit, nedum totius vitiosi humoris necesse est, ut fiat, sed per ea quoque loca, quæ conferentia sunt; quemadmodum idem Hippocrates alibi edocuit. Ex quibus omnibus nunc admonemur, Naturam ejusmodi evacuationes in vehementibus doloribus capitis tentantem, vel sollicitandam, vel adjuvandam esse, dissolventibus, & per eadem loca educantibus medicamentis, si nimirum illa tarda, vel imbecilla sit.

APHORISMUS XI.

Melancholia, & Nephritide laborantibus hæmorrhoides supervenientes bonum.

Qua ratione Nephritici, & Melancholici solius Naturæ beneficio juventur, docet in hoc alio Aphorismo Hippocrates; idque asserit commodè, & salubriter accidere, si hæmorrhoides illis superveniant.

Quinam autem intelligi debeant Nephritide, aut Melancholia laborantes, dubium esse potest; nam Melancholia aliquandò sumitur apud Veteres pro ipso humore melancholico; & aliquando pro specie cujusdam delirii, in quo timent, & morerent ægrotantes citrà causam manifestam, ut idem Hippocrates *hoc eodem libro, aphor. 23.* Nephritis verò, propria Renum ægritudo est, quæ cum eorundem inflammatione contingit. At cohærenter rationi, & experimento dicendum, Melancholiam hic sumi pro morbo, & Nephritidem pro ea dumtaxat Renum affectione, quæ ab affluxu acidorum succorum in eas partes provenit, quemadmodum speciatim est dolor nephriticus à calculis, arenulis, atque à tuberculis in Renum substantia, aut in canaliculis eorundem progenitis. Hinc non immeritò plerique Interpretes legere maluerunt *vitia renum*, quàm *Nephritidem*, ut scilicet comprehenderent non solum renalis substantiæ affectiones, sed etiam quæcumque alia accidentia in Renibus inducta.

Qua autem de causa supervenientes hæmorrhoides, melancholicis, & Renum vitio laborantibus, conferant, ratio in promptu esse potest,

quia per ejusmodi sanguinis melancholici, & crassi profusionem, vel minuitur, vel omninò evacuat acidus ille humor cum sanguine commistus, cujus causa melancholicum delirium contingit, & prædicta vitia Renibus accidunt. Constat enim ex Anatome sanguinis impuritates tartareas, & acidas per hæmorrhoidales, sive venas, sive arterias (potissimum externas) feliciter repurgari, cum istæ consentiant cum arteriis (splenicis, & mesentericis, ex quibus acidi succi, tartarei, & melancholici in inferiores partes ventris à provida Natura deducuntur. Hinc experimur malè affecta, & cachyma corpora per laxatas ejusmodi venas hæmorrhoidales, ne dum à præsentibus, sed etiam ab imminetibus gravissimis ægritudinibus præservari; sicut contra à suppressa illorum evacuatione, pessimos morbos tum cordis, tum capitis exoriri, ut de Alcippo retulit Hippocrates 5. *epidemicorum*, qui à suppressis hæmorrhoidibus insanivit, & periit; quinimò sequenti aphorismo dicitur, Tabem, vel Hydropem succedere, nisi una saltem ad aperta servetur.

Verùm debent hæmorrhoides Melancholicis, & Nephriticis supervenire, ut subinde proficiant: nam si forsitan illos ab initio comitentur, tantum aberit, ut conferant, ut potius noceant, & pessimum signum sint, alterius gravioris ægritudinis; quippe indicabunt tantam, ac talem pravitatem, tantumque a core in sanguine exorbitare, ut unà simul melancholicum delirium, aut renum vitia foveat, & hæmorrhoidales venas, aut arterias proritet, ac reseret. Quare tunc solum conferet per hæmorrhoidas evacuatio, cum per acidi humo-
ris.

ris repurgationem subtrahitur, vel divertitur vitium læsionis Cerebri, aut Renum: quod sanè non contingit, nisi fluxus iste supervenerit. Cæterum dixit Hippocrates, *bonum esse*, desumpta nimirum bonitate tum ex parte humoris excreti, qui, utile est, ut evacuetur; tum ex parte viscerum firma, validaque constitutione præditorum, quæ scilicet à se ipsis vitiosos humores repurgent, & ad alvum, veluti ad totius corporis sentinam, depellant.

Quamquam autem hic Melancholicis, & Nephriticis solum hæmorrhoides supervenientes utiles, conferentesque referantur, alibi tamen ab eodem Hippocrate aliis quoque morbis proficere memorantur: etenim 6. *epidem. sect. 3.* dicitur: *Qui hæmorrhoidas habent, neque pleuritide, neque peripneumonia, neque phagedena, neque furunculis, neque tuberculis, terribinthe figuram habentibus, corripiuntur; fortassis autem neque lepris, neque vitiliginibus, &c.* Quin & nonnulli pro Nephriticis, Phreniticos legunt, immò voce etiam generaliori Insanientes; cum re ipsa insanientibus omnibus ejusmodi fluxus prodesse soleat, quemadmodum *Aphor. 21. huius* subnectitur: *Insanientibus si varices, vel hæmorrhoides supervenerint, insanie solutio fit.* Morbi siquidem isti ab acido coagulante, ac figente sanguinem, & lympham, sui originem recognoscunt, quòd planè per hæmorrhoidas, jam reſeratas, magna ex parte exiliens egeritur, unàque corpus universum repurgatur, & revalescit.

Pro Coronide tandem advertendum, hæmorrhoides sponte Naturæ tantummodò supervenientes uti-

les esse, secùs verò si aliter prioritatè, arte quavis promoveantur. Unde malè quis ex hoc aphorismo colligeret, posse etiam tutò Medicos ejusmodi evacuationem per hirudinum appositionem, aut alia consimili industria, excitare; nam evacuatio ista sponte Naturæ promota, nedum ejus humoris sit, qui melancholiam, aut nephritidem fovet, (repurgato per eandem convenienter sanguine) sed etiam opportuno tempore, & ea quantitate, qua congruit, cum conferentia, & tolerantia ægrotantis. Hæc enim non benè quis, licet solertissimus Artifex, internoscere, ac distinguere valebit, ut quid, quantum, & quando evacuandum sit, rectè peragat. At verò poterit solum, inchoatum in eas partes defluxum adjuvare, si fortassis remoretur, & hæreat, laxantibus, & emollientibus medicamentis, quibus scilicet Natura ipsa alliciatur solum, ne utiquam verò irritetur, & concidat. Ita quidem pluries experti sumus tumefactas hæmorrhoidas, leniter laxatas, sanguinem fudisse ope emollientium plantarum, malvæ, althææ, chamomillæ, parietariæ, aliarumque similium, quibus oscilla venarum reſerantur, & acidi falsi, tum serosi, & sanguinei, tum lymphici humores, sua malitia reſusi, salubriter effunduntur. Verum tamen profusio ista sanguinis moderata esse debet, & quousque vires patientis tulerint; nam si immoderata fuerit, ut patulas perpetim venas sanguinem quocumque levi conatu fundentes habeat, pernicioſa fiet, & causa evadet aliorum morborum, longè graviorum, cum omnè nimium Naturæ sit inimicum.

APHORISMUS XII.

A diuturnis sanato hæmorrhoidibus, si una non servatur, periculum est aquam intercutem, vel tabem advenire.

Cum dixerit præcedenti Aphorismo Hippocrates ex hæmorrhoidalium venarum fusione ægritudines quasdam, & præsertim melancholicas, & nephriticas temperari; tunc, si fortassis illæ diutius fundendo perduraverint, admonet non sine gravi periculo posse in totum suppressi, & fluentem per intervalla sanguinem vitiosum cohiberi; siquidem, aut aquam intercutem, aut tabem successuram prædicit. Verum ad exactam Aphorismi intelligentiam plura sunt animadvertenda.

Primum, diuturnas debere esse hæmorrhoidas, hoc est ex longo tempore sanguinem fundentes, sed cum certa moderatione tum quantitatis, tum temporis: secus enim, si recens sanguinis profusio ex illarum reperatione sit, & neq; debita quantitas, nec conveniens modus, nec quantitas moderata, in ejusmodi evacuatione fervetur, proculdubio accurata Medici diligentia poterit immodica hæc boni sanguinis evacuatio saltem sensim, sensimque cohiberi: quippe immoderatæ omnes evacuationes, etiam si, ratione excreti, bonæ videantur, sollicitè sisti possunt, in gratiam virium conservandarum. Solùm igitur fluentes hæmorrhoides sisti non debent, cum ex diuturno tempore vitiosum sanguinem, & glutinosos, acidosque succos emisierint, potissimum per intervalla: tunc enim vitiosis humoribus exitum impedire, atque fluen-

tes hæmorrhoidas omninò cohibere, periculo non vacat. Jure optimo proinde Hippocrates adnotavit, à diuturnis hæmorrhoidibus sanato, Tabem, vel Hydropem facillimè accidere posse, retentis nimirum intra corpus pravis illis humoribus, qui per venas, arteriasque illas infernas convenienter, salubriterque repurgabantur.

Dixit insuper, *Sanato*, hoc est non sponte Naturæ constrictis, occlusisque hæmorrhoidalium venarum osculis, sed ab Arte, & ope medicamentorum adstringentium, ac sistentium sanguinem. Unde Medicos profectò monitos voluit, ne statim cohibeant ex longo tempore fluentem ex hæmorrhoidibus sanguinem; quemadmodum à plerisque incautè nimis fieri consuevit, ut fortassè importunis agrotantium petitionibus gratificarentur. Oportebit namque primum, a core in sanguine inductum emendare, medicamentis potissimum chalybeatis, ut deinde tutò, & sine ullo patientis incommodò possit sanguis detineri. Sed nihilominus consulit Hippocrates, neque omnes simul venas sanguinem fundentes adstrictoriis medicamentis debere sanari, sed tutius esse unam saltem ad apertam relinquere, per quam reliquæ vitiosorum humorum, si fortassè è toto corpore illuc deferantur, repurgari possint. Prudentis itaque, & sagacis Medici erit, unam post alteram, aliquo temporis intervallo, occludere, & quam postremò refectionem agnoverit, aut fortassè tumidiorem viderit, apertam, fundentemque relinquere; & cum tandem universum Corpus tum vivido colore, tum solidis carnibus, & naturali vigore fuerit restauratum, detumescantibus interea hæmorrhoidibus,

dibus, poterit ex integro sanare. Sed & adhuc in his considerata erit propria, cujusque patientis constitutio, ætas, & habitudo, num deinceps ferendo sit ejusmodi venarum reclusionem, aut occlusionem.

Et quidem nisi ista exactè perpendantur, & juxta traditas leges methodicè servantur, verendum valdè erit, ne Tabes, vel Hydrops subsequatur, etenim detentis acidi, & tartarei sanguiniscrementis, nedum cæteri liquores paulatim inficientur, sed etiam partes solidæ corporis, & viscera tum naturalia, tum vitalia; unde vel Hydrops, vel Tabes, procedente tempore subortietur: Hydrops quidem ex mala chylosi, ab obstructione, à tuberculis ingenis, & à vasorum lymphaticorum diruptione; Tabes verò ab infecto liquore nutritio, & à pulmone vel eroso, vel flaccido.

Neque verò dixit Hippocrates omninò futuram exinde Tabem, vel Hydropem, quasi quòd necesse sit alterutram ex his inevitabiliter successuram, sed solum periculum esse, ne Tabes, vel Hydrops subsequatur. Siquidem fieri potest, ut ob exactam victus rationem, & ope medicamentorum ad id conferentium, utraque ægritudo præcaveatur. Plurique enim temperatiores facti post diuturnam hæmorrhoidum profusionem, ab usu medicamentorum, præsertim ex chalybe, nedum ab hæmorrhoidibus convaluisse visi sunt, sed etiam cachexiam, quam incurrerant, evasisse; secus verò alii diatam non servantes, post mille propemodum incommoda, tandem Hydropici, atque etiam Apoplectici perierunt, à superabundanti sero, seu lymphâ in cerebrum effusa. In quem sanè sensum audiendus Aetius, qui *lib. 14. cap. 5.* dictum Hippocratis:

nisi una servetur, de servanda diætâ interpretatur, quæ nisi exacta servetur, Hydropem, vel Tabem, ac postremò mortem certò subsequuturam prædicit.

APHORISMUS XIII.

A singultu correptum sternutatio superveniens liberat.

Comparat in hoc aphorismo Hippocrates duos motus præternaturam factos inter se, unum ventriculi, alterum cerebri; etenim sternutamentum cerebri, seu mamillarium processuum, & meningum, motus est expulsivus, ab irritante humore excitatus; singultus verò commotio ventriculi est conantis expellere ea, quæ sibi infensa sunt: & unus alteri juvamento est; nam si singultienti superveniat sternutatio, bonum, desinente nimirum singultu per sternutamentum.

Quòd nonnulli Interpretes fieri dicant sternutamentum ab exucto aere per nares in cerebrum, unde pulmones illo quodammodò priventur; licet hæc in sternutatione contingant, non proinde causam excitantem, aut efficientem sternutationem, sed tantummodò concomitantem exponunt: quippe cum pars anterior cerebri, seu processus mamillares meningibus obvoluti à causa vel interna, vel externa proritantur, quodammodò contrahuntur, ut seipsos tueantur, & proritantem simul causam expellant, per idem tempus aer uberius per nares in partes se contrahentes inseritur, atque ea de causa pulmones attolluntur, mox verò consequente rei irritantis expulsionem, sicuti partes anteriores cerebri in pristinam amplificationem reducuntur, ita quoque

que pulmones deprimuntur, & simul una sternutamentum contingit. Quod autem à re irritante illud accidat, palàm fit in his, qui catarrhis obnoxii sunt; quoniã humor serofus, aut lymphicus per nares extillans sua acritate olfactum proritat, & tunicam narium internam laceffit, statim sternutamentis vehementibus, & iteratis molestantur; Qui pariter à pulveribus acris, uti sunt Peti, Euphorbii, Sampfuchi, Pulegii, Betonicæ, aliarumque plantarum, pari modo naribus vellicantur, sternutationes subeunt.

Singultus verò, licet ex mente Hippocratis fieri dicatur, quomodo fit convulsio, cum ille motum convulsivum referat, non tamen sine irritamento accidit, nimirum ab humoribus fibras, tunicasque Ventriculi proritantibus; quemadmodum experimur ab assumptis cibis acris, vel à crapula, quamobrem facillimè singultiunt helluones, ebrii, & qui piperata alimenta, aut etiam allium, capam, sinapim, aliaque similia assumpserunt. Sed & à glutinosis, & constipantibus id ipsum plerique patiuntur: etenim quosdam novi, qui tam certò à castaneis præfertim elixis, & mellitis rebus singultirent, ut ab illis foret opus penitus abstinere. Hæc eadem de causa contingit, cur in his sedetur illico singultus epota mox aqua, vino, aliove liquore, cujus scilicet beneficio dilutis cibariis; laxatisque fibris ventriculi, vellicatio desinat, & singultus.

His breviter præmissis, facile nunc solvitur, quamobrem à superveniente sternutamento singultus fit defuturus: etenim cum per sternutamentum fiat motus expulsivus processum mamillarium, & meningum Cerebri, indeque concutiatur Tho-

rax, & cum Thorace vehementer quoque compellatur septum transversum, fit proinde, ut etiam stomachus, & Ventriculi fundum violenter etiam concutiatur, ad quam concussionem mox consequitur dimotio rei illius molestantis, & singultum efficientis in tunicis Ventriculi; quapropter illa in ejusdem cavo innatans, non solum ab irritatione deficit, sed etiam facilè per pylorum ad intestina transferri potest. Nisi etiam dicere velimus, singultum illum hic ab Hippocrate notari ex superveniente sternutatione defuturum, qui solum fit à vaporibus acris, aut acidis, qui ubi prius tunicas Ventriculi infestabant, mox sursum elati, ac per palatum ad nares deducti, in causa sint, ut sternutatio superveniat, facta interim à Ventriculo in Nares eorundem translatione. Quod si non Ventriculus, ejusque orificium superius, propriè in singultu pati dicatur, sed potius Diaphragma, ea quidem in parte, qua ab œsophago perforatur, facilius istius problematis resolutio patebit, ob consensum nervorum, qui plurimi per diaphragma disperguntur, cum nervis vagæ illius conjugationis, quæ per musculos intercostales, & vocales diffunditur; quippe possunt hi nervi per septum transversum, & stomachum dispersi sola proritatione commoti, internam narium membranam, & meninges Cerebri pariformiter contorquere, atque ex mutua, reciprocaque concussione, halitus, aut vapores proritantes excutere, ac sternutamento singultum, & singultiendi occasionem auferre.

Cæterum singultus factus ab ingluvie ciborum, proculdubio superveniente sternutamento tolletur, si ex vehementi illa concussione libera-

tur Ventriculus ab illa molestia, quam percipit ab oppletione, & gravamine, non quidem in fibris, & liquore nervorum, sed in poris, & membranis eorundem; nam nullatenus fieri potest, ut ex iteratis, ac vehementissimis sternutamentis id, quod internam nervorum substantiam occupaverit, extrudi queat. Quare non benè videtur Galenus explicasse aphorismum hunc de singultu ex plenitudine facto, pari modo, ac evenit in convulsione: siquidem in convulsione benè possunt filamenta nervorum, & liquor nervus à re, aut humore replente contrahi, & convelli; minimè verò in singultu ope sternutamenti excuti, & evacuari; quod certè necessarium foret ad liberandum illos à singultu.

Postremò sicut singultus hic memoratus ab Hippocrate, frequens, iteratus, ac molestus intelligitur, ita sternutamentum quoque, ut illum solvat, debet esse repetitum, vehementius, ac valdè concussivum, quo scilicet possit tenax, & hærens humor à partibus semoveri, & extrudi: quamobrem non immeritò plerique *sternutamenta* plurali voce scribenda voluerunt, ut nimirum plura, & frequentia illa sint superventura, quæque iteratis concussionibus rem tenaciter adhærentem excutiant, & exturbent.

APHORISMUS XIV.

Hydrope correpto, si aqua è venis in ventrem defluxerit, solvitur morbus.

DE qua specie Hydropis scriptus sit hic Aphorismus, non levis est hujus loci difficultas: Etenim si de Ascite exponatur, quia Aqua in imo ventre collecta est, non benè

toti sententiæ aphoristicæ cohærebit, qua è venis dicitur aquam in ventrem, & consequenter in alvum defluxam, morbum solvere; utque è venis aqua in ventrem, idest in alvum deflueret, per totum corpus diffusam prius esse oporteret, adeoque Anasarcam primò constituere, & deinde in alvum deponi, & evacuari, pro totius morbi solutione.

Et quidem in hac solùm Hydropis specie poterit aqua sensim per occultos canaliculos, aut etiam per communes ductus, in ventrem effluere, indeque criticè evacuari; unde pressius sanè intelligendus erit Aphorismus de laborantibus Anasarca, Hyposarca, ac Leucophlegmatia, non verò de Ascite, aut Tympanite. Id quod clariùs explicans idem Hippocrates 7. *aphor.* 29. sub nomine Leucophlegmatia hanc eandem sententiam protulit, inquiens: *si à Leucophlegmatia habito alvi fluxus superveniat, liberatur.*

Confer.
Hipp. l.
de intern.
affection.

Sed quomodò fieri possit, ut lymphicus humor, & aqua intercus ex habitu corporis in ventrem transferatur, alia est gravior difficultas. Et quidem crediderim, non ex venis, aut arteriis illam posse resorberi, & in alvum deduci; etenim per arterias potius humor defertur ad partes, quàm è partibus referri possit, ut patet ex motu sanguinis circumfluo. Neque deduci potest ex venis, quia istæ reducunt humores in partes interiores per jecur in cor; unde si aqua in ventrem effluxura è venis deduceretur, proculdubio deberet prius per cor meare, & ex corde postmodum in arterias transferri, atque ex arteriis denique in alvum: id quod non sine gravi vitæ periculo peragi posset, cum ex hoc transfluxu cor ipsum, & arteriæ à tanta humoris serosi colluvie inficeren-

rentur, & sanguis universus labem ferè inemendabilem contraheret . Quare potius è vasis lymphaticis aqua illa intercus in alvum deferri debet: vasa etenim lymphatica per universam cutim perreptantia benè possunt resorbere, ac reassumere lymphicum illum humorem, qui in glandulis subcutaneis continetur, citrà sanguinis, & viscerum infectionem.

Quoniam verò locutus est Hippocrates sub conditione, *si aqua è venis in ventrem effluat*: id profectò tunc accidet, cum lymphæ sub cute nondum concreverit, sed adhuc fluida manens, per prædicta vasa lymphatica remeare potest. Cæterum postquam diutius hæserit sub cute, & glutinosam induerit conditionem, nulla ratione poterit è vasis lymphicis in ventrem defluere, nisi tamen, non eam, quæ extra vasa in glandulis sub cute jam substituerit, sed, quæ adhuc in vasis lymphicis continetur, fluxuram in alvum intelligere velimus: Id quod facilius semper eveniet inter initia incipientis hydropis; secus verò in hydrope jam confirmato, cum scilicet crassior, & glutinosior reddita lymphæ nequibit per vasa lymphica in alvum deferri.

Sed cur est, quòd Hippocrates hic Venarum meminerit inquiring: *si è venis in ventrem, seu alvum, defluxerit?* Fortè quia, sub venarum nomine, omnia corporis vasa humores deducuntia comprehensa intellexit: quo fit, ut etiam arterias is aliquando venas appellaverit: vel etiam quia, cum nondum illi vasa lymphica innotuissent, planè cum vidit aquam ex habitu Corporis in alvum deductam hydropicos judicasse, ex sola venarum notitia, arbitratus est, non nisi per illas potuif-

se aquosum humorem in ventrem effluere: quandoquidem ipse, quæ vidit scripsit, & quæ iteratis observationibus expertus est, in Aphorismos redegit: observavit autem ex habitu corporis aquam in hydropicis in ventrem effluxam illos judicasse, existimavit, juxta communem veterum medicorum sensum, per venas illuc fuisse delatam.

Quamquam autem id in Anasarca laborantibus verisimilius existimem accidere posse; non tamen omninò impossibile putandum, quòd id ipsum in Asciticis contingere nequeat: etenim licet Aqua in Ascite inter Peritonæum, & musculos Abdominis colligatur, unde difficile admodum est in alvum effluere posse, fieri tamen aliquando potest, ut per ductus nobis incognitos à provida Natura in Intestina deferatur, & expurgetur: quandoquidem, ut alias dicebat Galenus ex eodem Hippocrate *6. epidem. sect. 5. mille sibi Natura parat vias, per quas seipsam exoneret*: attamen perrarum hoc planè est, nec tam facile, ut propterea non nisi paracentesi aquam in Abdomine collectam abducere adnitantur peritiores Chirurghi, neque tamen perpetuò successu felici.

Postremò dicitur, solvi morbum effusa in ventrem aqua; non quòd in ventre detinenda sit, sed quòd per ventrem in intestina, & alvum delata, promptè evacuetur, & quidem tota quanta est; siquidem ex eo, quòd aqua Hydropicorum, veluti res præternaturam egeritur per alvum, tanquam per locum convenientem, contingit morbum ipsum solvi, ut quæ totum corpus occupaverat, in ventrem effluens, aditum sibi faciat apertum; adeoque non

non quia in ventrem effluxerit, conferat, sed quia in alvum translata possit sponte sua evacuari, & extramitti. Hinc designavit Hippocrates ventrem, veluti locum facilis, & promptæ expurgationis, ut exinde corpus universum à leucophlegmatia, & aqua intercute vindicetur; quamobrem tota pariter, & quanto citius fieri possit, educatur, viribus intereà constantibus, quemadmodum salutaribus crisis convenit. Porro non quia hic ab Hippocrate solius per alvum evacuationis mentio facta est, exclusa credenda omninò erit, quæ per vias urinæ alias ab eodem velut conducibilis commendatur in tumore lienis, qui prodromus est hydropisis, ut 2. epid. sect. 2. de Bione fertur, ex animadversione Mercurialis: nam hoc loco eam potissimum memoratam voluit, quæ citior, facilior, liberior, ac securior esse solet, in comparisonem ejus, quæ per urinam fit, longè tardioris, difficilioris, ac molestioris eventus.

APHORISMUS XV.

*Longo alvi profluvio laboranti
spontaneus vomitus superveniens morbum solvit.*

Etiam in hoc Aphorismo memorat Hippocrates unius morbi sanationem per alium, sed cum morbificæ causæ evacuatione conjunctum: At verò non, ut præceptum curativum tradat, sed solummodò, ut prognosim proponat salutaris exitus diarrhœæ inveteratæ, à vomitu spontaneo superveniente, ac propterea non exinde deducant, arguantque Medici id ipsum Arte tutò posse promoveri, quod sponte Naturæ utiliter accidit; nam, ut su-

Tozzi Op. Med. Tomo IV.

perius quoque monuimus, non æquè benè, nec undequaque potest Ars Naturam imitari, ut in humoris excernendi quantitate, conditione, tempore, & modo pariformiter se habeat, valeatque id solum, quod vitiosum est, & morbum facit, salutariter educere; cùm & nec ipsa Natura perpetuò, atque indiscriminatim, quocumque morbi tempore, & qualibet ejusdem circumstantia, ritè, rectèque se gerat. Signanter autem notavit in hoc aphorismo Hippocrates, *diuturnum alvi profluvium per spontaneum vomitum supervenientem terminari*; quia tria speciatim considerata voluit, *diuturnitatem* in alvi profluvio, *vomitum supervenientem*, & *sponte Naturæ* excitatam, non ab Arte.

Et quidem, si alvi profluvium recens fuerit, quia tunc peccans humor multus, pravusque esse solet, non tam facilè proficiet, nec utiliter continget. Inter initia etiam vomitus diarrhœæ superveniens, malus, non bonus censendus erit, veluti inductus ab irritata Natura, vel gravata à multitudine vitiosorum humorum, quæ nequeat illos efferos regere, & emendare; unde & per inferiora, & per superiora indomiti feruntur. Quare non solum vomitus in his nullatenus proderit, sed magis, magisque oberit, veluti symptomaticè excitatus ab impetu, & violentia prævalentium, & superabundantium humorum, quemadmodum in Cholera morbo evenit. Itaque diarrhœam ex longo tempore perdurasse notat Hippocrates, quoniam ex temporis diuturnitate verisimile admodum est, & multitudinem humorum defecisse, & pravitatem magna ex parte fuisse sedatam, ut propterea ex mala, ineptaque solum dissolutione,

M

secre-

secretioneque ciborum assumptorum, alvi fluxus perseveret, & quidem ex fermentis Intestinorum vitiatis, aut etiam ex labefactatis, depravatisque succis ventriculi digestivis, qui mox à superveniente vomitu egerantur, vel immutentur: in quem etiam sensum exponendus est idem Hippocrates 2. *de diæta*, ubi dixit, vomitum sistere alvum.

At quamvis ita ab Hippocrate scriptum sit, & plerumque id ipsum experimentis respondeat, non tamen universaliter verum putandum est, ut aliquando saltem non fallat, cum & nonnunquam à spontaneo vomitu visum sit, non solum diarrhœam nullatenus desisse, sed subinde etiam mortem fuisse subsequutam, potissimum in his, qui viribus destituti, ejuscemodi evacuationem per dejectionem primum, deinde per vomitum, sufferre nequiverunt. Sed & vomitus superveniens si præterea cibalis, vel chylosus fuerit, pejoris plane judicii erit, cum ex illo magis vires atterantur, & labefactatus unde quaque ventriculus nequeat deinceps illas restituere.

Tunc ergo vomitus spontaneus laudabilis solum erit in diarrhœa, cum humoralis fuerit, & ejusdem planè conditionis, ac est materia ipsa diarrhœam efficiens, & conservans. Debent insuper vires constare, ut vomitionem tolerant, quæque semel tantum, & non ulterius repetat; hac enim ratione crisis naturam referet. Hinc idem Hippocrates *primo de morbis*, hanc eandem sententiam describens, adjecit particulam *validè*, quæ non solum referri potest ad diarrhœam, sed etiam ad vomentem, & ad vomitum supervenientem, puta cum virium robore toleratum.

APHORISMUS XVI.

Pleuritide, & Peripneumonia correpto alvi profluvium adveniens, malum.

Quod antea scripsit Hippocrates de supervenientibus evacuationibus conferentibus, nunc de aliis nocentibus ex adverso proloquitur; atque exemplum dat in morbis pectoris, in quibus dejectiones supervenientes nocuas animadvertit. Et quidem Pleuritis, ac Peripneumonia morbi sunt partium spiritalium, quorum alter ad Pleuram, alter ad Pulmonem pertinet: quamvis non defuerint, qui utrumque Pulmoni affixerint, ea tamen differentia, ut si Pulmo totus secundum utrumque latus dextrum, & sinistrum, inflammationem contraheret, Peripneumonia laborare diceretur; Pleuritide vero, si alterutro tantum lobo; de qua re alibi.

Utrumque autem id eveniat, certum est, Pleuritidem, & Peripneumoniam ægritudines pectoris esse, & partium in pectore contentarum, quæ nulla alia ratione salubriter judicari possunt, quam per anacatharsim; unde 5. *aphor.* 8. ab eodem Hippocrate scriptum est: *Quicumque morbo laterali, seu pleuritide laborantes in quatuordecim diebus non repurgantur, ii ad suppurationem vertuntur*; quoniam nullus alius tutior ductus patet expurgationi humoris in pectore contenti, quam per asperam Arteriam, adeoque per tussim.

Si ergo contingat Pleuritide, aut Peripneumonia laborantem non expectoratione, sed dejectione per alvum evacuari, duplici proculdubio incommodo afficietur: altero quidem,

dem, quòd humor in pectore contentus non expurgatur, cùm ex pectore ad alvum ductus nullus sit, intersepiente Diaphragmate cavum pectoris, & abdominis: altero verò, quòd alius ab eo, qui peccat, educitur, & non sine ingenti virium jactura, cum ventriculi, & primæ digestionis languore, recrudescente interea, aut etiam putrescente eo, qui pectoris cavum occupat; undetum Pulmo, tum Cor, & sanguis universus plurimum inficitur. Accedit, quòd superveniens alvi profluvium in Pleuritide, aut Peripneumonia, alia quoque Viscera, nempe naturalia, præter spiritalia, affecta designat, potissimum verò Ventriculum, Jecur, Mesenterium, Intestina, ex quibus pravi illi humores alvi profluvium concitantes sine ulla difficultate derivabunt: quo autem morbi plures fuerint, & partes affectæ variæ, eò planè gravius vitæ periculum imminet.

Quoniam verò, non quamcumque, aut levem evacuationem per alvum memoravit Hippocrates, sed multam, iteratam, & copiosam, designatam scilicet sub nomine *Alvi profluvii*; idcirco tunc solum exinde de ægrotantis vita verendum, cùm alvus immodicè in ejusmodi Pectoris ægritudinibus fluxerit; secus verò, si levis solum, & modica dejectio fiat: fieri enim aliquando potest, ut citrà incommodum partium spiritalium affectarum, alvus cum juvamento potius exoneretur, aut quia cumulatè antea excrementis abundat; aut quia, ob adjunctam febrem, sanguis à suis impuritatibus repurgatur; aut etiam quia compatiencia reliqua viscera naturalia, forte fortuna ab infartu, obstructione, tumefactio-

ne, vi febris, atque Naturæ molimine, per dejectionem illam, sensim allevantur, ut in Metone, & in Caupone memorat idem Hippocrates 7. *epid.* Jure igitur per *alvi profluvium*, immoderatam, impertinentem, adeoque vires atterentem evacuationem, ac sputum supprimentem, notatam voluit.

Neque solum malum censendum est alvi profluvium in Pleuritide, & Peripneumonia ex ratione partium affectarum, quæ nullatenus per alvum exonerari possunt; sed etiam ex ratione earumdemmet ægritudinum. Sunt enim Pleuritis, & Peripneumonia de genere inflammationum: in inflammationibus autem nulla purgatio per alvum proficit, ut propterea purgantia medicamenta sint omni jure interdicta: quomodo enim conferre poterit alvi solutio in inflammationibus, in quibus sanguis alicubi hæret, & concrevit, indigetque sui resolutione, aut suppuratione, ut tandem pars inflammata in pristinum statum restituatur? id quod potissimum in Pleuritide, & Peripneumonia fit; de qua dicitur, quòd quanto citius sputum comparuerit, tanto quoque morbus breviabitur. Quod si cum Heurnio addere quoque velimus adverbium *vehementer*, quo non levem inflammationem, sed magnam, ingentem, vehementemque intellexerit Hippocrates, profectò timendum magis de illarum eventu à superveniente alvi profluvio: quippe vehementi Pleuritide, aut Peripneumonia laborantes gravioribus symptomatibus afficiuntur, dolore scilicet acutissimo, difficili respirazione, siti, vigilia, inquietudine, febre continua, cæterisque, quæ magis, magisque exacerbabuntur, & ingravescent, à superveniente diarrhæa. Sed

& longè pejus erit si alvi fluor acci-
dat his, qui ex longo tempore Pleu-
ritide, aut Peripneumonia labora-
rint, veluti suppuratis, ac tabidis ef-
fectis, quemadmodum ex voce græ-
ca *ἰχθυήω*, idest *habito, detento, vexato*, sive *diutius affecto*, colligit
Galenus, estque cunctis notissimum.

APHORISMUS XVII.

*Lippientem alvi profluvio corripere,
bonum.*

ADnotat nunc Hippocrates be-
neficia ex alvi profluvio pro-
venientia in aliis affectibus, ac pro
exemplo affert lippitudinem, quam
consequens alvi dejectio salutaris
dicitur.

Quid autem pro lippitudine in-
telligendum, græca vox *Ophtbalmia*
fatis apertè explicat, quàm Celsus
lippitudinem, & oculorum inflam-
mationem pluries appellat, licet ple-
risque lippitudo ad palpebras potius
inflammatas referatur, non verò ad
oculos. Quin & Celsus ipse *lib. 6. cap.*
6. aliam, diversamque videtur face-
re lippitudinem ab inflammatione
oculorum, eamque sæpius nuncupat
Aspritudinem, per quam palpebra-
rum extremitates asperæ, ac dolen-
tes observantur.

Sed quamvis de nomine parùm
interfit, multùm tamen refert no-
visse, Hippocratem alibi diversimo-
dè descriptam *Ophtbalmiam* memo-
rasse, præsertim verò *primo epidem.*
sect. 2. & 3. apbor. 12. & 16. ubi modò
humidam, sed mordacem; modò a-
ridam, & tabificam; modò ficcā,
& pruriginosā, immò etiam exul-
cerantem nominat, veluti à diversis
causis, atq; humoribus progenitam;
Unde ipse fieri crediderim, cur lip-
pitudine quandoque sit contagiosa, &

lippientes, alios inficiant; immò nec
æquabiliter afficiant, & afficiantur,
neque paribus symptomatibus mo-
lestentur, cùm & aliquando in pal-
pebris solùm, aliquando etiam in
adnata, seu conjunctiva tunica, ru-
borem, tumoremque patiantur.
Quare qualem hinc intellectam velit,
quæri potest.

Et clarè liquet, eam lippitudi-
nem hoc in aphorismo designari,
quæ nedum palpebrarum, sed & ad-
natæ oculorum tunicæ inflammatio
est, facta ab affluxu humorum ibi-
dem hærentium, potissimùm a-
crium, & erodentium, quorum
causa asperitas, dolor, rubor, tu-
mor, in orbita oculorum exteriori
percipiatur: etenim nisi humores
corpulenti has oculorum partes oc-
cupaverint, ac læserint, fieri haud
poterit, ut per alvum excreti lippien-
tes liberent; pari certè ratione, ac de
obsurdescentibus auribus alibi idem
Hippocrates pronunciavit. Nisi et-
iam dicere velimus cum cæteris Ex-
positoribus, liberari lippientes ocu-
los per alvi exonerationem, facta sci-
licet depositione humorum ab affe-
ctis visceribus naturalibus, ex quibus
illi coassiciebantur. Oportet autem
alvi profluvium sponte evenire; si-
quidem, ut antea monuimus, istius-
modi evacuationes morbis superve-
nientes sponte Naturæ excitari de-
bent, cùm solius Naturæ opus sit id
evacuare, quod convenit, & quo
tempore, atque ea quantitate, quæ
causæ morbificæ correspondeat.
Hinc non benè quis ex hoc deducere
licere Medicis indiscriminatim o-
culorum lippitudoines per dejecto-
ria medicamenta curare, nisi ali-
ter constiterit in ejusmodi opere
naturam sibi adminiculantem ha-
bere, fortè quia in alvum adigere
tentat humores, & vel rugitu, aut
ven-

ventris murmure, aut intestinorum inflatione ejusmodi depositionem ostendat.

Quia insuper Hippocrates usus est voce *profluvii*, existimandum propterea supervenientem hanc evacuationem oportere esse copiosam, & non solum fecum, aut intestinalium excrementorum, sed etiam humorum, acrem, muriaticamque conditionem præferentium: quippe hac ratione fiet, ut oculi ab humoribus ibidem stagnantibus vindicentur, ve etiam pars alia mandans affecta inaniatur. Quod si evacuatio ista sponte naturæ promota, parca admodum sit, & insufficiens, tutò tunc poterit Medici industria perfici, & expleri, documento ejusdem Hippocratis *aphorismo 20. primi*.

Denique inquit Hippocrates, *bonum*: significans ex hoc utilem esse ejusmodi evacuationem, quamquam non omninò necesse sit, ut ex illa sit prorsus lippitudo desitura: etenim postquam humores ab oculis defecerint, remanere quoque solet asperitas cum rigiditate, quæ non nisi progressu temporis, sponte Naturæ definit, vel fotibus, & balneis egebit, ut penitus aboleatur; quemadmodum idem Hippocrates 7. *aphor. 46. & hoc eodem 6. aphor. 31.*

APHORISMUS XVIII.

Vesica discissa, aut Cerebro, aut Corde, aut præcordiis, aut aliquo extenuioribus Intestinis, aut Ventriculo, aut Jecore, lethale est.

Prognosticus est hic Aphorismus, in quo Hippocrates mortem prædicit in his, qui vulnus, vel ulcus patiuntur in Cerebro, Corde, *Tozzi Op. Med. Tomo IV.*

præcordiis, Jecore, Ventriculo, aut Intestinis gracilibus. Simile quid scribitur etiam *lib. I. de Morbis: Moritur autem, si quis cerebro sauciatus fuerit, aut spinali medulla, aut hepate, aut præcordiis, sive septo transverso, aut vesica, aut vena sanguiflua, aut corde.*

Et sanè, quòd pleræque ex his partibus discissæ, aut vulneratæ mortem afferant, longè notius est, quàm ut longa oratione probari queat; nam cum inter partes corporis numerentur omninò vitæ tuendæ necessarias, planè fit, ut discissæ, sicuti non amplius ad vitam conservandam conferunt, ita imminentem mortem proculdubio portendant. Hujus generis præsertim sunt Cerebrum, Cor, Pulmo, Septum transversum, Ventriculus. Dissecto etenim Cerebro, nervi, & nervorum liquor statim malè afficiuntur; unde operationes animales deficere necesse est: his autem deficientibus, nec vita diutius perdurare valet. Id ipsum, & multò magis dicendum de Corde, quod principium, & origo est vitalium operationum; quamobrem ipso dissecto, neque pulsus, neque sanguinis motus haberi commodè potest. Pari ratione Pulmo discissus necem afferet, cum sit unum ex præcipuis organis respirationis, atque per ipsum principalia vasa sanguifera dispergantur, unde sanguis in cor, deindeque in corpus universum influit. Septum quoque transversum respirationis quam maximè conducit; quare si fortassè dissecetur, quia in suo motu labascit, deficit pariter respiratio, qua deficiente Animal perit. Ita etiam reliqua viscera his adjacentia eidem infortunio subiiciuntur, sub quibus Præcordia comprehensa intelliguntur. De Ventriculo autem, quamvis à plerisque

dubitatum sit, num inter partes principes numerandus foret, quia nihilominus conficiendis cibis incumbit, sine quibus diu animal perdurare nequit, proculdubio ex ipsius discissione mortem quoque accidere fatendum; quamobrem non immerito à Quinto Sereno Rex membrorum appellatus est, à quo scilicet reliqua corporis membra alimentum, robur, & nutritionem suscipiunt. Accedit, quòd per ipsi plurimi venarum, arteriarum, & nervorum rami disperguntur, unde absque istorum gravi læsione eundem vulnerari minimè contingit, adeoque non sine evidenti vitæ periculo.

Quoniam verò aliquando observatum est ex vulneribus Cerebri, Cordis, & Pulmonis ægrotantes supervixisse, ansa datur plerisque dubitandi, qua ratione id evenerit, ut simul unà tueri possint doctrinam hanc Hippocratis, & ex adverso experimenta eidem adversantia. Verum facile difficultas exolvetur, si vulnera his partibus inflata, & à Medicis memorata, examinentur ubi, & quomodo contigerint. Nam qui testantur ab vulneribus capitis, cordis, aut pulmonum consanuisse; haudquaquam de partibus organicis istorum viscerum meminere, sed solum de superficiariis, & extimis eorumdem. Cerebrum siquidem, ut ex anatome liquet, constat cortice, & medulla; ex his autem medulla omninò necessarium est ad animales operationes sensitivas, & motivas obeundas; cortex verò non nisi plurimarum glandularum contextus est. Hinc si portio aliqua corticis cerebri rescindatur illæso medulla, quia organa destinata functionibus sensitivis, & motivis inoffensa manent, benè poterit in

vita animal permanere; secus verò si interna cerebri substantia, ejusque medulla offendatur. Cor pariter, sine vitæ jactura vulneratum memoratur ea in parte, quæ illius mucronem constituit, qui cum pars extrema illius sit, nihilque impediat motum ejusdem, & sanguinis tractionem in arterias, neque proinde vitæ tuitioni incommodabit. Cæterum vulnera cordis inflata basi, ventriculis, arteriæ aortæ, cæterisque ductibus principalibus ejusdem, omninò lethalia observata fuere. Pulmones quoque resecti memorantur, superstiti vita, in extremitatibus, & apicibus loborum, quò scilicet vasa pulmonica circulanti sanguini necessaria haudquaquam pertingunt. De Jecore præterea idem omninò dicendum est, nam si vulnus sit inflatum in substantia Jecoris, ubi arteriæ, & venæ latiores adunantur, adeoque partem illius organicam constituunt, proculdubio lethale erit; secus verò si fiat in extremitatibus loborum. Et ratio inde deducitur, quia vulnera in his visceribus inflata, non alia de causa lethalia sunt, nisi quia sanguinis circulationi impedimento sunt, & disruptis, incisisque venis, aut arteriis, sanguis extra propria vasa effunditur, qui deinde exhaustus motum cordis conservare nequit, nec reliquas partes vivificare; quin & multoties ab irruente sanguine adjacentes aliæ opprimuntur, & repenti suffocantur, unde vita diutius persistere non potest. Accedit, quòd sanguis extra propria vasa effusus duplici alia de causa vitæ incommodat, & quia restagnans putrescit, & corrumpitur, & quia mole, ac irruptione, qua in parte hæret, gravat, opprimit, obruit, citius tamen, vel tardius, pro varietate viscerum affectorum. Atque

que hinc modo fit, quamobrem vulnera apices viscerum solummodo lædunt lethalia non sunt, nisi ex aliquo alio accidente, quia ejusmodi vulnera vasa sanguifera majora, & præstantiora minimè perturbant, unde nec multus sanguis effunditur, nec motus sanguinis intercipitur, aut impeditur. His itaque de causis accidit, ut vulnera basim cordis, & venas, arteriasque inde exorientes transfodientia statim perimant, ut & vulnera perforantia medium pulmonis, quoniam disruptis vasis pulmoniacis, vel sanguis aliò diffunditur, quàm in cor, vel impetuosius quàm par sit in cor ipsum influit, unde illius motus impeditur; in reliquis autem partibus vulnera inflicta non statim enecant, sed in aliquod tempus protrahuntur, quia ex his non omninò intercipitur motus sanguinis, & cordis, licet deinde in lethum etiam desinant; alia sanè de causa, quemadmodum de vulneribus Vesicæ, & Intestinorum mox dicemus.

Vulnera itaque in universum lethalia erunt non una, sed multiplici ratione. Primò, si in partibus vitæ tuendæ necessariis conformationem, texturam, & nexum vasorum, aut structuram earumdem discindant, ac turbent. Secundò, si circuitum sanguinis interrumpant. Tertiò, si operationes ad vitam tuendam destinatas lædant, vel adimant. Quartò, si excrementorum repurgationes impediant. Quintò, si inflammationem, gangranam, dolorem vehementem, aut alia symptomata graviora inferant, unde vires atterantur, & labascant. Hinc modò vulnera Cordis, & Cerebri ex primo, & secundo capite lethalia sunt, Pulmonis verò, Jecoris, aliorumque viscerum magnis, latif-

que arteriis, & venis refertorum ex secundo, & tertio capite; ex quarto, & quinto denique Intestina, & Vesica, in quibus etiam summopere considerabilis est propria constitutio membranosa, & nervosa, ob quam convulsionibus subiiciuntur, & difficillimè coalescunt.

Atqui dubitare contingit, cur Hippocrates Lienis non meminerit, cum tamen Lien arteriosum viscus sit? Ad quod dicendum, nullam de illo Hippocratem hoc loco fecisse specialem mentionem, quia parem cum Jecore conditionem sortitur; vel quia, si fortassè vulneretur, commodè rescindi potest, cum viscus linguosum sit; & facile à cæteris separabile, quinimmò illum eximi etiam integrè posse testantur plerique Anatomici citrà ullum vitæ incommodum.

Quoniam verò Hippocrates in textu non omnia Intestina dixit discissa mortem afferre, videndum hic etiam breviter, quænam sit differentia inter tenuia, & crassa intestina, ob quam tenuia si vulnerentur, aut scindantur, mortem afferant, secus verò crassa. Et quidem nedum in vulneribus, verum etiam in erosionibus internis experimento constitit longè periculosiora esse ulcera tenuium intestinorum, quàm crassorum, nam in dysenteriis malè affecta priora tria, Duodenum, Jejunum, & Ileum, insanabilia esse solent; facilioris verò curationis Colon, Cæcum, & Rectum. Verum diversitas hæc petenda est tum à structura, tum ab usu, tum etiam ab humoribus, qui per illa diffunduntur: etenim Intestina gracilia ex membranis constituuntur tenuioribus, habentque glandulas quoque molliores, in quas hiant oscilla venarum lactearum, unde chylus

in mesenterium, & saccum lacteum traicitur, quamobrem & structura, & usus illorum longè præstantior est, quàm sit structura, & usus aliorum trium Intestinatorum crassorum, in quibus & tunicæ crassiores, obesioreque sunt, & glandulæ duriores, compactioresque, eo quòd diutiùs detinendis facibus inservire deberent. Humores etiam confluentes ad Intestina tenuia, pancreaticus scilicet, & felleus, cùm in statum præternaturalem degenerant, pessimam, & deleteriam conditionem nanciscuntur, unde graviùs affici solent Intestina gracilia, secùs verò crassiora, ut patet; quamobrem non sine ratione fit periculosiori dysenteria laborare Intestina superiora, quàm inferiora. Non immeritò proindè Hippocrates consideratis his in Intestinis gracilibus, dixit illa discissa lethalem exitum sortiri, non ideò tamen ejusdem periculi expertia esse Intestina crassa, quæ etsi plerumque non tam graviter afficiantur, possunt tamen aliquando, ex ingenti, & magna discissione pari modo periclitari, sed longè minùs, vel tardiùs, quàm gracilia. Vesica pariter discissa insanabilis est, quia cùm sit perpetuum emissarium urinæ, nequit promptè conglutinari; quin & ulcus ibidem contractum perpetuò sordidum esse solet; quamobrem sæpè sæpiùs experimur illa in fistulas facillimè desinere.

Denique Ventriculus si vulneretur, etiam mortem portendit, si quidem ipso discisso necesse est succos digestivos infringi, illius texturam vitari, chylosim offendi, & chylum ipsum neutiquam protrudi posse per pylorum ad intestina. Sed & ob nervorum copiam, quibus inte-

brum compatiatur, unde postmodum motus convulsivi; quinimmò ex sola, simplici illius læsione vomitus, singultus, anxietas, dolor, & alia graviora symptomata minimè poterunt evitari: ab his autem fieri nequit quin mors sit brevi subsequutura.

Ventriculo non irrationabiliter adjungi potest Oesophagus, qui vulneratus non dissimiliter lethum afferet, non ita pridem observavi in quodam Presbytero ob vulnus inflitum in parte postica thoracis prope spinam, cui Oesophagus adnectitur.

Partibus his vulneratis, atque hoc loco memoratis ab Hippocrate, sunt quia alia plura adiiciunt; & quidem Brasavolus Vesicam felleam, Pericardium, Pulmonem, Lienem, & Spinatam medullam inter partes ad exitum vulneratas recenset: Et Celsus *lib. 5. cap. 26.* addit quoque Renes, venas, & arterias potissimum circa fauces, & guttur, nec non spinalem medullam, uterum, & meningis cerebri. Verùm non quæcumque vulnera, quæ insanabilia sunt, lethalia dicenda erunt: etenim ossa, & cartilagines si frangantur, aut vulnerentur, licet plerumque insanabilia evadant, non tamen mortem necessariò afferunt. Cæterùm multæ aliæ partes vulneratæ aliquando exitiales fiunt (etiam si commodè sanari possint) vel ob imperitiam artificum, vel ob symptomatum societatem, vel ob vulneris profunditatem, aut magnitudinem, vel ob sanguinis effusionem, indeque consequentem virium jacturam, vel ob ætatis languorem, vel ob carniem molliorem, vel ob alterius morbi præsertim virulenti concomitantiam, ut in lue gallica affectis experimur. Hinc non semel contingit

git observare vulnera, aut ulcera in partibus extimis etiam ignobilibus corporis inflata, quæ tandem mortem attulerint, in senibus, valetudinariis, gallica lue affectis, aliisque propter quasdam circumstantias cum vulnere conjunctas.

Signa denique, quibus internoscere liceat, quæ membra discissa, aut vulnerata sint, ut ex illis iudicium ferri possit lethalis, aut salutaris eventus, latè exposuit Celsus *cit. lib. 5. cap. 26.* ex quo alii Chirurgiæ professores, quos consulite si lubet.

Illud autem à nobis videtur superaddendum, quod iterati, inæquales, & recurrentes rigores febriles ferè semper solent internorum viscerum læsionem prædemonstrare, idque vel ob sanguinis è venis, aut arteriis discissis effusi in alias circumjacentes partes, præsertim sensu præditas, irruptionem, subsequentemque putrefactionem, vel ob impeditum ea in parte sanguinis circuitum, qui cum non promptè sua vasa circulationi destinata subire queat, illas impetit, & extimulat; & licet magna ex parte, non rarò per supervenientem sudorem dissolvatur, perseverante tamen eadem causa, denuo illi recurrunt. Hinc benè Cardanus, partes in universum vulneratæ quatuor modis mortem afferunt; vel necessitate officii, ut Pulmo; vel potentia Naturæ, ut Cor; vel sanguinis profluvio, ut Jecur, Arteriæ magnæ, & venæ; vel symptomatum pravitate, ut nervosa, Ventrículus, Vesica.

APHORISMUS XIX.

Cum discissum fuerit os, aut cartilago, vel nervus, aut genæ particula tenuis, vel præputium, neque augetur, neque coalescit.

EXposuit in præcedenti aphorismo Hippocrates partium quarundam organicarum vulnera, eaque protulit lethalia esse; in hoc verò aliarum quarundam partium simularium vulnera, & scissuras proponit, atque illa, inquit, non quidem mortem afferre, sed difficulter coalescere, & augeri.

Primo autem loco proponit fracturas ossium, de quibus tamen dubitare contingit, an non coalescere possint, & successivè incrementum suscipere; etenim *Gal. lib. 3. artis medicæ*, non solum in pueris illa inquit facillimè cuniri, & deinde augeri, sed etiam in adultioribus intermedio corpore calloso, quod licet propriè os dici non possit, nihilominus ad illius naturam quam maximè accedit, quippe quod duritie, soliditate, candore, insensibilitate præditum est, sicut os. Verum est, ossa fracta per intermedium aliud corpus uniantur, propriè tamen coalitio illa dici non potest, cum sit quid heterogeneum differentis omninò conditionis, & naturæ, quamquam duritiem, & soliditatem ossium æmuletur, ut propterea si contingat in ea parte os iterum fracturam subire, non quidem frangetur in poro illo adnato, sed alibi, ut pluries experimento constitit. Sed & neque incrementum suscipit os fractum, sed in eadem magnitudine, ac dimensione subsistet, cum nutrimentum, quod ossi suggeritur supra solum, non verò infra fracturam deferri possit,

impe-

impediente nimirum transitum poro illo calloso; quamobrem experimur ossa fracta in pueris non ulterius increfcere, sed per comparationem ad alia ossa correspondentia aliquantulum decurtata, & exilia remanere: modò Hippocrates in hoc textu de verò coalitu, & de genuina nutritione mentionem facit, secus verò de falsa, & æquipollente.

Sed unde est, quòd ossa, aliæque partes hic memoratæ coalescere, & nutriri non possint, gravis equidem est hujus loci difficultas. Omnes interpretes cum Galeno communem in omnibus partibus exanguibus, & spermaticis appellatis causam faciunt materiæ alibilis defectum. Putant enim partes universas corporis aut ex semine, aut ex sanguine generari: ex semine quidem partes eas, quæ albæ sunt, uti ipsi dicunt, Ossa, Tendines, Ligamenta, Nervi, Venæ, Arteriæ, Membranae, Cartilagines, Glandulae; ex sanguine verò omnia viscera, Cor, Pulmonem, Jecur, Lienem, Renes, Musculos, & carnes universas. Hinc subdunt partes carnosas, & rubras à sanguine progenitas, cum vulnerantur, aut dilacerantur, facillimè regenerari, & increfcere posse suggesto ipsis sanguine pro alimento, ex quo exordium desumpserunt: at verò ossa fracta, atque cæteras partes albas, veluti spermaticas dissectas, nullatenus coalescere posse, quia deficit illis alimentum, & principium generationis earundem, nempe semen.

Sed quam falsa sint ejuscemodi Veterum opinamenta, clarissimè deducitur ex Anatome, & ex earundem partium structura; omnia enim viscera tanquam constructa ex glandulis, membranis, fibris, nervis, venis, arteriis, nonnisi in pri-

mordiis suæ generationis eandem materiam albugineam uniformiter recognoscunt, unde nil penitus differunt à generatione, & structura partium albarum, seu spermaticarum; hinc in prima conformatione embryonis, cum illius corpusculum integratur, nonnisi texturam quandam exhibet fibrarum, glandularum, membranarum, & vasorum, per ipsas excurrentium, quæ deinde à sanguine materno per vasa umbilicalia suggesto, nutritionem, & incrementum suscipiunt per substantiam illam glutinosam ejusdemmet sanguinis, quæ in aliquibus magis, & copiosius appingitur, in aliis minus, & parcius pro vasorum exilitate, & pororum, ac texturæ diversitate. Quòd verò Pulmo, Jecur, Cor, Lien, & alia consimilia viscera rubra videantur; membranae verò, cartilagines, ossa, alba sint, id dumtaxat contingit à sanguine affluentiùs per prædicta viscera discurrente, quoniam continent venas, & arterias latiores, & numerosiores: at verò in partibus albis, quia venulae, & arteriolae exiles admodum sunt, propterea vix conspici possunt. Atque hinc, si Pulmo, Jecur, Lien, & cætera viscera carnea, & sanguinea putata, sanguine ipso exuantur, quod fieri solet per immersionem in aqua tepida, postquam universum sanguinem per illorum parenchymata diffusum dimiserint, albicantem quoque substantiam referunt; & quemadmodum accurata diligentia Anatomicorum detectum est, nonnisi glandulis, vesiculis, fibris, venis, arteriis, nervisque contexta sunt. Itaque omnes partes corporis homogeneam referunt naturam, atque in primis suis rudimentis ab una substantia seminis glutinosa, vel ut melius

lius loquar, ab una substantia albugeinea in ovo foemineo contenta ducunt originem; à sanguine verò circumfluo vitam, vigoremque suscipiunt, quemadmodum fusiùs à nobis est demonstratum in nostra Theoretice.

Hinc ergo omninò falsum dicendum est, quod à veteribus fuit creditum de duplici materia, origine, & principio partium componentium humanum corpus, & cujusvis alterius animalis. Sed & falsum quoque est deesse materiam feminalem nutriendis partibus spermaticis aptam, quippè quæ nedum in ætate juvenili, verum etiam in virili, & senili non rarò superabundat. Quin immò si vera sunt, quæ Galenus memorat de regeneratione, & restoratione ossium fractorum in pueris, quia in his semen deficit, proculdubio ossium fractorum coalitus, & resectio nulla foret, atque contra facilior, & abundantior haberi posset juvenibus, in quibus semen uberius est, & vegetius.

Totum igitur opus nutritionis à substantia sanguinis glutinosa promanat, quæ longè copiosior suggeritur illis partibus, in quas sanguis uberius influit: quo fit, ut jecur, pulmo, carnes in majorem molem, temporis progressu assurgant, minùs verò augeantur membranæ, aliæque partes exanguës. Nisi etiam dicere velimus alimentum partibus accedere ex nervis, & nervorum liquore, ut Glissonius, & Vvarthonus inter Anglos primi arbitrati sunt, quocirca ubi membranæ corpulentiores sunt, & latioribus nervis sunt intextæ, ibi quoque incrementum sensibilius observatur; contra verò in membranis tenuioribus, per quas nervi exiliores diffunduntur.

Neque insuper verum est, partes

carnosas vulneratas omninò coalescere, & restaurari in fibris, venis, nervis, arteriis, siquidem istæ eodem modo uniuntur, ac reliquæ aliæ partes spermaticæ dictæ, ut patet ex cicatrice in ipsis relicta; quæ mobrem non semel observatum est in Cadaveribus anatome subjectis, viscera antecederent vulnerata, & mox Chirurgicis auxiliis restituta exhibuisse signaturas, & cicatrices qua parte vulnus fuerat inflictum. Sed & in cruribus, tibiis, brachiis, vulnerati muscoli, cum consanescunt, profundam cicatricem relinquunt, & qui cauteriis fuerant instructi, postquam ulcus ad cicatricem perductum est, manifestam signaturam, & foveam gestant, designantem non solum cutim externam, sed etiam musculorum substantiam cicatricem subiisse. Verum, in his partibus musculosis minùs sensibilis esse solet inflicti vulneris signatura, quia sanguis per adjacentes partes circumfluit illas sublevat, & consueto rubore afficit, unde non adeò conspicua in iisdem remanet cicatrix; contra verò in reliquis partibus, in quibus venæ, & arteriæ parciore, exilioresque sunt, longè apparentior observatur, & potissimum in membranis, quarum textura tenuis, & plana est, & colore candicans.

Quoniam verò adhuc de modo, quo Callus fit in ossibus fractis, dubitare contingit, idcirco neque videtur soluta difficultas in præsentitextu proposita. Et quidem si id à Veteribus petamus, difficile admodum erit conicere, quo pacto ossa fracta invicem conglutinentur per intermedium Callum. Recentiores verò Anatomici, nec quidpiam certi in hac re determinare ausi sunt. Solum Angli cum Glissonio, & Vvarthono

thono è membranis, & perioſtiis eorumdem alimentum offium deduxerunt, quò fieri ajunt denudata perioſtiis offa ſiderari, & contabefcere: At neque per hoc explicant quomodò Callus in fracturis offium generetur; cùm in illis ſæpeſæpiùs membranæ ipſæ coafficiantur, & reſciſſæ, aut diſſectæ nequeant alimentum illis ſuppeditare. Putaverim idcirco alimentum offibus ſuggeri à ſanguine ſecundùm partem glutinoſam per apices muſculorum deſinentium in eorumdem offium capitibus, ubi cartilagineſ circumponuntur, & glandulæ innumerabiles ſunt poſitæ: illa verò ſenſim per partem poſt partem intra poros eorumdem intruditur, & per univerſam offium ſubſtantiam ſecundùm longitudinem communicatur: quippe offa licèt ſecundùm extimam ſuperficiem lævigata ſint, ſecundùm interiorem tamen ſubſtantiam ſunt manifeſtè poroſa, ſpongioſa, ſquamoſa, & perforata, ut propterea ſi frangantur, non ſolùm ſuccum ipſum alibilem effundunt, verùm etiam, & non rarò, ſanguine intinctum, quo videlicet vegetare, & vigorari poſſint. Hinc facilè dijudicare eſt, ſuccum ipſum ex glandulis ibidem ſitis per porulos, & cavernulas offium veluti per filtrum tranſfudare, & quaquaverſum diffundi; Quin & quò offa fuerint majora, & longiora, eò etiam cavitas, & manifeſtior, & oblongior in illis obſervatur cum ingenita quadam ſubſtantia medullari, quæ ibidem ex reſudante eodem ſucco offium nutritio concreſcit, & coagulatur inſtar axungię, quemadmodùm obſervare eſt in offibus femorum, & brachiorum. Non tamen inde negaverim, à membranis offa amicientibus aliquid etiam volatile, & ſpirituo-

ſum per extimos illorum poros ſuggeri, quo nimirum vegetiora ſiant, & in motibus promptiora, ut ſcilicet faciliùs commoventibus muſculis extendentibus, contrahentibus, & circumvolventibus obſequantur. Quia ergo in fracturis offium textura illa pororum, & cavernularum diſcontinuatur, & alimentum nequit commodè veluti per filtrum traici, potiffimùm quia fibræ, ac filamenta eorumdem ſquamoſa non recta invicem colligantur, & uniuntur, ſed aliquantulum tortuoſè; proinde nodus in parte fracta gignitur pari fermè modo, ac in reciſis arborum ramis experimur, ſicut etiam in inſitionibus, in quibus inter truncum, ſeu ramum unius, & ſurculum, aut palmitem alterius, nodus adnaſcitur.

Differt autem aliquantulum ab offe ipſo nodus iſte, quia non ex primigenia ſubſtantia ſeminali ortum ducit, quemadmodùm reliquæ offis partes, ſed totus ab adjuncto illis alimento provenit, ut propterea non referat eandem omninò duri-
tiem, quam habet os, licèt eidem quàm proximè accedat: Neque verò fracturæ obnoxius deinceps fit, quia offe durior, ſed potiùs contra, quia offe mollior, ſed tamen glutinoſior, & compactior, ut in nodis arborum; nam quæ dura ſunt facilius franguntur, quàm quæ molliora, & glutinoſiora, uti cartilagineſ, quarum conditionem, & duri-
tiem nodus ille refert, ut proinde meritò Callus appelletur.

Hæc planè de offium conglutinatione jam pridem meditatùs in publicis lectionibus edocueram, cùm tandem ad manus meas Romæ pervenit accurata, & nova Domini Cloptonis Osteologia Francofurti, & Lipſiæ anno 1692. latinè impreſſa;
ibique

ibique simul unâ suam de ossibus Anatomem Doctor Dominicus Gagliardus Medicus Romanus diligentissimus est elargitus, qui ambo ossium structuram, veluti ex pluribus lamellis superstratis instructam dexterunt, & de eorundem nutrizione, & augmento abundè satis egerunt, juxta ea, quæ in sua Anatomie Plantarum multò antea Clarissimus Malpighius indicaverat, pag. m. 19. & 20.

Quod hætenus dictum est de fracturis ossium, facile etiam aptari potest Cartilaginibus, quæ pari modo nutriuntur, & pari modo coalescere possunt, ac de ossibus dictum est, ea solum differentia, quòd quemadmodum Cartilago est mollior osse, & durior carne, ita alimentum, quod in suis porositatibus recipit, mediam quoque sapit naturam inter alimentum illius, & istius: id autem quod partibus discissis agglutinatur, neque tantam duritiem acquirit, quantam habent primevæ partes Cartilaginis, quò fit, ut in confluxu humorum præternaturalium ad eas partes, quæ scissuram passæ sunt, semper dolor percipiatur acerbior in parte illa conglutinata. Dixit autem Hippocrates partes istas non coalescere, non quòd revera coalitum nullum admittant, cum re ipsa sæpius conglutinari soleant, sed quia per intermedium corpus uniuntur, non verò immediatè per sua filamenta, texturam, porositates, & partium apices connectuntur, quemadmodum in partibus carnosiss per fibras carneas; atque propterea neque augentur eodem incremento, quo reliquæ partes ossæ, aut cartilagineæ crescunt, quia alimentum non satis abundanter, neque cum ea vivacitate, & efficacia ad partes infra fracturam transmittitur, quemad-

modum in aliis partibus sanis fit, ut patet.

Id ipsum inquit accidere nervis discissis, aut sectis, ut neq; amplius coalescant, neq; augeantur. Verum in his distinguenda est punctura à cæsura, nam nervi puncti non solum coalescere nunquam solent, sed & convulsiones inemendabiles afferunt, quemadmodum alias à nobis est dictum in commentariis super tertium artis medica Galeni; at verò nervi cæsi, aut omninò resecti nil tale patiuntur, sed solum nulla ratione poterunt cum partibus rescissis cœniri, aut in posterum succrescere, unde à Chirurgis communiter pejor, & periculosior censetur nervorum punctura, levior verò cæsura; quin & non raro satius ipsis ducitur nervum punctum omninò rescindere, & resecare.

Quamvis autem cæsi nervi vite periculum non minentur, haud tamen possunt coalescere, & augeri, non solum ex prænarratis rationibus desumptis ab alimento, ut de aliis partibus spermaticis dictum est, verum etiam quia nervi secundum longitudinem præter membranas habent fibras, quæ peculiari liquore perpetim irrorantur, quoties verò illi rescinduntur fibræ similiter unâ simul resecantur, quæ cum nequeant in pristinum statum revocari, ut in membris rescissis quibuscumq; accidit, propterea fit, ut coalescere, neq; possint. Accedit, quòd fibræ ipsæ in resectione instar fidium retrahuntur, ut neq; deinceps in rectum situm disponi possint, quo certè opus esset, ut cum aliis rescissis possent cœniri.

Adiicit quoque in textu Hippocrates tenuem genarum partem, pro qua intelligendæ sunt non solum, quæ propriè genæ dicuntur, verum etiam labia, nares, palpebræ, & facies universa, quippe experimur vulne-

vulnera his partibus inflicta, & quæcumque scissionem, & discontinuationem efficiunt, fœdas, & indelebiles cicatrices relinquere, etiam si post diuturnum tempus sagaci Medicorum industria resectæ partes coaluerint. Et quamvis id ipsum commune sit totius corporis cuti, nihilominus difficilior semper erit coalitio in partibus faciei vulneratis: Id autem multiplici de causa videtur evenire, tum quia cutis faciei longè nervosior est cæteris aliis; tum quia ita nectitur cum panniculo carnosio, qui illi subjacet, ut nullatenus possit altera ab altero separari, qua ratione fit, ut nullibi cutis se sola contrahi, & moveri possit nisi solum in facie, unde citrà capitis commotionem cutem frontis contrahere, & corrugare solemus, ut & labia, buccas, & pinnas narium, in cæteris autem partibus nullimodè; tum etiam quia fibræ intexitur omnis generis, & dissecta facie ita fibræ discerpuntur, ut quaquaversum retractæ, nequeant in posterum nulla industria, ac diligentia cuniri.

Denique præputium, seu membrana extrema mentulæ, cum fuerit rescissa, neque amplius coalescit, si in longum, neque augetur, si in margine sectionem patiatur, idque non solum propter ea, quæ omnibus partibus extremis communia sunt, cum quælibet pars extrema corporis rescissa nunquam amplius restauretur, vel increseat, ut in auribus, naso, digitis; verum etiam quia pars admodum exanguis est, & paucissimis, atque exilibus vasibus est intexta, quamobrem neque multo calore, neque multo alimento prædita est. Et quamvis secundum longum dissecta aliquando visa sit coaluisse, id tamen non contigit sine

summa Chirurgi diligentia confutis scilicet labiis vulneris, & ita proximè inter se invicem statim à vulnere commissis, ut adhuc sanguinem funderent: cum hac autem summa diligentia etiam per intermedium corpus callosum coaluisse visa est, ut propterea manifestam cicatricem referret, & quidem duriusculam. Si verò ejuscemodi connexio negligatur, nulla ratione fiet, ut in posterum conglutinationem, & coalitum admittat, ut pluries est observatum.

Partibus his in hoc aphorismo memoratis possent aliæ plures adiacere, præsertim extremæ corporis, potissimum palpebræ oculorum, pinne narium, nasi acumen, aures, & digiti manuum, & pedum. Verum partes istæ cum sint ex supradictis simplicibus in aphorismo recensitis compositæ, quemadmodum ex anatome manifestissime deducitur, propterea ad illarum classem sine ulla dubietate revocandæ erunt. Memoravit autem Hippocrates illas veluti simplices, sub quibus comprehensas voluit reliquas omnes, vel ex ipsis compositas, vel cum ipsis in natura, constitutione, & textura convenientes.

APHORISMUS XX.

Si in ventrem sanguis præter naturam effunditur, necesse est suppurari.

QUAMVIS Aphorismus hic communiter ab expositoribus receptus, & juxta versionem Leonici traditus verissimus in quocumque sensu credatur, quoniam sanguis extra propria vasa effusus statim concrevit, acescit, & in pus vertitur, quemadmodum passim experi-

perimur in ejusdem collectione in pectoris cavo, cum è venis, aut arteriis ejusdem pectoris, & pulmonis effunditur, nihilominus re exactius perpenſa, & ad experientiam revocata, non ubique veritati conſonat; etenim ſæpiſſimè etiam obſervamus ſanguinem in Intestiſtorum cavitatem effuſum, ut & in fundum ventriculi, concreſcere quidem in grumos, & coagulari, non tamen in pus verti, ſed ſub eadem ſanguinis forma compactum, concretumque evacuari etiam poſtquam diù, & ad plures dies fuerit detentus. Quamobrem non immeritò viſum eſt plerique de veritate iſtius aphoriſmi aliquantulum ambigere; quinimò Recentioribus quibuſdam putatur pus non quidem ex ſanguine, ſed ex lymphâ, & adipe proficiſci: Sed & Fuchſius aliter quoque exiſtimavit illum eſſe exponendum, & quidem ſub generaliſſima ſignificatione, ut ſanguis præter naturam effuſus in quamcumque cavitatem non ſuppurationi ſtriçtè ſumptæ, ſed corruptioni ſubiiciantur. Hinc videndum hoc loco breviter erit, quibus in cavitatibus collectus ſanguis ſuppuretur, & cum quibus conditionibus, & circumſtantiis ſuppurari poſſit.

Et quidem, quòd pus ex ſanguine oriatur palam eſt, juxta doctrinam Galeni pluribus in locis, in quibus clariffimè oſtendit ſuppurationem præſſè ſumptam nullatenùs compe-tere poſſe, niſi ſolùm ſanguini: ceteros autem humores per analogiam dumtaxat dici poſſe ſuppurati, quatenùs per corruptionem æmulantur puris naturam, ſed revera in pus minimè vertuntur. Sic in empyemate aliquando pus expurgatur verum, cum ex præcedenti ſputo ſanguinis originem duxerit, juxta documentum Hippocratis: à ſan-

guinis ſputo puris ſputum; aliquando verò ſputum puri ſimile fit, ſed verum pus non eſt, cum ſcilicet ex phlegmate, aut lymphâ ortum traxerit. Id ipſum quoque experimur in tumoribus, nam ſi iſti fiant ex ſanguine, & inflammationis naturam referant, verum pus cum maturuerint emittent; ſecus verò ſi à cæteris humoribus fiant, ut in edemate, meliceride, & ſimilibus, licèt videantur puris conditionem referre, fortasſè propter alborem, revera tamen purulentam materiam minimè exhibent. Itaque cum ſanguis extra propria vaſa effunditur, benè poſteſt in pus commutari, ſi tamen per fermentationem in corruptionem tendat. Ut autem corruptioni ſubiiciatur, neceſſe eſt, ut in cavitatem unde quaque concluſam effundatur, in qua poſt concretionem, & acoem, particulæ ejusdem ſanguinis heterogeneæ inter ſe invicem colluctentur, & tenues, ac volatiles, contranitentibus craſſis, niſi quodam ſubigant, & ſubigantur; unde indebita fermentatio, & à fermentatione tenuium particularum exolutio, & craſſarum præcipitatio, immò & totius humoris permutatio, atque in pus converſio. Hinc in cavitatibus patentioribus, in quibus ejusmodi motus fermentativus minimè poſteſt excitari, nec conſequenter ſuppuratio haberi poſteſt; quemadmodum experimur in Intestiſtis craſſioribus, & in ventriculo. Cæterum in cerebro, pectore, renibus, glandulis, cæterisque cavitatibus anguſtioribus, & occluſis, promptiffimè ſuppuratio accidit, ob traditam rationem; quinimò quò loci fuerint anguſtiores, & ex adjuncto calore facile promoventes fermentationem, eò quoque citior, & facilior ſuppuratio promove-

movebitur; quæ de re sanguis effusus in musculos citius suppuratur, ut & in parenchymatibus viscerum, quemadmodum experimentis palam est. Atqui pus universim à solo adipe, & lymphæ proficisci minimè crediderim, cum ex adverso multæ partes adipis expertes suppurationi subiiciantur, & phthisici penitus extenuati, ac omni adipe consumpti, purulenti sint.

Quamquam autem Hippocrates dixerit *in ventrem*, seu ut mavult Fuchsius, *in cavitatem*, non tamen pro ventre, & cavitate intelligendi sunt Venter imus, & medius scilicet thorax, & secundum alios etiam caput, sed etiam tubuli, & pori omnes in toto corpore constituti, ut propterea non irrationabiliter plerique Anatomici existimarent, omnem muscolum, & quodcumque viscus, immò & partem quamcumque corporis, suos habere ventres, & cavitates, in quibus sanguis recipi, & colligi possit; & sicuti in statu naturali sanguis quaquaversum diffunditur, vel ut vivificet, vel ut nutriat partes, ita in statu morbofo è suis vasis exiliens, si hæserit, inflammationem primum, mox suppurationem excitat: neque enim fieri potest, ut sanguis recipi, & colligi possit in partibus quibuscumque, nisi cavitates saltem inconspicuæ, vel etiam porositates ibidem sint, quæ illum excipiant, cum duo corpora in eodem loco simul esse possint, ex communi sententia Philosophorum.

Debet insuper sanguis, ut putrescat, corrumpatur, & commutetur in pus, moram in cavitatibus contrahere; unde si fortassè è venis effusus per alios ductus ef-

fluat, minimè putrescet; & è converso etiam si intra venas, aut in apicibus arteriarum aliqua de causa præternaturali immoretur, poterit putrefactionem, & suppurationem subire: quæ ratione factum est, ut sanguis sit semper in motu, ne scilicet alicubi hærens concresecat, & putrescat: quia verò è suis vasis effusus à continuato motu circulationis deficit, & in cavitatibus, aut poris partium restagnat, statim concresecit, & corrumpitur, excitata ibidem indebita fermentatione, ut dictum. Adjectum est insuper *præter naturam*, ut fortassè discrimen statueretur inter eam effusionem, quæ naturaliter fit è vasis in poros partium pro nutritione, quippe quæ sensim accidit, & non ultra partium exigentiam, unde pedetentim convertitur substantiam partium alendarum; at verò, quæ præternaturaliter fit, affatim accidit, & præter naturæ exigentiam, eo quòd nec quantitas conveniens servetur, nec modus, nec usus naturæ operantis, sed solum à causis præternaturalibus tum sanguinem depravantibus, tum vasa sanguifera erodentibus, unde postmodum sanguis effluit.

Denique scriptum est in aphorismo, necesse est suppurari sanguinem extra venas effusum; siquidem cum non amplius regi possit à natura per motum intra propria vasa, neque ex altero capite commutari possit in substantiam aliam, necessariò fiet, ut per corruptionem convertatur in pus, modis superius enarratis.

APHORISMUS XXI.

In insanientibus si varices, vel hæmorrhoides supervenerint, insanie solutio.

Quid pro insanientibus intelligat Hippocrates in hoc aphorismo dubitari potest. Et Galenus in *commentario* de iis exponit, qui melancholico delirio sunt affecti. Verum non solum melancholicos, sed etiam maniacos non improbabili-ter interpretabimur, attenta causa utriusque delirii, quæ semper ab humoribus acorem præferentibus procedit, ea solum differentia, quod in melancholicis acidam stypticitatem, aut ponticam conditionem sapit; in maniacis verò redolet acritatem.

Quoniam verò per varices, aut hæmorrhoidas supervenientes, significatur, humores istos acidos deorsum transferri, & à partibus superioribus removeri, propterea fit, ut Insanix solutio exinde sit speranda, & quemadmodum, ex superius traditis, hæmorrhoides supervenientes melancholicis profunt, translata causa melancholici delirii ad venas podicis; ita in his facile etiam insanix definere poterit decumbentibus vitiosis humoribus ad partes corporis inferiores. Neque multum differre videntur varices ab hæmorrhoidibus, eo quod pari modo, quo hæmorrhoides tument circa podicem, illæ in cæteris partibus corporis tumorem referunt, unde varices describi solent, venarum in aliquibus partibus corporis tumores; & sicuti hæmorrhoidales venæ tumefactæ nigrescunt, ita quoque livescunt varices à congesto, atque hærente in ipsis sanguine, propter

acidum concrecente, & ut vocant, melancholico: quare hæmorrhoides rectè possent varices podicis appellari.

Debent autem tum varices, tum hæmorrhoides supervenire, etenim hac ratione significant deponi vitiosum humorem ad partes ipsas tumefactas, & ubi antea acidus, & vitiosus sanguis ferebatur in caput, mox à provida natura repurgetur, & deturbetur ad partes corporis infernas cum tumore venarum hæmorrhoidalium, aliarumve, à transpositione ejusdem peccantis humoris. Et licet varices comparere soleant in omnibus fere corporis partibus, collo, brachiis, mammis, pectore, immò ventre, femoribus, tibiis, aliisque; nihilominus securior semper erit ejusmodi transpositio in partes infernas, & à capite remotiores, ne scilicet reditus exinde timeri possit, è partibus inferis metastasi affectis in superam insaniam laborantem. Et quidem plurimi ab insanix, aliave consimili capitis ægritudine evasisse visi sunt, vel saltem in melius abiisse, apparentibus varicibus in tibiis, ne dum superficialiis, sed etiam profundis; quamobrem in his etiam existimare est remeantem ex arteriis in venas sanguinem, omnem malitiam in varicosis tibiis deponere, & reliquum magna ex parte repurgatum denuò per jecur in cor circumire, unde cerebrum mitius affici cogeretur.

Verumtamen oportebit depositam in his partibus Insanix materiam, hærentem esse, nam si fortassè denuò in partes superas remearet, facile posset ex nova transpositione in cerebrum, remissam affectionem augere, atque in pristinum statum revocare; quemadmodum de Alcippo idem Hippocrates me-

morat 5. *epidemiorum*. Unde sicut apparentibus varicibus, aut hemorrhoidibus insania, vel melancholicum delirium definit; ita ex adverso ista redirent, si varices, vel hæmorrhoides disparerent.

APHORISMUS XXII.

Quæcumque ruptiones ex dorso ad cubitum descendunt, venæ sectio solvit.

SIve ruptiones, five rupta ipsa, quæ in partibus musculosis contingunt in præsentī aphorismo legantur, non minimam afferunt difficultatem; cum fieri non possit, ut ruptio, vel ruptum unius partis, ad aliam partem remotiorem transferatur. Melius ea propter videtur legendum *dolores* non *ruptiones*, ut in *commentario* rectè admonet Galenus; vel etiam melius causa illa, quæ dolorem attulit, quemadmodum esse solet sanguis, serum, lymphæ, aliæve humor acritatem, aut acorem redolens. Et licet ruptio, vel ruptum, propriè pertineat ad distractionem, distentionem, aut divulsionem fibrarum membranarum, musculorum, & partium carnosarum, nihilominus quia causa diruptionem efficiens (si fuerit interna) vel dolorem à diruptione exortum excitans, & fovens (si fuerit externa) non rarò loco movetur è parte dirupta in partem externam corporis, idcirco sub nomine diruptionis implicite Hippocrates voluit esse intelligendam causam ipsam diruptionem facientem, vel conservantem, quoniam dolor diruptionem, & partem diruptam omninò debet concomitari, qui cum fieri non possit nisi ab humore discindente, & continuum solvente, propterea divulsionem ipsas

expressit Hippocrates veluti dolorificas, atque sub sensu cadentes.

Si itaque contingat, ruptiones, & divulsionem partium dorsi transferri in cubitum, hoc est humores, dolores in dorso inferentes, ex parte ipsa divulsa dimoveri, & in cubitum deponi, argumento erit causam ipsam divulsionem, & dolorem inferentem, mobilem esse, atque adeò facilius posse evacuari per vasa proximiora, & magis consentientia, qualia sunt venæ, per quas sanguis, serum, lymphæ, aliæve humor perpetuò circumit. Atque hinc est cur Hippocrates hic scripserit venæ sectione ruptionem ipsam definire, quatenus per venæ sectionem humor ille divulsionem, & dolorem inferens, utpote mobilis, & in cubitum delapsus, facile possit evacuari.

Non tamen hinc quis licitè deducere poterit in contusionibus, luxationibus, fracturis, cæterisque divulsionibus partium musculosarum, debere venam secari, nam præterquam quod tunc dumtaxat admonet hic Hippocrates venæ sectione divulsionem solvi, cum humor de parte divulsa ad cubitum defertur, atque adeò mobilis est; neque tamen in quibusvis ruptionibus, divulsionibus, & fracturis causa illas efficiens interna est, sed sæpe sæpius externa, cujus ratione solutio continuæ manifesta est, & sanguis, aliique humores in partibus fractis, aut contusis hæret, & restagnat, qui propterea nulla ratione per venæ sectionem evacuari poterit, sed omninò resolutione egebit usu, & auxilio medicamentorum attenuantium, dissolventium, & promoventium diaphoresim. Et licet nonnulli in his etiam casibus sanguinem mittant, id tamen agunt, non ut hærentem ibidem sanguinem educant, & ruptionem

Hollierius etiam
περὶ μέρους
id est fluxiones
legere
non videtur.

ptionem solvant, sed solum ut prohibeant fluxurum in partem affectam humorem, qui quò paucior fuerit in venis, eò minus in partem affectam confluere poterit. Verum an id rectè etiam agatur, non est meum in præsentì loco examinare. Cæterum Hippocrates nulla facta venarum electione, simpliciter dixit, *venæ sectione ruptionem solvi*, fortè quia existimavit sanguinem undecumque evacuatum istiusmodi irruptionibus conferre. Nisi etiam dicere velis, implicite contineri in aphorismo venæ sectionem in cubitu faciendam, eo quòd ex dorso ad cubitum ruptionem descendere dicatur, quæ cum ex humore mobili, & fluente, ad illam partem descendere putetur, per venas quoque eidem proximiores, atque adeò ex cubitu, verisimile sit sanguinem velle esse mittendum.

APHORISMUS XXIII.

Si timor, atque mœstitia longo tempore perseverent, ex eo atrabilis significatur.

QUamvis Leonicenus ex metu, & mœstitia longo tempore perseverante atrabilem significari scripserit, rectius tamen reliqui Interpretes non atrabilem, sed melancholiam ex græco codice vertunt; & licet atrabilis aliquando pro melancholia exponatur, ad evitandam nihilominus æquivocationem, melius erit melancholiam, non atrabilem hic exponere. Sed & neque pro melancholia humor melancholicus intelligendus est, sed potius affectio melancholica; unde Cardanus, & Heurnius scribunt: *si timor & mœstitia longo tempore perseverent, tale est melancholicum.*

Et sanè inter symptomata melancholicam affectionem concomitantia, præcipua recensentur ista duo, Timor, & Mœstitia sine causa manifesta, ut latè explicat *Galen. 3. de loc. affect. cap. 7.* ubi etiam Dioclem reprehendit, quòd in examine symptomatum, melancholicum delirium comitantium, istorum duorum non meminerit, quippe quòd ab his duobus potissimum, rectè quis iudicabit, patientem factum esse melancholicum, si diuturna mœstitia, ac panico timore laboraverit. Et licet in hoc textu simpliciter dicatur ex diuturnitate temporis, quo timor, & mœstitia perseveraverit, melancholicum judicari debere patientem; quia tamen diuturna mœstitia, ac perseverans timor neutiquam à manifestis, ac externis causis oriri possunt, idcirco conditio ista sine causa manifesta videtur implicite contineri in temporis diuturnitate, quo timor, & mœstitia perduraverint. Quoties enim timor, & mœstitia ex manifestis causis cœperint, puta ex obitu parentum, aut amicorum, ex infortuniis, calamitatibus, cæterisque hujus sæculi ærumnis, tum animi, tum corporis, tum denique bonorum fortunæ, in longum tempus protrahi non solent, nisi tamen à causa interna foveantur; unde cum diù perseveraverint, non nisi ab humore melancholico, depravante cerebri operationes, ortum ducent, ut propterea sub particula illa *diù* hoc est, *longo tempore*, implicite quoque contineatur, id accidere non à causa manifesta, & externa, sed à causa interna, & humoralì.

Quo autem pacto timor, & mœstitia ab humore melancholico, & acido procedant, indeque designent affectionem in cerebro contractam, similiter melancholicam, præter ea,

quæ fusè attulit Galenus *cit. 3. de loc. affect. & 2. de symptomat. caus.* clarè quis deducere poterit peruestigata conditione ejusdemmet humoris, sua aciditate magnoperè depravantis internas cerebri operationes, nec non etiam malè afficientis tum motum cordis, tum sanguinis, quem admodum pluribus ostendit præ cæteris Vvillisius, & nos etiam tum *in nostra Practice*, tum etiam in commentariis super 3. *Artis medicæ Galeni Cap. de passionibus Animi.*

Cùm itaque timor, & mœstitia diù aliquem infestaverint, & sine evidenti externa causa in longum tempus perduraverint, indicio erit talem factum esse melancholicum, hoc est delirio melancholico laborare. Verùm quamvis dictum sit, sine causa evidenti, & externa, melancholicos timere, & mœstos esse, fieri tamen poterit, ut etiam à causis externis timorem, & mœrorem inferentibus, sit quis melancholico delirio laboraturus; etenim si ex præcedente mala dispositione, & habitudine corporis ad melancholicum vergentis, ex malo fortassè apparatu succorum acidorum, quis à nimio mœrore, & à vehementi timore extrinsecùs illato, incidat in tantam animi consternationem, ut deinceps amicorum societatem fugiat, solitudinem inquirat, cibos non assumat, ploret, vigilet, & aliis consimilibus incommodis se submittat, poterit proculdubiò melancholicum delirium progressu temporis incurrere, ut propterea timor, & mœstitia, quæ symptomata sunt melancholicorum, fierent in isto casu causæ ejusmodi affectionis. Non negandum tamen, quòd cùm symptomata sunt melancholicorum, junctum melancholicum delirium attestantur; cùm verò melancholicorum causæ sunt, dis-

junctum una, vel altera, veluti separatæ passiones animi, melancholiam ingenerabunt, inducta nimirum in sanguine, cæterisque liquoribus corporis diathesi, acorem præseferente, vel aliter hebetante motum ejusdem, & cordis, ut alibi à nobis est ostensum. Delirium autem, etsi non semper in cunctis vocale sit, mentale saltem erit, cùm sæpenuerò mente solùm, quæ timent, aut merent, continuò recogitent, ac revolvant, & mille phantasmata sibi fingant.

Quamquam autem melancholicos hic ab Hippocrate notatos, censuerimus esse eos, qui ex nigro, fæculento, tartareo, & acido humore melancholico laborant, quique hebetes, taciturni, solitarii, tristes, ac pavidie esse solent; si tamen melancholicus humor non lentus, & crassus, terreusque sit, sed tenuis, acris, salino-sulphureus, & facilè inflammabilis, velut, qui cum atrabile à plerisque confunditur, quemadmodum ex prænarrata quorundam versione superiùs est memoratum; proculdubiò neque pavorem, neque mœrorem præseferet, sed potiùs Ingenii vivacitatem, Intellectus acutiem, Mentis perspicaciam, & speculandi profunditatem largietur, ut in plerisque à nativitate, Melancholicis natura dictis, experimur. De his namque scitè admonet Aristoteles *Problem. sect. 30. probl. 1.* in carminibus pangendis, in Republica administranda, & in studiis Philosophiæ semper extitisse optimos, quales, inter ceteros plurimos, fuisse testatur Empedoclem, Socratem, & Platonem; & nostræ quoque ætati proximos, ferunt alii, ejusdem prorsus indolis fuisse Tassum, & Cartesium. Hinc Seneca *de Tranquillitate animi*, affirmare nō est veritus cū Platone frustra pulsari fores poeticas absque

*que furore; & cum Aristotele, nulum magnum ingenium sine mixtura demerita: quamobrem non posse grande aliquid, & supra ceteros loqui, nisi motam mentem; quippe quod ab ejusmodi humore atrabilario non quidem spiritus pauci, hebetes, effœti, & lenti proficiscuntur, qui solum circa cerebri medullium (ut in melancholicis terreis) operantes, potius mentis confusio- nem pariunt, phantasmatum turba- tionem, & in judicando inertiam; sed potius tenues, mobiles, quaquaversum impetentes progignuntur, ferè ut in maniacis, & furiosis; unde postmodum fortis apprehensio, vehemens, & prompta existimatio, acutum judicium, & profunda intel- ligentia exoriuntur. Atque hinc stu- pendum quidem, quod à plerisque memoratur, hujus generis homines aliquando extitisse phanaticos, ac veluti ecstasi abreptos, nedum exo- tico idiomate, quod nunquam didi- cerant, fuisse loquutos, sed & ventu- ra fermè vaticinatos; fortè quia ex intensa, ac profunda nimis in seipsis meditatione, ab externis objectis pe- nitùs abstracti, nullamque in men- te aliorum phantasmatum turbatio- nem passi, usque ad ultimas rerum differentias per rectam mediorum continuationem rei præconceptæ, & concupitæ, votum, & finem sunt tandem assequuti. Hinc efficitur porro (concludit Aristoteles ibidem) *ut melancholici omnes non per mor- bum, sed per naturam, sint ingenio singulari.* Per naturam quidem: nam si præter naturam atrabilarii humo- res corporibus ingenerentur, exi- tiales morbos pariunt. Verùm de hac re legantur præ cæteris, *Valles. de Sacr. Philos. cap. 30. Gaspar à Re- ies Camp. Elys. jucund. quæst. 27. Cel. Rhodigin Antiq. Lect. l. 17. c. 5. Sen- Tozzi Op. Med. Tomo IV.**

nert. lib. I. prax. p. 2. c. 15. qu. 1. Mar- cell. Don. de hist. med. mir. lib. 2. cap. 1. præter alios.

APHORISMUS XXIV.

Si quod intestinorum gracilium di- scindatur, non coalescit.

QUOD in hoc aphorismo conti- netur, fuit ab eodem Hippo- crate expositum *Aphorismo* 18. ea solum differentia, quod ibi gracilia intestina cum aliis partibus connu- merata recenseantur, hinc verò sejun- ctim ab aliis, gracilia solum intestina non coalescere referuntur, si fortas- sè discissa sint. Hinc mirum videri debet, qua ratione id ipsum hoc loco sit repetitum, quemadmodum cum Galeno in *commentario* reliqui In- terpretes confitentur; undè Carda- nus nedum illum explicare non est aggressus, sed neque in aphorismo- rum serie ausus est connumerare, cum illum inter aphorismos adscri- bere non curaverit. Quoniam igitur ratio istius dicti in expositione illius aphorismi enarrata est, ad eundem propterea locum vos remitto.

APHORISMUS XXV.

Erysipelas ab exterioribus verti ad interiora, non est bonum: ab interioribus autem ad exteriora, bonum.

CUM Erysipelas fieri communi- ter dicatur, à tenuiori, & a- criori sanguinis portione, quam bi- liosam Veteres appellarunt, & hæc facilè mobilis sit, & de loco in lo- cum excurrens, considerans ea pro- pter motum illius in hoc aphorismo Hippocrates, inquit, ab exteriori- bus partibus ad interiores verti

malum esse, contra verò bonum ab interioribus ad exteriores. Idipsum scribitur in *Coacis prænotionibus* sub his verbis: *Erysipelas foris quidem accedere commodum est, intrò autem converti lethale: Convertitur autem intrò, cum disparente rubore pectus gravatur, & difficilem spirationem habet*. Ubi de erysipelate pectus occupante peculiariter meminit.

Neque solum credere licet locutum hic Hippocratem de erysipelate superficie-tenus apparente, atque adeò extimam corporis cutem dive-xante, sed etiam de erysipelate in interioribus partibus enato; siquidem qua ratione erysipelas extrinsecus fit, eadem fieri solet intrinsecus, & in intimis visceribus corporis, quæ (ut experimento pluries constat) nulla ab hac affectione immunia esse non solent; quare & meninges cerebri, & pulmones, & jecur, & septum transversum, & uterus erysipelate affecta sæpè observata sunt, ut propterea sicuti inflammationibus, aliisque tumoribus interna viscera obnoxia sunt, ita etiam possunt erysipelate laborare, unde Hippocrates 5. *aphor.* scripsit: *si in utero fiat erysipelas, lethale*; his verbis denunciando benè posse uterum erysipelate affici.

Si ergo erysipelas interiùs ingentum, ad externas partes vertatur, bonum erit; quippè quòd melius semper censendum est interiora viscera ab ægritudinibus vindicata remanere, etiamsi externæ partes afficiantur. Contrà verò gravius omninò erit, & non sine ingenti vitæ periculo, erysipelas introverti, male affectis internis visceribus, veluti ad vitæ tuitionem non amplius conferentibus, cum & sanguis, qui per illa perpetuò circumit, facillimè in-

ficiatur, & infectus, cæteras quoque partes, ac præsertim cor, brevi temporis interstitio valeat contaminare. Accedit, quòd humor erysipelas efficiens, vel conservans, peioris semper erit conditionis, cum introvertitur, & præter tenuitatem, acritatemque, acidam, ponticam, malignamque naturam participabit: si enim tenuis solum foret, & volatilis, proculdubio sponte sua resolveretur, & ex habitu corporis ne-tiquam denuò intimas partes pervaderet, ubi semel deflagrasset.

Est tamen advertendum, quòd ejusmodi introversiones erysipelatis citrà quamcumque occasionem, aut causam externam debent evenire; etenim si fortassè ex ambiente frigido, ex lotionibus aquæ gelidæ, aut etiam ex applicationibus medicamentorum infrigidantium, & repellentium, vel etiam incrassantium, & obstruentium poros cutis, erysipelas ab extimis ad intima vergeret, etsi malum quoque foret, quia tamen non ex defectu naturæ, neque ex vicio peccantis humoris id eveniret, minus profectò malum foret, & faciliùs posset introversum erysipelas extrà verti: quod secus accidet si sponte sua, & ab interna causa introverteretur.

Sed & prætereà animadvertendum, tunc solum bonum esse erysipelas extra versum; cum per ejusmodi extraversionem liberantur partes internæ; secus verò si partibus internis nullatenus vindicatis, nec ab erysipelate liberatis, illud ad partes externas vergeret, quemadmodum fieri solet, cum propter multitudinem, & malitiam vitiosorum humorum non satis sunt partes internæ, sed etiam externæ coguntur superabundantes illos humores excipere; Coniiciet autem prudens medi-

medicus bonam fore istiusmodi extraversionem, cum febris, sitis, ardor, inquietudo, & cætera symptomata, quæ cum erysipelate conjunguntur, omninò desinunt, vel magna ex parte saltem remittuntur; at verò si iisdem perseverantibus, nec ulla ratione intermissis, erysipelas extravergere videatur, pessimum indicium erit, denuncians præ multitudine, & pravitate peccantium humorum, nedum partes internas, sed etiam externas affici, & coinquinari.

Quod Hippocrates hic de erysipelate dumtaxat commemoravit, rectè admonet Galenus *in comm.* aptari quoque posse cæteris omnibus transpositionibus è partibus internis ad externas, ut alibi quoque de Angina 4. *aphor.* recensuit: semper enim, ac humor, vel quodcumque aliud præternaturam, è partibus intimis, & profundis corporis, ad extimas, & superficiarias vergit, bonum erit. Quandoque etiam motus humorum habitus à partibus intimis ad intimas, vel etiam ab extimis ad extimas boni, vel mali esse poterunt, attenta partium conditione, & natura; unde si à partibus intimis, sed præstantibus ad partes internas ignobiles humores deferantur, bonum erit; contrà verò à partibus ignobilibus ad nobiles, malum. Ita quoque si pravus humor, aut etiam erysipelas è partibus infernis ad supernas, ex brachiis, aut cruribus ad pectus, aut caput deferatur, malum. Itaque in unaquaque humoris motione considerata est partis præstantia, robur naturæ, integræ depositio, aut transmissio, termini à quo ad quem, spatium, seu medium, per quod transpositio illa fit, conferentia, tolerantia, & humoris commoti quantitas, qualitas, & permanentia in parte, ad quam transmissio facta est.

Deniq; pro praxi notandum perperam ex hoc aphorismo illos agere, qui ad reprimendum ardorem, & ruborem partium erysipelate affectarum consulunt infrigidantia medicamenta, aut etiam oleosa, haudquam animadvertentes, facile ab illis reprimi, & cohiberi motum naturæ propellentis ad cutim; ut propterea subsequi subinde soleat, vel introversio erysipelatis ad partes internas, & principales, vel ejusdem suppuratio, cum tamen utrumque malum sit. Satiùs ea propter erit extrinsecus admoveere medicamenta, quæ motum ipsum ad exteriora promoveant, & cutis poros patentiores reddant, ut hac ratione faciliùs vitiosi humores attenuentur, & resolvantur. In quem finem consultò solent plerique partes erysipelate affectas sæpiùs madefacere vini spiritu, sicut etiam spiritu salis ammoniaci correcto, vino camphora medicato, aliisque similibus. Quòd si hæc admoveere formido sit, juvabit partes ipsas ab ambiente frigido linteis tueri, atque intrinsecus exhibere ea, quæ simul corrigant, & diaphoresim promoveant, atque ex his, quæ mitiora videbuntur, ut est pulvis viperarum, cornu Cervi præparatum, sanguis Hircinus, lapides Cancrorum pulverati, sal cardui benedicti, & his similia. Referuntur quoque nonnulla extrinsecus admota erysipelati specificè prodesse, ut sanguis Leporinus recens extractus, & linteo superimpositus, sanguis caudæ felis, ros Vitrioli, sperma ranarum, aqua calcis, & in qua lapis medicamentosus Crollii sit dissolutus. Verùm ista potius retundendo acidum, quod in erysipelate vigere solet, quam sympathia, ut Veteres crediderunt, conferre putantur.

APHORISMUS XXVI.

Qui in febribus ardentibus tremores fiunt, delirio solvuntur.

IN expositione istius aphorismi non conveniunt Interpretes. Cum enim sententiam hanc non levibus difficultatibus implexam viderint, non fuere propterea concordēs, ut in commodum sensum illam revocarent. Et quidem qua ratione contingat, ut in ardentibus febribus tremores fiant tam ab illis disparati? unde Brasavolus pro tremoribus, rigores apposuit, quoniam rigor ardentem febrientibus supervenire solet: Insuper quomodo fieri possit, ut delirio solvantur sive febres, sive tremores, cum delirium febribus ardentibus superveniens illarum malitiam augeat, non minuat; hinc nonnulli volunt legendum tremore solvi febrem ardentem, non delirium. Putant alii non debere scribi *delirio solvuntur*, ut habet lectio Leonicensi, sed potius *delirium succedit*, ut exponit Fuchsius, existimans ex tremore ardenti febre superveniente succedere delirium, sensu penitus opposito. Quin & Heurnius delirio quidem eos solvi ait, sed in mortem desinentes, quippe qui ex tremore delirantes resoluti pereant. Quamobrem Cardanus tam acriter invehitur in Galenum, aliosq; Commentatores, ut se coactum dicat cum insanientibus insanire.

Ne autem de veritate istius aphorismi, deque illius vulgata versione dubietas ulla emergat, eandem sententiam recolligere ad verbum Nobis liceat ex *lib. de judicatione*, & *de Coacis prænotionibus*, unde hic aphorismus est erutus. Quoniam igitur in utrisque his locis de tremori-

bus, non rigoribus delirio solutis fermo fit, ambigere propterea nulla ratione licebit de vulgata versione, adeoque non esse pervertendam sententiam hanc, ut reliqui Interpretes voluerunt; idcirco sensus erit, tremores ardentem febricitantibus supervenientes, delirio facillime solvi, sive ad salutem, sive ad mortem: quamobrem verbum illud *solvi* non erit referendum ad febres, sed ad tremores, ut scilicet tremores ipsi supervenientes febribus ardentibus desinant in delirium, sitque delirium ipsum judicatio tremorum, licet ex febre ardente, & ex delirio eidem superveniente eger facile sit periturus, nisi opportunis, & convenientibus medicamentis illi occurratur.

Atqui fieri etiam potest, ut per delirium, ac febrim promptius extenuentur, & dissolvantur humores nervorum fibras vellicantes, adeoque simul unà ab utrisque ager evadat, juxta quem sensum Celsus hanc sententiam vertit *lib. 2. c. 8. cui calor, & tremor est, saluti delirium est*.

Quoniam verò tremores hic memorantur supervenientes febribus ardentibus, dubitari non incongruè potest, quomodo illi ardentem febrientibus contingere queant? præsertim quia Galenus *lib. 2. de symptom. caus. cap. 2.* tremorem ait esse motum compositum ex facultate debili conante sursum attollere membrum, & ex gravitate ejusdem membri deorsum tendente, unde tremor exurgit, quia ex una parte membrum gravat, & ex altera facultas debilis sustinere illud non potest, quemadmodum exemplo constat in senibus, qui propter virium imbecillitatem tremoribus corripiuntur. Id ipsum experiri est in puel-

puellis pondus aliquod elevare conantibus, qui cum tanta virtute non polleant, ut illud attollere valeant, tremere solent. Sic etiam bajuli ingentiora pondera ferrè cum non possunt, sub illis toto corpore contremiscunt.

Verum qui consideraverit irascentes adhuc juvenes quandoque magno, & impetuoso tremore affici, & quò fortiores illi fuerint, eò etiam impensius tremere, cum tamen in illis nulla improportio fingi possit inter facultatem attollentem, & membra deprimentia: Et ex adverso repentino timore perculsos, vehementer quoque tremere; itemque maniacos, phreneticos, aliosque citrà ullum partium languorem contremiscere solere, non irrationabiliter ambiget de causa tremoris, quam Galenus attulit, ut alibi quoque demonstravimus *in nostra praxi*; quamobrem non immeritò Cardanus *in commentario istius aphorismi*, duo genera tremorum distinguere non est veritus, atq; unum inquit fieri ab imbecillitate facultatis, ut in senibus, & pondere gravatis; alterum fieri cum magno impetu ex depravatione motricis facultatis, non tamen debilitatæ, quemadmodum in convulsionibus ex irritamento vaporum, aut acrium humorum, itemque in palpitatione, & similibus ægritudinibus.

Contingent autem tremores in febribus ardentibus ex illapsu humorum acrium, aut vaporum è cerebro in nervos, nervorumque tunicas, quæ proritatæ, ut à seipsis expellant infensos istiusmodi vapores, aut humores tremorem excitant. Quòd si huic tremori delirium superveniat, quia recurrentibus humoribus, aut vaporibus ad cerebrum, desinunt punctiones illæ nervis illa-

tæ, proindè fit, ut tremores delirio solvantur, quamquam in pejus ruat æger, nam longè pejus est delirare, quàm tremere. Cæterum, qui ajunt, febres exinde solvi, non tremores, longè, latèque falluntur, tum quia verbum illud solvuntur ex contextu verborum, nullatenus referri potest ad febres, tum etiam, quia nemo sanæ mentis concipere poterit solvi febres ardentes à delirio superveniente, cujus causa potius illæ increbrescunt, & multoties in mortem desinunt. Atqui fieri solùm potest, ut humores in Cerebrum recurrentes, & excitantes delirium, tenues admodum sint, & facilè resolubiles, qui propterea promptè evanescentes, & febrì, & delirio finem faciant.

APHORISMUS XXVII.

Quicumque suppurati, aut aquam intercutem patientes uruntur, aut secantur, si pus, aut aqua universim fluxerit, omnes moriuntur.

PRo suppuratis intelliguntur empyematici, qui nimirum puris collectionem in cavo thoracis subeunt: Hi autem cum multoties nequeant universam puris quantitatem per tussim egerere, ne suffocati perirent, solebant Veteres sectione, aut etiam unctione, inter quintam, & sextam costam inita, purulentam illam materiam evacuare, quemadmodum tempore Hippocratis in frequenti usu erat; quod & idem Author manifestè edocet *lib. de internis affectionibus*, confirmantque Celsus, & Ægineta, alique, ne dum ex vetustioribus, verum etiam ex recentioribus Medicis. Idem quoque solitum peragi in Hydropicis, & Asci-

Asciticis advertit etiam Hippocrates *lib. de locis in homine*, & præcitus Ægineta ejulce operationis modum tradit *lib. 6. cap. 56*. Nec desunt inter Recentiores, qui summa diligentia, & felici successu peractam in aliquibus paracentesim fateantur, educta sensim aqua in abdomine collecta.

De his ergo inquit hoc loco Hippocrates peculiarem cautionem habendam esse, ne pus, aut aqua confertim effluat, quemadmodum etiam in præcitis locis consulit. Si namque universum pus, & tota aqua ex illis educatur, mortem subinde eventuram præfagit; unde licet in præallegatis locis, cum cætera præsidia non profecerint, ad educendum pus ab Empyematicis, & ad evacuandam aquam ex Asciticis sectionem, vel unctionem commendet, illam tamen non universim, totamque simul educendam admonet, aliter illa affatim exeunte mors præstò erit, ut aliquando etiam Nos observavimus in quodam Ascitico, qui licet ab exitu aquæ visus fuerit per aliquot horas in pristinum salutis statum restitutus; mox tamen repente venter intumuit, & paulò post periit.

At qua de causa ex subita tum puris, tum aquæ subtercutem evacuatione mors certò immineat? Erasistratus, ut refert *Galenus in commentario* dicebat se experientia compertum habuisse, universam evacuationem febres, ac mortem afferre; verum unde id accideret, non memorat, cum tamen aliud quid diversum sit inter evacuationem affatim factam statim à principio, & eam, quæ in confirmato empyemate, & hydrope evenit, siquidem semper robustiores erunt vires inter initia, quàm sint diuturno post tem-

pore, ab inveterato hydrope, aut empyemate. Sed & magna quoque differentia est inter sectionem, & unctionem; unde unctionem non nisi volunt in pectore faciendam, sectionem verò in imo ventre. At Hippocrates varius in hac eadem re videtur; nam 2. *de morbis* secandum, non urendum in empyicis ait; & in aqua intercute urit, non secat, *lib. de inter. affect. & 6. epid. hydropicos*, inquit, *citiùs secare oportet, tabescentes verò statim urere*; at verò *lib. 3. de morbis* agens de suppuratis, sectionem, aut unctionem simul commendat; quamvis *Galenus in comm.* unctione egere dicat eos, qui plurimum habent pus, quod per sputum nequeat expurgari; eos verò, qui aquam intercutem patiuntur, sectione potius quàm unctione. Verum quocumque pacto pus, vel aqua confertim egeratur, periculosa semper erit evacuatio, cujus causam refert idem Galenus in suppuratis ad spirituum immodicam exolutionem, quæ simul cum puris evacuatione inevitabiliter accidit ob vasorum reserationem, quæ antea à pure, & à puris acritudine continebantur occlusa; in hydropicis verò non modò ob causam mox enarratam, sed etiam ob subitam viscerum duritiem, quoniam subducta aqua non amplius irrorantur, sed arefiunt, unde septum deorsum trahitur cum reliquis visceribus, quæ in thorace sunt. At potius ipse crediderim mortem iis accidere, quia per subitam, & immodicam tam puris, quàm aquæ intercutis evacuationem vires concidunt, & viscera labascunt, tum quia nulla immodica evacuatio, etiamsi pravorum humorum sit, tolerari potest; tum quia partes illæ inanitæ aliquo alio corpore, aut etiam aere, repente impleri

pleri solent, quod ad vitam sustinendam inidoneum omninò erit; tum etiam quia in partes istas inanitas humores, qui in venis, & arteriis continebantur, sine ulla remora confluunt, unde vasa quęcumque corporis ferè inaniuntur, ita ut circulationem sanguinis, & lymphę penitus interrumpant, quemadmodum præsertim in hydropicis sæpe sæpius est observatum, in quibus paulò post aquę extractionem ex abdomine, lymphæ, quę supererat in vasis lymphaticis brevi temporis intervallo tota prorupit in abdomen inanitum. Accedit, quòd in his totus ferè sanguis vertitur in serum, acre simul & falsum, & in empyicis à pure in pectore collecto sanguis pariter inficitur tanta acritate muriatica, ut plus justo dissolutus, fluitet in venis, & arteriis; unde per immodicam, & subitam utriusque evacuationem, commotione majori in toto sanguine, & in visceribus corporis inducta, pauci illi spiritus, qui supererant, suffocantur, extinguuntur, vel dissipantur.

APHORISMUS XXVIII.

Eunuchi neque podagra laborant, neque calvi fiunt.

Licet tempore Hippocratis perpetuò verum observaretur, Eunuchos, quibus scilicet virilia exempta forent, podagra non laborare, quia nostra tamen ætate plurimi adhuc observantur podagra affecti, non defuerunt, qui Hippocratem falsitatis in hoc aphorismo arguerent, quasi verò sententiam hanc inter aphorismos retulerit veritati non consentientem. Verum etsi id verum sit, quia nihilominus rarissimè accidit Eunuchos, propriè

tales, podagra laborare, illaque nonnisi in ultima senectute, idcirco non erit cur Hippocratem inculpe-
mus; quandoquidem ut alias notavimus, ea potissimum Hippocrates literis tradidit, quæ vidit, & frequentius evenire comperiit.

Ratio autem, cur Eunuchi Hippocratis tempestate, non tam facile podagra afficerentur, triplex ab Authoribus recensetur; ut præ cæteris memorat Fuchsius hoc loco. Primò, quòd non omninò ea tempestate otiosi forent, cum mos fuerit apud Veteres mulierum famulatu Eunuchos adscribere; quamobrem serosa illa excrementa, quæ in illorum corporibus cumulabantur, benè poterant exercitiis, immò etiam laboribus, sive sensibiliter, sive insensibiliter dissolvi. Secundò, quia ad coitum impotentes erant, quòd plerumque imbecilliora reddi solent corpora, & potissimum in articulis. Tertiò, quia moderata illis victus ratio erat, unde pauca, vel nulla excrementa cumulari poterant: Nunc verò, cum hæc omnia non tam exactè ab eisdem servari soleant, mirum non est, si nonnulli inter eos podagra afficiantur. Neque solum Eunuchi, ut hic memorat Hippocrates, à podagra immunes erant vetusta illa ætate, sed ut advertit in commentario Galenus, nec reliqui omnes tam facile illa corripiebantur. *Ætate quidem Hippocratis, inquit hoc loco Galenus, pauci podagra laborabant propter vitæ moderantiam; nostris verò temporibus usque adeò auctis eduliis, ut nihileis addi posse videatur, infinita est podagricorum multitudo, cum nonnulli sint, qui nihil exerceantur, & cruditatibus, atque ebrietatibus offendantur; & ante cibum assumptum bibant vina po-*
ten-

tentia, ac venereis utantur immoderatis: nonnulli verò etsi non his omnibus, in uno saltem, aut duobus exiis, quæ dicta sunt, delinquant. Et paulò infrà subdit: Accedit & ad has causas, ob quas plerique incidunt in podagras: quòd multi & patres, & avos habuere podagricos, in quibus semen erat vitiatum, atque idèò posteris vehementiorem fecerunt partium imbecillitatem. Quoniam verò Eunuchi in his non rarò delinquere solent, poterunt podagra quam maximè corripì, quamvis nullum habeant usum venereorum: talis enim (ut observat ibidem idem Galenus) est illorum desidia, insatiabilitas, ebrietasque, quòd etiam sine venereis podagra corripì possunt.

Est tamen advertendum, quod Eunuchorum alii sunt, qui Castrati dicuntur, alii Spadones, alii Thlasia, aut etiam Thladiæ, & alii Thlibiæ appellati. Castrati dicuntur, quibus ante pubertatem non solum testes, sed etiam virile membrum exsectum est, ut apud Turcas fieri consuevit; ve etiam tales sunt, qui sine testibus progeniti, vel ab ipso primo ortu exsecti nil virile habent ex Luciano, atque hi propriè Eunuchi appellantur. Thlasia, & Thladiæ sunt, quibus testes solummodò in prima ætate fracti fuere. Thlibiæ verò, qui attritos habent testes, quemadmodum fit in Juven-
 V. Gal. 15. de u-
 su par. c.
 3.

extra vasa ejaculari non possit; quomobrem ex istis nonnulli sunt, qui nequeunt generare, non quòd semen fœcundum minimè gignant, sed quòd propter aliquod impedimentum semen effundere nequeant, eo quod in suis cavitatibus, aut flexuris hæreat, quemadmodum ex multis colligit Fuchsius in *commentario istius Aphorismi*: sed & alii licèt semen emittant, infœcundum tamen illud est. Spadonibus quoque adnumerantur ex Alciato, qui cum uno tantum teste nati sunt, aut qui altero dumtaxat sunt exsecti. Cum igitur Hippocrates in hoc textu de Eunuchis meminerit, illi propriè intelligendi erunt castrati, & quidem ii, qui in ætate puerili antequam pubescere, & semen progignere cœperint, testium resectionem passi sunt. Cæterum Thlasia, Thlibiæ, & Spadones, planè possunt podagra corripì, cum licèt semen non efficiant, vel non emittant, benè tamen concumbere possunt.

Est præterea advertendum, Eunuchos podagra propriè dicta corripì non solere, posse tamen affici doloribus articulorum, etenim plurimum interest inter podagram, & articulares dolores; siquidem licèt artus in utrisque afficiantur, articulares tamen dolores redire non solent, sed postquam semel invaserint, & ad plures dies etiam cum febre acuta, & continua vexaverint, tandem, cum desierint, non tam facilè redeunt, nisi ex nova, & præpotenti causa; at verò podagra certis quibusdam temporibus redire solet citrà quamcunque causam, etiam si in his rectam victus rationem servaverint, & quidem in mutationibus tempestatum, scilicet in solstitiis, & æquinoctiis. Atq; hinc planè constabit, posse pueros, & ado-

L. Spadonum, ff. de verb. signif.

adolescentes quoque articularibus doloribus affligi, secus verò podagricis propriè diëtis; quamquam nostra ætate ob intemperantiam victus, & ob luis venereæ contagionem etiam visi sunt aliquando adolescentes, & juvenes podagricis doloribus affici, & iteratò vexari.

Sed est insuper notandum in podagra, chiragra, cæterisque doloribus articularibus, atque in Arthritide universali, duos concipi debere humores illos excitantes, alterum quidem, qui vel à toto, ut putavit Schneiderus, vel à cerebro juxta mentem Fernelii, vel à stomacho, & hypochondriis, ut alii voluere, dependet, & veluti à parte mandante, ut plerisque dicitur, per reliquum corporis divagatur, ut est serum sanguinis, vel lymphæ acrior, acidiorve reddita, ac salina conditione imbuta; alterum verò articulis ipsis inesse, atque in internodiis ossium, qualis Paracelso *synovia* dictus est, vel potius ex glandulis artuum mucilaginosus suggestus, qui licet in ætate puerili, ac juvenili fluxilior, laxior, molliorque sit, in senili tamen ætate crassior, densior, & acidior evadit, atque fermenti podagrici, vel chiragrici vices gerit, estque deinde in causa cur ibidem hæreat, ac restagnet serum illud, vel lymphæ præterfluens, adeoque tumorem, ruborem, ac dolorem infert vehementiorem, vel mitiorem, prout acrior, acidiorve fuerit, aut contra temperatior, & levior. Neque quis putet, quòd synovia, aliufve humor crassior redditus in senibus incapax sit ejusmodi acritatem, & dolorem artuum inferendi; Nam præter crassitiem acquirit etiam in senibus (ut reliqui humores) aciditatem, acritatemque; unde quemadmodum calx, auripigmentum, aliæque res

duræ per humoris injectionem fermentescunt, ac tumescunt, ita & gluten ipse. Debet autem istiusmodi glutinosus, aliufve similis humor articulis inesse, ut inibi cum præterfluente humore lymphico, vel sero sanguinis, fermentationem, tumorem, ac dolorem inferat; nam aliter nulla potior causa foret, cur ibi hæret, & non alibi. Neque satis est dicere ibidem hærare, quia articuli sunt partes ignobiles, quo natura transferre solet humores peccantes; nam ex hac ratione deberent potius vitiosi transferri ad alvum, aut vesicam, veluti ad partes longè ignobiliores, immò à Natura ipsa destitutas veluti in cloacam corporis, ad excipiendas omnes superfluitates ejusdem. Quare necesse est, ut in articulis aliud quid resideat, quod in causa sit, ut ibi fluentes humores hæreant.

Hinc ut Eunuchi, aut Spadones podagra sint exempti, satis non est, ut ad coitum sint impotentes, sed necesse etiam est, ut rectam servant victus rationem, cum ex superius traditis, præter artuum imbecillitatem, & glutinis, aut mucilaginis ibidem stagnantis vitium, serosi, ac lymphici etiam humores ex toto, vel ex visceribus naturalibus, aut etiam aliunde illuc confluant, ut dolores arthricos excitent. Porro in Eunuchis, Spadonibus, cæterisque similibus languidæ, & molles constitutionis, ejusmodi humores excrementosi, & aquei solent plurimum abundare. Atqui compertum adhuc est, cælibem vitam ducentes non rarò etiam podagra corripì, nisi simul unà temperantes sint, & frugales.

Denique neque calvos fieri Eunuchos docet hic etiam Hippocrates, quod certè verius, & universalius obser-

observatur. Cum enim calvitium fiat ob carentiam, & privationem ejus humoris, qui per cutim capitis diffusus radices capillorum irrigat, & in alimentum eorundem transit, quia Eunuchi carnes habent molliores, & ejuscemodi humoribus quam maximè abundant, veluti mulieres, quibus per quàm similes sunt, ut etiam advertit Aristoteles asserens *lib. 5. de gener. animal. cap. 3. Eunuchos non calvescere, quòd in fœminas mutantur*; unde Galenus, *Eunuchos*, ait, *sectio testiculorum similes efficit fœminis; sicuti ergo in eis calvities non accidit, sic neque in Eunuchis*, proinde fit, ut minimè calvi fiant. Quod autem dicitur calvitium oriri in hominibus ob cerebri siccitatem, & consumptionem, non videtur omninò verum: etsi enim cerebrum in senibus quodammodò constipetur, & obdurescat, non tamen tantam siccitatem acquirit, ut omni humiditate privetur, unde capilli decidere debeant; neque verò à cerebri humiditate capilli progignuntur, sed potius ab ea, quæ in glandulis subcutaneis continetur, cum cæteroqui nequirent per meningis, cranii durtiem, densitatem, ac magnitudinem, pervadere ad radices capillorum usque. Accedit, quòd si ex cerebri siccitate, & consumptione calvitium accideret, non magis in syncipite, quàm in occipite illa foret observabilis, cum tamen experiamur calvitium fieri dumtaxat in syncipite, secus verò in temporibus, & in occipite, ubi sola canities accidit. Verùm de hac re aliàs.

APHORISMUS XXIX.

Mulier podagra non laborat, nisi menstrua defecerint.

Hic etiam Aphorismus, nostra tempestate, veritati non semper cohæret, cum plurimæ sint mulieres, quibus citrà menstruorum defectum podagra laborare contingat. Verùm ex superiùs traditis, quia id rarò evenit, & plerumque fit, ut fœminæ à podagra sint immunes, quotiescumque menstrua illis commodè fluxerint, non erit propterea cur Hippocratem inculpemus. Verum tamen notare decet, menstruorum defectum non simpliciter intelligendum pro omnimoda illorum suppressione, sed pro quacumque eorundem evacuatione depravata, diminuta, retardata, anticipata, aliave, ut propterea tunc fœminas liceat existimare à podagricis doloribus immunes, cum non solum menstruis expurgationibus debito tempore, debitaque quantitate, scatuerint, sed etiam ejus conditionis, & qualitatis, ut in omnibus respondeant earundem constitutioni, ætati, habitudini, victui, exercitiis, aliisque; fieri enim potest, ut fœmina menstruas habeat expurgationes, sed non ejus quantitatis, qualitatis, & conditionis, ut convenit, relatè ad propriam constitutionem, & habitudinem: quo casu si exinde sanguis, totumque corpus non benè fuerit à suis impuritatibus, præsertim serosis, repurgatum, decumbentibus hujus generis excrementis ad articulos, benè poterit podagra illam invadere. Adde quod menstruæ purgationes non omnibus eodem modo accidunt, nec in omnibus ejusdem, æqualisque sunt duratio-

V. Hipp.
6. epid.
de Phae-
tusaPhy.
theæ u-
xore.

rationis: siquidem nonnullæ in singulis mensibus, per integram hebdomadam repurgantur, aliæ verò non nisi per duos, aut tres dies ad summum: plerisque circa septimum annorum septenarium menstrua deficiunt; aliis verò etiam ad octavum, & nonum prorogantur; unde sit, ut de menstruationis defectu nulla possit certa regula stabiliri. Quoties igitur citrà manifestam causam mulieribus menstrua defecerint, quæ alioqui tam citò deficere non debuissent, habito respectu ad ætatem, corporis habitudinem, temperiem, victus rationem, exercitia, & similia, quia facilè humores illi excrementosi, qui per uterum veluti per sentinam corporis repurgare consueverant, intus detenti, & cum sanguine, cæterisque humoribus commisti, in artus, veluti in partes corporis imbecilliores decumbere possunt, nil obstat, quin podagricis doloribus sint eadem laboraturæ, cum ad podagram contrahendam imbecillitas, & mala articulorum habitudo, nec non excrementorum præsertim ex sanguinis sero, & lymphæ dependentium superfluitates exigantur, quæ sanè in mulieribus, in quibus menstrua nimis tempestivè defecerint, benè haberi possunt. Quod autem à plerisque dicitur de intemperantia fœminarum nostri temporis, ob quam etiam commodè menstruantibus podagra laborent, non tanti certè est, ut rem omnem penitus evincat, cur etiam si menstrua ubertim fluxerint, debeant illæ podagra laborare: nam ex hac ratione omnes intemperantes essent podagricæ, perseverantibus adhuc menstruis purgationibus; cum tamen contrarium experiamur. Demiror itaque Senecam, qui in hoc mendacii deprehensum dicat Hip-

pocratem, *epist.* 95. & in mores fœminarum sui temporis tam acriter invehatur, cum inquit: *Maximus ille Medicorum, & hujus scientiæ conditor, fœminis nec capillos defluere dixit, nec pedes laborare: atqui hæcjam & capillis destituuntur, & pedibus ægræ sunt. Non mutata fœminarum natura, sed vitæ est; nam cum virorum licentiam æquaverint, corporum quoque virilium vitia æquaverunt: non minùs pervigilant, non minùs potant, & oleo, & mero viros provocant: æquè invitæ ingestæ visceribus per os reddunt, & vinum omne vomitu remetiuntur: æquè nivem rodunt, solatium stomachi æstuantis: libidine verò, nec maribus quidem cedunt, &c.* Et mox: *quid ergo mirandum est maximum Medicorum, ac naturæ peritissimum in mendacio præhendi, cum tot fœminæ podagricæ, calvæque sint? beneficium sexus sui vitiis perdiderunt; Et quia fœminæ exuerunt, damnatæ sunt moribus virilibus, &c.* Si planè is vitam, & mores nostrorum temporum contempleretur, haudquaquam suæ ætatis fœminas tam vehementer fuisset criminatus, quin immò fatetur aut nostra suis temporibus pejora, aut saltem non dissimilia, nilque esse sub sole novum, quod idipsum non fuerit, vel futurum sit. Nec illud quidem admittit de suo sæculo Cardanus, quòd podagricæ fiant fœminæ ob voracitatem, & incontinentiam, quippe qui asserat, mundum semper sibi similem extitisse, & nullo non tempore voracitatem, incontinentiam, & victus intemperantiam fuisse hominibus familiarem. Sed & notatu dignum, quod scribit Athenæus *libr. 2. cap. 10.* de Moris agens: *Hegeſander suis tempo-*

V. etiam
Cel. Rho
dig. l. 28.
c. 30. &
C. Agrip-
de van.
scient. c.
82.

temporibus intra viginti annorum spatium moros fructum non tulisse affirmat, atque tantam podagra pestem omnes invasisse, ut non homines solum, sed pueri, puellae, eunuchi, & mulieres eo morbo laborarent. Quare ad solam vitae intemperantiam podagram referre minimè posse videtur, cum adhuc cælibes, temperantes, frugales, abstemii, & vitam monasticam, atque eremiticam ducentes, visi sint pariter nodosa podagra laborare, quin & si ex intemperantia in victus genere podagræ in sceminis orirentur, planè hac nostra ætate nulla esset, quæ hoc morbo non foret affecta, adeò in cunctis cuiusvis generis gulæ libido excrevit. Itaque dicamus veram esse Hippocratis sententiam in quacumq; ætate, omnique sexu, dummodò ea omnia concurrant, quæ antea à nobis animadversa sunt. Cæterum non est prætereundum, quòd aliquando sceminæ aliis doloribus articularibus, præter quàm podagricis, affici solent, & quidem aliunde progenitis, quæ rheumaticam affectionem, aut gallicam contagionem referunt; & licet articuli tum inferi, tum superi cum dolore, & tumore divexentur, nihilominus non veram Podagram, Chiragram, Gonagram, sed Rheumatismum, vel simplicem, vel gallicum designant: dolores enim podagræ, aut chiragræ, per certa intervalla, & statutis quibusdam temporum mutationibus redire solent, cæteri verò dolores articulares, sive rheumatici, sive gallici, cum invaserint, vel nunquam amplius desinunt, vel si semel desierint, denuò non redeunt, licet languidas, admodum, & labefactas partes relinquant, & facile ex quacumque causa fluxionibus obnoxias.

APHORISMUS XXX.

Puer podagra non laborat ante usum venereorum.

QUOD dixerat præcedenti aphorismo Hippocrates de sceminis, eas podagra non laborare, nisi ex menstruorum defectu, nunc edocet de pueris, illos referens à podagra esse pariter immunes ante usum venereorum, his designans plurimum Veneris usum articulis nocere, qui propterea podagricæ affectioni fiant obnoxii.

Quoniam verò non ante decimum quartum annum incipiunt pueri semen progignere, idcirco visum est plerisque pueros hic interpretari eos, qui impuberes dicuntur, cum quo tempore semen gignunt, simul unà pubescere soleant: at verò ætas pubescentiæ ad annum decimumquartum adscribitur. Verum cum plerique referantur etiam ante hoc tempus semen effudisse, & generasse, propterea ad prædictum annum decimumquartum rem hanc definitè dijudicare velle, non videtur rationi, & experientiæ consentaneum; quamobrem non immerito Hippocrates indefinitè dixit, *pueros, & ante venereorum usum*; quia non ante hoc tempus fieri solet, ut articuli adeò sint labefacti, ut defluentes ex aliis interioribus partibus humores excipiant. Hinc nomine puerorum eos intelligere licebit, qui ante pubescentiam, & ante non solum seminis generationem, sed ejusdem effusionem, atque adeò venereorum usum, illibati permanserunt.

Sed unde sit, ut ex Veneris usu possint podagra laborare, non levis videtur hujus loci difficultas; siquidem

dem etsi immoderatus illius usus cunctis nocuus reputetur, documento ejusdem Hippocratis 6. *epid.* dicentis: *labor, cibus, somnus, Venus, omnia mediocria*; nihilominus si moderata illa fuerit, & tempestitiva, etiam plerisque ægritudinibus conferens ab eodem Hippocrate proclamatur. Atque hinc versus illi:

Balnea, Vina, Venus corrumpunt corpora nostra:

Conservant eadem Balnea, Vina, Venus.

prout moderatus, vel immoderatus fuerit eorundem usus. In ægritudinibus quoque frigidis, humidisque, & in corporibus succiplenis, & obesiss, utilis ab eodem existimatur, eo quod dicatur vim habere exsiccandi, & absumendi superfluas corporis humiditates. Quare cum pueri humidi sint, & ob voracitatem excrementosas superfluitates facile cumulent, atque in frigidas, humidasque ægritudines non raro incidant, non videtur omnino dicendum post venereorum usum pueros podagra laborare, si præsertim moderamen in ipsis servant.

Cui difficultati facile fieri potest satis duplici responsione. Primò, quia Hippocrates non dixit post venereorum usum pueros podagra esse laboraturos, quasi quod omnino post illud tempus illa affici debeant, sed solum, quod non ante hoc tempus soleant podagra laborare: siquidem ex Veneris usu articuli facile leduntur, & labefiunt. Secundò, quia pueri adolescere, & debitum magnitudinis incrementum acquirere debent: cumque per feminis effusionem (etiam si moderata illa fuerit) deficiat quodammodo nutritio, & substantia illa glutinosa sanguinis, quæ in nutrimentum partium, & præsertim articulorum cedere debet, in

locum effusi feminis deferatur, proinde fit, ut articuli plus justo labefactentur; quin etiam ex iterata feminis evacuatione, coguntur assumere alimentum non benè digestum, nec elaboratum, unde postmodum major labefactio, & imbecillitas: Et quoniam in podagricis doloribus contrahendis non solum exquiritur articulorum laxitas, & languor, sed etiam quædam habitudo, & mala constitutio eorundem, quam Paracelsus *Synoviam* appellavit, & Recentiores Medici fermento cuidam in ipsis ossium internodiis, glandulisque, hærenti adscribunt, cujus ratione decumbentes in ipsos artus serosi, & excrementitii humores in fermentationem adiguntur, unde postmodum dolor acerbissimus, maximus robur, & ingens tumor in ipsis artubus excitatur, si alimentum in pueris ad eas partes delatum, ejuscemodi imbecillitatem, malamque habitudinem, & Synoviam ex usu venereorum talem imprimat, ut confluentes ex cruditatibus humores facile ad fermentescendum promoveat, proculdubio podagricos dolores excitabit: Qua ratione etiam fit, ut ex parentibus podagricis orti, nedum ob languorem earundem partium articularium, propter malam feminis conformationem, verum etiam ab ingenito fermento podagrico in articulis hærente, fiant illi etiam in ipsa pubertate podagræ obnoxii. Simile quid à gallica contagione artubus inferitur, qua plerique solent in ipsa prima pubertatis ætate articulariis doloribus acerbissimè vexari, & exostoses molestissimas pati.

Quamvis autem ex eodem Hippocrate, ut antea notatum est, immodicus Veneris usus sit cunctis in quacumque ætate nociturus, specia-

lius tamen ob enarratas rationes pueris officiet; Sed neque solum immoderatus, sed qualiscumque, semper ipsis valde nocuus erit, tum ob carniū, nervorum, viscerum, & ossium teneritudinem, tum ob maiorem, ex alimentī inopia per seminis evacuationem, nutritionis jacturam, & sanguinis tunc temporis tenuioris dispendium; tum etiam ob partium pudendarum seminis elaborationi destinatarum imbecillitatem, laxitatemque, quæ neque multum semen gignere, neque genitum in suis vasculis continere possunt; unde in his non raro fieri etiam solet, ut iteratis pollutionibus molestantur, & aliquando pro semine, sanguis effundatur; quin & Tabes periculosissima contingat, quam Dorfalem appellant.

Podagra itaque vel nulla fit, vel rarissima in pueris, antequam Venerem exercuerint, nisi hæreditaria contagione illam à parentibus contraxerint; siquidem Natura tunc temporis intenta nutritioni, & augmentationi partium, nil in ossium intercapedines deponit, quod proficuum, ac salutare non sit, & acidum illud fermentum, quod podagricas affectiones excitat, per ætatem iners, vel nullum est, immò humores omnes dulces; grati, & consentanei partibus esse solent, nec tam facile a corem contrahunt, nisi aliunde à potenti causa, sive interna, sive externa depraventur. Qui verò referuntur in ætate puerili articulorum doloribus cruciati, revera podagrici non fuerunt, sed aliis generibus morborum affecti, ut antea quoque animadvertum est.

APHORISMUS XXXI.

Dolores oculorum, meri potio, aut balneum, aut fomentum, aut venæ sectio, aut medicamentum epotum solvit.

QUO pacto dolores oculorum curare expediat, docet in hoc aphorismo Hippocrates, & quidem non uno remediorum genere, sed vario, ac multiplici, pro varietate, & multiplicitate causarum illos inferentium.

Nomine autem dolorum, num simpliciter dolores intelligere voluerit sine humoris affluxu, an etiam cum tumore, inflammatione, aut lippitudine oculorum, & præsertim tunicæ conjunctivæ, aut etiam palpebrarum, quæri hoc loco potest. Et quidem probabilius videtur dolores hic fuisse recensitos ab humoribus dependentes, tum quia dolor nullus fieri potest sine causa valente solvere continuum, atque adeò materiali, & corporea; tum etiam, quia remedia, quæ hic ab Hippocrate proponuntur ad curandos ejuscemodi dolores, non nisi causis materialibus videntur adversari: qua enim ratione balneum, fomentum, venæ sectio, aut medicamentum purgans in doloribus oculorum curandis convenire possent, nisi humores, dolores foventes, forent dissolvendi, emolliendi, aut evacuandi. Itaque dolores erunt hic intelligendi cum affluxu humorum, atque adeò progeneriti à causis materialibus. Sive autem totum oculum in suo ambitu, sive solam tunicam conjunctivam, ejusque venulas, & arteriolas, sive etiam palpebras ipsas confluxi humores afficiant, parum referet; siquidem semper eadem indicationes vi-

gebunt,

gebunt, & eadem medicamentorum genera erunt in illis indicata.

Proponit autem primo loco Hippocrates *meri potionem*, si nimirum dolor sit inductus ab humoribus crassis, viscosis, & tenaciter herentibus, præsertim in lymphicis, unde sanguis etiam crassior, & glutinosior nequeat per angustas ocularium membranarum arteriolas, & venulas tam facile permeare, sed ibidem hæreat, & tumorem inferat cum dolore. Ab usu autem vini meracioris, bene potest sanguis ipse attenuari, & à crassamentis mucosis repurgari, sive per poros cutis, sive per vias urinæ, sive per alios ductus corporis, & commodè dolores etiam oculorum exinde poterunt levare: id quod nedum in his, sed etiam in aliis consimilibus ægritudinibus peropportunè factum existimaverim in corporibus humidioribus, & excrementosis, potissimum ex mala chylosi, propter ventriculi, aliorumque viscerum naturalium defectum. Sed & *fomentum*, ac *balneum*, quod adiicitur, etiam ad vinum meracum referri posset, ut propterea quis non malè existimaret fomentum, & balneum ex vino sit oculis dolentibus profuturum. Verùm hæc generalius sunt intelligenda.

Secundò *balneum*, quod nedum particulare iisdem oculis malè affectis adhibitum, sed etiam universale intelligi potest; etenim si particulare oculorum balneum intellexisset, minimè adjecisset fomentum; nisi tamen nomine balnei audiamus, quod humorosum est, & nomine fomenti, quod est vaporosum. Conferet autem balneum toti corpori adhibitum ad repurgandas superfluitates è toto corpore provenientes; particulare verò oculis admotum ad diluendos, attenuandosque

humores ibidem hærentes, & ad laxandas porositates eorundem, & præsertim tunicæ exterioris conjunctivæ. Poterit verò balneum tum naturale esse, tum artificiale: Naturale è thermis, & aquis mineralibus, ut est Puteolis: Artificiale verò ex herbis emollientibus, attenuantibus, & oculariis dictis. In hunc quoque finem excogitata sunt multæ aquæ, ophthalmicæ dictæ, à Quercetano, Hartmanno, Crollio, aliisque; quibus sæpius in die foti oculi, mirabiliter in visus acie reficiuntur, ut apud eosdem est legere: Attamen in doloribus hic memoratis Aquæ non ex acutis, & acribus, sed ex lenientibus confici debent.

Tertiò *fomentum* adiicitur, quod in multis convenit cum balneo antea recensito. Verumtamen potest etiam fomentum, nedum ex aquis, & decoctis herbarum mollientium, atque humefacientium confici, sed etiam ex rebus halitu, atque spiritu parari. Sic ex gummis, resinis, & lacrymis plantarum pleraque fomenta concinnari possunt, præsertim ad absumendas humiditas, serosæque superfluitates, in iis potissimum, qui caput, & oculos habent humoribus scatentes, facileque illacrymantes. Ita quoque plerisque in usu, & quidem salutari, est spiritus salis ammoniaci rectificatus, atque ex sale ipso ammoniaco, & tartaro, paratus, qui manè, & sero ante cibum oculis halitu applicitus, & propè palpebras admotus, efficacissimè albugines, maculas, & humores quoscunque conjunctivæ tunicæ inhærentes, diluit, & abstergit, sed & tanta insuper est illius efficacia, ut penetrante sua vi etiam interiores oculi tunicas, & humores repurget, & videndi aciem mirabiliter exacuat. Olfactus quoque visui prodest,

cùm internares , & oculos communi maxima intercedat. Verùm de his latius in praxi dictum est.

Proponitur quartò *venæ sectio* , cùm scilicet oculi dolent ab impetente sanguine , in corporibus plethoricis , aut ex suppressa sanguinis evacuatione laborantibus ; unde illius quantitatem minuere , aut plus justo irruentem in oculos interciperé , aut hærentem promoveré necesse est . Sed & fieri etiam potest , ut in oculis , ob angustiam arteriolarum , & venularum , sanguinis circuitus aliquantisper impediatur , nequeunte scilicet sanguine non tam promptè oscula venarum subire ; quàm obrem ad citandum ejusdem motum , promovendam circulationem in illis , conferre poterit *venæ sectio* , vel in brachiis , vel in pedibus : etenim diminuta quantitate , concitatoque motu , melius sanguis per ejus partes circumibit , atque etiam magna ex parte attenuatus facilius per angustas oculorum venulas , in reliquas totius corporis diffundetur . Attamen in ejusmodi sanguinis distractione maximoperè cautus debet esse Medicus , ne plusquam natura ferat , aut res ipsa postulet , sanguinem detrahat ; siquidem larga illius evacuatio sicuti cunctis partibus , totique corpori non leviter incommodat , ita , & multo magis visui , & oculis obesse solet , ut cunctis est notum : cæterùm quod scribitur 7. aphor. 46. *dolores oculorum post meri potionem , & aquæ calidæ balneum , venæ sectione curari* , non omninò recipitur à Galeno , nec minùs à Cardano , eo quòd cum præfenti aphorismo non consentiat , quapropter meritò rejicitur ab iisdem.

Denique *medicamentum epotum* proponitur , quod planè purgans in-

telligendum , illudque commodè adhiberi poterit in doloribus oculorum ortis à cacochymia , & quotiescunque corpus pravis humoribus refertum est ; siquidem ex convenienti purgatione sicuti vitiosi humores extrà corpus egeruntur , ita quoque oculorum dolores inde procedentes facillimè desinunt . Cujus autem conditionis , & virtutis purgatorium istud medicamentum esse debeat , facile quis determinabit , tum ab humorum peccantium multitudine , & pravitate , tum etiam à patientis constitutione , ætate , & corporis habitudine . Verumtamen in gratiam oculorum dolentium vitanda semper erunt ea , quæ acria sunt , & partibus plus justo infensa , qualia ex colocynthide , & scammonio , cæterisque similibus , sunt confecta , nisi fortè tam exactè fuerint à perita manu castigata , & correctæ , ut omnem malitiam , & acritudinem exuerint . Quæ verò conficiuntur ex manna , violis , prunis , neque convenientia esse dicuntur , cùm ista vix intestina diluant , & multoties in corruptionem tendentia majus damnum excitant , præsertim in iis , qui hypochondriorum affectionibus subiiciuntur .

APHORISMUS XXXII.

Balbi ab alvi profuvio maximè capiuntur.

Ubi Leonicens vertit ex græco Codice *Balbos* , Heurnius exponit *lingua titubantes* . Verùm in textu græco scribitur *Trauli* , qui propriè quales sint , non sine ratione controversi potest : etenim cùm ejusmodi vitium linguæ debeatur , & lingua tripliciter in loquela lædi soleat , idcirco cujusmodi sit vitium hoc in Traulosi , breviter est examinandum .

Et.

Et quidem nonnulli sunt, qui unam dumtaxat ex alphabetiliteris nequeunt rectè pronunciare. Alii, qui unam, vel alteram, aut plures, vel etiam syllabam integram in locutionibus prætermittunt: & alii, qui ita in singulis syllabis, & dictionibus balbutiunt, ut syllabas ipsas, & voces universas perpetim interrumpant, vel transiliant. Modò si ex linguæ mollitie, & muscutorum ejusdem imbecillitate voluerit Hippocrates deducendum esse alvi profluvium, omnes ii trauli hoc loco intelligendierunt, qui ex linguæ laxitate, nimiaque humectatione, in locutionibus deficiunt; unde & blæsi, & balbutientes, & hæsitantes in vocibus, & pronunciationibus verborum, poterunt commodè hic exponi, ut & Galenus ipse in *commentario* de pluribus speciebus traulosis interpretatur; quamquam Cardanus Traulos solùm putet esse eos, qui voces per T, & per R proferre non possunt, pro Blæsitate, *Traulotim*, seu *Traulosim*, pro balbutie *Psellotim*, & pro hæsitantia *Ischnophoniam* exponat ex idiomate græco: quamobrem subdit in *Pselloti* peccare eos, qui dictiones ex Ps proferre non possunt; in *Ancyloglossia*, qui linguam habent radici tenaciter hærentem, ut propterea in mediis dictionibus hære cogantur; in *Mogilalia* denique illos, qui præ timore, aut ex vehementi ira titubant, ac impediuntur. At Heurnius triplici vitio solùm affici linguam in sanis, ait, unde Trauli, qui aliquam litteram pronunciare perfectè nequeunt: Pselli, qui prætermittunt litteram, vel syllabam: & Ischnophoni, qui in continuata serie verborum syllabas non nectunt, & balbutiunt. Ceterum sunt adhuc, qui S nullatenus proferunt, vel mutant in T, aut C;

Tozzi Op. Med. Tomo IV.

& R in L: sed & Balbi, ut etiam advertit Cardanus, quædam proferre non possunt, aut aliter illa pronunciant ex impedito motu linguæ ad certas voces, ut in his, quibus frænulum, & ligamentum breve est, aut ex indebita sectione contractum; Blæsi verò omnia vitiosè. Quin & lingua interdum longior quibusdam est, & dentes exciderunt.

Quoniam verò omnia istiusmodi vitia locutionum ex linguæ laxitate, mollitie, atque imbecillitate provenire videntur, & multoties etiam ex ejusdem corpulentia, & crassitie, veluti bovina, & hæ non sine humoribus laxantibus, ac plus justo humefacientibus, vel tumefacientibus, puta pituitosis, aut lymphicis, propterea fieri credendum, quamobrem compatiante Ventriculo eadem laxitatem, cum una, eademque tunica omnes istæ partes vestiantur, facilè alvus in his laxetur, vel cum fortassis aliqua alia de causa lubrica fit immodicè, ut per longum tempus profluat, concurrente pariter ea, quæ ex cerebro, glandulis, faucibus, & ventriculo suggeritur, serosa colluvie. Hinc adverbium illud *maximè* non solùm refert promptam, & facilem in his alvi solutionem, sed etiam longam, ac diuturnam, si fortassè Balbi ea, quacumque ex causa, corripiantur. Novi quemdam è genere Ischnophonorum, qui adeò lubricam alvum habebat, ut pluries in die fæces egerere cogeretur, easq; liquidissimas: in eo autem id peculiariter notare erat, ut in mandendis cibis penitus deficeret, quippe qui illos pene integros devoraret: hinc non absre suspicor istiusmodi homines præter linguarum, & glandularum salivarium laxitatem, atq; humorum lymphicorum copiam etiam ex præpedito linguæ motu,

O 3 & man-

& mandibularum in molitura ciborum defectu, alvum lubricam subire, eo quòd cibi non benè mansi, nec exactè confecti, aut dissoluti, facillimè cruditates pariant, unde postmodum alvi profluvia; quin & saliva ipsa, quæ suo sale subacido plurimum confert ad ciborum digestionem, in his præ nimia fluiditate non nihil deficit à naturali sua conditione: consimiliter quoque malè affectos existimare licèt succos illos dissolutioni ciborum in Ventriculo destinatos, ob mutuum glandularum consensum inter sese; quamobrem facilè exinde accidunt in ipsis imperfectæ coctiones, atque adeò intestinorum laxitates, quæ semel deinde excitatæ, diutius postea perdurare solent, eodem fomite perseverante, cum laxa fibrarum intestinalium textura. Cæterum hæc non nisi contingunt his, qui à nativitate balbi sunt, neutiquam verò, qui ex aliqua ægritudine tales fortassè evaserunt, vel ex timore, aut ira, aut etiam ex ebrietate per aliquod solum tempus balbutientes observantur. Sed & quosdam in puerili ætate vitia locutionum contraxisse compèri ex malouso, quem ab aliis acceperunt, contracto in tenera illa ætate, cum quibus versari consueverant; quippe per id tempus facillimè incurrimus in defectus eorum, cum quibus consuetudinem inimus. De Demosthene, scribit Plutarchus *in ejus vita*, eum vitio linguæ laborasse, & voce, ut non mediocriter in dicendo turbaretur oratio, nec mens ejus intelligi posset; atque (ut ex Demetrio Phalereo subdit) ipsum adhuc jam senem linguæ hæsitantiam, conjectis in ore lapillis emendasse; vocem autem currendo, scandendo, inter pronunciandum exercuisse. Memini me aliquando

puellum non dissimiliter affectum, indicta inter pares in literario gymnasio æmulatione, in recitandis lectionibus sub certa pœna, moderasse. Quamobrem juvabit plurimum in his industria, ac peculiaris quedam exercitatio ad ejusmodi vitia tollenda.

APHORISMUS XXXIII.

Qui acidum eructant, non valdè morbo laterali corripiuntur.

DE ructu acido antea meminimus, & quo pacto à nidoroso differat: nunc qua ratione acidum eructantes non valdè morbo laterali corripiantur, breviter exponemus. Neque enim, quod communiter Interpretes cum Galeno commentantur, veritati consentaneum existimare est, acidus ructus fieri ex pituita sua natura frigida ventriculum opplente, pleuritidem verò ex humoribus potissimum biliosis: siquidem ructuosi sunt melancholici, & pleuritici plerumque fiunt ab herente crassa, viscosaque pituita, aut etiam lymphæ in ductibus pulmonis, aut pleuræ; unde neque ructus perpetuò à pituitosis, neque pleuritis omninò à biliosis humoribus in cunctis corporibus ortum ducet.

Cum itaque Hippocrates acidum ad lateralem morbum retulerit, certè comparatione inter ipsos inita ab una, eademque causa illos oriri tacitè existimavit; & quidem jam satis apud accuratiores rei Medicæ professores benè constitit, laterales dolores, immò & pleuritidem ipsam, ab acido figente exoriri: cum enim acidum in humoribus præsertim sanguine, & lymphæ exorbitaverit, in angustioribus vasis, ubi sanguinis motus, vel tardus, vel nullus fit,

fit, illos cogit, ex quorum concretionem inflammationes, tumores, & abscessus eveniunt, graviores, vel leviores, pro diversitate partium, in quibus humores isti in suo cursu præpediuntur, & quoadusque resoluti, vel subacti, & sive insensibiliter, sive sensibiliter fuerint educti, eoque tumor, & dolor perseverabunt. Et quamvis acidum istud præternaturale, & exorbitans, ubique excitari possit, nihilominus frequentius accidit ex vitiatis succis ventriculi digestivis, aut etiam ex depravato succo pancreatico originem trahere solere, unde postmodum chylus, sanguis, lymphæ, liquor nervorum, &crementa quæcumque corporis in suis ductibus, ac secerniculis vitiuntur, & vitiata in causa sunt, ut vel in seipsis hæreant, vel alios præterfluentes humores cogant, & coagulent, quemadmodum alias adnotavimus.

Cum igitur acidum istud per ductus corporis, ejusque humores, minimè vagatur, sed in flatus, halitusque vertitur, & per ructus discutitur, planè fit, ut neque laterales morbi, neque tumores, aut abscessus in partibus contingant; siquidem resolutio acidum, excussoque per flatus, ac ructus, humores, & viscera ab illius maleficio præservantur.

Quamvis autem ex acido ructu cujusvis generis morbi, atque innumerabiles aliæ egritudines præcaveri possint, meminit tamen speciatim hic Hippocrates lateralium morborum; siquidem ab acido detento potissimum in ventriculo, & pancreate, proximè affici solent partes pectoris, tum externæ, ut sunt musculi, tum internæ, ut pleura, mediastinum, pulmo, diaphragma: quare excusso per ructus acido,

detrimenta harum partium spiritalium, quæ exinde proximè corripiri possent, præcaventur, ipsæque minimè doloribus, aliisque egritudinibus afficiuntur.

Est tamen advertendum, quòd ructus acidus hic ab Hippocrate memoratus, debet esse ex longo tempore perseverans, atque iteratis vicibus recurrens, ut nimirum totum quantum acidum in dies fortassè cumulari potest, quotidie pariter per ructus dissipetur; Hac enim ratione fiet, ut nunquam humores reliqui à vaganti isto acido, quod oberrans appellavit Helmontius, sint vitium aliquod subituri, adeoque nec moram, nec coagulationem in pectore, aliisque partibus contrahant.

Denique advertendum, quòd non dixit Hippocrates acidum eructantes nullatenus morbo laterali corripiri posse, sed solum *non valdè*, sive (ut alii exponunt) *non admodum*, neque tam facilè; etenim si fortassè adeò illud augeatur, & exaltetur, ut etiam cum ructibus humores inficiat, poterit quoque laterales dolores, aliosque morbos parere, quemadmodum sæpè sæpius evenit in hypochondriacis, in quibus ponticum, & austerum quoque fieri solet. Itaque acidum eructantes non admodum lateralibus morbis corripuntur, licet illis laborare quoque possint, quapropter Hippocrates de acido dumtaxat in ructibus, non autem de acido per humores diffuso sermonem hic habuit, quòd scilicet intra limites ventriculi conclusum illud sit. Et licet ructus expressè meminerit, tacitè tamen flatus omnes etiam vagantes, & per intestina erumpentes ad alvum comprehensos voluit, cum non minùs per superiora, quàm per inferiora discuti possint:

sint: At verò, quia flatus per inferiora exhalantes non benè poterant dijudicari, cujus pravitatis naturam referrent, idcirco speciatim ructus commemoravit, utpote qui malum saporis sensum in ore referentes, benè poterant internosci, cujus qualitatis forent participes. Cæterum tam ructus, quam flatus pro causa materiali tenacem, crassamque pituitam acido-austeram recognoscunt, modico sale volatili, exiguaque bile refertam, quæ sicuti fundo Ventriculi hærens sæpissimè in ructus exolvitur, ita in Intestino Ileo, aut etiam Cæco erumpit in flatus; unde Simon Pauli *in suo quadripartito botanico*, non immeritò existimavit Cæcum Intestinum receptaculum esse flatuum, neque sine ratione tam amplum à Natura fuisse constructum, ut scilicet distentione, inflationeque minùs vexaretur.

APHORISMUS XXXIV.

Quicumque Calvi sunt, iis magnæ varices non fiunt: quibus verò Calvis varices magnæ superveniunt, iirursus capillati fiunt.

INsimulat Galenus in hoc Aphorismo mendacii Hippocratem, utpote qui calvos putet supervenientibus varicibus sanabiles fieri posse, cum aliunde calvitium passio existimetur insanabiles. Nec insuper verum esse subdit, quòd magnæ varices calvis nunquam accidunt. At ab ejusmodi calumniis rectè vindicatur Hippocrates à Cardano, qui pluribus contendit calvos capillatos fieri posse supervenientibus potissimum varicibus, quin & multa alia in medium adducit, ut Hippocratem adversus Galeni accusa-

tiones tueatur: quamquam Fuchsius in sua versione non calvos propriè, sed qui capillorum defluvio laborant eundem exponat, inquit enim, *φαλακροί, græcam vocem hic, non qui calvi sunt, ut ceteri Interpretes fecerunt, sed qui capillorum defluvio laborant, convertimus, ut Hippocratem, aut alium, qui huius aphorismi Author fuit, à mendacio vindicaremus*; atque in ejus rei comprobationem affert auctoritatem Philothei, qui calvos appellat, non eos, qui propriè ita nominantur, sed qui ob malum aliquod, capillorum defluviū patiuntur, veluti propter alopeciam, aut ophiafin; Unde istos existimat magnis varicibus non affici, quòd vitiosi humores ad caput, & non ad crura ferantur; iis verò, qui capillorum defluvio laborant, si varices succedant, capilli denuo nascantur, quoniam vitiosi humores, qui antea radices capillorum corruerant, ad crura transferuntur. Et sanè cum defluviū capillorum contingat à diffusis per cutem, pravis humoribus vim habentibus erodendi, & radices capillorum corrumpendi; planè fit, ut vergentibus illis ad alias partes corporis, & potissimum ad crura, vel tibias, cum tumefactione venarum, unde varices, facta transpositione prædictorum humorum acrium à capite ad femora, vel tibias, poterunt facillimè capilli renasci; & contrà, quicumque calvi sunt, & capillorum defluviū ex mala eorundem humorum acrium dispositione patiuntur, magnis varicibus non tam facilè corripientur, opposita proculdubio de causa.

Hinc autem palàm fit, defluviū capillorum hic sumi à causis morbo-
sis inductum, non verò ex mutatione naturali ætatum, potissimum in
ulti-

ultima senectute, in qua calvitium accidit, ob defectum potius materiei, ex qua capilli generantur: cum enim peream ætatem ob defectum alimenti partes omnes exarescant, & cutis specialius corrugetur, atque in suis porulis densata, constricta; à cæteris partibus non parùm dissocietur, propterea fit, cur capilli sponte sua decidant: id, quod potissimum accidit in syncipite, ubi cutis nudo ossi hæret; siquidem in aliis partibus substratum habet panniculum carnosum, & adipem. Hac eadem de causa fit quam obrem pleræque mulieres in ultima senectute pilos in mento progignant, & supercilia cæteris proluxiora, quoniam ob defectum menstruum superfluitates illæ, quæ in sanguine cumulantur, ad eas partes deferuntur, & commutantur in pilos, & capillos. Cæterum, quod spectat ad varices, superius est latè examinatum.

APHORISMUS XXXV.

Aqua intercute laborantibus tussis superveniens, malum.

PRO aqua intercute laborantibus intelligendi sunt propriè hydropici cujuscumque generis illi sint, quemadmodum manifestè deducitur ex textu græco. Neq; enim tussis mala solùm est, si Anasarca laborantibus superveniat, sed etiam Asciticis, quemadmodum deducitur ex eodem Hippocrate 2. *predictionum*, ubi signa tradit bona, & mala in hydropicis, ex quibus præfagire quis rationabiliter possit de eorundem eventu salutari, vel lethali.

Rationem autem hujus dicti, quamvis Galenus deducere conetur ab aquosa humiditate tantùm adau-

cta, ut jam asperam occupet arteriam, unde tussis; quia tamen exinde, non solùm malum, sed lethale signum foret deducendum, cum alioqui Hippocrates hic non dixerit lethale, sed dumtaxat malum; idcirco non sine ratione Cardanus ridiculam esse, ait in hoc aphorismo Galeni expositionem. Malum itaque signum erit tussis superveniens hydropicis, quoniam indicat aquam in illis adeò subcrevisse, & pravam fuisse redditam, ut sanguinem circumferentem infecerit, ac pulmones in suo transitu vellicando, ad tussendum extimulet, veluti ad expulsionem rei noxiæ. Accedit, quod in Asciticis à superabundanti aqua adeò tumescunt, & opprimuntur viscera sub diaphragmate sita, & potissimum jecur sub hypochondrio dextro diaphragmati alligatum, ut motum illius impedian, ac deorsum contrahant, unde postmodum respiratio difficilis, & cum difficili respiratione tussis sicca, & molesta. Si præterea in pulmone, & pectore hydrops factus sit, partim ab hydatidibus, partim etiam à superincumbente aqua, & ab oppleta pectoris cavitate, multò crebrior respiratio, & molestior tussis sine sputo fiet, quod certè pessimum signum est. Denique si tussis, & respiratio adeò incrementum accipiant, ut æger non nisi erecta cervice respirare possit, ab irruente in asperam arteriam, & bronchia pulmonis, humore, proculdubio nendum malum signum inde portenditur, sed etiam brevi mors futura, ob imminentem suffocationem; sub quo sensu præsens aphorismus videtur repetitus 7. *aphor.* 47. ubi scribitur: *Aqua intercute laborans, si tussis corripiatur, desperatus est.*

APHORISMUS XXXVI.

Difficultatem urinæ vena secta juvat: secare verò interiores.

Verum non esse hunc Aphorismum, scribit Galenus *in commentario, nisi, &* particulam conjunctivam, *assumpserit, ita ut aphorismus talis fiat: difficultatem urinæ, & venæ sectio solvit*. Sed non video quid unquam particula ista, *&*, ad expositionem hujus aphorismi conferre possit, cum eam dumtaxat urinæ difficultatem, græcè dysuriam, solvere possit, quæ ab inflammatione, & multitudine fit, ut ipsemet Galenus *in commentario* fatetur; Nisi præter venæ sectionem alia quoque medicamenta inflammationem respicientia per particulam illam, *&*, conjunctivam, intelligere velimus, quasi verò sensus sit, non solum medicamenta inflammationem temperantia, & dissolventia, sed etiam venæ sectionem convenire in urinæ difficultate.

At verò, quia urinæ difficultas cum ardore, & dolore conjungitur, planè dicendum videtur, etiam ab ipsa mala urinæ conditione dysuriam evenire posse. Et quidem, quandoque cum urinis salia acria commiscentur, quæ in transitu per sphincterem muscûlum, & urethram, vellicant, & compungunt partes illius sensitivas, planè fieri potest, ut citrà quamcumq; inflammationem, ardor quoque in urinæ exitu percipiatur. Quæ ratione fit, ut ægritudo ista sæpè sæpius observetur in senibus, in quibus humores omnes, & præsertim lymphici, ac sanguinis ferum, acorem summum contraxerunt, & nedum urinæ difficultati, sed & consimilibus aliis ægritudini-

bus ab acido provenientihus, illos obnoxios reddunt. Accidit præterea non rarò dysuria ex ulcere contracto in iisdem partibus, quemadmodum experimur in infectis gallica contagione: etenim pertransiens urina, sua mordacitate partem ulceratam compungendo, ardorem, & dolorem in ipsa mictione ingentem excitat.

Quamquam autem venæ sectio hic ab Hippocrate commendata locum habere possit in inflammationibus partium mictui destinatarum, non tamen in cæteris aliis commendabilis videtur, nisi dumtaxat ad deplendam feri sanguinei multitudinem. Cæterum, cum serum istud acore plerumque inficiatur, qui nulla ratione potest per venæ sectionem temperari, proinde fit, ut nemo amplius in praxi audeat in ejusmodi ægritudinibus sanguinem mittere. Sed neque solum apud Recentiores rei Medicæ professores, verum etiam apud Vetustiores Medicos mittendi sanguinis usus in urinæ vitiis exolevit, & qui illam tentare ausi sunt, in pejora mala ægrotos deduxere. Quæ etiam ratione putaverim, quamobrem Cardanus hunc aphorismum exponendum omiserit, imò neque inter aphorismos sententiam istam reposuerit, fortassè quia existimavit, neque rationi, neque experimento illam esse congruentem, adeòque non ab Hippocrate, sed ab aliis adjectam fuisse, quemadmodum Galenus ipse suspicatur, ob adjunctas dictiones, *secare verò interiores*: utpote Hippocraticis dogmatibus non consentientes.

Postremò additur *secare oportere interiores*, idest venas; quæ Antiquis credebantur majorem consensum cum partibus urinariis retinere, ut nimirum exinde promptius, & pro-

& proximius è partibus inflammatis affluxus humor derivaretur. Verum hæc post detectam sanguinis circulationem sponte sua evanescere.

APHORISMUS XXXVII.

Angina correpto, si tumor fiat in collo, bonum; foras enim morbus deducitur.

QUod aliàs dixerat de Erysipelate, immò etiam de cæteris aliis inflammationibus, nunc repetit speciatim de Angina, in qua si tumor ad partes externas, & ad collum vergat, bonum dicitur; adjecta causa, & ratione, quia foras morbus deducitur. Erit tamen advertendum, ut alibi quoque adnotavimus, tunc bonum signum esse, tumorem in collo apparentem, cum affluxus humor Anginam faciens partes internas gutturis, & faucium deseruerit; secus verò si adhuc easdem occupet. Cumque hoc notum sit etiam ex superius traditis, non est, ut hic longius immoremur.

APHORISMUS XXXVIII.

Cancros occultos habentes melius est non curare, curati enim citò pereunt: non curati verò longius tempus perdurant.

QUID pro occultis cancris intelligere voluerit Hippocrates in hoc textu, dubitat primùm in commentario Galenus; mox verò tum de cancris in profundo corporis, & in intimioribus partibus enatis, tum de nondum apertis, non improbabili-ter exponit, & quidem in utrisque ratio eadem æquè militat. Sed tamen verisimilior semper credita est illorum expositio, qui de can-

cris nondum apertis, aut ulceratis, quos Carcinomata Græci vocant, sententiam hanc interpretantur; siquidem Cancris in reconditis partibus corporis geniti, utpote intratables, nullatenus subiici possunt curationi per medicamenta localia, quæ ab occultis ad patentes illos deducant.

Sunt autem Cancris de genere tumorum malignam conditionem humorum redolentium, quales Veteribus putabantur atrabilarii, sive maligni, erodentes, & veneno aque stygiæ valdè consimiles. Dicuntur Cancris, vel ob similitudinem, quam referunt in sui expansione cum cancris, vel quia partes, quas invadunt, inæqualiter depascuntur, & multoties increscunt, aliquando etiam decrescunt instar cancrorum. Et quoniam ob malignam, & cacoethicam naturam difficillimè suppurantur, etiam si omnis industria adhibeatur, neque tam facile rescindi possunt sine ingenti sanguinis effusione, & periculosa circumjacentium partium laceratione, propterea fit, ut à Chirurgis insanabiles reputentur: adeoque nullo cuiusvis generis medicamento illos tractare audeant: quod & Ovidius 2. de Ponto innuit:

*Vulneris id genus est, quod cum sanabile non sit,
Non contrahi tutius esse puto.*

Considerata itaque pessima illorum conditione, inquit in hoc textu Hippocrates, melius esse illos non curare, id est medicamentis localibus, aut ad suppurationem, aut ad resolutionem ducentibus tractare; nam si contingat illos aperi-ri, & ulcerari, citò ad mortem perducunt, cum ex ambiente aere, virulentus ille humor magis acuatur, vires,

vires, & spiritus perpetim dissipentur, ob continuam sanguinis effusionem, & reliqui humores, immò etiam partes solidæ circumjacentes graviùs afficiantur, eoque magis si canceri reconditas corporis partes occupaverint. Et quamvis ab Aetio, & Paulo Ægineta methodus proponatur salubriter curandi cancos, & multa medicamentorum genera in eundem finem conferentia referantur; nihilominus illa aliquando in praxi deducta vana, & inefficacia evascerè, ut proinde nemo ampliùs in praxi audeat medicamenta in illorum curationem administrare, nisi solùm, quæ universale vitium humorum corrigere, & temperare valeant.

Præter difficultatem curationis procedentem à causa humoralis acido-acri, & maligna, adiicienda quoque est partium affectarum in cancris laxa habitudo, quæ deinde durefcit: siquidem canceri plerumque fiunt in partibus glandulosis, quæ cum suapte natura debiles sint, & facilè malorum succorum susceptivæ, propterea difficiliorem semper reddunt curationem. Fuere tamen, qui usu causticorum medicamentorum, & excedentium, præfertim olei vitrioli, aliisque, ex integro universum tumorem extirpare conati sunt, sed non semper felici successu; etenim nisi omninò carcinoma eradicetur, inutilis evadet opera extractionis. Accedit, quòd multoties ex resectione vasorum tanta sanguinis effusio facta est, ut omninò exanimati patientes paulò post interierint.

Atque hinc denique concluditur in textu, non curatos in longius tempus perdurare, cum Natura faciliùs semper toleret cancrum non ulceratum, quam ulceratum. Ob-

servatum namque est in praxi plures carcinomate affectos ad plurimos annos vixisse, & alios usque ad extremam senectutem fuisse perductos, servata tamen convenienti diætâ, & assumptis per intervalla medicamentis sanguinis acritatem retundentibus, qualia sunt, quæ ex cancris fluviatilibus, ex viperis, cornu cervi, decoctis chinae, aliisque similibus conficiuntur, de quibus in praxi.

APHORISMUS XXXIX.

Convulsio fit vel ex repletionè, vel inanitione: ita verò & singultus.

Causas convulsionis memorat in hoc Aphorismo Hippocrates, illasque ait duas esse in universum, Inanitionem scilicet, & Repletionem: cum enim convulsio sit retractio nervorum, & musculorum ad propria capita, & tum inanitio, tum repletio possint nervos, fibrasque nervorum ita afficere, ut involuntariè retrahantur, convellanturque, eo prorsus modo, quo fides, cæteraque partes membranaceæ, ac fibrosæ, aut plus justo arefactæ, aut plusquam ratio postulat humoribus tumefactæ contrahuntur, propterea fit, ut pari ratione nervi, nervorumque fibræ à consimilibus causis convellantur, quemadmodum Galenus ipse latè prosequitur *in commentario hujus aphorismi*.

Verùm quidquid sit de causa replente, certum est inanitionem talem, ac tantam in nervis impossibilem esse, quæ videtur omninò excitari non posse: nam quæ Galenus affert de chordis, & coriis arefactis ad ignem, vel ad solem æstivum, licèt vera forent (quæ tamen puerilia existi-

existimat Martianus) non tamen congruenter aptari possunt nervis, & musculis intra corpus positus, cum nunquam isti adeò possint areferi, & exsiccati, ut omni prorsus humiditate priventur, sicuti contingit corio ad ignem exsiccato: si unquam insuper id humano corpori viventi possit accidere, proculdubiò in his, qui hectica febre, tabeque consumpti sunt, id ipsum liceret experiri: atqui nemo istorum unquam convulsionibus corripì visus est, etsi plerique pellem dumtaxat superductam ossibus haberent: causam igitur istam ex inanitione petitam rationi, & experimento consentaneam nemo planè existimabit. Convulsio insuper nervorum compunctionem, aut cæsuram momento ferè temporis consequens, nec ad inanitionem, nec ad repletionem referri potest, sed aliam omninò diversam exigit.

Crediderim eapropter causam hanc inanientem, non ex ratione inanitionis, & arefactionis convulsionem excitare, sed ex acritate, ac molesta quadam vellicatione, nervis, & musculis plurimùm infensa, proficisci; nisi enim nervi, & musculi in inanitionibus à re quapiam prorientur, & compungantur, nullatenus poterunt convulsionem subire: qua etiam ratione exposuimus *V. aphorismorum textu primo*, convulsionem ab usu ellebori, aliussve similis acrioris medicamenti excitatam; siquidem cum elleborum immodicè evacuando humores extenuat, ac perturbat, simul unà per acritatem nervos, & musculos, illorumq; fibras prorit, & compungit, unde ipsi inæqualiter concitantur, & convelluntur. In quam eandem rem Galenus quoq; *in comm. istius aphorismi* proponens causas singultus, qui species dicitur convulsionis, affert ex-

emplum piperis ex vino sumpti, quod sua acritate potenter singultum promovet, motum scilicet ventriculi subversivum, quo se ipsum ab illa molestia liberet.

Neque solum causa inaniens, sed etiam replens, convulsionem nullam affert, nisi præter repletionem acrem, & molestantem aliquam conditionem conjunctam præferat: nam membra paralyti affecta à causis replentibus humidis, & pituitosis, nullatenus convulsioni subiiciuntur, sed potius à copia humorum plus justo distensa, & resoluta, omnem motum, & sensum amittunt: neque verò nervi in paralyti aliter afficiuntur, quam ut in convulsione; etenim fibræ, & tunicæ nervorum in utrisque æquabiliter offenduntur, ea solum differentia, quòd in paralyti causa sit opplens, & hebetans sensum, in convulsione verò pungens, & irritans. Atque hinc fit quamobrem hysterice passionibus laborantes non rarò unà simul vexari soleant convulsionibus, & motibus convulsivis, itemque catalepsi, & paralyti membrorum, à materia nimirum simul contorquente fibras, & sensum partis hebetante. Hinc falsum, quod hucusque nonnullis creditum in convulsione membranas nervorum, in paralyti verò cavum eorundem impleri, & tumefieri, siquidem in paralyti non rarò amittitur sensus superflite motu; sensus autem in membranis nervorum fit: & membra paralyti affecta resoluta observantur, ac plus justo distenta, & flaccida, ut per fibras nullimodè flecti, aut commoveri possint; in quarum vitium etiam fibræ musculorum coafficiuntur, ut aliàs dictum.

Quod dictum est de convulsione, facili negotio singultui aptari potest, cum singultus sit quædam pecu-

peculiaris ventriculi convulsio conantibus expellere ea, quæ intimas illius partes infestant: atque in hoc differt singultus à vomitu; in vomitu enim humores molestantes, cavum ventriculi occupando, facillimè evacuationi subiiciuntur, idcirco ventriculus motu subversivo illos expellit, & ab irritamento se vindicat; at verò in singultu conatus omnis est irritus, quia humores infestantes penitiores illius partes occupant. Non semel autem expertum est defuisse singultum citrà quamcumque evacuationem, assumptis medicamentis oleosis, acritatem illorum humorum retundentibus, vel fibras ventriculi laxantibus.

APHORISMUS XL.

Quibus dolor circa hypochondrium fit absque inflammatione, iis febris superveniens morbum solvit.

Dolores in hypochondriis excitati, varii esse possunt. Aliquando enim fiunt cum sensu ponderis à materia quadam obstruente, & sua corpulentia premente, & gravante partes præsertim glandulosas in hypochondriis sitas. Aliquando fiunt à flatibus cum sensu inflationis, unde partes ipsæ plus iusto distentæ tumescunt, & attolluntur, adeoque dolent. Nonnunquam à detentis facibus una simul commissis cum crassis, tenacibusque succis, ut non rarò evenit in intestino Colo, quòd cum à dextra in sinistram ventris partem porrigatur sub utroque hypochondrio, non rarò etiam cum hypochondriacis doloribus confunditur, eo quod zonæ instar jecur, lienem, renes, & lumbos circumafficiat. Sed & interdum quoque dolor excitatur à male affecto pancrea-

te, à glandulis lumbaribus, à tumoribus progenitis in parte cava jecoris, aut lienis, unde etiam difficultas respirandi, motus impotentia, murmur ventris, ructus, flatus, aliaque consimilia symptomata exoriri solent. Denique contingunt dolores ab inflammationibus, aut abscessibus in iisdem partibus progenitis ab humoribus præsertim acris, acidis, lymphicis, aut biliosis dictis, qui præter dolorem febrim quoque continuam, & acutam excitant.

Hos omnes ergo, aliosve similes hypochondriorum dolores considerans in hoc aphorismo Hippocrates, illos inquit salubriter finire superveniente febre; sed neque solum dolores ipsos veluti effectus, sed & morbum qualemcumque, unde dolores ipsi proficiuntur, à suscitata febre terminari. Dixit autem dolores hypochondriorum, hoc est partium illarum, quæ sub chondriis, seu cartilaginibus, costas spurias obducentibus, sitæ sunt, quemadmodum in dextra parte lobus est jecoris cum adjuncto illius ligamento, in altera parte lien: excipiuntur autem stomachus, ventriculi fundum, pylorus, intestina gracilia, quæ inter utrumque hypochondrium sita sunt, & medium regionis epigastricæ occupant; siquidem partes istæ dolentes, à superveniente febre minimè liberarentur, sed magis, magisque molestatae, exitium brevi futurum ex febre portenderent, quemadmodum ex aliis tum Hippocratis, tum Galeni locis, clarissimè deducitur, & pluribus experimentis passim in praxi comprobatum est, quippe non dolent nisi à causis vehementibus, & cum sint partes maximo sensu præditæ, semper ac febrim comitem habent, in mortem desi-

desinunt. Contrà verò dolores in hypochondriis excitati, quia plerumque fiunt ab humoribus crudis, crassis, glutinosis, & flatulentis, facillimè beneficio supervenientis febris discutiuntur, & resolvuntur, cùm febris vim habeat attenuandi, resolvendi, & ejusmodi crassos succos concoquendi, facta deinde per vias urinarias, vel etiam per alvum, depositione.

Excipit autem Hippocrates dolores ab inflammatione dependentes: tunc enim, quia causa doloris non est lentus, & crassus humor, aut conclusus flatus, sed sanguis vel acer, vel acidus restagnans in ipso jecore, velliene, neutiquam à febris subigetur, sed potius exacerbabitur, & exacuetur; unde sicuti in priori casu febris remedium est, ita in posteriori signum erit pessimi morbi, & exitus calamitosi, veluti designans causam malam difficulter superabilem, & partes affectas penitiùs esse in suis operationibus invasas. Qua planè ratione fit, cur Hippocrates apposuerit adverbium illud *circa*: nam inflammatio semper intimiores, & præstantiores partes occupabit; simplex verò dolor superficialiarius tantum, nec adeò naturæ operibus necessarias. Hinc autem idem Hippocrates scripsit 2. *pror. reth. hic*. febres ex hypochondriorum doloribus malignas esse, veluti ab inflammatione, vel phlogosi dependentes.

Denique adjectum est, non solum dolorem, sed etiam morbum subinde solvi: nam cùm dolor in hypochondriis, sit symptoma consequens vel morbum, vel causam morbi, putà obstructionem, tumorem, vel flatus, humoresque crassos inflantes, & distendentes, profectò nedum per febrim dolor ipse desinet, sed etiam

morbus, vel causa morbi dolorem excitans. Et licet dolor nullus fiat sine causa aliqua continuum solvente, quia nihilominus Hippocrates non definivit in hoc aphorismo naturam, seu speciem doloris, poterit benè explicari de quocumque dolore, etiam gravante, inflante, vel distendente, qui cùm fiat ab humoribus lentis, vel etiam à flatibus, facillimè poterunt à superveniente febre dissipari, discuti, & resolvi.

Pro coronide tandem deducere licebit ex hoc aphorismo, non semper febrim nocuam esse, sed sæpe sæpiùs salutarem, quemadmodum non hic solum, sed alibi pluries idem Hippocrates est testatus.

APHORISMUS XLI.

Quibuscumque suppuratio in corpore existens non innotescit, iis ob crassitudinem puris, aut loci, non innotescit.

CUM antea dictum sit dolores in intimis partibus corporis excitatos, non rarò ab inflammationibus exoriri, & inflammationes in suppurationem deduci, adiicit in hoc aphorismo Hippocrates, quibus de causis illa non innotescat, aitque vel ob crassitudinem puris, vel ob profunditatem loci non apparere, aut visu, vel tactu non percipi.

Et quidem primò necesse est, factam multò antea fuisse suppurationem à sanguine alicubi concreto, unde præcesserint febres, dolores, inquietudines, aliaque symptomata suppurationem comitantia: cumque post suppurationem ista soleant plurimum remitti, documento ejusdem Hippocratis 2. *aphor.* dicentis: *dum pus conficitur dolores, & febres*.

febres accidunt magis, quàm iam confecto; propterea ab indicio confecti puris, & desinentium symptomatum, si illud aliunde non innote-
 scat, alterum ex duobus intercede-
 re, crassitudinem videlicet puris,
 aut loci profunditatem. Usus est
 autem Hippocrates voce *non inno-
 tescere*, quæ idem omninò signifi-
 cat, ac non conspicuum fieri, non
 apparere, neque manifesta indicia
 de se prodere, siue fluctuatione, si-
 ve tumefactione, siue novo dolore,
 ac febre, siue exitu per vias urinæ,
 per alvum, aliosve ductus corporis,
 ita ut omninò intra corpus delite-
 scens nullum manifestum indicium
 præbeat, quo possit prudens Medi-
 cus in illius cognitionem perducì.
 Sed tamen non inde quis existimabit,
 taliter affectum, ac patientem benè
 se habere, nullaque ægritudine mo-
 lestari, nam cum pus genitum, &
 alicubi collectum, sit de genere eo-
 rum, quæ præter naturam sunt, fieri
 nulla ratione poterit, quin opera-
 tiones aliquæ læsæ sensibiliter non
 sint, unde probabiliter suspicari
 queat à contento pure, alicubi de-
 litescente, fore operationes aliquas,
 saltem naturales, ab ipso restagnan-
 te vitiatas, cum sensu saltem pon-
 deris, cum lassitudine, cum mo-
 tus difficultate, cum mala nutrica-
 tione, cum febris aliqua pusilla, cum
 inquietudine, cum vigilia, aliisque
 symptomatibus, magis, minusve
 ægotantem moestantibus, prout
 pars affecta nobilior, vel ignobilior
 fuerit. Atque hac ratione multoties
 visum, factas suppurationes in glan-
 dulis, & partibus glandulosis, diù
 patientem malè affectum detinuisse,
 & post aliquot horas à pastu levi fe-
 bricula vexasse, tum anxietudine,
 molestia, motus impotentia, sine
 evidenti aliqua causa, & tandem fa-

cta irruptione pus prodiisse per al-
 vum, aut per vias urinæ; unde licet
 patiens ipse malè se haberet, non ta-
 men certa indicia patebant peractæ
 suppurationis.

Verum quamvis difficillimum
 planè sit de facta suppuratione cer-
 tum iudicium proferre, poterit ni-
 hilominus sagax Medicus ex præ-
 gressis causis, atque ex præcedenti
 morbo non improbabiler coniecta-
 ri peractam alicubi illam esse: si ni-
 mirum ex casu, contusione, vulnere
 quis ægrotaverit, itemque ex præ-
 cedenti dolore saltem gravante, po-
 tissimum in partibus imi ventris,
 itemque ex nausea, vomendi stimu-
 lo, pavoribus nocturnis, pulsu inæ-
 quali, decubitu in aliquam partem
 corporis molesto, lassitudine, in-
 quietudine, motus impotentia, a-
 liisque per aliquod tempus fuerit il-
 le affectus, mox veluti repentè gra-
 vi febre, & acuta corripiatur, quæ
 sine ulla intermissione, & cum re-
 petentibus rigoribus, aut horripi-
 lationibus, ad tres, quatuorve dies
 uniformis observetur; deinde subi-
 tò mitescere, & remitti videatur ad-
 juncto levi sudore, vel urina cras-
 siori, ob quam ita in meliùs abire
 videatur, ut se à febre immunem
 omninò existimet, procedente ve-
 rò tempore sensim, statutis quibus-
 dam horis, febricula molestetur, &
 cum appetendo, & concoquendo
 benè se habere videatur, nihilum
 tamen proficit; planè suspicari li-
 cebit, ex causis superiùs memora-
 ris, abscessum, aut inflammatio-
 nem alicubi factam esse, mox ex su-
 perveniente febre acuta, & vehe-
 menti, promotam fuisse suppura-
 tionem, qua peracta, remissa fuisse
 symptomata, aut etiam inconspi-
 cua evasisse, sed non omninò deleta,
 patientem detinere morbosum, aut
 valetu-

valetudinarium; quamobrem, si adhibitis medicamentis dissolventibus, & puri confecto exitum parantibus, aliqua expurgatio deinde purulenta subsequatur, certum indicium prodibit latentem suppurationem patientem jam evasisse.

Quòd autem suppuratio in corpore existens delitescat, & certa sui indicia non proferat, idque ex memoratis duabus in hoc aphorismo causis haberi possit, clarius est, quàm ut longa hic oratione explicari egeat. Siquidem puris crassitudo multoties in causa est, ut alicubi restagnans neque ingentem molestiam pariat, neque exitum sibi paret; quoniam propter crassitiem circumjacentes partes minimè vellicantur, quæ propterea non proritata nullatenus illius evacuationem moluntur: id quod (ut antea est animadvertum) sæpè sæpius accidit in partibus glandulosis: Nec præterea purulenta materia tenax, & crassa vehementem in partibus excitat fermentationem, unde diù ibidem subsistere potest, quemadmodum experimur in Atheromate, Steatomate, & Meliceride, in quibus propter humoris contenti crassitiem, & viscositatem partes affectæ in longissimum tempus sufferunt tumefactiones, & gravamina. Partes etiam reconditæ, profundæque corporis, itemque crassæ, obessæ, glandulosæ, veluti sensus expertes, in diuturnum tempus solent collectam purulentam materiam citrà grave incommodum sustinere, & absque ullo periculo putrefactionis, aut corruptionis; quia putrefactio, & corruptio non fit sine fermentatione, & fermentatio non sine intestino motu partium tenuium, & mobilium: cùmque pus crassum sit, atque adeò ineptum motioni, & partes affectæ exangues,

Tozzi Op. Med. Tomo IV.

nullo, vel modico sensu præditæ, fit proinde, ut diutissimè suppurationes istæ delitescant, & eousque innoxia perseverent, quo usque promoto in illis motu, vel novus morbus insequatur, vel aditum sibi faciat pus attenuatum. Cæterum peritiores Chirurghi solent de internis istiusmodi suppurationibus partium profundarum certum fermè judicium proferre à fluctuante per tactum utrimque initum materia, si nimirum hinc inde prementibus digitis, quod subest, loco moveri percipiatur, & cutis externa à suo naturali colore, & calore permutata videatur.

Omittendum denique non est, de iis suppuratis locutum esse hoc loco Hippocratem, qui in imo ventre potissimum suppurationem patiuntur, secus verò de suppuratis in pulmone, aut pectore, quorum alibi signa cum eodem Hippocrate tradidimus, *in commentariis super quintum librum Aphorismorum.*

APHORISMUS XLII.

Morbo Regio laborantibus si fiat Hepar durum, malum.

MOrbus Regius quinam sit, & à quibus causis progigni soleat, & quemnam exitum febrientibus contingens portendat, alibi est à nobis examinatum: nunc solum pro expositione istius aphorismi, dicimus illum hic dumtaxat ab Hippocrate considerari, qui ab inflammatione vel simplici, vel mixta jecoris contingit: nam cùm fel-leus humor nequit in sua cysti colligi, propter tumorem, aut inflammationem jecoris, planè per universum corpus diffunditur, & sanguinem inficiens, non sine febre evenit;

P

hinc

hinc duplici de causa malus ille erit, tum quia infectus subinde sanguis, cunctas corporis partes inevitabiliter contaminat, & operationes ejusdem principales lædit, præsertim respirationem, & pulsum, cum Icterus nunquam fiat in febribus sine fermento sanguinis corruptivo; tum etiam, quia à jecoris inflammatione, vel tumore provenit, & ejusmodi mala in illo semper gravia sunt. Nisi etiam interpretari velimus Hippocratem de tumore, & duritie jecoris consequente, non autem antecedente, vel comitante Icterus. Si quidem morbo regio laborantibus si jecur obdurescat, indicio erit tantam in jecore humoris non repurgati collectionem factam fuisse, ut exinde illud remaneat obduratum; vel etiam felleum humorem in cysti collectum ex conditione acri transiitum fecisse in acidam, malignam, obstruentem, figentem, obdurantemque substantiam jecinoris, ut proinde non solum ex ipsa tumefactione, & duritie, sed etiam ex obstructione, & maligna conditione fellei humoris jecur obduruisse, ut in posterum nullus sit repurgandæ bili locus, sed universa sit per sanguinem, & habitum corporis diffundenda; quamobrem ex multis capitibus malum ægrotanti portendatur.

APHORISMUS XLIII.

Quicumque lienosis à difficultate intestinorum capiuntur: iis supervenientem longam difficultatem intestinorum, aqua intercus, aut levitas intestinorum excipit, & moriuntur.

Seriem quorundam morborum lienosis contingentium, proponit in hoc aphorismo Hippocrates,

cum prognosi exinde lethali. Inquit enim lienosos dysenteria, & quidem diuturniori correptos, facile in Hydropem, aut Lienteriam delabi, ac tandem mori.

Pro lienosis autem non intelligit quoscumque liene laborantes, sed eos solum, qui diuturna lienis egritudine laborarunt, cum tumore, obstructione, & duritie manifesta in sinistro hypochondrio: tales enim nedum acido, & melancholico humore superabundant, sed etiam serositatibus gravantur ferè per totum corpus dispersis; siquidem & sanguis universus in his malus est, & totus habitus corporis foedus, & decolor, non nisi ab acida ejusdem humoris conditione, & à copia aquosæ superfluitatis, quæ cum non benè repurgetur, nec in renes deferatur, omnia viscera naturalia, totumque corpus inficit, & conspurcat. Hinc observant Anatomici carere renibus animalia illa, quæ splene sunt orbatæ, & nos passim in praxi experimur spleneticos ex obstructione, aut tumore parùm mingere, & urinam proferre decolorem, tenuem, & veluti percolatam.

Quoties igitur lienosis tanta excrementorum multitudine superabundant, ut irruptione per mesenterium, & ramos mesentericos simul, & splenicos in alvum facta, dysenteriam incurrant, præsertim longiorem, fore planè, ut labefactatis plus justo visceribus imi ventris, propter diuturnam excretionem cruentam simul, & dolorosam intestinorum, aqua intercus, seu hydrops, aut lienteria subsequatur cum interitu inevitabiliter successuro. Neque enim mirum videri poterit, quod post diuturnam dysenteriam levitas intestinorum, aut hydrops subsequatur: nam cum lienosis, ex nuper tradi-

traditis, acidis humoribus, & serosis superfluitatibus abundant, proculdubio ista cumulatiora fient in lienosis post intestinorum difficultatem, tum quia vires sunt magis infractæ, partim ex dolore, & assiduo egerendi conatu, partim quoque ex sanguinis egestionem; tum etiam, quia fermentum stomachi digestivum vel dilutius omnino fit, vel aciditate infensus, unde chyloses pessimæ, adeoque & sanguis, qui ab his restaurari deberet; ut propterea tandem dysenteriam excipiat lenteria, si acidæ istiusmodi aquosæ superfluitates petant ventriculum, & Intestina gracilia; vel hydrops, si per totum corpus dispergantur, aut in abdominis cavum deducantur: superveniens autem alterutra ex his affectionibus, mortem inevitabiliter afferet, cum ægrotantem invadat diuturna ægitudine malè affectum, & dolorosis evacuationibus conflictatum, adeoque viribus imbecillem: qua sanè ratione fiet, ut morti brevi succumbat, effæto sanguine, & spiritibus exsoluto. Cæterum, quod à plerisque scribitur subsequituram mortem in his à labefactata jecoris sanguificatione, quoniam jecur putatur perpetuò affectum in hydrope, nec experimento, nec menti Hippocratis in hoc aphorismo cohæret: non experimento, quia hydropici citrà jecoris vitium affecti plurimi referuntur, ut alibi quoque à nobis est animadversum: neque Hippocratis menti, qui ex lienis affectione acido-melancholica futuram inquit dysenteriam, indeque lenteriam, aut hydropisim nulla facta de jecoris laborantis mentione. Sed & apud Schenkium, Platerum, Bonetum, aliosque, plerique memorantur hydropici solius malè affecti lienis vitio, & ex melancholico potius hu-

more superabundanti, quam ex dyscrasia frigida, humidaque jecoris, sanguinem pituitosum, & aquosum progignentis: quippe ubi lien tumet, & acidus, melancholicusque humor prævalet, aqua etiam, illaque malæ conditionis, perpetim quoque superabundat, ut propterea jure optimo melancholiam Hippocrates Aquam appellaverit.

APHORISMUS XLIV.

Quibus ex stillicidio urinæ Ileos supervenerit, in septem diebus pereunt, nisi, febre superveniente, satis urina fluxerit.

Proponit & in hoc aphorismo Hippocrates morbum morbo supervenientem considerandum, ut exinde exitum utriusque deducat, aut ad salutem, aut ad mortem. Affert autem exemplum supervenientis Ileus urinæ stillicidio, aitque Ileum stillicidio urinæ succedentem, infra septem dies lethum asserere, nisi tamen febris superveniat, & sua vi, atque efficacia urinam reddat copiosam, & affluenter prodeuntem.

Quid autem sit Ileos, & à qua causa fiat, abundè à nobis alibi est explicatum. Et quamvis à sæcum constipatione, & duritie, à viscosis, & tenacibus succis, à situ ejusdem intestini Ileus vitiatum, vel per contorsionem, vel per intrusionem, vel per inversionem, & denique ab inflammatione ejusdem, aut partium circumstantium oriri soleat, in præsentia tamen aphorismo, quia ex urinæ stillicidio provenire dicitur, putandum à confluxu acrimiarum, & mordicantium humorum illum excitari, ut propterea, qui humores in Vesicam ferebantur, & urinæ stillicidium inferebant, in intestinum Ileum delati, aut phlogosim,

gosim, aut inflammationem pariant, maxima autem, & vicinissima communio inter vesicam, & intestinum Ileum intercedit, cum illi proximè vesica superincumbat, quamobrem promptè possunt ex una in aliam partem humores decumbere: sive autem isti extimas vesicæ partes occupent, sive etiam musculus janitorem proritent, sive denique mediam vesicæ tunicam fibris carneis intertextam infestent, planè poterunt illam ad micturiendum sollicitare, atque adeò urinæ stillicidium inferre: si prætereà delati in intestinum Ileum, illud inflamment, vel per motum peristalticum inversum ad vomendum laceessant, non sine dolore, & ventris inflatione, profectò fiet, ut mors infra spatium septem dierum sit subsequutura, cum Ileus morbus sua natura sit lethalis, & multò magis si fiat ab inflammatione propter affluxum acrium, & mordentium humorum. Statuitur autem terminus septem dierum, non quòd septimo die mors omninò accidat, cum & sexto, quinto, quarto evenire possit; sed quia septimus dies est terminus morborum peracutorum, cujusmodi est Ileus. Hinc non dixit Hippocrates, in septimo die, sed in septem diebus, hoc est intra spatium septem dierum pereunt. Poterunt nihilominus patientes ab hac calamitate evadere, si beneficio febris (quæ proculdubiò affectionem hanc, aut à principio comitabitur, aut intra prædictum spatium consequetur) dissoluti humores denuò in vesicæ cavum repant, & urinam affluenter promoveant; siquidem promota per febrim fermentatione, & attenuatis humoribus, laxatisque viis in vesicæ cavum tendentibus, fieri poterit transpositio eorumdem ab intestino Ileum in vesicam. Et quamvis de ductibus

controverti possit, attenta nihilominus diligenti, & accurata anatomie Recentiorum, qui duce Bartholino detexerunt ex intestinis gracilibus, & præsertim ex Ileum, meatus quosdam deduci ad renes, ureteres, & vesicam, planè satisfieri poterit ejusmodi difficultati; quin & sagax Natura mille sibi (ut ajebat Galenus) parare solet vias, per quas se ipsam exoneret, & à morbis vindicet. Quòd si urinæ stillicidium fieri dicatur ab humoribus mucosis, crassis, & acidis, qui partim tenacitate, partim a core vesicam ad micturiendum stimulent, longè facilius poterit à superveniente febre, excitatus Ileus desinere, & mors præcaveri; quandoquidem per febrim viscosi isti humores facillimè attenuantur, & dissolvuntur, unde postmodum urinæ profluvium. Debet autem urina affluenter promoveri, quemadmodum dicitur in textu, ut ejusdem copia, ne dum humores in Ileum collecti, sed alii quicumque per universum corpus diffusi, veluti criticè, uberiori mictu penitus egerantur, siquidem crisis, ut sit perfecta, debet proportionem respondere quantitati humorum peccantium, qui sane in isto casu non pauci dicendi sunt, cum Ileum, febrim, & inflationem cum dolore ventris excitaverint. Et quamvis Hippocrates in aphorismo non meminerit, cujus conditionis urina futura sit, ut patientem ab Ileum, & à morte tueatur, credere tamen licet illam debere esse non solum quantitate copiosam, sed & crassam, multo sale, & sulphure saturam, ac abundanti sedimento scatentem, quemadmodum deducere est *ex Coacis prænotionibus*.

APHORISMUS XLV.

In ulceribus annuis, aut etiam diuturnioribus, abscessum cum osse communicari est necesse, & cicatrices cavas fieri.

Maximè utilis est hic Aphorismus in praxi Chirurgica procurandis ulceribus inveteratis: in eo enim edocet Hippocrates, quænam mala consequantur ulcera diuturniora, simulque reddit causam, cur eadem difficillimè quandoque curentur, etsi efficacissima præsidia tum interna, tum externa fuerint administrata; quippe sæpè evenit, ut adhibitam quamcumque diligentiam eludant, nullaque ratione ad cicatricem perducì queant, licèt rubra, munda, & sine ulla inflammatione observentur, ac pus referant concoctum, minimèque fœtidum, quia scilicet ossa illis subiecta livorem, aut corruptionem ab ipsamet diuturnitate contraxerunt, unde alimentum periostio communicatum inficitur, & infectum nullatenus permittit ulcus ipsum consolidari. Admonentur proinde Chirurghi aphoristica hac doctrina, oportere subiectum os denudari, deinde etiam si læsum, vitiatum, aut lividum observetur, detergi, abradi, desquamari, quousque pars sana ossis detecta fuerit. Verùm ad exactam totius aphorismi intelligentiam aliqua erunt adnotanda.

Primum memorari hìc ab Hippocrate *ulcera annua, aut etiam diuturniora*: nam recentia videntur excipi debere, nec ejusmodi incommodum subire, tum quia non statim ossa, & ossium periostia in ulceribus læduntur, nec alimentum,

quod illis suggeritur, statim ab initio contaminatur; tum etiam, quia non subito à pure detento, aut vitiato, ulcera sinuosa fiunt, vel saltem sordida, & cacoethica, unde profundiores illius partes infici possint; tum demum quia magna etiam ex parte resistunt corruptioni, & putredini ossa ipsa, quæ propterea non nisi ad longum tempus fœdari, & vitiari solent. Itaque ulcera debent esse in longum tempus protracta, ut propterea jure optimo dixerit Hippocrates *in ulceribus annuis*, quæ nimirum per annum, & ultra perduraverint. Adjecit autem, & non immeritò, *aut etiam diuturnioribus*; quoniam non ab annua conditione, sed à temporis diuturnitate subiecta ossa in ulceribus inficiuntur: Neque verò diuturniora solum ulcera debent hìc intelligi, quæ ultra annum producta sunt, sed etiam alia quæcumque, quæ intra annum curari potuissent, & sanata non sunt, cum in aliquibus partibus ulceratis curatio faciliior esse soleat, in aliis difficilior; unde experimur partes emunctorias corporis, glandulosas, articulares, aliasque similes difficilius curari, longè facilius carnosas, & musculosas; quin & inter has adhuc aliqua differentia observatur, nam ulcera in musculis clunium excitata, semper sunt difficiliora, & ferius ad cicatricem perducuntur; immò & ulcera musculorum temporalium periculosissima; quamobrem diuturniora appellari poterunt ulcera illa, quæ præter morem protrahuntur, sine ulla evidenti causa. Dixi sine ulla evidenti causa; quoniam fieri potest, ut ulcera in longius tempus differantur ex mala curatione, & ex imperitia Chirurghi, fortè quia non tractantur iis medi-

camentorum generibus, quæ à natura ulceris, & partis affectæ sunt exposita, vel quia sordities non est deterfa, vel quia corpus est impurum, & cacoethicum, vel quia gallica contagione infectum, vel quia in ulceribus occultum aliquod detinetur, quod curationi impedimento est, quemadmodum Galenus refert *lib. artis Medice*, & passim Chirurghi experiuntur in vulneribus, in quibus aliquod extraneum relictum est, puta ensis mucro, stupa, capillus, pila plumbea, aliudve simile.

Quoties igitur citrà quamcumque causam manifestam ulcera, quæ cæteroqui apparenter salutaria videntur, ad cicatricem non perducuntur, neque consolidationem admittunt, vitium in osse contractum significant, quod primùm abradi, & desquamari, deinde deterfum complanari expositulat; unde cogendi sunt Chirurghi, ut in his casibus cavum, & profundum ulceris exquirant, & tum periostrium, tum os subiectum mundificent, atque ab omni vitio tueantur, aliter abscessus, & decubitus humorum ad partem ulceratam factus, non solum curationi impedimento erit, verùm etiam talem, ac tantam læsionem in osse subiecto inferet, ut de totius ossis, totiusque membri enormi læsione timendum sit, quomobrem jure optimo admonet in hoc aphorismo Hippocrates ex diuturnitate ulceris abscessum in osse communicari, & cicatricem cavam fieri, ex causis superiùs adductis.

APHORISMUS XLVI.

Qui gibbi ex asthmate, aut tussi fiunt, ante pubertatem moriuntur.

QUamvis gibbi plerique sint, & ex multis causis tales fieri possint, non tamen omnes hic Hippocrates considerat, sed eos dumtaxat, qui gibbi fiunt à dorsi, & pectoris structura vitiata, ita ut pulmo, aliæque partes spiritales intra pectoris cavum conclusæ, & in angustum positæ, in respiratione molestentur: etenim non alia de causa videntur gibbi hic ab Hippocrate memorati, vitæ periculum subire, nisi quia summopere in respiratione offenduntur, quæ ad vitam omninò necessaria est.

Sed non solum gibbos hic considerat Hippocrates cum usu respirationis læso, sed etiam ante pubertatis tempora; siquidem in ea ætate pectus nimis angustum esse solet, & cum in situ, vacuitate, ac figura sit depravatum, nequit procedente ætate, juxta exigentiam corporis amplificari: quò fit, ut viscera spiritalia in angusto satis loco conclusa, neque debitam magnitudinem possint adipisci, neque pro respirationis usu commodè expandi, unde venæ, arteriæ, vasa lymphatica, itemque pulmonis tubuli, cordis ventriculi, pericardium, admodum exilia, & contracta putanda sunt, ut non satis commodè sanguis, & cordis motum ad vitæ indigentiam adjuvare queant, proindeque necesse sit vitam procedente ætate diutius sustineri non posse.

Addidit prætereà Hippocrates ex asthmate, aut tussi gibbos, quoniam tunc gibbositas non ex sola ossium intro-

introversione, aut extraversione, sed ex pulmonis, cæterarumque partium spiritalium vitio provenit; nam asthma, & tussis ægritudines sunt pectoris, & pulmonis. Verum tamen sicuti ex asthmate, & tussi gibbositas oriri potest, ita è converso ex gibbositate asthma, & tussis non rarò fit, ea tamen differentia, quòd in priori casu gibbositas illa sit maximè periculosa, & plerumque lethalis; in posteriori verò casu, sit quidem molesta, sed possit in diutius tempus prolongari; quemadmodum experimur in senibus. At verò, qui gibbi fiunt ex asthmate, aut tussi, propter violentam, & continuam contractionem juguli, ossis sterni, musculorum intercostalium, colli, & asperæ arteriæ, fieri nequit, quin simul unà partes internæ spiritalis, & externæ pectoris, haud graviter coafficiantur, præsertim in ætate puerili, in qua ossa mollia sunt, neque debitam expansionem, ac convenientem structuram sunt adepta, unde organa universa respirationi destinata inidonea fiunt vitæ tuitioni.

Atque hinc concludit Hippocrates eos ante pubertatem interire, cum peream ætatem exigat natura respirationem ampliorem, & vasa circulationi sanguinis dicata, latiora esse debeant; cumque per gibbositatem, & partium spiritalium contractionem, illa insufficientia sint, meritò proinde dicitur ante pubertatem illos interire. Sed & posset etiam aphorismus exponi de gibbis illis ex asthmate, aut tussi factis ante pubertatem; ut proinde sensus fiat, non quòd ante pubertatem moriantur, sed quòd gibbi ex asthmate, aut tussi ante pubertatem facti, in longum tempus vivere non possint. Quocumque autem modo

legatur aphorismus, semper exitus in his lethalis portenditur, quoniam cum gibbositate respiratio, & motus cordis, ac sanguinis plurimum impeditur, ac interrumpitur, unde vita diù foveri non potest.

APHORISMUS XLVII.

Quibuscumque venæ sectio, vel medicatio convenit, hos verè purgare, vel venam incidere oportet.

MUltoties corpora ægritudinibus obnoxia ad sui præsertionem indigent evacuationibus tum per venæ sectionem, tum per purgantis medicamenti assumptionem, sed quoniam non quocumque tempore ejusmodi remediorum administratio opportuna est, docet propterea in hoc aphorismo Hippocrates, quòdnam tempus sit conveniens, & opportunum, adeòq; magis aptum purgationibus, aut venæ sectionibus, ut illæ ex voto proficiant.

At verò non de quibuscumq; corporibus quomodolibet affectis intelligendus est hic aphorismus, sed de iis dumtaxat, quæ præsertione indigent, ne in ægritudines labantur, & in quibus humores mali adeò superabundant, ut nullo alio leviori præsidio possint emendari, sed omninò evacuatione egeant; quomobrem non immeritò Hippocrates in aphorismo scripsit: *quibus purgatio, vel venæ sectio convenit*; sive, ut aliis vertere visum est, *quos opus est purgare, vel sanguinis detractione evacuare*: isti autem non nisi cacochymi, vel plethorici esse solent, & ut cacochymi purgatione, ut plethorici sanguinis missione indigere videantur. Corpora namque actu ægrotantia, sicuti præsentibus,

non imminentibus egritudinibus, afficiuntur, ita curatione, non præservatione opus habent: perperam enim quis ageret, si ægritudine jam jam exigente, purgatorium medicamentum in vernale tempus differre vellet, cum tamen interea crescente ægritudine, facile æger ante hoc tempus perire posset. Itaque aphorismus intelligendus est in corporibus præservandis, non autem curandis, quippe corpora præservanda, licet actuali ægritudine minimè corripiantur, sunt tamen adeò malè affecta causis agrotare facientibus, ut ne progressu temporis istæ plurimum adauctæ, vel vitiatæ, morbos excitent, peropportunè antequam morbos pariant, ab iisdem purganda sint, & quidem tempore convenienti, quale vernale est, priusquam per æstivum calorem in motum fermentativum præternaturalem adigantur.

Quænam autem corpora ista sint, quæ verno tempore præservari debent, ne postmodum per æstatem in ægritudines labantur, inquisitione dignum. Et rectè exponuntur à Galeno, cæterisque Interpretibus, quæ per æstatem agrotare consueverunt: puta si quis diebus canicularibus solitus sit aliàs corripitur tertiana febre, erysipelate, diarrhæa, aliisque similibus ægritudinibus, quoniam propter superabundantiam excrementorum acrim, seu biliosorum, prædictas ægritudines æstivo tempore incurrere consuevit, profectò, antequam æstas accesserit, purgante medicamento, ejuscemodi excrementa biliosa, acrida & depravata educenda erunt, ne scilicet quantitate adaucta, qualitate corrupta, & in corpore diutius detenta, in subsequente æstate febres, aliasque ægritudines acutas cum manifesto vitæ periculo excitent.

Quod dictum est de Vere respectu

Æstatis, pari ratione ampliari poterit ad Autumnum respectu Hyemis, quoties hyemali tempore consueverint ægritudines pluries recurrere, & corpora divexare; unde si fortasse quis per hyemale tempus solitus sit laborare ægritudinibus pituitosis, aut lymphicis, poterit præcedenti tempore autumnali, opportunè repurgari à cumulatis ejuscemodi excrementosis superfluitatibus, antequam istæ per hyemem adauctæ, & depravatæ, solitas illas ægritudines inducant.

Disjunctim prætereà notavit Hippocrates *medicationem*, aut *venesectionem*; nam non in omnibus indifferenter utraque adhibenda est, sed prout habitudo corporis, morbi conditio, & apparatus humorum exposulaverit; quare corpora plethorica, carnosa, sanguinea, & quæ aliquam sanguinis evacuationem suppressam patiuntur, à qua aliàs juvenum suscipere, venæ sectione tractanda erunt; quæ verò cacochyma sunt, & excrementis abundant, vel in ægritudines delabi consueverunt, humorales dictas, medicationibus, seu purgationibus erunt præservanda.

Neque solum ista diversimodè peragenda erunt pro corporum varietate, & humorum conditione, sed etiam pro varietate ætatum, temperierum, regionum, consuetudinum; cum quædam corpora per ejuscemodi circumstantiarum diversitatem, hoc, vel illo remediorum genere in melius procedere soleant.

Denique imminentes ægritudines debent esse tales, ut præter timorem certæ repetitionis in æstate, aut in hyeme, gravitatem, diuturnitatem, aut vitæ periculum rationabiliter minentur; quamobrem sana ratione superius dictum est, nullo alio leviori præsidio posse fieri emendabiles: nam si fortasse sola diæta, exactaq; victus ratio

ratione, aut certo alimentorum genere, rectoque usu rerum non naturalium præcaveri possent, haudquaquam confugiendum erit ad venæ sectionem, aut purgationem. Ita quoque, si possint eadem præservari medicamentis corrigentibus, aut etiam per alios ductus corporis deducantur humores, puta per sudorem, aut vias urinæ: similiter si per vomitum, ut in corporibus picrocholis dictis, & in quibus facilis est vomitio, aut sponte naturæ humores per superiora feruntur, ut ab eodem Hippocrate dicitur 4. aphorismorum. Hinc excipiuntur egritudines illæ, quæ immateriales dicuntur, hoc est ab humoribus non pendentes, aut quæ à solo viscerum languore originem ducunt, adeoque sola correctione, non autem evacuatione curantur.

Quoniam verò in hoc comm. Galenus consulit, podagra, cæterisque articulariis doloribus affectos purgationibus quoque per eadem tempora præcaveri posse, cum dicat: *sed & podagram, & morbum articulare adhuc incipientem, & nondum poros circa articulos facientem, ex tali evacuatione multis jam annis fieri prohibuimus.* Qui hac ratione secutos ab illa credunt, perbellè deridet Podagra apud Lucianum in sua *Tragopodagra*, jactabunda sic istos eludens:

Quis est hominum, cui non ego, insuperabilis

Regina morborum Podagra, nota sum?

Quam nulla thura, nulla fumigatio,

Nec fusus apud aras cruor, aut donaria

Suspensa templis divitum placabilem

Reddunt: nec ipse vincere summus omnium

*Pœan deorum Medicus arte sua potest,
Apollinisve filius Æsculapius,
&c.*

Et infra, postquam retulerit varia remediorum genera, quibus eandem retundere sibi mortales persuadent, & plurimas, ut seipsam vincant, industrias adhibent, tandem concludit:

Sed omnibus illis nil nisi plorare impero:

Et sic facientibus, vel irritantibus,

Occurrere soleo magis iracundior.

Qui verò contra me nihil ejus cogitant,

Illis facilem, & tractabilem me præbeo.

APHORISMUS XLVIII.

Lienosis difficultas intestinorum superveniens, bonum.

Lienosi hinc intelliguntur, qui lienis vitio laborant, sed cum tumore citrà inflammationem, aut febrim; quia scilicet crassa, & tartarea excrementa ibidem collecta sinistrum hypochondrium tumefaciunt, lienis ductus obstruunt, & totum corpus serosis, ac vitiosis humoribus, acidis, & melancholicis inficiunt: cumque difficulter humores isti possint evacuari, & lien ab eorundem crassitie, ac densitate egrè admodum liberetur, propterea fit, ut non tam facilè medicamentorum beneficio oppletus, pressusque, ille inaniatur. Solet autem sponte naturæ non rarò moles ejus adaucta diminui, & per proprios ductus in mesenterium, ac in intestina exonerari, transfusis nimirum ejus ceteri humoribus in alvum, unde dys-

senteria hic ab Hippo crate notata , non quidem inducta à vitio succorum pancreatici, & biliosi, neque ab erosione venarum, aut arteriarum intestinalium, sed per solam metastasim decumbentis humoris è liene in intestina crassa, cujus causa frequens, sed non adeò dolorosa dejectio exorietur, ut in vera dysenteria intestinali: id quod non ita pridem contigit observare in Nobili quodam Viro, qui per integram hebdomadam atrum, crassumque humorem amurcæ sanguinis haud dissimilem, non tamen sine vitæ periculo, abundanter egeffit. Verum tamen bonum erit indicium, si exinde lien ab ejusmodi evacuatione detumescat, & universi illi humores ibidem cumulati excernantur, viribus simul unâ constantibus. Accedit, quòd lienosi plerumque serosis humoribus abundant, qui ab acido ibidem herente sinistram illud hypochondrium tumefacere solent; si deinde sponte naturæ serosa illa colluvies in alvum deferatur, lien ipse detumescet, & ductus ejusdem obstructi referabuntur, totumque corpus exinde malè affectum exonerabitur, atque in meliorem statum abibit.

Est tamen verum, quòd dysenteria hoc loco ab Hippocrate memorata intelligenda erit sine intestinorum ulcere, aut inflammatione, & fortassè etiam sine febre, quam plerique sub nomine diarrhœæ potius, quàm dysentericæ, solent appellare. Etenim si dysenteria sit cum ulcere Intestinorum, vel cum eorundem inflammatione, & febre conjuncta, planè ex his pertimescenda foret, adhuc si è liene tumefacto penderet, adeòque bonum non foret, cum dysenteria quæcumque semper mala sit, tum ratione partis affectæ, tum ratione ulceris ibidem contracti,

tum denique ratione symptomatum adjunctorum, & præsertim febris acutæ.

Hinc modò edocemur sinendam esse ejusmodi evacuationem in lienosis, si subinde lien detumeat cum ægri levamine, & virium constantia: quin si fortassè Natura tarda sit, & ægrè admodum hanc transpositionem tentet, aut illam non proficiat, poterit sagax Medicus eandem explere. Pari ratione admonemur, lienosos per easdem vias alvi fore evacuandos medicamentis purgantibus, sed attenuantibus simul, & incidentibus, cum plerumque humores ibidem hærentes crassi, & tartarei sint, nec facilè possint per alios ductus corporis amandari, nisi solum per Intestina. Quòd si post crassorum succorum evacuationem serosi alii supersint, qui forsitan nequiverint simul unâ, nec tam brevi tempore evacuari, diureticis planè medicamentis per vias urinarias deduci poterunt, cum inter lienem, & renes magnus consensus ineat, ut ex Anatome: quamquam, si crassi, tenacesque succi fuerint educti, verisimile sit simul unâ quoque tenues, & serosos per eosdem ductus commodè potuisse evacuari.

APHORISMUS XLIX.

Quibuscumque morbi podagrici fiunt; ii, sedata in quadraginta diebus inflammatione, finiuntur.

TErminum podagricarum affectionum hic memorat Hippocrates, dierum scilicet quadraginta, cum sponte sua, & citrà quamcumque causam externam, aut errorem tum ab ægrotante, tum à Medico commissum, producantur. Neque

que solùm podagræ, sed cujusvis alterius particularis morbi terminum, implicite in hoc contineri existimandum; siquidem par ratio in cunctis est, cum non à partibus affectis, manu scilicet, vel pede, sed ab humoribus ibidem depositis, & à loco articulari, terminus quadraginta dierum constituatur: qua profectò ratione experimur Rheumatismum, & Rheumaticas quascunque affectiones, in appendicibus musculorum habitas, pari dierum numero terminari solere.

Sed quamquam quadraginta dies hic ab Hippocrate pro termino desitionis podagricorum affectuum referantur, non tamen quis existimabit, & ante hoc tempus, & multò etiam post finiri non posse; siquidem juxta variam humorum decumbentium conditionem, ac copiam majorem, vel minorem, & citius, & tardius poterunt ægritudines istæ desinere; unde si humores pauci sint, & tenues, citius, tardius verò, si multi, & tenaces fuerint, terminabuntur: sic in tophacea podagra plerique sunt, qui ad menses, & ultra laborant, sine ulla spe brevioris desitionis. Quamobrem non sine ratione adjecit Hippocrates in textu, *sedata inflammatione*; nam cum inflammatio eas partes occupat, terminus desitionis speratur quadragesima die; humores etenim depositi in articulos cum inflammatione, non nisi tenues, & calorem præferentes esse solent: Inflammatio autem in his conspicua fit, quoniam non solùm internodia, & partes interiores articulorum, sed etiam appendices musculorum, tendinum, & ligamentorum, immò & cutis ipsa inflammari consuevit. Contra verò, cum humores sunt crassi, crudi, phlegmatici, citrà

quamcumque inflammationem articulos afficiunt, immò quandoque referunt conditionem tumoris edematosi. Tempus etiam vel æstivum, vel hyemale ad durationem brevior, vel longior valde conferet, promota nimirum, vel retardata per poros cutis transpiratione.

Prætereà, neque dixit Hippocrates desituram esse podagram in quadraginta diebus, sed inflammationem, fortassè cum podagra copulatam; unde ista tunc finienda speratur, cum inflammatio desierit: primò enim terminari debet inflammatio in articulis inducta, postea verò morbus podagricus, aut articularis. At qua de causa tantum tempus exigatur, ut inflammatio desinat, benè explicat Galenus in *commentario*: Quoniam humores illi sensim debent diffiliari, & per poros cutis resolvi, quod sanè nequit peragi ad breve tempus, sed omninò necesse est spatium quadraginta dierum, qui terminus est acutorum morborum; quare inflammatio, quæ ægritudo acuta est, ejuscemoditè termino finietur; podagra verò, quæ inter morbos chronicos referitur, etiam ultra hoc tempus prorogari poterit, & ut dictum, pro varietate adhuc humoris ibidem collecti, vel paucioris, vel copiosioris, vel crassioris, vel tenuioris. Accedit, quòd ex languore articulorum, & ex conditione phlegmatis ibidem congesti, acidum referentis, multoties humores illi vertuntur in tophos, unde tophacea, & nodosa podagra, quæ sanè longissima fit, & multoties immedicabilis, de qua Ovidius.

Solvere nodosam nescit Medicina podagram.

quinimmò articuli ipsi ita convelluntur, & distorquentur, ut luxationem

tionem subeant, nulla ratione reducibilem, ut ex praxi.

Cæterum licet terminus hic status in rheumaticis affectionibus passim talis observetur, sicut & non raro in repetentibus podagricis affectionibus, non tamen de universalibus, totoque durationis tempore podagræ intelligendus est, quippe quæ longissima cum sit, cum podagricis ipsis consenescit, & sæpissime commoritur.

APHORISMUS L.

Quibuscumque præceditur cerebrum, iis necesse est febrem, & bilis vomitum supervenire.

Est hic Aphorismus prognosticus, quo nos edocet Hippocrates quid præsagiendum sit à præciso cerebro; simulque etiam erit diagnosticus, cum ex symptomatibus hoc loco memoratis ducamur in cognitionem cerebri præcisi. Ubi autem Leonicens vertit *cerebrum præcisum*, Fuchsius clariori significatione exponit *vulneratum*; quinimmo & nos, *quomodocumque contusum, punctum, concussum, aliterve exagitatum*, pari ratione interpretari poterimus. Quare ad partem Chirurgicam specialius pertinere videtur monitum hoc præsentis aphorismo memoratum.

Et quidem cum cerebrum est vulneratum, aliterve affectum, non solum ratione vulneris febris accidit, sed specialius à sanguine è vulnere prodeunte, & in pus converso; quoniam sanguis alicubi restagnans, statim grumescit, & in pus vertitur, unde postmodum febris, quæ & acuta, & continua erit, tum ratione ipsius partis affectæ, tum ratione conclusi ibidem puris, aliussve corru-

pti liquoris, qui nedum Cerebrum ejusque meninges, sed & pertranseuntem sanguinem statim inficit, atque in indebitam fermentationem adigit: cum fieri non possit, quin vulnerato cerebro meninges etiam scissæ non sint, proindeque præterfluens per illas sanguis depravetur, & inflammatio ibidem excitetur: modò inflammationes in meningibus cerebri statim febrem inferunt, continuam simul, & acutam.

Est tamen verum, quod non semper febris hæc statim, & inter initia vulneris contingit, cum aliquando sit observatum, tertia, aut quarta die illam supervenire, quoniam, ut dictum, non tamen ratione vulneris, quàm à sanguine extravasato, corrupto, aut in pus converso, febris oritur: atqui pus non statim fit, sed plerumque tertia, aut quarta die, ut propterea non irrationabiliter dixerit Hippocrates, *febrem supervenire*, non comitari. Hinc si fortasse in vulneribus capitis febris post tertium, aut quartum diem, non appareat, probabiliter coniiicere poterimus cerebrum, ejusque meninges haudquaquam fuisse vulneratas.

Neque solum febris supervenit cerebri vulneribus, sed etiam vomitus; siquidem vulnerato cerebro, meninges etiam, & principium nervorum afficiuntur, unde postmodum stomachum, ventriculum, septum transversum, cæterasque partes nerveas simul unà collædi necesse est, immò etiam contrahi, & convelli, adeoque vomitum subsequi, qui peculiaris actio ventriculi est; quinimmo non raro accidit, ut statim ab affecto, vulneratoque cerebro ille succedat, ut & singultus, ac septi transversi coarctatio, ob maximum consensum, quem inter sese partes

partes istæ cum Cerebro ineunt. Neque solum si cerebrum vulneretur, vomitus accidit, sed etiam si scindantur, aut lacerentur meninges, quæ cum nervosissimæ sint, immò nervos, & nervorum liquorem convestiant, semper ac illæ afficiuntur, partes cum ipsis consentientes statim mutuo fibrarum commercio in consensum trahuntur, quemadmodum specialiter est stomachus, multis refertus nervis è vago pari provenientibus.

Quamquam autem vomitus sæpissimè paulò post inflitum vulnus subsequatur, solet nihilominus etiam tertio, aut quarto die supervenire, præsertim à sanguine putrefacto, à sanie, & à pure jam genito, quod cum non statim fiat, neq; subito vomitum afferet; postquam verò sanguis effusus in pus versus fuerit, atque cerebri medullium, ac principium nervorum pertigerit, vomitum inducet. Atque hinc deducunt peritiores practici mortem proximè esse affuturam, ut propterea, si contingat vomitus in quarta, æger sit periturus in septima; & si accidat in septima, periclitabitur in undecima, & sic deinceps; eoquòd vulnera capitis, & cerebri, periculum semper vitæ minentur, quousque non fuerint ex integro sanata; sed & aliquando etiam visa apparenter curata mortem attulisse, ichore ex vulnerata parte in cerebri medullium resudante; quomobrem non sine ratione plerique ad centesimum quoque diem periculum vitæ protendi existimant, ut apud Chirurgos ipsos est legere.

Sed unde accidat vomitus biliosus, & num à solo bilis vomitu periclitentur ægrotantes, quæri non incongruenter hoc loco potest. Et

quidem bilis vomitus in his accidit, vel quia ob nervorum convulsionem contrahitur ventriculus, & cum ventriculo pylorus, unde intestinum duodenum, in quod per choledochum ductum portio fellea exoneratur, etiam motu peristaltico inverso sursum retrahitur, & in ventriculi cavum biliosum istum humorem effundit, qui deinde evomitur: vel quia portiones cibales in ventriculo relictæ, nec benè digestæ, ac propterea in alium humorem degeneratæ per febrim ex vulnere cerebri supervenientem commutantur in excrementa amaricantia, quæ conditionem biliosam referunt, unde vomitu superveniente postmodum evacuantur: id autem sæpè sæpius experimur in praxi, quotiescumque ventriculus malè affectus non benè concoquit, nec dissolvit alimenta, & ex inconvenienti mixtura succorum digestionis destinatorum emergunt superfluitates amaricantes, bilis naturam referentes. Verumtamen etiam si vomitus biliosus non sit, nec amarorem referat, adhuc nihilominus ejusdem pravitatis existimandus erit, quotiescumque ex vulnerato cerebro accidit: malum enim exinde significatur, non quòd biliosus humor evomatur, sed quòd ex vulnerato cerebro vomitus accidat: parum enim referet, an vomitus biliosus, an acidus, vel pituitosus, aut cibariorum sit, nam semper malus erit, veluti designans ex vulnere cerebri medullium, & nervorum principium ab effuso sanguine, & à supergenito pure, aut ichore, in eam partem decumbente, fuisse affectum: modò gravis ista affectio à pure, à liove humore deciduo in principaliorem cerebri partem, periculosa semper est.

Deni-

Denique quòd à supervenientibus duobus hisce symptomatibus, febre scilicet, & bilis vomitu, ægri sint proximè periclitaturi, licèt hic ab Hippocrate non sit memoratum, expressè tamen deducitur ex *lib. 1. de morbis*, ubi hic idem aphorismus in hunc modum scribitur: *si cerebrum sauciatum fuerit, febrem necesse est supervenire, & bilis vomitum, & aliquam corporis partem siderari, atque perire: & in Coacis prænotionibus*, id ipsum ferè repetitur: *quibus cerebrum vulneratur, febris plerumque, ac bilis vomitus accidit, & corporis sideratio, atque tales perniciosè habent*, quinetiam 2. *lib. de morb.* addit, *cerebro corrupto sanguinis vomitum sæpè subsequi*. Cæterum quòd sanguis aliquando etiam in his exeat per nares, & aures adnotarunt Celsus *lib. 5. cap. 26.* & Paulus *lib. 6. cap. 88.* licèt non semper cum cerebri vulnere jungatur, sed potius in ictu, contusione, casu, in quibus aut sanguis, aut pus, ex sanguine genitum, exteriores cerebri partes occupat, & per suos ductus faciliùs educi potest; quemadmodum in praxi pluries est observatum.

APHORISMUS LI.

Quicumque sani dolore capitis repente capiuntur, & statim muti fiunt, & stertunt, in septem diebus pereunt, nisi febris apprehenderit.

AD prognosim quoque pertinet hic aphorismus, quo Hippocrates edocet benè valentes dolore capitis repente correptos, si statim obmutescant, & stertant, intra septem dies perire, nisi febris illos apprehenderit.

Et quidem sanos, benèque va-

lentes hic considerat Hippocrates, non autem ægros, aut valetudinarios, in quibus hæc omnia evenire possunt, sed alia profectò de causa, quæ dolorem capitis afferat, & mox etiam Aphoniam cum stertore: siquidem potentior planè causa existimanda est, quæ ejusmodi affectum excitet in sanis, quam quæ in valetudinariis. Itaque sani, benèque valentes, si dolore capitis repente capiantur vi, violentiaque causæ externæ, aut virulentia, & malignitate causæ internæ, taliter affecti intelligendi sunt: & quidem vi, atque violentia causæ externæ, puta ebrietate ex vino meraciori, aut usu alicujus medicamenti narcotici, ac stupefactivi, quemadmodum in expositione *aphorism. 5. libr. 5.* latè adnotavimus; virulentia verò causæ internæ videlicet humoris maligni, acidi, figentis, & coagulantis humores per cerebri substantiam diffusos, quemadmodum idem Hippocrates 2. *de morb.* alia phrasi id ipsum retulit, inquiens: *repente dolor occupat caput, & vox intercipitur, & sui impotens æger fit: hic in septem diebus moritur, nisi febris invaserit: Patitur autem hæc, cum atra bilis in capite commota fluxerit in partes, ubi venæ plurimæ sunt, in collum inquam, ac pectus; postridie autem apoplecticus fit, atque impotens, sanguine nimium perfrigerato. Et tertio de morbis subdit: cum à capite dolor acutus statim vocem intercipit, tum aliàs, tum si ex ebrietate hoc contingat: qui sic affectus est, septima die moritur; minus tamen moriuntur, qui ex ebrietate tale quid perpessi sunt, & voce privati permanserunt; nam si eadem die, aut postera,*

stera, aut tertia vocem edant, sani evadunt: faciunt autem hoc aliqui ex ebrietate, & neutri moriuntur.

Quoties igitur ex præcedenti dolore capitis repente suborto, Aphonia accidit cum stertore, nedum cerebrum, sed etiam nervi vocales in asperam arteriam, & in vasa spiritalia tendentes afficiuntur, & sive morbos de genere Apoplexiæ fiat, sive ad speciem Cari referatur, ut mavult Cardanus, sive etiam convulsio- nis naturam sapiat, proculdubio ex quibusvis harum ægritudinum æger perire poterit. Quomodo autem id contingat, describitur ab eodem Hippocrate 2. de morb. his verbis: *sanum repente dolor circa caput invadit, statimque vox intercipitur, stertit, & os hiat; si quis ipsum vocet, aut moveat, solum suspirat, nihil autem intelligit, & multum mingit, & se mingere non animadvertit.* Quare sensu, motuque privatum illum fieri clarissime designatur ex his, adeoque ægrotantem proximè accedere ad Apoplexiam, aut ad aliam cerebri affectionem huic valde affinem, præsertim quia repente illum corripit hoc aphorismo memora- tur, statimque mutum fieri; quæ sanè fieri nequeunt sine ingenti cerebri affectione, & cum partis animalis, & nervorum læsione. Stertor etiam id ipsum denotat, siquidem hic fit impedita respiratione, & nequeuntibus musculis thoracis illum attollere, unde aer interceptus in ductibus aspe- ræ arteriæ stertorem parit, quemad- modum experimur in his, qui suffo- cationis periculum incurrunt. Sicut autem Aphonia diutius perduratura est, ita quoque & stertor, qui ple- rumque conditionem ejusdem sequi- tur, ut propterea Galenus 2. aphor. *comm.* 42. quatuor Apoplexiæ species

constituerit, pro quadruplici respi- rationis læsione, majori, vel minori.

Hos itaque taliter affectos in se- ptem diebus mori testatur hic Hip- pocrates: Et licet alibi Apoplecti- cos dixerit intra quatuor dies peri- re, quia Apoplexia morbus acutis- simus est; nihilominus non exinde fit, ut nequeant isti ad alios dies se- quentes protrahi, puta ad quintum diem, sextum, vel septimum. Neque verò quia Hippocrates in septem diebus illos perire ait, terminus sep- timæ diei constituitur, nam juxta morem ejusdem, intra septem dies mortem evenire posse designat, ut pluries à nobis est adnotatum, cum & quinta, & sexta etiam accidere possit.

Tandem additur in textu, *nisi febris illum apprehenderit*, id est nisi febre intra hoc tempus æger corripiatur, cujus beneficio ligati, obstru- ctique nervi vocales solvantur, & hu- mores cerebrum afficientes per fe- brim digerantur, & aliò exturben- tur. Quanto citius autem febris ac- cesserit, tantò melior erit, antequam scilicet humor ibidem collectus con- crescat, & coaguletur, ut nequeat postmodum promptè digeri, & dis- solvi. Verumtamen febris ista nec adeò mitis, & levis esse debet, ut hu- mores impactos, crassosque non di- luat, nec multum vehemens, aut diu- tius protracta, quæ vires infringat, & deprimat, sed laudabilis erit, quæ de genere ephemerarum statuuntur, ut nimirum non transcendat spatium trium dierum, quo sanè tempore hu- mor Aphoniam efficiens, digeri, & dissolvi, adeoque vel per sudorem, vel per urinam evacuari commodè pos- sit. Cæterum si febris limites ephe- merarum excederet, & vel à visceri- bus malè affectis, ac tumefactis, vel ab humoribus plus debito fermenten-

tescentibus, ac vitiosis proveniret, non omninò tuta foret; quoniam exinde tantùm abesset, ut aponia, & stertor desineret, ut potius novus, ac deterior morbus exoriretur prior peior; ut aliàs etiam à nobis est animadversum *in commentariis super secundum Aphorismorum librum*.

Reliqua ad curationem hujus morbi facientia legi poterunt apud eundem Hippocratem in præcitato lib. 2. & 3. de morbis.

APHORISMUS LII.

Oportet verò considerare oculorum in dormientibus suspensiones: Nam si quid album commissis palpebris subinspicitur, neque ex alvi profluvio, aut medicamenti potione istud contingat, malum est signum, & lethale valde.

QUamvis Cardanus hunc aphorismum omninò adjunctum præcedenti velit, itaut sejunctim ab illo veritati non consonet, quia tamen ejus mos perpetuus est, ut aphorismos inter se connectere plurimùm allaboret, quasi verò sine connexionē stare illi non possint, nil mirum, si in hisce rebus inutilibus sæpissimè diutius immoretur. Est tamen verum, quòd accidentia hæc in oculis ægrotantium memorata, ut malum significant, & eventum quandoque lethalem portendant, à læso cerebro, nervisque inde provenientius proficisci debent: nam si fortassè à verminibus, aut vaporibus ex imo ventre elevatis orirentur, licet præternaturalem corporis constitutionem designarent, non tamen omninò prava forent, ut passim in puellis experimur. Sic pariter, si ex consuetudine quis dormire consueverit inconni-

ventibus oculis, & non commissis palpebris, neque malum prælagiri exinde posset, quandoquidem multi sunt, qui apertis oculis profundè dormire solent, immò hianti ore, & cum stertore, & ronchis horribilibus, citrà ullum vitæ incommodum. Itaque de his speciatim intelligendus est aphorismus, qui ex ægritudine Cerebri, & principii nervorum læsione id patiuntur, quemadmodum in delirantibus, caroticis, apoplecticis, lethargicis sæpissimè experimur; itemque in malignè febrientibus cum depravatione animalium operationum. Et licet in præcedenti aphorismo de cerebro laborantibus actum sit, quibus incommissis palpebris dormire malum est, nihilominus non solum de iis, sed de quibuscumque aliis, pari ratione cerebro laborantibus, exponi commodè potest, itaut aphorismus sejunctim sumptus aptabilis sit omnibus ægrotantibus quocumque genere ægritudinis, modò cum illa cerebrum compatiatur. Est propterea aphorismus hic prognosticus, prænuncians malum, & quandoque etiam lethalem eventum in ejusmodi ægrotantibus; simulque etiam diagnosticus, designans cum illa ægritudine cerebrum simul unà affectum esse, adeoque per ejus medullam, & nervorum principium, malitiam ejus ægritudinis esse diffusam.

Unde autem accidat, ut ægrotantes incommissis palpebris dormiant, & album oculorum detectum exhibeant, ratio varia proponitur ab Interpretibus. Et Galen. *in comm.* causam attribuit siccitati jam introductæ in partibus nerveis, itemque imbecillitati facultatis motricis, nequeuntis palpebras undequaq; expandere, & amplificare. Verùm siccitas ista si talis, ac tanta foret, ut hic fingitur à Galeno,

Galeno, certè non minùs in palpebris, quam in aliis partibus membranis, & nerveis conspicua foret; quin & idipsum dici oporteret in puellis inconniventibus oculis dormientibus ex causa vermium, aut corrupti lactis stagnantis in intestinis, cum tamen ejusmodi siccitas adaucta in his nulla sit. Neque etiam imbecillitas facultatis motricis causa ejusdem adæquata esse potest, quandoquidem in aliis partibus illa sensibilibus deberet apparere; quin & in palpebris tanta vis movens non videtur necessaria, ut illas expandere, & amplificare cogatur, quoniam sponte sua palpebræ laxari, & ampliari possunt, nulla intercedente interna facultate motrice; unde sæpissimè etiam accidit sponte sua illas lymphico humore gravatas delabi, laxari, & occludere universam oculorum orbitam, præsertim cum palpebræ superiores non committuntur; vel è converso, licet istæ committantur, infernæ tamen retractæ, nequeunt expandi, & simul unà committi cum palpebris superioribus. Accedit, quòd aliquando vitium non totum est palpebrarum in ejusmodi incommissione, sed est oculorum, qui cum ex defectu muscutorum, & nervorum, illos moventium, quodammodò retracti observentur, propterea non secundum rectam dispositionem constituti, velut in Strabonibus, sed vel sursum, vel deorsum contracti, exhibent inter utraque palpebras albumen; quod secus accideret, si oculi in suo situ forent repositi. Itaque ad solam siccitatem totum hoc oculorum, & palpebrarum incommodum tribuendum minimè videtur.

Crediderim eapropter rationabiliùs palpebrarum suspensiones exoriri in his, qui per ægritudines sive

Tozzi Op. Med: Tomo IV.

totius corporis, sive partium principalium ejusdem, cerebro laborant, & causa morbi in principium nervorum transfusa est, ubi vel propter acritatem, vel propter malignam conditionem infertur levis primùm, mox gravior nervorum contractio, cujus ratione nervi in sensus externos proximiores corporis tendentes coafficiuntur, & potissimùm illi, qui feruntur in palpebras, eo quòd propter exilitatem, tenuitatemque faciliùs commoventur, & proritantur, adeòque affectionem quamdam convulsoriam incurrunt. Sic etiam in his sæpissimè etiam experimur motus inæquales, spasmodicos, & convulsivos dictos, itemque retractionem labiorum per intervalla, & voces tremulas, & visus obtenebrationem, aliaque accidentia his similia, ab affecto nervorum principio provenientia, vel saltem à proritatis meningibus, quæ integumenta præstant nervis omnibus corporis, ut ex Anatome constat.

Hinc itaque deducere licebit, malum esse indicium, aut etiam valde lethale in ægrotantibus, quotiescumque palpebræ non benè committuntur ipsis dormientibus, ita ut album oculorum subinspiciatur; quoniam ex hoc arguitur cerebrum simul unà affectum esse, & nervos motus quosdam convulsorios subire à vaporibus, vel humoribus illos vellicantibus: cumque id plerumque non fiat sine absorptione roridæ cerebri substantiæ, aut alterius consimilis liquoris, cum ea, quæ irritandi, & vellicandi vim habent, etiam sua natura possint extenuare, & exsiccare; idcirco simul cum his sæpenumerò etiam partium consumptio, & exsiccatio copulari poterit, cum languore, & jactura virium.

Q

Quo-

Quoniam verò adiicit Hippocrates in textu, *si non ex alvi profluvio, aut medicamento purgantis portione*, id evenit; clarissimè ostendit causam in illis debere esse internam, non autem externam, & manifestam; siquidem fieri potest, ut ex immodica evacuatione, sive spontanea, sive promota per artem, adhuc nervicæ oculorum partes, aliæque adjacentes, partim ab ipsa evacuatione vim habente extenuandi, partim ex acritate medicamenti in humoribus, & sanguine relicta, nervi ipsi, & partes membranosæ contrahantur, quemadmodum ab usu heliobori aliàs edocuit idem Hippocrates convulsionem exoriri posse; quandoquidem medicamenta purgantia, & præsertim validiora, nedum dissolvendo, & aliquando humores, verum etiam irritando, evacuationem promovent, & non rarò etiam hypercatharsim inducunt. Et quamvis Hippocrates de alvi profluvio mentionem fecerit, veluti de evacuatione spontanea, nihilominus jam satis unicuique notum est, alvi profluvium, & diarrhæam immoderatam ab acribus, & vellicantibus humoribus proficisci, si nimirum in alvum delati, intestina ad immodicam evacuationem laceffant; unde postmodum partium superiorum, & cerebri non levis extenuatio, ac pruritatio contingit, adeoque palpebrarum retractio, quæ non adeò mala dicenda est, veluti facta à causa manifesta, scilicet ab illa immoderata evacuatione, quæ licet humores, & roridam substantiam nervorum absumpserit, non tamen hærentem in cerebro causam arguit, adeoque non adeò periculosa est; præsertim quia humores illi absumpti, & evacuati, faciliùs remitti, & restaurari possunt, secùs verò corrigi, & emendari, qui cerebrum proximè,

& non sine malignitate afficientes in causa sunt, ut membranosæ partes convellantur.

Tandem concludit, nedum malum esse signum, sed etiam valdè exitiale; siquidem in ægritudinibus quibuscumque cerebrum, & nervosas partes affici, pessimum est; sive quòd ille inter principales referantur, sive quòd sensui, & motui corporis dictæ sint, atque adeò ad cordis pulsus, & ad vitam conservandam proximè conferant; sive demum quia nutritioni incommodant, adeoque viribus sustinendis idoneæ fiant: quæ ratione affectus omnes Cerebri periculosissimi semper sunt. At verò non dixit Hippocrates omninò esse signum lethale, sed valdè lethale, hoc est multum, aut plerumque lethale; unde adverbium illud, valde, nō adiicit, sed aliquantulum potius diminuere videtur magnitudinem, & periculum symptomatis, si præsertim alia non penitus consentiant.

APHORISMUS LIII.

Desipientiæ, quæ cum risu fiunt, securiores: quæ verò cum studio, periculosiores.

Comparat in hoc Aphorismo Hippocrates desipientias, & quanam periculosiores, quæ verò securiores sint ab adjunctis breviter deducit; nam cum risu securiores dicit, cum studio verò periculosiores.

Quamvis autem desipientiæ in universum plures, & variæ esse solent, quemadmodum deducitur ex eodem Hippocrate, atque ex eodem colligit Cardanus; commodè tamen ad tres revocari possunt, utpote quæ sæpe sæpius ægrotantes afficiant, & patentioribus indiciis manifestantur, nempe ad eas, quæ cum risu, quæ cum stu-

studio, & quæ cum furore, & impetu contingunt, ut benè Galenus *in comm. istius aphorismi*. Inter has autem securiores semper sunt, quæ cum risu, graviores, quæ cum studio, & multò adhuc graviores, periculosioresque, quæ cum furore conjunguntur.

Et quidem, quæ cum risu fiunt, securiores sunt, tum ratione Imaginatricis facultatis non adeò à naturali statu declinantis, tum ratione humoris illum inferentis: etenim quandoque phantasmata per Imaginativam diffusa lætitiæ, & risum repræsentant, Naturam non deprimunt, nec deiciunt, sed potius exhilarant, ac sublevant, motum cordis, & sanguinis non opprimunt, aut intercipiunt, neque à sua diathesi multum distrahunt, aut averunt, sed per convenientes, ac expeditos spiritus confovent, & conservant: Humor autem risum excitans, non nisi benignus esse potest, qualis est sanguis, & risus ipse, seu risibilitas, passio propria hominis est, consentanea plurimum vitæ, & animi hilaritati; unde experimur lætos, hilaresque homines salubriter degere, cunctasque operationes naturales viriliter peragere, ac exercere.

Contrà verò desipientiæ cum studio semper sunt graviores, veluti contrariis ex causis inductæ; Imaginativam enim magnoperè perturbatam designant, atque ab idolis melancholicam, acidamque conditionem referentibus cum timore, ac mœstitia, unde cogitabundi, timidi, tristes, conversationem averfantes, solitarii, & cibum refugientes istiusmodi patientes fiunt, utpote qui humoribus abundant acidis, tartareis, melancholicis dictis, sanguinem figentibus, offuscantibus,

atque in suo motu retardantibus; quamobrem is parte sua florida, vividaque plurimum imminutus, pulsus, cæterasque operationes vitæ necessarias hebetes reddit; indeq; postmodum corporis macies, languor, & ad motum ineptitudo, atq; impotentia exoritur, quemadmodum experimur in delirio melancholico laborantibus, & sive ab hypochondriis, sive à toto corpore, ex congestione humoris melancholici illud proficiscantur, de quo Galen. 3. *de loc. affect. c. 7.*

Longè demum periculosiores sunt desipientiæ cum furore, impetu, & audacia, ut in maniacis, quoniam in his operationes vitales magis depravantur, & humores præsignatur longè pejores, quales dicuntur à Medicis atrabilarii, plurimum à naturali statu recedentes.

Hinc modò admonemur, quibus remediorum generibus ejusmodi desipientias curare debeamus, sive cum risu, sive cum studio, sive cum furore illæ locientur. Etenim licet Hippocrates in hoc aphorismo diagnosis, ac prognosim horum deliramentorum visus sit solummodò referre; voluisse tacitè tamen comprehensas eorumdem curationes, subintelligendus; adeòque majorem diligentiam esse adhibendam in curatione delirii cum studio, aut cum furore, quàm in eo, quod cum risu fit, ut ex superiùs traditis facillimè deducitur, & satis à nobis est explanatum *in parte Medicinae practica.*

APHORISMUS LIV.

In acutis passionibus, quæ cum febre sunt, luctuosa suspiria, mala.

Acutæ passiones non solum hîc intelligi debent, quæ brevî

temporis intervallo finiuntur, sed quæ gravioribus symptomatibus sunt stipatæ, atque adeo à pravis humoribus progenitæ, cum læsione partium principalium ad vitæ tuendam summo perè conferentium. Hinc appositè adjecit Hippocrates, *quæ cum febre sunt*: nam si fortàs se sine febre forent, leviores proculdubio essent existimandæ. Itaque cum febribus conjunctæ egritudines hoc loco considerantur, veluti quæ vitium in sanguine recognoscunt, & cor proximius, penitusque molestant. Hæ namque spiritales partes læsas vel comitantur, vel consequuntur, atque adeo facile possunt luctuosa suspiria excitare, quæ nonnisi ab affecto corde, pulmone, ac pectore, proficiuntur. Luctuosa namque suspiria sunt, quæ fiunt cum interrupto motu thoracis, & respirationis, quemadmodum etiam Galenus *in comm.* memorat, & sæpissimè pueris ejulantibus evenire experimur ob angustiam thoracis, & partium respirationi destinatarum, ut propterea nequeant seipsas tam benè expandere, sicut exigit necessitas Naturæ mœstitia oppressæ, quæ amplificatione cordis, & pectoris vellet melancholicum affectum excutere, & ab opprimente causa se liberare. Cum itaque hæc accidunt acutè laborantibus, & cum febre, proculdubio grave cordis detrimentum arguunt à maligno, cogenteque humore illud comprimente, ut propterea nequeat pro indigentia se convenienter amplificare; unde mala sunt, & quidem tam ratione ipsiusmet Cordis malè affecti, tum ratione humoris tam graviter illud afficientis; quam obrem nonnisi in malignis, ac pestilentibus febribus ista accidunt, in quibus propter sanguinis concretionem potissimum in vasis pulmonum, & quandoque etiam

in arteria Venosa, aut in arteria Aorta, ubi grumuli, hærentesque succi sæpissimè adinventi sunt, cor gravi oppressione afficitur, & veluti à comprimente manu, universa præcordia gravantur, unde pulsus etiam pusilli, intermittentes, ac deficientes exurgunt, ac postmodum interitus, ut in plerisque cadaveribus diligenti anatomica inquisitione sæpè sepius est observatum.

APHORISMUS LV.

Dolores podagrici Vere, & Autumno magna ex parte moventur.

Podagrici dolores, ut aliàs meminimus, à colluvie serosa, & à superabundanti lymphæ in articulos decumbente excitantur: ista autem nedum corpulentia, sed etiam infensa qualitate acri, aut etiam acido-salsa artus ipsos, & adjacentes partes musculosas, itemque tendines, ligamenta, membranas, nervos tumefaciunt simul, & compungunt, unde postmodum tumor, rubor, & dolor acerbissimus. Quoniam verò serosi isti, & lymphici humores superabundare potissimum solent Verno, & Autumnali tempore; idcirco fit, ut per hæc eadem tempora Podagrici dolores infestent: Verno quidem tempore, cum scilicet cumulata per hyemem pituitosa superfluitates, vi postmodum ambientis calidioris diluuntur, & melius fluitant; itemque propter sanguinem in cunctis hominibus vegetiorem, atque etiam velocius excurrentem per arterias, ut indicant pulsus per idem tempus celeriores, vehementioresque: Autumno verò, ex impeditis, detentisque quodammodo sudoribus, qui per æstatem copiosissimi esse consueverant, tum à potibus

tibus largioribus, tum ab esu fructuum immodico, unde excrementa copiosiora fuerant cumulata.

Magna autem ex parte dicuntur per hæc tempora excitari, sive quòd non semper in his temporibus cunctis accidant, sive quòd non solum in æquinoctiis, Verno scilicet, & Autumnali, sed etiam in solstitiis promoveri soleant podagrici dolores: e quidem passim experimur, ejusmodi dolores, aliosque similes, per hæc tempora excitari, fortassè ob mutationem in aere inductam, atque ex illo in humanis corporibus commotionem, cum ex calido in frigidum, vel ex temperato in calidum, & è converso, mutatio fit, ut propterea scripserit Hippocrates 3. *aphor. primo, mutationes temporum morbos parere*; ut alibi etiam à nobis est ostensum. Quantum autem valeant ejusmodi mutationes aeris in perturbandis humanis corporibus, & præsertim iis, quæ valetudine non firma fruuntur, notius est, quam ut hic longiori sermone ostendi possit; etenim præterquamquod aer magnam vim in alterandis corporibus habeat, usu respirationis, etiam simplici suo contactu eadem afficere solet, constipando, aut laxando cutim, ejusque poros diversimodè afficiendo, unde postmodum vel effluvia, quæ perpetim extramitti debent, retineantur, & retenta sanguinem, cæterosque liquores corporis inficiant, vel affluentius exhalantia, eosdem diluunt, & extenuant, unde plus justo dissoluti inhabiles fiant partibus reficiendis, quin potius apti ad easdem perturbandas, alterandasque; quam obrem qui obnoxii sunt doloribus articulorum, facile per hæc tempora illos incurrunt.

APHORISMUS LVI.

In morbis melancholicis cum in hac pericula inciditur, stuporem corporis, vel convulsionem, vel furorem, vel cæcitatem significant.

MOrbi melancholici dicuntur illi, qui ab humoribus melancholicis dictis, seu, ut mavult Paracelsus, tartareis, acidisque progignuntur, & sive isti proveniant à melancholica totius corporis constitutione, & peculiari sanguinis diathesi, sive specialius à mala habitudine viscerum naturalium, quemadmodum in hypochondriacis, & scorbuticis. In his igitur enumerat Hippocrates, quæ mala sint affutura, nisi citò, & opportunè succurratur; siquidem increbescente affectu melancholico, & exuberantibus succis acidis, ac tartareis, facile subindè accidere solent stupor corporis, vel convulsio, furor, vel cæcitas: Stupor, vel convulsio, si repant humores in nervos, hebetatis scilicet, malèque affectis ab acidis succis eorundem fibris, vel iisdem, ab acido vellicante pruritatis; nam 6. *epidem. sect. 7.* dicitur, *melancholici fiunt epileptici, & epileptici melancholici*: Furor verò, si in cerebrum tendant; unde Galenus explanans mox relatum Hippocratis sententiam 3. *de locis affectis*, dicebat: si humor melancholicus vergat in mentem, delirium, vel convulsionem, si verò vergat in corpus, paralysem, vel apoplexiam infert. Denique cæcitas, si in organa visus deducatur, & specialiter in nervos opticos, vel in tunicam retinam, quæ à fibrillis eorundem nervorum ortum ducit.

Quamvis autem hæc solummodò

retulerit Hippocrates, non tamen quis credat alia quoque mala exinde suboriri non posse; nam plures alii similes, affinesque morbi iisdem ex causis supervenire poterunt, pro varia corporum habitudine, ætate, consuetudine, sexu, & prout in has, vel alias partes, fortasse imbecilliores, prædicti humores decumbere possunt.

APHORISMUS LVII.

Apoplexiæ autem fiunt maximè à quadragesimo anno usque ad sexagesimum.

Licet Galenus in commentario non de quacumque Apoplexia scriptum velit hunc aphorismum, sed de ea solùm, quæ ab atrabile dependet, utpote quia *per eam consistentia ætatem atræ bilis humor abundet, quemadmodum & in Autumno*; nihilominus haud negat posse etiam à cæteris succis pituitosis, & crudis per eandem ætatem illam oriri: quin & senes ab his potius, quàm ab atrabiliis, aut melancholicis humoribus apoplecticos fieri alibi etiam pluries edocuit, cujus causa tam acriter in illum invehitur Cardanus, ut totum hujus aphorismi commentarium adversus hoc Galeni placitum conscriptum videatur.

At verò nobis distinguere fas sit, Apoplexias, & alias quidem ætatum defectu, alias humorum vitio, & alias à mala partium cerebri conformatione. Ex defectu ætatis, & ob virium languorem obnoxii magis sunt senes, & provecioris ætatis homines Apoplexiæ, à lymphicis humoribus crassescens, & tenacibus, qui per languidam illam ætatem ex malis coctionibus, ac secretionibus humorum, atque ab effœto, ac vap-

pescente sanguine emergunt, qui deinde cùm per cerebri ambitum, & corticales glandulas facilè hærescant, ac remorentur, adeoque gravent, oppleant, obtundant; Apoplexiam, cæterosque similes morbos inferunt. Et quamvis in pueris ejuscemodi pariter humores videantur superabundare, causa præsertim voracitatis; attamen in illis lymphici isti humores fluxiliores sunt, & viæ molliores, laxioresque, unde facillimè diffillantur, & evaporant, quique per cruditates progignuntur promptè in ductus urinarios, aut intestinorum delati egeruntur, & exonerantur, conferente in hoc idem plurimùm partium omnium mollitie, ac laxitate.

Humorum insuper vitio contingunt Apoplexiæ, sive cùm ipsi plus justo cumulati in cerebri meatibus hærent, & vel gravando, ac opprimendo, veletiam obstruendo motui sanguinis, ac lymphæ impedimento sunt, adeoque excrementorum, sive sensibilibum, sive insensibilibum repurgationi remoram faciunt: qua ratione helluones, ebrii, succipleni, obesi, catarrhosi, alique similes, sæpenumero Apoplectici, aut Carotici pereunt, factaque cadaverum sectione inveniuntur in cerebri anfractibus, & intercapedinibus, feri, lymphæ, aliufve corrupti humoris congestiones. Porro hoc pacto omnes, & quicumque humores gravare, opplere, obstruere, & stagnare valentes, aut etiam reserare, erodere, ulcerare, benè poterunt Apoplexias, cæterosque similes morbos in cerebro parere.

Ex mala denique partium cerebri conformatione, sive à primordiis vitæ, atque ex defectu Naturæ, sive tractu temporis, & ex accidenti morbo, progenita, accidunt Apoplexiæ;

xiæ; fortè quia moles cerebri pusilla, angusta, duriuscula, aliterve malè affecta est; aut etiam ductus, cavitates, pori non convenienter patuli sunt, adeoque arteriolæ, venulæ, & vasa lymphica liberum excursus, recursusque liquidorum non admittunt; unde postmodum interceptiones, occlusiones, obstructionesque, aut etiam diruptiones, erosiones, suppurationes, aliaque hujus generis incommoda suboriuntur. Quò sanè respexisse visus est Hippocrates 4. de ratione victus in acutis 23. dum scripsit: *cum quis repente obmutescit, id venarum interceptiones, occlusionesque faciunt. si sano absque occasione, vel forti alia causa id contigerit*: ubi alia plura in eandem rem accuratissimè observanda proponit. Hoc etiam pacto ligatis arteriis caroticis, aut contusis musculis temporalibus, concussoque cerebro, Aphoniæ, & Apoplexiæ accidunt, mutata scilicet, turbataque partium conformatione. Ex eodem vitio crediderim plerosque ejuscemodi affectibus comatosi natura obnoxios esse, ac repetitis insultibus per intervalla molestari solere, ut tandem ineunte senili ætate ab iisdem pereant; quin & non rarò (Anatome in iisdem instituta) nil quidpiam sensibile extra cerebri ductus inventum est, ut pluries expertum.

Hinc modò putaverim, Hippocratem in hoc aphorismo eas solummodò voluisse Apoplexiarum species recensere, quæ vitio humorum quidem, sed ex mala cerebri habitudine contingunt; fortè quia circuitus humorum, facilè per ætatem juvenilem fermentescentium, largam, promptamque vasorum expansionem, juxta naturam indigentiam nactus, superveniente ætate consistenti, à fibrarum, & membranacearum partium duri-

tie sensim, sensimque inducta, ejusmodi amplificationi non facilè deinceps obsequuntur; unde in plexibus cerebri, meningibus, lymphicis ductibus, cæterisque, quacumque de causa circumeuntes humores hærent, aut irruptione, impetuque facto in apicibus eorumdem, tenellàs illas partes delaxant, & aperiunt, vel tumefaciunt, opplent, aggravant, prout acor in illis inductus major, vel minor extiterit, adeoque obstructiones, interceptionesque; aut erosiones, & diruptiones inferunt planè inemendabiles. Procedente verò ad senium ætate, quia nîsus ille, & motus fermentativus in humoribus tractu temporis lentescit, propterea nec vehementem commotionem, nec urgentem impetum in iisdem excitat: id quod sanè ostendunt manifestissimè pulsus, per hæc eadem tempora tardi admodum, rari, & imbecilles: quamobrem licet sopores, hebetudines, languores in provectiori ætate contingant; haud tamen veræ Apoplexiæ dicendæ sunt, veluti ab ipso ætatis decrepitæ languore, & virium, ac sanguinis labefactione dependentes; collabente, videlicet sensim natura ex defectu spirituum, ac excrementosorum humorum ingluvie, quocirca soporati potius, & comatosi, non verò Apoplectici illi pereunt.

Quamvis autem Hippocrates hic dixerit à quadragesimo ad sexagesimum usque ad annum Apoplexias fieri, non tamen exinde putandum, intra hoc solummodò temporis interstitiū illas accidere posse, cum & ante, & post ejusmodi tempora, benè adhuc possint evenire: si nimirum aliunde causæ illas inferre valentes suppetant, quandoquidem unicuique perspectum est, omnes morbos cunctis ætatibus accidere posse, si causæ vel externæ, vel internæ, aut ex defectu

V. Gal. & Valles. in commet. hujus loci.

V. Hipp. 1. 2. & 3. de morbis.

naturæ, aut ex aliquo quovis accidenti supergredientes, salubrem, convenientemque corporis œconomiam turbent, ac depravent. Hinc non immeritò adjecit adverbium illud *maximè*, ut nimirum indicaret non omninò, & per eam dumtaxat ætatem Apoplexias evenire; sed magis solum, seu plerumque per illam; licet in aliis quoque ætatibus fieri queant, esto alius generis morbi, quam veræ Apoplexiæ.

APHORISMUS LVIII.

Si Omentum excidat, necessariò putrescit.

Id ipsum scribitur primò de Morbis, & in Coa. præn. unde hic aphorif. transcriptus.

EXcidere Omentum idem est, ac extra peritonæum, & abdomen, cum fortassè vulnerata sunt, egredi, ac prolabi, adeòq; ambienti frigido exponi: cum enim Omentum multò adipe, atq; innumerabilibus glandulis refertum sit, facillimè ambienti aeri expositum, alteratur, & livescit, adeòq; nullo negotio, ac brevissimo temporis intervallo, putrescit; idque potissimum, cum ex vulnere adeas partes inflicto, & sanguinis profluvio, illæ viribus fatiscunt, & elanguent, ac præsertim Ventriculus in suis coctionibus obeundis; quandoquidem ex observatione Galeni 4. *de usu partium cap. 9.* multum ad ciborum confectionem, chylicationemque conferat, ut in gladiatore illo ibidem memorato, cui omentum abscissum fuerat, compertum refert.

Ex hoc autem Aphorismo mone-mur, cautos, sollicitosq; oportere esse Medicos in illius extra abdominis regionem prolapsu, ad statim, nulla-que data mora reponendum; sin se-cus rescindendum potius, ne putrefactioni subiiciatur; cujus repositio-nis, aut resectionis modum edocent

Celsus *lib. 7. c. 21.* itemq; Galenus *lib. 6. meth. c. 4.* Paulus *lib. 6. c. 52.* & Fabri-tius *ab Aquapendente lib. 2. c. 45.* alii-que. Atqui non rarò etiam contigit à perita adhuc Chirurgi manure-positum periculo non vacasse, & computruisse; quandoquidem tam levis, & mollis texturæ est, ut ne tantillum è sua sede dimotum, atq; ambi-enti aeri expositum, livorem, & putrefactionem incurrat.

APHORISMUS LIX.

Quibuscumque à longo coxendicum dolore molestatis, cavitate sua excidit coxa, & rursus recidit, iis mucres superveniunt,

&

APHORISMUS LX.

Quibuscumque à coxendicum dolore diuturno molestatis excidit coxa, iis crustabescit, & claudicant, si non curantur.

HUnc Aphorismum sexagesimū non debere à superiori sejungi edocet *in comm.* Galenus, sed ipsum omninò esse cum præcedenti jungendum, ut unus sermo continuatus sit: quasi dicere voluerit Hippocrates à coxendicum dolore molestatis, ubi per mucoris multitudinem articulus excidit, & rursus recidit, necessariū esse, processu temporis os ipsum contabescere, & patientem claudicare, nisi, quam citò fieri possit, mucor ille absumatur, & exsicceetur; quemadmo-dum idem Hippocrates *l. de articulis* faciendum consulit in brachio jugiter excidente: quod & Arabes scrip-tores quoq; omnes admonēt peragē-dum vel igne *actuali*, & ferro cāden-ti, vel *potentiali*, opem medicamentorū causticorum, & per emplastra pica-

ta, quas uestiones Arabicas Moderniores appellarunt; juxtà illud ejusdem Hippocratis: *Qua medicamentum non sanat, sanat ferrum, qua non sanat ferrum, sanat ignis.*

Et quidem considerata ossis coxendicis cum osse sacro articulatione, facile est, ut quisque sibi persuadeat, crassos, mucososque succos eo loci, ubi coxa exciderit, colligi, & adunari posse, quique postquam obduruerint, & calli ferè conditionem fuerint adepti, difficulter discuti, aut exolvi poterunt, quinimò extra suam sedem caput femoris sursum protrudent, impredientque, nec cavum ossis sacri denuò ingredia-
tur, quamobrem claudicatio sequetur, contractis subinde, decurtatisque, tum crure, tum tibia ad usque pedem. Nec absre dictum, ac repetitum: *Cavitate sua excidit coxa, & rursus recidit*; quoniam non satis est coxam excidisse, sive è sua sede dimotam esse, sed oportere pariter recidere, si fortassis aliqua industria, vel sponte sua, commissa fuerit; siquidem tunc signifi-

catur cavum illud ossis à confluxu humorum præsertim lymphicorum repleri, vel saltem à luxatione, relaxationeque ligamentorum, & tendinum stare firmiter non posse, sed facillimè à cavitate illa desciscere, quam proinde lymphici humores occupent, & in mucos, tenacesque succos, data mora, convertantur, unde nequeat in posterum os femoris cum osse sacro còvenienti articulari.

Nedum autem exinde claudicatio, sed & tabes cruris quoque succedet, nisi per uestionem mucosi illi humores absumentur, quoniam læditur subinde non solum conveniens partium illarum dispositio, ac structura, ut pronide alimentum pro earumdem nutritione, vel in alium humorem degeneret, vel non apponatur, aut omninò deficiat; sed etiam membranule circumamicientes ossa, & medullaris illa substantia, quæ cavum femoris occupat, malè afficiantur; quocirca tabes postmodum, languor, dolor ad usque genu in periostiiis, musculis, nervis, cæterisque suboriuntur.



LUCAE TOZZI

In Septimum Librum Aphorismorum

HIPPOCRATIS COMMENTARIA.

APHORISMUS PRIMUS.

In morbis acutis frigus partium extremarum, malum.



Orbis morbos, & accidentibus accidentia, five in bonum, five in malum supervenientia, quæq; ex uno in aliud vicissim permutantur, considerata in hoc ultimo Aphorismorum libro proponit Hippocrates; qui propterea vagus, atque indiscriminatim varia comprehendens, neque certum ordinem, neque continuatum nexum in iis servat. Initium autem facit ab extremarum partium frigore cunctis morbis acutis contingente, quod nocuum generaliter pronunciat.

Quamvis autem hic cum 48. *quantum* (ubi in febribus non intermittentibus interiora uri, & exteriora frigere, lethale dixerat) multum convenire videatur; revera tamen omnino distinctus ab illo est; siquidem ibi speciatim in febribus, hic verò in morbis universaliter acutis, nulla interea de interiorum ustione, ac siti, mentione facta, sed solius frigoris partium extremarum meminit, ut propterea non penitus le-

thale, sed malum simpliciter protulerit. Neque insuper in eorum sententiam iverim, qui cum Galeno adhuc de acutis febribus dictum hoc interpretantur ex viscerum inflammationibus, quoniam tunc planè exitiosum omnino est, & morti proximum, ut etiam in *Coacis prænotionibus* adnotatur, cum tamen hic solummodò scribatur *malum*. Rectè proinde Celsus *lib. 2. cap. 4.* hanc sententiam ab illa sejungens, neque interioris incendii, neque urentis sitis mentionem faciens, extremarum dumtaxat partium frigus commemoravit, & mali morbi signum in acutis dixit.

Et quidem frigus partium extremarum cum incendio internarum partium, atque ingenti siti, veluti ab inflammatione interna procedens, facile in gangrænam vergente, lethale signum omnino est; at verò citrà internorum viscerum ardorem, & sine ulla inflammationis suspitione, provenit solum ab hebetato, & lentescente sanguinis motu, qui per angustos extremarum partium meatus progredi non potens potius in iis concrevens adhæret, quàm ut porulos earundem pervadens, exangues illas partes irradiet, & calefaciat; unde non rarò etiam liventes illæ comparere so-

solent; ejusmodi autem sunt aures, nares, manus, pedes, & quandoque etiam universa cutis, quæ ambienti quocumque modo exposita sæpissimè horrere solet. Addidit autem *in acutis*, nam illas in longis, diuturnisque ægritudinibus frigere non adeò præter rationem videtur evenire; quamobrem rectè Galenus *in comm.* inquit: *in morbis diuturnis, qui præsertim sunt sine febre, & hyeme, & ætate senili, partes extremas corporis, veluti nares, aures, pedes, & extremas manus frigidas fieri, nihil mali; præsertim quia diuturni morbi, (præter corporis languorem à morbi diuturnitate contractam) non nisi à crassis, lentis, frigidisque succis progignuntur. At verò acuti pro causis, tenues, mobiles, & calorem excitantes humores recognoscunt; unde in illis frigus persentiri dissentaneum omninò est, ideòque malum, & longè gravius, ac periculosius livore conjunctum. Verumtamen frigus istud partium extremarum perseverans esse debet, ut omninò malum sit, nam si fortassè ad modicum tempus appareret, & deinde sponte sua, calefactis partibus iisdem, desineret, quemadmodum inter initia tertianarum, & quartanarum febrium experimur, dubiò procul nihil mali præfagiret, quod tamen pessimum foret, si per omne tempus perduraret, & partes ipsæ ab admotis calorificis nullatenus recalescerent; quod & longè adhuc gravius, si cum madore cutis frigus societur.*

APHORISMUS II.

In osse agrotante caro livida, malum est.

Livor in quacumque parte comparens, nedum frigoris, sed mortificationis, & gangrænæ præsentis, vel imminētis indicium est; cum igitur in osse agrotante, idest læso, contuso, vulnerato, caro superincumbens, vel circumsepiens livida fit, ipsum à suscepta læsione corrumpi quoque conjectandum. At non ideò, quia caro livescit, ipsum corrumpi dicemus, sed potius, quia ipsum à læsione corrumpi contingit, caro livescens apparebit: sæpè enim in gangrænâ caro livida, & omni sensu orbata percipitur, nullo interea in osse vitio existente, idcirco appositè adjecit Hippocrates *in osse agrotante caro livida*. Sed & neque solum caro si liveat in læsis ossibus, verum etiam si albicet, si flaccescat, si ichorem saniosum, & foetidum fundat, si sponte sua sejungatur, & subjecto ossi minimè inhæreat, id ipsum arguit: quamquam in his dijudicandis, internoscendisque sagax, & accurata Chirurgorum diligentia multum valeat; siquidem non rarò fit, ut à contunden- te corpore cutis externa solum liveat, nulla interius inducta in osse læsione.

Livor autem, à contusis, vulneratisque ossibus, in carne circumjacente, vel superincumbente, provenit à liquore in nutritum ossis transmutando, qui cum in partibus circumjacentibus remoretur, & stagnet, atque lamellæ ossium externæ quodammodò à reliquis interioribus dissociatæ, immò & periostrium, quo ipsæ amiciuntur, in suis filamentis,

& lo-

& oculis distractum, fauciatumque sit, propterea partes subjectæ rorido, vivificanteque spiritu destitutæ, sensim languescunt, & ferè emoriuntur, unde postmodum corruptio, & putrilago, quæ sensim quoque in adjunctas carnes serpit, & livorem, sphacelum, ac gangrænam parit, simili modo, ac in remorante, hærenteque in poris carniū sanguine contingit; atqui facilius gangræna, & mortificatio accidit in membranæ ossium, quàm in carnibus, tum quia illæ exangues sunt, tum quia spiritu valdè tenui irradiantur, tum quia glutinosum quid magis, facileque coagulabile suscipiunt, quod acore hebetatum, & alkalino spiritu depauperatum, indomitumque redditum, tandem frigefacit, & mortificat. Hinc experimur gallicas exostoses ab acido illius luis miasmatis nimium infensas ossibus evadere, corrodendo, frangendo, & terebrando, ut illa penè friabilia reddantur. Expedit itaque in ejusmodi livoribus ad carnes circumstantes apparentibus, statim subjectum os detegere, & qua parte squamosum, rima affectum, aut aliter læsum apparuerit, abradere, ac desquamare, vel etiam urere, & removere, si opus fuerit, ut in posterum meliori alimento reliquum restauretur, & subsistet, ut ex praxi Chirurgica satis notum.

APHORISMUS III.

Avomitum singultus, & oculorum rubor, malum.

PER vomitum solent humores nedum per ventriculi cavum innatantes, sed ejus tunicis hærentes, aut aliunde confluentes, salubriter evacuari, qui propterea salutaris

pluribus in ægritudinibus observatur, quinimmò à plerisque, statis quibusdam temporibus, gratia præservationis salubriter instituitur, quemadmodum ab Ægyptiis singulo quoque mense factitatum refert Herodotus *lib. 2.* Si qui igitur prodesse consuevit, obsit, singultum potius afferens, atque oculorum ruborem, symptomata cæteroqui gravissima, malus planè, & perniciosus censendus est.

Singultus siquidem ad classem convulsionum non irrationabiliter reducitur à Galeno, adeoque semper humorum acritatem, malignitatemque, nervos vellicare, ac lacerare valentem, pro causa recognoscit, ut aliàs ostensum; oculorum verò rubor (si tamen perseverans, nec subito disparsens sit) meningum cerebri, quibus oculorum orbitæ componuntur, inflammationem significat: utrumque autem vomitui, unde emolumentum non leve toti corpori accedere sperabatur, supervenire, proculdubio malum est.

Num autem utrumque simul oporteat supervenire, an alterutrum tantum, dubitari potest; præsertim quia Celsus disjunctim illorum meminit *lib. 2. cap. 4.* sententiam hanc Hippocratis ita in latinum vertens: *mali morbi signum est, aut post vomitum singultum esse, vel rubere oculos.* Et quidem ipse crediderim fuisse utrumque; hic consultò ab Hippocrate memoratum, ut certius de mala prognosi judicium ferri posset; nam etsi singultus solus si superaccidat, malus sit, veluti nervorum per ventriculum serpentium læsionem designans, & potius à prava humorum conditione proveniens, quàm ab eorundem multitudine, quæ saltem magna ex parte ina-

inanita per vomitum existimanda est, nihil tamen minus si cum eodem oculorum rubor pertinax, & durabilis conjungatur, longè magis illorum malitiam adauget, ut potè quæ cerebrum, ejusque meninges in consensum trahere potuerit, & præter irritationem, corrugationemque fibrarum nervearum, atque angustiam meatuum sanguiferorum, etiam phlogosim, aut inflammationem in iisdem excitare. Porro per vomitum præsertim violenter promotum, non solum ventriculus ipse, propter sui inversionem, cum stomacho graviter contorquetur, & affligitur, sed etiam septum transversum, thorax, aspera arteria, oesophagus, jugulum, facies, & caput universum moleste admodum afficitur, impediturque non leviter in his omnibus sanguinis reditus per venas, qui impetuosius per arterias, stante illo per vomitum conatu, sursum appellitur; unde non mirum si oculi, & vultus impensè rubeant, qui tamen sponte sua à vomitu sedari solent, si is benè cesserit; secus verò, si vitium in humoribus, atque in ipsamet textura ventriculi profundius recognoscat, ut interiorē ipsius membranam, & nervos coarctatos arguat. Hinc cautos esse oportet eos, qui ad vomendum inepti, vel in partibus thoracis, & capitis malè formati, crebris vomitionibus se subiiciunt; quoniam facile ejuscemodi pericula subeunt. Ceterum licet Hippocrates *malum*, hinc tantummodò dixerit, non tamen istos ab initio immunes putarem, si alia subinde concurrerent virium languorem attestantia.

APHORISMUS IV.

A sudore horror, non bonum.

Licet sudor totius corporis evacuationi credatur, proximè tamen glandularum subcutanearum humores exhaurit; qui cum à lymphicis derivent, & isti à sanguine, propterea ab unius exoneratione, reliqui successivè diminuuntur, & tandem sanguis ipse, immò & universum corpus, communione illa cum partibus reciproca, repurgatur, & impuritatibus inanitur; quamobrem à Medicis evacuatio hæc universalis dicitur, & morbis ferè omnibus indifferenter conducibilis. At verò, ut omni ex parte proficiat, non solum exigit, ut è toto corpore faciliter prodeat, & calens sit, sed etiam, ut levamen ægrotanti afferat, & ab ægritudinibus solvat, vel saltem temperet; unde si fortassè non allevet, sed aggravet, immò symptomata nova inducat, vel præterita excitet, proculdubio indicium non bonum erit, quoniam ex eodem Hippocrate: *Decretoria non decernenti a partim lethalia sunt, partim difficilis judicii*. Quamquam autem multa alia pessimi indicii mala sudorem subsequi possint, meminît tamen hic speciatim Hippocrates *horroris*, seu potius horripilationis, quæ sanè sæpè sæpius illi succedere solet: nam cum, ut dictum, sudor proximè à glandulis subcutaneis emanet, si fortitan is per cutim sensu præditam excurrens, a core vitiosus, & glutinositate hærens, porulis ejusdem impingatur, & ab ambiente magis, magisque recrudescat, ac figatur, proculdubio eamdem vellicans, & compungens, horrorem, aut horripilationem incutit, quinimò, rigescen-

te corporis habitu, humores ad glandulas è partibus internis commoti, repelluntur, & intrò remeant, unde postmodum incommoda majora, & præsertim si id accadat ex sudore manante in febribus, quo tempore speratur crisis; tunc enim nedum priorem morbum non tollit, sed potius novum, & pejorem accessit, elanguente interea Natura, ac infractis per sudorem viribus. Hinc in multis ægrotis *epidemiorum* Rigor, aut Horror post sudorem vel lethalem, vel longum saltém morbum præmostravit. Verùm debet horror hic à sudore supervenire; nam si fortassè præextiterit, ut inter initia febrium intermittentium, malus omninò dicendus non erit, veluti initiantis futuræ febris prodromus.

APHORISMUS V.

A furore difficultas. Intestinatorum, vel aqua intercus, vel mentis alienatio, bonum.

V. etiam Hipp. lib. de inter. affect. **E**tsi non rarò morbus morbo succedens majorem malitiam arguat, & extremum Naturæ languorem, quæ proinde debilis reddita cuicumque deinceps incommodo succumbat, solent tamen aliqui alios pejores solvere, & è gravioribus principes partes occupantibus, liberare, aut saltem in leviores, magis domabiles, aut in longius tempus protrahendos commutare. Debent autem isti adjunctam semper habere materiæ peccantis evacuationem, vel saltem decubitus in partem minùs nobilem, quemadmodum in hoc aphorismo Hippocrates memorat de Furore in dysenteriam, vel hydropem, aut etiam mentis alienationem commutato. Cùm enim humor fu-

rorem, & maniam in Cerebro efficiens, aliò transfertur, & per Intestina, veluti per communem corporis cloacam foras educitur, etsi vellicando, & abradendo, dysenteriam in illis excitet, attamen quia è cerebro deponitur, & maniam delet, omninò salutaris censenda est, tum ratione humoris peccantis excreti, tum ratione loci à parte affecta remotissimi, quamquam in ratione modi convenientis deficiat. Atqui potest etiam furor, & mania desinere, si ex humore in hypochondriis commoto cerebrum in consensum trahatur, cujusmodi plerique Maniaci per intervalla furiosi, certis dumtaxat temporibus, perturbantur, & impetunt, siquidem in his necesse non est, ut vitiosus humor cerebrum sua corpulentia occupet, sed satis est, si plexum nervorum in mesenterio, aut diaphragmate situm, afficiat, & fibrillas eorundem extorquendo, in cerebri medullium definat, ac talem commotionem excitet, ut phantasmata rerum confundat, ac perturbet. Sed & Ecstasim quoque, seu mentis alienationem, non dissimiliter parere potest, deturbata materia in fibras nervorum, vel etiam vaporibus Cerebro perfuso, quò pacto de humore melancholico acido aliàs dicebat Hippocrates, & cum Hippocrate Galenus, si is nimirum in mentem vergeret, fieri melancholiam, seu delirium melancholicum. Inde enim mania remittitur à continuitate, quia per Ecstasim interrumpitur, & attenuata materia in halitus, & vapores, faciliùs mox mox penitus sit exolvenda: constat autem, fixos, hærentesque succos perpetim molestantes, benigniores evadere, si loco moveantur, & attenuentur, ad eòque mitiùs affligant, & per intervalla;

valla; ut & contra acres, tenues, mobiles, si crassescant, & consistent, plerumque commutantur in melius, resolutis tenuioribus partibus, & subactis, concretisque crassioribus, atque adeò non tam vehementer ferientibus, & perturbantibus, quemadmodum de phreneticis factis comatosis dicitur *primo prorrheticorum*, consumpta scilicet parte humoris tenuiori, & relicta crassa mitiori. Commutari verò potest Mania in Hydropem, si humores illi in hypochondriis stagnantes, & nervos extorquentes, cum phantasmatum perturbatione, locomoti, & inter cavitates imi ventris à nervorum plexibus sepositi, ipsum tumefaciant, & hydropem efficiant, atque hac de causa mania opitulentur. Nisi etiam fieri contingat, ut melancholici, acidique succi maniam inferentes, in serosiores diluti salino-acidum ex parte dimittant, & in cavum ventris confluentes aquam intercutem inducant: quippè novum non est, melancholicos, acidosque humores facile commutari solere in aqueos, & serosos, immò maximam inter utrosque analogiam inesse, ut ab Hippocrate docemur, & constat ex Pancreatis liquore per ductum Vvirsungianum in gracilia intestina derivantem. Ab his autem supervenientibus mania symptomatibus, licet bonum dixerit Hippocrates, non tamen simpliciter tale intelligendum est, sed comparatè solùm ad Maniam, & cum criticorum motuum rationem sapiunt, nam si fortasse unum, aut alterum ex his superveniret, nullatenus interea definente, aut mitesciente Mania, proculdubio gravius esset; siquidem unum alterum non deleret, sed potius augeret. Sic pariter humores aliò translati, si tenaciter ibidem hære-

rent, ac consisterent, morbum solummodò in alium morbum commutarent, æquè periculosum, uti sunt Dysenteria, & Hydrops, & sua etiam ex parte Ecstasis, quæ planè ægritudines sunt non minùs, quàm Mania lethales, quinimò sæpè perniciosiores, ac breviores. Debent itaque ejusmodi humorum Maniam inferentium motiones criticam conditionem referre, ut ex his illi, vel extra corpus, quàm citiùs expellantur, ut in dysenteria, illæsis interea intestinis; vel aliò sepositi ignobiliores partes occupent, deferentes nobiles, sintque mox etiam facile egerendi; vel denique in se ipsis intranea commotione subacti malitiam deponant, & mitiorem nanciscantur conditionem, ut in Ecstasi.

APHORISMUS VI.

In morbis longis ciborum fastidium, & dejectiones syncerae, malum.

Quoties morbi spatium quadraginta dierum transiliunt, & ulterius progrediuntur, ex acutis fiunt chronici, seu longi, potissimum ex humoribus lentis, crassis, & hærentibus progeniti, vel etiam in locis stagnantes, ubi difficulter fermentationi, & secretioni subiciuntur, sed potius impacti tenaciores evadunt, & veluti gypsei, quemadmodum in glandulis, & articulis, si præsertim viribus infractis langueat Natura, & sanguis, ac viscerum fermenta, suo spiritu alkali no destituta, inertia prorsus evaserint. His ergo si fastidium ciborum, nausea, & inappetentia superaccidat, malum erit, tum quia præ longitudine, effæctis omnino viribus, per alimenti carentiam, facile est, ut Natura penitus succumbat, & con-

concidat, antequam morbus finiat, tum quia, à ciborum fastidio, & nausea stomachicum fermentum valdè languidum, & ineptum indicatur, & quod gravius, nec à sanguine, cæterisque liquoribus similiter effœtis, ut decet suggestibile, ut proinde, etiam si vi, & conatu cibi resumptivi ingerantur, ob illorum inertiam corrumpantur potius, & degenerent in excrementa, magis magisque cumulantia materialem causam chronicitatis, unde etiam dejectiones synceræ prodeunt. Quamobrem non absre Hippocrates utrumque symptoma conjunctim in hoc aphorismo proposuit, quoniam vix fieri potest, ut unum sine altero habeatur. Dicuntur autem synceræ dejectiones, quæ uniformes sunt, & impermixtæ, æqualiter fermenta viscerum malè affecta significantes, ut ejusdem languoris, tam quod in stomachum derivat, quam quod per confluentes succos, intestinorum excrementorum repurgationi famulatur, vitium denotet, proindeque uniusmodi, & homogeneæ conditionis alvi dejectiones efficiat, sive illæ hunc, aliumve colorem referant, à prædominio unius, vel alterius succi depravati cum cibo commisti. Hinc & flavæ, & virides, & pallidæ, cibales, & humorales, aliæve esse possunt, quas propterea generaliori nomine voluit Hippocrates synceras appellare. Cæterum esto alterum horum symptomatum satis etiam attestari possit de malo morborum chronicorum eventu, cum illis superacciderit, juxta ea, quæ Celsus *lib. 2. cap. 4.* sententiam hanc inter sua prognostica referens, commemoravit; crediderim, tamen voluisse Hippocratem utrumque hoc loco jungere, ut certius mali morbi testimonium desumatur; præterquam quod

difficile admodum sit, ex uno alterum non esse consequuturum, si præsertim ciborum fastidium cum nausea, inappetentia, & mala assumptorum digestionem, jungatur, ut sæpius accidit.

APHORISMUS VII.

Ex multa potatione rigor, & desipientia, malum.

MAla ex ebrietate provenientia, tum mentem, tum corpus plurimum turbantia, nemo est qui non sciat; & quidem ex his alibi dixerat Hippocrates subsequenter ab ebrietate aphoniam, convulsionem inferre, ac postremò mortem, nisi illam febris præverteret; nunc alia memorat ex multa potatione symptomata, & prognosim inde faciendam: & quamvis potationem simpliciter recensuerit, nulla facta liquoris potabilis mentione, non est tamen, ut ambigamus, de alio ipsum, quàm de vini potu sermonem habere voluisse, ut Galenus exponit, & cum eo reliqui omnes Interpretes conveniunt; nam à nullo alio liquore in usum potus deducto Rigorem, ac Dementiam proficisci posse, res in comperto est. Itaque ex nimia solùm vini potatione, seclusa tamen temulentia, ac ebrietate rigorem, & desipientiam supervenientem, malum esse inquit. Quoniam verò hominum industria factum est, alios æquipollentes liquores pro vino fuisse excogitados, qui cum immoderatiùs fuerint epoti, paria incommoda inferant; id ipsum idcirco de iis intelligendum suadent, quod à larga vini potatione hic est animadvertendum, cum non dissimiliter Cerebrum, & nervi malè afficiantur à vino, quàm à cerevisia, & zitho, cæteris-

terisque artificialibus potibus vinosis, qui identidem cerebrum vaporibus opplent, & offuscant, acoremque fecilè redolentes, nervos, nervorumque fibras vellicant, & extorquent, immò spiritus animales acres, & tumultuarios progignunt.

Incuitur autem exinde Rigor concussione in iisdem inæqualiter excitata ab acore ipso irritante, & à natura impellente per contractionem, corrugationemque earundem partium nervearum: Desipientia verò à turbata fibrarum dispositione, & spirituum animalium violenta commotione, qui nimirum à potu meri largiore turgentes, & efferi, immò confertiores, mobiliiores, & acres reddit non suaviter, & blandè irrigando, ac leniendo fovent, sed contrà impetenter irruendo, omnia conturbant, irritant, & exagitant; unde postmodum delirium. Junxit autem utrumque non inconsultò Hippocrates, ut malum exinde rationabilius prædici queat, quoniam per rigorem, malum in nervis, & fibris membranarum; per desipientiam verò damnum in spiritibus, & in mente, cerebrique substantia portenditur, quæ sanè quantum faciant ad vitæ tuitionem, nemo est, qui nesciat.

Haudquaquam autem hic reticebo, quod à bibacibus quibusdam in usum inter epulas, ne temulentiam incurrant, ac pro more largissime bibant, inventum est, vinum etsi potentissimum, saccharo commiscere; ita enim confitentur illud minus, immò nullatenus, inebriare, fortè quia per sacchari mistionem ejus spiritus inspissantur, & dulcore coerciti, coarctantur adeò, ut propterea minus, vel nullimodè cerebrum feriant: qua etiam ratione fit, ut vinum, colatum dictum, seu

Tozzi Op. Med: Tomo IV.

non fermentatum, aut etiam mustum ipsum, paucissimos, ac inertes admodum spiritus per destillationem emittat, ac largius adhuc potum minimè inebriet, licet ventrem inflat, & in ingentes flatu erumpat.

Postremò notatu dignum est, Rigorem non rarò ex largo quoque Aquæ gelidæ potu supervenientem imminentis morbi esse solere prænuncium. Novi siquidem virum sobriè, modestèque viventem, qui cum à potu aquæ frigidæ, etiam à prandio, vel coena, rigeret, futuram sibi prædicebat infirmitatem, potissimum à stomacho, vel imo ventre procedentem, & multoties adhuc cum febre: fortè quia infracta, vel deficientia Ventriculi, & Intestinorum fermenta, ab aquæ potu languidiora reddita, chylosim non benè moderabantur, nec melius excrementorum alvi repurgationem, unde postmodum febris, & alia ventris incommoda.

APHORISMUS VIII.

A Tuberculi introrsum ruptione, virium dejectio, vomitio, aut animi defectio fit.

Accidentia à Tumoribus internis disruptis exorientia hic ulterius memorat Hippocrates, atque prognosim ex iisdem recenset, quam malam, & infaustram ait, si subinde vomitus, animi defectio, aut exsolutio consequantur. Hinc prognosticus est præsens Aphorismus, & summo perè in praxi Medica utilis.

Tumores in humano corpore progigni, nedum externos, sed etiam internos, & ratio manifestissima suadet, & experimenta plurima ex dissectorum cadaverum observationibus certocertius attestantur. Eos

R

autem

autem non solum in viscerum parenchymatibus, Jecore, Liene, Renibus, Utero, verum etiam in glandulis, quibus totum ferè corpus constructum, contextumque est, tum maioribus, & conspicuis, tum etiam parvis, & inconspicuis, ac solo microscopio observabilibus, cunctis planè in confesso est, adeò ut plerique, nec sine firma, constantique ratione arbitrentur, rarò febres acutas, aliasque graves, & calamitosas ægitudines accidere, quæ ingenitum tuberculum comitem non habeant, vel pro causa, sive efficiente, sive fovente, non recognoscant. Quò sanè videtur Hippocrates respexisse, cum dixit, omnes morbos vel ulcus esse, vel ulceris conditionem præferre, ut alias inuimus.

Quoties autem accidit, interiùs genitos Tumores suppurari, ac postmodum dirumpi, nisi promptè materia suppurata exitum habeat, necesse est alicubi deponi, ac hære; & quidem si in glandulis, quæ uti spongiosæ faciliè quoscumque humores excipiunt, facillimè corruptionem inferet, & symptomata planè exitiosa; si verò in Ventriculum feratur, vomitum excitabit, si in Thoracem, & Pulmonem, tussim, anhelitum, suffocationis periculum, & quandoque etiam animi defectionem; si in Intestina, diarrhæam, vel dysenteriam, si in Abdominis cavum, hydropem; si in Renes, aut Vescicam, stranguriam, dysuriam, ischuriam, sicque deinceps alia, & alia incommoda pariet, prout in unam, vel aliam partem abscedet. Ex his autem speciatim memoravit Hippocrates virium exsolutionem, vomitionem, & Animi defectionem, quæ videntur esse symptomata specialiora diruptionis, ad cavum thoracis, & præcordiorum pertinentia, unde

gravius timere sit vitæ periculum; siquidem quæ sit ad Intestina, Renes, Vescicam, & Abdomen leviùs præ cæteris vitam incommodat, etsi etiam mala sit. Silentio autem prætermisit Hippocrates prognosim, quam in cæteris antea præsignaverat, fortè quia implicite in his continebatur, vel faciliè ab iisdem deduci poterat; quamobrem rectè Mercurialis *hoc loco: sat fuisse:* inquit, *dicere, fieri, cum sint semper perniciofa quomodocumque fiant: sunt enim hæc omnia mala, si separatim, & multò magis si conjunctim capiuntur; tum quia significant magnitudinem tuberculi, & pravitatem illius materiae locique, ad quem missa est, præstantiam; tum quia cuncta hæc tria symptomata tam per sese, quam consecutivè, unumquodque separatim, vires magis atterit, atque alios graves affectus producere potest.* Quin & grumi sanguinis ex rupto apostemate, ulcus ipsum fordidum, faciliè in gangrænam terminandum, continuus per eas partes humorum effluxus, fistulæ, cuniculi, aliaque plura, quæ supervenire solent, vitæ periculum adaugent. Quibus omnibus unica spes est evadendi per iteratas potiones vulnerarias, adjecto spermate ceti, mumia, extracto hyperici, aliisque similibus, ut ex praxi.

V. Hæmorrhagium
hoc loco.

APHORISMUS IX.

A profluvio sanguinis desipientia, ac convulsio, malum.

EX sanguinis fluxu convulsio-nem, aut singultum consequentem malum esse scripsit Hippocrates 5. aphor. 3. nunc addit etiam desipientiam; unde propterea crediderim se junctim unum ab altero, si hæmor-

hæmorrhagiæ superveniat, malum portendere; quamvis Celsus *lib. 2. cap. 8.* utrumque sociaverit; & quidem convulsio sola, aut sola desipientia satis, superque mali morbi testimonium esse possunt, cum cerebri, & nervorum læsionem arguant, quæ, sua natura, inala semper est. Quod si præterea simul unà copulentur, multò magis deteriora erunt; quare idem Celsus utrumque conjungens, non solum *malum*, sed *mortis periculum*, adjecit. At verò hæc non dixit Hippocrates supervenire posse cuicumque sanguinis evacuationi, sed illius profluvio dumtaxat, seu largæ, & copiosæ hæmorrhagiæ, de qua etiam meminerat cit. *lib. 5. aphor. 3.* nam si modicè sanguis fluat, fieri proculdubio nequit, ut desipientia, vel convulsio sequatur, quinimò sæpius accidit, ut sanguis moderatè, præsertim per nares, vel per hæmorrhoides, profluens, multum levaminis afferat ægrotantibus, ut etiam ex pluribus locis Hippocratis deducere est. Num autem de sola narium hæmorrhagia dictum hoc retulerit, an etiam de aliis aliarum partium evacuationibus cruentis, licet dubitari possit, probabilius videtur de quocumque sanguinis exitu immoderato, è quacumque parte prodeuntis, voluisse intelligendum, cum ab omni sanguinis immodica evacuatione Cerebrum præ cæteris visceribus magis afficiatur, & langueat, attenta præsertim ejusdem conditione, licet quæ è naribus procedit proximè cerebrum debilitet, qua de causa non solum malum esse indicium censuit Celsus, sed etiam exitiosum dixit *c. loco*. Desipientia autem, seu dementia, quæ hic notatur, ea videtur potissimum intelligenda, quæ

stuporem, stultitiam, & sensuum omnium hebetudinem significat, ut in mentecaptis, ob ingentem virium, præsertim animalium, jacturam.

APHORISMUS X.

Ab Ileo vomitus, singultus, desipientia, vel convulsio, malum.

Ileos, latinè Volvulus, est morbus, in quo, nil quod supernè assumptum est ad inferiora, & ad alvum descendit, sed potius sursum resolvitur, & per os regeritur, obstructo, constipatoque, aut etiam contorto, atque inflammato intestino Ileo, à quo morbus ipse nomen desumpsit. Quamquam autem Intestini hujus affectionem specialius morbus iste volvulosus comitetur, aut consequatur, non tamen omninò vomitus necesse est, ut simul unà conjungatur, cum fieri etiam possit, ut nedum Ileon intestinum, sed etiam reliqua superiora compatiantur dolore, cruciatu, torminibus, inflatione, febre, siti, inappetentia, aliisque symptomatibus citrà vomitum, qui etsi postmodum subsequatur, solius cibi assumpti, vel humoris in cavo ventriculi stagnantis esse solet. At verò si vomitus deinde stercorarius accedat, aut etiam cum singultu, omninò lethale esse consuevit, de quo hic Hippocrates: tunc enim intestinum Ileon tam crudeliter vexari indicio est, ut irritatione perpetim inducta, fibræ illius laceffitæ distorqueantur, & veluti convulsione affectæ, sursum retrahantur, ac motum peristalticum penitus conturbent, & invertant, unde postmodum fæces in cellulis, & anfractibus illius residentes, evomantur, excitato simul unà singultu.

Perpenſis prætereà cauſis, è quibus Ileos proficiſci ſolet cum vomitu, planè ab illis periculum vitæ magis adaugetur: nam ſive ab inflammatione contingat, ſive ab ejuſdem contractione, ac tortura, aut etiam prolapſu, ut in Enterocèle, ſive à fæcibus induratis, aut viſcoſo, hærenteque humore, ſive ab alio quopiam vim habente convellendi, & fibras inteſtinorum proritandi, atque diſtorquendi, ſemper exitium minatur, ut hiſtoriis quoque compertum eſt, & praxis ipſa pluries oſtendit; quamobrem non immeritò funeſtum ſignum hic ab Hippocrate proclamatur.

Quod ſi ulterius cum vomitu ſingultus adjungatur, longè gravius malum indicitur, tum ex natura ſingultus, qui ad convulſionem refertur, tum ex conditione materiæ Ventrículum, & Stomachum impetentis, planè mordicantis, & acris; tum denique ex ratione partis affectæ ad vitæ ſuſtentationem penitus neceſſariæ (qualis eſt Ventrículus) & propter nervos, quibus intexitur innumerabilibus, magnam cum cerebro connexionem habentis, ut aliàs dictum.

Hinc non ſolùm Hippocrates ſingultum ſupervenientem malum dixit, ſed etiam convulſionem, quæ proculdubio periculoſior cenſenda eſt ob cerebri, & nervorum inde immediatè prodeuntium affectionem: Atqui deſipientiam quoque ſuboriri poſſe ex Ileo, illumque pari modo funeſtum ſignum eſſe, nulli dubium, tractis nimirum in conſenſum partibus ad animales operationes pertinentibus, depravatis ſpiritibus, turbatiſque, confuſiſque phantaſmatibus, Imaginativam, & ſtimulativam dirigentibus, ac moderantibus. Quæ cum clario-

ra ſint, quam ut fuſiori ſermone egeant, non eſt, ut diutiùs in his immoremur. Solùm id animadvertere juvabit, unumquodque horum ſymptomatum ſatis eſſe ad indicandam morbi Ilei pravitatem, ac contumaciam; quamquam unum ab altero proſectum, & intrà quatridduum lethum attuliſſe non rarò obſerverimus.

APHORISMUS XI.

A morbo laterali inflammatio Pulmonis, malum.

Pleuritis, ac Peripneumonia, ad eòut inter ſe affines morbi ſunt; ut multoties unus alterum mentiri ſoleat, quinimò plerique utrumque confundere conſueverint. At verò quamvis inter initia diverſimodè moleſtent, & diſtinctas partes pleuram ſcilicet, vel pulmonem afficiant, unde poſtmodum à partis affectæ diverſitate, Pleuritis, aut Peripneumonia vocitetur, plerumque tamen, procedente morbo, ac peioribus ſymptomatibus comitato, citrà ſuppurationem, & ſputum, etiam ſi antea partes à pulmone diſtantes affecerit, facilè in ipſius pulmonis ſubſtantiam repere poteſt, & Peripneumoniam, ſeu pulmonis inflammationem excitare; cumque hic affectus majus vitæ periculum minetur, ob majorem cum corde viciniam, & cum toto corpore conſenſum, per arterias inde latiores excurrentes, ac recta in cor, ejuſque ventriculos, & aortam ſanguinem aſportantes; propterea tranſitus pleuritidis in peripneumoniam longè pernicioſior exiſtimatur: id quod conſiderans in hoc aphoriſmo Hippocrates ait, à *Pleuritide Peripneumonia, non bonum.*

Digno-

Dignoscitur autem his præsertim indicibus transitus hic ex Pleuritide in Peripneumoniam à febris exacerbatione majori, à difficultate spirandi magis adaucta, à tussi profundiori, vel nulla citrà creatum, à genarum rubore, ab urine substantia magis flavente, crassaque, atque à doloris sensu, qui prius acutus, & pungens, mox verò gravis, & premens evadit, majori cum anxietate, & corporis inquietudine.

Tunc itaq; Pleuritis in Peripneumoniam commutata mala dicetur, cum, illa non desinente, hæc supergreditur; at verò si cessante priori, posterior adveniat, licet bonum simpliciter non sit, non tamen omninò malum esse solet, si præsertim materia inflammationem inferens, aut fovens, perducta ad pulmonem, atque ad ductus ejusdem tracheales, possit subinde faciliùs, & promptus extusfiri, & excreari. At verò cum Pleuritis, seu inflammatio pleuræ, nō omninò desinit, sed potius majori sua expansione etiam in pulmones diffunditur, & unà simul cum pleuræ inflammatione, pulmonem quoque ipsum, secundum alterutrum saltem lobum, inficit, ac tumefacit, tantum abest, ut commutetur, & aliquatenus profit, ut potius malum malo gravius adiciat, & pejora vitæ incommoda pariat, de qua re hic sermo est; unde meritò scriptum, *malum*, immò & fortassè pessimum, ac lethale asserere licet, eo quòd subinde febris, quæ utrumq; morbum comitari solet, augeatur, respirandi difficultas increseat, & quod gravius, cor, ac vitale robur magis, magisque infringatur, & hebescat. Quòd si præterea genæ exinde rubeant, sputum vel supprimatur, vel crudum, rotundum, flavum, viride, aut nigrum, & nonnisi maximo cum conatu educatur, vel in le-

thum desinit, vel in empyema, ac phthisim, commutatur, & postremò in mortem adhuc.

Sed an quod Hippocrates hic ait de inflammatione pulmonis ex pleuritide, ampliandum quoque sit è converso in pleuritide, si in hanc peripneumonia transeat, ut in *Coacis prenotionibus*, ubi peripneumonia pleuritidis succedanea, tutior primigenia dicitur, & cur ejusmodi transmutationem Hippocrates tacuerit? Et dicendum, illam siluisse non irrationabiliter Hippocratem, veluti rarissimam, & insuetam, quæ si fortassè aliquando visa sit, pari, immò peiori prognostico esse judicandam, cum subindè conjectura pateat jam pulmonem ex integro fuisse inflammatum, ut proinde incapax novi affluxus humoris, illum excipere non potens, aliò divertere faciat, quin immò beneficium educendi per sputum, & tussim humorem, penitus desperatur à superveniente pleuritide, quod faciliùs expectandum erat ex sola peripneumonia.

Qua verò de causa pleuritis in peripneumoniam transire possit non aliunde crediderim, quàm ex impedito magis, minusve in partibus pectoris sanguinis circuitu: cum enim in apicibus solum arteriolarum sanguis hæret, cæteræ verò liberæ, expansæque sunt, ac præterfluentem sanguinem admittunt, ac deducunt, levis planè inflammatio fit, & pleuram non excedit; at verò si illæ excipiendo sanguini satis non sint, sed adhuc ulteriori egent spatio, fortè quia sanguis, crassior, acidior, glutinosior, alijsve amplitudinem exigit majorem, latioremq; tunc in adjacentes partes excurrere adhuc in pulmonem divertitur, illiusque substantiam tumefacit, ac inflammat.

APHORISMUS XII.

A Pulmonis inflammatione Phrenitis, malum.

QUamquam pleuritis, & peripneumonia morbi sint inter se adeo affines, ut vices invicem commutent, & unus in alterum transire possit, frequentius tamen mutatio in pejus, à superveniente nimirum graviore, periculosiorique contingens, juxta seriem ab Hippocrate hic notatam, fieri solet, ut ex pleuritide, peripneumonia, atque ex peripneumonia, phrenitis accidat. Hac enim ratione per partes successive nobiliores, magisque ad vitam sustentandam necessarias, periculum adaugetur, & proximius ad mortem itur: Pleuritis autem, & peripneumonia ita à plerisque confunditur, ut ex utrisque commune nomen apud nonnullos factum sit; & pleuro-pneumonia non incongruenter vocitetur.

Cum igitur à peripneumonia transitur in phrenitidem, aut hæc illi superaccidit, ab affectione partis vitalis trahitur in consortium ægritudo alia partis animalis, & cerebri, ubi phlogosim, & inflammationem pariter exortam suspicari irrationabile non est, eo ferè modo, quo pulmo ipse affectus creditur: etenim sæpè numero evenit, ut quemadmodum partes externæ, erysipellate vexatæ, aliis consentientibus, & vicinis id ipsum communicent, quod patiuntur, ita & partes internæ inter se invicem consentientes; sed & fit quoque, ut erysipelas veluti per saltum diffundatur, & has, & illas partes, non rarò etiam diffitas, indifferenter infestet, ut in eo, quod *volaticum dicunt*. Atqui maximus

inest consensus per arterias, venas, & nervos inter thoracem, & pulmonem cum cerebro, ut patet, estque à nobis aliàs notatum ex Anatome. Si igitur præter pulmonis inflammationem, cerebrum quoque, vel ejusdem meninges, & plexus, accidat inflammari, unde phrenitis exoritur; nulli dubium mali morbi testimonium esse, & ægrum de vita facile periclitaturum. Porro in his, sive urinæ turbulentæ compareant, sive è turbidis mox repente tenues fiant; aut etiam, quæ inter initia concoctæ videbantur, post quartum diem attenuentur, aut aliter in excretis confusæ varient, mortis prænunciæ esse solent, ut dicitur ab eodem Hippocrate *lib. Coacarum prænotionum*.

APHORISMUS XIII.

Ab æstibus fortibus Convulsio, aut Tetanus, malum.

QUO pacto legendus sit hic aphorismus, non satis adhuc benè constat, cum, & neque inter veteres Expositores convenisse scribat Galenus *in commentario*, qui fatetur, Marinum insignem Aphorismorum Interpretem pro *æstibus* maluisse scribendum *vulnera*, ut propterea ex vulneribus potius fortibus, quam ex æstibus, convulsiones oriri posse fuerit arbitratus, cum nunquam rationabiliter constare possit ab æstibus fortibus convulsiones proficisci, aut quinam unquam intelligendi sint ejusmodi fortes æstus, an ab ambiente aere, an verò à vehementibus medicamentis, sudorem potissimum inferentibus, vel etiam ustionem, & escharam excitantibus, aliisque. At sicut hæc versio suas patitur difficultates, ita nec altera

tera Marini suis aliis ex adverso caret. Quis enim unquam veluti rem notatu dignam, & inter aphoristicas sententias collocandam arbitratbitur, ex fortibus vulneribus convulsiones oriri posse, aut ortas inter mali morbi testimonia reponere dubitabit? cùm tamen aliàs, & pluries Hippocrates id ipsum memoraverit, sitque cunctis jam satis superque notissimum. Multoties etiam observatum in praxi ab hypocautis, & laconicis, ex thermis naturalibus, sudore nimium, vehementerq; promotum, excalefacta plus justo corpora exaruisse, ac nervorum, musculorumque tensionem passa esse; itemque alia ab usu causticorum medicamentorum supra partes sensu exquisito præditas applicatorum, contractas, & convulsas illas remansisse, ut & ab usu mercurialium; quocirca non omninò impossibile putandum ab æstibus fortibus, cæterisque extrinsecis calorificis immoderatis convulsionem, ac tetanum posse proficisci; unde Celsus *lib. 2. c. 7.* hanc Hippocratis sententiam ita accepit, ut verteret: *Post magnos fervores corporis, nervorum rigor, aut distentio, malum.*

Sed etsi ab his, aliisque similibus causis externis convulsiones excitari posse crediderim, non videtur tamen hoc loco Hippocrates voluisse istas ab illis deducere, sed dumtaxat, quæ ab internis causis progignuntur, cùm hic de morbis aliis morbis supervenientibus sermonem habere à principio hujus libri sibi constituerit. Hinc rationabilius fortes æstus exponere conveniet, febri-les, & quales ab Ardentibus inferuntur, quæ Causones, & æstuosæ febres, appellantur, & aliquando colliquativæ fiunt. Et quidem ab his plurimum commoti, ac fermente-

scientes humores, nedum calore intensissimo, & siti inextinguibili, ægrotantes excruciant, sed etiam acritate, ac molestia intolerabili partes cunctas corporis exagitant, lacessunt, ac divexant, ut musculi, & nervi rorida illa, blandaque substantia exhausti, rigidi, contractique fiant. Atque hinc animadversione dignum sequitur, quamobrem Hectici, ac Tabidi effecti, etiamsi toto corpore exarefacti evaserint, nullatenus tamen convelluntur, quoniam non à siccitate (ut vulgò creditur) quæ sanè in illis extrema est, sed potius ab humorum acritate, ac irritatione convulsio nervorum, & musculorum evenit, ut alias adnotavimus. Quòd autem febres ardentes, fortes æstus ab Hippocrate appellari soleant, præter voces græcas πυρ, πυρεξία, πυρετός, quibus ipse utitur, ad significandas febres ardentes, deducitur quoque ex eodem *lib. de medicamento purgante*, ubi in fortibus æstibus cavendum à catharticis consulit. Huic etiam expositioni melius cohæret Celsus antea memoratus *lib. 2. c. 7.* hanc Hippocratis sententiam afferens, dum inquit: *post magnos fervores corporis, nervorum rigor, aut distentio, malum*, quandoquidem ibi de his, quæ intrinsecus in singulis morborum generibus accidunt, sermonem facit.

Sed quid est, quòd Hippocrates se junctim hic scripserit convulsionem à Tetano, quem latini vertunt nervorum distentionem, cùm tamen Tetanus ad convulsiones referatur, sitque affectus compositus ex Opisthotono, & Emprosthotono? Et dicendum superaddidisse Tetanum convulsioni simpliciter dictæ, veluti morbum simplici convulsione deterioriorem, eo quòd totum corpus tum.

anteriori, tum posteriori rigidum, contractum, immobileque reddat; unde quodammodo ad naturam Cataleptis videtur accidere, in qua præter contractionem, tensionemque nervorum, & musculorum, corpus universum rigidum, & inflexibile fit, à nerveo liquore, & spiritibus, gelu ferè coactis.

APHORISMUS XIV.

Ex Capitis ictu obstupescencia, & desipientia, malum.

Capitis vulnera, & contusiones undecumque contingant, vel inflata sint, semper metuenda; innumeris id attestantibus experimentis, confirmanteque ratione; quoniam primum Ratiocinatricis Animæ domicilium conturbant, & offendunt; quamvis pro Regionum varietate magis, minusve molesta sint, & ferius, vel tardius curari soleant, plurimum ad hoc concurrente ambientis aeris conditione, ac qualitate: quod & luculenter quoque deducitur ex pluribus Hippocratis, Galeni, aliorumque clarissimorum Auctorum testimoniis. At verò ubi præter generalis hujus timoris causam manifestam, comparent insuper læsi interiori Cerebri indicia, quæ symptomata sunt veluti pathognomica concussæ ejusdem substantiæ, vitiataque structuræ, tunc nedum graviora, sed etiam periculosiora illa existimantur. Quamobrem scitè admodum Hippocrates hoc loco scripsit, *Obstupescencia, & desipientia*, quæ solent esse ejusmodi læsionis symptomata frequentiora, illis supervenientia, malum esse, ut fusius *lib. de vulneribus capitis* refert, & admonet. Neque solum à re gravi contundente, ut ferro, lapi-

de, ligno, aliove, sed etiam ab impetente quovis violenter, id accidisse plurimæ testantur historiæ: Notabilior autem est, quæ scribitur ab eodem Hippocrate de Virgine illa Nerii filia 5. *epidemiorum*, quæ lata manu ad synciput percussa vertigine capta est, & nona periit: Et de eo, qui lapide in caput percussus à Macedone corruit, secunda die voce destitutus, tandem mortuus est; ut & Autonomus in Omilo lapide ex manu ictus, & decimasexta pariter defunctus.

Quoniam verò hic speciatim meminit *ictuum*, videndum quid ex his magis, quàm ex vulneribus cerebro contingat? Et sanè noxa, quæ obstupescencia, vel desipientiam infert, non aliunde provenit, quàm ex interna totius substantiæ Cerebri concussione, perturbationeque; quæ nimirum illius fibræ, poruli, sinus, spiritus, & roridus ille liquor, qui ejus substantiam irrorat, vigoratque, perturbantur, concutiuntur, exagitantur, & è suis loculis dimoventur. Sed & aliquando etiam accidit, ut Cerebrum in sua constitutione, ac textura depravetur, & dissocietur, vel etiam è disruptis venulis, aut arteriis sanguis guttatim effluat, atque vel in eadem cerebri substantia, vel in meningibus, & plexibus restagnet, ut propterea mole aggravet, aut putrefactione corrumpat, motum liquidorum interrumpat, & mentem, mentisque operationes hebetet, ac dementet. Hinc autem fit, quòd gravior, periculosiorque non rarò fit ictus, & contusio, quàm simplex vulnus Capitis, si præsertim per illud prodire possit quidquid extra vasa effluerit, & pus exinde proveniens exitum habeat. Accedit, quòd multoties ex ictibus non ipsa pars percussa, aut con-

tula,

tusa, sed opposita lædatur, & frangatur, unde occultum nimis ubi, & cui medela adhibenda sit; quod secus contingit in vulnere, dummodò fracturam, aut contusionem vehementem adjunctam non habeat: Quamobrem ex contusionibus, periculosiores fiunt Cerebri læsiones ventri interiùs inductæ, nec sensibus conspicuæ, & apparentes, ut compluries est observatum.

Quamquam autem innumera prope modum mala, ex ejusmodi ictibus, & contusionibus capitis accidere possint, speciatim tamen meminit in hoc aphorismo Hippocrates obstupescentiæ, & desipientiæ; siquidem istæ frequentius ex illis accidunt ob enarratas causas: A concussionem etenim cerebri, atque ab effusione sanguinis, alteriusve liquoris, extra propria conceptacula, faciliùs Cerebrum gravatur, atque opprimitur, unde postmodum obstupescencia, qua nimirum icti, vel vulnerati, attoniti, immobiles, ac veluti apoplectici remanent. Desipientia verò hic ab Hippocrate notata, non ad phrenitidem, vel maniam referenda est, sed ad dementiam, seu stupiditatem, per quam mens stupefacta nil rectè agit, vel cum sopore, confusione, & ignavia, ut in vacillantibus, temulentis, multoque vino repletis.

Denique dixit Hippocrates *malum*, non lethale; quoniam etsi sepe numerò sic affecti pereant, fieri tamen potest, ut revalescant, ac salventur, si nimirum Cerebrum sua substantia illæsum, solum in suis vasis sanguiferis, aut lymphicis, noxam patiatur, & sanguis ex illis effluxus exitum habeat per aures, nares, aut os, ut in plerisque visum: tunc enim nullibi restagnans cerebri substantiam nec comprimit, nec corrumpit,

adjuta potissimum natura à traumaticis, & vulnerariis medicamentis, de quibus alibi dictum.

Cæterum malum semper est stupe-re, ac dementari ex capitis vulneribus, aut ictibus, quoniam ab his cerebri substantia concussa, & vitata significatur, quæque tum ratione sui, tum ratione sanguinis effusi, facile in corruptionem abit, ni per patentem suum ductum statim se ipsam exoneret, & commotum, turbatumque humorem repurger, extramittatque. Neque à non apparente extrinseca capitis læsione quis certò coniciet, nullam internam Cerebro commotionem fuisse illatam; quandoquidem non rarò etiam compertum est, sine ulla apparente contusionis, aut vulneris signatura, cerebrum malè affectum, conturbatumque fuisse, atque etiam repente post aliquod tempus mortem intulisse, nullo interea præcedente sensibili symptomate.

APHORISMUS XV.

A sanguinis sputo puris sputum, malum.

DIxerat aliàs Hippocrates *sanguinem supra ferri, malum*; nunc superaddit, illum superiùs rejectum, nisi citò, & spontè sua desinat, in pus verti, atque ab illius sputo, puris sputum evenire, atque adeò priori malo aliud pejus, & gravius succedere, quod est suppuratio, & Empyema.

Et quidem sputum hic memoratum, non simplicis spuitionis, aut excretionis intelligendum, veluti ex faucibus, & ex faucium glandulis erumpens, sed quod è pectore per tussim eiicitur, quemadmodum omnes

omnes Interpretes exponunt. Huic enim dumtaxat puris sputum superaccidit, deindeque phthisis, de qua sequens Aphorismus subnectitur. Nec aliter pus verum fieri potest, nisi sanguis, è suis vasis exiliens in pectoris cavo, aut alibi concreseat, & fermentatione subactus suppurationem postmodum subeat. Cohæret his consuetus loquendi mos Hippocratis, qui cæteras quascumque expurgationes, excreationes semper appellat; per tussim verò habitas, sputa restrictiùs vocitat; unde *aph. 13 quinti*, scripsit: *qui spumofum sanguinem expuunt, &c. & in Coacis prænotationibus, sputa spumosa, & flava, & alba, & nigra, rotunda, ac viscosa* nominat, quæ è pectore educuntur. Quoties ergo sputum sanguineum observatur, mox futurum expectare est purulentum.

Quoniam verò à *sanguinis sputo*, inquit, vereri subit, num propriè sanguinis puri puti, ac simplicis, an etiam misti; vel sputi solum cruentati, is intelligendus sit? Et planè asserendum in verò pure, simpliciter sanguinem esse extussendum, nam verum pus non nisi à solo, & puro sanguine provenit; at verò à sputo cruento, seu cum aliis humoribus permisto, potissimum cum phlegmate, verum pus non exoritur, sed quid puriforme, ac purissimè, quemadmodum experimur in catarrhis diuturnis, ad maturitatem perductis. Parum autem refert, si sanguis excretus multus sit, vel modicus, dummodò iteratis vicibus expuatur, ut exinde conicere liceat vas aliquod sanguiferum fore apertum, vel disruptum, & secundum aliquam sui partem, saltem in pectore hæreat, & concreseat; cujus causa deinde fiat, ut in pus vertatur. Atqui longè gravius erit, & pus subin-

de futurum portendetur, si spumofus, ac floridus, adeoque ex pulmonis parenchymate ille prodeat, ut aliàs ostensum: Cæterum major, vel minor copia sanguinis excreti, non nisi proveniet ex vasis adaperitis, vel erosis, latioribus, aut angustioribus ejusdem, præsertim per pulmonis substantiam dispersis. Vasa enim illa, per quæ sanguis è dextro in sinistrum Cordis ventriculum per pulmones traducitur, longè majora sunt, & cum reserantur, vel rumpuntur, citam mortem afferunt, ab impetente sanguinis irruptione, ac suffocatione, impeditaque circulatione.

Puris prætereà sputum hoc loco ab Hippocrate notatum tunc eveniet; cum valida Natura vim extussendi ferre potest; nam si fortassè imbecilla sit, quæ tussis impetum, atque anacatharsis molestiam sustinere nequeat, licet sanguis antea prodierit, puris sputum non comparebit, quia interiùs detentum cavum pectoris occupabit. Quocumq; autem modo fiat, malum semper erit, quoniam sputum purulentum, & sanguinem præterfluentem inficiendo, & pulmonis substantiam erodendo, Phthisis causa evadit; de qua in sequenti.

Verumtamen observare est, non fuisse in aphorismo absolutè pronunciatum, omninò à sanguinis sputo puris sputum subsequiturum, sed solum sub conditione, si à sanguinis sputo puris sputum subsequatur, malum esse; plerosque enim novi sanguinem non semel tantum, sed pluries, atque iteratò ad certum tempus expuisse, nullamque passos esse puris excreationem: quin & pleuritici, & mulieres in menses, catameniorum recursum consuevere ad plures dies copiosum sanguinem sputo,

to, ac tussi, non sine ingenti molestia expurgare, citrà succedentem ullam puris excretionem. Jure optimo itaque adjectum est, malum tunc signum esse, cùm ad sanguinis sputum, puris sputum consequitur; siquidem hoc pacto fiet, ut deinceps à puris sputo phthisis, & marcor universalis insequatur, ac tandem interitus, ut mox dicetur.

APHORISMUS XVI.

A puris sputo phthisis, & fluxus : cùm verò sputum retinetur, moriuntur.

EX antedictis clarè liquet, non irracionabiliter hunc aphorismum fuisse à præcedenti disjunctum, cùm non omninò necessarium sit, puris sputum sanguinis rejectionem subsequi debere, licèt plerumque id fieri soleat: Quamobrem sensus utriusque aphorismi videtur esse, quòd si à sanguinis sputo, puris sputum habeatur, malum sit; quoniam à puris sputo phthisis, & deinde fluxus sequitur; & si forsitan puris sputum in posterum detineatur, mors infallibiliter succedet: unde aphorismus hìc videtur esse ratio prioris illius.

Sed unde fit, ut à puris sputo phthisis, & fluxus portendatur, sitque alterum alterius symptoma, veluti necessariò superventurum? Planè id videtur deducendum à pure, & puris conditione: pus enim, ut alias dictum, acritatem habet muriatico-salinam, & acrem, adeòque erodentem, atque insensam sanguini, & pulmone, ubi hæret, unde cordi, totique corpori, vis, robur, & nutrimentum suggeritur; quamobrem ab infecto, ulceratoque pulmone, sanguis inde præterfluens perpetim

vitiosus, & acer, ac mordens redditus, nedum ulcus ipsum fovet, & sordidum reddit, sed etiam ventriculos cordis, & reliquos humores inficiens, febrim excitat tabificam, subindeque postmodum alia innumera detrimenta, & tandem mortem.

At cur sputum in pleuritide cruentum bonum sit, & quantò citius comparuerit, tantò melius: cùm ex adverso hìc malum referatur, & supurationem portendat? Ratio facillè reddi potest ex eo, quia ibi ex disrupto apostemate à sanguine extravasa restagnante, hìc verò è pulmonis vasis disruptis, vel resecatis proximè resilit, etiam cum pulmonis læsione, cujus insanabilia dicuntur ulcera, authore Galeno 4. *de loc. affect. cap. 5.* & 5. *Meth. cap. 8.* & 11. Legi meretur de hac re idem Hippocrates lib. 1. & 2. *de morbis*, ubi multiplex genus Phthiseos distinguit, & uniuscujusque causas, ac generationis modum, per quam accuratè recenset; ut propterea in illis describendis non sit opus hic ulterius immorari.

Fluxus verò, qui in hoc aphorismo, nomine generaliori notatur, vel intelligendus erit, qui ventris dicitur, juxta documentum ejusdem Hippocratis 5. *aphor.* dicentis: *Tabe laboranti si alvi fluxus superveniat, vel capillorum defluviu, ut ibidem memoratur aphor. 12.* & 14. vel utrumque, planè nil erit, quod huic sententiæ non conveniat; quoniam ex utrisque proximè imminens interitus portenditur, ut iis in locis à nobis est explanatum: quidquid enim præter naturam evacuari Phthisicis, ex pulmonis scilicet ulcere tabefactis, contingit, proculdubio malum est, immò etiam lethale, ob maximum naturæ languorem, & vi-

rium dispendium. In quam rem non semel observare curiosum fuit, phthisi peremptos in tam extremam sanguinis consumptionem pervenisse, ut is solum in arteriis, & venis superfuerit, qui vix circulationi ejusdem satis foret, reliquo penitus exhausto.

Tandem ad calcem aphorismi adiiicitur: *cum sputum detinetur, moriuntur*. Et sanè: detento etenim pure pulmo nedum magis inficitur, sed in usu respirationis multum opprimitur, ut tandem suffocetur, unde cor à suo motu deficiens vivere desinit. Atque hinc liquet, quam gravius sit puris sputum intercipi, & remorari, quam, molestè licèt, extussiri, & educi; quoniam ex hoc expellentis Naturæ robur ostenditur, ab eo verò detento summa ejusdem imbecillitas indicatur, & proximus vitæ finis.

APHORISMUS XVII.

In Hepatis inflammatione singultus, malum.

Confer.
aphor.
58. 5.

MUltoties Hepar (sicut & pleuraque alia corporis viscera) ab hærente in ejus substantia sanguine, utriusque, vel alterutrius vitio, inflammatur. Cum autem id morbi genus subit, non solum graviter ægrotantes divexat, sed in maximum vitæ periculum eosdem coniecit, si præsertim vehementiori febre, anhelitu difficiliore, ingenti dolore, siti, vigilia, cæterisque molestioribus accidentibus societur. Ex multis autem, quæ illius inflammationem comitari, vel subsequi solent, specialius hic adnotat Hippocrates singultum, veluti symptoma rarenter superveniens, atque ab alio viscere malè affecto, puta stomacho, aut

diaphragmate, dependens; aitque illum malum esse, quoniam designat eò diffusam, extensamque esse jecoris inflammationem, ut alias quoque partes superiores, & adjacentes affecerit, magisque ad vitam sustinendam necessarias. Et quidem à singultu stomachus, & diaphragma perpetim convellitur, unde & ciborum assumptio, ac eorumdem digestio, nec non respiratio plurimum impeditur, quæ operationes sunt quam maximè ad viventis corporis conservationem conferentes; præterquam quod affecti, ac pruritati à causa singultum excitante, nervi per stomachum, & septum transversum dispersi, trahunt quoque in consensum cerebrum, unde alia longè graviora, & periculosiora mala exoriri possunt, ut cunctis notum.

Sed etsi Hepatis inflammatio ad stomachum, & diaphragma non subreperit, adhuc tamen poterit singultus ab Hepatis inflammatione suboriri propter ligamentum carneum, quo illud diaphragmati alligatur, ut ex Anatome patet, quomobrem illo inflammato, tumefacto, ac plus justo distento, ex nimio pondere contrahitur diaphragma, & in suis expansionibus impeditur; cumque stomachus diaphragmati quoque cohæreat, unde fieri potest, ut singultus exoriat, qui utriusque passio dicitur: & quoniam singultus ad motus spasmodicos refertur, & isti nervos malè affectos, & Cerebrum quoque læsum arguant, adhuc exinde malum signum erit, & multarum partium principalium, simul unà laborantium, indicium manifestissimum.

APHORISMUS XVIII.

A Vigilia Convulsio, vel Desipientia, malum.

Sicut convulsio, aut desipientia plerisque aliis ægritudinibus, cum nervorum læsione conjunctis, supervenire solet, & mali morbi testimonium addit; ita si Vigiliæ, ut non rarò fit, accidant, malum pariter portendunt: quoniam si in reliquis deducti in compassionem Cerebri indicia sunt, multò magis in Vigilia Cerebrum ipsum malè affectum proximè designabunt. Verùm Vigilia in his vehemens, diuturna, & nulli penitus remedio cedens esse debet, ut convulsionem, vel desipientiam pariat: sunt etenim, ac fuere plurimi, qui ad menses integros somno caruerint nihilum tamen convulsionis, vel desipientiæ incommoda passi sunt, ut historiis liquet, & de Mæcenate cunctis notum: At verò ubi ex perenni Vigilia ista evenerint, ne dum humores, & spiritus per Cerebri substantiam diffusi acriores redditi, multum infensi evaserunt, sed etiam Cerebrum ipsum in sua constitutione, ac textura non leviter à naturali statu declinasse indicio est, cum ipsius medullium, & nervorum principium depravari, ac offendi contigerit ex contumaci, diuturnoque pervigilio, aliter convulsio, vel desipientia nullatenus accideret. Cujus autem generis desipientia hic intelligenda sit, facilè ex supradictis deducere licebit, quam nimirum vocant melancholicam, vel maniacam, ab exustis, acidis, vel acris humoribus progenitam; ab his enim pluries dictum, convulsionem excitari solere, irritatione in nervorum fibris indu-

Pl. l. 7. c.
51. Sen.
de prov.

cta; quamobrem pari ratione ab iisdem desipientiam hoc loco memoratam proficisci credendum est. Atque hinc modò, facilè quoque deducitur, cur Vigilia, quæ plerisque innocua esse solet, in his mala fiat, si nimirum ad eam convulsio, aut desipientia subsequatur; siquidem denunciat non à sola exsiccatione, aut humoris absorptione illam provenire, sed ab alia peiori, mordaci, ac virulenta causa, quæ convulsionem, & dementiam gignere valeat; vel saltem ex tali, ac tanta substantiæ cerebri coarctatione, ut roridum illius liquorem vel non gignat, vel in medullium diffundi non permittat, unde contumax, atque incompefcibilis vigilia sensim, sensimque suborta sit; quamobrem malum ægrotanti portenditur, & fortassis etiam interitus, nisi, humectantibus simul, ac retundentibus acritatem convenienter, opportunèque occurratur.

APHORISMUS XIX.

Ex offis nudatione Erysipelas.

Adiiciendum omninò est, *malum*, vel implicite subintelligendum, ut sensus aphorismi consonet experimento, & menti Hippocratis; siquidem illo omisso, nequaquam videtur utriusque consentaneum, quòd offi nudato erysipelas perpetuò accidat, quidque portendat, cum supervenerit, ignoretur, attenta offis denudatione. At verò fieri nequit, quin grave, & periculosum symptoma censendum non sit erysipelas offi denudato superveniens, tum sui met ipsius ratione, tum ob ejusdem offis denudationem, quoniam denudatum os facillimè livori, & corruptioni subiicitur, unde postmodum sphacelus.

celus. Fuere siquidem ossa omnia à provida Natura tenui quadam membranula, quæ perioſtion vocatur; unde quaque circumveſtita, cuius cauſa foveantur, & ab extrinſecis alterantibus cuſtodiantur; quæ mobrem ubi illa orbata ambienti aeri exponuntur, promptiſſimè frigent, liveſcunt, & quamlibet aliam præternaturalem alterationem ſubire poſſunt; cùmque liquor, & vigor nerveus, qui per illam diffunditur, propter offis denudationem, per eas partes permeare nequeat, ſed vel hæreſcit, & circumquaque reſtagnat, vel ex partium circumſtantium vitio, ac ambientis aeris importuna actione, aceſcit, & corrumpitur, proinde fit, ut antedicta mala exoriantur. Hinc cauti, & accurati Chirurghi in ejuſmodi caſibus omnem adhibent diligentiam, ut os nudatum amiciant, ac baſamicis medicamentis tutentur, ſimulque unà ab extrinſeco ambiente cuſtodiant, & defendant, immò ſi quid in offe vitioſum appareat, ſtatim abraſionibus, ac lituris detergant, & amoveant.

APHORISMUS XX.

Ab Eryſipellate putredo, aut ſuppuration, malum.

QUamvis Eryſipelas ad Tumores referri poſſe videatur, quia tamen à tenui admodum humore acri, & volanti plerumque fit, qui vix cutem affectam elevat, & rufo, vel flavo colore inficit, propterea ſponte ſua ſolet promptiſſimè diſcuti, & inſenſibiliter reſolvi, intacta, atque illæſa relicta parte, ſi præſertim verum, ac legitimum illud fuerit. Cùm autem præter rubicundum colorem, in manifeſtum tuinorem

cutim attollit, miſtum ex alieno, & craſſiori humore eſſe ſolet, adeoque ſpurium appellatur: quin & pro ratione humorum admiſtorum, nunc phlegmonodes, nunc œdematodes, nunc etiam ſcirrhodes dicitur, pro ut in colorem varium inclinatur, & hunc, vel illum adiunctum humorem redolet, ut apud Chirurgos: quo caſu niſi illorum peritia, & accurata diligentia accedat, facile in apoſtoma degenerat, & ſuppurationi ſuccumbit, nequeunte ſcilicet alieno illo, admiſtoque humore tam promptè attenuari, & exolvi. Id ergo conſiderans in hoc aphoriſmo Hippocrates, inquit, putredinem, aut ſuppurationem ex Eryſipelate inductam, malam eſſe, eo quòd à ſua conſueta conſtitutione recedat, & alio, quàm diſſolutionis, & evaporationis modo deſinat, immò in gravio rem morbum, & in ulcus fanè periculoſum commutetur.

Et quidem cùm in putredinem, vel in ſuppurationem tendit, proculdubio designat ex miſtura alterius humoris craſſioris, indebitam fermentationem inibi fuiſſe excitatam, per quam partes tenues exolutæ, faſculentas, ac tartareas reliquerint planè irrefolubiles, quæ cùm acorem, ac virulentiam etiam contraxerint, facile in ſuper ſubjectas, & circumſtantes partes inficiant, & corrumpant, ac tandem in gangrænam deſinant, ſubſtratum os vitiantem, contaminantemque.

Sed & ex putredine, aut ſuppuratione, nova ſemper febris exoritur, & non raro priore pejor, infecto ſubinde ſanguine, per affectam partem in cor remeante, indeque per corpus univerſum; unde poſtmodum gravius vitæ periculum imminet. Accedit, quòd putredo iſta, & ſuppuration mali ſemper moris eſſe ſolet,

solet, ratione mistorum humorum spurium Erysipelas progignentium, qui cum ferè semper acorem salinum referant, vel procedente tempore adipiscantur, præter crassitiem, & lentorem, sordidum quoque ulcus efficiunt, quod non tam facilè detergi solet, nec tam citò consolidationem admittit; quapropter diuturna mora, etiam circumjacentes partes, excitatis cuniculis, afficit, & novos, novosque tumores, ac abscessus promover, dubium semper exitum comminantes, præsertim si circa articulos fiant, & in corporibus valetudinariis, humidisque regionibus, atque in ætate senili, ut multoties est observatum. Anno 1700. sub Autumni finem, ac deinceps per totam hyemem sequentis anni 1701. Neapoli, genus quoddam crustosis Erysipelatis vagatum est, epidemicam constitutionem referens, quod cunctos facie peculiari-ter affecit, cum febre acuta, pervigilio, delirio, è naribus hæmorrhagia, aliisque symptomatibus perniciosissimis, è quo pauci admodum evasere.

APHORISMUS XXI.

A forti in ulceribus pulsu, profluvium sanguinis, malum.

ULcera, sicut etiam vulnera, cum præsertim magna sunt, & in partibus arteriosis inflicta, solent circumlabia, ob indigestam materiam, intumescere, & non rarò etiam cum rubore, dolore, & ardore lociari, ut propterea circumsitæ venæ, & arteriæ sanguinem deducere, & excipere non valeant, unde postmodum ab ipso restagnante vehementius pullant, & elatiùs attolluntur. In his ergo ait in hoc apho-

rismo Hippocrates, facilè posse sanguinis profluvium exinde succedere, impetente nimirum illo, atque aditum sibi per violentiam faciente: quod cum acciderit, malum esse subdit, tum ratione ipsius sanguinis immodicè profluentis, tum ratione ulceratæ partis, quæ ab ejusmodi immoderata sanguinis effusione languida, & effœta remanens, difficulter ad cicatricem sit perducibilis.

At verò hæc in ulceribus quibuscumque contingentia, longè graviora evadunt in Carcinomatibus, quorum proprium esse solet ejusmodi mala inferre, & fortes pulsus, aut irrestagnabiles sanguinis profusiones inducere, à maligna, virulentaque materia arsenicalem conditionem referente; quamobrem non solum malum, sed pessimum in his indicium promitur insanabilitatis, & mortis.

Notavit autem signanter Hippocrates *fortem*, id est vehementem, & elatum *pulsus* esse debere: nam non quælibet pulsatio in ulceribus mala est; quæ enim concors, & conformis est cum cordis, cæterarumque arteriarum pulsu, mala non est, immò potius salutaris, cum sit conveniens debito Naturæ usui, arguens ulceratæ partis vim, facultatemque validam, & sanguinis circumeuntis blandam, consentaneamque conditionem. Quare, ut pulsationes istæ morbosæ sint, fortes, vehementes, impetentesque esse debent, vitium ulceris, & qualitatem materiæ restagnantis designantes acrem, multumque infensam, quæ peculiari fermentatione ibidem excitata violentè concutiat, & percellat arterias, immò & ambitum totius partis ulceratæ, quocirca fiat, ut orificia arteriarum, & venarum ab impetente,

te, atque erodente illius malitia referentur, & scindantur. Sed & nec solum ab ulceratis, aut vulneratis partibus, sanguis si profluat, malum erit, sed etiam si à naribus, hæmorrhoidibus, utero, cæterisque immoderanter exiliat; quippe tunc arguit vitium tale in sanguine inductum, ut nedum labia ulceris, & adjacentes partes tumefaciat, & excruciet, verum etiam reliquas omnes totius corporis inflat, vellicet, & depravet; unde Celsus latiori planè significatione sententiam hanc expressit lib. 2. cap. 7. inquit: *ubi vehementer venæ super ulcera moventur, sanguinis profluvium erit*. Et quidem ex Cancerosis ulceribus aliquando observatum nares immodicè sanguinem fusisse, cum jam patientes in proximum exitum deducti toto corpore ejus malitia forent infecti. Sunt etiam, qui fortem, ac vehementem pulsationem non proximè in ulceribus, sed in corde ex ulceribus vehementer affecto, atque elato illam velint, veluti signum inflammationis ibidem inductæ, atque ex pulsu cordis manifestandæ, cum pulsationes omnes arteriarum ab unico, & solo corde procedant: & quidem id non inverisimiliter dictum putaverim, quamvis cunctis ferè interpretibus creditum sit, pulsum Hippocrati vel incognitum fuisse, vel denegatum; at verò si nonnulla in ejusdem operibus loca perpendantur, haud inficiabimur fuisse non rarò pulsum in ægrotantibus ab illo observatum, siquidem 4. *epidem. n. 9. In acutissimis febribus pulsus densissimos, & maximos* fuisse adnotat: & num. 12. *In Zoilo fabro pulsus tremulos, & tardos* memorat; itemque num. 23. & 2. *epidem. sect. 5. cui vena*, inquit, *in cubito pulsarit, insanus, & iracundus est*:

Juxta
divisio-
nem Ma-
rinelli.

& 7. *epidem. numer. 41. Pherocyda pulsus in fronte valdè obscurus* memoratur: & num. 42. *Venæ in temporibus saliebant* (pro venis autem arteriæ intelliguntur juxta Veterum morem.) Et in *Coacis prænotionibus*, quibus in febribus, ait, *venæ in temporibus pulsant*: atque *ibidem: pulsus lethargicorum tardos esse*, ait: & inferius, *pulsus* memorat in præcordio. Pulsum etiam circa tempora meminit lib. de flatibus, & lib. de Alimento, *venarum pulsationes, & aeris respirationem sanitatis, & morbi signa* esse statuit. Ex quibus locis colligere planè est, consuevisse aliquando Hippocratem pulsus observare, immò etiam in diversis corporis partibus, eo fermè modo, quo apud Chineses (superstitiosè tamen nimis) factitari legimus, quibus mos fertur pulsus in toto ferè Corpore percipi, & observari; Verùm eos Hippocrates non adeò magni fecit.

V. Merc.
var. lect.
l. 2. c. 12.

APHORISMUS XXII.

A ventris dolore diuturno, suppuratio.

Diagnosticus, & Prognosticus simul hic aphorismus summo-perè ad praxim conducibilis est, admonens medicos, ut in tractandis diuturnis ventris doloribus cauti fiant, ne inadvertenter decipiantur, immò aberrantes à scopo exoptatæ curationis ægrotos in perniciem deducant, quemadmodum non rarò plerisque accidisse maxima sane incuria, observatum.

Accidunt sæpè sæpius ventris dolores in intestinis ex retentis, constipatisque fæcibus, à flatibus cavum eorundem distendentibus, & quodammodò convellentibus, à tenaci,

naci, hærenteque pituita acorem ponticum referente, & fibras contrahente, & corrugante, aliisq; consimilibus causis *in nostra praxi* memoratis, exceptis his, qui ad utrumque hypochondrium pertinent, ut & ad vesicam, & uterum. Isti verò temporis diuturnitate, sponte sua desinere solent, vel ope medicamentorum remitti, atque aboleri, discussis nimirum flatibus, egestis facibus, subactisque aliis causis dolorem inferentibus, nisi tamen, ut benè advertit Galenus *in comm.* doloris ferocia à contumaci, repugnantique causa mors ægrum præoccupet. Quoties ergo dolor in diuturnum tempus producit, nec beneficio medicamentorum sedatur, aut desinit, indicio est, doloris causam cavum intestinorum, aut locum ad exitum per alvum patentem non occupare, sed interiùs reconditam esse, & fortassè etiam fixam, hærentemque in glandulis Mesenterii, Omenti, Pancreatis, & similium, quæ non nisi coctione, maturationeque subigi, & subacta, maturata, ac fluida reddita expelli possit; idque beneficio suppurationis, quæ opus Naturæ est, in rem malam alicubi conclusam, & fermentationi subjectam; unde jure optimo, inquit hîc Hippocrates, à diuturno ventris dolore suppurationem esse expectandam, cum non alia subsit via, per quam illa corrigi, & expurgari queat. Nisi tamen Natura impotens, & imbecilla evaserit à laboris, & doloris diuturnitate, quam etiam Vigiliæ molestissimæ, & virium jactura sæpè sæpiùs consequi consueverunt; unde ægro tanti interitus ante suppurationem præaccidat, ut non rarò evenit in istiusmodi tumoribus, & abscessibus internis.

Tacuit postremò Hippocrates,
Tozzi Op. Med. Tomo IV.

malum, vel quod implicitè subintellectum velit; vel potiùs, quòd in ipsa suppuratione contineatur, quæ licèt opus Naturæ concoquentis sit, adeòque bonum, mala tamen est saltem ex reliquo in parte dolente ulcere, quod difficulter admodum detergi, & ad cicatricem perducipotest, adeòque timendum deinceps est, ne in longius tempus protractum, mortem sit denique allaturum.

Quod hætenus de imi ventris doloribus est expositum, nonnulli quoque ad ceteras corporis cavitates, quas etiam ventres vocant, extendunt, nimirum ad Thoracem, & Caput, itaut si in his quoque dolores diutiùs perseveraverint, sequuturam suppurationem portendant pariratione. Verùm etsi id non improbaverim, cum rationi, & experimento non repugnet; verisimiliùs tamen id videtur pronunciatum ab Hippocrate de infimo ventre, qui propriè, immò specialius talis dicitur, atque in diuturnum tempus dolorem sustinere potest, potissimum si in mesenterio, ejusq; glandulis progignatur, ut dictum. Atque hinc modò facilè etiam deducitur, dolorem hîc ab Hippocrate memoratum haudquaquam vehementem, & magnum esse intelligendum; nam si magnus, & ingens foret, nullatenus posset in longum tempus produci, cum tantam doloris vehementiam, & acutiem Natura diutius ferre non possit citrà manifestum vitæ periculum. Modò in capite, & in pectore dolores, qui fiunt, semper sunt gravissimi, & citò intra terminum acutorum vel in salutem, vel in mortem desinunt; secus verò, qui in mesenterio, ejusque glandulis fiunt, leviores sunt, adeòque ad menses integros perdurasse fatentur histo-

riæ: suppurata autem materia doloris causa, dolor ipse mitescit, & febris, si quæ fuit, remittitur; nam *dum pus conficitur, dolores, & febres accidunt magis, quàm jam confecto*: atqui pus siue verum, siue falsum sit, parùm refert, cùm utrumque esse possit, pro varietate humoris in parte dolente congesti, & subacti.

Postremò pro coronide animadvertendum collectos in glandulis mesenterii humores, præsertim crassos, & consistentes, non semper dolores excitare, neque in suppurationem desinere, sed aliquando in tubercula durissima, scirrhus æmulantia, commutari, atque ita cum ægrotantibus consensescere, ut Anatomicis inspectionibus dissectorum corporum pluries est observatum.

APHORISMUS XXIII.

A dejectione sincera difficultas intestinorum, malum.

Sinceras dejectiones appellat Hippocrates, quæ uniusmodi sunt, & simplicis, sincerique humoris conditionem referunt, quales sunt, quæ solius flaventis bilis, seu fellei humoris, aut nigricantis, vel albicoloris comparere solent, atque à Veteribus ad flavam, aut atrabilem, & ad pituitam reduci consueverunt; quamvis nunc à detectis, industria anatomica, novis humoribus aliter evenire referantur. Ut cumque autem istæ fiant, cùm comparent, minùs malæ esse solet, eo quòd arguant Naturam non tam variè distractam, malèque affectam, nec viscera esse diversimodè coinquinata, ut alios, aliosque succos præternaturales gignant, & genitos deponant in intestina, ut alibi meminerat;

Verumtamen non adeò à facibus se junctæ egeri debent, ut penitus impermixtæ, ac solitariae educantur: tunc enim immodicum humoris excessum, & causam effectricem nimium præpotentem denunciant, quæ haudquaquam à reliquis aliorum viscerum succis corrigatur; ut cùm dejectiones flavæ fiunt ab exuberantia fellei humoris nullatenus à succo pancreatico edomiti, & contemperati; vel contra, cùm nigricantes sunt, ejusdem pancreatici acidioris redditi vitium arguentes, qui ab inerti, paucoque succo felleo corrigi non potuit. Has ergo vituperat Hippocrates tanquam malas, tum ratione signi, quoniam significant viscera, unde illæ derivant, à naturali constitutione degenerantia; tum etiam ratione causæ, eo quòd indomitæ, nec correctæ, quò tendunt, veluti efferæ, partes cunctas inficiunt, depravant, & excruciant. Quamobrem non immeritò hoc loco animadvertit, à sinceris dejectionibus dysenteriam supervenientem malam esse, non quòd undecumque ista proveniat, mala non sit, sed quòd longè gravior, ac molestior sit futura, cùm à sinceris dejectionibus originem habuerit. Et quidem, ut mox dictum, quoniam à causa provenit nimium præpollente, & excedente, tum in quali, tum in quanto, & viscera, unde dejectio provenit, plurimum à naturali statu recedentia, atque intemperata recognoscit: Quare intestina nedum continuis, & constantibus doloribus extorquentur, sed etiam facilè subinde exulcerantur, & exeduntur. Hinc aliàs dixerat idem Hippocrates, *dysenteriam ab atrabile lethalem esse*, quippe quæ à simplici, sinceroque humore procedit; & alibi mutationes colorum in evacuationibus commendavit, utpo-

te arguentes humores sibi invicem in melius succedentes, & mutuò se contemperantes, ne scilicet alter supra alterum nimium prævaleat.

Quod autem hic edocet de malis dejectionibus sinceris à statu naturali in præternaturalem, excipere convenit in his, quæ à statu morbofo, & præternaturali in sanum accidunt, cum scilicet in declinatione morborum, & præsertim febrium acutarum, criticè contingunt. Tunc enim facile fit, ut à victrice Natura, separante malum à bono, unius dumtaxat sinceri humoris febrim foventis evacuatio criticè, & salubriter habeatur. Quo pacto experimur sæpenuerò tertianas, aliasque febres acutas desinere solere, copiosa simplicis humoris flavi, seu biliosi dicti, evacuatione, unde postmodum æger convalescat. Ita pariter in Aurium obsurdèscencia scripsit Hippocrates biliosas dejectiones salutares esse, redeunte in pristinum auditu.

Neque insuper inquit Hippocrates omninò futuram dysenteriam ab ejusmodi sinceris dejectionibus, sed solum sub conditione, si evenerit, malum esse; ut propterea perperam à quibusdam omittatur particula, *malum*. Quin & sincera dejectio in singulari numero à Leoniceno, aliisque Expositoribus notata, non unicam, sed iteratam, nec modicam, sed copiosam egestionem designat, quæ scilicet valeat dolores, tormina, & cruentam quandoque evacuationem excitare: quæ profectò conditiones junctim solent dysenteriam comitari.

APHORISMUS XXIV.

In ossis præcisione, desipientia, si in vacuum apprehenderit.

OS hic sumitur per antonomasiam, Cranium, quod cæteris ossibus præcellat magnitudine, structura, ministerio, præstantia, ac sublimitate: Præciditur autem multoties exteriori dumtaxat lamina, vel ad medullium, aliquando etiam ad ejusdem concavum usque, ubi dura meninx appingitur, & alligatur: sed & quandoque parte posteriori, quæ durior, & validior est, interdum verò parte anteriori, tenuiori, magisque friabili, quæque molliorem Cerebri substantiam amplexatur, ubi plerique Phantasiam, seu Imaginatricem facultatem stabilari arbitrati sunt.

Etsi autem indiscriminatim scribat Hippocrates ex illius præcisione desipientiam suboriri; putaverim tamen id non perpetuò successurum (quod sanè pluries observatum, irrita hujus aphorismi prædictione) nisi ad eam partem sectio, atque incisio facta sit, quæ meningem duram comprehendit; unde ipsa graviter læsa, vel saltem detecta, ab ambiente aere, à confluyente sanguine, hærenteque sanie, aliove humore præternaturam alteretur, & subiectam aliam piam meningem, & tenellam Cerebri substantiam in consensum trahat, indeque postmodum desipientia succedat. Hinc non absre dictum videtur, *in ossis præcisione*: quod sanè verbum, antèrius incidi, aut secari significat, græcè διακοπή. Neque solum incisione, sed etiam contusione crediderim os illud affici oportere, ut si fortassè desipientia (quam vocalem

dicunt) propriè non sequatur, saltem accadat, quæ mentalis dicitur, vel ea, quæ cum stupiditate, obstupescencia, caro, & comate vigili confundi solet, de qua antea meminerat.

Sed quid voluerit intelligendum pere a verba, *si in vacuum apprehenderit*, non benè constat apud Interpretes. Puto tamen ego, id ipsum hic intelligi, ac *in cavum*, id est in internam, & concavam cranii partem, qua duram matrem suspensam sustinet: *vacuum* autem illam partem appellat, quia reverà inter cerebrum, suis meningibus obtectum, & cranium, spatium quoddam intercedit, quo levis ille, tardusq; Cerebri motus expansionis, & amplificationis, peragi possit, ut in ejusdem cranii incisionibus comperitum, & patentissimum est in recens natis.

Quamquam autem hæc ita exposita Experimento, & Rationi non dissentiant; sunt nihilominus, qui in hoc Hippocratem crimentur, quòd rem scripserit rarissimè contingentem, cum sæpius capite vulnerati, & cranio præcisi, nil penitus desipuerint. Verùm id summæ, & accuratæ Chirurgicorum diligentia tribuendum, qui efficacissimis remediis balsamicis ejusmodi vulnera, quàm optimè tractare sint conati, & nedum ab imminentibus ejusmodi periculis tueri, verùm etiam ad perfectam sanationem perducere satagerunt. Quæ autem mala imminetia prælagit Hippocrates, intelligenda sunt à vi præcisionis, & vulneris, siquidem vulnera, & incisiones Cranii certò certius hæc, & alia graviora mala minantur, immò inevitabilem mortem plerumque arcessunt, cum potissimum Cerebrum concutunt, & perturbant; atque in his,

quæ citrà Artis beneficium accidunt, aphoristicam hanc sententiam intelligendam mox recensita suadent juxta Hippocratis observationem, qui & posteris tradidit, quæ sola morborum vi, ac violentia, ut plurimum, contingunt.

APHORISMUS XXV.

Ex medicamento potione convulsio, lethalis est.

INitio libri Quinti dixerat convulsionem ab assumpto helleboro lethalem esse; nunc, quod speciatim de uno genere medicamenti purgantis asseruerat, ad quod vis aliud prorogat, ac extendit, si tamen catharticum sit: siquidem, ut benè exponit Galenus *in comm.* de propriè purgantibus, atque per irritationem, & acritatem humoris educantibus, intelligendum monet, cum convulsio non nisi ad acrimoniam, irritationemque nervorum consequatur, ut alibi à Nobis est explicatum. Cumque de hac re satis, superque ibidem; & in aliis aphorismis, actum sit, idcirco in hac recoquenda crambe immorari non licebit.

APHORISMUS XXVI.

In forti dolore ventris, partium extremarum frigiditas, malum.

ANtea etiam docuerat in acutis morbis frigus partium extremarum malum esse; hic verò specialius memorat id ipsum malum esse, & fortasse pejus in ventris dolore; quoniam ibidem designat inflammationem genitam, jam jam ingranam vergentem, & partes internas

ternas mortificantem, unde postea extremarum frigiditas emanat, cum istæ ab illis bene se habentibus vigorentur, & incalescant.

Quoniam verò ventrem indefinitè nominavit, posset quis omnes tres animalem, spiritalem, & naturalem subintelligere, juxta consuetam Anatomicorum divisionem. Attamen satius credere licebit, notatum hic speciatim ventrem inferiorem; ibi enim specialius dolores atroces, & tormina fiunt, immò facilius ibidem gangrenæ, & mortificationes exoriuntur, unde postmodum extremarum partium frigus, quod sanè pluribus experimentis comprobatum in Cadaverum ejuscemodi genere mortis interemptorum dissectione; quin & varietas viscerum, glandulis, & membranis innumeris constantiam, id ipsum promptè accidere posse suadet, ut consideranti patet. Cæterum etsi Intestina acutis potissimum doloribus subiiciantur, cætera nihilominus viscera suo pariter sensu prædita iisdem expertia non sunt, quæ cum affecta fuerint, proximè adjuncta, & consentientia Intestina divexant, & condolere quoque cogunt. Denique, quod Hippocrates scribit *malum*, Celsus *lib. 2. cap. 8.* hanc eandem sententiam latinè interpretatus, inquit: *periculosum*, nec sine ratione, quia ad harum partium inflammationem, & gangrænam nonnisi interitus brevi expectandus est.

APHORISMUS XXVII.

Mulier utero gerenti si tenesmus supervenerit, facit abortum.

Est Tenesmus, torminosus, & irritus ille conatus desidendi, & *Tozzi Op. Med. Tomo IV.*

egerendi fæces, in quo tamen vix musculum quid, sed cruentum, aliquando verò solus crepitus emittitur. Molestissimus sanè affectus, quo præter tormina, & intestinorum cruciatus, cupiditas deiiciendi perpetua est, nec desinet, etiamsi crebrò venter comprimatur, atque ad egestionem sollicitetur; quamobrem frequentem hanc molestiam, & ventris compressionem, vulgò *Premitti* appellare solent.

Id ergo si utero gerenti accidat, abortum facit, multis ex causis, speciatim ex his, quæ illum excitant; siquidem plerumque ab ambiente aere frigido subter excepto, à cibariis acidis, crudis, crassis, ac glutinosis, gelidis potionibus, fructibus ponticis, & acerbis, aliisque, itemque ex natura ipsius morbi, & ex situ partis affectæ, cum spincter musculus, & intestinum rectum eo afficiantur; denique attenta molestia symptomatum adjunctorum, præsertim verò torminum intestinalium, & assidua ventris compressione; quibus omnibus accidit sæpenumero stomachi tum in appetendo, tum in digerendo nimia imbecillitas, qua vires deinde non leviter imminuuntur. Atqui hæc utero gerenti potissimum infensissima sunt ob viciniam partis affectæ, & ob ingentem noxam, quam idem uterus subire cogitur ab iteratis compressionibus, quas cum infans diutius sufferre nequeat, alia ex parte multum ob carentiam alimenti labefactatus, proculdubio abortui succumbit, nisi Artis auxilio succurratur, de qua re in praxi.

APHORISMUS XXVIII.

Quando os, aut cartilago, aut nervus abscinditur in Corpore, neque augetur, neque coalescit.

Qua ratione sit denuò præsens aphorismus hoc loco insertus, cum alibi *aphorismo 19. sextilibri* latius, clariùsque eadem sententia referatur, & nedum de his, sed de aliis quoque similibus partibus discissis, ac resectis, explanare non ausim; nisi dicere cum aliquibus velimus industria librariorum fuisse adjectum, ut per ampliorem libri molem, hunc reliquis aliis coæquarent. Quomodocumque autem se res habeat, quia nil ultrà continet præter ea, quæ ibidem memorantur, eum locum adeat, qui de his instructus esse velit.

APHORISMUS XXIX.

Ei, qui leucophlegmatia detinetur, si fortis ventris fluxus supervenerit, à morbo liberatur.

Quid nomine Leucophlegmatie intelligat hic Hippocrates, non satis benè liquet; aliquando enim cum Ascite, quandoque etiam, immò plerumque cum Anasarca, aut Hyposarca confunditur. At verò contra Ascitem pugnare videtur *aphorismo 27. sexti*, in quo dicitur, quòd hydropicis sectis, vel uctis si aqua affatim exeat, moriuntur; cum hic ex adverso dicatur vehementem, & copiosum alvi fluxum illos liberare; quamobrem verisimiliùs putandum Anasarcam, aut Hyposarcam intelligendam esse, in qua crassa, ac lenta pituita, vel etiam lympa glutinosior reddita, in extimis parti-

bus corporis, & sub cute universa, diffusa hæret, nihilum compatientibus visceribus internis, ut *in prorrheticis* dicitur, sed solum vitio lymphaticorum vasorum resorbere per glandulas illam non valentium. Soluta namque fortiter alvo universus ille humor pituitosus, vel lymphicus glutinosus, per glandulas ipsas inter sese connexas, ac consentientes, facilè sensim, sensimque deducitur in proprios ductus, & salubriter evacuatur. Porro cum hoc evenit, validum naturæ robur indicatur, quæ non solum vias evacuationis patentes reddit, sed etiam humores ipsos evacuandos disponit attenuatione, dissolutione, lubricitate, nullo interea viscerum internorum detrimento exoriente; quod sanè faciliùs in Asciticis haberi solet. Atqui fluxus iste alvi vehemens, copiosus, & crassi illius humoris, qui peccat, esse debet, quemadmodum hic indicitur, ne scilicet tenuiores humores egerantur, crassioribus, ac tenacioribus relictis; quamobrem non immeritò notatum, *fortem, ac validum* esse oportere, ut à leucophlegmatia liberet.

Sed quamvis de Anasarca, aut Hyposarca sententiam hanc simus probabiliùs interpretati, haudquam tamen diffidendum, id ipsum salubriter quoque evenire posse in Ascite, in quo licet in abdomine contentus humor non tam facilè ad Intestina deduci possit, eo quòd supra peritonæum ille fluctuet; non rarò tamen factum est, ut parante sibi viam Natura, adhuc salutariter inter mali initia sit evacuatus, & cum Ascites altam ibidem non fixerit radicem, nec adjacentia viscera inferit, aut labefactaverit; quo casu etiam eos perire accidit, etsi ab uberrima seri evacuatione videantur suble-

sublevati, quoniam paulò post in novam feri collectionem, à labe in visceribus relicta, recidunt, laxatis simul unà glandulis, & vasis lymphaticis erosis. At verò neque hinc colligere audeant, qui adaucter à Naturæ evacuationibus ab Arte promovendas pari gradu procedere contendunt, licere nimirum prudenti Medico idipsum rationabiliter tentare, quod aliquando à Natura criticè peractum est: nam disparitas longa, lataque nimis est inter utrumque: Naturæ opus siquidem tempestivum, ac opportunum quis unquam, etsi peritus artifex, ad amissum poterit imitari? ut aliàs à nobis indicatum. Quin & ipsam quoque non rarò fallere, ac falli experimur, cum in iisdem evacuationibus, salubriter interdum inchoatis, tandem deficiat, & naufragetur sæpe sæpius æger in portu.

APHORISMUS XXX.

Quibus in alvi profluviiis excrementa spumosa sunt, iis ex Capite pituita defluit.

Diarrhœam non ineptè plerique multiplicem faciunt, tum pro diversitate humorum excretorum, tum pro varietate partium affectarum, unde illi originem ducunt; memorat autem hic Hippocrates eam, quæ à capite malè affecto, atque ab humore ejusdem causa congesto, & vel ingenito, vel non repurgato, derivat. Inquit autem illam internosci à spumosis excrementis per alvum egestis, non quòd ista, si compareant, cerebrum affectum certò designent, cum possint aliundè procedere, etiam ab ipsis intestinis; sed quòd malè affectum caput, si fortasse per intestinorum

cavitates exoneretur, excrementa spumosa deponat, atque ab iisdem apparentibus idipsum alleviari spes non levis adsit, quemadmodum in *Coacis prænotionibus* de Angina per intestinales vias solvenda, idem Auctor admonet.

Dicuntur autem spumosa excrementa, quæ præter mucum, tenacemque pituitam, bullosa comparent, & intermixtos flatus, illam attollentes, ac quodammodò fermentantes, necnon etiam crepitus adjunctos habent. Tales autem egestiones fiunt, quoties lymphicus, sive pituitosus humor acorem contraxit, & cum tenui, effœtoque felleo humore, ad intestina delatus commiscetur, qui cum è glandulis inter se invicem connexis prodeat, & potissimum à Cerebro, quod magna glandula ab Hippocrate dicitur, nil mirum si hic ab eodem censeantur ejusmodi spumosa excrementa è capite defluere, non quòd proximè spuma ipsa à Cerebro dependeat, sed quòd pituitosus, seu lymphicus humor ab ipso malè affecto, cæterisque glandulis potissimum proficiatur; qui deinde in intestinis à mistura cæterorum succorum, atque ab intermixtis flatibus spumose evadat; quin & non rarò, docente eodem Hippocrate *libr. de internis affectionibus*, & *libr. de Glandulis*, per ventriculum, & glandulas per ipsum intersertas ad alvum exoneratur; non levi interea, nec unica, sed ingenti, ac multiplici fermentatione in itinere promota à variis succis per ductus, & viscera occurrentibus, præsertim felleis, pancreaticis, & intestinalibus, ut ex Anatome constat; sed & per glandulas ipsas, in quibus seceratur, diversimodè commotus, atque inæqualiter discerptus, variis-

que salium generibus, pro varietate fermentorum, vel partium, per quas transit, imbutus, facillimè deinde spumescit, & quæ in intestinis invenit excrementa, pari conditione inficit, immò multò magis, coadjuvante nimirum accommoda ejus loci ad fermentandum habitudine.

Quod autem hic Interpretes opinantur de spumæ generatione, ab intercluso aere in liquoribus, vel motu exagitatis, vel calore ebullientibus, verum quidem est in iis, quæ extra corpus sunt, quibus aer intermisceri potest; at cum humoribus per corporis vasa discurrentibus, quomodò unquam externus aer commisceri queat, non benè liquet, nec rationabiliter sibi quis persuadebit, cum vix is pulmonis tracheolas subeat; quamobrem, quod Galenus in *comm. edocet: flatuosum spiritum, dum humori commiscetur, vehementem habentem motum, & inaequalem, ita quod ipse dirumpitur, & pituitam frangit in multas partes, & parvas*, spumam progignere, verisimiliùs aptabitur fermentantibus in seipsis humoribus inter se invicem commistis, ut mox est expositum, cum fermentatio ad localem etiam motum partium heterogenearum seipsas subigentium, per quam optimè reducatur. Cæterum adhuc si à Capite pituitosus, vel lymphicus humor non defluat, ut ex longo itinere, & cæterorum succorum commistione, agitari queat, & spumofus fiat; satis tamen erit si ex confluxu solùm prædictorum humorum inter se invicem fermentescentium commotio talis habeatur, ut excrementa spumescant, adeoque indicent, à laborante Cerebro pendere, si crassior lymphæ inde deducatur ob malam per ejusdem glandulas repurgationem, veluti per filtrum la-

xum plus justo, vel obstructum, habitam, quemadmodum in catharrhis, ut proinde per glandulas sensim, sensimque delabatur in ventriculum, & intestina. Constat autem ex Anatome consentire cum Cerebro glandulas penè universas corporis, tam arctè inter sese connexas, ut catenam indissolubilem efforment, ut præsertim sunt Corticales Cerebri, Papillares, Pituitaria, quæque in collo, jugulis, faucibus, & in Oesophago interspersæ sunt ad Ventriculi fundum usque, indeque ad intestina, Pancreas, Mesenterium, ut reliquas sileam viscerum planè omnium, & subtercutaneas dictas, quæ nexu equidem inexplicabili cum fibris partium, & præsertim membranacearum texturam efformant reticularem, ut fermè dixerim, aliud non esse humanum corpus, exceptis ossibus, quam exactam, elegantemq; compagem glandularum, fibrarum filo consutam, extructam, & intertextam. Quare, qui hæc in humano corpore consideraverit, planè perdiscet, qua ratione Hippocrates dixerit partes omnes inter se mutuò consentire, & consensum in toto corpore unum esse, *conspirationem unam, & omnia esse consentientia: & lib. de locis in homine inter initia scripserit; corporis autem singula partes altera alteri, ubi hinc aut illinc processerit, morbum statim facit, venter capiti, caput carnibus, ac ventri, & reliquæ omnes juxta eandem rationem, quemadmodum venter capiti, & caput carnibus, ac ventri, &c.* Et paulò infra: *Corpus porro ipsum sibi ipsi idem, ac simile est, & ex iisdem compositum est: similiter autem habet parvas, & magnas partes, itemque infernas, ac supernas: & si quis minimam partem*

Hipp. lib. de alimento. V. Gal. ibidem, & primo de usu part. cap. 8. & primo de natur. fac. cap. 13.

corpo-

corporis acceptam malè afficere velit, totum corpus affectionem sentiet, qualiscumq; tandem ea fuerit, propterea quòd minima corporis pars omnia habet, quacumque & maxima, &c. Hæc Hippocrates.

APHORISMUS XXXI.

Quibuscumque febricitantibus in urinis fiunt sedimina veluti farina crassior, longam ægritudinem fore significat.

Prognosticus hic aphorismus fortassè opportuniùs, & congruentiùs inter eos, qui *libro* 4. continentur, fuisset relatus, cùm ibi de his, quæ ad febres pertinent, sermo habeatur, sed quoniam Nobis nuspiam curæ fuit aphorismorum connexionem exquirere, aut veluti necessariam in hoc opere investigare, propterea parùm intererit, quo loco sit hic adiiciendus, modò sententiæ utilitatem, veritatemque fuerimus assequuti.

Urinarum sedimenta hic considerans Hippocrates in febrientibus, dijudicat ex illis futuras chronicas, ac diuturnas febres, si farinæ crassiori, vel furfuraceæ simile quid referant. Sunt enim sedimenta in urinis repurgamenta eorum, quæ è circulante sanguine in visceribus deponuntur, atque cum sero urinario ad filtra tubulorum renalium amandantur, ostenduntque propterea quidquid in sanguine, & visceribus, præsertim imi ventris superabundat, atque uti inutile fecernitur, ac repurgatur. Quoniam verò febres cùm longæ futuræ sunt, à crassis, lentis, tartareis, atque acidis succis progenitæ foveantur, & hi diuturno planè tempore egent, ut dissolvantur, at-

tenuentur, ac seponantur, per fermentationem in se ipsis promotam; proinde fit, ut cùm ejusmodi humores prævalent, longas quoque ægritudines excitent; quandoquidem hi non aliò promptiùs deduci solent, quàm ad Renes, quò superabundantes in sanguine, & visceribus humores, fermentis eorundem subacti, & secreti, simul cum sero urinario transcolantur, ac deponuntur, & actione inter se ipsos inita, acidum illorum à sale urinoso alkalino subitur, unde præcipitatio succedit cum depositione partium tartarearum, & crassiorum, quæ fundum matulæ petentes, sedimentum urinarium efficiunt farinæ crassiori simile; Quamobrem cùm istud in urinis comparet, indicio est, crassos, tartareos, acidosque succos in corpore prævalere, qui febrim foveantes, illam significant diuturnam, & chronicam futuram.

Cæterùm tunc solùm sedimenta istiusmodi farinæ crassiori similia morbi longitudinem indicabunt, cùm citrà sanguinis vel coagulati, vel dissoluti vitium, accidunt, à sola scilicet crassioris lymphæ, vel glutinosi seri abundantia; at verò si cum aliis pravis symptomatibus conjungantur, mali moris in sanguine vitium attestantibus, nedum mala erunt, sed etiam lethalia, ut contigit *Sileno*, & qui in *Dealcis borto decumbebat*, ut benè advertit Galenus; quoniam tunc non à multitudine, aut crassitie humorum dependent, sed à veneno dissolvente, & sua acritate veluti in cinerem redigente glutinosam sanguinis substantiam, quam reficere difficillimum est, & acre, ac corruptivum ejusmodi venenum retundere, ac debellare, penè impossibile; unde

unde tandem, fatifcente corde, animal perire cogatur.

APHORISMUS XXXII.

Quibus autem in urinis biliosa sedimina, ac supernè tenues sunt, acutum morbum significant.

Aphorismus hic contrapositus videtur præcedenti, quoniam sicut in illo sedimenta furfuracea, vel farinacea, veluti à pituitosis succis pendentia, chronicam, & longam ægritudinem portendere dicta sunt; ita in hoc à sedimentis suspensis, & elatis, utpote à biliosis humoribus exortis, acutus morbus prædicitur: & quamvis in priori, attenta potius videatur sedimenti substantia, atque conditio, in hoc verò locus, & positus ejusdem, si res tamen ipsa intimius pensitetur, idem omninò in utrisque, sub diversa licet consideratione, perpensum animadvertemus, cùm ea, quæ farine crassioris similitudinem referunt, fundum petant, quæ verò biliosa sunt in altum attolluntur; unde sediminis substantia in præcedenti aphorismo considerata re ipsa convenit cum situ hic memorato.

Naturalis equidẽm sediminis positus in urinis, ut salubritatis indicium sit, medius planè esse debet inter sublimem, & infimum, cùm is propriè pertineat ad hypostasim, quam tantoperè Medici in urinarum inspectionibus desiderant, eo quòd peractam, absolutamque in operibus Naturæ coctionem, secretionemque demonstret, quæ mediocriter in crassando procedere dicitur.

At verò variat plerumque sedimentum à conditione varia humoris concoquendi, aut secernendi; unde qui crassus, & lentus est, licet

Naturæ concoquenti, ac expellenti subiiciatur, imum semper suo pondere in urina locum petit; tenuis verò in altum effertur, & eo magis, quòd urina ipsa multo sale saturata est; quo sanè pacto gallinaceum ovum experimur in catino aqua salita repleto, sursum magis, vel deorsum tendere, prout paucò, vel multò sale marino imbuta illa fuerit.

Quoniam verò sedimina biliosa, præ cæteris tenuiora sunt, ut ex adverso à phlegmaticis, & crudis humoribus procedentia, crassiora, & compactiora; proinde fit, ut illa sursum attollantur, hæc deprimantur, & fundum matulæ petant: etenim illa volantis sulfuris, ista acidi coagulantis conditionem participant. Adjecit insuper Hippocrates biliosis hisce sediminibus, aliam in urinis conditionem, *ut supernè tenues sint*: quæ verba, cui aptanda sint, non satis liquet: & quidem non sediminibus, quæ cùm biliosa dicantur, planè tenuja quoque, ut dictum, esse debent; neque urinis, quoniam haudquaquam videntur posse simul esse biliosæ, & tenues, præsertim juxta expositionem Galeni, qui tenues arbitratur ex mente Hippocratis intelligendas perpetuò aquosas esse. Verum rationabilius illa congruentur urinis ipsis, tum secundum propriam substantiam serosam consideratis, tum secundum earumdem contenta, græcè hypostases; quoniam in ejusmodi casibus, ut acutiem morbi indicent, præter sedimentum biliosum, supernè tenues quoque esse solent; hac enim ratione neque multitudinem, neque crassitiem, aut oleositatem bilis significant; quippe fieri adhuc potest, ut cum sediminibus biliosis, urinarum substantia unde quaque crassa, & flavo colore plurimùm tincta copuletur;

tur; at verò, ut brevitatem, & acutiem morbi prænuncient, tanto humore flavo tinctæ, ac saturæ esse non debent, ut penè ictericæ videantur, cum multitudo, crassities, & oleositas ejusdem longitudinem potius præsignaret. Attamen nec omninò tenues, seu decoloratæ esse debent; ita enim malæ quoque forent, ob symptomatum, & signorum disparitatem, sed supernè solum, hoc est ea parte, qua sediminibus supernant, & per comparisonem ad infernam earundem partem, qua coloratiores, opaciores, crassioresq; erunt. Qua sanè ratione salino-sulphureus humor illas tingens, nedum tenuis, sed etiam modicus designatur, qui propterea citò concoqui, secerni, atque expurgari possit, unde postmodum morbi acuties, & brevitās. Quòd si fortasse tenuitas urinarum talis sit, ut flammeam conditionem referat, & illas reddat, quales alibi Hippocrates pellucas appellavit, tum sanè non solum acutus, sed etiam peracutus, & valde periculosus præsignabitur, veluti in delirantibus, ac phreneticis, detenta nimirum parte salino-sulphurea crassiori, atque alicubi in partibus principalibus hærente. Verum Galenus in *commentario*, *supernè tenues* non ad situm, sed ad tempus retulit, ut proinde voluerit eas tenues intelligendas fore inter initia, & cum nondum coctio in illis relucere conspicitur, quoniam inter initia morborum omnia cruda sunt, adeoque tenuia, & coctio, ut dictum, increassando procedit: At verò in eum, more suo, acriter invehitur Cardanus, quem adeat, qui velit, cum id nostra nunc non intersit.

APHORISMUS XXXIII.

Quibuscumque urina divulsa sunt, iis turbatio fortis in corpore fit.

QUod antea de urinarum sediminibus, nunc de iisdem in universum secundum totam substantiam, & contenta, consideratis, sermonem subiicit, aitque divulsas urinas fortem, seu vehementemurbationem in corpore significare.

Quid verò pro divulsis intelligat, licet Galenus in *commentario* dubitare videatur, si tamen perpendantur, quæ ipsemet Hippocrates aliis in locis adnotavit, & in Epidemiorum ægrotantibus observasse meminit, proculdubio minimè ambiget, divulsas, distractasque urinas dici, quæ sive in substantia serosa, sive in contentis, sive in utrisque sibi non cohærent, & inæquales, inconstantesque observantur, & modò tenues, modò crassæ, nunc uno, nunc alio colore tinctæ, & sedimenta disjuncta sursum, deorsum, aut ad latera, magis, minusve, concocta referunt, vel eodem tempore, vel diverso, quemadmodum in Philisco, in Pythione, uxore Philini, aliisque.

Quamquam autem indicia ex urinis desumpta non rarò fallacia sint, cum pleræque malæ creditæ, quibusdam consuetæ sint, & naturales, immò variata in ætatibus constitutione, victus ratione, exercitatione, aliisque, sæpenumerò etiam variæ esse solent, & pro re nata etiam nunc bonæ, nunc malæ, nisi peculiare adhuc viscerum, præsertim naturalium, affectiones, specialiter quoque illas permutent, ut in hypochondriacis potissimum, unde dubiæ prorsus conjecturæ deducantur;

atten-

attenta nihilominus æquabili corporis constitutione, ac nihilum prætereà permutata in suis ductibus urina, quæ à serosa sanguinis parte, & à lymphâ procedere putatur, proculdubio fidelius indicabit, quæ in vasis sanguiferis gesta sunt, aut in ductibus reliquis corporis, quos pervadit; quamobrem visceribus, ac ductibus omnibus in sua naturali habitudine constitutis, quando-cumque urinæ divulsæ, atque in suis partibus contentis discerptæ comparent, ingentem in sanguine commotionem attestantur: Tunc enim sic affectæ, ac distractæ minguntur, cum inæqualiter partes inutiles à sanguine secernibiles, & fermentationi subjectæ, non totæ simul repurgantur, sed prout à puriori parte sanguinis, tractu temporis secedunt, quare interruptim inutiles illæ impuritates in urinis observantur magis, minusve concoctæ, & compactæ; quò aliæ ab aliis melius per fermentationem subactæ fuerint. Eiusmodi itaque in urinis varietates indicant fortem, vehementemq; in sanguine commotionem, per quam partes inutiles ab utilibus sejungi necesse est; neque enim aliter istæ ab invicem secedunt, & separantur, quàm per fermentationem in præcipationem desinente, quemadmodum experimur in musto doliis incluso. Rectè ergo Hippocrates ab illorum sedimentis apparentibus distractis, ac divulsis, vehementem in corpore turbationem coniicit. Verumtamen commotio hæc, & turbatio non rarò etiam fieri solet in hypochondriis, cæterisque visceribus naturalibus, è quibus sæpè urina per compendarios meatus educitur, ut aliàs ostendimus; cum jam satis Anatome compertum sit, adhuc breviori itinere urinæ materiam

in renes percolari, ut propterea percuriales horum viscerum affectiones indicare soleat, ut de hypochondriacis dictum; quamobrem non immeritò Hippocrates indefinitè dixit: *fortem in corpore turbationem fieri*, comprehendens sub nomine corporis omnem, & quamcumque ejusdem cavitatem, ubi fermentatio, & heterogeneorum succorum comistio, & exagitatio haberi potest.

APHORISMUS XXXIV.

Quibus in urinarum summo bullæ insident, morbum renalem, & longum significant.

ERuit & in hoc aphorismo longi, & renalis morbi prognosticum Hippocrates ab his, quæ urinis insident, cujusmodi sunt bullæ parùm differentes à spuma, nisi quod hæc confertioem, sed humiliorem inclusi halitus elationem in materia crassiori, illæ veluti à materia hærente quidem, sed magis expansibili sublimiorem, latioremq; tumefactionem referunt, non tamen adeò arctè inter se connexam. Insident autem istæ urinis, cum in mictione sal universum, veluti ammoniacum volatile sali acido lymphico, & sero urinario commistum, mutua vicissim actione in tenues halitus elevantur, qui quoadusque extricari nequeunt à parte phlegmatica urinarum, supernatantes bullas, & perdurantes excitant; at verò postquam internonisu, atque adigentis externi aeris impulsu extenuantur, rarefiunt, & discerpuntur, statim dissolvuntur, & evanescunt.

Cum igitur hæ insidentes urinis apparent, Renalem morbum significant;

ficant; quoniam arguunt porulos, tubulosque renum, ac eorundem filamenta in pelvim desinentia, anfractuosa, & implexa evasisse, ut proinde non tam promptè transcolare sinant serum urinarium suo sale imbutum, à tartareis, acidis, viscosisque succis, per eas partes derivantibus, unde facilè, procedente tempore, tubuli ipsi, & cavum renum infarciri possint, & gravia calculorum, obstructionum, tumorum, aliorumque similium accidentium incommoda, ipsis inferre, si præsertim præter bullulas sedimentum illæ referant sabulosum, crassum, & feculentum. Ab his enim planè constat ægritudinem Renalem futuram longam, siquidem vitio crassorum humorum excitatæ ægritudines longæ sunt, & præsertim si acorem illi, ut plerumque fieri solet, simul unà contraxerint, quo crassities, & aciditas humorum difficulter subigitur, & cedit.

APHORISMUS XXXV.

Quibus autem summum est pingue, & confertum: iis renum dolor, & morbus esse acutus significatur.

QUod dixit de bullis infidentibus, nunc de superficie ejusdem urine pingui, & conferta pronunciat; sed multò gravius quàm antea, quippe exinde ait non longum, sed acutum morbum Renum significari. Apparet autem summa urine superficies pinguis, ab adiposa aliqujus partis substantia dissoluta, & liquefacta; atqui hæc non tam ingenti, exurentique calori renum, aliarumve partium circumstantium tribuenda est, ut Interpretes existimant, quàm sali erodenti, ac exolventi, per eas partes, cum sero u-

rinario transcolato, quòd etsi adipem ipsum jam concretum minimè diluat, aut corrodat, si tamen glutinosam substantiam alimentorum abra dat, atque exolvat, poterit quoque adiposam urinam reddere, & secundum superficiem pinguefacere, id quod plerumque fieri solet in febribus æstuosis, aut inflammatoriis; quamobrem acutus morbus exinde significatur. Nedùm autem pingue, sed etiam confertum, coactum, & concretum esse oportere adii citur, ut nimirum non oleosum, aut guttis adipis conspersum urine summum intelligatur, quo scilicet compacta substantia sit ex partibus excerpta. At verò falluntur, qui putant acutum morbum hic ab Hippocrate notatum Renibus ipsis insidere, cum is universaliter, atque indefinitè in aphorismo recenseatur, ut etiam è quibuscumque partibus, immò è toto corpore pendere possit; Renibus autem solus dolor adscribatur, qui planè tum ab acuto morbo cum febre conjuncto, tum etiam ab urina erodente, multoque acri sale, vim habente pungendi, & partium nexum solvendi, imbuta provenit. Hinc hallucinatos eos existimaverim, qui, ut Galenus in commentario recenset, pro nephriticis, phreneticos morbos exposuerunt, coarctantes Hippocratis dictum ad hunc unum dumtaxat particularem affectum, & quidem à renibus remotissimum; cum tamen urinæ, & urinarum contenta, si unquam probabilius quid significant, planè Renum, & Vesicæ affectiones specialius ostendunt, ut cunctis notum. Quòd si concretus adeps totus simul in urinis excernatur, nec iteratis vicibus appareat, ut confertim potius exeat, quàm confertum, coacervatumq; tunc profectò à renibus, & partibus circumstantibus

spe-

specialiter prodibit, eadem penitus de causa, ab acri scilicet, erodentique humore falso cum urinis excreto, vim habente refecandi, & abradendi.

Unde autem frustulum adipis, vel adeps ipse liquatus, deindeque in renibus concretus prodeat, non benè ex Anatome ab Interpretibus explicatur, quippe ex illa constat Renum substantiam in seipsa consideratam adiposam non esse, & canaliculos in ejus pelvim definentes, membranosos, fibrosos, ac duriusculos esse; ut nec tam facilè erodi, nec erosos adipem æmulari, sed potius strigmenta membranacea, vel filamentosa. Adeps autem, quo Renes circumvallantur, licèt multus sit, & undèquaque illos circumambiat, haudquaquam tamen in ejus substantiam, aut cavitatem patet; unde etiamsi liquetur, vel abscindatur, nullatenus potest in Renum pelvim deduci, & per urinas expurgari; quamobrem difficilè admodum videtur, viam invenire, qua ipse perducatur, & cum urina permisceri queat, ut supernatans in eadem compareat. Hinc verisimilius existimaverim, adipem in urinis apparentem, vel è glutinosa sanguinis portione prodire; vel è glandulis atrabilaris, & succenturiatis dictis, quæ consensum cum renibus ineunt, illuc guttatim deduci, ac deinde vel in renum pelvi, vel in vesicæ cavo concrefcere, & frustulum adipis æmulari. Sed fieri quoque potest, ut malè affectis renibus phlogosi, inflammatione, tumore, tam in suis porulis amplificentur, & hient, ut possint attenuati, liquatique, saltem ex parte circumambientis adipis substantiam excipere, atque in pelvim deducere, attenta præsertim Recentiorum Anatomi-

corum observatione, qua universa renum substantia refertur innumeris tubulis pervia, ac fibris, glandulisque quaquaversum intertexta, quæ ad pelvim undequaque patulam definant.

APHORISMUS XXXVI.

Quibus autem morbo renali laborantibus prædicta accidunt signa, doloresque circa spinæ musculos fiunt: siquidem circa loca exteriora fiant, abscessus quoque exterius futuros expecta: si verò dolores magis circa loca interiora fiant, etiam abscessus exspecta futuros interius.

Quæ hæcenus ab urinis deduxerat, nunc à doloribus potesticam renum partem occupantibus alia præfagit, & quidem futurum abscessum ad interiora, vel exteriora lumborum, prout illi internas, vel externas partes magis obsederint, aut pervaderint. Et quidem; quoniam Renes ad eas partes siti sunt, quæ lumbos, & lumbares musculos respiciunt, non raro proinde accidit, ut dolor unius partis, alterius dolorem mentiat, & aliquando dolores lumborum, & musculorum, tum ad spinam, tum ad abdomen pertinentium, præsertim cum tumefacti, ac inflammati fuerint, nephritidem referant; & è converso, attentis solummodò situ, & doloris qualitate, quandoquidem se quoque deceptum fatetur Galenus in internoscendo colico à nephritico dolore, ob earundem partium vicinitatem; quin & dolor rerum facilimè cum lumbis communicat, quemadmodum experimentis innotescit, & edocet etiam Hippocrates.

V. Hipp.
6. epid.
sect. 1.

res *lib. de internis affectionibus*; quomobrem plerique crediti nephritidem passi, inventi sunt subisse abscessum in musculis lumborum, ut de quodam Medico Pisano fatetur Mercurialis, & in quibusdam aliis observatum memorat Bonetus; quamquam dolor in his, atque doloris sedes omninò differentes sint. Accuratiùs igitur hic Hippocrates animadvertit, quibus jamdiu morbo Renali laborantibus prædicta accidunt signa, & ex urinis, earumque contentis, nihilum levantur, doloresque ad spinæ musculos protenduntur, facilè fore, ut circa ea loca abscessus fiant, interiùs, vel exterius prodituri, prout ad interiores, vel exteriores partes illi vergere videbuntur. Fiunt autem, perdurantque tamdiu ejusmodi dolores ab humoribus ad eas partes transfluxis, & non rarò etiam paulatina congestione concretis, quamdiu nec exolvi, nec per renes, aut ureteres ad vesicam, nec per alios ductus ad alvum transferri, & evacuari possint, sed in tumorem, & abscessum coacerventur; unde si renum substantiam, aut alias circumjacentes partes cum renibus consentientes occupaverint, & fermentatione, suppurationeque sensim inducta, fluidiores redditi fuerint, aliò tandem decumbent, atque (Natura tamen existente valida) per diruptionem, atque evacuationem aliquam se prodeant; si verò lumbares musculos pertingant, ad extimas rerum partes, in illis abscessus fiet: procurante interea Natura, qua porta data possit illos exonerare. Hæc autem præter antedicta comitantur febres suppuratoria vocatæ, manifesta in lumbis elatio, ac tumefactio, itemque rubor, ac dolor, tactu longè sensibilior, quibus pru-

dens, ac diligens Medicus, pro re nata, congruis remediis, vel internè, vel externè administratis, opportunè opitulabitur.

APHORISMUS XXXVII.

Quicumque evomunt sanguinem, si sine febre quidem, salutare: si verò cum febre, malum. Curare verò acerbis, & refrigerantibus.

Verbum, evomere, quamquam alibi videatur latiori significatione ab Hippocrate usurpatum pro quacumque sanguinis per os rejectione; hic nihilominus strictè sumptum audiendum est pro eadumtaxat, quæ è ventriculo procedit, cujus actio specialis est vomere. Eos igitur hoc loco considerat Hippocrates, qui sanguinem evomunt, idest ex ventriculo sanguinem eructant, seclusis iis, qui vel è pectore, vel è capite illum expuunt; quippe haud facilè foret febre exemptos eos inveniri, qui sanguinem tussi, atque ex pectore egerunt, saltem procedente tempore excreationis, vel ratione ipsius sanguinis multò antea malè affecti, aut postea alicubi stagnantis, & suppurati; qui verò simplici excreatione è faucibus, aliisque adjacentibus partibus illum expuunt, veluti rem nimis levem patientes, haudquam videntur sub tanta Aphoristica sententiæ contemplatione comprehensi, longè admodum ab Hippocratis proposito, qui res graves, & notatu dignas solummodò in aphorismos redegit.

Sed unde est, quòd alibi *libr. 4. aphor. 25.* scripserit: *sanguinem, qualiscumque is sit, supraferri, malum*, hic verò, saltem sine febre, salutare esse dicat? Verùm comparatè

ratè locutum animadverteret, qui distinguet, ibi contulisse supernam cum inferna sanguinis evacuatione: hìc verò modum expurgationis ejusdem, vomitu ne, an tussi; unde locus etiam valdè differens conici possit sanguinis rejecti: siquidem ab his longè graviora, vel mitiora imminet mala, adeòque præsagia itidem deducuntur periculosiora, vel tutiora. Equidem sanguinem evacuare, nunquam bonum, quia talis evacuatio est de genere eorum, quæ nunquam debent excerni. Facta autem comparatione, si aliquando ipsum egeri contingat, pejus est supra, quàm infra evacuare; ex illis verò, quæ per supernas partes accidunt, sanguinis evacuationes, minùs malum est vomitu, graviùs planè tussi, levissimum simplici scretu illum rejectari, quoniam hic ex ore, & faucibus, ille ex ventriculo, mediùs inter utrosque è pectore, aut pulmone prodit.

Quoniam verò adhuc, qui sanguis vomitu eiicitur magis, vel minùs malus esse solet, hinc Hippocrates ab adjuncta febre illum discriminandum edocet; & quidem sine febre salutarem, cum febre verò malum esse ait; Atqui salutarem hìc subaudire decet, non quòd profit, aut salutem inferat, sed quòd in salutem facilè terminetur; nisi etiam dicere velis, salutarem esse, quoniam exoneratur Natura sanguine illo, qui extra vasa si stagnaret, vitæ periculum afferret, & fortassis etiam mortem; quippe sanguis non tam obest egestus, quàm cum extra vasa alicubi hærens coagulatur, & corrumpitur.

Cur autem salutaris dicatur, qui sine febre accidit, contra verò, qui cum febre fit; ratio facillimè deducetur, quia cum febre junctus vitium in sanguine arguit, qui falsa

acritate venas, aut arterias erodat, & sibi exitum faciat; cumq; non tam facilè sit vitium istiusmodi à sanguine delere, atque erosa vasa conglutinare, propterea malus omni ex parte existimandus est, attenta præsertim ventriculi structura membranacea, quæ corrosa difficillimè refarcitur; & si aliunde sanguis ille prodeat, atque in ventriculum exoneretur, adhuc malum prænunciat, veluti signum labefactati, aut exoluti visceris, infectique sanguinis. Contrà verò, sine febre excretus sanguis, non tam malus est, quin potius in salutem facilè terminatur, cum citrà sui vitium prodeat, & per solam, ut dicunt, anastomosim, apertis, dilatatisque osculis arteriarum, aut venarum, quæ plerumque sponte sua corrugari, & couniri solent, præsertim si aliunde is effluat, quàm è ventriculi cavo: qua sanè ratione evenit, quam obrem salutaris dici etiam possit, inducto in viscere ipso malè affecto levamine, quod neutiquam haberetur, nisi per vomitum sanguis fuisset excretus: id quod tamen adhuc accideret, si per alvum deponeretur, ut aliàs ostensum.

Nedum autem consistit Hippocrates in vomitus sanguinei prognostico, sed methodum quoque adiicit eundem curandi, indicatione nimirum sumpta ab ejusdem exitu, qui planè tum ratione ipsiusmet sanguinis excreti, tum etiam partis laborantis, & evomentis, longè urgentior videtur, etiamsi febris adjungatur, quæ sæpenumerò symptomatica (ut dicitur) esse solet. Omisit autem indicationem à febre desumptam, vel quòd non semper cum sanguinis vomitu copuletur, vel quòd secundo loco consideranda sit, & subsequenti tempore, eoque longiori,

giori, adimplenda, quæ nimirum directæ sit ad vitium sanguinis adimendum; vel quòd demum, edomito sanguinis fluxu, ipsa sponte sua sit desitura, repurgante intereà, quod alienum in sanguine est, Natura, per convenientia corporis secernicula, quoties sanguis opportunis remediis promptè constiterit. Hæc autem fore subdit, acerbæ, seu adstringentiæ, & refrigerantiæ, quæ scilicet simul unâ oscilla venarum, & arteriarum agglutinent, fibrosam, glutinosamque sanguinis portionem figant, & coarctent, ac denique sanguinem ipsum temperent, atque in suo motu aliquantulum remorentur; quorum sylva magna est apud Practicos: præcellunt autem, quæ ex chalybe, & vitriolo confecta sunt, cum succis plantarum, bistortæ, centinodii, pyrolæ, aliarumque. Cæterum vomitus sanguineus cum febre ab interna inflammatione nullus erit, vel simul unâ purulentus observabitur, si nimirum dirupta, ulcerataque illa fuerit, adeoque non multò postea lethalis. Erit tamen summopere advertendum, an non sanguis è venis, aut ab arteriis egressus, atque conversus in grumos, ventriculi cavum occupet; tunc enim acerbæ istæ, atque adstringentiæ medicamenta haudquaquam forent administranda; quippe quæ magis concretum sanguinem coagularent, ac figerent; quin immò communicato inde illi acore, non solum in fermentationem eundem adigerent præternaturalem, sed etiam infractis, depravatisque succis ventriculi digestivis, ventriculum ipsum labefactarent, & chylosim impensè admodum vitarent; quomobrem expediet tum primum concretum sanguinem dissolvere, & educere, postmodum oscula venarum, aut arteriarum occludere, & coarctare.

Tozzi Op. Med. Tomo IV.

Coniiciemus autem de grumis ventriculum occupantibus à pondere, laxitate, anxietate, & ciborum fastidio, sicut etiam ab assiduo vomendi conatu, aliisque symptomatibus epigastricam regionem molestantibus. Verum tamen utramque paginam adimplebit mistura illa Sylviana ad vomitum sanguineum compescendum per opportuna, præter alia plurima dissolventia ex testaceis potissimum petita. Atqui hæc convenient solum in anastomosi, & in simplici refectione vasorum; etenim in erosione, aut ulcere, alia omnino differentia essent adhibenda, ut propterea hic arguere liceat, Hippocratem non alium sanguinis exitum memorasse, quam ex sola aperitione venarum, & arteriarum, ut dictum.

Adnotare insuper convenit quam ex parte probabilius suspicari fas sit sanguinem prodire, num scilicet ex ipso met ventriculo, aut gula, an potius ex inferioribus, aut collateralibus visceribus; etenim pro earumdem partium varietate adhibere quoque conveniet varia, eaq; specialiora medicamenta, sine ipsius ventriculi incommodo, qui non nisi ex consensu illarum sanguine opletur, atque ad vomendum laceffitur. Hæc autem facile erit interno-scere ex eorummet viscerum affectionum læsione, tumore, dolore, excreti sanguinis quantitate, ac qualitate, aliisque symptomatibus adjunctis, & causis prægressis, de quibus latius in praxi.

Postremò vomitus sanguinis ex dirupto Aneurismate, adhuc sine febre lethalis est, quin immò momento temporis interimit, ut pluries observatum.

APHORISMUS XXXVIII.

Distillationes in ventrem superiorem suppurantur intra viginti dies.

Quid nomine distillationum hic intelligat Hippocrates, hallucinatos plerosque video, qui putant pituitosos humores in Cerebro collectos sensim per glandulam pituitariam dictam, in os, & guttur irruere, ac postea per tracheam delabi in pectus, & pulmonem; ubi si diutius detineantur, fortè quia per tussim, & anacatharsim educi non potuerunt, putrescunt, & in pus verum, vel aliud æquipollens commutantur: quamobrem distillationes hi ad catarrhos revocant, de quibus extant versiculi illi.

Si fluat ad pectus, dicatur Rheuma Catarrhus,

Ad fauces Branchos, ad Nares esto Coryza.

Quin insuper existimant illas potissimum à vaporibus è visceribus naturalibus plus justo excalefactis exoriri, qui sua tenuitate ad Cerebrum elati, ibiq; concreti (quo pacto experimur in distillationibus arte promotis usu alembici) ac denuò in serosos humores redacti, sponte sua decidant in subjectas partes, & præsertim in pectus, & pulmonem; ubi, nisi citò expurgentur, maturationi subiiciantur, & suppurentur, ac proinde spurium empyema progignant, de quo hic Hippocrates.

At hæc Recentioribus non arrisere, quippe qui figmenta dicunt, quæ de viscerum naturalium excalefactione illi commenti sunt, deque attenuatione, evaporatione, & concretionem humorum, cum & nec vias, per quas efferantur, nec meatus, per quos

in pectus decumbant, patentes, hætenus Anatome detegere potuerit; quamobrem ad vasa lymphatica opportunius confugere coacti sunt, veluti, quæ majorem consensum cum partibus inferioribus tum gutturis, tum pectoris habere conspiciuntur. Verùm adhuc mihi superest animadvertendum, solere in gravedinibus Cerebrum exonerari per corticales suas glandulas in nares, aures, collum, tonsillas, cæterasque per guttur, & fauces dispersas; unde multoties affluenter serositates illæ expurgantur, & quandoque etiam raucedines, anginae, tussis, aliæque affectiones exoriuntur; quamobrem verisimile admodum est per consentientes glandulas posse cerebrum, saltem secundum exteriorum ambitum humoribus gravatum, in subjectas partes exonerari, licet ductus, per quos illi deferuntur, lymphatici esse soleant, quorum interest exuperantem lympham, aliasque humiditates referre è glandulis exceptas, atque depositas. In quem sanè sensum audiendus Hippocrates, cum dixit *primo de morbis: Pituita multa, cum confertim è capite in ventrem superiorem fluxerit, putrescit, & pus evadit.*

Quandocumque igitur ejuscemodi humores lymphici, aut serosi, è capite, cerebroque in ventrem superiorem, sive in thoracem, decubitus fecerint, inquit Hippocrates, nisi citò aliò deferantur, atq; per urinas, vel per sudorem, exitum inveniant, infra viginti dies suppurari, idest maturari, concoqui, & puriformem conditionem adipisci, cum reverà puris naturam subire nequeant, quod non nisi à sanguine stagnante proficiscitur, ut aliàs dictum. Atqui necesse est, eos concoqui,

qui, & maturari, ut expelli possint; siquidem coctionis beneficio crassescunt, & impulsu per tussim à pectore susceptum sustinent, & admittunt; nam tenues, & fluidi cum sunt, impellenti pectori cedunt, ac denuò in ejus cavum delabuntur, quemadmodum in liquidis omnibus impulsis experimur: statuit autem vigesimum diem pro termino ejusmodi maturationis, non quòd ad illum præcisè diem concoctio ista, & maturatio perducenda sit, cum possit etiam in validioribus, & junioribus corporibus multò antea promoveri, sed quia infra hoc spatium, in occluso pectoris cavo, facile stagnantes humores concoqui possunt, ac deinceps ad subsequentes dies, usque ad quadragesimum, expurgari, ut de pleuriticis aliàs edocuerat. Verumtamen, ut materia in pectore collecta re ipsa maturationem, coctionemque subeat, intra hoc spatium viginti dierum, novam aliam defluentem admittere non debet, aliàs concoqui, seu suppurari illa non posset; quin & nec ab inspirato frigido aere, aut ab epotis gelidis, crudisque sorbitionibus, recrudescere; frigidum enim pectori inimicum est, & coctioni officit, non proficit: quod profectò plerique nulla ratione servantes, catarrhos etsi leves, in longissimum tempus protrahunt, & multoties etiam exinde empyematici fiunt.

Haud denique in calce hujus aphorismi omiserim, pilulas quasdam plurimum conferentes ad ejusmodi destillationes reprimendas memorare, potissimum si salsam, acremque conditionem referant: potenter enim illas temperant, ac sistunt: conficiuntur autem ex *thuris masculi, seu olibani, & mastiches an.*

scr. i. myrrhæ, opii, & croci singulorum gr. vii. succ. liquiritiæ dr. i. & cum aqua rosarum f. pilulae, ad magnitudinem pisi, quarum una sumatur tempore somni.

APHORISMUS XXXIX.

Si quis sanguinem minxerint, & grumos, & stillicidio urinae laboret, & dolor inciderit in anum: ventrem, pectinem, & ad anum: circa vesicam morbus esse significatur.

DE hoc dictum satis lib. 4. unde quo pacto hic iterum sit insertus, non video; eum ergo locum adeat, qui velit.

APHORISMUS XL.

Si lingua repente incontinens fiat, aut aliqua pars corporis stupida: tale est melancholicum.

Dictio græca ἀρπαγῆς, qua hic utitur Hippocrates in linguæ vitio, ad melancholicos internoscendos, magnam sanè apud Interpretes excitavit dissentionem; quippe Leonicens incontinentiam, Cardanus procacitatem, alii immobilitatem exposuerunt: Galenus verò in commentario eam vult esse, quæ ita infirma est, ut non possit integrè vocem de articulare, aut immobilem, & omninò resolutam esse: ex his autem, expositionem primam solum retinet, & commendat Mercurialis, ut proinde verbum ἀρπαγῆς significet linguam, quæ difficulter firmatur, & quando non oportet sistatur, ob sui imbecillitatem; nam quæ penitus, subdit, resoluta est, comprehenditur sub secunda aphorismi dictione, in qua dicitur, aut aliqua

pars corporis stupida; alioquin aut idem bis repeteretur, aut lingua non esset corporis pars. In hanc eandem sententiam concesserunt reliqui tum priores, tum posteriores Interpretes. Verum Cardanus cunctos redarguens pro incontinenti lingua exponit, quæ plura loquitur, quam deceat, ut propterea sensum Hippocratis eum esse dicat, melancholicum indicari, cum quis repente absurda, & turpia loquitur. Sed contra observat idem Mercurialis, ejusmodi linguæ incontinentiam, seu procacitatem esse potius, cujusvis alterius, insaniam indicium, quam veræ melancholiæ. Et quidem attenta humoris melancholici conditione, haudquaquam accidit, ut incontinentes, ac loquaces melancholici sint, multoque minus procaces, & lubrici, absurda, & turpia loquentes. Sed & de linguæ immobilitate haud omnino dici potest aphorismum esse intelligendum, nam etsi melancholici taciturni plerumque sint, solitarii, tristes, cogitabundi, non tamen prorsus stupidi observantur; modo immobilitas hæc cum stupiditate confunderetur, quam adjecit in aphorismo Hippocrates inquit, *aut si aliqua pars corporis stupida*. Ex his ergo colligere planè est aliud quid per verbum *ἀπαιτὴς* hic illum voluisse subaudiendum, aliter idem bis repeteret per diversa.

Verisimilius itaque per verbum *ἀπαιτὴς* ineptitudinem, impotentiam, hæitationem, seu trepidationem interpretabimur, quæ certè accidit sunt melancholicis familiaria, quæque, ut plurimum, eosdem invadunt, & arripiunt, cumque non tantum corpulentia, aut terrestriitate, sed potius halitu acido, & pontica conditione, per quam solent momento ferè temporis molestari,

& stuporem, ac ecstasim, seu congelationem pati, ut in Catalepticis, propterea non absque adjectum in aphorismo adverbium illud *repente*. Et quamvis Aristoteles in *problematicis* scriptum reliquerit melancholicos in Republica administranda, in carminibus pangendis, & in rebus philosophicis extitisse optimos; hi potius meditando, ac scribendo, quam loquendo valere solent; quinimò de melancholicis virtute, prudentia, ac moribus, veluti à natura, non autem à morbo, & causa morbosa aliàs sumus interpretati.

Adjectum est autem in aphorismo *repente*, seu *subito*, contractis, convulsisque musculis linguam componentibus, non quidem à corpulentia humoris melancholici, craffi, & tartarei, sed à qualitate ejusdem acida corrugante, ac figente: acidum enim, quod in eo prævalet, non rarò oberrans, citò cunctos meatus corporis pervadit, & nervos potissimum afficit, eorumque fibras coarctat.

Quòd si nedum vapore, aut halitu, verum etiam craffitie, & lentore, capita, & oscilla nervorum obstruat, stupore, ac paralyfi partes afficit; quamobrem in aphorismo dicitur, *aut aliqua pars corporis stupida fiat*; siquidem acidus humor, melancholicus dictus, corpulentia exolutionem, ac core verò convulsionem inducit. Atque hinc etiam deducitur, quamobrem linguæ incontinentia ad impotentiam, & taciturnitatem, non verò ad loquacitatem referenda sit, ne scilicet Hippocratis mens in duo omnino disparata, ac veluti opposita symptomata, ab uno, eodemque humore provenientia, deducatur. Quamquam etiam fieri possit, ut ab eodem acido, vitiosoque humore dege-

degenerato, ac vellicante fibras nervorum, non solum linguæ loquacitas, & musculorum omnium commotio, sed impetuositas quoque corporis universi, excitari possit, veluti in Maniacis; unde idem Hippocrates 6. *aphorif.* 56. scribit: *in morbis melancholicis in hac pericula inciditur, stuporem corporis, vel convulsionem, vel furorem, vel aecitatem significant.*

Cum hæc scriberem, contigit Romæ, ut vir quidam religiosus, & planè doctus, à perturbata vehementer imaginatione cum metu ex imminenti famæ periculo, adeò mente commotus est, ut attonitus fieret, & vocem articulare nequiret, quinimmò vix posset pedibus stare; post multos verò dies viribus, & animo reffectus, convaluit, sed adhuc mente hebes perstitit, & in operibus animalibus imbecillus; quamobrem constat solere non rarò melancholicos attonitos evadere, & lingua, ac voce titubantes fieri.

Unde autem id illis accidat, facile quispiam deducet ex humore ipso melancholico acido, cujus maleficio spiritus animales, & nervi, qui plurimi in linguam confluunt pro ejusdem motu, & loquela, acore infecti, inefficaces fiunt, & nequeant pro indigentia linguam promptè ad varios motus peragendos sollicitare. Sed & quod linguæ accidit, sæpè etiam ad alios musculos extenditur, adeoque impotentes ad corporis pondus regendum observantur: quò profectò fit, quamobrem pusillanimes, repentinoque timore præhensi, aliquando repentè concidant, & nec pedibus stare, nec progredi possint. Notanter autem de linguæ trepitatione, titubationeque, mentionem hic fecit Hippocrates, utpote, quæ proximior cerebro

Tozzi Op. Med. Tomo IV.

est; unde labes ista melancholicorum; cùmque ea musculis plurimis sit referta, quandocumque in suis motibus fatiscit, cæteras partes gravius affici posse pari vitio demonstrat; proindeque subditur hoc eodem aphorismo, *aut pars aliqua corporis stupida fit, tale est melancholicum*, idest morbo melancholico affectum, cohærenter illi, ubi dicitur *sit timor, atque mastitia longotempore perseverant, tale est melancholicum.*

APHORISMUS XLI.

Si senioribus supra modum purgatis, singultus supervenerit, non bonum.

QUod antea indiscriminatim de cunctis à medicamento cathartico singultientibus dixerat, nunc mirum, cur id ipsum repetat non bonum in senioribus, cùm hoc idem poterat ex antedictis facillimè deduci; quamobrem sana ratione à plerisque factum, ut aphorismum hunc è medio sustulerint, veluti inutiliter ab aliis, quàm ab Hippocrate, hoc loco insertum: id quod & nos pariter agentes, ad utiliora transeamus.

APHORISMUS XLII.

Si febris non ex bile fit, multa aqua calida capiti superinfusa solutio fit febris.

FEbres omnes ex bile fieri aliàs expressè docuit Hippocrates, præsertim verò *lib. de Natura humana*, & 2. *ac* 4. *de morbis*: eas autem intelligere oportet, quæ ab humoribus vitiatis progenitæ dicuntur, quales sunt, quæ Antiquis putridæ, &

T 3 humo-

humorales appellantur, tertianæ, quartanæ, quotidianæ, exceptis hecticis, atque ephemeris; unde febres omnes hic ab Hippocrate memoratas humorales dumtaxat interpretari licebit, contra id, quod arbitratur Galenus *in commentario*: Et quamvis quotidianæ, ac quartanæ febres iisdem fieri credantur à pituita, vel melancholia putrescentibus, non autem à bile, bene tamen juxta mentem ejusdem Hippocratis, adnotat Prosper Martianus in commentariis ejusdem, & ante ipsum Mercurialis, *hoc loco*, adhuc in ipsis bilem causam esse, cujus scilicet maleficio, instar sulphuris, cæteri humores effervescent, & inflammantur; ut propterea rectè scriptum sit ab eodem Hippocrate, febres omnes ex bile fieri; quod scilicet ab hac solummodò reliqui humores in motum, commotionemque febrilem adigantur. Et sanè, quandoquidem etiam à Recentioribus dicitur nuspian sanguinem, lympham, succum pancreaticum, aut alium quemcumque humorem febrem parere posse, nisi per alterius acrioris humoris, qui biliosi, ac fellei conditionem referat, missionem, in motum fermentativum adigatur, & sanguinem ad celerius circulandum provocet, & commoveat: id quod communissimum fuit Vetusioribus omnibus, etiam ante Hippocratis tempora, ut deducitur ex eodem citatis locis.

Itaque de iis solummodò febribus scriptus videtur hic aphorismus, qui hecticarum, & ephemerarum naturam sapiunt, ad redarguendos scilicet Medicos illos, qui cunctis indiscriminatim febrientibus, capitis, & totius corporis ablutionem commendabant, quemadmodum refert Celsus de Cleophanto *lib. 3. cap. 14.*

Quamobrem ejusmodi lotionem convenire solum docet in ephemeris, & hecticis (potissimum ex laboribus, lassitudinibus, cutis constipationibus, cæterisque) minimè verò in putridis dictis, & humoralibus febribus. Sed & advertit quoque, per quam optimè Mercurialis, ex doctrina ejusdem Hippocratis 2. *epidem. sect. 6.* nec febrem propriè, ac strictè acceptam, sed calorem dumtaxat excedentem, qualis in febre levissima, hic intelligendum, documento etiam Galeni *primo epidem. ægr. 12. & 3. ejusdem operis* ægro 2. quemadmodum idemmet in *libris methodi medendi*, pro curatione ephemerarum; & hecticarum febrium, ex Veterum more latius prosequitur, & proponit. Sed & num Hippocrates propria, an potius aliorum prædecessorum sententia, id protulerit, adhuc plerique non irrationabiliter abdubitant; cum aliter ipse de febrium natura, & causis videatur opinatus. Cæterum etsi calidam aquam capiti solummodò superaffusam, febrem solvere fateatur, non tamen exinde colligere est, ut reliquum Corporis excludat; siquidem Antiqui de more habebant, nedum caput, sed etiam totum corpus abluere, ac detergere.

APHORISMUS XLIII.

Mulier ambidextera non fit.

J Amdiu mente revolvi, quomodo unquam potuerit Hippocrati in mentem cadere, sententiam hanc inter aphoristicas collocare, quæ nec doctrinæ gravitate, nec sententiæ pondere, nec ad rem Medicam faciendam utilitate, videtur tantò Viro digna; quæque siuspian inter apho.

aphorismos recensenda visa fuisset, certè sermonis analogia, inter eos, qui libro quinto continentur, ubi multa de fœminis referuntur, repouenda foret. Sed &, cùm Galenus *in commentario*, ex quibusdam Authoribus exponat, ambidexterum hominem intelligi, qui ambabus manibus pro dextris utitur, quemadmodum fertur Homero fuisse Aristopœum; si id ipsum fœminis adscribere vellemus, planè constaret, non unde quaque verum esse; cùm licet nonnullæ fuerint, quæ dextræ manus opera ad sinistram etiam transtulerint, non æquè tamen benè, nec cuncta manuum ministeria, pari dexteritate, vi, atque vigore, illa peragere potuisse, ambigere valdè est. Plerasque equidem novi, quæ acum, forcem, glomum, (atque adeò suere, incidere, glomerare, nere) sinistra manu expeditè nimis, & agiliter tractarent, alia verò munia nequaquam, & non nisi dextra solùm, nec è converso: quamobrem etsi nonnulla manualia exercitia mulieres plurimæ sinistra manu agant, non tamen illa eadem, nec reliqua omnia, æquabiliter dextera peragunt.

Sed nec mares ipsi, qui lævi-dextri referuntur, æquè viriliter, ac pari robore, sinistra, ac dextra utuntur, cùm plerique strenuè admodum sinistra digladiari visi sint, scloppum verò, aliaque instrumenta bellica, non nisi dextra solùm, prout una, vel altera manu ad istiusmodi opera peragenda usum assiduitate contraxerunt. Rustici, & Agricola ingentia, & ponderosa nimis instrumenta promptissimè tractantes, calamus tamen in scribendo vix regere valent. Est apud nos Citharædus, qui læva mirabiliter fides pulsat, nullatenus autem dextra va-

let; atque in his, aliisque similibus, alii, alia. Quocircà rari admodum erunt, quæ æquè benè utraque manu omnia persolvant, aut æquali dexteritate, vi, ac promptitudine, præfertim, quæ majus robur, firmumque exigunt. Hinc non irrationabiliter factum crediderim, quamobrem isti italicè *Mancini* vocitentur, veluti mancami, ac deficientem alterutram manum habentes, ut propterea, prout usus, & frequentior alterutrius manus exercitatio prævaluerit, aut lævi, aut dextri magis, minùsve præpotentes evadant; unde licet Plato 3. *de legibus*, paucos viros, nullas verò fœminas ambidexterarum fieri dixerit, id tamen non ad virtutis imbecillitatem, & caloris inopiam, quæ sinistro lateri inesse creditur, sed ad defectum exercitationis ejusdem, causam retulit, exemplo à pedibus desumpto, qui pares, & æquipotentes in suis operibus observantur, quia parem in stando, & incedendo usum, & exercitationem ab ortu subiere. Et quidem plurimùm in his valet assiduus exercitationis usus temporis diuturnitate comparatus. Hac quippe arte Amazonidas, Sauromatas, & Scythicas mulieres in sagittis jaculandis, & bellicis instrumentis tractandis excelluisse refert Hippocrates *lib. de aere, aquis, & locis*, quoniam à pueritia ea exercere consuevissent. Experimur pariter Artifices omnes, qui ab ineunte prima ætate sinistra simul, & dextra manu, malleum, asciam, ferram, terebram, aliaque Artium instrumenta æquabiliter tractare consueverunt, utraque manu deinceps, pro arbitrio uti solere, & si fortassis sinistram potius, quàm dexteram exercere consuescant, illa potius quàm ista prævaleant. Fuit ali-

V. etiam
Arist. 2.
de hist.
animal.
c. 1. & 31.
f. probl.
12.

quandò, qui tam benè usum scribendi sinistra manu sibi comparavit, ut non meliùs dextera characteres efformaret, non alia planè industria, quàm assuetudine perpetim à prima ætate puerili acquisita. Non multis ab hinc annis per Italiam prodigiosa quædam mulier vagata est, quæ pedibus peragebat quidquid à cæteris sola dextera manu perfici solet: tantum valet contractus ab initio vitæ usus, ac frequens, & iterata eorundem actuum exercitatio.

Cum igitur hæc ita sint, non absere verendum videtur, ab alio prorsus, quàm ab Hippocrate sententiam hanc hoc loco fuisse interseptam, ut propterea si alius unquam inter adjectos aphorismos dicendus est, de isto planè suspicari omnino licebit, ex nuper allatis.

Cæterum, qui ambidexterarum distas volunt (ut memorat Galenus in hoc commentario) *quæ parte uteri dextra genitæ sint*; adeoque ambidexterarum fœminas, non fieri, quod in utraque uteri parte minimè generentur: tam longè à veritate declinant, & ob Anatomæ inscitiam falluntur, ut nullius penitus mereantur assensum; cum non minùs in dextra, quàm in sinistra uteri parte progigni femellæ visæ sint. *His adhuc magis à ratione alienum* (subdit in eodem commentario Galenus) *alii ajunt de iis, qui hermaphroditum nominantur, Hippocratem esse locutum, quasi dicat mari quidem pudendum accrevisse muliebri, mulieri verò virile, minimè.* Quandoquidem id remotissimum est ab Hippocratis mente, nec ullatenus aptari potest huic aphorismo, in quo de utriusque manus dexteritate sermo fit; quin & fœminis virile membrum, aut quid simile, ex elongata clitoride, succrevisse, ac foras

prodiisse, non semel observatum; maribus verò muliebria pudenda nequaquam.

APHORISMUS XLIV.

Quicumque suppurati uruntur, vel secantur, si pus purum fluxerit, & album, evadunt: si verò subcruentum, & fæculentum, ac fætidum, pereunt.

A Libi edocuit Empyicos uftos, vel sectos à pure affatim exeunte periclitari, nunc à qualitate puris exeuntis, bonum, vel malum eventum prælagit; aitque, si pus album, purumque exeat, bonum, si verò subcruentum, fæculentum, & fætidum, exitium portendi. Cum enim pus album, & purum prodit, neq; materiam in pectore collectam pravam, & deleteriam, neque ulcus sordidum, aut malignum designatur; quamobrem facillè fit, ut ab illius exitu, nulla in pectoris cavo relicta noxa, revalescant ægrotantes; quod fecus accidit, si pus inde prodiens fæculentum, & fætidum compa-ruerit, unde de ulceris pravitate, & de humoris ibidem collecti, ac suppurati malitia judicare est. Subcruentum autem pus rebellem, contumacemque humorem, non satis conditioni substantem indicat, qui & sanguinis è vasis pulmonis profusionem facilem, ac subitanæam pertimescendam arguit; unde periculosior eventus. Id ipsum habet idem Hippocrates in *Coacis prænotionibus*. Verum quod in empyicis tempore Hippocratis frequentissimè, sectionis, aut uftionis opera peragebatur, nunc penitus exolevit.

Quoniam verò indiscriminatim Hippocrates dixit *suppuratos*, an-
sam inde plerique arripuerunt, ut
etiam

etiam Galenus meminit, de quibuslibet suppurationibus in quavis alia Corporis parte habitis intelligendum. Nihilominus rectè idem Galenus advertit propriè suppuratos ab Hippocrate nominari eos, quibus inter thoracem, & pulmonem acervatum pus est, quos urere consuevisse Veteres adiicit ex Platone comico: Quin & sequens Aphorismus de suppurato Hepate scriptus, clarè etiam designat speciales hic memorare voluisse suppurationes, ut consideranti patet.

APHORISMUS XLV.

Quorum Hepar suppuratum adaritur, si pus purum fluxerit, & album, evadunt; in tunica enim his pus continetur: si verò qualis amurca fluat, pereunt.

SImul hic Hippocrates aphorismum prognosticum ab inuisione suppurati Jecinoris proponit, & rationem boni, vel mali eventus superaddit: inquit enim ita affectos evadere, si purum, & album pus fluxerit; quoniam in his pus continetur in tunica, seu membrana exteriori jecinoris; secus verò, si qualis amurca prodeat; quoniam è converso pus internam jecoris substantiam pervasit, illiusque parenchyma collæsit. Id ipsum habet in *Coacis prænotionibus*, ubi de variis hepatis affectionibus agens, speciatim de inuistis inquit: *Quibus secundum jecur inuistis veluti amurca exit, mortale*. Non etenim fieri potest, quin jecoris substantia intimius computruerit, si pus exinde prodiens putridum, & concretum instar amurcæ, seu sæcis olei, appareat, eo quòd pravum ulcus ibidem genitum designet: ulcera autem in jecoris pa-

renchymate excitata lethalia omninò sunt.

APHORISMUS XLVI.

Dolores oculorum post meri potionem, & aquæ calidæ balneum venæ sectione curato.

Hic aphorismus non cohæret ei, qui scriptus est 31. *sex-ti*, quæ enim hoc loco unum post aliud proponuntur, disjunctim ibi, ad dolores oculorum arcendos, commendantur, & quidem rationabilius. Hinc non immeritò Galenus interfertum, atque adjectitium hunc, adeòque expungendum opinatur. Neque præterea congruenter videtur venæ sectio, post meri potionem, & balneum instituenda in quocumque oculorum dolore, qualibet ex causa indifferenter proveniente, ut consideranti patet.

APHORISMUS XLVII.

Aqua inter cutem laborans, si tussâ corripitur, desperatus est.

DE hoc pariter dictum satis supra est in *commentario aphorismi 35. sexti libri*, ut proinde opus non sit illa eadem hic repetere; eum igitur locum adeat, qui hujus expositionem desiderat.

APHORISMUS XLVIII.

Urinæ stillicidium, & mingendi difficultatem vini potio, & venæ sectio solvit, incidere autem interiores.

Plerumque urinæ stillicidium fit à crassis, lentisque succimeatum

tum urinarium occupantibus, atque urinæ exitum impredientibus, five isti cum ipsamet urina permixti sint, five janitori musculo impacti; cumque præter viscositatem, acorem etiam referant, quoniam facillime fit, ut qui viscosi sunt, acidi fiant, & è converso, propterea accidit, ut simul unà urinæ exitum retardent, ac stillicidium inferant, atque etiam musculum ipsum vellitent; & proritent, unde postmodum stranguria, vel dysuria. Hac eadem de causa evenit, ut in horum ægrotantium urinis sedimenta observentur perpetuò fere mucosa, cænosa, & crassa. His ergo, ad diluendas ejuscemodi viscositates, summè confert vinum meracum, vel largius, & semel epotum, vel parcius, sed iteratum: eo enim crassi succi geniti diluuntur, ac extenuantur, & forte in posterum gignendi impediuntur, ne fiant, si præsertim in reliquis victus ratio, & usus sex rerum non naturalium in id ipsum concurrens consulatur. Desumptus est hic aphorismus ex 2. *epidem.* & scriptus quoque invenitur 6. *aphorif.* 36. quare hic ab aliis denuò interjectus putandus est.

Cæterum quod spectat ad venæ sectionem, & ad sectionem venarum interiorum, non tanti est, ut indifferenter prodesse possit in omni urinæ stillicidio, nisi solum indirectè, ad deplendam seri copiam, vel ad impediendam vesicæ inflammationem, si tamen id commodè fieri possit.

APHORISMUS XLIX.

Ab Angina correpto tumor, & rubor in pectore superveniens, bonum: extra enim vertitur morbus.

ET hic pariter aphorismus repetitus hoc loco invenitur (ut & alii) industria forsitan librariorum, ut antea dictum; cum & 6. & 4. *lib. aphorismorum* de eo scriptum sit.

APHORISMUS L.

Quibus Cerebrum sphacelatum est, in tribus diebus pereunt: si vero hos evaserint, sani fiunt.

Verbum istud *sphacelari* cunctis Interpretibus non modicè fuit offensioni. Attenta siquidem pressa illius significatione, *sphacelari*, idem vertunt, ac syderari, & corrumpi. Cum benè noscerent non posse id aphoristica huic sententiæ commodè adaptari, quoniam ex cerebro sphacelato impossibile est patientem revalescere, cum à corruptione interitus inevitabiliter subsequatur; propterea Galenus primum, mox alii deinceps, sphacelismum hic, veluti dispositionem tantummodò ad sphacelum, & corruptionem, sunt interpretati, ut accidit ex intemperie, aut inflammatione, quæ gangrænam, ac sphacelum præcedere solet. At isti minimè animadvertenter difficulter admodum, immò nullatenus internosci posse internam hanc Cerebri corruptionem, ut exinde quisquis, etiam oculatissimus, vaticinari queat de interitu intra triduum, vel de convalescentia, atque salute, ipso transacto,

facto, subsequutura, quemadmodum ex hoc aphorismo deducendum consulit Hippocrates: Nam quis unquam, etsi lynceus, id introspiciet? Sed nec insuper facile est, cerebrum inflammatione affectum tam subito, transacto scilicet triduo, consanescere posse, quin potius contra facillimum sit, ut sola inflammatione, immò etiam sola phlogosi succumbat, inducta phrenitide cum acuta febre, uti documento Hippocratis, attestante quoque experimento, passim observatur.

A causis præterea internis inductam istiusmodi siderationem, quomodo fieri poterit, ut quis probabiliter coniiciat, fuisse ex innumeris potius inflammationem, & non alias, quæ cæteroqui plures, & variæ esse possunt; cum tamen rarissimè, vel nunquam cerebrum sua substantia inflammationi subiiciatur, & in phrenitide potius meninges, quam cerebrum ipsum, inflammentur? Hinc factum, quamobrem Cardanus illud concussum, idest à causis externis, contusum, vulneratum, commotum, interpretetur, unde cerebrum interiùs læsum magis patere potest sensibus, tumore, rubore, veletiam livore, & corruptione. Et quamvis de cerebro concussio alibi verba faciat Hippocrates, nil tamen obstat, quin utrobique in eundem finem idem consideraverit; ut in uno causam externam, & signa, in alio prognosim advertat: Siquidem ab ictu, vulnere, & concussione aphonia primum, mox, si corruptio subsequatur, mors sit intra triduum successura. Verùm quæ in Cerebri sphacelismo contingunt latius idem Hippocrates memoravit 2. & 3. *de morbis* pluribus in locis. Faciunt ad hoc idem, quæ ipsemet

in Coacis prænotionibus, Celsus lib. 8. cap. 9. & Galenus 2. *de locis affect.* cap. 7. de Cerebri sphacelo edocent, quos vide. Cæterum, sphacelato Cerebro, interitus imminet ob affectæ partis dignitatem; & quidem infra triduum, cum diutinum tempus læsa Cerebri substantia ferre non possit: Post hoc tempus verò ægri evadunt, non quòd illud gangræna liberetur, sed quòd concussio tanta non fuerit, ut gangrænam, & sphacelum intulerit.

APHORISMUS LI.

Sternutamentum fit ex capite, calefacto cerebro, aut humectato eo, quòd in capite inani. Aer enim intus contentus extra erumpit: sonat autem, quoniam per angustum ipsi est exitus.

Considerat hic Hippocrates sternutamentum veluti male affecti cerebri symptoma, per quod & qualitas ægritudinis ejusdem internosci possit, & exuperantis humoris locus, & modus excretionis. Cunctis enim notum, non tantum hac de causa, sed ex multis aliis, tum internis, tum externis excitari sternutamentum, ut propterea quæcumque aut irritando, aut gravando, tum Nares, & Olfactus sensoria, tum etiam, quæ Cerebri meninges vellicant, & compungunt, valeant ad sternuendum lacessere, de qua relatiſſimè Galenus 2. *de symptomat. causis cap. primo*, alique Doctores passim. Quoties ergo Caput, Cerebrumque secundum corticem serosis, lymphicisque superfluitatibus gravatur, atque ad organa olfactus per sentientes meninges illos protrudere potis est, ex angustis, occlusisque meatibus in paten-

tentiores propellens, sternutamentum inducit, & sonum edit. Quare ex illo cerebrum indicatur superfluitatibus istiusmodi gravari, atque ad earundem expulsionem impelli, non sine manifesto plerumque juvamento. Accidere autem illud dicitur ex calefacto cerebro, aut humectato inani spatio, quod partem cerebri anteriorem, & cranium interest, si quidem nisi humor lymphicus, ac serosus exinde extillans concalescat, & acritatem, vellicationemque contrahat, proculdubio sternutamentum non fit, quemadmodum experimur in gravedinibus, & coryzis, quæ tunc sternutamentis sociantur, cum materia per nares effluens acris, & mordax est: quod etiam palam fit, cum in imminentibus catharris ab humefacto capite, aerem calidiorem inspiramus, & halitus odoriferos, aut solares radios affatim excipimus. Cæterum sonitus in sternuentibus fit, erumpente cum impetu è naribus, veluti ex angustis oculis, in apertum aere, sive flatu, aeri analogo, concurrente in idipsum motu thoracis vehementius expirantis; in multis enim similitudinem magnam referunt sternutatio, & tussis, ut benè explicat hic Scholiastes Hollerii. Denique sternutamentum, ut salutare sit, & levamen Cerebro, immò etiam pectori afferat, cum exitu fluitantis humoris, aut crassioris muci esse debet; nam si inaniter contingat, & iteratò, sine ulla humoris educatione, malum omen esse consuevit, ut in pestilentibus: tunc enim, vel à maligno, irritanteque miasmate fit, vel si quis humor inest, sternutamenti concussione, ob aeris exsuctionem internam potius Cerebri substantiam pervadit, & Apoplexiam infert.

APHORISMUS LII.

Quibus Hepar vehementer dolet, si febris superveniens solvit dolorem.

SEXTO libro aphorismo 40. dixerat, dolorem in hypochondriis febre superveniente sedari; unde de dextro solum meminit, ubi Jecur jacet. Sed num reverà de dolore jecoris substantiam occupante, an potius partes eidem adnexas, hoc loco intelligat, dubitari potest; Etenim non tam facile quis sibi persuadebit, superveniente febre dolorem in Jecore inductum exsolvi, si ipsius parenchyma affectum fuerit, tumore præsertim inflammatorio, qui per febrim potius exasperaretur, vel in suppurationem vergeret. Hinc non absre putavit Mercurialis legendum, *circumdolet*, non *dolet*, ut partes dolentes jecori circumpositas potius designaret, non proprias ejusdem. Verum si dolor jecur afficiens ex obstructione sit, quemadmodum ex sensu gravante, vel attollente solum, ut ex tenui materia conicere licet; proculdubio tunc etiam febris superveniens juvamento esse poterit, quippe per febrim impactus ibidem humor crassus, & hærens diluitur, meatus aperiuntur, & aliò, puta ad intestina, vel ad renes, & vesicam ille deducitur; ac si fortasse ex adverso tenuis fuerit, facillime dissolvitur, & evanescit. Febris autem debet non præcedere, sed supervenire; si enim dolorem præcederet, vel comitaretur, illum veluti ab inflammatione, vel phlogosi dependentem argueret; ita neque eundem solveret, sed potius augeret, & mali morbi indicium foret, adeoque periculo non vacaret.

APHORISMUS LIII.

Quibus à venis sanguinem mittere confert, iis Vere venam oportet secare.

Similis aphorismus scriptus est *lib. 6. textu 47.* propterea ejus expositionem omittimus, & ad illum locum lectorem amandamus.

APHORISMUS LIV.

Quibus inter ventriculum, & septum transversum pituita reposita est, & dolorem affert, non habens viam ad alterum ventrem: iis per venas in vesicam pituita versa, solvitur morbus.

Quinam sit istiusmodi locus inter ventriculum, & septum transversum, qui pituitam collectam continere valeat, illamque deinde ad vesicam deducere, ex Anatome nondum patuit. Sunt tamen ex Hypochondriacis nonnulli, qui passim de fluctuante aqua, veluti in utre conclusa, pereas partes, conquerruntur, ac perpetim illam undantem, & sursum, deorsumque vergentem exaudiunt, atque aliis manu commotam, exaudiendam præbent: sed num reverà illa aqua sit, vel aqueus, & flatuosus liquor, & ubi includatur, perspectum non est. Vivit adhuc Nobilis quidam Vir, qui adeò se hoc symptomate molestari ait, ut nil pejus se pati existimet, ac multum in ejusmodi fluctuatione verecundetur. Fatetur tamen ad plures hebdomadas illam aliquando quiescere solere, reddita nimirum per id tempus urina copiosiori.

Hinc suspicari fas est, ut quemad-

modum in Hydropicis non rarò serum ad vias urinæ deducitur, & quidem salubriter: ita quoque in his pituita, sive lymphæ crassæ, inter ventriculum, & lienem collecta, ac postmodum dissoluta in vesicam delabi possit, & cum profectu patientis, siquidem ea parte, qua ventriculi fundum lienem respicit, & colon intestinum, humores in hypochondriacis colligi solent, sibi locum facientes. Quod autem Hipp. dixit *per venas*, intelligendum vel de arteriis, vel de lymphaticis vasis, cum passim apud Veteres, canales omnes corporis, venæ appellari consueverint, ut aliàs quoque dictum. De reliquo cum dolorem affert collecta illic pituita, in vias urinæ efferri potest; quoniam tunc per fermentationem, suiq; dissolutionem, fluidior reddita vasa illa subire potest, & foras educi, præsertim si lienem ipsum pervadat, indeque per renes egeratur.

APHORISMUS LV.

Quibus Hepar aqua plenum in Omentum eruperit, iis venter aqua repletur, & moriuntur.

Qui per Omentum, atque Omenti meatus, in Renes, & Vesicam pituitam in antecedenti aphorismo memoratam deduci posse explicant, non incongruenter moventur ex his, quæ in hoc aphorismo ab Hippocrate, de aqua in hepate collecta, atque per vias urinæ excreta referuntur: Nam qua ratione jecur aqua repletum potest per Omentum exonerari, pariformiter quoque poterit collecta inter septum transversum, & ventriculum per eosdem ductus in vesicam deferri. Porro id experimentis frequenter comprobatur, sed per quos

quos ductus huc usque nescitur. Sagax autem, & perita Natura scit mille sibi parare vias, per quas seipsam exoneret.

Repletur hepar aqua ex vasis lymphaticis illuc confluentibus, & plerumque hydatides innumeras excitantibus, quæ ubi nimium distentæ, amplius expandi non possunt, & aquam stagnantem continere, in omentum, quod hepati, & ventriculo superincumbit, illam exonerant: unde Omentum ipsum sua natura adiposum, ab ejusdem falsilagine acri, & erodente dirumpitur, atque universam aquam in ventrem, idest in abdominis cavum effundit, & hydropē, Ascitem dictum, excitat. Exinde autem sequitur ægrotantis interitus, tum à gravi jecinoris læsione, atque hydatidum eruptione, tum ab omentis erosionem, ubi ulcus insanabile exoritur, tum denique à mala ejusdem lymphici humoris qualitate, falsa, & erodente, quæ diuturna ibidem mora, reliqua adjacentia viscera, præsertim verò intestina labefacit, & mortificat; cum potissimum nullo aditu remeare is possit, aut per patientes ductus foras educi. Hinc Antiquis in usu fuit Paracentesis, quæ cum non minoris periculi fuerit observata, quam morbus ipse, à Recentioribus nunc tandem omissa est.

APHORISMUS LVI.

Anxietudo, oscitatio, horror, vinum, æquale æquali potum, solvit ægritudinem.

Idem
refertur
2. epid.
5.6.

QUàm in multis conferat vinum, præsertim moderatè sumptum, non est, ut diutiùs hic suadeam, cum cæteroqui cunctis notum sit summum esse medicamentum, immò medicamentorum omnium ma-

ximum, de quo pluries Hippocrates verba facit, illiusque utilitates magnoperè commendat. Speciatim autem hoc loco docet medelam esse anxietudini, oscitationi, & horrori, quæ licet sæpenumerò ægritudines periculosæ non sint, solent tamen non rarò esse nimium molestæ, & sæpè sæpiùs stomachi, atque ventriculi malè affecti symptomata, contumacem, hærentemque causam, nervos proritantem indicantia, quæ nisi citò detergatur, dissolvaturque, pejora planè incommoda solet afferre. Est autem Anxietudo fastidium illud in imo ventre, quo patientes huc, illucque se jactare coguntur, cum situm commodum quiescendi non invenient, etiam si lecto decumbant. Id verò illis accidit ab hærente, glutinososque succo, plerumque acido, & austero, qui simul vellicando, & transitum reliquis humoribus impediendo, quandoque etiam per flatus distendendo, ingentem molestiam excitat, ut patientes loco stare non sinat. Non dissimiliter Oscitatio fit, cum in ipsa nervi quoque per ventriculum dispersi, atque in intestina transfusi, pariformiter læcessiti, alios, & alios sibi respondentes commovent, & musculos faucium, oris, & mandibularum, ad se retrahendum proritant: quod plerumque accidit, cum infomnes, dissolutionem exactam ciborum minimè peregrimus, nec vapores per cerebrum, & nervos diffusos, convenienti somno, discutimus. Horror denique, ut aliàs à nobis dictum, à crassis, acidisq; succis in fermentationem indebitam adaçtis, quemadmodum in Quartanis febribus, provenit. Porro his omnibus vinum, & quidem meracum summo perè conferre potest, dissolutis nimirum, detractisque succis illis crassis, & tenacibus, quorum causa ventriculus,

culus, atque intestina lacescunt. Atqui subdit Hippocrates, pari aque portione commistum potandum esse, tum ut acidum illorum succorum retundatur, & tenacitas eorundem melius diluatur; tum denique, ne totum in vapores exolutum, caput petat, & crassitiem illam succorum minus efficaciter detergat. Mistio autem variari potest, pro varia vinorum conditione, ac virtute. Postremo inquit ægritudinem solvere, id est non solum symptomata ista delere, verum etiam causam eorundem abstergere, concoquere, & superare.

APHORISMUS LVII.

Quibus in urinario meatu tubercula fiunt: iis suppuratione facta, & eruptione, solvitur dolor.

Hic etiam aphorismus alibi scriptus est 4. lib. aphor. atque ibidem à nobis expositus; quare ad eum locum lectorem remittimus.

APHORISMUS LVIII.

Quibus Cerebrum aliqua ex causa concussum fuerit, necesse est statim mutos fieri.

V. etiam
1. de mor-
bis.

Hanc eandem sententiam, & latiori quidem sermone exaratam, habet Hippocrates in Coacis prænotionibus, ubi, quibus cerebrum, inquit concussum fuerit, & doluerit, percussis, aut aliàs lapsis, hi statim voce privantur, & neque vident, neque audiunt, & plerumque moriuntur. Experimentis quoque confirmatam eandem proponit 5. & 7. epid. in femina quadam palma manus ab alia percussa, & in eo, qui à Macedone lapide ictus fuit. Quomobrem ab externis causis concussio-

nem hanc induci oportere manifestè liquet, ut antea etiam adnotavimus. Istos autem aphonos fieri necesse subdit; quoniam à cerebri concussione nedum spiritus tumultuariè commoventur, & confunduntur, verum etiam mole sua cerebrum conturbatur, & qua parte nervis originem tribuit, vel potius in illis elongatur, ingentem patitur perturbationem, ut propterea loquelæ, auditio- ni, ac visui impedimento fiat, cum nervi ad loquelam, auditum, & visum præsertim pertinentes, proximè à cerebro ipso dimanent. Contingit tandem hos plerumque mori, si non statim, vel intra triduum, quod summum, resipiscant; siquidem ultra hoc tempus, neque cerebri læsionem gravem fuisse argumento est, neque nervorum originem, stuporem, vel corruptionem subiisse, ut de corrupto cerebro antea dictum.

APHORISMUS LIX.

Corporibus carnes habentibus humiditas, famem adhibere convenit: Fames enim corpora siccatur.

Non de qualibet humida Corporum constitutione aphorismus hic intelligendus, sed de excedenti, extranea, & præternaturali: quippe moderatè humidi, atque innata, primigenia, & radicali, ut vocant, humiditate præditi, sicuti in siccam constitutionem deflectendi non sunt; ita neque fame diuturna macerandi: id enim esset illos haudquaquam in salubritate tutari, sed potius in ægritudines, & quidem perniciosissimas, transferre. Corpora itaque excedenter humida, & excrementis scatentia serosis, seu pituitosis dictis, ut in meliorem constitutionem reducantur, exsiccatio-

ne egent, adeòque fame, ne in morbos humefacientes labantur, præservanda sunt.

Debent pariter istiusmodi corpora, in carnibus, immò in cunctis partibus, humidis superfluitatibus scattere; nam si in una tantùm, aut in altera parte humida comparerent, haudquaquam fame, veluti re universum corpus exsiccante, tractanda forent; quamobrem jure optimo ab Hippocrate dictum; *Carnes habentibus humidas*, & quidem non solum musculares, & externas, sed & internas quoque, immò etiam parenchymata viscerum, ut ex illis superfluæ unde quaque humiditates absumantur. Quin & ab articulis easdem exolvendas esse, docuit idem Hippocrates *lib. de Articulis*. Hinc rheumatici, tussiculosi, podagrici, hydropici, alique, plurimum ab illa juvari solent. Famem autem his dixit adhibendam, non omnem, seu à quocumque cibo abstinentiam, sed moderatam solummodò ciborum subtractionem, præsertim eorum, qui humores adiiciunt; nam qui illos potius detrahunt, atque absumunt, commendari possunt. Sub nomine famis, sitim quoque comprehensam intelligere licet; etenim proportionabiliter, ad salutem conservandam, qui modicè edunt, parcè etiam bibere debent; unde quibus detrahenda indicitur ciborum copia, diminuta quoque censetur potulentorum assumptio. Atqui proposuit hic ad exsiccanda humida corpora Hippocrates famem potius, quàm cætera alia, sive alimenta, sive medicamenta, quippe illa insensibiliter, & citrà viscerum noxam, æqualiter Corpus universum in meliorem statum revocare potest: reliqua verò omnia tam ex Prophylaxi, quàm ex Therapeja, desumpta, ut sunt exercitia, vi-

gilia, diuretica, diaphoretica, & cathartica medicamenta, vel non equè cunctis partibus opitulantur, vel magis officiunt, quàm proficiant, ut benè etiam advertit Cardanus.

APHORISMUS LX.

Si febre correpto, tumore non existente in faucibus, suffocatio repentè superveniat, & non possit devorare, nisi vix, lethale.

APHORISMUS LXI.

Si febre correpto collum pervertatur, & devorare non possit, tumore non existente in collo, lethale.

APHORISMUS LXII.

Ubi in toto corpore fiunt mutationes, & corpus refrigeratur, & rursus calefit, aut calorem alium ex alio commutat, longitudo morbi significatur.

INveniuntur quoque supradicti tres aphorismi descripti in 4. libro, propterea non est, ut hoc loco repetantur. Ut moles hujus libri pluralitate aphorismorum excresceret, ab aliis adjectos credere est, ut & plurimos alios inferiùs appositos.

APHORISMUS LXIII.

Sudor multus calidus, vel frigidus semper fluens, repletionem humoris esse significat; abducere igitur oportet, robusto quidem superne, debili verò infernè.

ET hic etiam ibidem est notatus, atque expositus; nisi solum quòd hic adjecta est sudoris istius curatio per humoris nimirum superabundantis

dantis evacuationem, & quidem in robustis corporibus per superiora, idest per vomitum, in debilioribus verò per dejectionem, habito scilicet respectu ad tolerantiam patientis.

APHORISMUS LXIV.

Febres quaecumque non intermittentes, si tertia die fortiores fiunt, periculose: quocumque autem modo se remiserint, significant, quòd non sunt periculose.

APHORISMUS LXV.

Quibuscumque febres sunt longe: iis vel tubercula, vel ad articulos dolores decumbunt.

APHORISMUS LXVI.

Quibuscumque tubercula diutina, aut in articulos dolores ex febre decumbunt: ii cibo pleniore utuntur.

A Libi quoque appositi, & explanati sunt 4. lib. aphorismorum.

APHORISMUS LXVII.

Si quis cibum febricitanti dederit: sano quidem, robur, laboranti verò morbus.

H Adquaquam de cibo cuicumque ægrotanti exhibito, sed dumtaxat febricitantibus, & quidem acutè, scriptus est hic aphorismus; nam in his semper gravior noxa pertimescenda est à cumulatiss excrementis, & à Naturæ distractione; nec insuper de quocumque cibo, sed solum de

eo, qui sanis offerri solet, unde proculdubiò damnum majus, graviusque sequitur, si fortassè febricitantibus offeratur; quippe sicuti sanis corporibus is conversus in alimentum robur addit, ita febricitantibus, aut simili alia ægritudine affectis in malos humores transmutatus, morbum fovet. Quod sanè cunctis notum.

Id tamen peculiariter adnotandum, carniū esum fortiores reddere animantes, ut sunt Lupi, Ursi, Leones, Accipitres, Aquilæ, aliæque carnivoræ; contrà verò, quæ herbis vescuntur, ut pecudes, debiliores sunt. Et licet Cameli, Elephantes, Equi, plantis nutriti fortes etiam observentur; illæ tamen exarefactæ sunt, & substantiæ longè solidioris, ac vegetioris, ut cardui siccati, schœnanthi, similesque: Boves denique promiscui pastus, cum fœnu vescuntur, aridisque herbis, fortiores observantur, cum verò virentibus utuntur, imbecilliores, quamquam & istæ solidioris quoque substantiæ sint, ut Lupini, Rapa, &c. Quo autem tempore virentibus herbis tum Boves, tum Equi pascuntur, licet pinguescant, non tamen æquè vigorantur. Hinc commodum animalibus pro rata, & usu propriæ pastionis, dentes, mandibulas, musculos temporales, aliæque instrumenta ad atterendos, & conficiendos cibos magna, & valida, vel minora, & laxiora providit Natura, ut consideranti palam fieri potest.

V. Gal.
11. de usu
par. c. 2.

APHORISMUS LXVIII.

Quæ per vesicam excernantur inspicere oportet, si alia sunt, qualia sanis excernuntur. Quæ igitur minimè similia sunt his, hæc morbosiora. Quæ verò sunt sanis similia, hæc minimè morbosa.

ET hunc pariter aphorismum suspicatur Galenus Hippocratis non esse, cum non habeat elocutionem Hippocratis stylo convenientem. Sed & neque magnum quid, aut in Arte reconditum, continere videtur, immò potius cunctis obvium, atque manifestum. Verumtamen habet quoque quidpiam, quod cautum reddat Medicum in iudicandis excrementis è morbofis corporibus prodeuntibus: Nam si ea ipsis congruant, dum benè valebant, non solum morbosa dici non poterunt, sed non magnum eadem corpora recessum à naturali statu fecisse demonstrant. Sic plerisque in usu est, cum benè valent, urinas mingere perpetuò crudas, ac decolores; si in statu morbofo tales quoque inspiciantur, meliores planè erunt, quàm si ab illo consueto statu recesserint. Sic contrà alii aliis urinarum egestionibus sunt natura affecti, ut eo modò benè, contrà verò malè se habeant. De ejusdemodi autem similitudine, atque dissimilitudine excretorum in statu sano, & morbofo meminit quoque idem Hippocrates *lib. de officina Medici*, & *initio prognosticorum*, & Galenus ex mente Platonis *9. de plac. Hipp. & Plat. cap. 1.* Conferri huc quoque possunt, quæ idem Hippocrates protulit *6. epid. sect. 7.* ubi quæ à Medico sint in ægrotantibus considerata, pluribus edocet, sed præsertim, *quæ, & ex qualibus qualia fiant, &c.*

APHORISMUS LXIX.

Et quibus dejectiones, si stare permiseris, & non moveris, veluti strigmenta subsistunt: & si pauca sint, paucus est morbus: quòd si multa, multus: iis confert alvi purgatio; quòd si alvi non purgata dederis sorbitiones, quanto plures dederis, tanto magis nocebis.

SI quis unquam alius aphorismus, certè hic non levem sui suspicionem præbet, fuisse ab alio, quam ab Hippocrate hic interfertum, cum præter nimiam prolixitatem, & verborum incompositionem, nil quidpiam novi, utilis, aut commendabilis in Arte contineat, ut propterea merito à Galeno, cæterisque Commentatoribus adjectitiùs reputetur. Et quidem, si strigmenta, seu ramenta in excretis, sive per urinam, sive per fæces considerat, quæ modica modicum morbum, vel potius modicam morbi causam, & multa copiosorem significant, cur est, ut substantia, aut superstantia observanda proponat, illaque stare, non autem movere præcipiat? fortè quia sub his conditionibus malitiam minuant, vel adaugeant, & morbum leviozem, vel deteriozem prænuncient? Planè si ab illorum præsentia, & copia, morbus gravior portenditur, parùm, vel nihil referet, si stare, vel moveri permiseris, atque ea, vel superstare, vel subsistere observentur; sed & neque consonat, quod pro curatione subiicitur, conferre his alvi purgationem, si præsertim strigmenta, aut ramenta intestinorum hic notata intelligantur, quippe hæc nonnisi in ferina, ac protracta dysenteria comparere

parere solent, in qua alvi purgatio
tuta non est, quæ cæteroqui à mul-
titudine ramentorum valida, & co-
piosa desideraretur, ut illa penitus
depellerentur. Denique, quod à
sorbitionibus alvo non purgata ma-
jus damnum sit subsequuturum, jam
dictum generaliori sermone 2. a-
phorif. text. 10. *Impura corpora
quanto plus nutries, tanto magis
laedes*; unde nil novi videtur hic ad-
jectum: quamvis & hoc suam quo-
que patiatur limitationem, ut ibi-
dem, & alibi, à nobis est animad-
versum. Quin & Galenus in com-
mentario scitè admonet, neque o-
mnes ab hujusmodi sorbitionibus
lædi, neque prius eos purgare ne-
cessarium esse, atque adhuc mi-
nus, quibus aliquid urinis infer-
tum est, quod strigmenta referat;
sed legatur idem Galenus.

APHORISMUS LXX.

*Quibuscumque cruda infra dei-
ciuntur, atrabilis inest: si plu-
ra, major: si pauciora, minor
est morbus.*

ET hic pariter aphorismus ad-
jectitius creditur, quippe qui
à plerisque Commentatoribus peni-
tus omissus, ab aliis inexpressus re-
feratur. Continet enim sententiam
vel nunquam praxi respondentem,
vel falsitatis ream. Si tamen un-
quam id expertum, aliam planè
causam recognoscit cruditas ex-
crementorum deorsum apparens,
quàm atra bilis dejectio. De qua
Nos alibi latiore sermonem in-
stituimus,

APHORISMUS LXXI.

*Excreationes in febribus non inter-
mittentibus livida, sanguinea,
biliosa, & foetida, omnes male.
Cum verò excernuntur, bonum
est, & per ventrem, & per vesi-
cam: & ubi aliquid secedens ste-
terit non purgatum, malum.*

APHORISMUS LXXII.

*Corpora oportet ubi quis purgare
voluerit, fluida facere; & si su-
pra velis fluida facere, sistere al-
vum; si verò infrà, humectare.*

APHORISMUS LXXIII.

*Somnus, vigiliæ, utraque modum
excedentia, morbus.*

APHORISMUS LXXIV.

*In febribus non intermittentibus si
exteriora frigent, interiora utun-
tur, & febris habeat, lethale.*

APHORISMUS LXXV.

*In febre non intermittente, si la-
brum, aut nasus, aut oculus, aut
supercilium pervertitur, si non
videat, si non audiat, & jam de-
bilis sit; quidquid horum fuerit,
lethale est.*

APHORISMUS LXXVI.

*A pituita alba, aqua intercutem
supervenit.*

APHORISMUS LXXVII.

*Ab alvi profluvio difficultas inte-
stinorum.*

APHORISMUS LXXVIII.

A difficultate intestinorum levitas intestinorum supervenit.

APHORISMUS LXXIX.

A corruptione, abscessus ossis.

APHORISMUS LXXX.

A sanguinis vomitu, tabes, & puris purgatio supra.

APHORISMUS LXXXI.

Qualia fuerint vesice, aut alvi excrementa, & ex carnibus, & sicubi alibi à Natura Corpus exierit, si parum, paucus est morbus; si multum, multus, si valdè multum, letale est.

R Eliqui isti X. Aphorismi hic adjecti alibi sparsim in aliis superioribus libris descripti inveniuntur, ibique pariter à nobis expositi, ut propterea opus non sit denuò, ac inutiliter illos repetere, ac explicare. Hinc clarum, ac manifestum est, librariorum, aut quorumvis aliorum opera, peractum, ut majorem fortassis in molem VII. hic liber excresceret; quòd ex his X. ultimis, satis superque patere possit. Quare hic esto finis.

Cæterum plurimas alias Hippocratis sententias, & quidem ad Rem Medicam utilissimas, nostris temporibus selegit accuratissimus Vir Jacobus Sponius, atque in unum volumen rededit, suisque commentationibus adeò illustravit, ut alius non egeant explanatione.

Sub tit.
Aphor.
Novi.

APHORISMUS

UNICUS, ET SINGULARIS, EX VIII. LIBRO DE PROMPTUS.

Quoscumque morbos medicamenta non sanant, ferrum sanat: quos ferrum non sanat, ignis sanat: quos verò ignis non sanat, hos sanari non posse putato; vel hos incurabiles existimari oportet.



Et si Aphorismus hic in classem reliquorum redactus non invenitur, sed inter aliquot alios VIII. libri relatus, proindeque adjectitius, & spurius simul cum iisdem creditus sit; placuit tamen nobis singulariter præ cæteris seligere, utpotè qui supra reliquos (sive Hippocrates, sive alius quispiam ejus Author sit) quiddam memorabile magis, magisque commendabile complectatur. Etenim, quæ hæcenus ad morborum ferè omnium curationem explanata sunt, hoc unico, veluti per epitomen, admirabili sanè peroratione, videntur comprehensa, ut hinc saltem noscant Medici, per quæ rerum medicinalium genera vagari debeant, ut Therapejam universam expleant, & absolvant, quæque fortassis uno Remediorum genere mala cedere non observaverint, alio, aliove subigere adnitantur; quod primum, ac supremum est totius rei Medicæ opificium: Quod si neque his morborum contumacia, ac nequitia subiiciatur, immedicabiles illi censendi sint, utpote Artis ministerio non subigibiles, & Naturam omnimodè impotentem, abjectamque arguentes. Et quamvis hic partem solummodò Me-

dicinæ Chirurgicam amplexari, atque ad ejus classis morbos curandos pertinere videatur, cum Ferrum, ac Ignis non nisi in vulneribus, ulceribus, tumoribus, aliisque similibus, adhiberi soleant; si tamen res exactius pensitetur, ad universam Medicinam faciendam eundem spectare non incongruè existimabit, qui perpenderit cum Hippocrate omnem morbum ulcus esse, aut ulceris conditionem præferre, sive præsens, aut imminens, sive apparens, ac conspicuum, sive latens, & inconspicuum illud sit. Accedit, quòd gravis sententia hæc ad plurimos, innumerosque ferè morbos valdè conducibilis est; quin & statuta per ipsum series, ac methodus applicabilium medicamentorum, adhuc ex Ferro, & Igne, ac igneis, & ignitis rebus, veluti extremis, summisque Medicinæ præfidiis, desumptorum, non poterit non esse plurimùm cunctis Medicis fructuosa.

Et quidem primò ex medicamentis extrinsecus admotis, puta lituris, inunctionibus, cataplasmatibus, cerotis, emplastris, aliisque similibus; mox etiam ab interiùs assumptis, catharticiis, tum vomitum, tum dejectionem moventibus; itemque diureticis, diaphoreticis, incidentibus, attenuantibus, aperientibus, dissolventibus, temperantibus, corrigentibus, roborantibus, cæterisque &

tum cephalicis, tum cardiacis, tum stomachicis, tum thoracicis, tum hystericis, idque genus aliis, plurimi, ac innumerabiles morbi tolluntur, ut ex praxi therapeutica, & pharmaceutica. Itemque Ferro tum simplici, tum candenti, diversimodè incidente, secante, terebrante, abrudente, scalpente: ut in tumoribus, apostematibus, abscessibus, gangrenis, sphacelis, fracturis, contusionibus, &c. Tandem igne tum actuali, ut vocant, tum potenciali, igneis, ac ignitis rebus, & ignea vi ustionem, rubificationem, vesiculas, escharam, aliudve simile excitantibus; itemque thermis, hypocaustis, laticis, tam naturalibus, quàm artificialibus, ex sulphure, mercurio, sale ammoniaco, camphora, gummi quocumque, ac spiritu vini, vel simplici, vel medicato, aliisque, ferè omnes humani corporis affectiones indiscriminatim abiguntur.

Sed posthabitis iis, quæ ad Medicamenta, & Ferrum attinet: de iis enim aliàs dictum; & aliunde

Ovid. 1.
Meta-
morph.

..... *immedicabile vulnus
Ense recidendum est, ne pars sin-
cera trahatur.*

Profectò ignis in usum Medicum adhiberi solet, ac potest, leni, blandoque calore, ad rarefaciendam cutim solummodò, aut calore vehementiori ad attenuandum, dissolvendum, & sudorem promovendum, atque ad cutis, & partium subjectarum rubificationem; poros à propria figura immutando, humores substratos figendo, & cutim corrugando: itemque ad crustam ibidem, & escharam inducendam: ad ambustionem, & ulcerationem sive cutaneam solum, sive etiam muscularem, ac profundior, ut in ustionibus.

Unde autem noster hic ignis tantam vim, atque supra reliqua omnia

agentia naturalia insignem potentiam, & efficaciam nactus sit, ut cunctis primum dissolvens, summumque consumens esse dicatur; & unde ortum sumpserit, curiosum est quæsitum.

Et sanè crediderim ab incomparabili ignea Solis activitate originem sumpsisse, ut quemadmodum æthereæ naturæ Sol est, ita quoque vis, & efficacia nostri ignis, qui ejus conditionem participat, longè præcellentior statuenda sit quacumque alia sublunaris cujusvis Agentis virtute, ut proinde quam vim, facultatemque apud nos hic exerit, illam planè à Sole, Agente supremo, mutuatus est; eo quòd non aliunde ignem hunc nostratem apud homines inventum, excitatumque putare est, quàm à mutuata per Solis radios ignea communicatione; unde non absre fabulam Promethei ortam suspicari licet, de facula è Solis globo, Minervæ consilio, erepta, ut Mythologi commenti sunt, & Horat. 1. *Carmin.* cecinit:

*Audax Japeti genus
Ignem fraude mala gentibus
intulit.*

Etenim Sol ingens, & vasta solidi, conglobatique Ignis moles est, ex tenuissimis, purissimis, atque summè mobilibus particulis compacta, quæ cum circa proprium axem assidue revolvatur, ac motu rapidissimo cieatur, propterea fit, ut ignea in orbem spicula (ætheream simul, & æream regionem sibi proximè attiguas, veluti per rectas lineas, commovendo, & agitando) quæ radios appellamus, quaquaversum videatur ejaculari, communicata interea Orbi universo, calefaciendi, urendi, atque illuminandi virtute. Cumque Aer nobis circumfluus modò crassior, & opacior, modò tenuior, ac

pu-

purior, pro varietate halituum, & vaporum per ipsum interspersorum, fieri soleat; proinde etiam evenit, ut calor in terris urgentior, intensiorque quandoque persentiat; aliquando verò ab eorundem crassitie, constipationeque plurimum infringat, & hebetetur, & prout directè, reflexè, vel refractè radii ipsi in terram incidunt. Atque hinc etiam fit, cur radii solares, quò Sol ipse vertici nostro proximius accedit, potentiores, efficacioresque persentiantur, quoniam tunc perpendiculariter ferè incidentes, recta penè quoque reflectuntur, atque pluribus, & geminatis irradiationibus aerem alterant, & calefaciunt, attenuatis simul una discussisque magis vaporibus per illum dispersis. Quamquam & in hoc considerabilis plurimum est Terræ habitabilis varia habitudo: nam campestria loca, ad Meridiem, & Austrum exposita, sulphureis, aut aluminosis mineris referta, longè calidiora observantur; contrà verò montana, aut ad Boream posita, etiam si illa intra Zonam temperatam jaceant. Sic apud nos, ad oras Amalphis, & Surrenti sitæ urbes, & oppida inter montes, ingens, & intolerabile frigus subeunt, adhuc Æstate media, cum aliarum in plano sitarum urbium incolæ æstum exurentissimum patiuntur.

In Ros. Ur. Igneum autem globum esse Solem testantur quoque plurimi Veterum SS. Patrum, quos recollegit P. Scheinerus, cohæretque Sacer textus *Ecclesiast. cap. 43.* ubi dicitur: *Vas admirabile (quod Sol est) opus Excelsi, in meridiano exurit terram, fornacem custodiens in operibus ardoris: & in sacris hymnis canit Orthodoxa, & Catholica Ecclesia.*

Jam Sol recedit igneus.
Et alibi:

*Quarto die, qui flammeam
Dum Solis accendis rotam.*

Idipsum ostendunt apertissimè specula ustoria, per quæ radii Solis, quò plures, & confertiores diffunduntur, eò quoque ustiones in rebus accidunt citiores, vehementioresque, immò & in longius, remotiusque spatium pro ratione, & pro figurarum, seu sectionum conicarum, si quæ fiant, varietate.

Ab igneo igitur Solaris corporis globo ignem nostrum culinarem mutuatum fateri oportet; nam cum non aliunde constet in usum hominum ignem hunc ad nos venisse; proculdubio inficiari nemo poterit illum à Sole profectum; idque mea sententia putandum, quod Prometheo fabulosè tributum, Adamo primo hominum parenti adscribendum esse, qui cum rerum omnium naturalium scientia à Deo conditore fuisset instructus adeoque omniscius factus, atque ex Sacris literis aliunde pateat, adusque illa priora tempora Sacrificia succensa, & immolata fuisse, ut à Caino, & Abele ad hunc inter Mundi primordia satis constat; proinde credere decet, tunc etiam Terris in usum hominum Ignem inventum: & quidem, vel beneficio eorundem Solarium radiorum, per confictum ferularum, aliorumve lignorum Sole exarefactorum, ut ex hedera, & lauro vehementer affricatis; itemque ex silicibus attritis, potissimum sulphure, aut bitumine oblitis experimur; vel spontanea semisiccatarum plantarum, & herbarum præsertim capillarium, simul congestarum fermentatione; vel ex fimo putri, & ex calefacto, potissimum columbino, quo Galenus 3. de *Temperam. cap. 2.* ligneam fenestram nuper resina illitam, mox etiam domum integram succensam fuisse testatur;

Ignis à Sole ex Terra est: unde Vestalis ignis; nā Terra Vesta vocatur. Ovid.

De In-
ventor.
Rer. lib.
2. cap 19.
ex Plin.
17. cap.
56. V. et-
iam Cæl.
Rhodig.
1. 15. cap.
15. & 16.

flatur; vel Calcis, Nitri, Sulfuris, Bituminis, cæterorumque fossilium mistura, quæ multoties sponte sua Ignem concipiunt; ut in Ætna, ac Vesevo monte; aut alio simili artificio huc usque nobis ignoto: nam quod ope chalybis, & silicis passim peragitur, non tam vetustum inventum est à Pyrode Cilicis filio, ex testimonio Plinii, & Polydori Virgilio; idque existimaverim casu potius ab attritu vehementi silicis, sive lapidis illius, qui pyrites Græcis appellatur, aliuvse similis, cum ferro aliove denso, fortique metallo, quorum sanè usus per priora illa Mundi Caini, & Abelis tempora nondum innotuerat.

V. Oth.
Tachen.
cl. Hipp.

Si ergo noster ignis igneam Solis naturam præferre videtur, nil mirum, si deinde vires in nobis exerat, velut ille, validissimas, maximèque supra reliqua omnia præpotentes: is quippe & calefacit, & attenuat, & scindit, & dissolvit, consumitque quidquid eidem objectatur: cum ex Platone particulis constet valdè tenuibus, mobilibus, ac pyramidum figuram referentibus, quibus veluti tot cuneis moleculas corporum adhuc densissimas dissecat, incidit, divellit, disjungit, atque minimas partes atterit, & extenuat. Accedit, quòd in Igne vis præpotentissima acidi dissolventis viget, cujus virtute urit simul, & urendo constipat, crustamque inducit, necnon incidendo dilaniat, ac discerpit, cum nimirum proximè, ac immediatè partibus admoveatur; in reliquis verò, vires suas exerit pro ratione distantiae majoris, vel minoris, & prout aerem circumstantem magis, minusve alterat, suisque particulis afficit, & sive vapore, sive halitu diffunditur, aut tenuioribus, crassioribus, den-

fioribus, vel rarioribus corporibus commiscetur, ut ex praxi ipsa clarissimè patet. Quòd si non igne, & igneis particulis, sed medicamentis, sive simplicibus, sive compositis, igneam conditionem, ac vim participantibus, utamur, ardorem, ruborem, vesiculas, plagas, idque genus alia partibus inferre solemus; quin & vaporibus, ac halitibus, in concluso præsertim aere exceptis, attenuationes, rarefactiones, sudores, pro re nata excitamus.

Atque hinc ignis juvamento esse solet ad absumendam quamcumque ex aere malitiam, ut in pestilentis, qua ratione Hippocrates à peste Græciam præservasse traditur; quin & in morbosis causis coagulare valentibus, usus fuit infusionibus, & ignitis auxiliis, præsertim in morbis à materia crassa, lenta, & frigefaciente, itemque ad plagas putridas, sordidas, liventes, ac malignas. Sed & præsentaneum præsidium est ad pustulas, & bubones, abscessus, anthraces, furunculos, parotidas; ad tumores omnes ex frigidis, terrestribusque humoribus progenitos: ad hydropem, & empyema, ad ambusta, & membra mortificata, ac sphacelata, ad sistendum, cohibendumque sanguinem, ad membra amputata, & rescissa, ad fistulas callosas, ad paralyfim, & ischiadem, verrucas, condylomata, varices, hæmorrhoides, exostoses, dolores articulorum, luem Veneræ, ad ægrotudines stupore, ac narcosi afficientes, ad morsus venenatorum animalium, atque ad ictus ex venenatis instrumentis inflictos, cæterasque innumerabiles ægrotudines, quarum seriem (ut erat in animo) sigillatim referre non

non gravarer, nisi ab aliis jam actum foret. Cum autem præcæteris de his latè nimis nuperrimè egerit noster Marcus Aurelius Severinus *lib. de efficaci medic. p. 3.* & ex pluribus gravissimis Authoribus, singulorum morborum per ignea præsidia curationes retulerit, ac examinaverit: id quod etiam multò antea insinuaverat

Joannes Costæus Primarius Medicinæ Professor apud Bononienses, peculiari tractatu, cui titulum fecit *de Igneis Medicinæ præsidiis*; idcirco, ne ab aliis actum agam, ab illis describendis, & enarrandis supersedeo, cum eos adire possit, qui velit, contentus ipse hæc breviter tantummodò memorasse.

F I N I S.

I N D E X

R E R U M N O T A B I L I U M.

A

A Bortus imminet gravidæ ex purgante exhibito, & quo tempore magis. pag. 80.

Abortus ex morbo acuto fieri potest. 82

Abortus ex sanguinis missione accidere potest. 82

Abortus imminet ex alvi fluxu. 85

Abortus ex mammarum subita gracilentia. 89. 116

Abortus alterutrius foetus ex alterutrius mammae gracilescentia. 90

Abortus ex uteri erysipelate. 100

Abortus fit ex prægnantis macie, præfertim à causa externa. 100

Abortus quandoque ex uteri acetabulis mucore plenis. 102. & quare. 103

Abortus ex tenesmo imminet. 117

Abscessus frigidis tractandi non sunt. 71

Abscessus interni suppurati quare quandoque non innotescant. 224

Abscessus interni suppurati quomodo deprehendantur. 225

Abscessus interni ruptionem, quæ sequantur symptomata. 257

Abscessus interni sæpissimè morbos acutos comitantur. 258

Abscessus interni rupti quibus tractandi. 259

Abscessus circa regionem lumborum futuri signa. 286

Acetabula uteri quæ. 103

Acidus ructus in lienteria, bonum. 155. &c.

Acidus ructus à pleuritide præservat. 214

Acidi præternaturalis generatio, & varii effectus. 215

Æstus fortes convulsio, aut tetanus insequens, malum. 262

Æthiopes, & torridam zonam incolentes effœminatiores sunt ex Aristotele, & quare. 53

Alvi fluxus tabidis, si capilli à capite defluant, lethalis. 46. 48. 267

Alvi fluxus abortum parere potest. 86

Alvi fluxu hydrops sanari potest. 175. & quænam hydropis species. 176

Alvi fluxu longo laboranti vomitus spontaneus superveniens, bonum. 177

Alvi profluvium pleuritide, & peripneumonia affecto superveniens, malum. 178

Alvi profluvium lippienti superveniens, bonum. 180

Alvi fluxus puris sputum insequens, malum. 46. 48. 268

Alvi fluxus leucophlegmatia affectis superveniens liberat. 287

Alvi fluxus spumosi pituitam à cerebro delabentem significant ex Hippocrate. 279

Alvi fluxus crudi an atrabilem significant. 307

Alvi fluxum dysenteria insequitur. 307

Alvi excrementa corporis statum significant. 308

Ambidexteri, qui dicantur, & an mulier ambidextera fiat. 294. &c.

Ancyloglossa quid. 213

Aneurisma diruptum vomitum sanguinis lethalem facit. 289

Angina liberati quomodo dicantur in pulmonia, & empyema incidere. 42

Angina correptus, tumore in collo facto, non semper liberatur. 44

Angina correpto si tumor fiat in collo, bonum. 219. 298

Animi defectus fluxui muliebri superveniens, malum. 119

Anxietudinem tollit vinum, & quid ea sit. 302

Aphonia ex cerebri concussione. 303

Aphonia cum stertore repentino Capitis dolori superveniens septem diebus interficit, nisi febris accidat. 238

Aphonia ex ebrietate convulsionem, & mortem significat. 31. 33

Apoplexiæ fiunt maximè à quadragesimo ad sexagesimum annum. 246

Apo-

RERUM NOTABILIMUM.

Apoplexia ex ætate, ex humorum vitio, & ex mala cerebri conformatione fit. 246
 Aquæ frigida perfusio tetanum curare potest, & quando. 61. &c. ab Ægineta damnata. 63
 Aquæ calida perfusio an usum in Medicina habeat. 64. &c.
 Aquarum bonitas, vel malitia an ab illarum pondere deduci possit. 73
 Aqua quæ citò calet, & citò refrigeratur, levissima est. 73. quomodo experimentum fieri possit. 74
 Aquarum salubrium notæ. 73. 74. 75
 Aquarum pondus quomodo deprehendi possit. 75
 Aqua pluvialis an fontanæ, & reliquis sit præferenda. 75
 Aqua mulsa quid, ejusque in gravidis dignoscendis usus. 95
 Aqua mulsa gravidis exhibita cur ventris tormina pariat. 95
 Aquæ frigida potum rigor, & morbi quandoque insequuntur. 257
 Aqua calida si caput perfundatur, febris non ex bile facta, solvitur. 293
 Ardentes febres æstus fortes appellantur ex Hippocrate. 263
 Ardentes febres convulsio, aut tetanus insequens, malum. 263
 Aromatum suffitus muliebria ducit. 77. & quænam sint eligenda. 78
 Aromatum suffitus caput gravat. 77. 79
 Articularium dolorum, & Podagræ discrimen. 204
 Articularium dolorum causa. 205
 Asthmatici si gibbi fiant ante pubertatem, moriuntur. 230
 Atra bilis an ex crudis dejectionibus inferatur. 307
 Autumno quibus convenient purgationes, & venæ sectiones ad præservandum. 231

B

B Albi ab alvi profluvio maximè capiuntur. 212
 Balbutiei species. 213
 Balbuties an, & quomodo tolli possit. 214
 Balnea quænam oculorum affectibus conferant. 211. 297

Biliosis, & picrocholis dulcia omnia inimica. 139
 Blæsi qui dicantur. 213

C

C Æcum intestinum flatuum receptaculum. 216
 Calefacientia in sanguinis fluxu locum non habent. 58
 Calidorum detrimenta, & quid nomine calidi veniat. 51
 Calidorum utilitates, & commoda. 64. &c.
 Calorem ingentem convulsio, aut tetanus insequens, malum. 262
 Caloris, & frigoris in corpore mutationes longitudinem morbi significant. 304
 Calvitium eunuchi non patiuntur ex Hippocrate, & quare. 203. 205
 Calvitii causa. 206. 217
 Calvi varicibus magnis non afficiuntur ex Hippocrate. 216
 Calvi varicibus magnis supervenientibus capillati redduntur ex Hippocrate. 216
 Cancros occultos habentes melius est non curare. 219. & quare. 219
 Cancri occulti qui dicantur. 219
 Cancer quid, ejusque causa. 219
 Cancri remedia an sint, & qualia. 220
 Cancrilabiorum pulsationes, & hæmorrhagias inferre solent. 271. 272
 Capillorum defluvium tabidis lethale. 45. 46. v. Calvitium.
 Caput dolentes lacte non utantur. 135. 137
 Capite secundum partem posticam dolente, venæ frontis sectio profuit. 148
 Capitis dolor tollitur, si pus, aqua, vel sanguis effluat per nares, os, aut aures. 168
 Capitis dolor repentinè sanos corripiens cum vocis privatione, & stertore, septem diebus interficit, nisi febris supervenerit. 239
 Capitis ictum obstupescencia, et desipientia insequens, malum. 264
 Capitis ictus, et contusio nonnunquam gravior ejusdem vulnere. 264
 Capite delabens pituita spumosas dejectiones parit ex Hippocrate. 279
 Car-

- Carcinoma quid, ejusque causa. 219
 Carnosæ mediocriter foeminae abortientes uteri acetabula plena mucoris habent. 102
 Cartilagine quomodo nutriantur, & an coalescant. 189.277
 Castrati qui propriè dicantur. 204
 Catalepsis quid, & à qua causa. 210
 Cathartica convulsiones pariunt. 27. 30.276
 Cathartica, an, & quo tempore gravidis exhiberi possint. 79
 Cathartica in mensibus decoloribus, & inordinatis administranda, & quænam. 88.89
 Catharticum, an, & quale in oculorum affectibus conferat. 201
 Cathartica ad præservationem quibus, & quo anni tempore conveniant. 231
 Cathartorum exhibitionem quænam præcedere debeant. 307
 Cauteria hydropicis non sunt inurenda. 166
 Cephalalgia. v. Capitis dolor.
 Cerebri vulnera non semper lethalia. 181.182
 Cerebri vulnus, contusionem, puncturam febris, & bilis vomitus infertur. 236. & mors. 237
 Cerebrum sphacelatum tribus diebus mortem infert. 298
 Cerebri concussio aphoniam parit. 302
 Chiragræ causa. 205
 Chronicis morbis si inappetentia, & dejectiones sinceræ superaccidant, malum. 255
 Ciborum fastidium in longa dysenteria, malum. 159
 Ciborum fastidium in longis morbis, malum. 255
 Cibus febricitanti exhibitus sano quidem robur, laboranti verò morbus. 305
 Ciborum conditio animalia fortiora, vel debiliora reddit. 306
 Cœliaca passio abortus quandoque causa. 86
 Cœliaca passio quid, ejusque causæ. 155
 Coitus, v. Veneris usus.
 Colli tumor in angina bonum. 219. 298. & quando. 44
 Color faciei, an, & quando signum esse possit conceptionis maris, vel foemellæ. 96
 Colostrum quid. 115
 Comitialis morbus, vide Epilepsia.
 Conceptio marium, & foemellarum. 98. v. Foetus.
 Conceptionis signa fallacia. 113. 131. v. Graviditas.
 Conceptio quomodo contingat. 133
 Contusiones capitis periculosæ, & quandoque ipsius vulneribus periculosiores. 264
 Convulsio ex helleboro lethalis. 26. & quare. 27
 Convulsio ex catharticiis. 27.275
 Convulsio ex inanitione, & repletionem juxta Hippocratem. 27.220
 Convulsio ex vulnere lethalis. 28
 Convulsio ex ulcere an quoque lethalis. 28
 Convulsio ex punctura nervi. 28. remedia. 29
 Convulsio ab hæmorrhagia, malum. 29.258
 Convulsio ab immōdica purgatione, malum. 30
 Convulsio ex mictu sanguineo à cantharidibus facta. 31
 Convulsio ex ebrietate aphoniam inducente lethalis. 31
 Convulsio fluxui muliebri superveniens, malum. 119
 Convulsio fieri potest ex evanescente ulceris tumore, & quomodo. 143. 144
 Convulsi quartana superveniente liberantur. 151
 Convulsionis causa juxta Recentiores. 152
 Convulsio ab Ileo, malum. 259
 Convulsio ab æstibus fortibus mala. 262
 Convulsio à vigilia, malum. 269
 Cordis vulnera non semper lethalia. 181.182
 Cotyledones quid. 102
 Coxendicis diuturno dolore affectis cruristabes, & claudicatio imminet. 248
 Coxendicis dolor unctione curatur. 248.249

RERUM NOTABILIMUM.

Cranii præcisionem desipientia infequitur. 275
 Cucurbitulę scarificatę an gravidis convenient. 294
 Cucurbitula quam maxima mammis apposita menstrua cohibet. 110. & quomodo. 112
 Cucurbitularum frequens apud Veteres usus. 112
 Cutis raritas mediocris esse debet ad pilorum eruptionem. 151
 Cutem aridam habentes sine sudore, raram verò cum sudore moriuntur. 152

D

Delinium solvit tremores in febribus ardentibus. 200
 Delirium cum risu securius, cum studio periculosius. 242. v. Desipientia.
 Delirium cum furore. v. Furor.
 Dementia. v. Desipientia, Delirium.
 Dentes frigidis juventur potius an laxantur. 57
 Dejectiones syncerę, quę: & si chronicis morbis superaccidant, malum. 255. 256. 274
 Dejectiones sinceras si dysenteria infequitur, malum. 274. v. Alvi fluxus.
 Desipientia multam potationem infequens, malum. 256. v. Delirium.
 Desipientia largam hæmorrhagiam infequens, malum. 258
 Desipientia ab ileo, malum. 259
 Desipientia à capitis ictu, malum. 264
 Desipientia à vigilia, malum. 269
 Desipientia cranii præcisionem infequitur. 275
 Diarrhœa potissimum abortum parere potest. 86. v. Alvi fluxus.
 Diarrhœa Stomachica quid. 156
 Distillationes frigidis excitantur. 70
 Distillationes in ventrem superiorem suppurantur intra viginti dies. 290
 Distillationum nomine quid hic veniat, & illarum causę juxta Antiquos, & Recentiores. 290
 Distillationes reprimentes pilulę. 291
 Dolor frigidis retunditur. 71. &c.
 Dolorum varię species. 161. &c.

Dolores ventris sublimes, & non sublimes, qui. 164. & quare hi prioribus fortiores. 165
 Dolores sublimes apud Hippocratem an vagantes intelligantur. 165
 Dolores oculorum quibus remediis tollantur ex Hippocrate. 212
 Dolor hypochondriorum quotuplex. 222
 Dysenteria abortum efficere potest. 86
 Dysenteriam diuturnam si cibi fastidium comitetur, malum. 159
 Dysenteria incruenta, & sine febre. 161
 Dysenteria diuturna si corripiantur lienosi, in hydropem, aut lenteriam transeunt, & moriuntur. 226
 Dysenteria lienosis superveniens, bonum. 233
 Dysenteria furori superveniens, bonum. 254
 Dysenteria à dejectione sincera, malum. 274
 Dysenteria ab alvi profluvio. 307
 Dysenteria lenteriam parit. 307
 Dysuria. v. Urinę difficultas.

E

Ebrius obmutescens convulsus moritur, nisi febre corripiatur. 31
 Ebrietas quo tempore solvatur. 34
 Ebriis obmutescantibus quomodo succurrendum sit, ne in convulsionem incidant. 54
 Ebrietas quibus præcaveatur. 35
 Ebrii quomodo ab Apoplecticis dignoscantur. 21
 Ebrietatem rigor, & desipientia infequens, malum. 256
 Ecstasis quid. 254
 Elleborus albus, an niger convulsionem pariat. 26
 Elleborus motus convulsivos, an convulsionem efficiat. 26
 Emmotos quid significet apud Hippocratem. 107
 Empyema quomodo ex Angina fieri possit. 23
 Empyema fit ex pleuritide non repurgata spatio quatuordecim dierum. 20
 Empyema ex pleuritide factum, si quadraginta diebus non repurgatur, transit in tabem. 49

Empye-

I N D E X

Empyematici secti, si pus universim
fluxerit, moriuntur. 201. & quare.
202
Empyematici secti, si pus educatur
purum, & album, evadunt, si fœ-
culentum, & fœtidum, moriuntur.
296
Epilepsia pubertatis tempore mutatio-
nem subit; post vigesimum quintum
verò annum ferè insanabilis. 37
Erysipelas non suppuratum frigidis
tractari potest, non sic suppuratum.
68. 70. v. & 199
Erysipelas in utero gravidæ factum le-
thale. 99
Erysipelas ab intus extra bonum, non
contra. 197. & quare. 198
Erysipelatis causa. 197
Erysipelas internas quoque partes ob-
fidere solet. 198
Erysipelati quænam applicari possint.
199
Erysipelas ab ossis nudatione, malum.
269
Erysipelas ad suppurationem tendens,
malum. 270
Erysipelas epidemicum hic Neapoli
grassatum anno 1700. & 1701. 271
Eunuchi neque podagra laborant, ne-
que calvi fiunt ex Hippocrate, &
quare. 203
Eunuchorum varia genera. 204
Eunuchi laborant articularibus dolo-
ribus. 204
Excreationis in febribus quænam
bonæ. 307

F

Faciei color, & maculæ an signum
esse possint marium, & fœmella-
rum gestationis. 96
Faciei partes discissæ non facilè coales-
cunt. 185. 190
Fames corpora exsiccat. 303
Febris convulsionem ex ebrietate sol-
vere potest. 31. 34
Febricitantes gravidæ vel abortiunt,
vel difficulter pariunt. 118
Febricitantibus quando lac exhibitum
noceat. 135. 138. 139
Febribus ardentibus tremores supervē-
nientes solvuntur delirio ex Hippo-
crate. 194

Febris hypochondriorum dolorem ab-
sque inflammatione solvere potest
ex Hippocrate. 222
Febris nonnunquam salutaris est ex
Hippocrate. 223
Febris remedium esse poterit Ileo uri-
næ stillicidio supervenienti. 227
Febris insequitur cerebri vulnus, con-
tusionem, puncturam, &c. 236
Febris remedio esse poterit ei, qui ca-
pitis dolore repentè corruptus fuerit
cum aponia, & stertore. 238.
239
Febres ardentes æstus fortes ab Hippo-
crate dicuntur. 263
Febres ardentes convulsio, aut tetanus
insequens, malum. 262. 263
Febricitantibus urinæ cum crasso sodi-
mento, longam fore ægritudinem
significant. 281
Febris quæ non ex bile fit, si calida
caput perfunditur, solvitur. 293
Febris hepatis dolorem solvit, si super-
veniat. 300
Febres non intermittentes, quæ tertia
die fortiores fiunt periculosæ. 305
Febres intermittentes periculo vacant.
305
Febres longæ in tubercula, & dolores
articulorum desinunt. 305
Febricitantibus moderatus cibus est
exhibendus. 305
Febres cum partium externarum frigo-
re lethales. 307
Febrium non intermittentium lethalia
signa. 307
Ferrum sanat, quæ medicamenta non
sanant. 308
Ferri in morbis sanandis vis. 309
Flatus in ictericis non admodum ge-
nerantur, & an verum. 153. 154
Fluxui muliebri convulsio, aut animi
defectus superveniens, malum. 119
Fœcundæ mulieres quomodò dignos-
cantur. 123. 125
Fœcundæ mulieres quibus medica-
mentis reddantur. 126
Fœminæ quænam ad concipiendum
aptiores. 106
Fœminæ semen non præstant pro ge-
neratione, sed ovum. 108
Fœtus maris, vel fœminæ conceptio,
unde. 109
Fœtus ultimis mensibus gestationis
per

RERUM NOTABILIMUM.

per os nutritur. 90
 Fœtus maris, vel fœmellæ conceptio
 an in dextra, vel sinistra uteri par-
 te. 91.107
 Fœtus maris, vel fœmellæ conceptio
 an ex gravidæ colore dignosci pos-
 sit. 96
 Fomenta oculorum affectibus quænam
 conferre possint. 211
 Frigidi in corpore detrimenta. 54.
 59.64.70
 Frigidum quibus partibus speciatim
 officiat. 56.70
 Frigida ulceribus noxia. 59
 Frigida suppurationem impediunt.
 61
 Frigidæ aquæ in tetano usus. 61
 Frigida quibus morbis profint. 68
 Frigida ut nix pectori inimica. 70
 Frigida hæmorrhagiam sistunt. 69. sed
 non in pectore. 70
 Frigida quibus tumoribus conveniunt.
 71. &c. & an actu, vel potentia ta-
 lia. 72
 Frigus externarum partium in morbis
 acutis, malum. 250. præsertim si
 interiora inflammata sint. 250
 Frigus extremorum in forti ventris do-
 lores, malum. 276
 Frigoris, & caloris in corpore muta-
 tiones longitudinem morbi signifi-
 cant. 304
 Frigus partium externarum cum in-
 ternarum uisione in febribus, le-
 thale. 307
 Furor an, & quando significetur ex
 sanguine in mammis collecto. 93
 Furori si dysenteria, hydrops, aut
 mentis alienatio superveniat, bonum
 ex Hippocrate. 254

G

G Enitura. v. Semen.
 Gibbi ex asthmate, aut tussi fa-
 cti ante pubertatem moriuntur. 230
 Gravidæ mulieres an, & quando pur-
 gandæ sint. 79
 Gravidæ quibus purgantibus evacuan-
 dæ. 80
 Gravidæ an vomitoria ferre possint.
 80
 Gravidam acuto morbo corripì, lethale
 est. 80

Graviditas comparatur ægritudini. 81
 96.100.131
 Gravidæ ex sanguinis missione abor-
 tum quandoque patiuntur. 82
 Gravidæ alvi fluxu correpta abortui est
 obnoxia. 85
 Gravidæ ex repentina mammarum
 gracilescencia abortiunt. 89
 Graviditas an ex potione aquæ mulsæ
 deprehendi possit. 94
 Gravidæ benè colorata marem, malè
 colorata fœmellam gestat ex Hippo-
 crate. 96. an id verum. 98
 Gravidæ erysipelas in utero factum, le-
 thale. 311
 Gravidæ ex causa externa gracilescen-
 tes, abortiunt. 100
 Gravidæ mediocriter carnosæ absque
 causa manifesta abortientes, uteri
 acetabula plena mucoris habent. 102
 Gravidis uteri os comprimitur. 113
 Gravidis cur quandoque menstrua
 fluant. 114.128
 Gravidæ febribus prehensæ, vel ab-
 ortiunt, vel difficulter pariunt. 118
 Gravidæ si menstruæ purgationes fiant,
 fœtus non est sanus. 128
 Graviditatis signum innoxia men-
 struorum cessatio. 129
 Graviditatis signa fallacia. 113. &
 quænam sint. 131
 Gravidæ tenesmus superveniens facit
 abortum. 277

H

Hæmorrhagiam si sequatur con-
 vulsio, vel singultus, malum.
 29. 258
 Hæmorrhagiæ cur frequentiores estate.
 53
 Hæmorrhagia calidis augetur. 58
 Hæmorrhagiam sistencia medicamen-
 ta. 59
 Hæmorrhagiam frigida sistunt. 68. sed
 non in pectore. 70
 Hæmorrhagia narium, iis quibus men-
 strua defecerunt, bonum. 84
 Hæmorrhagia narium securior, &
 quare. 85
 Hæmorrhagia affectis lac non exhi-
 beatur. 135.139
 Hæmorrhagiam largam si desipientia
 insequatur, malum. 258
 Hæmor-

- Hæmorrhagia si mediocris sit, salutaris esse potest. 259
- Hæmorrhagia à forti in ulceribus pulsu, malum. 271
- Hæmorrhoides Nephriticis, & Melancholicis superveniens, bonum. 170
- Hæmorrhoides à quamplurimis morbis præservant. 171. Si sponte superveniant. 171
- Hæmorrhoidum una nisi servetur, hydrops, vel tabes imminet. 172
- Hæmorrhoides quo consilio claudi possint. 172
- Hæmorrhoides insanientibus supervenientes, bonum. 193
- Hæmorrhoides quomodo à Varicibus differant. 193
- Hæpatis inflammatio singultum parit ex Hippocrate. 122. 123. & malum est. 268
- Hæpatis vulnera quando lethalia. 181. 182
- Hepar durum ictericis malum. 225
- Hepar suppuratum si aduratur, pus purum fluens, bonum, si verò qualis amurca, lethale. 297
- Hæpatis dolor febre superveniente solvitur. 300
- Hepar aqua plenum si in omentum eruperit, lethale. 301
- Herpetes calidis tractandi. 68
- Hirudinum appositio an gravidis conveniat. 82
- Hirudinum appositio non semper tutò administratur. 171
- Horror à sudore non bonum. 253. v. Rigor.
- Horrorem tollit vinum. 302
- Humores omnes possunt ex partibus internis transmitti, & contra. 199
- Humida corpora fame tractanda. 303
- Hydropicorum ulcera difficulter sanantur. 165. & quare. 166
- Hydrops imminet à diuturnis sanato hæmorrhoidibus nisi una servetur. 40
- Hydrops alvi fluxu tolli potest. 175. & quamnam hydropis species. 275
- Hydropicorum aquæ quomodo possint ad ventrem ferri. 276
- Hydropicorum aquæ per vias urinæ quoque excerni possunt. 176
- Hydropici secti, si aqua universim fluxerit, moriuntur. 201. & quare. 202
- Hydropicis tussis superveniens, malum. 217. 297
- Hydrope, vel licentia corripuntur lienosi, si diuturna dysenteria affecti fuerint. 226
- Hydrops furori superveniens an bonum. 254
- Hydrops Hepatis. 302
- Hydrops pituita alba. 307
- Hypercatharsim si convulsio, vel singultus insequatur, malum. 302 293
- Hypochondriorum dolores absque inflammatione, febre superveniente solvuntur. 222
- Hypochondriorum dolor quotuplex. 222
- Hysterica quænam dicendæ sint. 87
- I
- I**cterici non admodum ventosi fiunt ex Hippocrate. 153
- Icteri causa, & species. Ibid.
- Ictericis si hepar fiat durum, malum. 225
- Ignis sanat, quæ ferrum non sanat. 309
- Ignis in morbis tum externis, tum internis curandis vis. 310. 311
- Ignis origo unde. Ibid.
- Ignis ope chalybis, & silicis quis primus inventor. 312
- Ileos urinæ stillicidio superveniens lethalis, nisi febris præhenderit. 227
- Ileum si vomitus, singultus, desipientia, vel convulsio insequatur, malum. 259
- Inappetentia in longis morbis, malum. 255
- Inflammationes an frigidis tractandæ. 69
- Inflammatio uteri periculosissima. 99
- Inflammationes catharticis non sunt tractandæ. 179
- Inflammationes internæ si frigore externarum partium copulentur, lethales. 250
- Insanientibus varices, vel hæmorrhoides supervenientes, bonum. 193
- Insanientis nomen quid hoc loco veniat. 193. v. Delirium.
- Intestinelorum, præsertim tenuium ulcera, & vulcera lethalia, & quare. 181. 183. 197
- Inte-

RERUM NOTABILIMUM.

Intestina gracilia discissa non coalescunt. 184.197
 Ischiade diuturna affectis cruristabes, & claudicatio, luxato articulo imminet. 248
 Ischias unctione curatur. 248.249
 Ischnophonia quid. 213

L

Lac in mammis foeminae non gravidæ, nec puerperæ signum est defectus menstruorum. 92
 Lac quandoque in viris observatum. 92
 Lactis materia quænam. 93.136
 Lac multum è mammis effluens fœtum imbecillum significat. 114
 Lactis ægrotantibus exhibendi canon. 130
 Lac ambigui valdè est usus. 130
 Lac ex butyrofa, caseosa, & serosa constat substantia. 136
 Lac Antiquis familiarissimum fuit. 135.136. & quare innoxium. 137
 Lac licet temperatæ naturæ, magna cum præmeditatione exhibendum, & quare. 137
 Lac acidi quid in se continet. 138
 Lac caput dolentibus nocet. 135.137
 Lac nocet febricitantibus, & hypochondriacis. 135.138
 Lac nocet siticulosis, & biliosis dejectionibus affectis; cum febre. 135.139
 Lac nocet cum sanguis multus effluerit. 135.138
 Lac tabidis conducit. 135.88. & quando. 140
 Lactis species, & quænam præferenda. 141
 Lac confert quacumque ex ratione consumptis. 141.142
 Lactis in ventriculo coagulationem quæ prohibeant. 142
 Lateralis morbus in quonam à pleuritide differat. 41
 Leucophlegmatia detenti forti alvi fluxu superveniente liberantur. 278
 Lienis vulnera lethalia non semper sunt. 183
 Lienosi si dysenteria diuturna corripiantur, in hydropem, aut lenteriam incidunt, & moriuntur. 226
 Lienosis dysenteria superveniens, bonum. 233

Torzi Op. Med. Tomo IV.

Lienteria abortum parere potest. 86
 Lienteriæ diuturnæ ructus acidus superveniens, bonum. 155
 Lienteria quid, ejusque causæ. 155
 Lienteria, vel hydrope corripuntur lienosi, si diuturna dysenteria affecti fuerint. 226
 Lienteria à dysenteria. 307
 Linamentum quid significet apud Hippocratem. 107
 Lingua incontinens quid apud Hippocratem. 291.292
 Lippientem alvi profluvio corripit, bonum. 180
 Lippitudo quid. 180
 Livor carnis ossæ ægrotante, malum. 251

M

Macies gravidarum abortus causa, & quando. 100
 Mammarum repentina gracilescencia abortum significat. 89.116
 Mammæ dextræ, vel sinistræ gracilescencia maris, vel foemellæ abortum an significet. 90
 In Mammis sanguis collectus an furorem significet. 93
 Mammis si cucurbitula apponatur quàm maxima, menstrua cohibentur. 110
 Mammarum cum utero consensus detectus. 112. per arterias, & nervos. 116
 Mammarum soliditas fœtus sanitatem significat, & contra. 114
 Mammarum durities à soliditate diversa. 115.116
 Mania. v. Furor.
 Mediocritas in cunctis laudabilis. 119
 Melancholia laborantibus hemorrhoides supervenientes, bonum. 170
 Melancholia quid, & variæ ejus species. 170
 Melancholia significatur ex timore ex mœstitia diuturnis. 194.195
 Melancholici sunt sæpenumero ingenio valentes, & quare. 196.197
 Melancholici morbi quæ mala portendant. 245
 Melancholici quomodo deprehendantur ex Hippocrate. 291
 Melicraton quid. 95
 Menstruæ purgationes quibus suffitibus promoveantur. 78.&c.

X

Men.

Menstruæ purgationes possunt vomitum sanguinem sistere, & quando. 83

Menstruæ purgationes corpus universum repurgant. 84

Menstruis deficientibus sanguis ex naribus fluens, bonum. 84. vel ex alia quoque parte. 85

Menstruorum purgationum vitia, quomodo sint corrigenda. 88

Menstruorum defectus lac quandoque in mammis abundare facit. 92. & quibus casibus. 92

Menstrua cohibentur cucurbitula maxima mammis apposita. 110

Menstruorum expurgatio quot modis lædatur. 110. eorumque causæ. 111

Menstruorum immodicum fluxum sustentia medicamenta. 113

Menstrua cur quandoque gravidis fluant. 114. 128. 132

Menstruorum nimius fluxus an nomine fluxus muliebris sumi possit. 119

Menstruis largè, & parcè fluentibus morbi fiunt. 119. & quinam. 120

Menstruorum quænam ab Hippocrate assignetur quantitas. 121

Menstruæ purgationis tempus universale. 121

Menstruæ purgationes ad longum quandoque tempus suppressæ absque notabili noxa, immò absque impedimento conceptionis. 121. 129. 132

Menstruæ purgationes si gravidæ accidunt, foetus non est sanus, & quomodo verum sit. 128

Menstruus sanguis unde fluat. 129

Menstruorum innoxia cessatio, conceptionis signum. 129

Menstruorum suppressio quænam mala producere possit, & quomodo. 130

Menstruus sanguis ex arteriis uteri fluit. 130

Menstruis purgationibus bruta carent, quod & quibusdam foeminis quoque accidit. 132

Menstruorum suppressio, vel vitium, mulieres podagræ obnoxias reddit, ex Hippocrate. 206

Mesenterii glandulæ quandoq; tuberculis indolentibus afficiuntur. 279

Mœstitia diuturna atram bilem significat. 195

Mogilalia quid. 212

Morbi omnes ulcus sunt, vel ulceris conditionem referunt ex Hippocrate. 258

Morbi medicamentis non sanati, ferro sanantur. 309

Mulier podagra non laborat, nisi menstrua defecerint ex Hippocrate. 306

Mulieres nostri temporis non ex intemperantia tantum Podagræ subii-ciuntur, ut de suo tempore dicebat Seneca. 207

Mulieres vetulæ cur pilos in mento progignant, & supercilia prolixiora. 217

Mulier an ambidextera non fiat. 294

Muliebrium nomine quid apud Hippocratem. 78

Muti fiunt homines ex cerebro concusso. 303

N

Nares natura humidiores minus integram sanitatem designat. 158

Nausea in longis morbis, malum. 254

Nephritide laborantibus hæmorrhoides supervenientes, bonum. 170

Nephritidis nomine quid hic intelligatur. 170

Nervi resecti minus periculi afferunt quam puncti. 28. 189

Nervi puncti, & cæsi an coalescant. 189. 278

Nix pectori inimica. 70

Nutritionis opus à parte sanguinis glutinosa perficitur. 187

O

Obesæ foemina non concipiunt, & quare. 104

Obesæ foemina quomodo curandæ, ut fecundæ evadant. 105. 106

Obesi citius intereunt. 159

Obstupescencia à capitis ictu malum. 264

Oculorum dolores, aliæque affectiones qui curentur. 210. 297

Oculis quæ noceant. 213

Oculi in somno non benè clausi quid significant. 240. huiusque rei causa. 240. &c.

Oculorum rubor à vomitu, malum. 252

Odoræ res mulieribus obsunt. 78. sed non semper. 126. &c.

Odoræ

RERUM NOTABILIMUM.

Odoræ particulæ quomodo possint ex
utero ad nares pervadere. 125
Oedematis nomine quid apud Vete-
res. 143
Omenti immoderata pinguedo sterili-
tatis causa esse potest. 104. 105. 118
Omentum extra abdomen educum
putrescit. 248
Ophtalmia quid, ejusque species. 180
Oscitationem tollit vinum, & quomo-
do illa fiat. 302
Ossibus fractis calida conducunt, fri-
gida nocent. 66
Ossa fracta an, & quomodo coales-
cant. 185. 277
Ossa quomodo nutriantur. 187
Ossium callus quomodo generetur.
188
Ossium vitium ulceris curationem im-
pedire solet. 229
Osse ægrotante caro livida, malum.
251
Ossis nudationem erysipelas inse-
quens, malum. 269
Ossis abscessus à corruptione. 308

P

PAlpebræ dormientibus incommis-
sæ quid portendant. 240. ejusque
rei causa. 240
Paracentesis quid, & quibus morbis
administretur. 201
Paracentesis unctione an sectione insti-
tuenda. 202
Partium corporis distinctio in Sper-
maticas, & Sanguineas vana à recen-
tioribus Anatomicis reputatur. 57
Partus sternutatione promovetur. 88
Partum promoventia medicamenta 88
Peripneumonia quomodo ab Angina
fiat. 43
Peripneumonia affecto alvi fluxus su-
pervenienti, malum. 178
Peripneumonix, & Pleuritidis sedes.
178
Peripneumonia à Pleuritide, malum.
260
Peripneumoniam si Phrenitis insequa-
tur, malum. 262
Phalacri qui propriè dicantur. 216
Phlebotomia, v. Venæ sectio.
Phrenitis à Peripneumonia, malum. 262
Phthisis quid. 140. v. Tabes.

Phthisicis an, & quando lac conve-
niat. 140. 141
Phthisis purum sputum insequitur. 267
Pilulæ ad distillationes reprimentas.
291
Pituita inter Ventriculum, & Dia-
phragma contenta, si vertatur in ve-
sicam, solvitur morbus. 290
Pleuritis in quatuordecim diebus non
repuigata ad suppurationem tendit.
39. & tabem. 41. 49
Pleuritidis exquisitæ processus. 39. 40
Pleuritis, & morbus Lateralis in quo-
nam differant. 41
Pleuritidis expurgatio quibus promo-
veatur. 41
Pleuritici suppurati quando nam in
Tabem transeunt. 49
Pleuriticorum apostema quibus signis
deprehendatur ruptum jam esse. 50
Pleuritico alvi fluxus superveniens,
malum. 178
Pleuritidis, & Peripneumonix sedes.
178
Pleuritide non valdè corripuntur aci-
dum eructantes. 214
Pleuritis ab acido figente fit. 214
Pleuritidem si inflammatio Pulmonum
sequatur, malum. 260
Podagra an frigidis tractanda. 71
Podagra non laborant Eunuchi ex
Hippocrate, & quare. 203
Podagra rarus morbus tempore Hip-
pocratis. 204
Podagræ, & Articularium dolorum
discrimen. 204
Podagræ causa. 205
Podagram non patiuntur mulieres, nisi
menstrua defecerint ex Hippocrate.
206
Podagra olim morbus epidemicus,
moris fructum non ferentibus, ex
Athenæo. 207
Podagra non ad solam intemperan-
tiam referenda. 208
Podagra periodis quibusdam affligit.
204. 208
Podagra pueros non torquet ante usum
Venereorum. 208
Podagrici podagricos gignunt, & qua-
re. 209
Podagram non prohibent purgationes
præservativæ dictæ. 233
Podagra vim medicamentorum elu-

dit ex Luciano . 233
 Podagra sedata inflammatione quadraginta diebus terminatur . 234
 Podagra Vere , & Autumno plerumque affligit . 244
 Potationem multam rigor, & desipientia insequens, malum . 256
 Prægnantes, v. Gravidæ .
 Præputium discissum non facile coalescit . 185.190
 Psellotis quid . 213
 Pueri Articularibus doloribus , non Podagra afficiuntur . 205
 Pueri Podagra non laborant ante usum Venereorum . 208
 E Pulmone ductus sanguis spumofus est . 46
 Pulmonis vulnera non semper lethalia . 181.182
 Pulmonis inflammatio à morbo laterali, malum . 260.v. Peripneumonia.
 Pulsationes circa vulnera, & ulcera hæmorrhagia si insequatur, malum . 271
 Purgantia v. Cathartica .
 Pus concoctum bonum in ulceribus signum . 65
 Puris generatio , & species . 191
 Pus in parte aliqua contentum vel ex crassitie, vel ratione loci non innorescit . 223
 Puris sputum à sanguis sputo , malum . 265.308
 Pus verum ex puro sanguine fit . 266
 Puris sputum phthisis , & fluxus insequitur . 267
 Puris sputum in phthisi suppressum necat . 267
 Puris empyicorum conditiones variæ . 296
 Puris ex hepate suppurato prodeuntis conditiones . 297
 Pustulæ latæ non admodum pruriunt . 167
 Pustularum species , & causa . 167
 Pustulis vermiculi innascuntur, unde pruritus . 168

Q

Quartana affecti non admodum convulsionibus capiuntur . 151

R

Renum, & Vesicæ vitia in senioribus difficulter sanantur . 163.& quare . 164
 Rheumatismus quadraginta diebus terminatur . 235
 Rigores febriles ex partibus posterioribus incipiunt magis, & quare . 149.150
 Rigores febriles quomodo per corpus propagentur, & ad caput . 150
 Rigor multam potationem insequens, malum . 148.v. Horror .
 Ructus acidus in longis lævitationibus intestinorum superveniens, bonum . 155.& quare . 156
 Ructus acidus in lienteria an excitandus . 257
 Ructus acidus à pleuritide præservat . 214
 Ruptiones è dorso ad cubitum descendentes venæ-sectio solvit . 194

S

Sanguinis fluxus . v. Hæmorrhagia .
 Sanguis spumofus è pulmonibus educitur . 46
 Sanguis sputo ejectus è venis an ex arteriis educatur . 47
 Sanguinis missio. v. Venæ-sectio .
 Sanguinis vomitus menstruis erumpentibus solvitur, & quando . 83
 Sanguis in mammis collectus furorem an significet . 93
 Sanguis non ad conceptionem, sed ad nutritionem foetus concurrat . 101
 Sanguinem fluentem sistentia medicamenta . 113
 Sanguinis motus venæ-sectione acceleratur . 149
 Sanguinearum partium prima generatio . 186
 Sanguis in ventrem effusus suppuratur . 190
 Sanguinis sputum puris sputum insequens, malum . 265
 Sanguinis sputi differentie . 266.47
 Sanguinis sputum, in mulieribus præsertim, nonnumquam innoxium . 266
 Sanguinis sputum in pleuritide cur bonam . 267

San-

RERUM NOTABILIMUM.

Sanguinis vomitus prognosticum, & curatio. 287.288
 Sanguinis vomitus sine febre salutaris, non contra ex Hippocrate, & quare. 288
 Sanguinis vomitus ex disrupto Aneurismate lethalis. 290
 Sanguinis vomitus tabem, & puris purgationem parit. 308
 Sanguinem supra ferri, an semper malum sit. 287
 Sanguis in ventriculo extravasatus grumescens, quibus dissolvatur. 289
 Secundinarum eductio sternutatorio promovetur. 109
 Secundinae quot sint, & quando educendae. 109
 Seminis masculi conditiones, ut fecundum sit. 134
 Semen utrumq; ex Lucretio mutua actione consentaneum reddi potest. 134
 Semen natura humidius minus integram sanitatem designat. 158
 Senes à morbis renum, & vesicae difficulter liberantur. 163
 Singultus haemorrhagiae superveniens, malum. 29
 Singultus ad ventriculum an ad diaphragma referendus. 30
 Singultus nimiam purgationem insequens, malum. 30.293
 Singultus ex hepate inflammato. 122. & quare. 123. malum est. 268
 Singultus causa, & sedes. 123.174.252
 Singultum sternutatio superveniens solvit. 173
 Singultus an fiat inanitione, & repletione. 220.221
 Singultus quomodo à vomitu differat. 221
 Singultus à vomitu, malum. 252
 Singultus ab Ileio, malum. 259
 Sitientes noctu an bibere debeant. 76
 Sitis naturalis, & morbosae causae. 76
 Sitis sedes pulmo ex Platone. 76
 Sitis fomno quandoque sedatur. 77
 Siticulosis lac nocet. 135.139
 Sol ignis moles est. 310.311
 Somno sitis quandoque sedatur. 77
 Somnus modum excedens, malum. 307
 Sopor ab ebrietate convulsionem, & mortem facit. 31
 Sopor à lactis acidi usu, mephitis, &c. 31

Spadones qui dicantur. 204
 Spermaticarum, ac sanguinearum partium prima generatio. 186
 Sphacelari quid sit apud Hippocratem. 298
 Spina ventosa an frigidis tractanda. 71
 Spumosa dejectiones pituitam è capite delabentem significant. 279
 Spuma quomodo generetur. 280
 Sputi graveolentia tabidis lethalis. 45
 Sputum sanguinis quot modis accidere possit, & eorundem signa. 47.266.v. Sanguis.
 Sterilitas cur quandoque ab obesitate. 104. & quomodo curetur. 105
 Steriles viri qua industria reddantur foecundi. 54
 Sterilitas mulieris quo pacto explorari possit juxta Hippocratem. 123.125
 Sterilitas quib. remediis tolli possit. 126
 Sternutationis in feminis juvamenta. 87
 Sternutatio partum promovet. 88
 Sternutatio secundinas promovet. 109
 Sternutationem quanam excitent. 88.110
 Sternutatio promovetur à natura, sed non sine vi causae morbosae ex Galeno. 109
 Sternutatio iterata in pestilenti constitutione lethalis. 110
 Sternutatio superveniens singultum tollit. 173
 Sternutatio quomodo fiat. 173.299
 Stranguria v. Urinae stillicidium.
 Strigmenta in urina quid significet. 306
 Sudor morientibus iis accidit, qui cutim laxam habent, non iis qui siccam. 152
 Sudorem si horror insequatur, non bonum. 253
 Sudor multus semper fluens corporis repletiones significat. 304
 Suffitus aromatum muliebria ducit. 77
 Suppurati quinam dicantur. 201
 Suppuratio non conspicua fit, vel ex puris, vel ex loci crassitie. 223
 Suppurationum internarum signa. 224
 Suspiria luctuosa in morbis acutis cum febre conjunctis, mala. 244
 Syncerae dejectiones v. Dejectiones, Alvi fluxus.
 Synovia quid. 205

T

TAbes fit praecipue à decimo octavo ad trigessimum quintum annum. 41

Tabi-

Tabidis sputi malus odor, & capillo-
rum defluvium, lethale. 45.46
Tabidis alvi profluvium lethale. 46.48.
267
Tabidi evadunt ii pleuritici suppurati,
qui quadraginta diebus non purgan-
tur. 49
Tabidis lac convenit. 135. & quando.
140.141
Tabidi quinam dicantur. 139
Tabes imminet à diuturnis sanato hæ-
morrhoidibus, nisi una servetur. 172
Tabes dorsalis quænam. 210
Tabes sanguinis vomitum insequitur.
308
Tenesmus abortum parere potest. 86.
277
Tetano correpti in quatuor diebus pe-
reunt. 36
Tetani natura, & causa. 36
Tetano correptis quæ conferant. 37
Tetanus frigida perfusione sanatur, &
quando. 61
Tetanus ab æstibus fortibus, malum. 262
Thlasia, & Thladiæ, qui. 204
Thlibiæ qui dicantur. 204
Timor diuturnus atram bilem deno-
tat. 195
Traulosi, & Trauli quid. 212.213
Tremores in febribus ardentibus deli-
rio solvuntur. 200
Tremoris causa, & quomodo ardentibus
febribus accidere possit. 201.
v. Horror, Rigor.
Tuberculi interni ruptionem quæ in-
sequantur. 257. v. Abscessus.
Tubercula, & dolores articularum ex
febre, cibum pleniorum significant.
305
Tumores quinam frigida sunt tractan-
di. 71
Tumores in ulceribus apparentes, mox
evanescentes, quid portendant. 143
Tumores subito evanescentes, quæ ma-
la inducere possint. 144.145
Tumores si vulneribus, & ulceribus
magnis non accidant, malum. 145
Tumores molles vulneribus superve-
nientes boni, crudi verò, mali. 147
Tumores in partibus internis sæpe
fiunt, præcipuè in morbis acutis. 257.
v. Abscessus.
Tussis frigidis excitantur. 70
Tussis hydropicis superveniens, ma-

lum. 217.297
Tussiculosi si gibbi fiant ante puberta-
tem, moriuntur. 230

V

V Arices insanientibus superve-
nientes, bonum. 193
Varices quomodo ab hæmorrhoidibus
differant. 193
Varices magnæ calvis non fiunt. 218
Varices magnæ calvis supervenientes
calvitium tollunt, ex Hippocrate.
216
Venarum in missione sanguinis vanus
selektus. 82
Venæ-sectio abortum efficere potest.
82. & quando. 82
Venæ frontis sectio dolente postica
capitis parte profuit. 148
Venæ-sectio revulsoria, & derivatoria
post detectam sanguinis circulatio-
nem exularunt. 149
Venæ-sectione sanguinis motus acce-
leratur. 149
Venæ-sectio solvit ruptiones ex dorso
ad cubitum descendentes. 194
Venæ-sectio in luxationibus, fracturis,
& contusionibus locum non habet.
194
Venæ-sectio an oculorum affectioni-
bus conferre possit. 211.297
Venæ-sectio an urinæ difficultatem
tollat. 218
Venæ-sectio an locum habeat in mor-
bis urinæ. 218
Venæ-sectio quibus, & quo anni tem-
pore ad præservationem conveniat.
231.301
Venæ-sectio an stranguriam, & dyfu-
riam sanet. 297
Veneris usus moderatus. 209
Veneris usu pueri ad podagram dispo-
nuntur, & quare. 209
Veneris usu articuli labefactantur, &
quare. 209
Ventris dolor diuturnus in suppura-
tionem tendit. 218
Ventris dolorem si partium extrema-
rum frigus comitetur, malum. 276
Ventriculi vulnus lethale. 288.184
Vere quibus convenient purgationes,
& venæ-sectiones ad præservandum.
231

RERUM NOTABILIMUM.

Vermiculi in pustulis pruritus causa.

168

Vesicæ, & renum vitia in senioribus
difficulter sanantur. 163. & quare. 164

Vesica discissa insanabilis, ex Hippo-
crate. 181. 183

Vesicæ morbi quomodo deprehendan-
tur. 291

Vesicæ excrementa corporis statum si-
gnificant. 308

Vigiliam convulsio, vel desipientia in-
sequens, malum. 269

Vigilia modum excedens, malum. 307

Vini immoderatè epoti præternatura-
les effectus. 12

Vini potio an remedium oculis esse
possit. 211. 298

Vini multam potationem rigor, & de-
sipientia insequens, malum. 256

Vini potio an stranguriam, & dysu-
riam sanet. 297

Vinum anxietudinem, oscitationem,
& horrorem tollit. 302

Ulcus an convulsionem lethalem in-
ferre possit. 28

Ulceræ ex frigidorum admotione malè
se habent. 59

Ulceribus si tumores fiant, mox dispa-
reant, quid indicetur. 143

Ulceribus magnis, nisi tumores acci-
dant, malum. 145

Ulceræ circumglabra quænam sint, &
cur mala. 160. quomodo curanda. 161

Ulceræ hydropicorum difficulter sa-
nantur. 165. & quare. 166

Ulceræ cerebri, cordis, vesicæ, præ-
cordiorum, tenuium intestinorum,
ventriculi, jecoris, lethalia. 181

Ulceræ annua, & diuturna cum ossis
vitio complicantur. 229

Ulcus sunt, vel ulceris conditionem sa-
piunt omnes morbi ex Hippocrate,
& quare. 258

Ulcerum fortes pulsationes sanguinis
profluvium insequens, malum. 271

Volaticum erysipelas quid. 262

Volvulus. v. Ileos.

Vomitoria an gravidis exhiberi pos-
sint. 80

Vomitum sanguineus ex menstruorum
eruptione sistitur, & quando, pag.
83

Vomitum superveniens alvi fluxu lon-
go laboranti, bonum. 177

Vomitum quomodo differt à singultu.

221

Vomitum biliosus insequitur cerebri
vulnus, contusionem, puncturam,
&c. 236. & quare. 236. 237. &c.

Vomitum si singultus, & oculorum ru-
bor insequatur, malum. 252

Vomitum si ileum comitetur, malum.
258

Vomitum sanguinis prognosticum, &
curatio. 287. 288

Urinæ stillicidium ex inflammatione
recti intestini, uteri, & renibus puru-
lentis. 122. non tamen perpetuò. 123

Urinæ difficultatem an venæ-sectio cu-
ret. 218

Urinæ stillicidio Ileos superveniens,
lethalis, nisi febris prehendat. 227

Urinæ cum sedimento crasso in feбри-
bus longam ægritudinem signifi-
cant. 227

Urinæ cum bilioso, & tenui sedimento,
acutum morbum significant. 228

Urinæ diversæ turbationem fortem in
corpore denotant. 229

Urinarum bullæ morbum renalem, &
longum significant. 284

Urinæ pingues renum dolorem, & mor-
bum acutum denotant. 285

Urinarum pinguium causæ. 285. 286

Urinæ stillicidium an vini potio, & ve-
næ-sectio solvat. 297

Urinæ difficultas an vini potione, & ve-
næ-sectione curetur. 297

Urinæ vias petere potest pituita inter
ventriculum, & septum transver-
sum contenta. 301

Urinæ sedimenta quid significant. 306

Urinæ sedimenta strigmenta referentia
quid significant. 306

Utero-gerentes. v. Gravidæ.

Uterinæ affectiones quænam dicuntur.

87

Uterus sternutatione expurgari po-
test. 87

Uteri erysipelas in gravida, lethale. 99.
atque etiam in non gravida. 99

Uteri inflammatio valdè periculosa. 99

Uterus graviditatis tempore crasse-
scit. 100

Uteri acetabula mucoris plena sunt
causa abortus. 102

Uteri acetabula quæ. 103

Uterus in coxam vergens, si suppure-
tur,

INDEX RERUM NOTABILIU.

- tur, necesse est linamentum fieri ,
quomodo intelligatur. 107
- Uterus loco-moveri nequit. 107
- Uteri cum mammis consensus dete-
ctus. 112. per arterias, & nervos. 113
- Uteri os gravidis comprimitur. 113
- Uteri cum vicinis partibus consensus.
117
- Uteri os durum illius compressionem
denotat. 117
- Uteri densitas, vel raritas, non confert
ad conceptionem. 118
- Uterus pluribus arteriis quàm venis
est refertus, & quare. 130
- Uterus valdè frigidus, humidus, sic-
cus, & calidus ineptus est ad con-
ceptionem. 132
- Uterus spissus quinam dicatur. 132
- Uteri foecundi conditiones, & signa.
133
- Vulnera lethales convulsiones parere
possunt. 28
- Vulneribus tumores si accidunt, &
mox evanescant, quid significetur.
143
- Vulneribus fortibus nisi tumores acci-
dant, malum. 145
- Vulnera prava, quæ dicantur potissi-
mum. 146
- Vulneribus tumores molles superve-
nientes, boni, crudi verò, mali. 147
- Vulnera vesicæ, cerebri, cordis, præ-
cordiorum, tenuum intestinorum,
ventriculi, jecoris, lethalia. 18r
- Vulnera quanam sint lethalia. 183. 185
- Vulneribus internorum viscerum ri-
gores supervenientes, malum signi-
ficant. 185
- Vulnera convulsio, aut tetanus infe-
quens, an malum esse scripserit Hip-
pocrates. 262
- Vulnera capitis quandoque minus pe-
riculosa, quàm ejusdem ictus, &
contusio. 264
- Vulnerum fortes pulsationes hémor-
rhagia insequens, malum. 271

FINIS.

L U C Æ
T O Z Z I
N E A P O L I T A N I
In Librum Artis Medicinalis
G A L E N I
Π Α Ρ Α Φ Ρ Α Σ Τ Ι Κ Η
Α Ν Α Κ Ε Φ Α Λ Α Ι Ω Σ Ι Σ

I N Q U A
UNIVERSA MEDICINA, ETIAM CHIRURGICA,
in suos Canones distributa, & juxta Veterum, ac Recentiorum
inventa, quàm dilucidè enucleata continetur.


Huic adjectum est Practicum Opusculum
D E R E C T O U S U
S E X R E R U M N O N N A T U R A L I U M,
cunctis Rei Medicæ Professoribus perutile simul, & necessarium.
T O M U S Q U I N T U S.



P A T A V I I, Ex Typographia Seminarii M. DCC. XI.
Apud Joannem Manfrè.
Superiorum Permissu, ac Privilegio.

INSTITUTION
IN LIBRARIIS
GALLI
PAPAZIKH
ANAKEFALAZIKH
IN DOCT
UNIVERSA MEDICINA
in hoc Canonis officium
interius quibus etiam

DE RECO
SEX RERUM NOMINATURALIUM
TOMUS QUINTUS



EXATVIT DE
LONDON

TYPOGRAPHUS LECTORI CANDIDO.



Uamplurimi fortassè erunt qui Libri hujus vix titulo inspecto, ex eo solum quod Galeni nomen præseferat, illum tanquam inutilem, & tantumnon perniciosum, prorsus rejiciendum esse existiment. Eò enim juniorum mentes incessit novarum rerum, præsertim in Medicina, cupido, ut quidquid novitatem non sapiat, inter inepta vulgò reponatur, & vetustiora omnia Antiquorum virorum monumenta, tanquam rancida, frivola, & nullius frugis, subsannatione, & risu excipiantur. Verùm quamvis non inficier innumera esse in Recentiorum Medecina præclarissima inventa; haud tamen negari potest non pauca quoque legi apud Veteres ejusdem Artis Professores, admiratione maximè digna, quæque ipsis Neotericis facem veluti prætulisse videantur. Unus sanè sufficeret apud Medicos accuratissimus, isque antiquissimus Practicus Hippocrates, cujus Aphoristicas sententias per tot retrò secula receptas, & ratio ipsa, & quotidiana experientia solidissimas esse luculentissimè confirmavit. Sed & in Galeno ipso ii, quos novitatis nimium studium transversos non egerit, permulta sanè, quibus erudito Medico carere non liceat, certocertius admirabuntur. Quum itaque Clarissimus Vir Lucas Tozzi, ut antiquissimo inclytæ hujus Neapolitanæ Accademiæ instituto obtemperaret, in Hippocratis Aphorismos, atque Galeni Artem Medicam locupletissima Commentaria digessisset, eaque multis ab hinc annis frequentissimos auditores, qui undique ad illum confluebant, publicè docuisset; (a) ope-

a 2

ra

re pretium se facturum esse existimavit, si eadem exactiori lim a perpolita typis traderet, atque Reipublicæ Medicæ perlegenda communicaret: Præsertim quum non solum inter horum Authorum monumenta selectiores, atque inconcussas doctrinas excerpserit, verum etiam illorum asserta Recentiorum Medicorum inventis, & saniori Philosophiæ semper accommodaverit. Hoc consilio septendecim ferè ab hinc annis in priores quatuor Aphorismorum Hippocratis Libros Commentarios publici juris fecit, reliquos successive editurus, nisi ab INNOCENTIO XII. Pontif. Max. à cubiculo Medicus Romam accitus fuisset, atque eo in extrema senectute è vivis sublato, Hispaniam versus, rigidissima hyeme, pro CAROLI II. reparanda salute quam citissime iter arripuisset. At quum in Italiæ finibus pietissimi Regis præmaturum obitum, Europæ universæ funestissimum, accepisset, de reditu consilium cœpit: quare post tot exantlatos labores domum tandem concessit, ut in suorum, amicorumque complexu letam, pacatamque senectutem traduceret. Itaque non solum in tres reliquos Aphorismorum Libros Commentaria, ut datam fidem liberaret, edidit; sed etiam Interpretationem, quam Paraphrasticam Anacephalæosin appellat, in Galeni Artem Medicam Medicorum manibus nunc tandem tradendam cogitavit. Hæc igitur manuscripta cum blattis, & tineis pugnantia nactus emendavit, auxit, atque in concinniore formam redegit: scilicet ut quæ fortassè in Galeno sunt effæta, exucca, & prorsus insipida, tot condimentorum suavitate præparata, gratissimum saporem etiam nauseabundis stomachis afferre possint. Fruere igitur, Lector Candide, celeberrimi Operis omnibus numeris absoluta Interpretatione: quod si Operis Author ad captandum impotentem animum nullas habet illecebras; Authoris Paraphrastes non pelliciet modò, sed trahet. Vale.

IN LAUDEM AUCTORIS.

Opus sum Illustratum, acque elegantem
Paraphrasin, & Additionem ad
ARTEM MEDICAM
Galeni.

G A L E N U S.

Anagr. pur.

A N G E L U S.

D I S T I C H O N.

GALENUS nomen præfert, mihi crede, verendum

ANGELUS, inverso nomine, nomen erit.

E A N D E M.

D I S T I C H O N.

Idem Galeni Illustratio & curatio descripta
Latine & Græce, & hoc sunt &c.

IN LAUDEM AUTHORIS.

Ob suam Illustrem, atque elegantem
Paraphrasim, & Additionem ad
ARTEM MEDICAM
Galenii.

OCTASTICHON.

*Luca, Galeni MEDICÆ quod deficit ARTI,
Arte, & Natura sufficis ipse tua.
Iliadem Medicam nucis arcto in cortice claudis.
Atque nova illustras Iliade Iliadem.
ANGELUS, & GALENUS, idem est. Hunc instruis. Ergo
Angelicum superas ingenio ingenium.
Ille prius te informavit: Nunc perficis illum.
Sic Ars Galeni vincitur Arte sua.*

*Amicus Addictissimus
Franciscus Coccioli.*

EJUSDEM. DISTICHON.

*Arti Galeni Medicæ si cætera defint,
Luce tua LUCÆ, luceat; hoc satis est.*

NOI REFORMATORI

Dello Studio di Padoa.

HAvendo veduto per la Fede di Revisione, & Approbatione del P. Fr. Ambrosio Lisotti Inquisitore di Padoa nel Libro intitolato *Luca Tozzi Neapolitani in Librum Artis Medicinalis Galeni* non v'esser cos' alcuna contro la Santa Fede Cattolica, & parimente per Attestato del Segretario Nostro; niente contro Principi, & buoni costumi, concedemo Licenza à Zuanne Manfrè Stampatore, che possi esser stampato, osservando gl'ordini in materia di Stampe, & presentando le solite copie alle Publiche Librerie di Venetia, & di Padoa.

Dat. 16. Aprile 1710.

(*Carlo Ruzini K. Proc. Refor.*

(*Alvise Pisani K. Refor.*

Agostino Gadaldini Segr.

NOT REFORMATORY

Dello Studio di Padova.

re copie alle Publiche Librerie di Venezia & di
mi in materia di Stampe, & presentando le sol-
te, che possi esser stampato, osservando gli ordi-
concedendo licenza a qualunque libreria stampato-
lito; niente contro Religione, & buoni costumi;
ca. & parimente per Autenticato del Segretario Ma-
v'esser così, alcuna contro la Santa Fede Cattol-
xi. Approbatione del P. Fr. Ambrosio Libani
L'Avendo veduto per la Fede di Revisione, &

Dr. J. A. De la Riva

(Carp. Linguae de P. de R. de)

509 2. 4. 11 (15.11.11)

Agostino Cacciari 2020

IN LIBRUM ARTIS MEDICINALIS GALENI PROŒMIUM.

HÆrebit statim aliquis in ipso primo limine Tituli, & dolenter secum immurmurans, simul unà demirabitur, quàm malè tempus insumamus in Re pervetusta nimis, & plurimum rancida; quàmque inutiliter opera, ac studio abutamur, nostra hac præsertim ætate, in exponenda Arte Medicinali Galeni, quam ipse, vel Senex, & obliviosus, vel Ephebus, inexpertus, & ineruditus, tumultuariè, ac minùs physicè compilavit. At si leat is, quicumque sit, nec audeat talia comminisci, aut de Galeni diligentia, ac sedulitate tam perperam opinari. Equidem in hoc Opere universam ille Medicinam, Methodo sanè compendiaria, faciliq; accuratissimè contractam, ob oculos Tyronibus exhibuit, atque Sanitatis, Morbique Naturam, & Differentias; itemque Signa, & Causas, quemcumque statum Corporis Humani Conservantes, Præservantes, Curantes, cum congruenti Auxiliorum Syntaxi, exactissimè retulit, & disertissimè examinavit; ut proinde nemo se Medicum haberi posse credat, nec quidquam aliqua laude dignum, in Medicina facienda, consequi posse speret, qui non omnem operam in hujus Operis lucubrationem impenderit. Neque verò, pro mea virili deerit, quin omni ex parte sim Vobis gratificaturus, curiosiora seligendo, minùsque in Scholis hucusque memorata, prout occasio tulerit, declarando, atque ad Praxim Medicam conferentiora, ex Recentiorum inventis, suo cuique loco adaptata, copulando, ac denique vetustiora, & infructifera, in meliorem frugem convertendo, logicalibus quæstiunculis resectis, atque omissis. Sategite igitur, Jatrophi studiosissimi, quibus scilicet Medicina ritè perdiscenda cordi est: Certè bis allaborasse non pigebit.

Antequam autem Rem ipsam attingamus, baud inutile existimavi, nonnulla breviter praemittere, veluti totius Operis Prolegomena.

Inscribitur opus hoc in Graecis exemplaribus Τέχνη ἰατρικὴ, id est, Ars Medicinalis: Ab Arabibus verd, & Latino-barbaris, deducto pariter à Graecis nomine, appellatur Mixfotexvñ, seu Ars Parva, eò quòd Universa Medicina, veluti per Epitomen, in hoc opere sit contracta.

Ejus Author Claudius Galenus est, natione Græco-Asiaticus, patria Pergamenus, (a) qui acri ingenio præditus, & in cunctis naturalibus Disciplinis versatissimus, in philosophando nulli addictus, sed in omnibus liber fuit. Hanc autem libertatem sparsim in suis operibus profitetur, adèd ut nulli sectæ inbærens, omnes Antiquiores impugnaverit. Sic Platoni, Aristoteli, Chrysippo, Erasistrato, Archigeni, Asclepiadi, Theffalo, aliisque infinitis contradicit; imò neque ipsi Hippocrati, quem cæteroqui summoperè veneratur, uspiam parcit. Adversus sectarios insuper vehementer invebitur, eosque vocat servos, & libertinos, atque ejuscemodi doctrinam Tyrannicam, & confusionis plenam: quamobrem, 8. de compos. Medicam. per loca, sub initio habet: Quod semper dico, etiam nunc proloquar, nimirum persuasum me habere, quòd difficillimum sit ad veritatem revocare eos, qui sectæ alicujus servituti se addixerunt: etenim falsæ opiniones, animos Hominum præoccupantes, non solùm furdos, sed & cæcos faciunt, itaut videre nequeant, quæ aliis conspicuè apparent. Et 6. epidem. comm. 2. t. 25. Neque in Hippocratis solùm scriptis, sed & in aliis omnibus Antiquorum libris observo, ut non temerè quæ quisque ipsorum dixerit, approbem; sed experientia, & ratione, verum ne, an falsum sit, quod scripserunt, examino. Se liberum quoque profitetur lib. 2. de Simplicibus, & veritatem omnibus rebus præulisse ait. Idem etiam confirmat lib. de libris propriis 2. Meth. cap. 5. 3. de loc. affect. cap. 2. & alibi pluries. Attamen jaëtabundus aliquando gloriatur, se posse ex tempore, pro re nata, de quacumque Secta dicere, nec rationum penuria posse convinci, ut præsertim fatetur cit. lib.

(a) Qui Galeni Vitam fusè descriptam desiderat, legat illam præ cæteris per Jo: Martinum Eustachium Gambatenzanum Medicum collectam, & editam Neap. 1577.

lib. 3. de loc. aff. cap. 2., ubi hac habet: Ego verò reipsa, & publicè, & privatim, apud eos videlicet, qui Sectam quamlibet à me discere cupiebant, ostendi in omnium Sectarum scientia (ne majus quidquam dixero) me esse posthabendum nemini: Quòd si uni Sectarum patrocinium ferre velim, quamvis ex tempore, ac pro re nata dicendum fuerit, haud tamen facilè ab aliquo convinci me rationum penuria patiar. Se quoque in omni secta instructum, non solum citato loco, sed alibi pluries confitetur, potissimum verò lib. de sectis ad eos, qui introducuntur, lib. de opt. sect. ad Thrasybulum, & lib. de Plenitudine cap. 9. & lib. 8. Meth. cap. 3.; quin imò de his multa volumina se composuisse testatur lib. de libris propriis. Hinc discant veri Galeni Sectatores, quomodo in Rebus Medicis se gerant.

Num autem prima, vel ultima vitæ suæ ætate, Librum hunc conscripserit, controversi solet. Et quumvis aliquibus visum sit fuisse illum, cum primum Rei Medicæ sese operam navaret, adeoque in Juventute compositum; verisimilius tamen est, ab eodem jam Senæ, fuisse memoriæ gratia, compilatum. Cum enim senes immemores evadant eorum, quæ per anteriores ætates didicere, consultum proinde visum Galeno fuit, per id temporis compendiariam Medicinam describere, ut facilius secundum capita eorum, quæ alibi fusissimè edocuerat, recordaretur. Ni quoque dicere velimus, hunc Librum in gratiam potius Tyronum fuisse ab eodem jam Senæ, & post alia numerosiora volumina editum, ut nimirum veluti Prodrómus ad penitiora Medicæ facultatis penetralia subeunda, & facilius perstruenda deserviret. (a)

Unicus hic Liber est, sed ab Interpretibus, atque Expositoribus, potissimum à Turisano, in tres, non incongrua divisione, dissectus est. Siquidem in primo Corpora Salubria, Insalubria, & Neutra in suis differentiis explicantur. In secundo, Signa ad eadem internoscenda referuntur. In Tertio demum, Causæ, tum Salubria Corpora conservantes, tum Neutra præservantes, vel in meliorem Statum reducentes, tum denique Insalubria, seu Morbosa curantes, latissimè enarrantur; cum Salubre, Insalubre, & Neutrum, de Corpore, de Signo, & de Causa dici possit, ut ex Logicis deducitur.

A 2

Hinc

(a) In fine hujus Operis recenset Galenus, quæ ante istius libri lectionem prænosci debeant, unde videtur hic in ultima ætate compositus.

Hinc nedum Tyronibus , sed & in Re Medica diu exercitatis , magno usui , maximoque emolumento esse , Commentaria super eos tradere , cunctis bonarum literarum Academiis hucusque creditum est : & gravissimi sanè Doctores in eisdem exponendis insudarunt , cum exinde Universa Medicina , tum Theoretica , tum Practica enucleata , recolligatur . His ergo prælibatis , singula nunc singulorum librorum Capitula percurramus , sua cuique adjecta Paraphrasi , Leonici versionem prosequentes .

LUCAE TOZZI

IN ARTEM MEDICINALEM

GALILENI

ΠΑΡΑΦΡΑΣΤΙΚΗ ΑΝΑΚΕΦΑΛΕΩΣΙΣ.

LIBER PRIMUS.

C A P. I.

Quot numero Doctrinae, ac de Definitivae dignitate.

T E X T U S.

Tex. 1.



Res sunt omnes Doctrinae, quae ordini inhaerent. (T. 2.) Prima quidem ex notione finis, quae per resolutionem fit: Secunda ex compositione constat eorum, quae ex resolutione fuerunt inventa: Tertia ex definitionis dissolutione, cui nunc incumbimus. (T. 3.) Licet autem huiusmodi doctrinam appellare, non tantum definitionis dissolutionem, sed & explicationem, ut nonnulli vocarunt, vel resolutionem, vel divisionem, vel (ut nonnulli alii) explanationem, vel expositionem, ut alii. (T. 4.) Conati sunt & Herophilorum quidam talem facere doctrinam, quemadmodum Heraclides Erythraeus: Conati sunt, & eam, quae per compositionem & ipsi Herophilii, & quidam Erasistrati sectatores, & Athenaeus Attaleus. Neminem tamen ante nos eam, quae oritur à notione finis, scripsisse compe-

rimus, ex qua omnes artes via quadam, atque ordine, constituuntur: sed illam quidem alio pertractavimus loco. (T. 5.) Hic verò Definitivam faciemus doctrinam, quae quantum ab ea, quae ex resolutione consistit, & dignitate, & ipso docendi ordine linquitur, tantum & ad totius compendium, & ad singulorum memoriam prestare invenietur: sufficienter enim facillimè memoriae commendantur ex Definitionis dissolutione, universa; quoniam totius Artis capita in se optima Definitio complectitur, quam quidam substantialem vocant, ex adverso distinguentes aliis, quae notionales appellantur; illae siquidem ab his, quae accidunt rebus definitis, haec verò ab ipsa essentia constituuntur. (T. 6.) Elaborata autem est à nobis particulatim, & in pluribus conscripta tractatibus totius Medicinae contemplatio, quibus uti quis possit ad triplicem doctrinam. Nunc verò Definitivam aggrediemur, hoc unum apponentes, quod solum Capita, & quadam veluti Conclusiones eorum, quae alibi latius sunt demonstrata, nunc à nobis dicentur.

P A R A P H R A S I S.

Ex capita priori huic Libro attribuuntur. Et in primo quidem totius Operis proœmium continetur, quo Galenus Doctrinarum ordine procedentium numerum Trinum esse ait, illasque mox enumerans, subdit: Primam esse ex notione finis, quæ per Resolutionem fit: Secundam ex Compositione eorum, quæ ex resolutione fuerunt inventa: Tertiam ex Definitionis explicatione, ejusque membrorum dissolutione; atque huic tanquam reliquis compendiosiori, & ad singulorum memoriam maximè conferenti in præsentiarum incumbere pollicetur. Pro tribus autem Doctrinis, tres Methodos intelligit, quibus tradi, addisci que solent universæ disciplinæ, quarum prima Resolutiva, græcè Analytica appellatur, atque in ea, supposita finis notione, inquiruntur simul, & declarantur ea, quæ ad finem ipsum consequendum requiruntur. Quam methodo usus est idem Galenus *lib. de Constit. Artis Medicæ*, ubi præsupposita notione finis Medicinæ, qui est Sanitas, ea deinde inquit, quæ ad Sanitatem consequendam sunt necessaria. Secunda Methodus vocatur Compositiva, græcè Synthetica, & hæc opposito procedit ordine; nam quemadmodum (inquit hoc loco Manardus) Resolvere est à Compositis ad Simplicia ire, ità Componere est à Simplicibus, retrogrado gressu, ad Composita ferri: Quam Compositivam Methodum servavit Aristoteles in tradenda Naturali Philosophia; siquidem à primis, & simplicibus Principiis ad principiata, & composita procedit, ut in suis Libris de Physico Auditui. Tertia Methodus Definitiva nuncupatur, græcè Horistica, atque hæc ex Definitionis in sua membra dissolutione, sive particularum Definitionem constituentium explicatione, divisione-

que, eousque procedit, ut tandem perveniat in totius rei propositæ cognitionem.

Cùm præterea singulas Disciplinarum Methodos, ex tribus enarratis doctrinis declarasset, subdit, Definitiva ante ipsum usos esse Herophiliorum nonnullos, idest Herophili sectatores, inter quos potissimum Heraclides Erythræus. Compositivam verò fuisse aggressos ipsos etiam Herophilios, & quosdam ex Erasistratais, atque Athenæum Attaleum, qui Princeps fuit eorum Sectæ, qui Pneumatici vocabantur, eò quòd universa pulsibus contingentia ad Spirituum plenitudinem, aut vacuitatem retulerint, quorum meminit idem Galenus *4. de differ. Pulsuum cap. 14.* Nullum autem ante ipsum, Medicinam, per Methodum Resolutivam, quæ oritur ex notione Finis, scripsisse concludit, *tex. 4.*

Jam nunc Definitiva Methodo se usurum pollicetur, ea motus ratione, quam textu 5. affert, quoniam tametsi Definitiva Methodus à Resolutiva dignitate superetur, cum ex doctrina Platonis in *Philebo*, is, qui benè scit dividere, seu resolvere, similis sit Deo, & Divisio ab aliquo Numine inventa sit: cui subscribens idem Galenus *1. de Arte Cur. ad Glauc. cap. 1.* Veteres inquit Medicos ob Methodi Divisivæ inscitiam turpiter in errores incidisse; (a) illam tamen longè admodum brevitate præcellit, atque ad singulorum memoriam, superat: siquidem Definitiva Methodus ad totius Medicinæ comprehensionem, particulariumque recordationem valde commendabilior est, & ut ipse inquit, *totius Artis capita optima Definitio* (sive Essentialis sit, sive etiam Expositi-

(a) Laudat in hoc Galenus Mnesitheum Atheniensem, atque ob id nemini peritiam secundum vocat, eod. loco.

stiva, ut vult Turisanus) in se comple-
ctitur. Hinc rectè concludit Vallesius,
Methodum Resolutivam, ad invenien-
dum, Compositivam, ad docendum, &
Definitivam, ad memorandum esse opti-
mam.

Claudit postremò Proœmium, primum-
que Caput Galenus, inquiens, fusiores
tractatus Medicinæ, atque elaboratam,
elucubratamque ejus contemplationem in
aliis suis Operibus absolvisse; hic verò so-
lùm Capita, & quasdam veluti Conclusio-
nes eorum omnium, quæ alibi latius de-
monstrata fuere, referre velle. Et hæc-
tenus de primo Capite.

CAPUT II.

Quid sit Medicina.

TEXTUS.

(T. 7.) **M**edicina est Scientia Salu-
brium, & Insalubrium,
& Neutrorum. Nihil verò differt, & si
quis loco insalubrium, ægrorum dixerit.
(T. 8.) Nomen verò scientiæ communiùs,
non autem propriè accipere oportet. (T. 9.)
Salubre autem, & Insalubre, & Neu-
trum, unumquodque tripliciter dicitur:
hoc quidem ut Corpus, hoc autem ut Cau-
sa, hoc verò ut Signum. Etenim Corpus,
quod sanitatem natura suscipere aptum est,
& Causam, quæ eamdem efficere, vel con-
servare, & Signum, quod potest indicare:
hæc omnia Salubria Græci aptum, con-
servant, & susceptible mor-
borum Corpora, & eosdem efficientes, con-
servantesque Causas, & Signa indicantia,
Insalubria vocant: Nec aliter Corpora Neu-
tra, Causas, Signave dixerunt. (T. 10.)
Et secundum quidem primam rationem, at-
que præcipuam Causarum salubrium, est
Medicina Scientia, propter eas autem, &

aliarum secundo quidem loco insalubrium,
& tertio neutrarum. Et post has eodem mo-
do Corporum primo quidem, & hic salu-
brium: secundo loco insalubrium: tertio
neutrarum. Itidem de Signis dicendum. In
actionibus autem prima quidem est Corpo-
rum cognitio, quæ habetur ex Signis, post
hæc earum, quæ in ipsis sunt, inventio Cau-
sarum.

PARAPHRASIS.

CUM in tradenda Medicina Definiti-
vam Methodum servaturum se Ga-
lenus antecedenti Capite spondisset,
nunc ut stare promissis, Medicinæ Defi-
nitionem assignans, inquit: *Medicina est
Scientia Salubrium, Insalubrium, & Neu-
trorum.* Quæ Definitio, sive ipsius Ga-
leni sit, sive potius Herophili, ut refert
idem Galenus tum libro *Introductorii cap. 6.* (a), tum libro *de Sectis cap. 1.*, tum
demum *6. de san. tuend. cap. 2.* videtur tra-
dita per Genus, & Differentiam; unde
teste eodem c. libro *introduct.* cunctis fe-
rè post Hippocratem proba visa est. Ge-
nus enim continetur in Scientia, quo-
niam per hoc convenit Medicina cum reli-
quis Scientiis, seu Disciplinis. Differen-
tia verò designatur sub verbis: *Salu-
brium, Insalubrium, & Neutrorum.* quo-
rum consideratio ad solam Medicinam
pertinet.

Verùm ex hac Definitione tres major
momenti difficultates emergunt enuclean-
dæ. Prima proponitur à Cardano lib. 1.
Medicar. Contradict. tract. 1. contrad. 4.,
nimirum ratione Galenus in hujus O-
peris titulo dixerit Medicinam,
hoc autem Capite eamdem Scientiam defi-
nierit. At ab eodem Cardano solvitur:

A 4 quia

(a) Licet hic falsò Galeno adscribatur.

quia Titulus à majori; Definitio verò à præstantiori parte desumitur: Constat autem Medicam Disciplinam secundum majorem sui partem Practicam esse; Unde motus etiam Hippocrates 1. *aphor.* 1. Artem longam illam appellavit. Secunda difficultas ab Expositoribus proponitur super hoc textu, præsertim autem à Manardo, Sclano, & Vallesio, eaque est, quòd Galenus videatur sibi ipsi contradicere: vix enim dixerat, Medicinam esse Scientiam, cum deinde statim subdat, Scientiæ nomen, non propriè, sed communiter accipere oportere. Cui difficultati (omissis aliorum responsionibus) congruenter respondet Sanctacrucius *Opusc. de Natura Medicinæ cap. 2.*, quòd Medicina non propriè Scientia dicatur, comparata Naturali Philosophiæ, cum quodammodo per experientias, & singularem observationes perficiatur, reductis universalibus Principiis ad particularia; quin universa Medicina complectitur duas partes, Theoricam scilicet, & Practicam; unde licet secundum partem theoricam verissima Scientia dici possit, secundum partem Practicam tamen puritate scientifica declinat: quam rem non propriè Scientiam Galenus, ut intelligi oportere dixit: atque hinc Aristoteles 3. *Cæli t.* 61. omnes Artes, Scientias vocat effectivas. Tertia difficultas proponitur ab Averroe 1. *et 6. collect.* cap. 1., quòd assignata Definitio minimè congruat Medicinæ, cum careat Differentia; quippe consideratio Salubrium, Insalubrium, & Neutorum ad Naturalem Philosophum, non ad Medicum pertineat. Sed eidem occurrit Sanctacrucius *opusc. cap. 3.* quòd Philosophus consideret quidem sanitatem in abstracto, Medicus verò, ut naturalem passionem Corporis humani, vel conservandam, vel restaurandam.

Post traditam Medicinæ Definitionem prosequitur Galenus propositæ Definitio-

nis membra in alias, & alias partes, divisionis ope, discindere: aitque Salubre, Insalubre, & Neutrum, quæ tres erant partes Herophileæ Definitionis, alia in membra dissecari; atque unumquodque eorum trifariam intelligi, videlicet de Corpore, de Signo, & de Causa, adeo ut in universum novem Capita resultent, Corpus nempe Salubre, Insalubre, & Neutrum: Signum Salubre, Insalubre, & Neutrum: Causa Salubris, Insalubris, & Neutra; cum hoc tamen discrimine, quòd Corpus dicatur Salubre, quia Sanitatem naturam suscipere aptum est: Salubre Signum, quòd ejusdem Sanitatis sit indicativum: Salubris demum Causa, quòd eandem efficere, vel conservare valeat: Eademque ratione Insalubritas, & Neutralitas, alio modo de Corpore, alio de Signo, & alio de Causa prædicentur: de Corpore, ut susceptivo: de Signo, ut indicante, seu indicativo: & de Causa, ut Effectiva, vel Custoditiva. Hinc, ut notat Sclanus *hoc loco*, allata divisio Salubris, Insalubris, & Neutrius, in Corpus, Signum, & Causam, est Analogi in sua significata, cum Salubre, Insalubre, & Neutrum analogicè de Corpore, Causa, & Signo prædicentur, quia non dicuntur de uno, sed ad unum, per attributionem, nempe ad Corpus, quod est principale Analogatum, cum ipsum propriè dicatur salubre; Causa verò, & Signum, salubria vocentur, quatenus Salubritatem in Corpore efficiendi, demonstrandique vim habent. (a) Verum hæc ad prædictos demandentur.

Horum autem tractandorum ordinem ita statuit: in prima quidem ratione, seu in

(a) Salubre se habet ut Bonum, quod prædicatur de omni ente ex *Arist. 5. metaph.*; & Gal. etiam salubre, insalubre, & neutrum æquivocè prædicari de his ait.

in intentione, locum primum esse Causarum, secundum Corporum, tertium Signorum; in actione verò, seu executione, primum locum esse Corporum, quæ nosci debent, deinde Signorum, quibus illa dignoscuntur, ultimum locum esse Causarum, seu Remediorum inveniendorum, quorum ope illa conservantur, vel reficiuntur; idque juxta commune effatum Philosophorum: Quod est primum in intentione, est ultimum in executione. Atque hic ordo servandus proponitur à Galeno in hoc Opere, ut superius est notatum. Quæ verò hic ab Expositoribus disceptantur de mente Galeni, quid voluerit per primam rationem, & quid per actionem, seu executionem intelligere, cum supervacanea, & inutilia penitus existimem, nihilque prorsus conferant ad rem nostram medicam, consultò prætermittimus, ne tempus inutiliter teramus in Logicis, aut Metaphysicis speculationibus, quarum nullus fructus in Medicina. Et hæc quoad Secundum Caput.

CAPUT III.

Quot modis dicatur Effectivum, Indicativum, & Susceptivum.

TEXTUS.

(T. 11.) **S**ed quoniam & Effectivum, & Indicativum, & Susceptivum, dupliciter unumquodque dicitur, hoc quidem simpliciter, hoc verò ut nunc, nosse oportet amborum esse Medicinæ Scientiam. Ipsum verò simpliciter duobus dicitur modis, & quod semper, & quod ut plurimum, de quorum utroque Medicina pertractat. (T. 12.) Neutra verò, & Causa, & Corpus, & Signum, & quod simpliciter dicitur, & quod ut nunc, tri-

pliciter unumquodque appellatur, hoc quidem, quia neutrius contrariorum est particeps, hoc verò, quia utriusque, hoc verò, quia aliquando hujus, aliquando illius. Horum autem ipsorum secundum rursus duobus dicitur modis, aut quia utrumque contrariorum ex equo participat, aut quia aliquando plus alterum. (T. 13.) Est verò & in tota Definitione, si verba animadvertimus, ambiguitas quædam, quam & ipsam dissolvere oportet. Cum enim dicitur Medicinam esse Scientiam & Salubrium, & Insalubrium, & Neutrum, significatur, & quod omnium particularium, & quod quorundam, & quod qualium. Sed omnium quidem indefinitum quoddam est, atque impossibile, quorundam diminutum, atque artificia carens: Qualium verò artificiosum pariter, atque sufficiens ad omnia Artis particularia, quod etiam dicimus in Medicinæ definitione comprehendendi. (T. 14.) Primum igitur de Corporibus dicere aggrediemur, qualianam sint, & Salubria, & Insalubria, & Neutra: post hæc de Signis, & Causis differemus.

PARAPHRASIS.

Præfens Caput quatuor in Textus ab Expositoribus dividitur, quoniam in eo quatuor edocet Galenus: Primum, quod effectivum, indicativum, & susceptivum; hoc est, Causa Salubris, Insalubris, & Neutra: Signum Salubre, Insalubre, & Neutrum: Corpus Salubre, Insalubre, & Neutrum, aut sunt Simpliciter talia, aut talia ut Nunc, & sub utraque differentia à Medicina considerari debent, quæ ut sanitatem custodire, & Morbum, quoad possibile est, abigere melius possit, omnem Corporis constitutionem, & absolutam, & secundum quid pervestigare debet; ipsumque sive Corpus, sive Signum, si-

ve Causa, quibus Salubritas, Insalubritas, aut Neutralitas competit, dupliciter quoque, alia divisione, intelligi possit. Vel enim semper est tale, hoc est simpliciter Salubre, Insalubre, & Neutrum; vel ut plurimum. De quibus Differentiis inferius agemus.

Quid autem significet particula *Simpliciter*, & *ut Nunc*, dubitari hoc loco solet. Et quidem Aristoteles 1. *Elenchor. cap. 4.* & 2. *Topicor. in fine*, simpliciter inquit illud intelligi, quod absolute, & sine ulla additione, vel conditione, tale est: quemadmodum de Cygno absolute dicimus, quod sit simpliciter albus; de Æthiope verò, solum secundum dentes. Unde Simpliciter salubre erit, quod sine adjectione tale est; & salubre ut Nunc, sive secundum quid, illud ex eodem Aristotele dicetur, quod tale est cum adjectione, seu determinatione. At verò juxta doctrinam Galeni tum *cap. sequenti*, tum 1. *de Temperam. cap. 6.* ex animadversione Sclani, 1. *Artis Medicæ comm. 11.*, Simpliciter dicitur, quod absolute, & à Natura salubre est; ut Nunc verò, vel secundum quid, quod propter adscititias causas salubre sit. Vel melius dicas coherentem eidem Galeno, quod Simpliciter salubre sit, quod nedum absolute, & à Natura est, verum etiam quod comprehendit actum, & aptitudinem ad sanitatem: actum quidem, seu perfectam sanitatem; aptitudinem verò non solum ad salubriter operandum, sed etiam ad persistendum, ac perseverandum in sanitate, ob naturale robur, quod à radice Nativitatis nactum est, resistendi scilicet Causis ægrotare facientibus. Salubre verò ut Nunc, seu secundum quid, licet actu sanum sit, quia tamen ejus sanitas non est absolute perfecta, neque cum robore à radice Nativitatis; adeoque non habet efficacem vim resistendi Causis insalubribus, propterea non habet aptitu-

dinem ad persistendum in sanitate, sed ab illis facile superatum infirmatur.

Docet insuper Galenus, *Simpliciter* dici pariter duobus modis: *Semper* scilicet, & *ut Multum*, seu *ut Plurimum*, quæ in græco Codice notantur per *Ἀπαντῆς*, & *ὅτι τὸ πολὺ*: (a) Et quamvis ferè communiter explicent *Diapantos* per *Semper* tale, quod toto Vitæ tempore, & *Epitopoly* per *Multum*, quod majori ex parte ejusdem Vitæ tale perseveret; Forolivienſis tamen, Argenterius, Sclanus, & Sanctorius rationabilius contendunt, per *Diapantos*, & *Epitopoly*, nil aliud intellexisse Galenum, nisi gradus quosdam perfectionis, aut imperfectionis, in eadem ratione Salubris, Insalubris, & Neutrius simpliciter; itaut *Diapantos* non *semper*, sed *omninò*, ac prorsus tale, in quacumque temporis differentia, significet; *Epitopoly* verò, non *multum*, sed *magna ex parte*, seu ferè tale sonet; Unde Corpus simpliciter salubre *Diapantos* erit optimè temperatum, optimèque constructum; *Epitopoly* verò salubre, quod ab optima tum temperie, tum structura parùm recedit; quamobrem illud fortiter resistet Causis ægrotare facientibus; hoc verò non tam fortiter. Moventur hi Authores ex eo potissimum, quia differentiarum divisivarum non destruunt rationem generis, sed eandem retinent, ac perficiunt; atqui *Diapantos*, & *Epitopoly* sunt differentiarum Salubris, Insalubris, & Neutrius simpliciter; igitur retinere debent, & non destruere naturam ipsius; sed Salubre, Insalubre, & Neutrum simpliciter illud est, quod absolute, & seclusa omni temporis determinatione tale est; ergo differentiarum illius, nempe *Diapantos*, & *Epitopoly*, non

(a) *Diapantos*, *Epitopoly*.

non possunt tempus determinare, vel ut semper, vel ut multum.

Afferit secundo Galenus differentias Neutrius Corporis, Causæ, & Signi, aitque Neutra tum Simpliciter, tum ut Nunc, tripliciter dici posse. Primo ut Neutrum sit, quod Neutrius contrariorum est particeps, sive per negationem utriusque extremi. Secundo quod utraque extrema participet, sive per participationem utriusque extremi. Tertiò, quod aliquando est particeps unius, aliquando alterius.

Amplius subdividit Neutrum, quod particeps est utriusque extremi, in alterum, quod ex æquo extrema participat, & alterum, quod aliquando plus unius, quam alterius extremorum.

Sed hic grave litigium exoritur inter Aristotelicos, & Galenicos. Illi enim cum Aristotele omninò negant Corpora Neutra. Isti contrà cum Galeno firmiter affirmant. Nos utrosque conciliantes dicimus, Aristotelem considerasse Sanitatem in abstracto, quatenus forma putatur distincta à Corpore, atque adeò indivisibilis non suscipiens magis, & minus, & ut mera æqualitas est, referens contradictionem cum ægritudine, tanquam inæquali. Galenus verò consideravit Sanitatem in concreto, sive in individuis, illamque non punctualem, & insectilem, sed latitudinis capacem, adeoque magis, & minus susceptivam. Cumque non omnia individua saluberrima sint, aut insaluberrima, sed in medio latitudinis Sanitatis versentur; idcirco Neutra illa appellavit, qualia præsertim esse dixit Corpora imbecillia, convalescentia, senilia, atque ad ægritudinem contrahendam proclivia, ut docet libro ad Thrasybulum cap. 4. & 5. de san. tuend. cap. 3. Sed de hac re fusiùs infra.

Hinc non temerè quis putet, inutilem

omninò futuram ejusmodi Neutrorum considerationem; nam cum ex alibi dicendis, Medicina tota ferè quanta est, correctiva sit, nec eodem modo Corpora tractari debeant, propterea oportebit exactè perpendere dispositiones, constitutionesque Corporum corrigendorum, & sive recessus sensibiles sint, sive insensibiles, à salubritate; & ubi conservatio, aut præservatio, ubi verò curatio exercenda sit; sicut pariter in quibus detrahere, reficere, aut adjicere oporteat.

Solvit tertiò Galenus ambiguitatem quandam, quæ in assignata definitione occurrere poterat: Num scilicet Medicina, quæ dicitur Scientia salubrium, insalubrium, & neutrorum, intelligenda sit omnium salubrium, aliquorum, an qualium: aitque non esse Scientiam omnium particularium salubrium, cum hæc sit indefinita, & indeterminata, adeoque impossibile sit posse singula percurri: neque esse Scientiam aliquorum, aliter esset diminuta, & inartificiosa, cum Scientia de omnibus in universali agere debeat: Erit igitur Scientia qualium. At quid per qualia ipse intelligat, multi multa commentantur, ut legere est apud Argenterium, & Sanctorium. Verum omissis aliorum responsionibus, duæ videntur probabiliores. Prima est Turisani in Commentario hujus loci, asserentis Galenum per qualia intelligere universalalia, cum Scientia sit universalium; quocirca idem Galenus subdit, Scientiam qualium esse artificiosam simul, & sufficientem ad omnia Artis particularia, sub ea tamen ratione, quæ talia sunt. Altera est Sanctorii, qui inhærens doctrinæ Aristotelis 5. metaph. cap. 14. de Quali, putat qualia à Galeno intelligi differentias omnium Prædicamentorum, cum nullum detur Prædicamentum, quod non sit particeps Salubris, Insa-

Infalubris, & Neutrius status: Modò Differentia ab Aristotele, & Porphyrio definitur id, quod prædicatur in Quale quid.

Quartò demum eum ordinem Galenus inquit se servaturum, ut de Corporibus primùm, deinde de Signis, & ultimo loco de Causis edisserendum sit: quod in posterum exactissimè præstabit.

CAPUT IV.

De Corpore Salubri.

TEXTUS.

(T. 15.) **S**alubre Simpliciter Corpus est, quod ab ipso Naturæ ortu bonam habet temperaturam in Simplicibus, & primis particulis, atque in his, quæ ex illis componuntur, Instrumentis, est commensuratum. Salubre verò Nunc est Corpus, quod in præsentī est sanum: est verò & hoc, eo tempore, quo sanum existit, bonam habens temperaturam, & commensurationem, non tamen optimam, at sibi propriam. Ipsius verò Salubris simpliciter corporis tale quidem est semper id, quod est optima temperie præditum, ac maximè est commensuratum: ut multum autem, quod à constitutione optima non valde admodum deficit.

PARAPHRASIS.

Asignatis Corporum differentiis, incipit nunc Galenus de Corpore Salubri, ejusque differentiis pertractare: cùmque superiùs illud diviserit in Salubre Simpliciter, ut Nunc, ut Semper, sive omninò, & ut Multum, sive magna ex parte, singulorum proptereà Naturam in hoc Capite declarat.

Primùm inquit, Corpus Simpliciter

Salubre illud esse, quod ab ipso Naturæ ortu, seu ab ipsis generationis principiis bonam habet temperaturam in Simplicibus, & primis particulis, atque in his, quæ ex illis componuntur, Instrumentis, seu partibus organicis, est commensuratum. Et quidem ut Sanitas sit optima, & Corpus Simpliciter Salubre dicatur, debet à naturali, insitoque principio tale esse, quod potentia, & aptitudine valeat sanas, & salutares operationes exercere, ad differentiam ejus Salubritatis, quæ adventitia, & acquisitiva vitalis observatur in Corpore Salubri, ut Nunc. Hanc autem optimam, insitamque Sanitatem in duobus consistere ait, nempe in bona temperatura Simplicium, primarumque Corporis partium, & in commensuratione, compositione, seu structura Instrumentorum, sive partium organicarum, quæ ex eisdem similaribus particulis componuntur: qua in re contradicit Aristoteli, qui 5. *Physicorum* tex. 17. Sanitatem in sola quatuor qualitatum symmetria reponere videtur. Ostendit autem Galenus tum 1. de *San. tuenda* cap. 5., tum lib. de *optima Corporis constitutione*, hanc solam temperaturam ad Sanitatem constituendam non sufficere, quia Corpus potest esse benè temperatum, & tamen ægrotare ob vitium formationis, aut in magnitudine, aut in numero, aut in situ partium, & similibus. Sed nec revera Aristoteles putavit Sanitatem solummodò consistere in temperatione primarum qualitatum; quandoquidem in *Problemat.* ut etiam adnotat hoc loco Sanctorius, meminit alterius conditionis requisitæ ad Sanitatem, nempe structuræ, atque ibidem memorat ægritudines partium organicarum: quod confirmat pariter ejus Commentator Averroes 5. *Physicor.* tex. 57. & 5. *Metaph.* t. 10.

At hic dubitare contingit, cur Galenus

nus omiserit tertiam conditionem alibi à seipso memoratam perfectæ Sanitatis, nempe Continuitatem; cum Corpus, ut sanum sit, non solum benè temperatum, meliusque constructum esse oporteat, sed etiam optimè in suis partibus unitum, continuatumque: de qua continuitate ne quidem verbum hic facit Galenus; unde videtur in docendo diminutus. Verùm huic difficultati plenè satisfaciunt Turisanus, & Manardus; siquidem Corpus ab ortu Naturæ benè temperatum, benèque constructum, necessariò erit quoque exactè unitum; nam impossibile est infantes oriri cum unitate partium soluta, sine aliqua intemperie, aut mala compositione.

Dubitari ulteriùs potest, num Galenus ad perfectam Sanitatem, & ad Corpus simpliciter Salubre requirat Temperiem, quam juxta illius hypothesen nuncupant in Scholis Ponderalem: an verò solum Justitialem. At unicuique vestrum perspectum esse puto, Justitialem solum ab eo exigì, cum Ponderalem Temperiem Galenus non agnoverit; inquit enim 1. de San. tuenda cap. 5. in fine: *Qui Ponderalem Temperiem admittunt, disputant de re vel nunquam planè visa in Animalis Corpore, aut si aliquando visa est, ne minimum quidem tempus durante.* Itaque juxta mentem illius Justitalis intelligenda est, cujus tantum naturaliter similes partes capaces sunt, utpotè quæ illarum exigentiæ maximè conformatur.

Quoniam verò hoc loco Galenus Sanitatis, ejusque conditionum, & præsertim Temperiei, meminit; solent, arrepta hinc occasione, Interpretes latissimè de his agere. At cum unusquisque Vestrum, ex nostris Thesisibus, ut reor, hæc optimè calleat, solum generaliora quædam hic ex illis memoria repetam, in cognitionem Temperierum, quantum scilicet ad eorum, quæ inferius dictu-

ri sumus, intelligentiam satis esse poterit.

Primarum Particularum Similarium inter sese ritè, rectèque contextarum, pro suis quibusque operationibus obeundis, debitam, convenientemque constitutionem, primariam Salubritatis, & congruæ Temperaturæ basim esse, perque eas irriguo Sanguinis, aliorumque liquorum Corporis accessu, quo particulæ ipsæ primæ turgeant, vigorentur, & nutriantur, perfectam Sanitatem constitui, alibi à Nobis dictum est. Qua enim ratione primæ illa stamina, & rudimenta partium Corporis, in ovariiis foeminarum præjecta sunt, & masculeo deinde semine foecundata, fermentationi, & motui subjiciuntur, mox etiam circumfluente Sanguine vigorantur, & adolefcunt; ita planè Temperies in Animalibus, eorumque Salubritas emergit, firma nimirum, ac valida, vel contra debilis, & lubrica, pro varietate prædictarum conditionum, ad earundem particularum constitutionem concurrentium: Uade ex complexu, & combinatione illarum bona, vel mala, validiori, aut languidiori, Corpora exurgunt benè, vel malè complexa, temperata, & constructa, fortia, & robusta, vel contra languida, & debilia: calida, vel frigida, laxa, & mollia, seu humida, stricta, fixa, ac dura, seu sicca dicta. Hæc autem omnia varia esse possunt, ac multiplicia, pro vario statu Corporum generationem ipsam promoventium, & nedum secundum totum, sed etiam secundum partes principaliora viscera potissimum componentes, quo nimirum tempore ova in foeminis progignuntur, perficiuntur, & maturescunt, aut cum à semine masculeo foecundantur, atque in motum fermentativum, pro vita, & operationibus vitalibus disponuntur. Sic non rarò accidit, à Parentibus cætero-

qui

qui in habitu validissimis, filios gigni debiles, molles, & valetudinarios; quia nimirum, quo tempore stamina illa prima, & rudimenta Corporis prædisponuntur, languorem, laxitatem, ac ineptitudinem aliquam ex parte alterutrius generantis, forte fortuna implicari, & committeri contingit: ita quoque Parentum infectiones, & hæreditariorum morborum lumen in filios transfundi experimur.

Sed & in idipsum valde conferre solet sanguinis pro nutritione foetus in Utero, in partes ejusdem affluentis, bona, vel mala dispositio, qua deinceps etiam vigere magis, vel ex adverso labefieri illas toto tempore gestationis evenit; unde compertum utero gerentes, prava victus ratione usas, plerumque filios progignere imbecilles, & facile lapsuros in ægrotudines, licet hi in meliorem statum non raro reducantur à lactis conditione meliori, salubriorique, ut propterea adscititiam saltem salubritatem deinceps nanciscantur, facta nimirum in primæva illa partium habitudine non levi exinde emendatione, correctioneque. Atque hinc, insitam, innatam, ac primævam illam partium constitutionem, irriguo, ac influente sanguine fotam, Temperaturam, à primo Naturæ ortu habitam appellabimus; ab adscititiis, & adventitiis Causis, alimentis scilicet, potibus, aeris incolatu, exercitiis, cæterisque similibus inductam, nuncupabimus Adventitiam, & per ætatum mutationes acquisitam: & quidem calidam, vel frigidam, humidam, aut siccam pro Sanguinis habitudine varia, & in suis partibus vivifica, & auctifica, magis, minusve præpollente: quam si fortem, ac robustam, debilem, & languidam, laxam, & mollem, firmam, labilem, aut aliter nuncupare quis velit, per nos licebit. Salubritates autem, aut Insalubritates exinde provenientes, Modos appella-

bimus, quibus scilicet quo pacto partes Corporis, totumque Corpus ipsum, se habeant, & num benè, vel malè, in suis operationibus se gerant, & sive in uno, sive in alio genere deficient, ut in ægrotudinibus evenit, de Oeconomia Corporis, ejusque Statu, Naturali, aut Morbofo, judicium faciemus. Quare Sanitas dicitur Modus Corporis benè se habentis in prædicta partium Constitutione; Morbus verò ex adverso, Modus ejusdem malè se habentis in eadem, sive secundum unam, sive secundum plures prædictarum conditionum: quia Bonum ex integra causa, Malum ex singulis defectibus. Hac profectò ratione ambages illas, & Scholasticorum tricas in exponendis Temperierum Naturis facili negotio evitamus, quippe qui ex qualitatibus elementaribus dictis, quas vocant primas, inter se invicem commistis, illas eruere adnituntur; proindeque innumerabilibus difficultatibus circumventi, easdem implicant potius, quàm explicent.

Neque verò hinc quis Nostemeritatis insimulet, quòd Veterum dogmatum doctrinam deferentes, novam, in temperamenti enucleandis, rationem prosequi, atque in medium proferre ausi simus, cum cæteroqui supremos reconditæ Philosophiæ apices illi fuerint affecuti, & quidquid boni in naturalibus disciplinis apud nos pervestigatum exstat, ab Antiquis sit derivatum. Nam in rerum naturalium pervestigatione, quò tempora à primæva Mundi ætate magis recesserunt, eò quoque pervetustiora, ac proinde sapientiora, dicenda sunt, veluti novis, novisque continenter inventis locupletata, cum longiori, diuturniorique variorum experimentorum auxilio: eò quòd semper, semperque Veterum excogitatis alia, & alia innumerabilia experimenta, improbo labore, assiduoque studio, in cunctis disciplinis elaborata, atque elu-

cubrata, Rationi magis conformia, & in Veri cognitionem deducenda, succedentibus ætatibus, à Recentioribus adjecta sint.

Sed liceat hinc transcribere, quæ jamdudum in Prælectione habita Anno 1694., cum in publico Archigymnasii Neapolitani Agone, de probandis, stabiliendisque Medicæ facultatis Professoribus, à Regiis Senatoribus, ac studiorum Moderatoribus confuleretur, ut eisdem ad Recentiorum inventa, & excogitata, grato supercilio suscipienda, persuaderem, in medium post alia protuli: Isti quippè (nempè Recentiores) aiebam, Medicinam non contraxerunt, sed amplificaverunt, non deturparunt, sed illustraverunt: Et si ceteræ Facultates omnes non exiguum incrementum nostra ætate à Recentioribus susceperunt, cur est, quòd Medicam Facultatem ejuscemodi beneficio defraudari patiamur? Sic Pictura, & Sculptura quantum profecerint nostris temporibus, & à Recentioribus sint expolitæ, nemo est, qui nesciat. Optica, Dioptrica, & Catoptrica in conficiendis, & poliendis conspiciis, mirum quantum excreverint; unde factum, ut remotissima quæque, & inconspicua, vicinissima, & magnæ molis videantur, aliaque innumera in speculis planè admirabilia. Architectura Nova Militaris longè admodum antecellit Antiquam, ut propterea munimenta Recentiorum præstantiora sint munimentis Veterum. Geometria beneficio Analyseos, seu Algebrae, quam vocant Speciosam, ea invenit, quæ impossibilia Veteribus credebantur. Astronomia penitus innovata est; nam orbes Planetarum, qui solidi à Veteribus ponebantur, à Recentioribus fluidi observati sunt. Venus, & Mercurius, qui circa Tellurem volitari credebantur, nunc observantur circa Solem revolvi, easdemque phasès pati, quas Luna, ut proinde falcati, dimidiati, & gibbosi subindè com-

pareant. Ante Solis faciem Maculae detectæ sunt Veteribus ignotæ, quæ spatio quatuordecim dierum totum discum solarem percurrunt: Mars, qui Concentricus putabatur, adeò à nobis quandoque recedit, ut serè invisibilis evadat. Ita quoque Satellites Jovis, & Comites Saturni, qui nulli erant apud Antiquos, jam nunc beneficio Telescopii à Recentioribus sunt detecti. Sed de Geographia quid dicam? in ea Novus Orbis detectus est: Zona Torrida, quæ inhabitabilis putabatur, jam habitabilis inventa est: Antipodes, qui imaginarii dicebantur, nunc revera sunt: & alia sexcenta. Sed neque solum in cæteris disciplinis Novitates admirandæ inventæ sunt, sed in ipsamet facultate Medica, præsertim ex structura Humani Corporis, in quo nuper detecta est Sanguinis circulatio Veteribus Medicis ignota: inventa sunt Vasa lactea, & lymphica, Glandulae lombares, intestinales, subcutaneæ, usus Felle, & Cystis felleæ, Ovaria in Uteris Feminarum, textura varia Pulmonum, Renum, Cerebri, Testium, & alia plurima, quæ longum satis foret hic singulatim enarrare. Unde Thomas Bartholinus insignis nostri temporis Anatomicus, postquam ter Anatomem suam reformasset, coactus fuit nunc postremò illam penitus renovare. Idipsum etiam factum, non sine summo humanorum Corporum beneficio, in usu Medicamentorum, quæ undequaque perfectiora, quantoperè Medicinam illustraverint, non est quod multis suadeam. Quàm minus sanè temporis, & laboris impendisset Galenus, si scivisset ex Vino Spiritum elicere: Agnovit ille quidem latere in Vino substantiam quandam tenuem, volatilem, & spiritalem, sed illam extrahere nescivit: cum tamen nostra ætate non solum à Pharmacopæis, verum etiam à Femellis quibuscumque, nedum ex Vino, sed à cæteris quibuslibet liquoribus, immò etiam ex rebus durissimis, extrahantur spiritus,

tingituræ, olea, & similia. Quamobrem jure optimo dixit Seneca Epist. 64. Multum egerunt, qui ante nos fuerunt, sed non peregerunt. Et scitè admodum Lactantius lib. 2. divin. instit. cap. 7. sua tempora cum vetustioribus comparans, scriptum reliquit: Nec quia nos illi, (id est Veteres) temporibus antecesserunt, sapientia prævalent, quæ si omnibus æqualiter datur, occupari ab antecedentibus non potest. Quare cum sapere, id est veritatem querere, omnibus sit innatum, sapientiam sibi adimunt, qui sine ullo judicio inventa majorum probant, & ab aliis, secundum morem, ducuntur. Sed hoc eos fallit, quod Majorum nomine posito, non putant fieri posse, ut aut ipsi plus sapiant, quia minores vocantur, aut illi desipuerint, quia Majores nominantur. Facit in hoc idem, quod Martialis cecinit lib. 5. suorum Epigrammatum, epigr. 10. ad Regulum, de Poesi veterum suæ tempestatì comparata.

Esse quid hoc dicam, vivis quod fama negatur?

Et sua quod rarus tempora lector amat?

Hi sunt invidiæ nimirum, Regule, mores,

Praferat Antiquos semper ut illa novis.

Sic veterem ingrati Pompeji querimus umbram,

Et laudant Catuli Julia templa Senes.

Ennius est lectus, salvo tibi, Roma, Marone,

Et sua riserunt secula Mæoniden.

Rara coronato plausere theatra Menandro,

Norat Nasonem sola Corinna suum.

Vos tamen, ò nostri non festinate libelli.

Si post fata venit gloria, non propero.

Libet etiam hinc referre, quod idem Martialis in Vacerram quendam, qui

Martialem in numero laudatorum Poetarum ponere recusabat, quia mortuus non esset, argutè scripsit:

*Miraris Veteres, Vacerra, solos,
Nec laudas, nisi mortuos Poetas.
Ignoscas, petimus, Vacerra; tanti
Non est, ut placeam tibi, perire.*

lib. 8. epigr. 69.

Et multò antea Horatius, de poesi sui temporis cum poesi Antiquorum collata, scripsit, Epist. 1. lib. 2.

*Si quia Græcorum sunt Antiquissima
quæque*

Scripta, vel optima, Romani pensantur eadem

Scriptores trutina, non est quod multa loquamur;

Nil intra est Oleam, nil extr aest in Nuce duri.

Venimus ad summum fortune: pingimus, atque

Psallimus, & luctamur Achivis doctius unctis.

Si meliora dies, ut vina, poemata reddit,

Scire velim, pretium chartis quotus arroget annus.

Scriptor, abhinc annos centum qui decedit, inter

Perfectos, veteresque referri debet? an inter

Viles, atque novos? excludat jurgia finis.

Est vetus, atque probus, centum qui perficit annos.

Quid? qui deperiit minor uno mense, vel anno,

Inter quos referendus erit? veteresne poetas?

An quos & præsens, & postera respuet ætas?

Iste quidem veteres inter ponetur honestè,

Qui vel mense brevi, vel toto est junior anno.

Utor

Utor permissio; caudeque pilos ut e-
quine

Paulatim vello, & demo unum,
demo etiam unum;

Dum cadat elusus ratione ruentis a-
cervi,

Qui redit ad fastos, & virtutem e-
stimat annis:

Miraturque nihil, nisi quod Libiti-
na sacravit.

Convenit & his Plinius junior, epist.
21., lib.6. ubi: *Sum ex iis, inquit, qui
mirer Antiquos, non tamen, ut quidam,
temporum nostrorum ingenia despicio: ne-
que enim quasi lassæ, & effæta Natura
est, ut nihil jam laudabile pariat.*

Quare sapienter apud Græcos in pro-
verbium ductum est: *Secundæ cogitatio-
nes primis sunt Sapientiores.* Veruntamen
nil proinde fit, ut Veteribus, vel mini-
mum, hac in re derogemus. Hi namque
divinum hoc Medicinæ opus, veluti ma-
gnum Deitatis simulacrum, præjectis pri-
mum fundamentis, ad æthera postmo-
dum evexere. Recentiores verò multige-
na armillarum, gemmarum, & torquium
varietate, mirificè subinde exornarunt,
ut propterea utrisque simul ingens laus
tribuenda sit, quoniam unam, eandem-
que Medicinam illustrare, & plurimum
locupletare conati sunt, Chymix scili-
cet, & Anatomies beneficio. Non est i-
gitur ut in Recentiores tam dirè Nostra-
tes invehantur.

Esto autem hæc ita se habere opine-
mur, quia tamen ex sanguine, aut vi-
gente, aut deficiente, promotò, vel
præpeditò, in suo motu, fermentativo,
vel locali, calor, aut frigus in Anima-
libus exoritur; ut in posterum in verbis
Galenì, pro expositione Temperierum,
confusionem evitemus, retinebimus in-
veteratum, & jam pridem receptum in
Scholis loquendi usum, de calido, frigi-
do, humido, vel sicco Corporis, & Par-

Tom. V.

tium temperamento, dummodo illud e-
mergere intelligamus ex varia sanguinis
irrigantis, & circumfluentis conditione,
tam secundum partem illius vivificam,
quàm per auctificam, vitam, & nutri-
tationem in Corpore promoventis, de
quibus alibi dictum. Quamobrem adno-
tare hìc operæ pretium existimavi, me in
his dumtaxat Authoris mentem fideliter
exponere voluisse, & ubi melius visum
fuerit, in saniores sensum revocare, li-
cèt in plerisque aliis modò à propria,
modò ab illius sententia, declinaverim.

Quoniam verò indicia Simplicium
Temperierum inferius ex Galeno erimus
relaturi, hìc breviter etiam animadver-
tendum putavimus, nullibi ipsum sim-
plices Temperies rebus assignasse, sed
perpetuò compositas. Voluisse autem hoc
loco Simplicium Temperierum notitiam
præmittere, ut ex istarum cognitione fa-
ciliùs Tyrones in Compositarum agnitio-
nem deducerentur, combinatis simul dua-
rum qualitatum inter se invicem com-
mistarum indiciis; cum cæteroqui im-
possibile videatur, unam tantummodò
simplicem qualitatem in compositis Cor-
poribus exuperantem invenire, non sta-
tim alia simul in consortium contracta.

Sed & neque Temperamenta Corpo-
rum, ex prævio solùm qualitatum, vi-
cissim refractarum, complexu, aut com-
mitione, re ipsa exoriri putavit, sed il-
la ab humoribus in sanguine prædomi-
nantibus deduxit; unde Cholericæ, San-
guineæ, Phlegmaticæ, & Melancholicæ
sæpissimè nominat. Quin & nos alibi,
deductis undequaque argumentis ex sa-
niori philosophia, ejuscemodi combina-
tiones refutavimus, quæ nunc referre
supersedeo, ne sermo hic in longius,
quàm par sit, protrahatur. Sat solùm
erit memorare, cuncta, quæ ad tempe-
ramenta ex combinationibus primarum,
ut vocant, qualitatum, referuntur, à

B

va-

varia sanguinis, & partium Corporis conditione, atque textura, constitutionem, ac habitudinem variam, pro ipsarum operationibus, efficiente, facillimè deduci posse; & quidem calidum, vel frigidum, humidum, aut siccum temperamentum, prout Sanguis, vel magis, vel minus vividus, floridusque erit, atque ex diversa partium solidarum constitutione, ac textura, benè, vel malè repurgatus, itemque à suis impuritatibus, fortasse ex cibo contractis, secretus: Quamobrem calor, frigus, siccitas, humiditas; vel potius magis, minusve calidum, magis, minusve humidum Corpus, in suis partibus exurget. Hæc enim veluti effectus sunt nostris sensibus manifestiores, per quos corporum habitudines, & constitutiones facilius innotescunt: quin & à Sanguine ipso vegeto, suaque parte vivida, floridaque prapollente, cunctasque partes corporis convenienter irrigante, vivificanteque, calidum illud appellamus; ab eodem verò minus vivido, & à parte sui glutinosa aliquantulum refracto, nominamus frigidum, seu minus calidum: Sic quoque humidus, ac mollius, siccus, ac durus, à sero ejusdem exuperante, vel deficiente, aut etiam consipato. Atqui ista omnia progressu etiam ætatum variari contingit, vel sponte Naturæ, ab ipso sanguinis circulantis dispendio, vel à fermentis viscerum attenuatis, aut infectis; ut pariter ex incolatu vario, diversoque alimentorum, & potuum usu, exercitiis, aliisque similibus, in ipso vitæ decursu permutantur; ut patet.

Sed & aliud quid insuper præadvertendum hoc loco superest, quòd qui me ad hæc scribenda impulerunt, se præsertim exoptare sunt professi, ut locutione Medicis magis familiari, in hisce Expositionibus uterer, nulla tam exacta purarum dictionum ratione habita, satisque

esse, si quæ adhibentur docendi formulæ, apud Commentatores Galeni, Avicennæ, aliorumque, reperirentur; propterea, ut illis satisfacerem, qui rem hanc ornatiùs, quàm deceat tractari nolunt, ceu torrentis impetu, me quoque rapi, permittere sum coactus.

Sed revertamur unde digressi sumus. Quandoquidem Galenus superiùs in *textu* 15. dixerat, Salubre Simpliciter Corpus esse illud, quod ab ipso Naturæ ortu bonam habet temperaturam in Simplicibus, & primis particulis, atque in Instrumentariis est benè commensuratum, difficultas non levis exinde oritur, num revera Corpus Simpliciter Salubre ab ipso Naturæ ortu tale esse debeat. Et dubitandi occasionem præbuere nonnulli, non levibus argumentis permoti. Inquiunt enim, ad constituendum Corpus Simpliciter Salubre sufficit bona temperies partium similarium, & melior organicarum structura, si hæc ab ipso naturæ ortu fuerint, si progressu temporis acquirantur. Insuper potest Corpus ex generatione non sanum simpliciter, mutatione temporis, & ætatis evadere simpliciter sanum, potissimum si congrua utatur victus ratione, ad meliorem, & salubriorem statum seipsum reducens, quemadmodum pluribus etiam insinuat Galenus 3. l. *hujus Operis*. Denique Corpus non optimè sanum leviter si ægrotaverit, potest curationis ope, non solum sanari, sed etiam ad optimam sanitatem reduci, quæ sanitas non erit à primo naturæ ortu, cum inducatur in tempore; igitur Galeni assertio non erit universaliter vera.

Verum his non obstantibus, dicendum, Salubre simpliciter ab ipso naturæ ortu tale esse debere, quia id non denotat solum circumstantiam temporis, sed potius modum inhærendi in subjecto, hoc est firmam inhæSIONem, perfectamque Sanitatis habitudinem: siquidem Sa-
lu-

lubre simpliciter, ut superius notavimus, & ostendit latè hoc loco præ cæteris Foroliviensis *quæst.* 6. debet habere sanitatem fixam, stabilem, & exquisitè perfectam, quæ nimirum vim habeat plurimum resistendi causis ægrotare facientibus, imò persistendi in salubritate, optimarum operationum radice: Cùmque hæc optima Corporis constitutio opus Naturæ sit, non Artis, propterea Galenus illam expressurus dixit, ab ipso ortu, sive ex generatione esse.

Hinc modò facile fit satis objectionibus mox propositis. Et quidem primò impossibile videtur, quòd Corpus benè temperatum, optimèque constructum, à nativitate tale non sit, cùm salubritas ista perfectissimum inhærendi modum in subiecto dicat, qui neutiquam ab Arte, sed omninò à Natura proficisci potest, præsertim quia Ars refarcit, non efficit, aut producit sanitatem; quare jure optimo Corpus absolutè, seu simpliciter Salubre, ex generatione, sive à Naturæ ortu esse dicitur. Quod prætereà subditur, Corpus Simpliciter non sanum mutatione ætatis, & adhibitis convenientibus remediis, absolutè sanum fieri, falsum omninò est; quoniam nunquam poterit introduci in eo Sanitas cum habituali aptitudine ad persistendum in sanitate, & ad fortiter resistendum causis ægrotare facientibus; unde si fortasse in meliorem, salubrioremque statum reducat, acquireret solummodò sanitatem actualem, & meliorem respectivè, non absolutè: id quod docet *sequenti lib.* 3. Galenus, & Nos suo etiam loco probabimus: Postremò Sanitas, quæ curationis ope restituitur, dicitur refarcita, non ingenita; siquidem Sanitatis absolutæ productio, non Artis, sed Naturæ opus est. Concedimus tamen usu medicamentorum Corpora quandoque in ægritudinem lapsa, postquam convalescerint, meliorem statum acquirere,

nunquam verò absolutè salubrem, sed solum respectivè salubriorem ad tempus progressum, vel ad præcedentem ætatem: quin morbi ex conformatione, malaque structura orti, vel nihilum, vel leviter adhuc post longum tempus, & per ætatum mutationem tolluntur, ut patet in iis, qui malam pectoris, aurium, aut oculorum conformationem à nativitate contraxerunt.

Docet secundò in hoc Capite Galenus, Corpus Salubre ut Nunc, esse illud, quod in præsentī sanum est, atque per id temporis, quo sanum existit, bonam habet temperaturam, & commensurationem, non tamen optimam, at sibi propriam. Quibus verbis ostendit, duas in universum conditiones requiri ad Salubre Corpus, ut Nunc: primam quidem, ut in præsentī sanum sit, sive quòd habeat solum actum, seu Sanitatem, non tamen perfectam, hæc est cum aptitudine ad persistendum in illa, & cum resistentia ad causas ægrotare facientes; alteram verò, quòd prædicta Sanitas, licet optima non sit, est tamen propria, seu accommodata tali individuo. Hinc experimur plerisque, etiam à nativitate, laudandam constitutionem, lubricamque sanitatem sortitos, cum ea tamen citrà ægritudinem, toto vitæ tempore, perseverare; servata scilicet exacta in sex rebus non naturalibus ratione: cujus Constitutionis fatetur Galenus seipsum fuisse *quinto de san. tuena. cap. 1.*

Tertiò, quoniam Salubre simpliciter diviserat in *Ἀγπαντία*, sive, omninò, & *ὑποπολύ*, sive magna ex parte, idcirco considerans Salubre *Diapantos*, illud esse inquit, quod omninò, seu exquisitè tale est, quodque optima temperiæ est prædictum, optimèque commensuratum. Salubre verò *Epitopoly*, quod à constitutione optima non admodum recedit, deficit tamen aliquantulum ab ea. Unde

patet, etiam ex Galeni mente, Salubre *Diapantos*, & Salubre *Epitopoly* differre perfectione, & majori, vel minori vi, inresistendo causis ægrotare facientibus; non verò tempore; ut superius dictum.

C A P. V.

De Corpore Insalubri.

T E X T U S.

(T.16.) **I**nsalubre verò *Simpliciter* est Corpus, quod ab ipso ortu Naturæ, vel in consimilibus partibus malam habet temperaturam, vel in instrumentariis incommensurationem, vel utrumque vitium. Insalubre verò Nunc est Corpus, quod eo tempore, quo tale dicitur, ægrotat; neque obscurum est, quòd & hoc ipsum eo, quo dicitur tempore ægrotans, vel in consimilibus malam habet temperaturam, vel in instrumentariis incommensurationem, vel utrumque. Est verò & semper Insalubre, quod ex ipso Naturæ ortu, vel pessimam habet temperaturam in simplicibus, & primis particulis omnibus, vel aliquibus, vel his, quæ obtinent principatum, vel in instrumentariis incommensuratissimum existit. Similiter autem inois, vel omnibus, vel in aliquibus, vel illis, quæ obtinent principatum. Ut multum verò Insalubre est Corpus, quod ab hujus quidem vitio recedit, nondum tamen mediocritatem attingit.

P A R A P H R A S I S.

Explicata Natura Salubris Corporis cum suis differentiis, progreditur Galenus ad expositionem Corporis Insalubris, & illud quidem Insalubre *Simpliciter* esse inquit, quod ab ipso Naturæ

ortu, vel in Similaribus partibus malam habet temperaturam, vel in organicis malam commensurationem, seu structuram; vel etiam utrumque vitium patitur: ubi tria specialius notanda occurrunt.

Primum, quemadmodum in definienda Natura Corporis Salubris *Simpliciter* dictum fuit, illud ab ortu Naturæ tale esse debere; ita quoque Insalubre *Simpliciter* ab ortu Naturæ insalubritatem contrahere oportere, cum oppositorum eadem sit ratio.

Secundum, quòd Insalubre *Simpliciter*, ut tale sit, necesse non est, ut utrumque vitium, nimirum malam temperiem in similaribus partibus, malamque structuram in organicis unà simul patiatur, sed satis est, si alterutrum horum subeat: in quo differt Natura Salubris Corporis ab Insalubri: Salubre enim convenit cum recto, & bono, ex Aristotele 5. *metaph. tex. 10.* Bonum autem, & rectum ex integra causa est, Malum verò ex singulis defectibus; ita pariter Salubre tum bonam temperiem in Similaribus, tum optimam commensurationem in Organicis partibus exquirat, cum ex aggregato ambarum exoritur; at Insalubre congruens cum malo, ad singulos harum conditionum defectus emergit: cujus rei non ignarus Galenus, usus est particula disjunctiva, vel, ut patet ex textu.

Tertium, quòd licet Insalubre *Simpliciter* Corpus utrumque dictarum conditionum vitium referre possit, & quòd sit intemperatum, sitque etiam incommensuratum; hoc tamen si daretur, esset omnium Insalubrium pessimum. At verò sicut Salubre *Simpliciter*, & omninò, vix mente concipi potest, ita Insalubre *Simpliciter*, & omninò, inter viventia erit irreperibile. Atqui hoc Insalubre Corpus utrumque vitium involvens à Sanctorio

Insalubre *Simpliciter Diapantos* dicitur; Insalubre verò, vel in similaribus solum, vel in organicis partibus deficiens, appellatur Insalubre *Multum*, sive *Epitopoly*.

Animadversione autem dignum est, quòd sicuti Salubre Corpus *Simpliciter* illud dicitur, quod firmam, stabilemque Sanitatem possidet, cum aptitudine resistendi causis ægrotare facientibus; ita è converso, Insalubre *Simpliciter* Corpus intelligetur illud, quod à nativitate per exiguam, vel nullam habet potentiam resistendi causis prædictis, ita ut ex quacumque, etiam levissima causa, in ægritudinem incidat; fiatque Insalubre *Nunc*, seu actu ægotans.

Exempla vitiorum, quæ hoc loco memorantur in contemperatione partium Similariarum, notissima sunt: si nimirum plus justo incallescant, tepeant, algeant, obrigescant, mollescant, obducentur, laxentur, contrahantur: quamvis vix fieri possit, ut ipsæ solum afficiantur, & ledantur, illæsis, & non affectis unà simul Organicis, quæ ex illis componuntur; nec à calore, aut frigore, aliave Simplicis intemperie offendi possint; sine vitio alicujus causæ materialis, undè Intemperies illa proveniat, ut speculanti patebit. Vitiorum verò ex mala conformatione Organicarum ab eodem Galeno recensentur: si quis cum magno capite oriatur; si porus felleus non ad jejunum intestinum, sed ad ventriculum pertingat; si ventriculus rotundus sit, septi transversum motum impediens, & respirationem interturbans, atque alia hujus generis.

Transit ulterius Galenus ad explicandum Corpus Insalubre *ut Nunc*, illudque esse inquit, quod eo tempore, quo tale dicitur, ægotat; idest, vel malam subit in similaribus partibus contemperationem, vel malam structuram in organicis, vel utrumque; ut propterea, quod

est Insalubre *Simpliciter*, hoc est habet ineptitudinem ad diutius resistendum causis ægrotare facientibus, si præter ejusmodi ineptitudinem, actualem ægritudinem incurrat, fiat Insalubre *ut Nunc*: ægrotare autem dicitur, vel quia in similaribus particulis sensibilem intemperiem patitur; vel quia in organicis incommensuratum, seu malè constructum evadit, puta in quantitate, numero, situ, figura; vel etiam quia utrumque vitium subit, juxta ea, quæ nuper dicta sunt.

Insalubre præterea *Diapantos*, sive *semper*, & *omniò* est, quod ex ipso Naturæ ortu, vel pessimam habet temperaturam in simplicibus, & primis particulis, aut omnibus, aut aliquibus, & præsertim principalibus dictis: vel in organicis est pari ratione incommensuratum, pessimèque constructum. *Ut multum* verò, seu *magna ex parte*, *Epitopoly* Insalubre est, quod ab hujus quidem vitio recedit, sive non adeò vitiosum est, ut *Insalubre Diapantos*, mediocritatem tamen nondum attingit, idest non pervenit ad statum *Neutrius simpliciter*, quod est Medium inter Salubre *Simpliciter*, & *Simpliciter* Insalubre.

CAPUT VI.

De Corpore Neutro.

T E X T U S.

(T.17.) **Q**uoniam verò & Neutrum Corpus tripliciter dicebatur, unum quidem, quod neutrius erat extreme dispositionis particeps, aliud autem, quoniam utriusque, aliud, quoniam aliquando hujus, aliquando verò illius, Juxta primum significatum, Neutrum erit Corpus, quod exquisitè medium est & Sa-

luberrimi, & Insaluberrimi Corporis, & hujus hoc quidem Simpliciter tale, quod ab ipso ortu Naturæ ita est constitutum: hoc verò ut Nunc, quod in præsentì tempore medium exquisitè existit Saluberrimi, atque insaluberrimi Corporis. Ipsius autem Simpliciter, Semper quidem tale est id, quod in omnibus ætatibus tale perdurat, ut Multum autem, quod nonnullas recipit mutationes. (T. 18.) Juxta verò secundum significatum Neutrum erit Corpus, quod ab ipso ortu Naturæ contrariarum simul est particeps dispositionum, aut scilicet in una parte, aut in duabus differentiibus. In una quidem, si secundum alteram oppositionem effectivarum qualitatum bonam habuerit temperaturam, vel etiam secundum utramque, sed in formatione, vel magnitudine, vel numero partium, vel situ delinquat: aut contra in his quidem rectè se habeat, vel omnibus, vel quibusdam, peccet autem in temperatura. In differentiibus verò partibus, & juxta omnes oppositiones potest quicquam simul particeps esse contrariorum. Et Semper quidem tale, quod per omnes ætates in eodem perseverat; ut Multum verò, quod aliqua ex parte evariet; ita verò & Nunc Neutrum erit Corpus, juxta secundum significatum, quia vel in parte una hæc quidem sibi Salubria existunt, illa verò Insalubria, vel in differentibus ita afficitur partibus. (T. 19.) Juxta verò tertium significatum Neutrum erit Corpus, quod aliquando quidem Salubre, aliquando verò Insalubre per vices existit, ut nonnullis accidit, qui in pueritia Salubritate corporis vigent, cum verò ad juventutem pervenerint, Insalubres evadunt, aut contra. In uno autem tempore, quod ita est Neutrum exquisitè consistere nequit: latius verò si accipiatur, contingit. Novimus autem, quod Nunc dupliciter dicitur. (T. 20.) Salubre igitur, & Insalubre, & Neutrum Corpus quot modis dicatur, & quale unumquod-

que sit, sufficienter explicavimus. De Signis verò deinceps dicendum.

PARAPHRASIS:

Post definitiones Corporum Salubrium; & Insalubrium, cum adjunctis differentiis, naturas Corporum Neutrorum tandem assignat, atque cohærenter divisioni superius allatæ, inquit primò, Neutrum Corpus Primi Significati, idest per negationem utriusque extremi, esse illud, quod exquisitè Medium est, & Saluberrimi, & Insaluberrimi Corporis, nempe ejus, quod in latitudine sanitatis perfectissimum est, & ejus, quod è converso omnium est imperfectissimum. Secundò hujus significati Neutrum Simpliciter tale inquit esse, quod ab ipso ortu Naturæ ita est constitutum, ut scilicet ejusmodi neutralitatem in medio positam exactè possideat, habeatque aptitudinem ad persistendum in eadem. Ut Nunc verò Neutrum subdit esse, quod in præsentì tempore medium exquisitè existit Saluberrimi, & Insaluberrimi Corporis; at facile ab hoc medio declinare potest. Tertiò, Neutrum Simpliciter, semper, seu omnino, dicitur illud, quod in omnibus ætatibus tale perdurat, propter aptitudinem in eadem Neutralitate perdurandi, licet aliquando ob aliquam externam causam ab hac neutralitate declinare possit, & in ægritudinem incidere. Ut multum denique, seu magna ex parte Neutrum Corpus dicitur, quod nonnullas alternè recipit mutationes, non valde tamen remotas à prædicta Neutralitate, eò quod ad eam facile redeat. Atque hæc sunt Neutra propriissimè sumpta.

Neutrum verò Secundi Significati, seu quod particeps est utriusque extremi, Simpliciter tale quidem est, quod ab ortu Naturæ contrariarum simul est particeps dispositionum, aut scilicet in una par-

parte, aut in duabus differentibus; in una quidem, si particulæ primæ temperaturam Corporis constituentes, non inter se mutuò congruant, nec se vicissim coadjuvent pro bona Corporis constitutione, seu temperatura; vel si per qualitates temperiem illam constituentes non se mutuò contemperent, aut in operationibus conformentur; vel si bonam habuerit temperiem, malè tamen Corporis totius constitutio constructa sit; vel è contra in differentibus partibus, si una nimirum sit disposita ad unam habitudinem, altera ad alteram, & oppositam. Neutrum *semper* secundi significati est, quod per omnes ætates in eodem statu perseverat. Neutrum *ut multum*, quod aliqua ex parte variat, hoc est, quod magna ex parte est tale, Neutram scilicet dispositionem participans, sed magis inclinantem ad alterum extremorum. Neutrum denique *Nunc* juxta Secundum significatum, esse dicitur, quod vel in una parte, vel in pluribus partibus varias participat dispositiones. At clariùs Neutrum *ut Nunc* dicitur, quod in præsentì tempore habet dispositiones insalubres in una parte, ex mala primarum particularum combinatione, in aliis salubres; vel etiam in una parte adest Salubritas, in alia verò Insalubritas; vel denique una pars sana est, alia morbosa, vel quod ad temperiem, vel quod ad organorum compositionem. Et quidem hoc Neutrum *ut Nunc* frequentius esse solet Medium inter Sanitatem, & Morbum.

Postremò Neutrum Tertiì Significati, quod scilicet aliquando unius, & aliquando alterius extremi particeps sit, definitur illud, quod aliquando Salubre, quandoque verò Insalubre est. Dat exemplum Galenus eorum, qui in Pueritia Salubritate fruuntur, ad Juventutem verò pervenientes Insalubres evadunt, aut contrà. Debet autem ejusmodi Insalubri-

tas, ut scitè advertit hoc loco Sanctorius, non ab externis causis provenire, sed ex mala dispositione naturali, puta ob morbos hæreditarios; quia, ut supra notatum est, Corpora prædicta considerantur secundum habitudinem, & potentiam ab ortu Naturæ contractam. Sic namque observamus pleròque ad virilitatem usque sanissimos vivere, post hanc ætatem obnoxios fieri Podagræ, Nephritidi, Tussi, & similibus, adhuc ob contractam consimilis luis hereditatem ab affectis Parentibus. Præterea, si æquè per vitæ cursum mutationes istas Corpus subeat, aut si plus Salubritatis, quàm Insalubritatis participet, vel viceversa, aliarum differentiarum Neutrum fiet; sicut pariter, si vicissim modò salubritatem, modò insalubritatem per ætatum mutationem nanciscatur, de quibus non est ut fusiùs agamus, cùm facillimè ex dictis pateant.

Ex hæcenus dictis de Neutrorum Corporum differentiis, unica gravior difficultas solvenda remanet, atque illa est, ad quamnam differentiam referenda sint Neutra Convalescentiæ, & Decidentię. Quoniam enim exempla Neutrorum frequentiora apud Medicos sunt illorum Corporum, quæ mox sunt in Morbum lapsura, aut nuper à Morbo evasere, quæ revera neque egra, neque sana dici merentur; propterea dubitatur apud Expositores, cujus generis illa sint, & ad quam classem revocari debeant. Turisanus inherens Avicennæ 2. *prim. doct. 1. cap. 2.* arbitratur Corpora Convalescentia, & Decidentia referenda esse ad Neutra *primi significati*, idest per exclusionem utriusque extremi; quia, inquit, ejusmodi Corpora mediam formam habent inter eas, quæ Sanis, & Ægrotis conveniunt; atqui hæc videtur competere Neutris *primi significati*. Sed revera omnia Neutra tum *Primi*, tum *Secun-*

di, & Tertii significati, mediam quandam formam habent, ob id enim Neutra vocantur, quia Media sunt inter extrema. Rectius ideirco dicendum, pertinere illa ad Neutra *secundi significati*, quia praedicta Corpora Convalescentia, & Decidentia participant de utroque extremo, autoritate Galeni *lib. de constitut. Art. cap. 19. & 20.* ubi Corpora Decidentia, & Convalescentia aliquid causae morbificae participare ait; quod latius ostendit hoc eodem *lib. Artis Medicæ cap. 82. & 5. de sanit. tuend. cap. 4.*; quibus in locis, etiam Senes ad Neutra *secundi significati* revocat, tanquam aliquid participantes de Sanitate, & de Mor-

bo; nam Convalescentiam, & Senectutem vocat ipse Morbos quosdam, vel Sanitates quasdam lubricas: Et Hippocrates *de Convalescentibus*, 2. *aphor. text. 12.* dixit: *Quae relinquuntur ex morbis post judicationem, recidivas facere consueverunt.* Ex neutris autem *secundi significati*, videntur eadem reducenda potius ad Neutra *Nunc*, quam ad alia, ut praeteris inculcat Sanctorius *hoc loco*.

Peroratione tandem concludit Galenus Sextum Caput, & Ultimum Primi Libri, inquiens, se sufficienter explicasse Salubre, Insalubre, & Neutrum Corpus, & quale unumquodque sit. Deinceps verò de Signis dicendum. Et haecenus de Primo Libro.




LIBER SECUNDUS.

CAPUT I.

Quod est VII. in Galeno.

De Signis Salubribus.

TEXTUS.

(T.1.)  Unt autem & ex his Salubria quidem, quæcumque præsentem indicant sanitatem, & futuram prænunciant, & præteritam memoriæ subjiciunt. Insalubria verò, quæ & præsentem indicant ægritudinem, & futuram prænunciant, atque præteritam memoriæ subjiciunt. Eadem ratione Neutra dicuntur, quæ neutram dispositionem ostendunt, prænunciant, & memoriæ subjiciunt, & quæ nihil omnino de dispositionibus indicant, vel nibilo magis Salubrem, quàm Insalubrem dispositionem ostendunt, & quæ partim quidem Salubrem, partim verò Insalubrem indicant dispositionem; & quæ aliquando quidem Salubrem, aliquando verò Insalubrem, & hæc quoque secundum tria tempora veluti Salubria, & Insalubria appellantur. Vocantur autem nonnunquam à Vetustioribus Medicis hæc omnia, Signa Prænunciativa, quamvis præsentium, ac præteritorum sint indicativa: usus verò non parvus ex Prænunciativis, atque Indicativis, minor autem ex his, quæ memoriæ subjiciunt.

(T.2.) Cùm verò sint Salubria Corpora, hæc quidem Simpliciter, hæc verò ut Nunc, quæ & benè valentia dicuntur, Salubrium Simpliciter Corporum duplicem diximus esse differentiam: quoniam nonnulla quidem Semper, nonnulla verò ut Multum essent talia. Et Semper quidem, quæ optimam

constitutionem sortita sunt: Ut Multum verò, quæ non magnopere ab illa recedunt.

PARAPHRASIS.

A Corporibus ad Signa transit, atque illa, non secus ac Corpora, dividit in Salubria, Insalubria, ac Neutra. Ex Salubribus autem alia præsentem indicant Sanitatem, & dicuntur Diagnostica; alia futuram prænunciant, & vocantur Prognostica; & alia demum præteritam in memoriam revocant, atque Anamnestica nominantur. Insalubria pariter vel præsentem indicant ægritudinem, vel futuram prænunciant, vel præteritam memoriæ subjiciunt. Quòd si simul Signa indicent præsentia, prænuncient futura, & ad memoriam revocent præterita, Tritemporea appellantur; quia simul tria Tempora demonstrant. Non dissimili ratione, Neutra subdit dici, quæ Neutram dispositionem ostendunt, prænunciant, aut in memoriam reducant. Cùmque Neutra Signa per ordinem ad Neutra Corpora sint directæ, adeoque Primi, Secundi, & Tertii significati, propterea Neutra Signa juxta Primum significatum esse docet, quæ nihil omnino de dispositionibus extremis indicant, cùm Neutrum Primi significati sit per negationem utriusque extremi; vel etiam esse illa, quæ non magis Salubrem, quàm Insalubrem Constitutionem ostendunt. Neutra verò Signa juxta Secundum significatum inquit esse, quæ partim Salubrem, partim etiam Insalubrem dispositionem significant. Demum Signa Neutra juxta Tertium significatum esse, quæ aliquando Salubrem, aliquando Insalubrem

brem demonstrant dispositionem. Horum signorum exempla ex inferius dicendis patebunt.

Præterea edocet Galenus, quod antedicta Signa tam Prognostica, quam Diagnostica, & Anamnestica, indiscriminatum à Vetustioribus Medicis Prænunciativa fuerint appellata, quamvis non omnia futurorum, sed præsentium, & præteritorum sint indicativa: quod etiam confirmat *lib. 1. de præfagitione ex pulsibus initio*, ubi inquit: *Non esse futurorum tantum Præscientiam, sed præsentium etiam, & præteritorum, satis id olim demonstravit Hippocrates; quemadmodum colligi posse videtur ex primo prognosticorum 2. ubi Medicus præsentiens, & prædicens coram ægro præsentia, præterita, & futura, quæque Infirmi omittunt, enarrans, creditur agnoscere magis ægri conditionem; Hinc audent homines magis se concredere Medico. Hæc Hippocrates. Et quidem præterita, vel præsentia, antequam ab Infirmo referantur, si à Medico prænotentur, certè præsciri sana ratione dici possunt, quoniam prædicuntur, antequam ab aliis memorentur.*

Amplius utilitatem horum Signorum Galenus insinuat, atque ex iis majorem à Prænunciativis, & Indicativis, minorem verò à Rememorativis futuram ait; quoniam illa futurum eventum vel salutarem, vel lethalem prædemonstrant; unde non parum gloriæ inde Medicis accedit, eaque præsentem quoque ægritudinem notam faciunt, qua fortasse ignorata, curatio nullâ institui posset. Rememorativa verò conferunt solùm ad confirmanda ea, quæ per signa Diagnostica cognita sunt; quin aliquando solùm Causas procatarcticas, seu Occasiones, unde quis ægrotare cœperit, patefaciunt.

Denique juxta superius traditas Corporum, & præcipuè Salubrium, differentias, Signa relaturus, repetit, Corpora alia

esse Salubria *Simpliciter*, alia *ut Nunc*, alia *ut Semper*, seu *Omninò*, alia *ut Multum*, seu *Magna ex parte*. Et *Semper* quidem, quæ optimam constitutionem sortita sunt, *ut Multum* verò, quæ non magnopere ab illa recedunt; atque de horum Signis deinceps latissimè agit; & primò de Signis optimæ constitutionis.

CAPUT II.

VIII. in Galenò.

De Signis optimæ Constitutionis.

T E X T U S.

Horum autem dignotiones sumendæ sunt ab iis, quæ secundum essentia rationem ipsis insunt, & ab iis, quæ ex necessitate consequuntur, operationibus, symptomatibusque, idest casibus, qui propriè accidentia vocantur. (T.3.) Ab essentia quidem ipsa, eorum, quæ optimam habent constitutionem: commensuratione Consimilium quidem, in caliditate, frigiditate, humiditate, & siccitate: Instrumentalium verò, in quantitate, ac numero eorum, ex quibus componuntur, ac præterea formatione, situ partium singularum, ac totius instrumenti. Ex his verò, quæ ex necessitate consequuntur Consimilia, quantum quidem attinet ad tactum, à mediocritate, quæ in mollitie, ac duritie consistit: quantum verò ad aspectum, à colore optimo, & levitatis, atque hispiditatis mediocritate. In Operationibus, à perfectione, quam & ipsarum virtutem appellamus. Ab his verò, quæ Instrumentarias partes consequuntur, à commensuratione, & pulchritudine omnium totius Corporis instrumentorum, ac præterea ab earum, quæ ipsis insunt, virtute operationum. Optimæ igitur constitutionis Corporum Signa indicativa

tiva sunt hæc. (T.4.) Eorum autem, quæ ab ipsa deficiunt, & adhuc tamen Salubria existunt, nonnulla quidem in Consimilium temperatura vitium aliquod parvum habent; nonnulla verò in Instrumentariorum commensuratione, & hoc quoque perexiguum. Accidit autem hoc vel in omnibus, vel in aliquibus, aut in utrisque. Vitiorum verò genera eadem sunt cum his, quæ virtutem perficiunt, temperatura quidem in Consimilibus, numerus autem, & formatio, & magnitudo, & situs in Instrumentariis, utrisque verò communis Unitas; quam & ipsorum Continuitatem appellamus. (T. 5.) In his autem ipsis generibus sunt Corporum Insalubrium vitia secundum utrumque Insalubritatis significatum. Terminus autem, qui utrumque distinguit, est operationum læsio sensibilis. (T.6.) Quæ verò ab optima Corporum constitutione breve aliquid deficiunt, revera quidem & ipsa in aliquo sunt offensa, non tamen id sensu comprehenditur. Distinguuntur verò ex eo, quod magis, minusve in operationibus existit, & quia Causis, quæ ægritudinem pariunt, non æquè resistunt. Quæ autem simpliciter Insalubria sunt Corpora, distinguuntur ob id, quod facile à causis Insalubribus superantur; & quoniam in vigore operationum plurimum deficiunt. In medio autem amborum collocantur Neutra, tum quæ exquisitè appellantur, tum quæ cum latitudine quadam. (T.7.) Quo fit, ut tota Sanitatis latitudo in tres partes, quarum singulæ latitudinem habent non parvam, dividatur. Erit autem prima quidem Salubrium Corporum, secunda Neutrorum, tertia Insalubrium. Post quæ deinceps sequuntur, quæ jam agrotant Corpora, quæ sensibilibus operationum læsionibus distinguuntur. (T.8.) Quæ igitur dolore infestantur, & quorum motus sunt depravati, aut omnino interierunt, manifestas habent determinationes. Quæ verò imbecilles edunt

operationes, in magnis quidem distantis, facile discernuntur, in parvis verò ambigua sunt; atque idcirco in eo genere noxæ collocatur dispositio, quæ Neutrius contrariorum est particeps, quam & ipsam Neutram diximus appellari: Ita tamen ut horum omnium sensus sit Iudex, non ipsa Natura rerum inspiciatur, ne periculum sit in dogma perpetuæ passibilitatis incidere. (T.9.) Et quidem Signa Sanorum Corporum, sed quæ aut Insalubria, aut Salubria, aut Neutra existunt, quantitate distantie differunt, duobus invicem contrariis terminis à nobis statutis, optima videlicet constitutione corporis, & nuper facta egritudine, ac deinceps considerantibus, utri eorum viciniore sint ea, quæ ad examen Corpora veniunt: quæ enim proximiora sunt optime constitutioni, Salubria: quæ verò ab hac longius distant, atque ad ea, quæ jam egrotant, magis accedunt, Insalubria: quæ autem intermedia, atque equaliter ab utrisque distare videntur, Neutra erunt. (T.10.) Optime igitur Constitutionis Corporis indicia explicavimus. Eorum verò, quæ ab ipsa deficiant, totidem sunt numero genera, quæ in magis, & minus secari possunt. (T.11.) Cum autem in tres latitudines divisa sint, Corporis Insalubris simpliciter indicia trademus: ex his enim & reliquæ duæ latitudines innotescunt. Generaliter igitur prius à nobis in eo, quæ de optima constitutione sermonem habuimus, dictum est. Specialiter autem nunc dicitur, si prius partes dividerimus.

P A R A P H R A S I S.

PLura docet in hoc Capite Galenus; & primò, postquam Salubrium Corporum differentias retulit, ut fortasse ostenderet, ab illorum, utpotè perfectissimorum, diagnosi se incepturum, mox subdit: horum, idest Salubrium Corporum, dignotiones in universum ex tribus fon-

fontibus sumendas esse; videlicet ab his, quæ secundum essentiæ rationem ipsis insunt, sive à substantialiter inhærentibus: ab his, quæ ex necessitate consequuntur, operationibus, sive ex necessariorum consequentibus, actionibus, & effectibus: & demum à Casibus, qui propriè Accidentia dicuntur. Substantialiter inhærentia appellantur ab eodem, Temperamentum partium similarium, & organicarum Structura, seu Compositio. Et quidem Temperamentum dicitur apta dispositio necessaria ad esse, & conservari mixtorum; quin ab eodem Galeno *1. de usu partium cap. 9.*, *1. method. cap. 6.*, & alibi, dicitur Natura, seu Proprietas in quarto modo dicendi per se mixtorum. Compositio pariter, seu Structura partium organicarum, constitutionem ipsarum, & essentiam constituit; neque enim per aliud pars organica, seu dissimilans talis est, quàm per Compositionem. Quæ ex necessitate consequuntur operationes, ita intimam partium Naturam comitantur, ut ab earundem partium sive Simplicium, sive Compositarum constitutione inseparabiles sint; unde Signa desumpta ab operationibus longè fideliora cæteris esse solent. Hinc fallitur Turisanus existimans operationes separari posse à Sano, vel ægro Corpore, puta dormire, concoquere, nutriri, &c.: nam sumpsit operationes in actu secundo, seu in exercitio, non autem in habitudine, ac in subiecto; quemadmodum, licet Risus, seu affectus ridendi sit separabilis ab Homine, non tamen ab illo sejungi potest Risus, ut est habitudo ridendi, tanquam proprietas essentialis illius; quamobrem Galenus *1. de differ. morb. cap. 1.*, considerans, quòd dum quis dormit, licet nulla ipsius pars moveatur, aut operetur, sanus tamen est: quoniam scilicet non ab exercitio operationum, sed ab habitudine, seu potentia ad operandum, bo-

nas, vel malas Corporis affectiones deducere oportet; proinde inquit: *Quoniam & dormientes, aut alioquin in tenebris, & otio degentes, aut sæpè discumbentes, neque ulla Corporis parte movemur, neque alicujus rei extrinsecæ sensum habemus, nihilominus sani sumus: Hinc perspicuum est, quòd Sanitas non operatione, sed potentia potius est diffinienda.* Hæc ille.

At quid pro Casibus, propriè Accidentibus dictis, ipse intellexerit, gravior est hujus loci difficultas. Omissis autem aliorum expositionibus, rectius dicendum cum Sclano *lib. 12. Art. med. comment. 2.* in græco Codice Symptomata, pro Casibus legi, quæ tamen non propriè sumenda pro iis, quæ sequuntur morbum, ut umbra Corpus, sicuti habet idem Galenus *lib. de different. Syptomat. cap. 2.*; neque communiter accipienda, prout omne id significant, quod præternaturam est, quemadmodum accipi posse docetur ab eodem Galeno *eod. lib. cap. 1.*: hoc enim pacto Symptomata non possent esse unum ex tribus principalibus Signis, quæ optimam Salubrium Corporum constitutionem attestantur: sed communissimè sunt intelligenda, prout non solum significant, quæ præter naturam sunt, verum etiam quæ sanis accidunt, sicuti usurpantur à Galeno *1. methodi cap. 8. & 9.*, ubi quæ sanis sunt Accidentia, ægrotis dicuntur Symptomata; quin ex Græco Codice in hoc textu legitur: *quæ propriè in Sanis συμπεβηκότα*, id est Accidentia dicuntur.

Secundò, ab his tribus fontibus particularia Signa deducit, & explanat, proindeque ait, Salubre Corpus dignosci ex optima temperie, seu contemperatione primarum qualitatum in partibus similariibus, & ex bona structura, seu conformatione, consistente in debita Magnitudine, determinato Numero, convenienti Situ, naturali Figura, & Ductibus expeditis par-

partium, organicarū: quæ sunt conditiones eorū, quæ dicuntur essentialiter inhærentia.

Dignosci insuper subdit ex necessariò consequentibus; tum partium similarium bonam temperiem, tum partium organicarum meliorem structuram; nempe, ut interpretatur Sclanus *hoc loco*, ex robore, & excellentia virtutum in suis operationibus, videlicet si benè ratiocinetur, ac imaginetur, si acutè videat, & audiat, si perfectè concoquat, & appetat, &c.

Præterea, per ea, quæ sensibus subjiciuntur, præsertim Tactui, & Visui, illa colligit. Et quidem Tactum in Corpore Salubri percipere mediocritatem in molitie, ac duritie; Visum verò observare colorem optimum, atque moderantiam lenitatis, hispiditatis in pilis, & in partibus Organicis rectam commensurationem, ac pulchritudinem omnium totius Corporis Instrumentorum.

Verūm, non hinc quis existimet ab his solū Signis optimam salubris Corporis constitutionem esse deducendam; sed à pluribus aliis, de quibus fusè agitur ab eodem Galeno *in libris de Temperamentis, de Naturalibus Facultatibus*, & alibi: Meminit autem hinc duntaxat præcipuorum, quoniam Methodus Definitiva expostulat brevitatē, qua summa rerum Capita tanguntur, & memorantur.

Tertiò, à modico recessu ab his enarratis Signis Corporis perfectè Salubris, recolligit Signa Corporis Salubris, *ut Multum*, atque inquit, illud parum deficere à præcedenti, adeoque leve aliquod vitium habere, vel in temperie partium similarium, vel in commensuratione organicarum, & vel in omnibus, vel in aliquibus, vel in utrisque. Hinc vel partes Similares parum intemperatæ erunt, vel Organicæ aliquod vitium patientur, aut in magnitudine, aut in numero, aut in situ &c., vel Unitas utrisque communis leviter soluta observabitur. Distingui-

tur itaque Corpus Salubre *ut Multum* à Salubri *ut Semper*, per aliquod parvum, ac perexiguum vitium in temperatura, aut in compositione; Unde fit, ut quemadmodum Saluberrimum Corpus *Semper*, seu *omniò*, omni vitio carens, vix in Natura reperibile sit; ita è converso, omnia ferè Corpora, quæ Salubria judicantur, ad Salubria *ut Multum* reducenda sint.

Quartò, quoniam Salubria *ut Multum* aliquod exiguum vitium admittunt, ut illa distinguat Galenus à corporibus Insalubribus, docet terminum, qui utraque distinguit, esse sensibilem operationum læsionem. Hinc Insalubrium Corporum vitia in universum, vel in Temperie, vel in Compositione, vel in Unitate consistere, adeoque Signa illorum ab his pariter derivare. Oportet autem, ut Corpus Insalubre *actu* ægrotet, sensibile vitium pati, quod nonnisi à sensibili operationum læsione dignoscetur. Cæterum si Operationes læderentur insensibiliter, Insalubre *Nunc*, seu *actu* morbosum Corpus non constituerent, cum sanitas latitudinem habeat, & tunc dicitur extra limites naturales divagari, cum operationes sensibilibus sunt læsæ. Atque hinc Galenus i. *de diebus decretoriis*, initium ægritudinis stabilivit faciendum esse à sensibili operationum læsione: & Avicenna, postquam febrem definivit per calorem adauctum, subdit, non à qualicumque calore, qualis est ebriorum, & irascentium, febrem constitui, sed illum debere esse excedentem, & extra limites naturalitatis adauctum.

Quintò declarat Galenus, quibus Signis distingui debeat Corpus Salubre *ut Multum* à Corpore Salubri *ut Semper*, atque ait, Corpus Salubre *ut Semper* à Salubri *ut Multum* adeò parum differre, ut eorum differentia sensu minimè percipi queat; etenim salubre *ut Multum*, eodem modo tactu apparere temperatum

inquit, ac Salubre *ut Semper*, & visu æquè coloratum, obesum, aut gracile, sicut illud; solum verò differentia aliqua sumi poterit à perfectione operationum; nam perfectiores erunt in Salubri *ut Semper*, quàm sint in Salubri *ut Multum*; quin efficacior erit potentia resistendi causis ægrotare facientibus in illo, quàm in isto. *Simpliciter* verò *Insalubria* Corpora internoscuntur ex eo, quòd facile à causis, quæ morbos inferre valent, superantur, & à perfectione operationum plurimum deficiunt. Inter hæc denique collocabuntur, quæ Neutra exquisitè, seu *Simpliciter* appellantur, tanquam media Salubrium, & Insalubrium Corporum.

Sextò, ex his omnibus deducit totam Sanitatis latitudinem tres in partes dividi: Primam esse Salubrium: Secundam Neutrorum: Tertiam Insalubrium Corporum. Post hæc deinceps sequi subdit Corpora, quæ jam ægrotant, sensibilibus operationum læsionibus à superioribus distincta, & in latitudine Morborum posita.

Septimò, ut commodiùs distingui possent Corpora Insalubria, & Ægra, à Salubribus, & Sanis, in latitudine Sanitatis positis, necnon Salubria inter sese; dat Signa desumpta à triplici genere operationum læsarum. Hæc namque lædi possunt *abolitè*, *depravatè*, & *diminutè*, ex doctrina ejusdem lib. de differ. Sympt.: modò Sana, & Salubria Corpora distinguuntur ab Ægris, & Insalubribus per actiones abolitas, & depravatas, quæ inveniuntur quidem in Ægris, minimè verò in Sanis. Ubi per actiones abolitas non solum simpliciter extinctæ intelligendæ sunt, sed quæ ad sensum abolitæ, & extinctæ videntur, sive in genere operationum Animalium, sive in genere operationum Vitalium, & Naturalium. In Sanis autem, & Salubribus Corporibus inveniri possunt actiones diminutæ, dum-

modò non multum à mediocritatè recesserint, nam aliàs sensibilem læsionem paterentur. Itaque (ut optimè exponit Turisanus) intentio Galeni in hoc textu est declarare, quænam sint sensibiles operationum læsiones, quibus Ægra à Sanis, & Sana inter se invicem internoscantur: nam Sana ab Ægris per actiones abolitas, vel depravatas; Sana verò inter sese per actiones diminutas, sed absque multo recessu à mediocritate, & intra Sanitatis limites. Hinc qui de Visus acutie E.g. aliquantulum hebetata conqueritur, Sanus dicitur, licèt diminutam actionem patiat, quia scilicet diminuta hæc actio videndi non tanta est, ut extra limites Sanitatis extendatur. In his autem distinguendis, ait Galenus, sensum judicem esse debere, non verò ipsam rerum Naturam, quia si natura judex statueretur, incideremus in Dogma *ἀνταρθεῖας*, seu perpetuæ passibilitatis: idest oporteret asserere, Corpora perpetuò ægrotare, neque posse in Natura inveniri Corpus propriè sanum, quod est maximum inconveniens. (a) Unde dicebat idem Galenus 3. libro hujus operis, text. 31. *Nisi operationis læsio sensibilis sanitatem ab ægritudine separet, sed qualitatem tantummodò dispositionis introspeciamus, perpetuæ passibilitatis dogma necessario recipiemus, cum nullus sit, qui omnes operationes optimas habeat.* Hæc ibi.

Octavò docet, quòd Signa dicantur Salubria, Insalubria, & Neutra ex eo, quia magis, vel minus accedunt ad optimam constitutionem, vel ad oppositam, nempe ægritudinem; ut propterea, quæ viciniora sunt saluberrimæ constitutioni, dicantur Salubria; quæ verò ad ægritudi-

(a) Et quidem Corpus Adæ à Deo constructum oportuit esse *Simpliciter Salubre*: Itemque Corpus Christi Domini.

dinem magis accedunt, Insalubria: quæ demum in medio posita, non minus ad hanc, quam ad illam inclinant, Neutra vocantur: & prout operationes perfectiores, vel imperfectiores fuerint, statum vel Salubrem, vel Insalubrem, vel Neutrum demonstrabunt.

Tandem concludit hoc Caput Galenus inquiens, in posterum se traditurum Signa Insalubris Corporis; nam Cognitis Signis Salubrium mox memoratis, nec non Signis Insalubrium Corporum infra referendis, facile quoque internoscentur Signa Neutorum, quæ media sunt inter Salubria, & Insalubria. Verum antequam Signa Insalubrium Corporum proponat, de generali partium Corporis divisione verba facit, de qua sequenti Capite.

CAPUT III.

IX. In Galeno.

Quot sint Differentiæ partium.

T E X T U S.

(T. 12.) **S**unt verò earum quatuor universæ differentiæ, quoniam nonnullæ earum principia quædam existunt: aliquæ verò ab ipsis originem habent: aliquæ nec aliarum gubernationi præsumt, neque ab aliis gubernantur, cum insitas habeant à Natura potentias, à quibus reguntur: quædam verò sunt, quæ insitas simul, & aliunde emanantes habent. Principia igitur sunt Cerebrum, Cor, Hepar, Testiculi. Ab his verò ortum habent, atque eisdem subministrant; Nervi quidem, & Spinalis Medulla Cerebro: Cordi verò Arteriæ: Hepati Venæ: ipsa verò Seminaria vasa Testiculis. Quæ autem à seipsis gubernantur sunt Cartilago, Os, Copula, seu Ligamentum, Membrana, Adenes,

Adeps, Caro simplex: Reliquæ verò partes cum una cum istis habeant ex seipsis regimen, arteriis, nervis, & venis insuper egent. Capillorum autem, atque Unguium neque regimen ullum est, sed generatio tantummodò. Hæ igitur sunt partium differentia.

P A R A P H R A S I S.

UT melius Signa Insalubrium Corporum percipiantur, proponit hoc loco Galenus partium humanum Corpus componentium præcipuas quasdam differentias; earum scilicet, à quibus ultimò disponuntur ad actiones peragendas, & à quibus perturbatis, alteratisque, cæteræ quoque turbantur, alteranturque; propterea totus est in hoc Capite, ut explicet, enarretque partes tum Principes, tum Subjectas. Primum autem quatuor differentias partium proponit, mox verò easdem exemplificat, & determinat.

Inquit itaque, ex partibus humanum Corpus componentibus alias esse Principales, quas ipse Principia vocat, & alias, quæ ab illis originem habent. Nonnullas prætereà esse independentes, quæque à seipsis reguntur, nec aliarum dominio subjacent, aut ab illis aliquid exigunt; quasdam denique, quæ insitas quidem operandi potentias habent, sed tamen egent influxu à superioribus delato. Primi generis ponuntur Cerebrum, Cor, Hepar, & Testes. Secundi generis Nervi, Arteriæ, & Venæ. Terti generis Ossa, Ligamenta, Cartilagines. Ultimi denique generis reliqua viscera, nempe Pulmo, Ventriculus, Lien, Renes. Cumque de Capillis, & Unguibus quis dubitare potuisset, in fine Capitis addit, illis nullum regimen competere, sed generationem solum, idest non esse partes viventes Corporis, adeoque præstare solum usum, non verò actionem exercere.

re. Verùm singulá perpendamus, & examinemus.

De Principátu Partium vetusta nimis apud Medicos quæstio est, & frequenter in Scholis agitata, potissimùm inter Aristotelicos, & Galenicos, quorum primi solum Cor, secundi verò etiam Cerebrum, & Hepar, atque ex hoc Galeni loco, Testes adhuc admiserunt, quibus alii addidere Ventriculum, Pulmonem, & Lienem. At verò quid in hoc sit à nobis determinandum, absque eo, quòd à Galeno recedamus, breviter aperiemus, examinata in primis Natura, cum necessariis conditionibus, ad Partis principatum requisitis.

Principem partem Galenus nedum hoc loco, sed alibi etiam passim expressurus, aliquantulum varius sanè visus est. *Lib. etenim 6. de usu partium cap. 7.* partem Principem docet triplicis generis statui posse: aut relata ad vitam *Simpliciter*, aut ad vitam commodiorem, aut ad utriusque conservationem, & speciei pariter propagationem. Ad vivendum *Simpliciter* subdit, *14. ejusdem operis cap. 1.* partes necessarias esse, Cerebrum, Cor, & Hepar: Ad commodiùs vivendum Oculos, Nares, Aures; Ad ambarum conservationem, Ventriculum: Atque ad Speciei propagationem Testes, Pudenda, & Uterum. Sed clariùs *lib. 6. de placit. Hipp. & Platon. cap. 4. & 6.* Principem partem dicit esse, quæ iis, quæ ex se oriuntur, vim, vel materiam saltem suppeditat, atque impartitur. Hinc ferè communiter deducunt, tres præcipuas condiciones ad Partis principatum requiri: Primam, ut subjectas partes gubernet, ab illis non gubernata, ideoque influxum eisdem communicet, eundem influxum non recipiendo. Secundam, ut vim, vel materiam saltem toti corpori transmittat. Tertiam, ut sit simpliciter ad individui vitam necessaria.

At his pòsitis, pleráque haud facillè sustineri poterunt pro Galeno, præsertim si res ad Autopsiam, & ad Anatomen referatur. Quamvis enim Cerebrum, & Cor partes Corporis principales statuere velimus, eò quòd istæ influere videantur in Corpus, sintque simpliciter ad vitam necessariæ; si tamen vitæ commodum, & diuturnam ejusdem conservationem attendamus, profectò etiam Ventriculus, Organa sensuum, Pulmo, aliæque partes plurimæ inter Principes referendæ erunt; cùm sine illis vel diuturnam vitam ducere nequeamus, vel saltem infelicem admodum vivamus. Prætereà Hepar in consortium Principalium partium collocare repugnat Anatomix, qua jam satis superque constat, omninò ab assignatis conditionibus illud deficere: neque enim vim, neque materiam toti Corpori communicat, cùm potiùs recipiat Sanguinem, qui nutritioni partium superfuit, per venas remeantem. Facta siquidem ligatura in quacumque vena, (præter cavæ ascendentis truncum Cor pertingentem,) tumor conspicitur in parte extremum Corporis respiciente, inanitus ex adverso, qua parte Jecur spectat: quin & valvulæ per longitudinem venarum dispositæ id ipsum quoque manifestè attestantur; admittunt namquæ illæ refluxum sanguinem, admissum verò versus Jecur, omninò prohibent, ne relabatur. Ulteriùs Chylum Antiquioribus creditum in Hepar tendere, potiùs per thoracicos tubulos Cor adire, nuperrimè observationibus innumeris demonstrarunt Pecquetus, Van-Horne, Thomas Bartholinus, Blasius, Steponius, aliique plures, ut proptereà de re hac ampliùs dubitare stultitiæ sit argumentum. Et quamvis Harveo aliquando visum sit, aliqualem saltem portionem Chyli, venas Meseraicas subire, ac venam Portam, & Jecur ingredi; contrarium tamen evicit Thomas Bartholinus in

Spicilegiis Anatomicis, dissertatione de Hepate Exauthorato, & Tumulato. Hæc porro si innotuissent Galeno, procul dubio à consortio Principalium partium Hepar eliminasset, quemadmodum de Naturali Spiritu in Jecore genito valdè dubitat 12. *meth. cap. 5.* Ni tamen in gratiam Galeni dicere velimus, hîc eum de principiis, seu origine solùm quarundam partium mentionem facere voluisse, qua ratione Cerebrum Principium, & Origo Nervorum est, Cor verò Arteriarum, & Hepar Venarum; cùm observemus ductus istos, qua parte majores, & latiores sunt, in ipsis implantari.

Testes insuper, quamvis hoc loco inter Principes partes Galenus connumeret, alibi tamen excludit, & tres tantum enumerat partes Principales, Cerebrum, Cor, & Hepar, ut legere est 7. *de usu part. c. 21.*, 12. *method. cap. 5.*, 7. *de placit. Hipp.*, & *Platonis cap. 4.*, & 6. & alibi pluries; quin, si Principia hoc loco dixit esse, ex quibus reliquæ partes originem ducunt, quænam quæso partes, quive ductus ex Testibus pronascuntur? Certè nulli patent ex Anatome. At dices, unde igitur est, ut castrata animalia hebetiora evadant, licèt pinguescant? proculdubio è reselectis Testibus masculeum robur deperisse fatendum. Omîssa Aristotelis responsione, pinguescere dicam castrata animalia ex abundantiori glutine sanguini ingenito, & plurimum partibus applicito, quod cæteroqui per vasa seminalia in Sperma transire debebat: à copiosiori autem substantia glutinosa vigor Sanguinis, indeque robur corporis obtunditur; unde sicut Sanguis nutritioni aptior evadit; sic è converso vivificandis partibus fit ineptior. Sed & idem Galenus 1. *de semine cap. 15.* Testes dixit principia dumtaxat esse benè vivendi. Et quamvis Testes ejusmodi sint, ut nedum Corpori vigorem conferant, sed etiam fœcundum semen

reddant, non tamen sunt simpliciter ad vitam necessarii: quæ conditio omninò necessaria videtur esse partium Principali. Jure ergo ferè communiter munus hoc illis denegatur. Verùm si eorum, quæ superius ex Galeno retulimus, meminimus, erunt tamen Testes ad Speciei propagationem necessarii. Non minus enim vivens quodlibet ex insita Natura sibi ipsi consulere debet, quàm propriæ speciei propagationi, documento Aristotelis 8. *de histor. Animal. cap. 1.* ejusdemque Galeni 14. *de usu partium cap. 1.* Atqui hoc loco Galenus latiori significatione Principia, seu Principes partes sumpsit, ex dictis. Unde autem Semini fœcunditas, & generandi vis accedat, alibi à nobis explicatum, in Parte Medicinæ Theoretica.

CAPUT IV.

X. in Gal.

De Signis Cerebri.

TEXTUS.

(T. 13.) **I**ndicia autem singularum temperaturæ, sumpto à Cerebro initio, deinceps dicemus: Sunt verò quinque universa genera, quæ ipsius naturam ostendunt. Primum quidem totius Capitis dispositio: secundum verò sensibilibus operationum virtus, & vitium: & tertium activarum: quartum earum, quæ tenent principatum: & quintum naturalium. Aliud verò genus, præter hæc omnia, est ea, quæ ab extrinsecus occurrentibus advenit alteratio. Et quidem totius Capitis dispositio ex magnitudine, & figura sumitur, atque capillis.

P A R A P H R A S I S.

CUM dixisset superiori Capite Galenus, à partibus Principalibus reliquas subjectas partes, imò & totum corpus affici posse, eò quòd vis quædam, seu influxus, aut materia exinde suggeratur; propterea hoc Capite Cerebri temperierum indicia primum refert, quibus scilicet dignosci possit, num illud ad calidum, vel ad frigidum inclinet, subindeque dijudicetur de reliquarum partium subjectarum temperatura. Antequàm autem singulatim intemperierum Signa afferat, proponit quinque generales fontes signorum, unde singuli defectus, eorumque indicia deduci queant, ad internoscendas quascumque Cerebri intemperies, intra Sanitatis tamen limites. Nam Intemperies, seu Dyscrasia ex doctrina ejusdem Galeni tum *hic*, tum in *libris de temperamentis*, & *alibi*, duplex esse potest: altera Naturalis, quæ in latitudine sanitatis ponitur: altera omninò Præternaturalis, delapsa nimirum in morbi confinia. Inquit idcirco, quinque esse genera Signorum, quæ Cerebri naturam ostendunt. Primum desumitur à totius Capitis dispositione. Secundum ex Sensilium operationum ad Cerebrum pertinentium virtute, seu robore, & vitio, seu defectu. Tertium à bona, vel mala operationum activarum affectione. Quartum à vi, & habitudine operationum, quæ principatum possident. Quintum denique ab operationibus naturalibus. His quinque fontibus, tanquam præcipuis, & principalioribus, adjicit alium ab extrinsecis desumptum; puta à juvenibus, & nocentibus. Sed singula clariùs explicemus.

Primò, quod ad Capitis dispositionem, hæc ut idem Galenus explicat, comprehendit Magnitudinem, Figuram,

& Capillos, quibus Caput ipsum obtegatur. A magnitudine enim, vel parvitate Capitis, sicut etiam ab ejusdem figura, arguitur Formatricis virtutis robur, aut languor, in prima membrorum formatione; necnon materiæ seminalis conformitas, vel difformitas; aptitudo, vel ineptitudo, de qua infra. A Capillis verò, caloris, & temperiei naturalis constitutio; ac materiæ, unde illi progignuntur, conditio, ut propterea ab his colligere liceat an totius Capitis, & Cerebri valetudo bona sit, vel mala.

Secundò, quod ad virtutem, vel vitium Sensilium operationum, observandum, an illæ validæ, vel imbecilles sint. Pro sensibilibus autem operationibus intelliguntur quinque sensus externi, cum sensu interno, qui ponitur communis judex illorum. Quamobrem ab horum sensum perspicacitate, colligitur pariter caloris robur, & bona temperiei dispositio, contrà verò, ex contraria eorundem habitudine.

Tertiò, quod ad operationes activas, pro illis intelligendi sunt motus omnes præsertim arbitrarii, qui ad actiones reducuntur, juxta Doctrinam Aristotelis 2. de *Anima*: ubi movere quoddam agere dicitur, sentire verò quoddam pati: quare qui motum velociorem, & validiorem exercent, calidi dicuntur, qui verò tardum, ac debilem, frigidi.

Quartò, quod ad operationes Principatum obtinentes, ponuntur istæ quæcumque procedunt ab Imaginatrice, Ratiocinatrice, & Memoratrice; nam quemadmodum istæ benè, vel malè se gerunt, sic pariter variam designant Cerebri constitutionem; unde acutiori judicio præditi, calidiores observantur; & ex Galeno *Commentario super librum de Natura Humana*, ubi viget acuta, & velox Ratiocinatio, ibi quoque calor vegetior indicatur: contra Senes immemores fiunt, quia

quia cerebro labefactantur. Dicuntur autem hæ facultates Principatum habentes, græcè ἡγεμονικὰ Hegemonicae, quia cæteris nobiliores, superioresque sunt, atque in omnes sensus externos, & in motus corporis imperium sustinent, si cum arbitrio jungantur.

Quintò, ex facultatibus naturalibus Signa quoque Cerebri desumuntur; siquidem Cerebrum, ut pars vivens, eget nutrimento, quo increseat, vigeat, & operetur: illudque debet apponi, atque in ejus substantiam converti: indeque excrementa, quæ emergunt, convenienter repurgari; Quamobrem, si hæc perperam fiant, debile Cerebrum indicatur, quemadmodum experimur in Senibus, aliisque Capite imbecilibus; unde Hippocrates 6. aphorism. 2. dixit, eos, qui natura nares nacti sunt humidiores; minùs sana frui constitutione.

Denique à Juvantibus, & Nocentibus indicia quoque desumuntur; puta si à calefacientibus, Aere, Cibo, Potu, cæterisque Caput, Cerebrumque incalescat, ad calidum illud inclinare judicabitur; & si à frigefacientibus frigeat, ad frigidum. Ita de aliis. Sic contra si frigorifica alterantia profint; illud ad calidum esse intemperatum designabitur; ad frigidum verò, si à calorificis foveatur.

CAPUT V.

XI. in Galeno.

De parvitate, & magnitudine

Capitis.

TEXTUS.

(T. 14.) **P**arvum igitur Caput vitiosæ constitutionis Cerebri proprium est indicium; magnum verè non ne-

cessariò indicat bonam Cerebri constitutionem: Sed si quidem ob insitæ virtutis robur, quæ multam, atque optimam materiam efformaverit, eveniat, optimum est signum; at si ob materiæ tantum multitudinem, haudquaquam bonum. Distinguenda verò sunt hæc & ex figura ipsa, & ex his, quæ ab eo habent ortum. A figura quidem ipsa, si concinna: semper enim hoc bonum est signum. Ex his autem, quæ ab eo ortum habent, si valida est cervix, & si aliis ossibus optimè constet, atque omnis præterea nervosa substantia boni sit habitus, ac robur habeat intentum. Propria autem Capitis figura est, veluti si excogitares spheram exquisitè rotundam ex cera constructam, leviter utrinque depressam. In hac enim necesse est, ut posteriores, prioresve partes magis gibbæ fiant, quàm spheræ conveniant: quæ verò utrinque consistunt, magis rectæ. (T. 15.) Quod si ea, quæ secundum occiput eminentia, aliquatenus minuatur, simul intueri oportet nervos, atque cervicem unà cum ossibus aliis. Nam si secundum naturam constiterint, materiæ defectu, non virtutis imbecillitate hoc contingit: illis verò non rectè se habentibus, principium est debile. Sed magna ex parte defectus, qui occipiti eveniunt, consequitur eorum, quæ ante diximus, imbecillitas, rarissimèque aliter evenire consuevit. Caput etiam, quod secundum occiput in acutiem tendit, animadvertere oportet, iisdem adhibitis distinguendi rationibus, quibus antea in Capite grandiori factò utebamur. Ut plurimum verò & hic optimum est signum, figura concinna Cerebelli, quod nonnulli Medici posterius Cerebrum appellare consueverunt, quemadmodum & posterius existit ea sutura, quæ græcè literè Δ formam habet distinctam. Est verò hujusmodi pars spinalis medullæ principium, & ejus ratione nervorum omnium, qui in toto animali sunt activi. Ipsa autem pars posterior per se ipsam paucos admodum sensitivos

obtinēt nervos, plurimos verò activos. Sicuti & anterior sensitivos quidem plurimos, paucos admodum activos. Quare ubi bene fuerit affecta utraque pars, robustas habebunt propagines. (T. 16.) Eedem quoque distinctiones adhibendę sunt ad partes Capitis anteriores, ad frontem attinentes, quę etiam ad posteriores; earumdemque & parvitatem, & magnitudinem inspicere oportet, atque itidem figuram, & sensus ibi collocatos, Visum, Gustum, atque Odoratum. Hęc enim se invicem indicant, atque testantur, & quę à principiis oriuntur, principii virtutem, & vitium: & principium ea, quę ab ipso nascuntur.

P A R A P H R A S I S.

E Narratis generibus Signorum, pro Cerebri temperierum dignotione, incipit nunc singula examinare. Et quoniam Capitis dispositionem ex magnitudine, & figura, atque capillis, sumendam esse dixit, proinde à magnitudine, & parvitate Capitis exordium facit. Et quidem neque parvum, neque magnum Caput probat, ea tamen differentia, quòd parvum vitiosę constitutionis Cerebri proprium sit indicium; magnum verò, non necessariò bonam constitutionem indicet; posse tamen hanc optimam designare, si nimirum in prima generatione à robore formatricis virtutis magnum constructum sit. At verò si solùm à copia materie tale formatum sit, citrà virtutis formatricis vigorem, haudquaquam bonum magnum Caput esse prænunciat. Ut autem hæc duo internoscantur, num scilicet à formatrice valida, an verò à copia materie solùm, magnum Caput ortum sit, prospiciendam subdit esse figuram, & ea, quę ab ipso Capite ortum habent; unde si figura Capitis concinna sit, bonum erit indicium; sicut pariter si Cervix valida, atque alia ossa capiti adjacentia sint optimè constru-

cta; & demum si Nervi inde prodeuntēs, validi fuerint, adeoque in sensu, & motu robur ostendant. Quænam autem debeat esse Capitis figura, ut concinna dici possit, indicetque bonam Cerebri constitutionem, declarat his verbis; *Veluti si excogitares spheram exquisitè rotundam excera constructam, paulatim utrinque depressam.* Et rationem affert, quia in tali figura necesse est, ut posteriores, & anteriores partes plus gibbæ fiant, quàm spherę conveniat; quę verò utrinque consistunt, magis rectę. Et sensus est, quòd Caput ita figuratum, cum non sit perfectè globosum, sed quodammodo oblongum, adeoque aliquantulum in lateribus, seu temporibus depressum, sit, ut in anteriori, & posteriori parte exuberans evadat pro operationibus sensitivis, ac motivis, valde conferens, & accommodum. Idipsum confirmat 9. *de usu partium cap. 17.*, ubi docet, debere Caput oblongum esse, ratione eorum, quę à cerebro exoriuntur, nervorum nempe, mammillarium caruncularum, spinatęque medullę, quę per Capitis longitudinem ante, retroque liberius procedant. Decuit præterea Caput globosam figuram aliquantisper referre, tum ut cerebrum, ob sphericę figurę capacitatem, commodius complecteretur, tum etiam, ut illud ab externarum ærumnarum incursionibus securius tutaretur, cum apud omnes exploratissimum sit, ovales figuras adversus hostiles insultus tutissimum esse munimentum. Verum licet in lateribus expediens fuerit Caput aliquantisper deprimi, non tamen huiusmodi depressio tanta esse debuit, ut si profundior foret, Cerebri ventres, aliosque meatus angustiores redderet, non sine gravi Cerebri læsione.

Cur autem Caput magnum, præsertim à robusta formatrice constructum, bonum sit, ratio est, quia continet magnam Cerebri molem: ubi verò Cerebrum

brum mole majus est, ibi quoque operationes animales efficaciores sunt, ob abundantiores spiritus, solidioremque nervorum constitutionem, ac medullaris substantiæ quantitatem. Atque hinc etiam patet, cur parvum Caput malum dicatur, quia ventriculi in eo angustiores, Spiritus parciores. Nervi valde exiles, & medullaris substantia modica est.

Verum, quæ de magnitudine, & parvitate Capitis à Galeno dicta sunt, magnam peperere apud Authores, & præsertim Physiognomiæ, & Anatomes peritos, dissensionem: cuinam scilicet Capiti, magno ne, an parvo laus tribuenda sit. Aristoteles enim 30. *sect. problem. 3.* parvum Caput commendare videtur; siquidem inquit, prudentissimum animantium esse Hominem, quia Capite minimo est: subditque, inter Homines ipsos, qui minori sunt Capite, prudentiores esse, quàm qui sunt grandiori. At verò in *Physiognomicis cap. 9. text. penult.* contrarium videtur affirmare, dum ait, quòd qui habent magnum Caput, sensati sint, & referantur ad Canes, puta Venaticos; qui verò parvum, insensati, & referantur ad Asinos. Galenus verò tum hìc, tum alibi, & præsertim 6. *epidem coment. 1. tex. 3.* parvum Caput nullo modo probat, commendatque magnum.

Conati sunt plerique contradicentes hos Authores conciliare. Et quidem nonnulli dixerunt, Aristotelem in *Problematis* loquutum esse de parvitate humani Capitis, facta comparatione ad Capita cæterorum Animalium; Galenum verò egisse de parvitate Capitis inter homines solum considerata. Attamen Aristoteles ibidem, adhuc inter homines, prudentiores esse ait, qui parvo sunt Capite, quàm qui grandiori; unde non solum comparat Caput humanum cum Capitibus Brutorum, sed Capita Hominum inter sese:

quod etiam notavit Septalius *super expositione prædictorum Problematum*.

Existimarunt alii, Aristotelem pro parvo Capite excarne, & macilentum intellexisse: Galenum verò, quod, ob calvariæ modicam capacitatem, paucam Cerebri molem continet: Ita præ cæteris exponunt Conciliator, & Forolivienfis, atque ex his Laurentius 10. *Anatomes cap. 1.*, itemque Jo. Baptista Porta in sua *Physiognomia lib. 2. cap. 1.* Sed & hos rejicit quoque relatus Septalius, quia quæ sensum effugiunt, dignosci non possunt, ex eodem Galeno *hoc eodem opere, cap. 75.*

Aliter dissensionem hanc conciliat Santorius *hoc loco*. Ait enim, Galenum pro parvo Capite intelligere parvum impropportionatum; per magnum verò optimæ constitutionis intelligere proportionatum; proportionem autem istam conferendam esse ad reliquas adjunctas partes Capitis, & Cervicis, imò totius Corporis. Sed suam quoque patitur difficultatem, nam Galenus agit de parvo, & magno Capite naturali, non monstruoso: modò si parvum considerasset impropportionatum, profectò illud monstruosum esset.

Septalius *loco citato* Aristotelem inquit commendasse parvum Caput cum minimo recessu à mediocritate, Galenum verò non probasse illud cum magno recessu ab eadem: laudasse è converso magnum, non quidem nimiam molis, sed ad mediocritatem accedens; unde subdit, utrumque commendasse Caput mediocre. At hoc gratis fingit, cum Galenus revera opposuerit magno Capiti parvum, nulla facta mentione de mediocri, de quo nulla poterat esse difficultas, quia, quod in cunctis rebus medium, & moderatum est, optimum pariter statuitur.

Meliùs igitur, & magis cohærenter Galeno, dicamus, magnitudinem, &

parvitatē Capitis considerari posse cum duplici vitio, altero quidem materiei, ex qua Caput efformatur, & altero virtutis formatricis. Si parvum Caput sit, tum ex defectu virtutis, tum ex defectu materiei, proculdubio malum semper est, & in hoc sensu improbat illud hoc loco Galenus. Si verò parvum sit ex defectu materiei, non autem ex defectu formatricis, tunc reprobandum minimè erit, præsertim si deficiat solum in ossibus, non autem in substantia medullari Cerebri. Magnum è contra, si referat tantummodò magnitudinem materiei sine robore formatricis virtutis, similiter malum est; at si molem exhibeat cum robore virtutis, quod dignoscetur ex concinna figura, & ex soliditate, firmitudineque ossium adjunctorum, optimum planè judicabitur. Quamobrem ea solum Capita vitiosa sunt, quæ inconcinnam constitutionem, difformemque structuram sortiuntur, quoniam arguunt languorem formatricis virtutis, nequeuntis partes Capitis exactè conformare. Vel brevius dicas, quòd Aristoteles improbat Caput magnum magnitudine ossium, quale est Brutòrum; Galenus verò commendat magnum mole Cerebri, quale humanum esse debet, quod ex observatione Anatomicorum sextuplo ferè exuperat reliquorum Animalium Cerebella.

Sed liceat nunc, arrepta hinc occasione ex magnitudine, & figura Capitis, quidquid Physiognomici collegerunt, ad mores, & naturas Corporum dignoscendas breviter referre, cum ex Galeno animi mores Corporis temperaturam sequantur: quod sanè valde utile existimandum cunctis Medicinæ Professoribus. Et quidem parvissimum Caput omninò malum, & indecens existimatur, documento Aristotelis citato cap. 9. suæ Physiognomiae: Stolidorum enim proprium est indicium; Bubalo namque, Camelo, Struthioni, Pantheræ, Anseri, aliisque stolidis Anima-

libus Caput admodum parvum inest, Cerebrumque minimæ molis. Addit pariter D. Thomas Comm. in lib. Aristotelis de sensu, & sensili lectione 5. parvissimi Capitis homines secundum aliorum membrorum proportionem, impetuosos esse, iracundos, indociles, ac violentos; quod etiam confirmant Porta, Claramontius, & Honoratus Nicquetius, ex eo potissimum, quia in parvo Capite minimum Cerebrum invenitur, adeoque ductus omnes angustissimi; quamobrem spiritus, halitus, & vapores, ac sanguis ipse, facili negotio incalescunt, & Cerebri operationes promptè admodum turbantur, atque ad violentas actiones commoventur, & impelluntur. Hujus Cerebri parvitatē participes sunt foeminae.

Acutum Caput, seu Pineatum, ex eodem Aristotele ibidem, inverecundi signum est: igneam enim arguit temperiem, quippe ignis motum, & conditionem imitatur, ad formam pyramidis, seu coni assurgentis: tales enim audaces sunt, & temerarii, adeoque inverecundi; de qua Capitis figura mentionem fecit Hippocrates 6. epid. sect. 1. text. 3.

Caput plus justo magnum pessimum quoque est, si potissimum ad cætera membra improprietatem habeat: arguit enim nimium humoris in ejus formatione collectum esse, ac illius meatus quodammodò gravari, & obstrui; unde ex quacumque causa facilè novis humoribus, & vaporibus oppletur, & lethargicas affectiones contrahit. Designat etiam sensuum hebetudinem, & mentis stoliditatem exemplo Capitatorum Animalium, ut sunt Asini, Noctuæ Aves, Cephali, Uranoscopi; aliaque Animalia relata à Jo: Baptista Porta in sua Physiognomia naturali, quæ stolidissima sunt. Quòd si Caput maximum appareat, sed Cerebrum in eo contentum minimum sit, pejus erit: nam tanta ossium moles Cerebrum gravat, estque hoc ejus.

ejus oneri ferendo, atque operationibus Animalibus rite peragendis insufficiens. Juxtà quem sensum intelligendus Aristoteles, qui homines parvo Capite retulit ad Asinos; non quòd hi magno Capite non sint præditi, sed quòd in magno Capite minimum Cerebrum contineant. Hic ferur Vitellium maximi Capitis Imperatorem, stultum, & ignavum fuisse.

Non adeò magnum Caput, imò aliquantisper ad parvum inclinans, parvitate ossium, non Cerebri, cum concinna figura, prudentiæ, fidelitatis, calliditatis, & versutiæ signum ponitur, ut in Cane, Vulpe, Simia: cujus magnitudinis fuisse fertur Caput Aristotelis; in his enim prævalet calor, cum naturali formatricis virtutis vigore, adjunctustamen siccitati, cujus causa partes externæ, & ossa extenuantur; internæ verò, & præsertim Spiritus, & Sanguis exacuuntur.

Aliquando demum majus Caput, Cerebri potius mole, quàm ossibus, & carnibus, omnium optimum observatur: Sicut enim virtutis robur, caloris vigorem, & aptam materiam arguit; sic pariter denotat sensuum internorum, & externorum perspicacitatem, animique constantiam, ac fortitudinem. Aristoteles, & Jo: Baptista Porta comparant ejuscemodi capite præditos Canibus sagacibus, venaticis, & Vertagis dictis, quibus Caput amplius, & frons latior inest. Hujus Capitis genere præditos Platonem, & Hippocratem fuisse ajunt, ut etiam testatur idem Jo: Baptista Porta. Et de his satis.

Præter totius Capitis magnitudinem, & figuram, considerat quoque Galenus anteriorem, & posteriorem illius partem, Synciput scilicet, & Occiput, atque ait, Occiput non secus, ac totum Caput, vel debito minus, vel solito majus esse posse. Et quidem si Occipitis eminentia longè solito minor sit, oportebit observare ea, quæ ab Occipite oriuntur, nempe Cer-

vicem, Spinatam medullam, & Nervos, quæ si secundum naturam constiterint, hoc est, si rectè se habuerint in duritie, & mole, prædictus in diminutione defectus erit ob solam materie deficientiam, neutiquam verò ob formatricis imbecillitatem, ideòque minus malum erit: contra verò illis non rectè se habentibus, principium eorum, nempe Cerebrum, debile designabitur, simulque inferetur, tum materiæ inopia, tum formatricis virtutis languor; quare longè majus malum est. Adjicit præterea magna ex parte defectus, qui Occipiti eveniunt, consequi imbecillitatem Cervicis, Spinatæ medullæ, & Nervorum; rarissimè verò contingere, quòd cum Occipitis defectu robur conjungatur eorum, quæ ab ipso exoriuntur.

Quod autem spectat ad vitium in augmento: Caput secundum Occiput in acutiem tendens, adeò ut turbinatum videatur, si pari modo adjacentia Ossa, Spinam, & Nervos benè se habentia obtineant, bonum; malum è contra, si prædicta hæc malè se habeant. At cujus partis, cujusve maligne generis indicium sit, docet inferiùs Galenus, ejusmodi bonitatem, vel malitiam ad Cerebellum pertinere, quod à Sutura Lambdoidea comprehenditur; necnon ad operationes, quæ à Cerebello potissimum proficiscuntur, quales sunt operationes motivæ, cum Nervi à Cerebello provenientes ad motus potius conferre videantur; (a) sicut è converso procedentes à Cerebro potius ad sensus perficiendos inservire. Quid autem de Nervis, eorumque Origine, differentiis, & usu dicendum sit, ab Anatomicis petendum.

Quod denique dixerat de Occipite ad dignoscendam Cerebelli constitutionem, id ipsum

C 4

ipsum

(a) V. super hoc Willis in Cerebri, & Nervorum.

ipsum intelligendum ait de Syncipite, pro Cerebri temperaturæ dignotione, num scilicet solito eminentius, aut depressius fuerit; & quemadmodum in Occipite considerata proposuit *Exorta*, & *Adjacentia*, nempe Nervos, Spinatam medullam, & Cervicem; ita in Syncipite subdit, observandos esse Sensus, quorum organa anteriorem Capitis partem occupant, videlicet Visum, Gustum, & Olfactum, in quæ anteriores Nervi per Cerebrum delati diffunduntur: si namque sensus isti rectè se habeant, depressio illa minus mala erit, cum solius materiei defectum arguat, non verò formatricis languorem; peior autem erit, si ob sensuum imbecillitatem virtutis languor designetur. At si Synciput plus justo excreverit, tunc inspiciendum, an cum tali eminentia concinna figura jungatur, cum exortis validioribus; his enim benè se habentibus, incrementum illud bonum, & laudabile erit; sin secus, contrà. Ex utroque autem incremento, Occipitis scilicet, & Syncipitis, magis esse commendandum idem Galenus inquit 6. *epidem. sect. 1. comm. 3.* incrementum Occipitis, quàm Syncipitis, fortè quia Occiput postremum Cerebri ventriculum contineat, qui putabatur ab eodem ultimus Spirituum animalium elaborator, atque Spinalis medullæ principium. Contrarium tamen arbitratur Vallesius in *comm. ejusdem loci*, qui vult præstare Synciput esse eminentius, ob Sensem communem, & Ingenium, quod potissimum vigere videtur in Syncipite; sed & neque Spinalem medullam cum Nervis à Cerebello pendere, nec revera sinum ibidem contineri subdit.

At cur Galenus ad cognoscendam Cerebri constitutionem indicia non sumpsit ab Auditu, & Tactu, qui etiam per Nervos perficiuntur, & à Cerebro procedunt? Respondet Turisanius, pro dignoscenda anteriori Cerebri parte Galenum

illis dumtaxat Sensibus usum esse, qui ab eadem anteriori parte originem ducunt, quales sunt prædicti tres; Auditus verò, cum potius à laterali, & media regione oriatur, tanta virtute minimè pollet, ut significet partis Cerebri anterioris constitutionem. Tactus insuper cum per totum corpus sit diffusus, non majorem vim significandi habet, quæ pertinent ad Synciput, quàm quæ ad Occiput, reliquasque Corporis partes.

At verò animadvertere decet, ex eodem Galeno, quòd licet Principio benè se habente, nempe Cerebro, exorta, idest Nervi, & sensus inde dependentes, benè quoque se habere soleant; possunt tamen ob aliquam adscititiam causam exorta ipsa vitari, illæso tamen principio, seu Cerebro; unde non valebit illatio ad convertentiam. Patet hoc evidenter in Cæcis, & Surdis, in quibus licet Nervi visivi, & auditivi non rectè se gerant; principium tamen, seu Cerebrum quàm optimè se habebit, ut colligere erit ex Ratiocinio, Memoria, Judicio, aliisque animalibus operationibus; nam hi Sensus externi, illorumque Nervi poterunt offendi ab aliqua externa causa, citra Cerebri læsionem.

Pro coronide hujus Capitis, adjiciamus etiam indicia ex Physiognomicis petita pro depresso, vel eminenti Syncipite, & Occipite. Quibus itaque Synciput depressum est, ex Alberto Magno, insidiæ sunt familiares; sed rationabilius putat Porta, hos Imaginativa destitui, nec tam facile apprehendere, quàm memoria tenere. Expertus sum & Ego esse vaniloquos, & ignavos, facilèque sibi omnia fingere, atque quacumque de causa in utramque partem prospera, & adversa, facilia, aut difficilia persuadere, cujusmodi sunt fœminæ. Quibus verò depressum est Occiput, hebescit robur in motu musculorum, & solent esse obliviosi, duri, obstina-

stinati, atque in suis opinionibus pertinaces.

Sinciput è contra plus justo elatum, duræ cervicis homines denotat, non facile à præconcepta sententia amovibiles; sicut pariter Occiput eminens, nisi quod in hoc robur aderit in motu, & sensu Tactus, præcipue in partibus priores Spinalæ medullæ nervos obtinentibus.

De Fronte etiam lata ad instar Bovis, scribit Aristoteles, tarditatis, & pigritiæ indicium esse, atque obtusioris ingenii notam: idemque fatetur Galenus lib. quod *Animi mores Corporis temperiem sequantur*, confirmatque Rhasis ad Almanso-rem. Frons parva, & angusta arguit mobilitatem ex eodem Galeno, & si angusta quidem sit, sed aliquanto longior, præter mentis inquietudinem, Corporis etiam immunditiem portendit. Frons quadrata, instar Leonis, fortitudinem, & magnanimitatem denunciat. Rotunda verò, & circularis faciem significat Animi iracundiam, & furorem, & maximam ad insaniam contrahendam proclivitatem; sicut pariter si plurimum rugosa fuerit. Tempora denique plus justo concava ex Galeno cit. libro, deceptorem, & crudelem arguunt: id quod siccitati idem Author attribuit: siccitas autem calori juncta, sicut calvitium ante tempus afferre solet, documento Hippocratis 6. *epidem.* ita pariter callidum, astutum, & fraude plenum prænunciat. Verumtamen hæc omnia intelligenda sunt juxta Naturæ, & sensitivæ Animæ inclinationem, cum cæteroqui Ratione, Judicio, & Prudentia corrigi, mutari, atque etiam aboleri omnino possint. Et de his satis.

CAPUT VI.

XII. in Galeno.

De Operationibus obtinentibus principatum.

TEXTUS.

(T. 17.) **E**arum autem operationum, quæ obtinent Principatum, virtus, ac vitium sunt ipsius principii seorsum tantummodò indicia. Voco autem operationes principatum obtinentes, hoc est *ἡγεμονικὰς*, quæ à solo principio proveniunt. Ingenium quidem igitur græcè *Ἀγχινοία* subtilem Cerebri substantiam indicat: tarditas verò intellectus, crassam: discendi verò facilitas, formarum facile susceptivam, memoria autem stabilem, ac firmam: sicuti & discendi difficultas, formarum non facile susceptivam: & oblivio, fluidam; mobilitas quoque in opinionibus, calidam: stabilitas autem, frigidam. (T. 18.) Adhuc autem duo indiciorum genera mihi videor prætermisisse, de quibus sum ab initio me dicturum pollicitus: quorum alterum ad operationes attinet naturales, alterum verò ad ea, quæ extrinsecus occurrant. Erit autem in utrisque Sermo communis.

PARAPHRASIS.

Cum explicuisset superius Galenus, quo pacto ex Capitis dispositione, & ex functionibus sensitivis, ac motivis Cerebri temperatura esset dignoscenda; declarat in præsentem, quomodo eadem ab actionibus principatum obtinentibus cognosci quoque possit. Primum autem docet, virtutem, ac vitium, sive perfectionem, & imperfectionem principalium Cerebri operationum, ejusdem dumtaxat indicia

dicia esse, quoniam operationes principatum obtinentes à solo principio, idest Cerebro, dependent, atque ab eo immediatè peraguntur, ideoque vim habent immediatiùs significandi Cerebri constitutionem. Ità enim Imaginatio, Ratio, cinatio, & Memoratio à Cerebro solùm proficiuntur, ut propterea nullius alterius sensus adminiculo egeant; ad differentiam operationum sensuum externorum, quæ licet in organis fiant, perfici tamen nequeunt, nisi dependentèr à Cerebro; Siquidem licet visio E. g. in Oculo fiat, non tamen independentèr à Cerebro fieri potest, à quo Spiritus animales, & Nervos Oculus recipit: quin & non desunt, qui haud irrationabiliter contendunt, omnes sensationes in Cerebro fieri, quamvis per sensus externos, tanquam per fenestras habeantur, inter quos est Manardus in suis Epistolis. De qua re alibi.

Subdit insuper Ingenium subtilem Cerebri substantiam indicare; Intellectus verò tarditatem, crassam ostendere. Prætereà discendi facilitatem indicium esse, quòd eadem Cerebri substantia formarum sit facilè susceptiva; contrà verò discendi difficultatem, quòd illa difficilimè formas suscipiat. Memoriam ulteriùs eandem stabilem, ac firmam designare; oblivionem verò mollem, ac fluidam. Denique concludit mobilitatem in opinionibus calidam Cerebri substantiam; & stabilitatem, frigidam significare. Verùm in his parumper immoremur.

Et quidem dubitare primò contingit, quid hic pro Ingenio intellexerit Galenus, quidve pro subtile, crassaque Cerebri substantia; atque unde Ingenium, subtilem, intelligendi verò tarditas, crassam ejus substantiam fortiat.

Argenterius, & Sclanus in commentario hujus loci exponunt pro Ingenio (græcè ἀγχίνοια Anchinoëa) intellexisse Gale-

num promptitudinem quandam cogitativæ facultatis, sive potius cogitativam ipsam celerem, & velocem: id quod deducunt ex eo, quia idem Galenus hoc eodem loco *Anchinoëa* contraposuit ἀγνοια *Dianoëam*, hoc est Intellectus, sive potentiae Ratiocinativæ tarditatem, ut hinc patere posset, pro Anchinoëa, vel Ingenio, celerem, & velocem Ratiocinatricem voluisse intelligere. Sanctorius verò explicat Anchinoëam, per Solertiam; de qua Aristoteles 1. *Poster. cap. ult.* habet, quòd ille Solers est, qui citissimè medium invenit ad conclusionem, & causam dantem propter quid. At Themistius ibidem, illum esse solertem ait, qui citò, & faciliter resolvit conclusionem in sua principia: videtur consentire Plato in *Theeteto*, ubi docet, Solertes velociter omnia distinguere. (a)

Verùm pro dubii solutione adnotandum hic primò est, quòd Ingenium propriè competit solis Hominibus, cùm solùm Homines dicantur pollere, vel non pol- lere Ingenio; propterea que fiet, quòd ad Appetitum sensitivum, & Imaginativam pertinere non possit, quoniam hæ duæ Potentiæ sensibus egent, suntque communes etiam Brutis; quin plerique valent sensibus, Ingenio tamen haudquaquam: & complures alii Imaginativa pol- lent, cùm nihilominus Ingeniosi non sint, quia carent Judicio, à quo Ingenium nul- latenùs sejungitur: Nonnulli demum in- signem habent Memoriam, sed Ingenio deficiunt, quia judicio non pollent; imò rarò

(a) Tres sunt partes docilitatis, μνήμη, ὀξύτης, ἀγχίνοια: μνήμη, seu Memoria est conservatio eorum, quæ quis didicerit: ὀξύτης, seu Acumen est celeritas ἀγνοιας h. e. Intellectus: ἀγχίνοια demùm est potestas ex iis, quæ quis didicerit, in- vestigandi, quæ non didicerit. V. Lexic. Græc. Tusani.

rarò evenit, ut qui plurimùm memoria valent, acri Ingenio sint præditi. Quare asserere oportebit Ingenium propriè Homini concessum, neutiquam ad facultates materiales reduci posse, sed ad solam virtutem Intellectivam, quæ est propria Hominis, ejusque solius. Pertinebit igitur Ingenium ad Intellectum, sed cum ejusdem summa perfectione, adeoque consistet in Viceleriter apprehendendi, acriter judicandi, & subtiliter deducendi ex rebus apprehensis, & judicatis congruentes suas conclusiones. Vel brevius: in Vi inveniendi media citissimè ducentia in cognitionem Causarum.

Quod ad subtilitatem verò, & crassitiam Cerebri, diversimodè quoque illam Expositores interpretantur. Montanus, & Acachias, non ad Cerebri, sed ad Animalium spirituum substantiam, subtile, crassumque Cerebrum referunt. At hi manifestè contradicunt Galeno, de substantia solùm Cerebri mentionem facienti, neutiquam verò de Spiritibus. Nonnulli cum Haly, subtilem Cerebri substantiam exponunt, perviam, claram, & translucidam. Sed hos reprehendit Argenterius, & meritò; quia nulla claritas, vel pelluciditas in Cerebri Corpore denso, & opaco effingi potest, si septum tantùm excipias lucidum à transparentia sic appellatum, quo anteriores Cerebri ventriculi discriminantur; quamquam & hoc neque intùs tale videatur. Hinc idem Argenterius probabiliorem existimat illorum expositionem, qui subtile Cerebrum interpretantur syncerum, & non ex crassa, ac turbulenta, sed ex puriori materia constructum, inter quos est Salvus Sclanus in *commentario hujus loci*. Non desunt alii, qui pro subtili Cerebro, rarum, attenuatumque exponant; pro crasso verò densum, & constipatum. Sed verisimiliùs dicendum, subtile Cerebrum intelligi hìc à Galeno, quod tenujum partium est, atque in pri-

ma sui formatione molis non admodum profundè constructum fuit, præsertim secundùm corticem; quinimò substantiam habeat porosam, facilèque transpirabilem; ad differentiam crassi, quod profunda nimis mole, & cortice denso, transpirabile admodum non est; unde rorida illius substantia, spiritusque animales, ac medullium à superincumbenti pondere oppressa, & constipata, nec libera, nec tenuia, nec spatiosa fiunt, pro expedita, ac prompta sensuum internorum operatione: quamobrem cum Spiritus animales, & rorida medullaris substantia per medullium liberè excurrunt, & halitus, seu vapores promptè per corticalem substantiam aditum fortiuntur, & evaporant, subtile Cerebrum appellabimus: crassum è contrà. Hac profectò ratione dicere solemus, tenuem esse Aerem, cum vaporibus destituitur, & caret nebulis, atque è converso crassum, cum vaporibus, & exhalationibus repletur, estque caliginosus: & sicut radii solares non æquè, ac ubertim, nec tam facilè per vitrum, quàm per crystallum, idque adhuc si crassius minus, quàm si tenuius; nec ità per aquam, ac per aerem, aut per aquam, & aerem fuscum, quàm per aquam limpida, aeremque serenum diffunduntur; sic Ros ille, & Spiritus animales, non per quamlibet substantiam Cerebri æqualiter trajiciuntur, liberèque transfluunt, & excurrunt; sed diversimodè, prout Cerebri substantia tenuior, vel crassior erit.

Ex his nunc deducimus, Ingenium non aliam ob causam subtilem Cerebri substantiam indicare, nisi quia ipsum acutum quoque est, documento Scaligeri *exercit. i.* asserentis, aliud non esse Ingenium, nisi Intellectus subtilitatem, & acumen; idest facilem, citam, ac promptam rerum apprehensarum exhibitionem, ac intelligentiam, quæ à Spiritibus summè tenuibus, ac mobilibus exoritur; quoniam isti cele-

celeriter tenuem Cerebri substantiam pervadunt, ac promptissimè simulacra rerum exhibent, atque Intellectui repræsentant; unde subita, ac velox intellectio succedit, indeque Judicium in distinguendo, eligendo, & judicando subsequitur, in quibus omnibus consistit Ingenium.

Præterea circa discendi facilitatem (quæ consistit in facili imaginatione, & promptæ rerum apprehensione) inquit Galenus, quòd illa significet Cerebri substantiam facilem susceptivam formarum; discendi verò difficultas ostendat ineptitudinem ejusdem ad formas rerum suscipiendas: pro quibus formis, rerum Imagines, & Simulacra intelligenda sunt, quæ cum faciliter, ac promptè in molli substantia suscipiantur, & difficillimè in dura, idcirco idem erit dicere, discendi facilitatem indicare Cerebri substantiam facilem formarum susceptivam, ac illam esse mollem; contra verò difficilem formarum susceptivam, ac duram, solidamque, exemplo à Pueris, & Senibus desumpto. Pueri enim Cerebrum molle habentes, & aliquanto humidius, facilius addiscunt, quia melius in illorum Cerebro rerum species, seu simulacra imprimuntur; secus autem in Cerebro Senum sicciori, duriorique: quamvis ad hoc plurimum quoque conferat attentæ perceptio, ac fortis apprehensio discendorum, quæ cum potius vigeat in pueris, utpotè inexperitis, adeoque curiosioribus, minimè verò in senibus, propterea fit, ut illi vehementius apprehendant, detineant, & discant, quàm isti.

Subdit insuper idem Galenus, à Memoria stabilem, ac firmam Cerebri substantiam denotari; oblivionem ex adverso, fluidam eandem ostendere. Pro Memoria autem, ut benè advertit hoc loco Argenterius, minimè intelligenda Reminiscencia, quæ cum fiat per Ratiocinationem, ad Ingenium referri debet, de quo antea dictum est; sed solum intelligenda simpli-

citer Memoria, quæ est Potentia magis inhærens subjecto, atque ad organi variam dispositionem, in Hominibus quoque varia est.

At unde varietas hæc in Memoria habetur, dubitari hinc solet ab Expositoribus. Et nonnulli apud Argenterium existimarunt, in Senibus Cerebrum diminui, in Pueris augeri, ac propterea hos memores, immemores illos esse. Sed melius idem dicendum arbitratur, in Senibus Cerebrum duriusculum fieri, quod in Pueris mollius est. Quemadmodum enim omnes partes Corporis mutatione ætatum obdurescunt, & constipantur; ita valdè credibile est, Cerebrum etiam aliquantisper densari, & obdurescere in senectute. Verum ob id ipsum, quòd senes siccior Cerebrum nanciscuntur, dicere possumus, quòd obliviosi evadant; quare adversus nuper dicta ambigere contingit, quòd Memoria, haudquaquam stabilem, firmamque Cerebri substantiam portendat; nam cæteroque senes durior Cerebri constitutionem adepti valdè memores esse deberent. Ad quam difficultatem dicamus, obliviosos evadere senes, vel quia Cerebri substantiam longè debito siccior, constipatior, remque acquirant, adeo multum à Cranio distare soleat; vel etiam quia nimia excrementorum congeries eorum Cerebrum adeo aggravat, & obtundit, ut nedum novas impressiones minimè excipiat, sed & factas deleat; quin & aliquando stolidos, & mentecaptos reddat. Nisi tamen dicere velimus, obliviosos fieri Senes eorum tantum, quæ nuper audierunt, quia nulla cum attentione illa percipiunt, nec apprehendunt, cum aliunde Pueri attentissimè, quæ audiunt, excipiant, & excepta retineant, adeoque majori cum sedulitate illa eadem perquirant, sæpiusque mente revolvant, proindeque tenacius retineant, ac diutius recordentur.

Nedum autem ex Ingenio, & Memoria,

ria, sed etiam ex Opinione, quæ est altera Ratiocinatricis facultatis actio, licebit Medico circa Cerebri constitutionem philosophari; Unde Galenus inquit, Mobilitatem in opinionibus calidam Cerebri temperaturam significare; Stabilitatem verò in iisdem, frigidam. Pro Mobilitate in opinionibus, ut advertunt Argenteus, & Sclanus, non solum intelligere debemus mutationem sententiarum, quæ habentur de vero, & falso; verum etiam eorum, quæ volumus, aut nolumus, sive quòd bona, & proficua, sive quòd mala, & noxia videantur. Eos namque opinionem mutare dicimus, qui non solum ex verisimili ad verisimilius, aut ex falso ad verum, vel viceversa mutantur; sed etiam qui rem aliquam nunc volunt, & appetunt, tanquam proficua, aut utilem, nunc verò nolunt, ac respuunt, utpotè nocuam, aut inutilem. Contrà autem quicumque in re semel percepta, aut concupita, vel repudiata, cui scilicet assensum, vel dissensum præstiterunt, obstinatè, ac pertinaciter persistunt, stabiles in opinionibus dicuntur.

At cur mobilitas in opinionibus calidum Cerebrum arguat, & stabilitas frigidum, ratio potissima redditur, quia calidi proprietas est, agitare, ac movere; frigidi verò condensare, componere, & stabilire: quo fit, ut mutabiles calido temperamento, hoc est tenuiori sanguine præditi observentur, ac biliosi, seu cholericici dicti; stabiles verò frigidi, quales melancholici ex adverso.

Verum si hæc vera sunt, unde est, ut fœminæ longè maribus frigidiores creditæ, opiniones tamen quàm facillimè mutant? Respondent aliqui, fœminas non ratione caliditatis, sed humiditatis, quæ in ipsarum Cerebro abundat, mobilissimas in opinionibus esse. Sed hæc responsio non satisfacit, quoniam humiditas ponitur qualitas passiva, cui movendi vis à Galeno de-

negatur 1. de symptom. causis, aliter obesse, & quibus inter mares Cerebrum inest solito humidius, ac destillationibus, & catarthis obnoxium, mobiles quoque in opinionibus esse deberent. Probabilius ergo erit fœminas facilè mobiles asserere ob imperitiam potius, quàm ob humiditatem, vel caliditatem: Cum enim imperitæ, & inexpertes sint rerum humanarum, maxima idcirco credulitate afficiuntur, ob quam facilè sibi persuadent, quicquid illarum menti objicitur, unde instabiles, ac mutabiles evadunt.

Postremò concludit præsens Caput Galenus inquiens, velle deinceps de duobus aliis indiciorum generibus agere, de quibus ab initio se dicturum pollicitus fuerat, & quæ fortasse vel prætermisisse, vel distulisse videri poterat; propterea sermonem resumens ait, reliqua duo indiciorum genera esse, alterum quidem ad naturales operationes attinens, alterum verò ad ea, quæ extrinsecus occurrant: atque de utrisque subdit, se inferiùs communem sermonem facturum, particularia signa referens cujuscvis temperaturæ Cerebri. At quoniam ratio postulabat, ut primùm indicia temperatæ constitutionis Cerebri referret, qua cognita reliquæ facilè cognoscuntur, proinde sequenti Capite totus ipse est in tradendis signis moderatæ Cerebri temperici, desumptis ab actionibus naturalibus, & à juvantibus, ac nocentibus, de quibus mox.

CAPUT VII.

XIII. in Galeno.

Signa bonæ temperaturæ Cerebri.

TEXTUS.

Siquidem Cerebrum sortiatur bonam quatuor primarum qualitatum temperaturam, omnia quæ diximus habebit moderata, & excrementa quæ vel per palatum, vel aures, vel nares, vel oculos expurgantur: hæc quoque modicè se habebunt: atque ab his, quæ extrinsecus occurrant, minimè lædetur, quæ scilicet vel calefaciunt, vel friges faciunt, vel humectant, vel exsiccant. Talibus igitur Capilli Capitis, cum adhuc sunt infantes, subrufi, cum verò pueri, subflavi, cum jam adoleverint, flavi fiunt, medii quodammodò sunt inter eos, qui omninò sunt crispi, & simplices, non tamen faciliè Calvitium patiuntur. (T. 19.) Quæ verò dicuntur, ac posterius dicenda indicia sunt, accipere oportet, ut in bonam habentibus temperiem habitationibus. Quæ autem ad Capillos attinent, non ad locorum tantum, sed ad humorum quoque temperaturam, qui Cerebri temperaturæ proportionem respondent, sunt referenda. (T. 20.) Si verò Calidius sit quam oporteat, in altera verò oppositione bonam habeat temperaturam: Si quidem in caliditate multum excesserit, omnia, quæ dicuntur, validiora erunt indicia: Sed si parvus fuerit excessus, imbecillia. Communis autem hæc ratio statuatur in omnibus partibus, quarum in temperaturis universis indicia sumus tradituri.

PARAPHRASIS.

Naturales operationes bonæ, vel malæ, à bona, vel mala primarum

qualitatum contemperatione fieri ponuntur: hæc autem si moderata fuerit, omnia quoque ab illa dependentia, moderata erunt. Unde si Cerebrum bonam sortiatur primarum harum qualitatum temperaturam, nedum antedicta signa desumpta ex dispositione Capitis, ac sensitivis, & motivis operationibus, necnon ex actionibus principatum obtinentibus, mediocritatem participabunt: verum etiam excrementa Cerebri, quæ per palatum, aures, nares, & oculos expurgantur, modicè quoque se habebunt, atque ab extrinsecis alterantibus illud vel minimum, vel nullatenus lædetur.

At hic illicò insurgit gravis in Galeno difficultas, eaque est, quid ipse intelligat per moderatam, bonamque Cerebri temperaturam, cum cæteroqui idem Author i. de temperam. cap. ultim. Cerebrum doceat frigidum, humidumque esse. Ad quam tamen dicimus, intellexisse Galenum iustitiam, quæ nimirum talis est, qualis congruit exigentiæ Cerebri, cujus ope optimè ipsum operatur: vocasse autem Cerebrum frigidum, & humidum, non absolutè, sed respectivè ad cæteras partes Corporis longè calidiores: Cum enim Cerebrum præ reliquis partibus debilius sit, propterea frigidum, id est minùs calidum, quàm sint reliqua viscera, à Galeno appellatur; Vel etiam dicas, considerari hoc loco à Galeno moderatam Cerebri temperaturam, tanquam regulam, & exemplar cæterarum temperierum, cui quò magis accedunt, & conformantur, eò etiam meliores erunt; quò verò magis recedunt, & difformantur, eò pejores, insalubrioresque dicuntur. Atque hinc idem Galenus hoc eodem libro temperatam, moderatamque temperaturam assimilat Statuæ Polycleti, in qua nullus excessus, aut defectus inerat.

Ulteriùs retulerat suprà, inter alia indicia Cerebri, Capillos, nunc illorum

variā habitudinē examinans, considerat primū eos in temperatis, & inquit: talibus, idēst temperato Cerebro præditis, Capilli accidunt in Infantia quidem subruſi, in Pueritia subflavi, in Adoleſcentia denique, & Jūventute flavi fiunt, quique mediū quoq; erunt inter Crīſpos, & Simplicēs, nec demū Calvitium faciliē patiuntur.

Mutantur autem Capilli in ætatibus tres ob cauſas, quæ generationi Capillorum communiter attribuuntur, nempe ob temperiei, & præſertim caloris mutationem, cutis, & fuliginosī excrementi variationem. Calor ſiquidem licet in prima ætate multus ſit, non tamen eſt vegetus, eò quòd ab humiditate illius ætatis aliquantulū retundatur: quia verò progreſſu ætatum partes corporis magis, magiſque conſolidantur, denſanturque, atque ideò tanta humiditas abſumitur; propterea fit, ut calor vegetior obſervetur, atque adeo fuligo, quæ materia eſt Capillorum, conſiſtentior, & aduſtior fiat. His accedit cutis, quæ pari ratione propter ætatum mutationem, magis conſtipatur, denſatur, & ſiccior fit; unde non mirum, ſi Capilli ſimiliter tractu temporis mutantur, & qui primū tenuiores, molliores, laxioresque erant, ac ſubruſi, fiant deinde craſſi, duriuſculi, & ſubflavi. Poſtremò in jūventute duriores, craſſiores, & flavi obſervantur, quoniam per ætatis mutationem calor auctior, cutis denſior, & fuligo craſſior evadit.

Sed hīc de Coloribus, eorumque origine, & natura nonnulla in medium afferamus. Vulgò in Scholiſ fertur, colores eſſe ſecundas qualitates, quæ ex primis emergunt. Sed nunquam ab his explicari potuit, quænam qualitas exuberet in albo, & quæ in nigro colore, cæteriſque. Dantur enim alba Corpora, ut Gypſum, Ceruſſa, Camphora, Nix, Margaritæ, Coralia, & tum quæ alba ſunt, tum quæ rubra in calcem, vel pollinem redacta, &

alia hujus generis innumera, quæ communiter frigida dicuntur; alia verò plurima, tametſi alba ſint, calidiſſima obſervantur, ut Arſenicum, Sublimatum, Calx, Allium, Cēpa, & ſimilia. Sic pariter multa nigrum colorem referentia exiſtimantur frigida, ut Caſſia, Succus Acaciæ, Pruna, Lutum, Lydius Lapis, Fæx ſanguinis, ſeu melancholia dicta, Capilli, & cætera plura: alia multa calida ponuntur, ut Opium, Piper, Caryophylli, Atramentum ſcriptorium, præcipitatum nigrum, atque inter humores Atra bilis. Eodem modo ex flavis recensentur frigida, Santalum citrinum, Terra Armenia, flores Nymphææ luteæ; itemque calida, ut Rhabarbarum, Aloe, Cortices Aurantiorum, & Citriorum, Sulphur, Bilis flava. Ex rubentibus demum (ut alios colores brevitatē cauſa omittam) calida ſunt, Ignis, Oſtrum, Sanguis, Cinnabaris; frigida ex adverſo, Coralia, Santalum rubrum, Roſæ, &c. Itaque velle ex primis qualitatibus colores deducere, vanum omninò putandum eſt.

Rationabiliùs exiſtimant Optici, & cordatiores Philoſophi, colores à lumine diverſimodè reflexo, vel refractō, adeoque cum umbris corporum intermiſto, ac modificato exoriri. Cujus ſententiæ ex Antiquioribus fuerunt Alhazenſ in ſua *Optica*, Avicenna *lib. 6. naturalium part. 3. cap. 1.* Avēmpaces apud Averroem *2. de anima comment. 67.*, & Beatus Albertus Magnus in *ſumma de homine, peculiari quæſtione de natura colorum*. Hoc idem ſenſiſſe videtur Ariſtoteles *lib. de ſenſu, & ſenſili cap. 3.* ubi colorem definit, extremitatem perſpicui, idēſt luminis, in corpore terminati. Et *lib. 2. de anima text. 67.* colorem appellat motivum perſpicui in actu, quod nonniſi lumen eſt.

Suffragantur hiſ experimenta. Vitreo namque Priſmate ante oculos appoſito, intuemur objecta diverſimodè colorata, prout

prout lumen in illo diversimodè infrangitur. Id ipsum etiam experimur in Iride, in collo Columbæ, in Mari, in Nubibus, in Eclypsibus luminarium, aliisque similibus, diversimodè à lumine intermixta umbra illustratis. Sit insuper cubiculum aliquod undiquè occlusum, & obtenebratum, habeatque ex directo duorum parietum, vel duarum fenestrarum oppositarum, duo foramina, per quæ lumen Solare transeat, & qua ratione per unum foramen cubiculum ingreditur, eadem per alterum foramen egrediatur: Si oculus ex obliquo positus intra cubiculum respiciat objecta, illa minimè colorata videbit, et si lumen Aerem in cubiculo contentum trajiciat, & illustret; videbit autem eadem, si lumen ex uno foramine admissum terminetur ad parietem, aliudve corpus intra cubiculum existens. Hinc motus ingeniosissimus Cartesius in sua *Dioptrica*, adhibito ad fenestræ foramen oculo Bovino, invenit qua ratione prætereuntia per viam corpora possint intra clausum cubiculum videri, cum iisdem omninò circumstantiis, motibus, coloribus, & similibus. His accedit, quòd oculus in tenebris positus videt objectum illuminatum; si verò sit in Aere illuminato, neutiquam videre poterit objectum in tenebris existens.

Sunt qui distinguunt colores in Reales, & Apparentes: hosque à lumine quidem haberi dicunt; illos autem rebus inesse. Sed nulla ratio suppetit, ut hanc diversitatem in coloribus re ipsa admittamus; cum cæteroqui communis habitudo, & apparentia in utrisque sit. Sola autem differentia erit in eo, quòd in coloribus, Realibus dictis, diuturnior permanensio, in Apparentibus verò brevior, seu fugacior habeatur: quod provenit ex dispositione partium, seu superficierum objectorum visibilium: si enim hæc uniformem, & æqualem superficierum habitudinem sortita sint, uniformem quoque luminis reflexio-

nem efficient, adeoque eundem semper colorem exhibebunt; si verò difforme in, & inæqualem, varietatem ostendent. Verum ut res hæc meliùs intelligatur.

Sciendum, tria in universum requiri ad colorum varietatum efformandam, nimirum habitudinem, seu texturam variam corporum visibilium; diversam luminis reflexionem, & cum intermixtis umbris modificationem; & demum situm varium oculi videntis. Cum corpora tersa sunt, ac polita, ut lumen intrà se non admittant, sed omninò ad eundem angulum reflectant, quia illud resiliens fulgorem veluti in Aere excitat, & multa luce oculum premit, specularem splendorem exhibent, ut in polito Clypeo est observare, etiam si ob chalybis exiguorum pororum multitudinem videatur nigrorem præferre. At si ea sit corporum superficies, ut radii luminis reflectantur quidem omnes, sed perturbatè, & non ad eundem angulum, albus color exurget. Demùm si corpora lævigata non sint, sed porosa multum, aut excavata, ita ut lumen minimè resiliat, sed quodammodò intromissum poris illud excipiant, nullus color, si ve nigror emerget, etiam si albo corpore sint interiùs illita. Sic paries dealbatus, frequentioribus tamen foraminibus excavatus, candorem non manifestat: parietes ipsi licèt æqualiter dealbati, nisi à lumine æquè illustrentur, nec albi æqualiter apparebunt, sed alter altero albicantior, vel contrà ad fuscum magis inclinans, prout lumen vel directè magis, vel reflexè, subibit. Hoc idem ostendunt vestes sericæ diversorum colorum filamentis intertextæ, ac versicolores appellatæ: hæc namque ab uno situ spectatæ unum exhibent colorem, ab alio, alium, & quidem varium, à varia dispositione intertextorum filorum, atque incidentis, & deflectentis luminis. Idem est experiri in depictis telis varicoloribus, diversimodè ad lumen expositis. Ita quoque

que ligna E.g. quæ primò viridia, aut fusca videbantur, aliter, aliterque colorata conspiciuntur, cùm carbones fiunt, cùm comburuntur, & vertuntur in cineres.

Quæ igitur corpora visibilia non tam facile partium texturam mutant, difficile etiam colorem variant, & è contrà. Quo fit, ut parietes, panni linei, lanei, ferici aliaque similia, quæ facilius in superficie mutationem subeunt, promptius quoque in colore mutantur: lapides verò pretiosi, crystallus, vitrum, marmor, aliaque huiusmodi semper eundem colorem referunt, utpotè quorum superficies immutari nequit, & si à supervenientibus quibuscumque corporibus ea inficiatur, facile ob lævorem detergitur. Et hæc breviter de Coloribus dicta sunt.

Præter colorum varietatem addidit Galenus in textu, Capillos in temperato capite medios esse inter crispas, & simplices, nec facile calvitium subire. Hinc videamus pariter, unde Capillorum crispitudo, & mollities, itemque calvitium contingat.

Capillorum crispitudinem retulit Aristoteles 5. de generatione Animalium cap. 3. ad duo, videlicet ad meatuum tortuositatem, & ad siccitatem terrestrem materiæ fuliginosæ; cui consentit Galenus 2. de temperamentis cap. 5., ubi ob siccitatem, pilos igni admosos statim intorqueri existimat; capilli enim cùm ab exhalationibus terrestribus, & siccioribus generentur, ab ambiente calido contorquentur, quoniam modica humiditas, quæ in illis est, facile absumitur, ideòque Capilli inflectuntur, & crispi fiunt; qua ratione Æthiopes crispas capillos habent; Poloni verò, Novergi, alique Zonam frigidam incolentes, tenues, longos, molles, & simplices gestant. Unde deducitur, quòd quemadmodum crispitudo capillorum siccitatem, caliditatemque arguit, sic è converso laxitas, & mollities

frigiditytem, humiditatemque designat, ratione scilicet illius excrementi, ex quo progignuntur.

De Calvitio insuper docet idem Aristoteles citato 5. de generatione Animalium cap. 3. quòd Capitis siccitatem indicet, ejusque humiditatis defectum; exemplo à plantis desumpto, quæ tunc defrondescunt, cùm humore privantur. Addit tamen Galenus 2. de temperamentis cap. 5. conferre ad Calvitium, durioris cutis constitutionem, quæ nimirum in tempestivè extenuetur, & arescat, adeoque vaporosa fuligo deficiat, porique constipentur. Atque hinc in plantis pedum, & volis manuum pili nullatenus enascuntur, quoniam ibi cutis densior, & compactior est. At plures alias Calvitii causas addit Avicenna 7. 4. tract. 1. cap. 2. nempe materiæ defectum, cutis duritiem, & siccitatem, meatuum laxitudinem, & exhalationem acrem, ac erodentem; quamvis hæc ultima causa potius pertineat ad morbum, quàm ad ætatum mutationem. Verius tamen tot esse possunt Calvitii causæ, quot sunt requisita ad capillorum generationem. Tria autem in universum ad hanc requiruntur, videlicet calor, tanquam causa efficiens, ac extenuans humorem in capillos commutandum: fuligo ipsa excrementosa, tanquam materia, & cutis porosa, tanquam subjectum, & locus. Quotiescumque igitur conditiones istæ vel deficiunt, vel depravantur, capilli vel non gignuntur, vel nati decidunt. Itaque si calor sit urentior, vel debilior, cutis rarior, vel constipatior plus justo, & fuliginosa materia, vel debito tenuior, & acrior, vel ex adverso crassior, & compactior, Calvitium sequitur, ut latius alibi ostendimus.

Adjicit in textu Galenus, signa antedicta, atque inferius dicenda accipere oportere in habitationibus locorum temperatis: Etenim si quis moderata temperie

gaudeat, sed regiones inhabitet calidiores, vel frigidiores, aut se exponat ambienti intemperato, procul dubio declinabit ab indiciis supra traditis de moderata temperatura. Plurimum namque valet Coeli clementia, vel inclementia, variusque situs illius ad permutandas nedum temperaturas, verum etiam mores, & corporum constitutiones; Atque hinc experimur albicante cute, & roseo colore decoros, si diutius Soli exponantur, nigrore cutis infici, cum duritie, & asperitate; contra verò Rura incolentes, si deferantur in Urbes, ibique diutino tempore immorentur, albidiores, molliores, minusque asperos evadere. Sed & præter bonam habitationem conferet quoque in idem ciborum delicatiorum usus, ut addit etiam *hoc eodem libro Galenus*, de qua re fusiùs infra.

Non tamen hinc quis deducat, supervacaneam esse humorum in Corpore prædominantium considerationem ad dignoscendas Cerebri temperaturas. Siquidem non solum locorum temperiem, sed etiam humorum naturam, & conditionem, in Corpore prædominantium, ad eundem finem commemorat Galenus: etenim Capilli ex humorum fuliginibus oriuntur; ut propterea juxta varietatem eorundem, Capilli quoque varietatem fubeant, coherenter communi Medicorum assertioni ex Galeno desumptæ: *Qualis humor abundat in Corpore, talis color apparet in cute.*

Demum claudit Caput hoc Galenus referens breviter cæterarum Cerebri temperierum à mediocritate recedentium indicia, & inquit, in Cerebro calidiori, cum magno recessu, allata indicia esse validiora; cum modico verò recessu, imbecilliora: quam regulam intelligendam quoque subdit in reliquis omnibus partibus, quarum temperaturarum indicia tradenda sunt; ut infra.

CAPUT VIII.

XIV. in Galeno.

Signa calidi Cerebri.

T E X T U S.

(T. 21.) **D**Einceps igitur signa Caliditatis Cerebri præter ea, quæ nuper diximus, sunt, quod ea, quæ circa Caput omnia rubicundiora, & calidiora, & quæ in oculis venæ magis sensui patent. Capilli quoque in his geniti celeriter in capite proveniunt, & cum plurimum in caliditate à mediocri temperatura recesserint, nigri, & robusti, & crispi fiunt: cum verò non multum, subflavi quidem ab initio fiunt, deinde nigricant, ac progredientibus ætatibus calvitium patiuntur, atque eò magis, qui plus modico sunt calidiores. Excrementa verò, quæ per palatum, & nares, & oculos, & aures pauca, & concocta ipsis existunt, cum integram habuerint sanitatem: Cum verò eis Caput repletur, continuo enim, ac tum præsertim cum nullam victus servaverint rationem, tale quid eis accidit: plura quidem in ipsis excrementa, sed non concocta generantur, implenturque, atque aggravantur eorum Capita à calidis cibis, & potibus, odoribus, atque hisce omnibus, quæ extrinsecus occursant: in quorum numero est, & qui nobis circumfunditur aer. Sed præterea magis, si non solum natura calida, sed etiam humida Corpora extiterint. Brevibus autem somnīs hujusmodi temperaturæ contentæ sunt, neque admodum profundis.

P A R A P H R A S I S.

Postquam indicia temperatæ Cerebri constitutionis retulit Galenus, prosequitur calidioris Cerebri temperiæ signa

signa recensere. Quoniam verò per recessum à moderamine, & ab optima temperatura, poterant omnes qualitates excedere, & tum Simples, tum Compositæ, propterea memorat indicia primùm singularum qualitatū excedentium, deinde signa qualitatū compositarum: factoque initio ab excedente caliditate, tradit plura signa temperamenti calidioris. Primùm enim inquit, ea, quæ circa caput sunt, omnia rubicunda, & calida magis apparere. Secundò venas in oculis, & facie patentiores esse. Tertiò, Capillos mox statim ab ortu generari. Quartò, eosdem fieri nigros, robustos, & crispas, si tamen calor plurimùm recesserit à mediocritate; si verò non multum, primò subflavos, deinde nigricantes observari; ita tamen, ut majorem calorem ostendant Capilli nigri, quàm subflavi. Quintò, in progressu ætatum calvitium subire, & eò magis, ac citius, quò calor fuerit intensior. Sextò, excrementa ex palato, auribus, naribus, & oculis prodeuntia modica esse, quin etiam maximè concocta, si in cæteris tales homines integram sortiti fuerint sanitatem, sin secus non concocta, sed cruda apparebunt, & Caput excrementis implebitur: idque præsertim, si rectam vivendi rationem minimè servaverint. Septimò ex nimio cibo, vel potu, potissimùm calorifico facile eorum Capita gravari, præcipuè verò ab odoribus acutis offendi, itemque ab iis; quæ extrinsecus ad calidum alterare valent, ut & Aer calidus, æstivus, & austrinus, eòque magis, si calido humidum jungatur. Denique in his somni erunt breves, nec admodum profundi. Allata autem indicia, non distributivè, & singulatim accipienda sunt, sed conjunctim, sive, ut Græci dicunt, in Sydromen; tum quia seorsim sumpta fallacia forent, tum quia multa ex enarratis, non magis Cerebri, quàm alterius cujusvis Visceris, ca-

lidam temperiem possent designare. Hinc rubor faciei, venarum ocularium inflatio, & Capillorum nigrities, Sanguinem solummodò calidiorem arguunt, quo non magis Cerebrum, quàm reliqua Viscera ad calidum alterari possunt.

At unde allata hæc indicia in Sydromen accepta calorem in Cerebro excedentem significant; Ratio diversa refertur, pro illorum varietate: licet in universum facilius, & congruentius ad Sanguinis conditionem revocari debeant. Equidem facies, & ea, quæ circa Caput sunt, rubicunda apparebunt, quoniam Sanguis, unde rubor, & vigor exurgit, tenuior, ac floridior est, adeoque partes Capitis, & faciei cutim, roseo, sanguineoque colore perfundit. Eadem ratione circumjacentes Capitis partes calidæ magis observantur, quoniam universus calor in Animalibus, nonnisi à Sanguine promanat: cumque hic per angustas, & exiles Meningum Cerebri venulas, atque arteriolas excurrentes, præ sui volatilitate, floriditateque fermentescat magis, atque vi elastica turgeat, proindèque latius spatium exquirat, propterea non mirum, si per eas partes calorem solito majorem concitet, & inferat. Cur autem potius in his, quàm in aliis partibus Corporis calor iste manifestetur, ratio petenda erit ex propria, peculiarique Capitis, & Cerebri, eorumque partium constitutione: Siquidem licet Sanguis universas partes Corporis irriget, foveat, & calefaciat, si tamen istæ aliqua ratione ipsum melius repurgent, vel ob latiores venas, arteriasque in ampliori spatio excipiant, atque in suis meatibus, ac poris admittant, aut aliter, aliterque propter alios liquores ibidem ingenitos, vel aliunde confluentes, quos fermenta partium vocant, temperent, aut infringant, temperatiorem calorem ostendent: quòd si contrà acuant, & in sensibiliorem fermentationem promo-

veant, intensiorem calorem subibunt. Sic hypochondriaci in seipsis experiuntur, Chylum, & Sanguinem præterfluentem per viscera imi ventris, veluti fervorem excitare, indeque totum Corpus æstuationibus cruciari: sic nonnulli alii de Renum, & Lumborum calore nimium fervente conqueruntur: alii de Stomachi ardore, & alii de Thoracis, & Cordis æstu. Contrà verò in aliis, quibus contraria contingunt. Eandem ob causam accidit, quòd venæ Oculorum, & Faciei patentiores sint, quoniam in his Sanguis fervidior cum sit, facilèque fermentescens, Venas proinde, & Arterias eundem continentes fortè natura latiores efficit: quas si fortasse angustiores, vel compressiores fieri contingat, circulans per ipsas Sanguis vim patitur, sui que expansione easdem dilatans, & turgidas, conspicuasque reddens ruborem procreat, nisi tamen in apicibus, & oscillis aditum sibi faciat: Hinc pariter pulsus majores, ac validiores fiunt, cum manifesta arteriarum tumefactione. Quamobrem ubi Sanguis vegetior est, calor exuperat, & arteriæ, ac venæ necessariò latiores erunt, adeoque pulsationes, quæ exinde proficiuntur, vehementiores observabuntur.

Capilli præterea mox ab ortu generantur, quoniam ex superius dictis, utraque causa ad illorum generationem concurrans, efficiens scilicet, & materialis, statim à nativitate viget; proindeque non solum promptè comparebunt, sed etiam nigri: siquidem fuligo, quæ materia illorum est, à vegeto calore uritur, & rarefcit, eòque magis si conjungatur siccitati: hoc est, si humiditas, quæ alborem in illis infert, deficiat, aut absumatur. Addit tamen Galenus, calorem solito acutior nigrætiem progignere, remissiorem verò flavedinem; quamobrem à Medicis nigrorum capillorum generatio ad humorem atrabilarium referri solet; flavescen-

tium verò ad biliosum. Similiter robusti, & crispi fient à calore intensiori, qui à parte sanguinis floridiori exoritur, sicut ex adverso molles ab humiditate, seu à parte sanguinis glutinosiori, pari ratione, ut ex dictis patet.

A calore insuper excedente siccitati conjuncto accidet quoque Calvitium, tum quia fuligo plus justo extenuatur, & evanescit; tum etiam quia pori Cutis magis rari, & patuli fiunt; tum demum, quia acres humores ex tali temperamento designantur, unde sequitur veluti in eorundem radicibus extenuatio, & erosio: eò autem citius, & efficacius ista evenient, quò calor acutior, atque intensior fuerit, à conditione Sanguini, & primis particulis insita.

Excrementa insuper palati, oculorum, aurium, nariumque modica erunt, & concocta, quoniam ob excedentem calorem exiccantur, & crassescunt, cum ex Aristotele, coctio à calore procedat, propriumque caloris esse dicatur, attenuare, concoquere, atque superfluum humiditatem absumendo, reliqua cogere, & conterminare. Addit tamen Galenus, quòd hæc ita erunt, si integra sanitate homo de cætero fruatur; sin secus, licet modica sint, erunt tamen haudquaquam concocta, & caput excrementis implebitur, quoties præsertim errorem in victu ipse commiserit: siquidem tunc excrementa vitio Ventriculi cumulata, & majori ex parte in Caput translata, ejus venas, atque arterias opplent, & Cerebrum aggravant.

Idem etiam accidit à nimio cibo, potuque præsertim calidiori, aut ex aromatibus confecto, hæc enim facillimè Caput petunt, & Cerebrum conturbant. Ab odoribus quoque, eadem de causa, promptissimè offendetur, sicut pariter ab iis omnibus, quæ ad calidum alterare valebunt, ut Aer æstivus, & austri-

nas, documento Hippocratis 3. aphor. 5. ubi dicitur, *Austri Caput gravant, &c.*

Denique somni breves erunt, nec admodum profundi, aut quia Somnus ex sententia Aristotelis, ejusdemque Galeni, fit refrigerato, & humectato primo sensiterio, idest Cerebro, quod cum in his calidius sit, & siccus, nequibit longiori somno sopiri: aut quia potius ubi Sanguis acrior est, & tenuior, biliosus dictus, ibi somnus vel nullus, vel brevior fit: aut etiam, quia ex Sanguine tenuiori, spiritus tenuiores, agilioresque progignuntur, qui præ sua mobilitate Cerebrum undequaque pervadunt, nec sinunt ejus porositates rorida, humidaque substantia convenienter perfundi, & irrigari, atque adeò quiete sopiri, quæ somnus est. Hinc experimur vigiles eos omnes esse, qui calidi, gracilesque sunt; somnolentiores verò ex adverso, qui humidi, atque obesi. Sic pariter alimenta, quò vaporosiora sunt, eò promptius, & efficacius somnum afferunt.

Unum superest nunc discutiendum ad integram hujus Capitis explanationem, idque est: cur Galenus dicat Caput calidius facile ab odoribus præsertim acutis, necnon à cibis, potibusque calidis gravari, sicut pariter ab aere, cæterisque causis calefacientibus extrinsecis, cum potius ab illis deberet, ex natura calidorum, dissolvi, & attenuari: quæ enim gravant, opplent; at calida non opplent, sed calefaciendo dissolvunt, & extenuant. Accedit, quòd odores sunt objecta olfactus, quare vix videntur nares prætergredi, potissimum ex sententia Aristotelis 2. de Anima text. 97. & libro de sensu, & sensibili cap. 5. Sed & odor consistit in exhalatione sicca, unde res odorabiles ad ignem expositæ statim extenuantur, atque in auras abeunt.

Ad quod tamen dicimus, alimenta calida, potum, & similia Cerebrum lædere, quia illud calore magis afficiunt: sub quo sensu intelligendus hoc loco Galenus memorans læsionem Cerebri à consimilis qualitatis alteratione. Quòd autem dicat, ab his etiam magna ex parte gravari, id accidit, quia ejusmodi cibi, & potus calorem præferentes, vapores plurimos ad Caput per Sanguinem emittunt, unde illud gravari contingit. Quamvis insuper ex doctrina Aristotelis Nares dicantur sedes Olfactus, communior tamen sententia Anatomicorum processus mammillares statuit; quin Galenus libro de olfactu, etiam ad Cerebrum, & ad primores ventriculos extendit, argumento deducto ab exemplo cujusdam, qui assumpta per Nares nigella, Cerebrum vellitari, & morderi persentiit; unde haud perperam opinatus est etiam ad Cerebrum acutorum Corporum particulas, licet crassiusculas, pertingere posse. At quamvis Cerebrum minimè pertingant, adhuc tamen gravare illud possunt halitu tenuissimarum particularum per processus mammillares ad Cerebrum delato: qua ratione comperimus plurimos à rebus odoris capite dolere, non alia sanè ratione, nisi quia acuti, & tenues halitus facillimè quamcumque substantiam pervadunt, præsertim verò Cerebrum sua natura molle, & porosum. Reliqua patent ex dictis.

CAPUT IX.

XV. in Galeno.

Signa frigidi Cerebri.

T E X T U S.

(T.22.) **F**rigidioris verò, quàm oporteat Cerebri indicia sunt, plura in propriis meatibus excrementa, & capilli recti, & rufi, & stabiles, & qui longo post nativitatem tempore nascuntur, tenues, atque ab initio malè nutriti; & facile à causis frigidis offenduntur, atque hoc ipso offensionis tempore distillationibus, & gravedinibus capiuntur: neque si tetigeris partes ad Caput attinentes, admodum calidæ sentiuntur: neque si inspexeris, rubicundæ apparent, & oculorum venæ omninò visum effugiunt, & somnolentiores quodammodò sunt.

P A R A P H R A S I S.

Post Calidioris Cerebri temperaturam, prosequitur Galenus referre indicia Temperiei Cerebri frigidioris, atque plura quoque ad illam dignoscendam affert, desumpta pariter ex iisdem fontibus, quorum in Cerebro calidiori meminerat. Primùm autem excrementa inquit, in propriis meatibus plura cumulari. Secundò, Capillos rectos, & rufos nasci, itemque stabiles, & qui longo post nativitatem tempore nascuntur, tenues, & ab initio, sive prima ætate malè nutriti. Tertiò, à frigidis alterantibus facile offendi, adeòque distillationibus, & gravedinibus corripì. Quartò ad tactum partes externas Capitis minimè calidas persentiri, minimèque rubicundas apparere. Quintò oculorum, & faciei venas visum effugere, utpotè nimium exiles. Sextò somnolentiores quod-

ammodò esse, qui eo temperamento sunt præditi. Quæ Signa ex superiùs probatis facilè rationibus consona ostendi possunt. Siquidem cùm Cerebrum ad frigidum inclinat, proculdubio excrementa narium, aurium, oculorum, & palati copiosiora erunt: nam quemadmodum calor extenuat, & dissolvit; ità frigus è contra condensat, & multiplicat, & ubi concoctio, ac nutritio calore fovetur, contrariis ex causis torpet, & languescit, cùm Cerebri temperies à Sanguine minùs vegeto procedit.

Capilli insuper recti, & rufi erunt, nec non stabiles, ac firmi, qui scilicet calvitio obnoxii non sint, quoniam effectus frigoris est fuligines delaxare, cum in radice capillorum adstringere, ideoque calvitium impedire. Tardè autem capilli, & pili nascuntur, quoniam causa efficiens, nempe calor, languidus est: eruntque tenues, & malè nutriti ob defectum fuliginosæ materie.

A frigidis causis facillimè Caput offendetur, quia nulla, vel levis aderit resistantia ex parte caloris, ac vividæ Sanguinis substantiæ: unde quemadmodum calidius Caput ab Aere, cæterisque calefacientibus offenditur, ità ex adverso frigidum à frigidis.

Eadem ratione, subdit, ex quacunque levi causa affectiones catarrhales patietur, quamobrem obnoxium erit distillationibus, & gravedinibus, ob facilem pituitosi, & incrementis humoris delapsum ad nares, & os.

Venæ, & Arteriæ, utpotè exiles, vix apparebunt, quoniam à frigore, seu inertiori sanguine, amplificari non possunt: rubicundus color, qui à vegeto Sanguine exoritur, nullus erit, quin potius albicans apparebit; Hinc partes externæ frigidæ etiam ad tactum observantur, vel cum minimò calore, præsertim in hyeme.

Postremò frigidò Cerebro præditi, somnolentiores erunt, ob rationem superiori Capite allatam. Usus tamen est Galenus particula, *quodammodò*, ut nimium designaret, non simpliciter, & gravi sopore illos tentari, quemadmodum evenit frigidis, humidisque plus iusto, videlicet à causa morbosa, sed solùm comparatè ad præcedentem Cerebri temperaturam calidiorem. Cæterùm, quæ pro calidiori Capite antea dicta sunt, ex conditione, & diathesi Sanguinis vividioris, floridiorisque, ad frigidam ejusdem temperaturam explicandam, si ex adverso referantur, optimè, ac brevissimè, memorata signa in commodiorem sensum explanata intelligentur.

CAPUT X.

XVI. in Galeno.

Signa sicci Cerebri.

TEXTUS.

(T.23.) **S**iccioris autem Cerebri indicia sunt, *meatus superfluitatibus carentes, & sensuum perspicacitas: sunt autem ad vigilias prompti, & capillos habent robustissimos, & qui celerrimè eis genitis innascuntur, crispì autem potius sunt, quàm recti; citò autem calvi fiunt.*

PARAPHRASIS.

Sicut calidioris, & frigidioris Cerebri indicia antea retulerat Galenus, ita nunc Cerebri sicci signa memorans, inquit illa esse, parcitatem affluentium superfluitatum, sensuum perspicacitatem, promptitudinem ad vigilandum, capillos robustos, celerem eorundem generatio-

nem, crispitudinem, & citam denique calvitiam.

Quòd excrementa in his pauca sint, patet; siquidem siccitas serosas superfluitates absumptas indicat. Sensuum perspicacitas aderit, quia ubi sensus ab excedenti humiditate hebetantur, istius penuria, seu siccitate, necesse est exacui, & perspicaces fieri; neque solùm in sensibus externis, sed etiam in internis. Vigilia potius vigeat, quoniam defunt humores, qui Cerebrum humefaciendo, & irrorando ad soporem disponant. Capilli robusti fient, ratione siccioris fuliginis, è qua illi progignuntur, & non secus, ac mollities ab humiditate, ita durities, & crispitudo à siccitate provenire dicitur. Denique Calvitium citò apparebit, tum quia fuliginosa materia progressu ætatum magis attenuatur, & absumitur; tum etiam, quia à nimia humoris inopia radices capillorum sterilescunt, ut in plantis experimur. Quæ omnia cum ex supradictis clarissimè pateant, ulteriùs examinanda non sunt.

Solùm addam, siccitatem hoc loco memoratam revera non aliundè provenire, quàm à defectu humoris, seu serosæ humiditatis cum sanguine commixtæ, & per iteratas circulationes à sanguine in glandulis secretæ, quæ cum multa fuerit, & excedens, humidiorē constitutionem ingenerabit; cum verò parca, aut diminuta, sicciorē Corporis, & consistentiorē partium habitudinem efficiet. Nam, ut alibi ostensum est, vigent in sanguine plures particularum habitudines, illum vel ad hanc, vel ad aliam diathesim, seu constitutionem disponentes; potissimum verò sensibilior, ac manifestior duplex in eodem observatur, altera vivificans, & partes roborans, adeoque calefaciens, altera nutrimentum, & augmentum præbens, proindèque auctifica appellata. Quò ergo una, vel altera ex his

in sanguine prævaluerit, eò robur, & calor magis, vel contrà frigus, sive potiùs calor minor, & remissior in partibus persentietur; indeque nutritio, & humefactio à prævalente portione auctifica, sicut etiam serosa, & lymphica sensibilibior observabitur: & qua ratione per ætatum mutationes, istæ aut prævaluerint, aut deficient, eadem mutationes in individuïs exorientur, vel ad unam, vel ad aliam habitudinem inclinantes, ut ex traditis speculanti palam fiunt. At verò mutationibus hisce plerumque adjiciuntur aliæ ex adventitiis, atque extrinsecis causis fortè fortuna provenientes, & ex continuato earundem causarum usu æconomiam Corporis permutantes, de quibus non est hujus loci pertractare.

CAPUT IX.

XVII. In Galeno.

Humidi Cerebri indicia.

TEXTUS.

(T.24.) **H**umidioris verò Cerebri indicia, Capilli plani, & nequaquam calvi fiunt, sensus autem turbulenti, & excrementorum multitudo, somni multi, atque profundi. Et hæc quidem simplices sunt intemperaturæ.

PARAPHRASIS.

Ponuntur hujus intemperiei signa, Capilli plani citrà calvitium, sensus turbulenti, excrementorum copia, somni multi, ac profundi: quæ sanè ex nuper dictis clara sunt. Alia plura indicia patebunt ex inferiùs dicendis, de reliquis Cerebri compositis intemperiebus.

CAPUT XII.

XVIII. In Galeno.

Signa calidi, sicciq; Cerebri.

TEXTUS.

(T.25.) **C**omposita autem primùm calida, & sicca, secundùm quam & superfluitatibus carent, & sensibus vigent, & plurimùm vigilant, & citò calvi fiunt. Et prima quidem Capillorum generatio celerrima est, ac plurimò abundans alimento. Capillos verò habent nigros, & crispis, & tangentibus Caput calidi sentiuntur, & sunt rubicundi usque ad ætatem consistentiæ.

PARAPHRASIS.

Amplicibus Cerebri intemperiebus pergit Galenus ad compositas, & primùm calidioris, ac siccioris indicia tradit, ab eisdem Capitibus deprompta, nempe à defectu superfluitatum, seu excrementorum: à sensuum vigore, & acutie: ab immodica vigilia: à citò, & facili calvitio: à celerrima Capillorum generatione: à Capillis nigris, & crispis: à sensu tactus calidiori in partibus Capiti adjacentibus; à rubore earundem, & præsertim faciei, usque ad ætatem consistentiæ, sive, aut alii exponunt, usque ad summum vigorem Juventutis, puta ad annum trigessimum quintum, aut paulò ulteriùs, quo tempore homo perfectus evadit, tam in incremento Corporis, quàm in operationum omnium præstantia.

XIX. in Galeno.

Signa calidi, & humidi Cerebri.

TEXTUS.

(T.26.) **S**I verò humiditas adjungatur caliditati parum utriusque qualitatibus superantibus mediocritatem, color bonus, & calor, & oculorum venæ magnæ, & plura excrementa, & mediocriter cocta, & capilli recti, subflavi, & non facile calvi fiunt. Implentur verò, atque aggravantur eorum Capita à calidis: at si humectentur, tunc multò magis excrementorum habent multitudinem: Et si plurimum caliditas, atque humiditas creverit, his Caput agritudinibus est obnoxium, atque excrementis abundans, & quod facile à calefacientibus, atque humectantibus offendatur. Auster verò semper eis adversatur, atque optimè in Aquilone se habent: non tamen diu vigilare possunt, & cum se ad somnum converterint, simul gravi somno, hoc est Comate, tentantur, & vigilant, & somnia habent imaginationibus plena; visus eis turbulenti, neque satis sensibus vigent. Quòd si multum in caliditate Cerebrum à mediocritate recesserit, paululum autem humidius extiterit, calidæ temperaturæ indicia quidem superabunt, cum quibus levia quædam humiditatis signa conjungentur: veluti si longè quidem humidius, paulò verò calidius, vehementia quidem erunt, ac manifesta humiditatis indicia, debilia autem caliditatis. Communis verò hæc ratio in omnibus compositis intemperaturis existit.

PARAPHRASIS.

CAlidæ, humidæque temperiei indicia duplicia facit: & quidem si ca-

lor, & humiditas parum à mediocritate recesserint, inquit, signa esse, bonum, & floridum colorem faciei, qui mixtus ex rubro, & albo est, ob sanguinis abundantiam, & floriditatem, ut idem Galenus docet *lib. de constitutione Artis*: Secundò, calorem sensibilem circa oculos, faciem, & tempora. Tertiò oculorum venas magnas, & latas apparere. Quartò excrementa esse aliquanto majora, quàm in calido, siccoque Cerebro, nec non mediocriter concocta. Quintò capillos rectos, ac subflavos esse: rectos quidem ex humiditate, cum crispitudo à siccitate proveniat; subflavos verò à caliditate temperata, propter adjunctam humiditatem, cum ex superius dictis, tunc calor nigros capillos reddat, cum urgentior est, & siccitati conjunctus. Sextò, non facile calvos fieri, retusa scilicet caliditate ab adjuncta humiditate, cum calvitium ex doctrina Hippocratis 6. *epid.* 3. *text.* 1. atque ex supra traditis, potius à siccitate dependeat. Septimò, lædi à causis calidis, humidisque, potissimum ab Aere vaporoso, & Austrino.

Quòd si excessus caloris, & humiditatis supra mediocritatem multus sit, intra latitudinem tamen sanitatis, tunc Cerebrum obnoxium erit agritudinibus, præcipuè verò distillationibus, & catarrhis, atque excrementis insuper ejusdem conditionis abundabit, facileque lædetur à calefacientibus, & humectantibus, itemque ab Australibus ventis quàm maximè offendetur; juvabitur verò ab Aquilonaribus, consumpta nimirum superflua humiditate. Insuper qui calido, humidoque excedenter Cerebro sunt præditi, diu vigilare nequeunt, semelque in somnum prolapsi, gravi sopore capiuntur, & simul una vigilant, somnia patientes variis imaginationibus plena, hoc est, variis phantasmatibus turbata, quæ ab evaporationibus in Cerebrum per alimenta de-

latis, Imaginativam perturbant, & spiritus irrequietos reddunt. Demùm nec visus acie præcellunt, nec reliquis sensibus satis vigent.

At si Cerebrum in calore plurimùm à mediocritate recesserit, paululùm verò humidius extiterit, tunc indicia calorem attestantia manifestiora erunt; leviora verò, quæ humiditatem consequuntur. Et contrà, si humiditas fuerit abundantior, remissior verò caliditas, signa illius erunt sensibilia, & istius obscuriora. Id quod incæteris temperaturis compositis, tum Cerebri, tum reliquorum viscerum, observandum esse docet, de quibus infra.

CAPUT XIV.

XX. in Galeno.

Signa frigidi, & sicci Cerebri.

TEXTUS.

(T.27.) **F**rigidæ verò, & siccæ Cerebri intemperaturæ, quantum ex se est, frigidum, & minimè coloratum caput reddunt: semper enim memoria repetenda, quæ à nobis ab initio est distinctio posita, ut præterea advertamus, quantum ex humorum temperatura alterentur, quæ circa ipsum consistunt. Proptinùs autem hujuscemodi temperaturæ venis carentes habent oculos, & à causis frigidis facile læduntur. Quare & inæquali sanitate fruuntur, quoniam nonnunquam levissima habent capita, & meatus, qui superfluitatibus careant: nonnunquam verò & gravedinibus, & distillationibus parva ex causa capiuntur.

PARAPHRASIS.

Non dissimili modo à supradictis dignoscetur Cerebrum frigidum, & siccum. Et quidem primò Caput ad tantum frigidum percipietur. Secundò cutis faciei non est colorata, idest non rubore, sed potiùs pallore fœdabitur. Tertiò venæ oculorum erunt adeò exiles, ut minimè appareant. Quartò à causis frigidis facile lædetur. Quare eo præditi temperamento inæquali sanitate fruuntur, quoniam, ut subdit Galenus, nonnunquam levissima habent capita, & excrementorum moderatos effluxus: nonnunquam verò & gravedinibus, & distillationibus quacumque ex causa corripientur. Verùm hujus signi quamvis mentio in hoc textu fiat, non tamen sufficienter illius ratio explicatur, præsertim quia ejusmodi discriminis causa nulla affertur, cur nimirum aliquando levissima habeant capita, aliquando verò distillationibus capiantur. Attamen si attendatur disjunctiva temporis particula, *nonnunquam*, facile diversitatis ratio eruetur: etenim cum Cerebrum simul frigore, & siccitate afficiatur, propter debilem, effœtamque sanguinis crassim, si ab externis causis frigefacientibus alteratio accidat, Caput gravedinibus, & distillationibus corripientur; si verò causæ extrinsecus alterantes siccæ fuerint, ut sunt venti Aquilonares, tunc ob intensiorem siccitatem ab extrinseco superadditam, excrementa adeò extenuabuntur, ut ferè Cerebrum deserant leve, & quodammodò vacuum, quia scilicet ubi Cerebrum ab excrementorum humidorum congerie opprimebatur, iisdem extenuatis, & absumptis, inanitum remanet, eorumque gravamine exonertum.

CAPUT XV.

XXI. in Galeno.

De Sensibus. (a)

TEXTUS.

Sensus autem eorum, in juventute quidem omnes vigent, atque omni vitio carent, sed progrediente ætate citò marcescunt: & ut summatim dicatur, omnes celerrimam circa Caput senectutem ostendunt; quare & citò cani fiunt; capilli verò ipsis quidem genitis, vix exeunt, & malè nutriuntur, & rufi sunt. In progressu autem ætatis, superante magis frigiditate caliditatem, quàm siccitate humiditatem, multum non calvescunt. Contrà verò si contigerit, siccitatem quidem plurimum dominari humiditati, frigiditatem verò caliditati, parum calvi fiunt hi.

PARAPHRASIS.

PRæter antedicta Signa demonstrantia siccum, frigidumque Cerebrum, alia Galenus à sensibus deducit: unde inquit, sensus in his, cum in juventute sunt, perspicaces esse, quamvis progressu ætatis citò marcescant, sive hebetentur. Et quidem in juventute sensus omnes vegeti, perspicaces, ac prævalentes sunt, tum quia per id temporis siccitas conjungitur cum caliditate, seu vigore juvenili, neque frigiditas à vegetiori sanguine multum prævalet; tum quia Cerebrum excrementis minimè gravatur, adeoque Nervi, & organa sensuum inde

dependentia, puriora sunt; tum etiam, quia Spiritus animalibus operationibus addicti, tenuiores progignuntur, ac propterea efficaciores evadunt in peragendis functionibus hegemoniis; tum demum quia ipsamet Cerebri substantia in juvenili ætate purior semper, tenuiorque fit comparata ad alias ætates. Valdè autem conferre, dictum est suprà, ad Ingenium tenuitatem substantiæ Cerebri medullaris. At verò procedente deinceps ætate, hebetantur sensus omnes, eoque magis, quò ad senium fiet accessus; siquidem per subsequentes ætates cumulari incipiunt excrementa, & calor, qui in ætate juvenili vegetior erat, plurimum tractu temporis imminuitur, subindèque etiam Spiritus deficiunt; unde postmodum sensus, tum interni, tum externi impensè torpent. Quæ sanè omnia ob mutationem sanguinis perpetim succedentem in ætatibus, & in partibus primis eveniunt.

Addit ulterius, hoc celerrimam circa Caput senectutem ostendere. Sub quibus verbis quid intelligere voluerit, non benè ab Expositoribus explicatur. Melior tamen, & congruentior expositio videtur, quòd sensus quemadmodum in Adolescentia, & Juventute plurimum vigent, ità citò consenescant, & elangueant, ut proinde in Virilitate, vel cruda senectute, torpeat Visus, Auditus, & Olfactus. Solent & hi in ætate prima multum judicio, consilio, ac prudentia præpolle- re; ad Senium verò perducti, stolidi, ac mente capti fiunt. Observat pariter Santorius, hos pati citam mutationem in facie, ut propterea adhuc Adolescentes vultum senilem exhibeant, aut emaciatum, signum evidentissimum languidæ Cerebri constitutionis, atque effœti sanguinis, unde intempestivè facies extenuatur, ac senilis, & rugosa redditur. Hinc etiam accidit, quòd immaturè quoque moriantur, vix sextum, aut septimum anno-

(a) Caput hoc jungi deberet præcedenti ob materiæ affinitatem.

annorum septenarium transgressi . Hac eadem de causa compertum ; ægrotantes faciem , & aspectum suorum Parentum , aut Avorum in ægritudine repræsentantes , certò ex illa infirmitate diem ultimum obire . Canities insuper his est familiaris ; quamobrem in textu adjicit Galenus , eos citò canos fieri , capillos tardè admodum in iis exoriri , & natos malè nutriri , ac rufos apparere . Canities namque accidit propter caloris languorem , quoniam ex Aristotele 5. de generat. Animal. cap. 4. & 5. & 3. de historia eorundem cap. 11. Canities dicitur languor , & ægritudo capillorum , orta ob caloris imbecillitatem . Ob eandem causam capilli vix exeunt , & extra cutim distenduntur , quin etiam malè nutriuntur , & crescunt , quoniam calor exiguus est , impotens fuliginosam capillorum materiam , quæ adhuc inepta est , per poros cutis impellere , & extra protrudere : immò ipsamet fuligo ob cutis constipationem à frigida intemprie inductam vix egredi potest ; unde sequitur , ut malè illi nutriantur , & crescant . Rufi verò observabuntur , nequeunte scilicet Sanguine præ sui lentore nigros , vel flavos illos progignere . Postremò , si progrediente ad senectutem ætate potius siccitas , quàm frigiditas , ob inopiam partis glutinosæ , prævalere videatur , calvitium magis accidet ; si verò frigiditas prævaluerit , hoc est langueat magis florida , quàm glutinosa substantia , calvitium tardiùs apparebit , quoniam calvitium , ex dictis , provenit ab inopia partis glutinosæ .

CAPUT XVI.

XXII. in Galeno .

Signa Cerebri frigidi , & humidi .

TEXTUS.

(T. 28.) **H**UMIDÆ verò , & frigidæ Cerebri temperaturæ faciunt homines gravi somno tentari , & ad somnum facilè converti , sensibus quoque minimè vigentes , atque excrementis redundantibus , & qui Caput frigiditati , ac repletioni habent obnoxium , ac distillationibus , & gravedinibus , facilè tentantur , neque tamen hi calvi fiunt . (T. 29.) Hæc igitur indicia sunt Cerebri temperaturæ , à quibus si progrediaris ad unumquodque sensorium dignotiones transferre licebit .

PARAPHRASIS.

INDICIA temperaturæ Cerebri frigidæ , humidæque referuntur . Primò , quòd ejusmodi temperamento præditi gravi somno tentantur , & experrecti facilè denuò in somnum relabuntur . Et quamvis in Cerebro calido , humidoque etiam dictum sit , homines facilè ad somnum inclinare , ibi tamen facilis in eisdem expergefactio adjungitur , quæ in his nulla est ; nam in textu dicitur , quòd gravi somno tentantur , & ad somnum facilè convertuntur ; quia ibi humida , seu glutinosa substantia sanguinis juncta est cum vegetiori cruore , hîc verò cum hebetiori copulatur . (a) Secundò , sensus istorum eandem ob causam vigentes non sunt , sed obtusi , quoniam

(a) Quo pacto somnus fiat , & à quibus causis , alibi à nobis dictum .

niam vigor à roborè rutilantis sanguinis, hebetudo verò ab ejusdem defectu procedit; quinimò isti nedum obtusos sensus habent, verùm etiam stolidi, atque omninò inepti observantur. Tertiò, excrementis abundant, & præsertim pituitosis, & aqueis, unde illorum capita obnoxia sunt repletioni, gravedini, & distillationi. Quartò demùm, calvitium non subeunt, quoniam in ipsis humidum excedit: calvitium autem ab illius inopia proficiscitur.

Ab his modò Indiciorum genèribus docet Galenus progredi posse ad dignoscendas reliquorum omnium sensuum à Cerebro dependentium temperaturas, consideratis nimirum in illis tum sensitivis, tum motivis operationibus, nec non partium magnitudine, conformatione, figura, itemque juvantibus, & nocentibus, aliisque, ut de Cerebro memoratum. Verùm, ut exemplum aliquod referret, adjicit indicia Temperiei oculorum, ut ab his reliqua sensoria dignoscenda deduci possint: de quibus nunc.

CAPUT XVII.

XXIII. in Galeno.

De Oculis.

TEXTUS.

Sed sufficiet de Oculis dumtaxat facere mentionem. (T. 30.) Quicumque tangentibus quidem manifestè calidi existunt, & facili, ac crebro motu cientur, & venas latas habent, hi calidi omnes sunt; frigidi verò his contrarii. Et humidi quidem molles simul, & multa humiditate pleni; sicci verò duri simul, & aridi. A similibus autem suæ temperaturæ causis facile offenduntur, juvantur autem

à modico contrariorum usu: sed hoc quidem commune in omni cujuscumque partis temperaturæ dignotione oportet meminisse.

PARAPHRASIS.

ET quidem ab iisdem fontibus signa temperierum Oculi deducit: aitque calidos esse Oculos, si ad tactum calidi percipiantur: si facili, & crebro motu cientur: si venas latas habeant: & si à calefacientibus lædantur, juventur à frigidificantibus. Contrà verò frigidi erunt, si juventur à calidis, lædantur à frigidis. Sed & humidi, molles simul, & multa serositate scatentes: sicci verò, duri simul & aridi erunt. Ita in pueris, & fœminis facilis illacrymatio, nulla, vel difficilis in senibus.

Sed cur ab Aristotele 22. *sect. problem.* 20. facilis illacrymationis causa ponitur calor, & acritudo? Quoniam is ibi respexit ad causam effectivam, glandulas oculorum, unde lacrymæ profiliunt, portantem. Atque hinc solvitur quoque Problema illud, cur à dolore simul, & à lætitia, quæ oppositæ passionēs sunt, lacrymari contingat. Quia nimirum, ut docet Alexander Aphrodisæus 1. *sect. Problem.* 31., coarctantur muscoli, & glandulæ oculares in dolore, quemadmodum experimur ex ambiente frigore comprimente; in lætitia verò laxantur, amplificanturque, ut propterea serositates lacrymarum continere nequeant, sicuti ex fumo, Sole, aliisque similibus. Hinc pariter nonnulli facilius ob lætitiā lacrymantur, quàm ob dolorem, ut sunt Senes, durioris texturæ Corpora, & Melancholica dicta, quoniam in his promptior, ac facilior est laxatio glandularum, quàm compressio.

Quemadmodum ex humiditate molities, & facilis illacrymatio, ita ex opposito ob illius penuriam, oculorum durities, & ploratus difficilis succedit: & si

quæ

quæ unquam lacrymæ ab illis profiliunt, aridæ sunt. Dicuntur autem lacrymæ aridæ, quæ cum comparent, illicò exiccantur, & evanescunt, ob tenuem, facilèque evaporabilem illarum serositatem. Cæterùm signa desumpta à juvantibus, & nocentibus communia sunt cum reliquis cæterarum partium temperaturis; siquidem à similibus causis offenduntur, à contrariis verò juvantur; si tamen modicus sit earumdem usus: Unde obiter notandum: Conservationem hîc, ex mente Galeni, à contrariis, non à similibus memorari, cum tamen de signis Temperierum Corporum, intra limites sanitatis contentorum, agat.

CAPUT XVIII.

XXIV. in Galeno.

De Magnitudine Oculorum.

TEXTUS.

(T. 31.) **M**agnitudo oculorum quidem, ubi concinnitas adsit, & operationum virtus, multitudinem benè temperatæ substantiæ ostendit, ex qua sunt conformati: quæ si desint, multam quidem substantiam, non tamen benè temperatum, ostendunt.

PARAPHRASIS.

A Magnitudine etiam Oculorum indicia desumit, atque inquit, Oculorum magnitudinem cum concinna figura, & videndi acutiæ conjunctam, ostendere bonam illorum temperiem, melioremque compositionem, quæ duæ sunt conditiones superiùs relatæ ad cujuscumque partis salubritatem denotandam requisitæ. At si contrà, Magnitudo Oculorum præseferat concinnitatem, at videndi acu-

tie careat, tunc arguet quidem matériæ copiam, sed debilem virtutem, adeoque Visionis organum non esse benè temperatum, aut convenienter constructum.

CAPUT XIX.

XXV. in Galeno.

De Parvitate Oculorum. (a)

TEXTUS.

Parvitas verò oculorum, adjuncta quidem concinnitate, ac operationum virtute, paucam quidem, sed benè temperatam substantiam ostendit, ex qua sunt conformati. Si verò sociam habuerint inconcinnitatem quandam, atque operationum vitium, tunc paucam simul, ac vitiosam materiam ostendunt.

PARAPHRASIS.

Quòd si Oculi parvi sint, sed concinnam figuram habent, cum vegeta virtute, seu videndi acutiæ, indicabitur modica materia, sed robusta virtus, adeoque perfecta conformatio, & temperata partium similarium oculum componentium constitutio. At si oculi parvi sint cum inconcinna figura, malam conformationem, & virtutis imbecillitatem designabunt. Si insuper accedat Visionis vitium, tunc paucam simul, & vitiosam materiam arguent, quemadmodum de Magno, & Parvo Capite dictum est.

CA-

(a) Hoc etiam Caput adjungi deberet præcedenti.

CAPUT XX.

XXVI. in Galeno.

De Colore Oculorum.

TEXTUS.

(T. 32.) **Q**uæ verò ad Colores attinent, ità distinguere oportet. Glauci quidem Oculi, qui pura humiditate, ac non multa præfulgent, tales fiunt, ob splendidi luminis abundantiam. Contrà verò nigri, & qui intermediam naturam servant, causas quoque intermedias habent.

PARAPHRASIS.

Præter magnitudinem, & Parvitatem Oculorum, est quoque in illis considerandus Color, qui sanè varius in Oculis esse solet. Præcipui autem referuntur hic à Galenò Glaucus, Niger, & Medius. Glauci oculi dicuntur, qui pura humiditate, at non multa præfulgent, & tales fiunt ob splendidi luminis abundantiam: Nigri è contrà: Medii demùm, qui intermediam naturam servant, & intermedias causas habent. At Aristoteles 5. de generatione Animalium cap. 1. quatuor colores oculis attribuit, scilicet Cæsum, Flavum, Nigrum, & Caprinum, quibus etiam viridem colorem addidit Albertus Magnus 19. de Animalibus cap. 3., aitque Oculos Puerorum in primâ generatione virides apparere. Verùm Galenus consideravit solùm hic Colores Oculorum in Hominibus, qui ad ætatem adultam pervenerunt, atque eos dumtaxat, qui frequentiores sunt; quin pro intermediis intelligit omnes alios, qui inter album, & nigrum reponuntur. In cæteris autem Animalibus, tot, & tam diversi Oculo-

rum colores observantur, ut vix ad certam classem redigi possint, cùm penè differant pro diversitate specierum. Leones enim rubros, & flavos gestant, Feles fulgidos, & igneos, Noctuæ albicantes, & ad flavum vergentes: sic alios, & alios Lupi, Vulpes, Ursi, Canes, &c. Aves quoque diversimodè coloratos oculos habent juxtà varietatem luminis, ac Iridis oculorum, eorumque magnitudinem. Diversa quoque Regionum constitutio oculos in coloribus variat; & quidem Mauris nigricant, Gallis flavescent, Polonis albicant.

Sed unde provenit hæc in Oculis colorum varietas? Quidquid alii putent, ex contemperatione primarum qualitatum, adeoque ex temperamento vario pendere; verisimiliùs crediderim ex varia superficie exterioris tunicæ luminis radios reflectentis textura, nec non ex ocularium humorum diversimodè lucis radios refractos admittentium, & eadem ratione remittentium, dispositione, varios colores in oculis exoriri: quæ sanè variant pro varietate structuræ, & conformationis partium, & humorum, oculos componentium. Ità quoque Aristoteles 5. de generatione Animalium cap. 1. causam Nigredinis oculorum attribuit copię, & profunditati humoris Aquei; Glaucedinem verò inquit oriri ex ejusdem paucitate. Et 14. sect. Problem. 11. causas ocularium colorum refert ad conditionem tunicarum; quemadmodùm etiam insinuat 10. sect. Probl. 13. Galenus etiam expressè sequenti Capite has eadem ocularium colorum causas assignat: quod mox sumus explicaturi.

CAPUT XXI.

PARAPHRASIS.

XXVII. in Galeno.

De Glaucedine, & Nigredine
Oculorum. (a)

TEXTUS.

Glaucus igitur Oculus fit, vel propter magnitudinem, vel propter splendorem humoris, qui à Græcis Crystalloides nominatur, vel propter situm prominentem, aut propter tenuis, & aquei humoris, qui in pupilla existit, paucitatem, & puritatem, atque omnibus quidem in unum convenientibus fit glaucissimus Oculus. Quod si aliqua adsint, aliqua verò non, tunc major, minorve glaucedo contrahitur. Niger verò oculus fit, aut ob parvitatem Crystalloidis, aut propter profundum situm, vel quoniam splendidus, ac fulgidus exquisitè non est, vel quoniam tenuis humor vel superabundat, vel purus non existit, vel propter unam aliquam ex his causis, aut propter omnes fieri consuevit. In ipsis autem magis, & minus, (ut antè diximus) reperitur. (T. 33.) Tenuis igitur humor, quò magis ad Aquæ naturam accedit, & superabundat, humidiores Oculum ostendit: quemadmodum si crassior, ac minor fiat, sicciorem. Crystalloides autem si quidem durior existat, sicciorem efficit Oculum: si verò mollior, humidiores: sic, & si plus modico tenuem humorem exceßerit, sicciorem: si autem defecerit, contrarium.

Causas Glaucedinis Oculorum refert hoc Capite Galenus, easque ad quinque revocat, videlicet ad magnitudinem humoris Crystallini, splendorem ejusdem, situm prominentem, paucitatem humoris Aquei, & ejusdem humoris puritatem. Addit deinde, quòd si omnes istæ causæ in unum conspiraverint, Oculi valdè Glauci fient; si verò aliquæ tantum convenient, aliæ non, minùs Glauci observabuntur: si denique his oppositæ causæ habeantur, niger color exorietur: Speciatim autem Niger Oculus fiet, aut ob parvitatem Crystalloidis, aut propter profundum ejusdem situm, aut quia splendidus, fulgidusque hic humor exquisitè non est: aut quia tenuis humor, idest Aqueus, plus justo superabundat, minimeque purus est; eò autem minùs, magisve niger erit, quò prædictæ causæ plures, paucioresve concurrent; quamobrem in diversis individuis pro varietate particularum Oculos componentium, varii colores exurgent, magis, minusve Glauci, vel Nigri.

Et quidem Glaucus color in plures gradus dividitur. Primus est valdè fulgidus, & luminosus, qui splendentes oculos reddit, & veluti fulgore coruscus; qui color in Cælo sereno, ac luminoso observatur. Secundus ad Croceum inclinat, ut in Noctuis. Tertius ad Viridem accedit, ut plerumque in Equis generosioribus. Quartus ad Cæruleum, & Marinum vergit; unde non mirum, si Neptuno Marini Numini illum Mythologi attribuere, & Minervam Homerus Glaucopin vocat. Niger color licet suscipere possit majorem, vel minorem nigroris gradum, non tamen adeò declinat, ut sensibiles differentias afferat: potest tamen ratione Animalium, in quibus aliquantisper variat, dici

(a) Hoc aliud Caput videtur priori quoque adnotandum.

dici Caprinus , Ovinus , Bovinus ,
&c.

Inter hos medii ponuntur Fulvi , Charopi , seu gratiosi , ut in Oculis Leonis , Aquilæ , & Vulturis : Rubei , ut in Panthera , Ceraſte , Baſiliſco , Alſpide : ſic etiam Purpurei , Flavi , Ruſi , & ſimiles :

Colligit modò ex his omnibus Galenus , humidiores eſſe Oculos , cùm tenuis , ſeu Aqueus humor ad Aquæ naturam magis accedit , & aliquanto ſuperabundat : Sicciores verò eſſe , cum iſſ crasſior , & minor fuerit . Sic quoque Cryſtalloides , ſi denſior , & durior ſit , ſiccioſum oculum oſtendit ; humidioſum verò , ſi mollior , & laxior . Facta autem comparatione cum Aqueo humore , ſi plus modico tenuem , & Aqueum humorem Cryſtallus ſuperaverit , durioſum , & ſiccioſum Oculum efficiere : at cùm defecerit , molliorem reddere docet . Ex Cornea etiam tunica magis minusve diaphana idipſum evenire poteſt . Num autem humores iſti excedant , vel deficient , ex colore vel Glauco , vel Nigro deducere licebit . Et de his hætenus .

Supereſſet hîc tandem Indicia Phyſiognomica tradere ex habituſine totius Faciei deſumpta , adjuncſtis ſimul unâ Oculis , Naſo , Auribus , Labiis , aliisſque adjacentibus partibus . At cùm de his latè nimis egerit præ cæteris Jo. Baptiſta Porta peculiari volumine *de Phyſiognomia Naturali Hominis* inſcripto , propterea Lẽctorem noſtrum ad illum remittimus . Nobis autem ſufficiet hæc breviter innuiſſe .

CAP. XXII.

XXVIII. in Galeno.

De Cordis Temperaturis .

T E X T U S .

(T. 34.) **D**E Cordis autem Temperaturis deinceps dicendum eſt ; ſi priùs hæc in memoriam revocaverimus , quòd unamquamque partem ſeiſſa vel calidioſum , vel frigidioſum , vel ſiccioſum , vel humidioſum dicimus factam , non alicui rei alteri comparantes , ſed ad ſeiſſam . Sic enim utcumque extiterit Cor natura frigidiffimum , multò ſanè calidioſum temperaturam poſſidebit calidiſſimo Cerebro .

P A R A P H R A S I S .

Postquàm ſuperioribus Capitibus late egerit Galenus de Cerebri Temperaturis , ad Cordis Temperamentorum indicia explicanda ſe nunc convertit , quoniam ſub Cerebro nullum aliud viſcus præſtantius Corde eſt . Antequàm autem varias illius temperaturas conſideret , regulam quandam generalem præmittit , inquiens ; Unamquamque partem ſeiſſa vel calidioſum , vel frigidioſum , ſiccioſum , vel humidioſum , intelligi debere , non alicui alteri rei comparatam : *utcumque enim* , ſubdit , *Cor extiterit frigidius , multò ſanè calidioſum temperaturam Cerebro adhuc calidiſſimo poſſidebit .* Quorum verborum ſenſus eſt , quòd Cor calidius , vel frigidius dicitur , non quidem comparatum ad reliquas partes Corporis , reſpectu quarum ſemper calidius erit , ſed ſolum in ſeiſſo conſideratum , cum temperamento moderato , & medio ; Unde cùm dicitur , Cor eſſe frigidum , minùs calidum

E

dum

dum intelligi debet, quàm sit temperatissimum: sicut pariter, cum dicitur calidum, magis calidum intelligendum erit, quàm sit moderatum, ac medium; siquidem hoc, Mensura ponitur omnium Temperamentorum.

CAPUT XXIII.

XXIX. in Galeno.

Signa Cordis Calidi.

TEXTUS.

(T. 35.) **C**alidioris igitur Cordis, ut admodum qui ei proprius est, atque conveniens, indicia quædam sunt inseparabilia, & propria, magnitudo respirationis, & pulsus velocitas, & frequentia, & audacia, & ad actiones natura prompta. Quod si multum in caliditate exceßerit, tunc iræ præcipitatio est furibunda. Est autem his thorax hispidus, & præsertim pectus, & quæcumque hypochondriis partes proximiores. Magna verò ex parte calidi Cordis temperatura universum Corpus calidum reddit, nisi Hepar vehementius obstiterit. Dicemus autem paulo inferius totius Corporis indicia. (T. 36.) Est quidem & latitudo Thoracis caliditatis indicium, nisi & hic quoque Cerebrum plurimum obstiterit, quoniam ei magna ex parte spinalis medulla in magnitudine respondet: tantæ verò erunt magnitudine vertebræ, quanta & spinalis medulla, quare & spina universa. Configitur verò Thorax ad eam Spinae partem, quæ Metaphrenum, idest Dorsum dicitur, tanquam ad Carinam Navis. Quare necessariò ejus longitudo æquabitur dorso: latitudo verò erit pro vertebrarum ratione, quando ad proportionem earum crassitudinis fuerit confixus. Cum ve-

rò cordis caliditas superans, perflaverit, ac dilataverit in primo sui ortu thoracem, erit ejusdem caliditati proportionem respondens. Quare cum Caput parvum, thorax autem latus extiterit, maximum hoc tibi fuerit Cordis caliditatis indicium: cum verò magno existente Capite parvus fuerit, propriissimum hoc erit Cordis frigidioris signum: si verò Capiti fuerit proportionem respondens, tunc aliis signis de Corde distingues, ex ipsius thoracis amplitudine nihil assumens.

PARAPHRASIS.

Quemadmodum in Temperaturis Cerebri distinxit Galenus Temperies in simplices, & compositas; pari nunc ratione, ut indicia singularum Cordis Temperierum exactè traderet, signa Temperamenti Calidioris primò proponit.

Illius autem Indicia ad quatuor in universum revocat: videlicet ad Magnitudinem Respirationis, ad Pulsuum velocitatem, ac frequentiam, ad Audaciam, & ad Promptitudinem actionum: atque hæc inquit Signa esse inseparabilia, & propria. Indicat Cordis caliditatem Magnitudo Respirationis dupliciter. Primò, quia Magna Respiratio magnum Thoracem exigit, adeoque organa, Respirationi necessaria, ampliora: modò amplitudo, & magnitudo partium spiritalium non nisi à calore potest haberi, adeoque in prima sui formatione demonstrat vim validam, ac efficacissimam fuisse. Secundò, ex amplitudine Thoracis arguitur calor vegetior in Corde, quoniam Vasa sanguinea Pulmonem perreptantia, lata quoque, & multo, floridoque Sanguine referta esse oportuit; unde Caloris vigor, & spirituosæ substantiæ copia manifestè colligitur. Pulsuum velocitas, ac frequentia calorem pariter excedentem attestantur; si ve quòd ex his usus in Corde adauctus, ut putat Galenus, indicetur; si verò rationabilius,

lius, quia ubi velox, & creber pulsus fit, ibi quoque motum Sanguinis circumcuntis celeriores fieri necesse est. Ex velocitate autem, & frequentia motus Sanguinis, & Cordis, tenuiores, puriores, & copiosiores Spiritus exurgunt, unde Calor vegetior fit, & vicissim exinde robur maximum in Corde, & partibus vitalibus excitatur. Implicitè autem continetur in velocitate, & frequentia Pulsus, magnitudo, & robur ejusdem, cum ut plurimum utraque simul observetur. Audacia pariter indicat Calorem Cordis, & vitalis regionis; quoniam illa à copia, puritate, & mobilitate Spirituum, è puro, & tenui Sanguine procedentium, dependet. Conjungit autem cum Audacia Galenus promptitudinem Actionum, siquidem Calor agiles efficit actiones, & nedum reddit Homines Audaces, sed etiam citò exequentes, quæ sibi, adhuc si difficilia sint, agenda proponunt. Hinc Aristoteles 3. *Ethicor. cap. 7.* Audacem inquit esse, qui in terribilibus rebus excellit, vultque videri fortis: quod si præter excellentiam in terribilibus; promptitudinem in exequendo habeat sine timore, tunc nedum Audax, sed Fortis etiam dicetur.

Si prætereà multum in caliditate Cor excesserit, idest si calidissimum fuerit, tunc signa excedentem hunc calorem attestantia, erunt, furiosa quædam Iracundia, ac Temeritas; Iracundia quidem, quæ cita, & facilis est ad irascendum propensi, quoniam ex nimio calore Sanguis acerrimus, & qui dicitur biliosus, evadit, adeoque promptè effervescent, & ex quacumque causa levi Iram concitans, quæ à Medicis definitur: *Ebullitio Sanguinis circa Cor.* Temeritas verò, quia citra formidinem, quodcumque terribile cum impetu irati aggrediuntur. Quamobrem Biliosi sunt Iracundi, & Iracundi sunt biliosi, idest acri sanguine præditi.

Sed & ulterius his Thorax hispidus est,

quoniam ubi calor abundat, ibi quoque fuligo, pilorum materia, multa elevatur, & in pilos extenditur, suggerentibus scilicet illam musculis Pectoris. Partes quoque hypochondriis proximiores, & circa septum transversum sitæ, id ipsum ostendent, ut pote pilis pariter refertæ, veluti spiritalibus partibus attigæ.

Advertit tamen, & sana ratione, Galenus, à Cordis calida temperatura totum Corpus facile in calidam constitutionem inclinare; siquidem calor totius Corporis à Sanguine, provenit, & ubi is vividus, ac rutilans, à Corde procedens, cunctas Corporis partes pervadit, pari ratione istæ vividæ, ac calidæ observabuntur. Verum addit, *nisi Hepar vehementius obstiterit.* Nam, cum Hepar ex mente Galeni ponatur primum sanguificationis organum, si fortasse vehementer obsisteret, hoc est magna intemperie frigida afficeretur, posset illius fervorem plurimum contemperare. Vel congruentius, (Galenus sententiam in meliorem, & Anatomix accommodatorem sensum reducendo) dicas, posse Jecur remeantem Sanguinem infringere, & à partibus acris, sulphureis, aut biliosis dictis, peculiari sua constitutione, ac textura non minimum repurgare, ac repurgando obtundere.

Postremò addit aliud caloris excedentis indicium Galenus, desumptum à Thoracis amplitudine: etenim caloris est amplificare, & partes in prima sui generatione latiores reddere, nisi tamen Cerebrum plurimum obstiterit: cujus rationem ipsemet desumit à Spinatæ medullæ magnitudine, ac proportionem: *Tantæ enim erunt magnitudine Vertebrae, quanta est Spinalis Medulla; quare & Spina universa. Configitur verò Thorax ad eam Spinæ partem, quæ Metaphrenum, idest Dorsum dicitur, tanquam ad Carinam Navis: quare necessario ejus longitudo æquabitur Dorso; latitudo verò erit pro Vertebrae ratione*

quando ad proportionem earum crassitudinis fuerit confixus. Hæc Galenus. Ex quibus verbis deducitur, in primo partium ortu, ex copia materie, unde Cerebrum, Spina, Vertebrae, & Costæ formantur, Thoracem posse construi latiore, etiam si Cor caliditate minimè prævaleat; siquidem magno Cerebro, & Capiti magna Spina naturaliter respondere debet; huic verò & Dorsum, & Costæ proportionem similiter servabunt, idèdque Pectus amplum Capiti magno naturaliter adjungetur. Dictum est, naturaliter, nam si Corpus monstruosum sit, partes istæ poterunt non servare proportionem.

Ut insuper distinguat Galenus, num à calore Cordis, an à magnitudine Capitis, Thorax latior habeatur, subdit: si calor Cordis exceßerit, ac Thoracem amplificaverit in prima sui formatione, ex ingénito, insitoque vigore, tunc proportionem respondebit calor Cordis Cerebri caliditati. Quare cum Caput parvum, Thorax verò amplius extiterit, maximum hoc erit Cordis calidioris indicium. At contrà, cum magnum fuerit Caput, Thorax verò parvus, erit hoc proprium Cordis frigidioris, idèst minùs calidi, signum. Si denique Caput proportionem respondeat Thoraci, ab aliis indiciis Cordis temperatura deducetur, cum ex hoc fallax signum desumatur.

Quamvis autem Argenterius Galenum reprehendat in eo, quòd dixerit, Caput esse posse parvum in magno Thorace, cum nunquam id ipse expertus sit, nil penitus evincit; id equidem impossibile non est: quinimò non rarò accidit Caput parvum latiori Thoraci superincumbere, & è converso; non tamen incongrua penitus magnitudine, ac proportionem, sed solum respectiva.

CAPUT XXIV.

XXX. in Galeno.

Signa Cordis Frigidi.

TEXTUS.

(T. 37.) **I**N frigidiorè verò Corde pulsus minores existunt, quàm modo Naturæ conveniat: non tamen necessariò tardiores, vel rariores. Respiratio autem, si quidem tantò Thorax minor extiterit, quantò Cor frigidius, pulsibus erit proportionalis. Si verò major fuerit, quàm pro frigiditatis quantitate, non minor est tantum, sed etiam tardior, & rarior. Tales autem timidi natura sunt, & sine audacia, & segnes, & nudum pilis habent pectus. De ejus verò parvitate distinguendum, ut diximus priùs. Eodem modo & de totius Corporis caliditate.

PARAPHRASIS.

Oppositis indiciis inquit dignosci Cor à mediocri calore infra recedens: Pulsus enim fiunt minores, quàm sint in Corde temperatè calido, non tamen, subdit, necessariò esse tardiores, vel rariores, quoniam cum parvitate aliquando jungi potest tarditas, & raritas, quandoque verò celeritas, & frequentia, ut ex tractatu de Pulsibus. Insuper si Thorax respondeat frigiditati Cordis, respiratio erit quoque proportionata pulsui, idèst etiam parva. At si Thorax latior sit, fortassè ob Cerebri, & Spinæ, cum suis vertebrae, amplitudinem: Respiratio longè minor pulsu erit; quoniam amplitudo loci minuit indigentiam, ac usum novi aeris. Præterea, hæc Cordis temperie præditi, timidi natura sunt, nec non segnes, & pectore glabri: quæ omnia à Sanguine hebe-

hebetiori, minùsque vivido, proveniunt. Atqui istiusmodi timor intelligitur illatus ex quacumque levi causa; etenim ex doctrina Aristotelis 3. *Ethicor. cap. 2. & 6.* (a) Timidus dicitur, qui metuit ea, quæ timere non decet; vel qui metuit, quæ non oportet, vel non sicut oportet, vel quando non oportet. Compertum autem est ex Anatome, Meticulosos corde solito grandiori, laxiorique esse præditos, Fortes verò, & generosos, parvo, sed solido: in hoc enim Sanguis vegetior; in illo dilutior, vapidusque fit. Non dissimili ratione isti observantur etiam Segnes, & Glabri; quoniam ab effæto Sanguine, fuliginosa materia pilorum, crassior, vel elevari, & extendi, vel poros cutis pervadere nequit; quin & cutis ipsa laxa nimis est, & mollis, adeòque glabra, ut in Fœminis, & Eunuchis. Pectus denique erit angustum, eadem de causa, nisi tamen ex Cerebri, & Capitis mole, ac Spinæ, vertebrarumque magnitudine, latius habeatur, modo superius relato.

CAPUT XXV.

XXXI. in Galeno.

Signa Cordis sicci.

TEXTUS.

(T. 38.) **C**or autem siccus, pulsus efficit duriores, & iram non promptam quidem, sed feram, & quæ non facile sedari queat, magna ex parte universum Corpus siccus existit, nisi Hepar obstiterit.

(a) V. etiam Aristotelem lib. de juvent. & senect. cap. 15.

PARAPHRASIS.

IN Corde sicciori pulsus fient duriores: Homines minùs iracundi erunt, nec tam facilè ad iracundiam concitantur, iram tamen semel conceptam diutiùs foveant, & ferinam ferè conditionem æmulantur. Totum Corpus siccus, ac durius ad tactum apparebit, unde Cutis, Fibre, Carnes, asperæ, duræ, & siccæ observabuntur, nisi tamen aliunde, & præsertim ab Hepate moderentur, repurgata scilicet plurimùm parte illa sanguinis fellea; vel etiam inertiori reddita, aut segregata nimium parte ejusdem crassiori, melancholica dicta, relicta parte lerosa, & lymphica.

CAPUT XXVI.

XXXII. in Galeno.

Signa Cordis humidi.

TEXTUS.

(T. 39.) **C**ordis verò humidioris signa, pulsus molles, & mores ad iram quidem proclives, sed talem, quæ facile sedari possit, & universum Corpus humidius existit, nisi Hepar obstiterit. (T. 40.) Secundum verò conjugationem qualitatum primarum Cordis intemperaturæ ita se habent.

PARAPHRASIS.

Signa humidioris, & laxioris Cordis referuntur pulsus molles: propensio ad iram, sed talem, quæ facile sedetur: universi Corporis humida, mollisque constitutio, nisi Hepar obstiterit, modis nuper explicatis.

Difficultas solùm esse potest in eo , quòd Galenus dicat , humidius Cor proclive esse ad iram ; cùm contrarium Ratio suadere videatur . Unde Argenterius , tanquam gravis erroris culpam , in Galenum , ut sui moris est , illud impingit . Verùm pro Galeno responderi potest , in humidiori Corde , sed simul etiam calido , iram excitari quoque posse , sed talem , quæ facilè sedetur ; quare sua natura licèt non concitetur ad iram , si tamen fortassè aliqua ex causa ad illam provocetur , facilè sedabile sit ad contra distinctionem antecedentis temperaturæ . Satis enim est ad iram promovendam sanguinis effervescencia , quæ ex prædicto calore juncto humiditati inferri potest , si præsertim à vehementi aliqua exteriori causa incitetur , & acuat.

Tandem Compositas temperierum conjugationes deinceps se velle referre insinuat Galenus , quarum indicia , ex cognitis Simplicibus , facillimè deducuntur , ut ex sequentibus Capitibus .

C A P U T XXVII.

XXXIII. in Galeno.

Signa Cordis calidi , & sicci .

T E X T U S .

Calidi , & sicci cordis pulsus duri sunt , & magni , & veloces , & frequentes , & respirationes magnæ , & veloces , & frequentes , & multò magis ad velocitatem , ac frequentiam vergunt , thorace Cordi non aucto proportionaliter . Hi verò præ cunctis pectus habent maxime hirsutum , & hypochondria . Ad actiones autem prompti sunt , & iracundi , & ce-

leres , & impudentes , & mores tyrannicos habent : etenim sunt in iram precipites , non facilè verò placabiles . De totius autem Corporis temperatura , & Thoracis amplitudine , his , quæ ante diximus , proportionaliter est distinguendum .

P A R A T H R A S I S .

Compositarum Cordis temperierum indicia in posterum relaturus Galenus , eodem , quo suprà ordine , initium facit à Temperamento calidiori , & sicciori ; atque ad illius dignotionem sex genera signorum proponit , nempe pulsus duros , magnos , veloces , & frequentes : itemque respirationes magnas , veloces , & crebras : pectus , & hypochondria hirsuta : promptitudinem ad actiones , iracundiam , impudentiam , & mores tyrannicos : proclivitatem ad furorem , non facilè placabilem : denique totius Corporis calidam , siccamque constitutionem , cum Thoracis amplitudine ; nisi tamen Jecur ex parte obstiterit , quo modo suprà dictum est .

Primò itaque Pulsus duri , magni , veloces , & frequentes Cor calidum siccum ostendunt : durities enim à siccitate ; magnitudo verò , velocitas , & frequentia à caliditate provenit , eò quòd arguat Sanguinem floridum , tenuem , & spiritibus scatentem .

Secundò , Respiratio magna , velox , & crebra eadem ratione contingit , cùm Pulmo cogatur sæpiùs suas expansiones repetere , atque novi aeris ingressum , & veteris egressum admittere , juxtà thoracis amplitudinem .

Tertiò , Pectus , & Hypochondria sunt hirsuta , quoniam à Sanguine abundantiori , tenuiorique , multa fuliginosa materia elevatur , unde evenit hispeditas .

Quartò , Actionum promptitudo : si-

qui-

quidem ex superius traditis, calor actiones agiliores efficit, eoque magis, si cum siccitate conjunctus sit, idest si Sanguis acrior fuerit.

Quintò, tales sunt iracundi, & impudentes: exacuitur enim, non retunditur calor, cum sanguis multo glutine non abundat, sed potius acritate aliquatenus inficitur, & exasperatur: unde isti nedum maxima cum audacia operantur, sed impudenter etiam quodcumque adhuc arduum moliuntur. Habent pariter mores tyrannicos, idest sunt crudeles, immisericordes, audaces, impii, temerarii, & cunctorum contemptores; quamobrem faciles sunt ad iram, & difficulter admodum placabiles: Sanguis etenim in his acer, inflammabilis, & biliosus est, ideoque ad furorem proclives homines reddit.

Denique totum Corpus calidum, siccumque observabitur, quia tantus est in cunctas partes, Cordis, & Sanguinis inde profluentis delatus vigor, ut ad illius habitudinem Corpus universum pariformiter afficiatur, & excandescat, transfuso nimirum quaquaversum subinde sanguine æquabiliter fervidiori. His plerumque Thoracis amplitudo eadem de causa jungitur, nisi Spinæ, & Dorsii vitio, aliter ex prima generatione contigerit, ut superius dictum: quod tamen rarissimum est, veluti ferè monstruosum.

CAPUT XXVIII.

XXXIV. in Galeno.

Signa Cordis calidi, & humidi.

TEXTUS.

(T. 41.) **S**I verò caliditas una cum humiditate dominabitur minus quidem his, quos antea diximus, hi sunt hirsuti, ad actiones verò nihilominus prompti, non tamen ferus est animus, sed ad iram proclivis tantummodò. Pulsus verò magni, ac molles, veloces, & frequentes existunt; & respiratio, cum Thorax Cordi fuerit proportionalis, eandem pulsibus formam servabit. Si verò minor extiterit, tanto illis velocior erit, & frequentior, quanto & thorax minor extiterit. Si autem multa facta fuerit eversio in temperatura, ac si hoc præsertim in humiditate contigerit, præterea, quæ diximus, contingent etiam ex putredine morbi his, qui in ipsis fuerint, humoribus corruptis, ac putrefactis. Expirationes autem majores sunt, ac velociores inspirationibus, & submissio arteriæ in pulsibus velox.

PARAPHRASIS.

QUoniam humiditas contraria qualitas siccitati ponitur, idcirco cum jungitur calori, vires illius, & effectus aliquantulum remittit, qui à siccitate plurimum exacuantur. Hinc Galenus hoc Capite omnia Signa in calido, & sicco Corde memorata, mitiorem conditionem referre docet in calida, humidaque Cordis temperatura. Et quidem, qui ejusmodi constitutione præditi sunt, minus hirsuti, & ad actiones minus prompti observantur; Animus non tam ferus, & immitis est, licet proclivis ad iram, causa caliditatis. Pulsus sunt

quidem magni, sed non duri, quin potius molles respectivè. Respiratio item, si proportionem servet Cor cum thorace, erit pulsui proportionata; sin fecus, vel velocior, vel tardior pro ratione. Sunt præterea isti morbis ex putredine progigni creditis obnoxii: quoniam putredo à calore in humido excitari putatur; id quod potissimum accidet, cum humiditas prævalentior fuerit; tunc siquidem non bene à calore, vitalium operationum moderatore, dirigetur: quamobrem & expirationes majores erunt inspirationibus, & submissiones, seu Systolæ Arteriarum, pari ratione velociores, fuliginibus, seu vaporibus, ex sanguine elatis, ad id impellentibus. Atqui hæc juxta ea, quæ nuper dicta sunt, facillimè quoque patefunt.

CAPUT XXIX.

XXXV. in Galeno.

Signa Cordis humidi, & frigidi.

TEXTUS.

(T. 42.) **H**umidioris verò, & frigidioris Cordis, pulsus quidem molles: moribus autem nequaquam audaces, sed timidi, & segnes existunt. Tales etiam glabrum pectus habent, minimèque iram retinent, sicuti & ad iram non admodum sunt prompti. Quæ verò ad Thoracem, & universum attinent Corpus, distinguere oportet, sicut ea, quæ antea diximus.

PARAPHRASIS.

HUic intemperiei pulsus molles accidunt, in moribus timiditas, & se-

gnities, in pectore glabrities, difficultas ad irascendum, & cætera ad Corpus pertinentia frigidam, humidamque habitudinem ostendent; unde tactus mollis, frigidus, humidusque erit: quæ omnia ex pluries repetitis manifestissima sunt.

CAPUT XXX.

XXXVI. in Galeno.

Signa Cordis frigidi, & sicci.

TEXTUS.

(T. 43.) **F**rigidius verò Cor, & siccius, pulsus quidem duros reddit, & parvos, respirationem autem, si quidem thorax parvitatem Cordis frigiditati proportionalem habuerit, moderatam: si verò major extiterit, raram, ac tardam. Hi verò præ omnibus minimè ad irascendum prompti, cum autem coacti fuerint irasci quibusdam, retinent iram. Habent autem maximè omnium nudum pilis pectus. De parvitate autem thoracis, ac præterea totius Corporis frigiditate similiter distinguendum Unum illud commune in hisce omnibus memoria repetentibus, quod quaecumque de moribus sive nunc, sive quovis alio sermone explicata sunt, ad temperaturæ cognitionem, non de probis moribus, aut vitiosis, qui ex philosophia hominibus adveniunt, sed de insitis unicuique, ac naturalibus, à nobis sunt exposita.

PARAPHRASIS.

Pulsus in his duri sunt, & parvi: duri quidem ratione siccitatis, seu penuriae substantiæ glutinosæ sanguinis; parvi verò ratione frigiditatis, seu sanguinis hebetioris. Respiratio erit moderata, si Tho-

Thorax proportionatus fuerit ; si verò major extiterit, tarda, parva, & rara erit : ad iram nulla, vel levissima aderit proclivitas repugnante scilicet Cordis, & Sanguinis habitudine ; at verò ea semel concepta, poterit diutius perdurare, quoniam à consistentia sanguinis passiones tenacitatem adipiscuntur, & Cordi intimius inhaerent. Pectus nudum pilis : nam deficiente parte vivida cruoris, nec fuligo, si quæ est, extenuari potest, nec per poros cutis extendi. Denique Thorax parvus, & angustus erit, totumque Corpus frigidum tactui apparebit, ab effœti sanguinis conditione.

Ad calcem hujus Capitis advertit Galenus, signa hæc intelligenda esse naturaliter, & præsertim eorum, quæ ad mores pertinent ; unde inquit, *quòd quæcumque de moribus, sive nunc, sive quovis alio sermone explicata sunt ad Temperaturæ cognitionem, non de probis moribus, aut vitiis, quæ ex Philosophia hominibus adveniunt, sed de insitis unicuique, ac naturalibus à nobis sunt exposita.* Ex quibus verbis colligitur, illos animi mores Temperaturas indicare, qui insiti à Natura sunt, & non ob bonam eam Philosophiæ partem, quæ Ethica dicitur, acquisiti, vel etiam ob consuetudinem, conversationemque assiduam cum hominibus morigeratis habitam. Sic plurimi natura iracundi, temerarii, & impudentes, ob Religionem, studium Philosophiæ, Sanctorum Patrum, & Moralium Librorum lectionem, mites, benigni, misericordes, & verecundi evaserunt ; quemadmodum inter Ethnicos, de Socrate, & Hippocrate referunt Historici. Et hætenus de temperamentis Cordis.

CAPUT XXXI.

XXXVII. in Galeno.

Signa calidi Hepatis.

T E X T U S.

(T. 44.) **H**epatis calidioris indicia, Venarum latitudo, flavæ bilis abundantior ; in consistenti verò ætate etiam atra : calidior ipsis Sanguis, atque eadem ratione Corpus universum, nisi obstiterit Cor. His venter, & hypochondria hirsuta.

P A R A P H R A S I S.

QUoniam superius inter partes Principes Hepar retulerat Galenus, illius propterea nunc naturales intemperaturas, cum excessu unius, vel duarum qualitatum, eodem ordine, ac de Corde dictum est, considerat, & examinat. Primum autem Signum calidioris Hepatis inquit esse venarum latitudinem : secundum rufæ bilis abundantiam, atque in ætate consistenti bilis atræ copiam : tertium, sanguinem calidiorem, ejusque ratione corpus universum ad calidum inclinare : ventrem denique, & hypochondria hirsuta fieri. Quæ signa licet apud alios Expositores non leves patiantur difficultates, facillimè tamen à Nobis diluuntur. Et quidem primò venarum latitudo ex præactis rudimentis, & partium primigeniarum staminibus oriunda, tractu temporis apparentior fit in Hepate, quod principium implantationis, seu radicationis illarum tantummodò est ; quoniam ramuli omnes ex extimis ad intimas partes perreptantes, pro usu circulationis sanguinis, semper, ac semper versus Hepar tendentes amplificantur, ut ibidem Sanguis.

guis à sulphureis, & acrioribus partibus in cysti fellea collectis, repurgatus, in Cor vergat, diathesi, & crassi puriori positus. Hinc secundò bilis rufa, seu flava, ex repurgamento Sanguinis in cysti colligitur, ut etiam ab eodem Galeno dicitur 2. *de natural. facult. cap. 9.*; quin aliquando etiam abundantior fit, citra caloris excessum, ut in puellis benè valentibus, & non rarò in cadaveribus Cachexia, aut Hydrope defunctis compertum est: verumtamen repurgatio ista fellei humoris si non sufficienter, aut malè fiat, intemperies calida in Jecore exorietur. Tertiò licet Hepar sanguificationis organum non sit, quia tamen major, ac manifestior ejusmodi impuritatum repurgatio in illo fit, propterea à mala, vel bona eorundem secretionem, totius etiam Corporis habitudo bona, vel mala proficisci potest, ut & Ventris, & hypochondriorum constitutio ex prompta, & facili, aut inepta, & difficili, iis in partibus, transpiratione. Quæ omnia rectè consideranti palam fient.

CAPUT XXXII.

XXXVIII. in Galeno.

Signa Hepatis frigidi.

TEXTUS.

(T. 45.) **F**rigidioris verò, angustia venarum, pituita abundantior, sanguis frigidior, & totius Corporis habitus, nisi à Corde calefiat. Venter illis glaber est, atque hypochondria.

PARAPHRASIS.

AB opposito, frigidioris Hepatis signa sunt, angustia venarum, pi-

uita abundantior, Sanguis frigidior, & totius Corporis habitus similiter ad frigidum inclinans, nisi tamen à Corde calorem æqui valentem suscipiat. Venter demum glaber est, unà cum hypochondriis. Et quidem omnium istorum ratio in promptu reddetur, quia à mala Hepatis constitutione repurgatio tum fellei humoris, tum cæterorum excrementorum conveniens secretio non fit, unde Sanguis minùs floridus, immò potius serofus, ac pituitosus emergit, totiusque etiam Corporis habitudo, ipsius sanguinis habitudinem, consequetur: cùmque fuliginosa materia pilorum, aut deficiat, aut inepta subinde reddita, extramitti, atque in pilos commutari nequeat, glaber venter cum hypochondriis observabitur.

CAPUT XXXIII.

XXXIX. in Galeno.

Signa Hepatis sicci.

TEXTUS.

(T. 46.) **S**iccioris autem, sanguis quidem crassior, & minimè abundans, venæ duriores, & totius Corporis habitus siccior.

PARAPHRASIS.

Siccioris verò temperiei indicia erunt, sanguis crassior, & consistentior, qui nimirum acorem aliquem contraxit; eritque modicus, cum angustia, & duritie venarum; unde etiam totius Corporis habitus in eandem constitutionem inclinabit.

CAPUT XXXIV.

XL. in Galeno.

Signa Hepatis sicci.

TEXTUS.

(T. 47.) **H**umidioris autem, Sanguis quidem abundantior, atque humidior, venæ autem molliores. Ita verò & universum Corpus, nisi partes, ad Cor attinentes, obstiterint.

PARAPHRASIS.

At Sanguis in humidiori temperatura Jecoris, erit quidem abundantior, sed erosior: venæ exinde molliores observabuntur, quin & partes cunctæ Corporis nimia serositate scatentes, tumidæ, & obesæ fient, nisi ex adverso Cor obstiterit; idest nisi Cor præcellenti sua virtute tantam serositatem moderetur, & emendet, per iteratas sanguinis circuitiones, aut diaphoresi, aut diuresi promota.

CAPUT XXXV.

XLI. in Galeno.

Signa calidi, & sicci Hepatis.

TEXTUS.

(T. 48.) **C**alidioris verò simul, ac siccioris Hepatis indicia, hypochondria plurimum hispida, Sanguis crassior simul, ac siccior, (al. paucior,) stava bilis plurima est: consistente autem ætate, & atra: venarum autem latitudo, & durities. Sic verò & universum Corpus se habet: nam quæ ex corde caliditas

originem habet, potest obtundere eam, quæ ab hepate nascitur, frigiditatem, sicuti & frigiditas caliditatem: siccitatem verò non potest humidius Cor ad contrarium habitum transferre. Media verò inter has, quæ dictæ sunt, ea, quæ ab Hepate humiditas oritur. Magis enim à Cordis siccitate superatur, quàm siccitas ab humiditate: minùs autem à caliditate: adhuc verò multò minùs frigiditate; Hæc enim inter omnes qualitates, quæ ab Hepate eveniunt, facillimè vincitur. Liquet autem, quòd cum in unum convenerint utriusque principii temperatura, totum exquisitè secundum illas afficitur corpus, paulò verò inferius ipsius dicentur indicia.

PARAPHRASIS.

Cum simul siccitas calori jungitur, & utrumque in excessu est, hypochondria plurimum hispida observabuntur, ob fuliginum inde prodeuntium multitudinem: crassior simul, & consistentior, seu fibrosior Sanguis fiet; quin & bilis flava multum in illo exuperabit, à Sanguine pariter acriori reddito, præsertim in juventute; in ætate consistenti verò atra evadet, absumptis perpetim per circuitum Sanguinis serosioribus partibus. Venæ latæ apparebunt, eruntque ad tactum duræ, eandem ob causam. Et demum Corpus universum consimilem patietur intemperaturam, nisi aliunde contemperetur, quod planè difficilius; siquidem à Corde nil tale quid suggeri poterit, quod Hepatis Temperaturam calidam siccam corrigere valeat, nisi solùm partes chyli nondum exactè elaboratæ eo deferantur.

CAPUT XXXVI.

XLII. in Galeno.

Signa Hepatis calidi, & humid.

TEXTUS.

(T. 49.) **H**umidius autem, ac simul calidius Hepar, minus quidem quam calidius, & siccus, hypochondria reddit hispida. Plurimum verò sanguinis, & venas amplas, habitumque calidiorum, atque humidiorum facit; nisi obstiterit Cor. Si verò amplius in ambabus qualitatibus à Natura modo recedat, à morbis, qui ex putredine, ac vitiosis humoribus fiunt, facillime capitur. Adhuc autem magis, si plurimum augeatur humiditas, caliditas verò non ita. Si autem contra, parum quidem humiditas crescat, plurimum verò caliditas, minime vitiosis humoribus laborant.

PARAPHRASIS.

Sunt in his etiam hypochondria hispida, sed minus, causa humiditatis, seu ferofioris sanguinis. Sanguis item ipse ob eandem rationem abundantior, & venæ ampliores, mollioresque, totumque Corpus eodem pariter temperamento erit affectum, nisi Cor aliunde obstiterit, tenuiorem, purioremque sanguinem reddendo. Erunt insuper tali temperie præditi obnoxii morbis ex putredine, quæ à calore in humido excitari dicitur, præsertim si humidum gluten in sanguine prævaluerit, quod sanè ex indebita fermentatione, aliqua de causa commotum, facillime in corruptionem vergit. At verò calore humiditatem moderante, hoc est coercito glutine à parte sanguinis vividiori, secus accidet.

CAPUT XXXVII.

XLIII. in Galeno.

Signa Hepatis humid.

TEXTUS.

(T. 50.) **H**umidius autem, & frigidius Hepar habet hypochondria glabra, sanguinem verò ad pituitæ naturam accedentem generat, cum venarum angustia: sic & reliquum afficit Corpus, nisi à Corde ad contrariam naturam transferatur.

PARAPHRASIS.

Ob excessum humiditatis, & frigiditatis, seu texturæ laxioris in Jecore, hypochondria glabra erunt, sanguis pituitosus, multo scilicet sero repletus observabitur, à serosis hisce partibus non benè repurgatus. Venæ erunt angustæ, & universum Corpus ex præfatis causis ad frigidum, humidumque inclinabit; nisi Cor iteratis circuitionibus serosum sanguinem in meliorem crassum non reduxerit, ejusque defectui non opituletur. Singula patent ex dictis.

CAPUT XXXVIII.

XLIV. in Galeno.

Signa Hepatis frigidi, & sicci.

TEXTUS.

(T. 51.) **F**rigidius autem, & siccus Hepar cum paucò sanguine, & venarum angustia efficit Corpus, atque frigidius, & hypochondria glabra, nisi & hic Cor dominetur.

P A-

P A R A P H R A S I S.

Siccitas frigiditati confociata Sanguinem indicat parciolem, & venarum angustiam, totumque Corpus frigidius observabitur; immò ad tactum durius; quare & hypochondria glabra erunt, magis, minùsvè, prout alterutrum ex his prævaluerit; si tamen à præcellenti Cordis temperamento Jecoris imbecillitas correctâ non fuerit; ut mox dictum.

C A P U T XXXIX.

XLV. in Galeno.

*Signa calidæ, frigidæ, humidæ, & siccæ
Temperaturæ Testiculorum.*

T E X T U S.

(T.52.) **T**emperatura verò Testiculorum, calida quidem ad Venerem proclivis, & masculorum generatrix, & sæcunda, celerrimèque genitales partes obsepit pilis; simul autem & circumjacentes attingit partes: frigidior verò contraria efficit. Et humida quidem multo, & humido semine abundat: sicca paucum, & modicè crassum generat semen.

P A R A P H R A S I S.

Sicut de Cerebro, Corde, & Hepate, ita nunc de Testibus, eorumque temperaturis, primò simplicibus, deindè compositis, agere prosequitur Galenus. Et calidæ quidem Temperiei indicia esse ait, proclivitatem ad Venerem, vim Seminis masculorum generatricem, maximèque sæcundam: Celerrimè quoque genitales partes pilis circumsepiri, ut & alias partes circumjacentes. Si ye-

rò Testium Temperatura frigidior sit, prædicta signa opposito modo se habebunt; nam & Semen infœcundum, ineptum, ac impotens ad Venerem excitandam: & si quæ fortassis, generatio exinde habeatur, potiùs erit fœmellarum, & partuum imbecillium. Partes item circa pubem, & genitalia, vel omnino glabra apparebunt, vel tardè admodum, & pauci pili generabuntur.

In humida Temperatura, semen multum quidem erit, sed fluidum, aquosum, & iners, generationique ineptum. In sicca demum paucum, & modicè consistens, aut crassum. Hæc namque laxam, mollem, ac debilem Testium texturam, & constitutionem consequuntur; vel exfuccam, siccam, spissam, & duram.

C A P U T XL.

XLVI. in Galeno.

Signa calidæ, & siccæ Temperaturæ Testiculorum.

T E X T U S.

(T.53.) **C**alidior verò, ac siccior, & crassissimum semen habet, & sæcundissima est, ac celerrimè ab initio protinus ad coitum excitat animal. Sed & his genitales partes citissimè hispida sunt, atque omnes, quæ circumstant, suprâ quidem usque ad regiones, quæ ad umbilicum sunt: infrâ verò usque ad media femora. Petulca igitur est, & ad libidinem prona hujuscemodi temperatura; statim verò satiatur, & si cogatur, offenditur.

P A R A P H R A S I S.

IN calidiori, & sicciori temperatura Testium; semen erit valdè crassum, ab-

absumpta nimirum superflu a humiditate : erit etiam fecundissimum, quoniam tenuum, seu spirituosarum partium ferax; unde ad Venerem maxima proclivitas, atque ad coitum celerrima commotio. Genitalia citò pubescunt, nec non circumstantes partes ad umbilicum usque, & ad femora, pari modo pilis erunt obtectæ. At verò quamvis ejusmodi Corpora salaciora sint, non tamen repetitas feminis effusiones sufferre possunt, quinimò ab illis maximè læduntur; tum quia semen licet fecundum, acre, & spirituosum sit, paucum tamen est; tum quia in his spiritus, qui valdè tenues sunt, facili negotio resolvuntur, & evanescunt, unde languor universalis subsequitur.

CAPUT XLI.

XLVII. in Galeno.

Signa calidæ, & humidæ Temperaturæ Testiculorum.

TEXTUS.

(T.54.) **S**I autem caliditas humiditati conjungatur, hirsuti quidem tales minùs, plus verò semine abundant, non tamen plus cæteris appetunt, sed minori detrimento præter modum Venereis indulgent. Quòd si satis exereverint, & caliditas, & humiditas, non sine detrimento à venereis abstinent.

PARAPHRASIS.

HI erunt minùs in pudendis hirsuti, plurimo tamen Semine abundabunt, sed ferofiori, unde non plus cæteris Venerem appetent, & si aliquando concubitus repetant, minùs offendentur. Si ve-

rò caliditas, & humiditas seminis multum excedant, non sine detrimento poterunt ab usu Veneris abstinere. Detrimènta autem à nimia Veneris abstinentia retulit Galenus 6. de loc. aff. cap. 5. Capitis gravitatem, cibi fastidium, febris periculum, diminutam Ventriculi coctionem, torporem corporis, & facilem timorem. His etiam addit in fœminis passionibus hystericas, & perfocationes uterinas, & quandoque etiam furores.

CAPUT XLII.

XLVIII. in Galeno.

Signa frigida, & humidæ Temperaturæ Testiculorum.

TEXTUS.

(T.55.) **S**I verò frigidiorè, & humidiorè rem temperaturam Testiculi habuerint, partes circumpositæ glabræ sunt, & tardè rem veneream exercere incipiunt, neque proni ad actum hujusmodi sunt. Aquosum verò, & tenue ipsis est semen, & parum fecundum; & fœminarum generativum, vel omninò non generans.

PARAPHRASIS.

PRævalente frigiditate, & humiditate in Testibus, idest Semine non tam vegeto existente, partes circumpositæ glabræ sunt, & tardè rem veneream perlentiscunt; & nonnisi in Adolescèntia, aut etiam Juventute, cum jam semen spirituosius evaserit, ad eandem concitantur; hebescent pariter in venereis actibus, & aquosum, ac tenue, debileque semen gignant, idèòque vel in fecundum, vel fœminarum generativum. Ratio petenda ex dictis.

CAPUT XLIII.

XLIX. In Galeno.

Signa frigida, & sicca Temperatura Testiculorum.

T E X T U S.

(T. 56.) **F**rigidior verò, & siccior Temperatura similis quidem in reliquis est antedicta, crassius verò in ipsa semen existit, atque omninò paucum.

P A R A P H R A S I S.

Conveniunt Signa hujus temperiei cum signis antecedentis; solùm differunt in duobus. Primò, quòd in sicca, frigidaque temperie crassius semen erit. Secundò, quòd omninò paucum. Cæterùm in utrisque pudendæ partes sunt sine pilis, tardè semen emittunt, & tardè ad coitum proritantur, ac denique si quæ generatio exinde sequitur, foeminarum potiùs, quàm masculorum erit. Verùm in hoc attendenda potiùs partium in Ovo muliebri præjacentium dispositio: nam organorum prima veluti stamina, quæ masculum præsertim à femina distinguunt, multo antea præjecta dici debent, ex alibi traditis. Et de temperamentis Testium hætenùs.

CAPUT XLIV.

L. in Galeno.

De habitu totius Corporis.

T E X T U S.

(T. 57.) **T**otius autem Corporis habitus, diximus & superius, quomodò & Hepatis, & Cordis naturam sequatur, ei autem magis assimilatur, quod unam aliquam ex primis qualitatibus potentiozem habuit, quas & effectivas appellant. Totius verò Corporis habitus in illis maximè dicitur partibus, quæ primæ oculis subjiciuntur. Sunt verò hæ musculi, qui omnia ambiunt ossa, carnes quædam compositæ ex prima, & simplici carne, & præterea fibris, quibus innascuntur; Propria enim musculorum substantia his duobus constat: quæ verò ad ipsos vasa perlingunt, veluti rivi quidam sunt, qui non eorum substantiam complent, sed eis subministrant, ut in vita permaneant. (T. 58.) Dicentur igitur & horum temperaturæ indicia in benè temperata habitatione: nam quæ malè temperatæ sunt, cutem permutant ex seipsis formantes, & quædam ex indiciis corrumpunt. Ita & in benè temperata regione si quis se tempore æstatis nudum Soli exposuerit, permutabit indicia, quæ ex colore, & duritie, & molitie sumuntur. Si verò quemadmodum bonam temperiem obtinet locus, ita & ipse benè temperato victu usus fuerit, ut qui neque se nudum singulis diebus in Sole plurimùm torrefaciat, neque sicuti plerique more puellarum continuè in umbra degat; hic certa, atque exquisita temperaturæ indicia præ se feret. Tanquam igitur de hoc futuro sermone nunc ad ipsum accedemus.

P A R A P H R A S I S .

Post Principalium partium Temperaturas per propria signa investigatas, pergit nunc Galenus tradere indicia, quibus dignoscere valeamus totius Corporis habitum, seu universalem Corporis constitutionem; atque unico Capite completitur, tam quæ ad habitum Corporis constituendum necessaria sunt, quam etiam documenta quædam quam maximè adnotanda, pro distinctione signorum diversum Corporis habitum attestantium.

Primum autem repetit, quod antea notaverat, nimirum ex temperaturis partium principalium haberi quoque totius Corporis habitudinem, cum ex calido, vel frigido Corde, aut Jecore, subindeque simul Sanguine, pariformiter affecto, universum Corpus calidum pariter, vel frigidum exoriatur. Deinde verò edocet Corporis habitum in iis maximè partibus consistere, quæ primæ oculis subjiciuntur, ut sunt musculi ossibus circumpositi, & carnes quæcumque aliæ, sua peculiari substantia dotata, suisque fibris intertextæ: quæ duo propriè carniam, & musculorum substantiam efformant. Venæ verò, Arteriæ, & Nervi, ductus potius, seu, ut ipsemet Galenus loquitur, rivi sunt, unde alimentum, & spiritus illis communicatur, ut in vita persistant, & conferventur.

His in genere præanimadvertis, admonet deinde, duas conditiones prærequiri ad internoscendas totius Corporis temperaturas, tam in seipsis consideratas, quam ab aliis distinctas. Prima est, ut Habitatio temperata sit: nam plurimum externa Cutis, atque adeo Corporis habitus, ab ambiente Aere permutari potest, ut propterea pro vario Aeris incolatu, varius habitus, & cutis constitutio diversa habeatur, alba nimirum, rubra, vel nigra,

& sive mollis, sive dura, & aspera. Hinc idem Galenus 2. de Temperam. cap. 6. & 3. Aphorif. comment. 14. inquit, Germanos, habitantes regiones Septentrionales, & frigidas, & Æthiopes incolentes regiones Meridionales calidissimas, partes extrinsecas, & cutaneas, dissimiles plurimum partibus internis, & principalibus habere; quippè Germani albicant cute, & frigent exteriùs, cum tamen interiùs æstuent, & rubeant: contrà Æthiopes, licet exteriùs temperaturam calidissimam præ nigrore mentiantur, intrinsecus tamen calor elanguet, & partes emollit, ut notavit etiam Aristoteles lib. de longitudine, & brevitate vitæ. Quamobrem nisi habitatio temperata sit, indicia, quæ hic afferuntur, haud congruent veritati, cum aliunde haberi possint, quam à propria cujusque Corporis temperatura. Secunda conditio est, ut signa indicantia musculorum, & totius Corporis habitus intemperies, conformentur etiam Regioni. Cum enim illa desumantur à duritie, molitie, colore, & similibus, quæ valdè immutari solent à situ, & à peculiari quadam loci constitutione, montana, vel campestri, maritima, vel palustri; propterea nisi Regionem ipsam temperatam sint, prædictorum signorum notitia confundetur. Hinc sub eodem climate habitantes plerumque variant in habitu corporis, & cute, non aliunde, nisi quia aliqui ad maris oras, alii ad montium cacumina, alii juxta paludes, aut lacunas degunt. Sed & his adjici quoque possunt, usus in victu varius, expositio Corporis ambienti diverso, atque differens exercitatio, pro Artium factivarum diversitate: Quemadmodum, subdit Galenus, bonam temperiem obtinet locus, ita & ipse benè temperato victu usus fuerit, ut qui neque se nudum singulis diebus in Sole plurimum torrefaciat, neque sicuti plerique, more puelarum, continuè in umbra degat, hic certa,

ta, atque exquisita *Temperatura* indicia præferet. Id equidem hic Neapoli Nos experimur in his, qui loca ad oras maritimas incolunt, longè in habitu Corporis, & colore differentibus ab aliis, qui juxtà colles sunt, minùsque à Sole percussi.

His conditionibus addit tertiam Sanctorius desumptam ab Hippocrate 1. de *Humoribus* tex. 1. quòd ab Humoribus efflorescentia, atque ad cutim depositione, nulla alteratio habeatur: nam quando humores effervescent, vel ad cutim deponuntur, non leviter turbantur indicia prædictarum temperierum. Sic flavescit cutis, cum ad habitum Corporis bilis diffunditur, potissimum ex Ira; pallet verò ex Amore, rubet ex Verecundia, livescit ex Timore, ac Mœstitia, & sic de aliis.

At quænam sint, aut dici possint, Temperatæ Regionēs? Quisque propriam Patriam præfert, & miris laudibus extollit: Græci Græciam, & Quartum Clima prætulerunt, ut Aristoteles 2. *meteor. summ.* 2. cap. 2.: & Galenus 2. de *San. tuenda* cap. 7. inhærens Hippocrati. Averroes cum aliis Quintum Clima Temperatum esse dixit, sub quo illius Patria continebatur. Manardus verò, quia Ferrariensis, Sextum Clima, sub quo Ferrara est, temperatius arbitratur *lib. 7. epistol. epist.* 1. Albertus Magnus Septimum, quoniam sub illo Ratisbona ejus Patria. Unde quilibet proprias Regionēs temperatas facit, non tam ratione, quàm affectu. At si Telluris divisioni ab Astronomis, & Geographis in Climata distributæ standum est, procul dubio temperatas Regionēs eas appellabimus, quæ non multum à Solis Circulo, seu Ecliptica Zodiaci, elongantur; quamobrem exceptis iis, quæ ad Polum Arcticum, aut Antarcticum proximè sitæ sunt, reliquas omnes pro rata sua, & comparatè ad Habitatores, Temperatas dicere non verebimur, dummodò

Tom. V.

Maria, Montes, Flumina, Stagna, Mephites, aut fossilium Fodinæ, illas non perturbent, & halitibus, aut vaporibus, per peculiare, aut irregulares ventos, non coinquant. Et quamvis crediderit Aristoteles Regionēs sub Zona torrida positas, non solum intemperatissimas, & excedenter calidas, verum etiam inhabitabiles esse; nuperis tamen observationibus illorum, qui eas partes perlustrarunt, innotuit, & maximè temperatas eas esse, & commodè etiam habitabiles: Ibi enim perpetuum ferè est Æquinoctium, quo æstus diei à noctibus duodecim circiter horarum, plurimum temperatur: pluviae etiam abundantissimæ fiunt, (si Ægypti partem tantummodò excipias) & irriguis fluviorum Aquis Tellus affluenter irrigatur, ventique frigidi, suaviter perflantes, Aerem quoque temperant, unde Solares radii adhuc perpendiculariter incidentes quammaximè infringuntur; quamobrem tantus calor, quantus ab Aristotele fingebatur, nullus ibi viget.

CAPUT XLV.

LI. in Galeno.

Signa moderatæ Temperaturæ.

TEXTUS.

(T. 59.) **M**oderatæ temperaturæ indicia secundum totum Animalis habitum: Color quidem ex rubro, & albo commixtus, capilli verò flavi, & ut plurimum mediocriter crispī. Carnositatis autem mediocritas in qualitate, & quantitate: medium est enim exquisitè hujusmodi Corpus inter omnes excessus, ut qui ad ipsum dicantur, & intelligantur: Nam, & crassum Corpus ad hoc compara-

F

tum

tum dicitur crassum, & tenue ad hoc eodem modo, & carnosum, & macilentum, & pingue, & durum, & molle, & hispidum, & glabrum. Nullum igitur horum Corpus est mediocritatem habens, sed qualis Polycleti Regula ad summum totius pervenit mediocritatis, adeo ut neque tangentibus molle videatur, neque durum, neque calidum, neque frigidum, insipientibus verò neque hirsutum, neque glabrum, neque crassum, neque tenue, aut aliquam aliam habens immoderationem.

P A R A P H R A S I S.

Indicia moderatam temperiem in habitu Corporis attestantia, tria hoc loco recensentur à Galeno. Primum, color Cutis ex albo, & rubro commistus, quoniam Cutis, sua natura, ex una parte albicat, quia membranacea, ex altera rubet à sanguine illam irrigante. Secundum est, Capillitium flavum, & ut plurimum mediocriter crispum, de quo signo plura alibi retulimus. Tertium, carnositatis mediocritas in quantitate, & qualitate. Sed quid intelligat per *mediocritatem Carnositatis in qualitate*, & *quantitate*? clarè deducitur ex I. de usu partium cap. 9. & ex I. de natural. facult. cap. 6. nam pro Carnositate mediocriter quanta, intelligit molem Carnium, & musculorum moderatam, & mediam inter gracilem, & obesam. Pro Carnositate mediocriter quali, moderatam intelligit molliem, densitatem, lævitatem, tenuitatemque, ita ut in his, cæterisque conditionibus moderamen exhibeat, & mediocrem participet habitudinem.

Reliqua Corpora, in quibus aliquis excessus, aut defectus à mediocritate est, non nisi ad prædictum Corpus temperatissimum, tanquam ad Medium, directæ, comparabuntur. Quamobrem Corpora

gracilia, vel pingua, dura, vel mollia, hispida, vel glabra dicentur, habito respectu ad temperatissimum, quod Medium est, fingiturque à Medicis tanquam Exemplar cæterorum, atque à Galeno assimilatur Regulæ, seu Statuæ Polycleti, cui nullus excessus, aut defectus inerat.

Hinc postremò concludit, Temperatissimum Corpus definiri per negationem cuiusvis extremi excedentis, vel deficientis, esseque tangentibus neque molle, neque durum, neque calidum, neque frigidum; insipientibus verò neque hirsutum, neque glabrum, neque crassum, neque tenue, aut aliquem alium habens excessum, vel defectum, seu immoderationem. Quod sanè vix mente concipi potest.

C A P U T XLVI.

LII. in Galenò.

De Corpore calidiorè : seu signa calidæ Temperaturæ.

T E X T U S.

(T. 60.) **Q**uæcumque autem in caliditate à medio recedunt, non tamen in humiditate, vel siccitate, hæc quantum ad carnosum genus attinent, (de hoc enim præsens est sermo) videntur quidem tangentibus calidiora tantum, quantum & eorum temperatura calidior. Tantò verò magis hirsuta sunt, quantò & calidiora, & minus pinguedinis habent. Colorem autem rubrum, & capillos nigros habent.

P A R A P H R A S I S.

CALIDIORIS habitus Corporis quatuor signa hoc Capite recensentur. Primò, quòd videantur Corpora tangentibus calidiora tantum, quantum & eorum temperatura calidior est. Secundò, quòd tantò magis hirsuta sint, quantò & calidiora. Tertiò, quòd minus pinguedinis habeant, quæ ex eodem Galeno 2. de Temperam. c. 4. à Sanguine frigidiori, & consistentiori pendere dicitur, sive potius ex glutine Sanguinis abundantiori. Quartò denique, quòd colorem rubrum, & capillos nigros referant. Quæ omnia ex superiùs explicatis faciliè innotescunt.

C A P U T XLVII.

E.III. in Galeno.

De Corpore frigidiorè: seu Signa frigida
Temperatura.

T E X T U S.

(T. 61.) **F**RIGIDIORIS autem temperatura indicia sunt, pilorum carentia, pinguedo, & frigiditas, quæ tangentibus obviat. Color autem unà cum capillis etiam rufior, & ubi multa frigiditas adfuerit, lividus quodammodo existit, quem nonnulli Medici colorem plumbeum appellant.

P A R A P H R A S I S.

HUJUS insuper temperaturæ indicia referuntur, pilorum carentia, pinguedo Corporis, ad tactum frigiditas, color cutis, & capillorum rufus: & si frigiditas multum excesserit, ad lividum etiam vergens, quem idem Galenus ait,

nonnullos Medicos plumbeum colorem appellare. Quæ profectò signa, quæ ratione à frigida Temperie oriantur, satis patere potest ex supradictis, quoniam ubi frigus exuperat, humores insunt melancholici, & crassi, & Sanguis ipse acidior, ac terrestrior est, spiritibus effectus; unde frigescit tactus, & color cutis plumbeus exoritur. De carentia pilorum, atque de pinguedinis abundantia, ratio etiam constat; siquidem ubi materia inepta est, & calor inefficax, pili non prodeunt; glutinositas enim sanguinis congelascens in membranis, vertitur potius in pinguedinem.

C A P U T XLVIII.

E.IV. in Galeno.

Signa sicca Temperatura.

T E X T U S.

(T. 62.) **S**ICCIOR autem temperatura tantò gracilior est, & durior bona temperatura, quantò major est siccitas. In reliquis autem eodem modo se habet.

P A R A P H R A S I S.

PRÆCIPUUM signum siccioris temperaturæ Corporis ponitur gracilitas, & durities cutis, atque eò major, quò illa intensior fuerit. In reliquis verò signis, inquit, eodem modo se habere Corpus, ac in frigidiori dictum est.

CAPUT XLIX.

LV. in Galeno.

Signa humida Temperatura.

TEXTUS.

ET humidior etiam in reliquis quidem eodem modo se habet; melius autem carnosus, & mollior. (T. 63.) Et quidem secundum conjugationem qualitatum primarum factæ intemperaturæ compositam habent indiciorum formam.

PARAPHRASIS.

IN humidiori Temperie, Corporis habitus erit carnosior, sive obesior, ut dicitur 2. de Temperam. cap. 4., itemque mollior ad tactum. Obesitas enim, & Mollities ab excedenti humore glutinoso provenit. De cætero in reliquis eodem modo se habet, ac in frigidiori. Concludit tandem Galenus indicia Temperierum simplicium, ex quibus facile conjugatarum qualitatum, seu Temperierum compositarum signa desumi posse subdit, de quibus mox.

CAPUT LI.

LVI. in Galeno.

Signa calidæ, & siccæ Temperatura. (a)

TEXTUS.

Calidior simul, ac siccior est hirsuta magis, ac calida, & dura existit,

(a) Fungitur hoc Caput Textui præcedenti.

& pinguedine caret, gracilisque est, & capillos nigros habet. Si verò multum in caliditate excedat, color quoque niger illi adest.

PARAPHRASIS.

Calidioris, & Siccioris Corporis quinque signa afferuntur, nempe habitus Corporis hirsutus, nedum secundum partes, sed etiam secundum totum: Cutis calida, & dura ad tactum percipietur: Gracilitas aderit cum inopia pinguedinis: Capillitium erit nigrum: & si caliditas fuerit intensior, color Cutis niger, & valdè fuscus observabitur. Quorum omnium rationes non est, ut hic inutiliter repetantur.

CAPUT LI.

LVII. in Galeno.

Signa calidæ, & humidæ Temperatura.

TEXTUS.

(T. 64.) **C**alidior autem, & humidior Temperatura mollior, & calidior, & carnosior tanto est bona temperatura, quantum & utrisque qualitatibus aucta fuerit. Quòd si plurimum augeatur, citò similiter à putredinis corripitur morbis, quoniam & humorum vitio promptè laborat: Si verò parum quidem humidior sit, multo verò calidior, molliores quidem parum huiusmodi sunt his, qui bonam habent temperaturam, & magis carnosæ, non parum verò hirsutiores, & tangentibus non parum calidiores. Nigri verò eis capilli, & caro pinguedine caret. Si verò paulo quidem calidior, multo verò humidior, mollis bis caro est, & mul-

ta,

ta, & color commistus est ex albo, & rubro, & tangentibus paulo calidiores. Et ut summatim dicatur, omnibus temperaturæ conjugationibus semper superexcedentis qualitatibus indicia eminebunt.

P A R A P H R A S I S.

Calorem humiditati sociatum attestantur, habitus Corporis mollior, & ad tactum calidior, atque utriusque ratione carnosior: quia ubi vigere ponitur calor, & humiditas, ibi Sanguis invenitur vegetus, & valdè aptus nutritioni, ac incremento carni. Quoniam verò ejusmodi Corpora calida, humidaque obnoxia putredini observantur, propterea addit Galenus, quòd si prædictæ qualitates plurimum exceßerint à mediocritate, putridis morbis facile illa corripientur. Capilli insuper erunt nigri, si præsertim humiditas non admodum augeatur, multum tamen excedente calore. Caro pinguedinis expers erit, quandoquidem dissolvitur potius, quam concreascit illius materia, documento ejusdem Galeni 2. de Temperam. cap. 4. At verò si humiditas calorem superaverit, carnes molles erunt potius, quam duræ, & multæ quidem, non paucæ, quoniam ex Aristotele calido vivimus, humido nutrimur. Color cutis erit ex albo, & rubro mistus indicans sanguinem utraque sui parte scatentem. Denique eadem de causa Corpus calidum ad tactum percipietur, si calor excedat; si verò humiditas, potius mollities, & obesitas, pro ratione.

CAPUT LII.

LVIII. in Galeno.

Signa frigida, & humida Temperatura.

T E X T U S.

(T. 65.) **F**rigidior autem, atque humidior Temperatura, si parum quidem utraque augeatur, capillis nuda est, & alba, & mollis, & crassa, & pinguis: Si verò magis exceßerit, reliqua quidem sunt secundum proportionem augmenti qualitatibus; color autem una cum capillis rufus; quemadmodum, si plurimum utraque augeatur, lividus; si verò qualitatibus augmentum fuerit inaequale, ejus, quæ superexceßerit, indicia eminebunt.

P A R A P H R A S I S.

Pæcipuum signum frigidioris, & humidioris temperaturæ ponitur cutis nuda pilis, colore alba, tactu mollis, crassa, & pinguis: quæ omnia satis manifestè arguunt caloris defectum, & frigiditatis excessum, idest sanguinis inertiam. Si prætereà frigiditas, & humiditas multum prævaluerint, color cutis, & capillorum rufus fiet, ad pallorem, & squallorem inclinans, remisso nimirum valdè Sanguinis vigore.

CAPUT LIII.

LIX. in Galeno.

Signa frigida, & sicca Tempera-
tura.

TEXTUS.

(T. 66.) **S**I autem frigiditas una cum siccitate aequaliter augeatur, natura durum, ac tenue, & glabrum Corpus habent, & tangentibus frigidum, pinguedo tamen ipsis, etsi graciles sint, per carnes dispersa. Capilli autem, & color frigiditatis modum, ac proportionem sequuntur. (T. 67.) Ubi verò calida, & sicca temperatura in tempore decrementi in frigidam, & siccam labitur, tunc horum habitus gracilis quidem similiter est, & durus; est verò etiam melancholicus, & ob id niger simul, & hirsutus. Ubi igitur altera qualitas multum dominatur, altera verò parum à mediocritate recedit, superabunt ejus, quæ dominatur, exilia autem erunt alterius qualitatis indicia. (T. 68.) In omnibus verò, de quibus supra diximus, & postea dicemus, commune est temperaturæ indicium, si membrum facile frigeat, vel frigiditatis, vel raritatis: si verò non facile, vel caliditatis, vel densitatis: si verò à desiccantibus offendatur, & aridum, & siccum, & non facile mobile fiat, siccitatis, quemadmodum, & si ab humectantibus pariter se habeat, humiditatis. (T. 69.) Inspicere autem oportet, si eandem omnes musculi servant temperaturam, vel minimè eandem, atque in omnibus animadvertere subjectorum ossium quantitatem. Nonnunquam enim gracile videtur membrum, cum tamen non sit gracile, quod ad musculos attinet, sed propter ossium tenuitatem tale videtur. Sic & crassius quibusdam plerum-

que apparet, non ob ossium amplitudinem, sed ob multitudinem carnis, quæ vel aucta, vel imminuta, vel durior, vel mollior effecta, siccus, aut humidus membrum ostendit. Pauca igitur, ac dura, siccus: multa autem, ac mollis, humidus. Sic & intermedia spatia simularium Corporum, ut plus, vel minus humidæ substantiæ in seipsis continent, vel crassius, vel tenuius, vel humidus, vel siccus membrum ostendunt: humidus quidem, ubi subtilior, & copiosior est humiditas: siccus verò, ubi crassior simul, & minor. Ipsæ enim solidæ Corporis partes, quæ verè solidæ sunt, ac primæ, nullo modo effici possunt humidiores. At satis est, si quis eas celerius exiccari prohibeat. Intercepta autem in ipsis spatia hac, vel illa humiditate complere, possibile. Hoc verò est proprium partium simularium alimentum, quod ex appositione fit, & non per vasa attrahitur. Communis autem hæc ratio, & omnium partium existit. Et iterum in salubrium, atque in salubrium causarum doctrina repetetur. Nunc autem ea, quæ ordine sequuntur, attingamus.

P A R A P H R A S I S.

SI frigiditas, & siccitas una simul æqualiter excedant, Corpus natura durum, tenue, & glabrum erit: ad tactum frigidum observabitur: Pinguedinem, si quæ est, per carnem dispersam habebit, quippe quæ modica erit, ob siccitatem: Demum Capilli, & color Cutis ejusdem frigiditatis proportionem servabunt: etenim vel albicabunt cum squallore, vel plumbeum colorem præferent, pro ratione.

At verò si Corpus antea calidum, per ætatum mutationem in frigidum siccum abeat, tempore scilicet decrementi, idest in ætate senili, cum ob Carnium manifestiorem consumptionem extenuetur, habi-

tus Corporis evadet gracilis, & durus; atter sanguis in ea prævalebit, & eadem de causa, nigrum simul, & hirsutum Corpus fiet: magis autem, aut minus pro ratione excedentis alterutrius qualitatis. Id, quod ex hebetudine, & penuria eorum, quæ Sanguini conveniunt, proficiscitur. Nedum autem ab his, sed à juvantibus etiam, & à nocentibus prædictæ temperaturæ innotescunt, ut proinde si facile frigescat Corpus, aut potius ab exiccantibus offendatur, de unius, vel alterius excessu, iudicium feratur.

Denique advertit Galenus, gracilitatem, vel carnositatem musculorum, comparandam esse ossibus subjectis, num æqualem inter se habitudinem in toto Corpore retineant, ne scilicet in dijudicanda Corporis constitutione decipiamur. *Nonnunquam enim inquit gracile videtur membrum, cum tamen gracile non sit, quod ad musculos attinet, sed propter ossium tenuitatem tale videtur, &c.* quemadmodum in hanc rem *textu* 69. plura alia accurate nimis considerat Galenus, in circumstantiis partium nutriendarum, pro recta dignotione siccioris, aut humidioris habitus Corporis, ut apud eundem legere est.

CAPUT LIV.

LX. in Galeno.

Signa sicci Ventriculi.

TEXTUS.

(T. 70.) **V**entriculi indicia ejus quidem, qui natura siccior existit, si celeriter sitibundi fiant, & paucus eis sufficiat potus, à copiosiore autem aggraventur, fluctuationibus infestentur,

aut superfluitet id, quod abundat, & cibis delectantur siccioribus.

PARAPHRASIS.

Satis hucusque Galenus egerat de signis Temperierum tum totius Corporis, tum principalium ipsius Viscerum: Nunc, ne aliquid in re hac intentatum relinqueret, Ventriculi, & Pulmonis Temperaturas etiam disquirat; etenim licet hæc duo viscera inter Principes partes minimè recensuerit, adeò tamen viventi necessaria illa cognovit, ut diù saltem, absque illorum opera, Vita prorogari nequeat.

Primum autem Temperies Ventriculi pervestigat, atque inter eas, quæ siccitatem exuperantem referunt, quoniam gravior Ventriculi passio, videtur esse Sitis, quæ plurimum siccitate, seu penuria humoris adaugetur: aitque Ventriculum siccioris sitibundos homines reddere: Sitis etenim ex Aristotele 2. de *Anima* tex. 28., & ex eodem Galeno 1. de *Temperamentis*, & alibi, definitur, Appetitus frigidi, & humidi: quin clariùs idem Galenus *lib. de inæquali intemperie* Sitim, docet, ex defectu humidæ substantiæ exoriri. Verùm de hac re inferiùs.

At cur est quòd priùs esurire, postea sitire soleamus, si per sitim humida substantia deficit, quæ longè resolubiliior est substantia solida, quam, fame coacti, naturaliter reparare exoptamus?

Conciliator *diff.* 118. respondet, humiditatem in viventibus esse copiosiore, præsertim eam, quæ ad ventriculum confluit, ubi fames, & sitis fit; ideò subdit priùs excitari famem, quàm sitim. Sed meliùs Vallesius 5. *controvers. cap. 7.*, excitari priùs famem ait, quoniam potus ad nullius substantiæ corporeæ reparationem dirigitur, nisi tantùm indirectè, & ex accidenti: at cibus propriè, & directè dirigitur ad reparationem substantiæ consum-

ptæ; quin etiam in cibo semper humiditas aliqua invenitur: Potus autem simpliciter videtur potius inservire cibo, ut vehiculum, deferens nimirum substantiam alibilem ad partes nutriendas, idcircoque fieri, ut potius indigeamus cibo, quam potu, atque adeo prius esurire, quam sitire solemus.

Insuper subdit Galenus, paucum potum his, qui siccior ventriculo sunt præditi, sufficere: quod signum maximam videtur continere difficultatem. Siquidem si Ventriculus siccior est, certè ex vi ipsius excedentis siccitatis, necessariò exiget in ejus remissionem abundantem humiditatem, qua tanta siccitas contempereatur; unde falsò videtur à Galeno dictum, hos paucum potu egere. Verùm respondetur, Galenum hic intelligere, paucum potum esse sufficientem in singulis vicibus, non verò in universum; siquidem qui sicco ventriculo sunt præditi, fibras habent, glandulas, & tunicas ejusdem adeo constipatas, corrugatasque, ut multam simul humiditatem excipere non possint; adeoque unica potatione modicam humiditatem sufferunt, ut subindè madefiant, licet ob citam resolutionem mox iterum sitibundi fiant; quamobrem sæpius potare coguntur, sed in singulis vicibus parùm bibere. Cæterùm modicus hic potus intelligitur exigi ab intemperatis corporibus ad siccum, sed intra sanitatis latitudinem, cum cæteroqui febricitantes, alique ex morbo sicciores redditi præternaturaliter, nedum sæpius sitiant, sed etiam abundantius potent.

Præterea addit Galenus, hos à plurimo potu gravari, fluctuationibus infestari, & superfluitatibus scatere: quoniam immodicus potus, cum non possit à glandulis, & tunicis Ventriculi, propter ejusdem texturam duriorē, constipationemque, excipi; proindè fit, ut superflua, & exuperans humiditas per ejus ca-

vum fluctuet, aut aliò divagetur, atque adeo excrementa cruda, aquosa, & phlegmatica dicta cumulet. Accedit, quòd Ventriculus siccior redditus, ineptus evadit coctioni, & dissolutioni ciborum: quare, si potu impleatur, magis in concoctione lædetur, ac propterea cruditatibus gravabitur. Debent idcirco tali Ventriculo præditi, paucum, sed iterato potu irrorari, ut in meliorem statum sensim reducantur. Verùm ex inferius dicendis hæc omnia clariora fient.

Postremò concludit, quòd cibus delectentur siccioribus, vel quia isti conservari desiderant, & conservatio per similia fieri dicitur; vel potius quia cum cruditatibus, & fluctuantibus serositatibus abundant, ad illas absumendas naturaliter appetunt sicciores, solidioresque cibos. Hinc non quidem in omni statu, sicciori Ventriculo præditi, siccioribus alimentis delectantur, sed solum cum ob languorem à superabundanti humiditate gravantur. Vel demùm dicas, eos hic à Galeno considerari, qui à Nativitate sicciori ventriculo sunt affecti, ut propterea sponte Naturæ exigant, quæ similitudine substantiæ sunt dotata. Quamobrem hæc videtur intercedere differentia inter naturas intemperatas morbosas, & intemperatas intra sanitatis limites, atque à primordiis Naturæ ingenitas, quòd intemperata ex causis morbosis, contrariis delectentur; ex nativitate verò, similibus; nisi tamen egeant reductione, in statum scilicet meliorem.

CAPUT LV.

LXI. in Galeno.

Signa humidi Ventriculi.

TEXTUS.

Humidioris autem, si neque sitibundi fiant, & superabundans humidum facile tolerant, & cibis gaudeant humidioribus.

PARAPHRASIS.

Signa humidioris Ventriculi ab opposito describuntur: Quod isti nimirum sitibundi non sint, ob humiditatis excessum: hunc autem facile tolerant, utpote qui ab ortu Naturæ inductus usus, redditus jam satis, superque est Ventriculo familiaris, & limites salubritatis non excedit. Gaudent præterea cibis humidioribus, veluti conformibus propriæ habitudini, atque ex indicto ejusdem Naturæ, à principio Vitæ usitatis. Atqui advertit, & scite Sanctorius, humidiora alimenta hinc intelligi debere substantifica, quæ nimirum foveant constitutionem ipsam Ventriculi humidam, atque insuper in aliti substantiam commodè transmutari possint; neutiquam verò excrementosa, laxantia, & aquea serositate partes opplentia, quæ sanè nedum his, sed aliis Corporibus proculdubio nocerent, in longius tempus præsertim assumpta.

CAPUT LVI.

LXII. in Galeno.

Signa calidi Ventriculi.

TEXTUS.

(T. 71.) **C**alidior verò natura Ventriculus melius quidem concoquit, quàm appetat, & multò magis quæcumque dura sunt, & non facile alterationem suscipiant: nam quæ facile alterantur, in ipso corrumpuntur; gaudetque calidis potibus, ac cibis, neque à frigidis ullam percipit noxam, si modicè ipsis utatur.

PARAPHRASIS.

Calidioris verò Ventriculi indicia recensentur, quod melius concoquat, quàm appetat, quoniam coctio ex Aristotele 4. Meteor. dicitur, perfectio à proprio, & naturali calore, adeoque solius caloris actio est. Quæ enim concoquuntur, per segregationem partium utilium ab inutilibus ad statum coctionis perducuntur: quod sanè non nisi à calore haberi potest. Minus verò appetere ponitur, quia ex eodem Galeno 5. de Usu partium cap. 4., & 5. de Symptom. causis cap. 7. Fames, & Appetitus fieri dicitur ab humore melancholico acido, quo frigidus Ventriculus potius, quàm calidus abundat. Sed & neque simpliciter dixit Galenus calidiorē Ventriculum nullatenus appetere, sed solum quod magis, seu melius concoquat, quàm appetat; sive (sub meliori forma loquendi) quod minus appetat, quàm concoquat; unde per comparisonem solummodò loquutus est. Addit præterea, quod multò magis concoquat quæcumque dura sunt, & non facile alterationi subjiuntur; quæ verò facile

lè alterantur, in ipso corrumpuntur. Rationem hujus affert idem Galenus 1. de Alimentor. facult. cap. 1., ubi quærens cur nonnulli melius concoquant dura cibaria, puta carnem bubulam, quam pisces saxatiles, inquit, quòd in his bilis adeò abundat in Jecore, & Cysti fellea, ut ad Ventriculum regurgitet, ibique duriora alimenta diluat, ac dissolvat; at verò si cibos inveniat labiles, quique facile concoquuntur, eos in naturam biliosam transmutet, atque amarulentam cruditatem excitet. Verùm ex observationibus Anatomicis id faciliùs explicatur per succos acido-âcres ad eundem Ventriculum confluentes ex glandulis ejusdem lenticularibus dictis, qui cùm aliquandò magis acredine, quàm aciditate vigeant, ut in his, qui calidiori temperamento præditi dicuntur, nidorem pariunt, cùm autem potiùs aciditate, quàm acrimonia præpollent, ut in frigidiori temperatura, ructus acidus, & acidam cruditatem excitant: de qua tamen re infra.

Gaudet insuper calidis potibus, ac cibis: his enim, ex superiùs dictis, meliùs conservabitur; quoniam Corpora ab ortu Naturæ temperata consimilibus delectantur, iisque opus habent, ut in eodem statu conserventur, dummodò excessus talis, ac tantus non sit, ut correctione potiùs, reductioneque egeat, quàm conservatione. Denique à frigidis nullam noxam percipit, si modicè ipsis utatur; etenim per ea, quòdammodò refracto calore, præservatur ab ægritudinibus, caloris excessum consequentibus; vel etiam reducitur in meliorem statum, qui magis accedat ad moderatum temperamentum, omnium optimum. His adnectitur in textu particula, *Modicè*, quæ idem sonat, ac convenienter, moderatè, & sensim, sive paulatim: nam *Omne nimium, Naturæ inimicum*: & *quod paulatim fit, tutum est*, 2. apbor. § 1.

CAPUT LVII.

LXIII. in Galenò.

Signa frigidi Ventriculi.

TEXTUS.

Frigidus verò natura Ventriculus ad appetendum quidem plurimùm viget, ad concoquendum autem minimè, tales præsertim cibos, qui frigidi sunt, & non facile alterationem suscipiunt. Citò itaque in ipso acescunt, atque ideò acidis eructationibus talis ventriculus plurimùm abundat, & gaudet quidem frigidis, sed ab eorum usu immodico facile offenditur. Ità & ea, quæ extrinsecus frigida occurrant, nequit longiori tempore tolerare, quemadmodum neque calidus, calida. (T. 72.) Malæ verò temperatura, quæ morbi ratione Ventriculum occupant, hoc differunt ab his, quæ naturales existunt, quoniam contraria, non autem similia appetunt, quemadmodum naturales.

PARAPHRASIS.

Frigidus ex adverso Ventriculus ad appetendum quidem plurimùm viget, ad concoquendum autem minimè, & eos præsertim cibos, qui frigidi sunt, nec facile alterationi, & coctioni subjiciuntur. Neque verò satis fuit dixisse frigidos cibos, sed oportuit addere difficulter concoquibiles: siquidem multi cibi, tametsi frigidi statuuntur, quia tamen faciles sunt concoctionis, profectò à frigido ventriculo commodè dissolvi, & concoqui possunt, uti sunt fructus omnes, qui à Medicis horarii appellantur, præsertim Cerasa, Pruna, Mora, istiusque generis alia. Ratio autem, cur multùm appetat frigidus Ventriculus, sed parùm con-

concoquat, deducitur ex Capite præcedenti, & potissimum ex eo, quia à succis acidioribus, Ventriculi frigiditatem comitantibus, aut consequentibus, coctio, seu dissolutio in his promovetur, quæ sine fermentatione non fit, ut alibi dictum.

Amplius, cum cibus impletur frigidis, & difficulter concoquibilibus, facile in acidam cruditatem incidit, & acidis eruptionibus abundat: hæ enim frigiditatis, seu debilioris caloris notæ sunt.

Insuper gaudet hic Ventriculus frigidis alimentis, ob analogiam, sed ab iisdem immodicè sumptis facile offenditur; quoniam per ea, quantitate, & qualitate excedentia, fit transitus ad statum præternaturalem, adeoque necessariò lædentes actiones; cum sanitas intra certos limites concludatur.

Præterea, quæ extrinsecus frigida occurrant, nequit frigidus Ventriculus tolerare, quemadmodum neque calidus calida: per quæ verba Galenus videtur sibi met contradicere: siquidem supra dixerat, frigidum Ventriculum frigidis gaudere; nunc verò subdit, frigida non posse Ventriculum frigidum diutiùs tolerare. At perpensis iisdem accuratiùs, nulla erit in Galeno contradictio, nam ibi mentionem fecerat de his, quæ intrinsecus assumuntur; hic verò de extrinsecus applicandis: Cibi enim quamvis sint frigidi, quia tamen facile concoquuntur, promptè admodum dejiciuntur, ideòque citò desinunt agere, aut pati in Ventriculo. At verò frigida externa, si diutiùs persistant, Ventriculum necessariò lædunt, cum in illum agant citra passionem, aut sui alterationem, eò quòd sint de genere agentium externorum, quæ alterant, & vincunt, non autem alterantur, & vincuntur. Eadem ratione dicendum de Ventriculo calido, qui nec extrinsecus calefacientia diuturno tempore sufferre potest, cum ab

iisdem summoperè alteretur, & calefiat, citra eorundem remissionem: quàmobrem appositè dixit, Ventriculum hæc longiori tempore tolerare non posse, quoniam exinde continua succedit, & permanens alteratio, cui Ventriculus imbecillis diù resistere nequit.

Ad calcem Capitis solvit quandam difficultatem Galenus, num scilicet Appetitus Ventriculi sit ad similia, an verò ad opposita: aitque malas temperaturas, seu intemperies morbosas, Ventriculum infestantes, contraria appetere; intemperies verò naturales appetere similia. Ratio est, quia intemperies naturales sunt in latitudine sanitatis, & modicum recessum habent à mediocritate, seu à temperie moderata, quæ est reliquarum regula, ideoque petunt conservari similibus, juxta superius tradita. At intemperies morbosæ, cum sensibili operationum læsione conjunctæ, quoniam ad salutarem statum reduci debent, curatione egent, ac propterea contraria expostulant. Atque hinc modò deduci potest, ad mentem Galeni, cur in Pica, aut Malacia gravidarum, sicut etiam in cæteris appetitibus morborum, ad opposita semper patientes concitentur. Verum, quo pacto hæc intelligenda sint, alibi explicuimus.

At verò his obstare videtur Hydrophobia in demorsis à Cane rabido, cujus venenum siccitatem præsefert, & tamen Rabidi aquam abhorrent.

Verum respondetur, Rabidos delirare, unde nil mirum, si aquam fugiant, cum & multa alia deliri abhorreant, sive conformia, sive difformia illa sint Morbo, & causa morbificæ. Alias responsiones afferunt Sanctorius, & Rudius, apud quos leges.

Quoniam autem Galenus superioribus Capitibus præcipuum signum Temperierum Ventriculi à Fame, & Siti desumpsit, utpotè quæ propriæ illius passionem sunt, idcir-

idcirco, arrepta hinc occasione, breviter de Fame, & Siti, earumque causis edisseramus.

Digressio de Fame, & Siti.

IN Fame definienda non conveniunt Aristoteles, & Galenus. Ille enim 2. de *Anima* tex. 28. Famem definit, *Appetitum Calidi, & Sicci*: Hic verò 1. de *Symptom. Causis* cap. 7., *Tristem esse dixit, seu molestam sensationem, seu suctionem, factam in orificio superiori Ventriculi, cum ipsiusmet corrugatione*. Quin ibidem asserit, quinque in universum requiri ad Famem, seu appetitum excitandum. Primò enim inquit præcedere consumptionem in cunctis partibus Corporis: subsequi secundò attractionem, seu suctionem sanguinis ab eisdem: Tertiò, suctionem hanc protendi per venas omnes ad Jecur usque. Quartò, ex Jecore per Venas Meseraicas alimentum sugi à Ventriculo: Quintò tandem ab hoc Stomachum lacerari, & ab ejusmodi suctione corrugari, subindeque ad famescendum, atque ad appetendum cibos sollicitari, ut seipsum ab ea molestia vindicet.

Sed in utraque non leves occurrunt difficultates. Et quidem in Aristotelea definitione, sive pro calido sicco, calidum siccum formaliter, (ut ajunt) intelligatur; sive potius solidum, ut alii exponunt, erit semper quod objici possit: nam neque semper in Fame Appetitus fit calidi sicci: neque semper quod solidum est, appetimus, nec quod solidum tantummodo est, cibos propriè dici potest, qui perpetuò solidus nec est, neque esse debet. In Definitione, seu Descriptione Galenica fingere tot tractiones, suctionesque, parùm Rationi consonum videtur. Obstant pariter in Venis valvulae, totaque Viscerum naturalium Anatome, qua jam

satis innotuit, nutritionem partium peragi per Arterias, non per Venas; unde si istæ suctione traherent, potius in Corde suctione hæc perferretur: sed etsi in Ventriculo, neque ibi desineret, sed in Oesophagum, & ad Fauces talis suctione perveniret, ibique potius Fames fieret. Cum Stomachus præterea famescit, jam partes à præcedenti alimento, sibi ipsis applicito, restauratae, commodè satis consulere, quare causam trahendi nullam habent, eoque magis in Corporibus plethoricis, in quibus sanguis, & alimentum Corporis, copia potius, quam inopia peccat, ut propterea dixerit Hippocrates 1. *aphorif.* 3. detractionibus eadem egere, ne repente à multitudine suffocentur, & pereant.

Facilius idcirco definiemus Famem, *Esculentorum Appetitum, seu desiderium proveniens à Stomachi vellicatione*. Vellicant autem Stomachum succi quidam eò confluentes, qui cum acido-acres sint, fibras, nervosque plurimos, per illius substantiam diffusos, quodammodo compungunt, & corrugare faciunt, atque inde ad famescendum sollicitant. Ingestis autem ad sufficientiam cibis, vel assumptis juribus, præfertim pinguibus, & calidis, Fames desinit; quia nimirum succi acres illi, veluti infringuntur, obtundunturque, & ventriculus ipse cibis oppletus simul illinitur, atque à corrugatione in fibris inducta solutus, vindicatur pariter à compungente succorum acrium vellicatu.

Hinc oleosa, butyrosa, pinguis, crassa, atque hujus generis alia, Famem promptè sedant, & momento fere temporis adimunt. Nec dissimili ratione deficit Fames in Obstructis, Crudis, & Adiposis: vel quia glandulae, ex quibus succi illi in Ventriculum extillant, glutinosa materia sunt oppletæ; vel quia iidem succi inertes evaserunt, & ad pruritandum penitus in donei.

Unde

Unde verò fucci isti acido-aeres in Ventriculo confluant, non apud omnes convenit. Galenus, P. Castellus, & Helmontius à Liene eos derivari ajunt, esseque portiones acidæ melancholiæ per Vas breve illuc delatas. Sennertus *lib. 3. Prax. p. 1. sect. 2. cap. 5. q. 1.* acidum hunc humorem Ventriculo ingentum arbitratur. P. Borrellus *centur. 2. obser. medit. 1.* pro Melancholia Bilem substituit, ex cysti fellea ad ventriculum confluentem, (de qua antea Galenus) per ductum nondum Anatomicis detectum. Nonnulli reliquiis ciborum, ex præcedenti digestionem remanens idipsum attribuunt. Sylvius Deleboe *Disput. Medic. 2.* è glandulis Salivariis illos evocat. At Ego crediderim potius ab Arteriis prodire, præsertim iis, quæ per Ventriculi tunicas, & per Pancreas disseminantur, atque per exiles ramulos in glandulas Ventriculi lenticulares desinunt, ibique liquores istos deponunt, ut in Anatome meminimus. Non negaverim tamen in digestionis auxilium, ope fermentationis, & dissolutionis ciborum absolvendæ, multa alia pro exacta elaboratione concurrere, convenientem scilicet Ventriculi structuram, volatiliū spirituum è nervis prodeuntium energiam, & salivarii roris misturam, ex antecedenti molitura dentium habitam: de quibus alibi.

Sicut Fames dicitur Esculentorum desiderium, ita Sitis, Potulentorum appetitus, dicenda erit, ex humidæ substantiæ defectu proveniens. Videtur enim humido potissimum sedari sitis, sive calidum, sive frigidum illud sit, (quemadmodum ex lacte in lactentibus) ut propterea necesse non sit, potum debere esse frigidum: nam & ignis ipse, & calido, & frigido humore superaffuso, penitus extinguitur. Sed & nec defunt, qui Sitim potius calidis sorbitionibus moderantur: quin & vino, aut aqua ardente, sibi sitim adi-

munt, quæ cæteroqui frigido potu non tam facile sedaretur. Refert de seipso Gasfendus *Tom. 2. lib. 5. cap. 1.*, quod cum præ dolore dentium coactus fuerit aquam calidam bibere, sedato postmodum dolore, etiam per æstatem frigida fuerit illi injucunda, & cum post biennium quotidiana febre corriperetur, calida sola, per paroxysmos ardentissimos, delectarit. Apud Veteres etiam mos erat calidam potare, quæ in deliciis plurimum habebatur, sicut nunc consuetudo invaluit apud Hispanos, Italos, & cunctos ferè Europeos, calidum Chocolaten, & decoctum Cooffe quavis hora sorbere, ad sitim potissimum sedandam: In hoc quippe multum usus prævalet.

Deficit autem serositas ista nedum in Stomacho, & Ventriculo, verum etiam in Oesophago, faucibus, ore, larynge, pulmone, totoque penè Corpore, quia humida substantia, præsertim lymphica, ex cunctis partibus absumitur, & vel per urinam, vel per sudorem, vel per fæces, vel per sputa, & salivam, vel per lacrymas, vel insensibiliter dissolvitur, unde in illius defectum nova semper subrogari debet.

Nedum verò à deficiente salivario rore, sed ab eodem crassescente, & glutinosiori reddito, acri, falso, pontico, aliterve vitiato, Sitis oritur, ut in Hydropicis, & Hypochondriacis, imò etiam in sanis, mox à pastu saturis, experimur. Saliva siquidem fluida esse debet, nulloque vitio imbuta, ut partes irriget. Sed etsi in reliquis partibus serosa ista substantia minime deficiat, sitamen in Ventriculo, faucibus, & gutture desit, aut crassescat, proculdubio sitis persentitur, quemadmodum in Asciticis, atque in his, qui anhelitu laborant, aut à pastu plurimum sunt vociferati; unde & de organo Sitis plerisque etiam ambigendi occasio data est.

Hinc

Hinc modò satis apertè patet, quòd debuisset potiùs Aristoteles definire Sitim per appetitum humidi solùm, quàm frigidi, & humidi. Qua ratione experimur eos, qui vescuntur oleribus, fructibus, jusculis, lacte, & similibus, vel nihil, vel modicùm sitire. Quin etiam sunt, qui ad plures dies nunquam potant, cibariis solummodò contenti. In Actis Anglicis Anni 1667. refertur, quòd in Insulis Caribum Animalia, vel parum, vel nihil bibant, sicut pariter Equi in Guanaboa, ubi etiam Vaccæ, nonnisi spatio semestri, & Capræ semel in singulas hebdomadas, potare solent. (a) Præfatus Cassendus narrat, Virum quendam nunquam potasse, vel vix anno semel, ut amicis gratificaretur. Et nos jamdiù novimus Presbyterum sanæ alioqui constitutionis, at præ cæteris voracem, qui per hebdomadam integram abstineret à potu. Alii plures referuntur ab aliis.

At hic curiosè quæri potest, Fames ne, an Sitis Animantibus tolerabilior sit, & utram ex ipsis diutiùs sustinere valeamus; aut sine qua in longius vitam protrahere possimus. Et quidem in statu sano periculosior fames est, quàm sitis, graviusque damnum futurum ex illa, quàm ex ista: Quoniam per Famem cogimur reficere sanguinem jugiter absumptum, & restaurare robur vitale, ex cujus defectu proculdubio vita desinit. Hinc cum ex præcedente fame cibus congruenter non adjicitur, Bulimos, & Animi defectio sequitur, quam tandem comitatur Mors. Verum tamen est, quòd sæpiùs, longo tempore jejuni, & famelici, vitam nonnulli solo potu sunt tutati, quo nimirum jugis illa interna consumptio plurimùm infringi potest, & succi digestivi, ac dissol-

ventes in stomacho, non leviter diluuntur, ne Bulimon inferant. Sed hoc ad multum tempus nil admodum proficit, quemadmodum ex cibo fit. In statu verò præternaturali, potissimùm in febrientibus intolerabilior sanè Sitis est, quàm Fames: Attamen per id temporis Fames vel omninò deficit, vel magna ex parte minuitur; quin & æstuantia viscera, & sanguis ipse acrior ex fermentatione redditus, potulentas serositates exigunt, quibus tantus ardor, vires enervans, & stomachum excrucians, compescatur, desinente intereà, vel multùm imminuta in partibus nutritione; cum alioqui Natura, pravis humoribus oppressa, omnes conatus in eorundem coctionem, segregacionemque adhibeat, ut tandem domitos, ac secreta expellat: quamobrem dicebat Hippocrates 2. aphor. *impura Corpora, (qualia profectò sunt febricitantium) quanto plus nutris, tanto magis ledis*. Itaque gravior Fames in statu sano, periculosior Sitis in statu morbofo censenda est.

Hinc nunc ergo facilè colligi potest, causam Famis, cum sensu indigentia, in stomacho habitæ, esse vellicationem, à succis Ventriculi dissolventibus excitatam, ex præcedenti plerumque defectu substantiæ alibilis sanguinis in partibus nutriendis: Sitis verò causatur, (habitæ similiter cum sensu indigentia,) esse consumptionem serosæ substantiæ, præcipuè in Ventriculo, Oesophago, & faucibus, propter ejusdem exsolutionem, educationemque per Renes, poros cutis, & partes glandulosas, quæ cum jugiter repurgentur, cogimur assiduò à Siti illam restaurare, ne præsertim sanguis in suo motu ferro privatus, alicubi remoretur, & concreascit.

Sed curiosiùs inquirendum, quinam appetitus animantibus primùm accidat in statu sano, Famis ne, an Sitis. Et dicendum,

(a) Id ipsum referunt Historici de Dromedariis in Ægypto.

dum, seclusa quacumque consuetudine, aut peculiari alicujus Corporis constitutione, præcedere Famem, subsequi Sitim: quoniam, ut benè Vallesius, in statu naturali prior est indigentia Cibi, quàm Potus, cum nosmetipsos experiamur prius famescere, deinde sitire. Cæterum in statu morbofo contrarium sæpè sæpius accidit, potissimum in febrientibus, ut & in laboriosis, atque nimium exercitatis Corporibus, exsoluta nimirum per copiosos sudores lymphica serositate.

At unde fit, ut plerumque potu, præfertim alibili, citius reficiamur, quàm cibo, licèt exquisito? Ratio deducitur ex faciliiori transitu illius in supplementum absumpti sanguinis: quin & non raro, solo per linguam potabilis liquoris gustatu, illicò vires instaurantur, quemadmodum passim ex vino, vinique spiritu dulcorato, evenit: quandoquidem per papillarum linguæ porulos, citissimè spiritus, tenuioresque illius partes in Corpus, per arterias, & nervos deferuntur: Porro papillis istis melius, luaviusque res assumptas degustare solemus, & salivario rore madefactis citius, salubriusque cibos conficimus, ut ex Anatome. Sed & portiones ciborum, ac potuum tenuiores, per occultos Ventriculi meatus momento ferè temporis in sanguinem quoque transfunduntur; cum lipothymia affecti, ab assumptis alimentariis potibus subinde reficiantur. Atque hinc non defuerunt, qui omnem totius Corporis nutritionem, per halitus, aut vapores, è ventriculo suggestos, peragi opinati sint.

CAPUT LVIII.

LXIV. in Galeno.

De Malis Temperaturis in Ventriculo conjugatis.

TEXTUS.

(T. 73.) **M**alæ autem temperaturæ in Ventriculo conjugatæ ex compositione simplicium cognoscuntur. Oportet autem, eas, quæ jam sunt dictæ, diligenter advertere, easdem ab his, quæ dicuntur, distinguentes. Non solum enim Ventriculus sitibundos, & minimè sitientes facit, & frigidi, calidive potus appetentes, sed ea quoque viscera, quæ in Thorace sunt, ut Cor, & Pulmo. Sed qui ob horum sitiunt caliditatem, plus inspirant, & longius expirant, atque æstum in Thorace sentiunt, non sicuti qui ventriculi ratione in hypochondriis caliditatem patiuntur, & cum potaverint, non statim sedatur sitis, & magis sedatur sitis, cum frigidum hauserint, quàm cum calidum nimis. Refrigerat autem eosdem & frigidi aeris inspiratio, quæ nihil eos juvat, qui ventriculi ratione sunt sitibundi. Ita & hi, qui contrario modo se habent, à frigida inspiratione sensibiliter molestantur.

PARAPHRASIS.

Postquam Galenus Temperaturas Ventriculi simplices superioribus Capitibus retulit, brevitati consulens, unico nunc Capite, de compositis mentionem facit, & inquit: Conjugatas, sive compositas Ventriculi intemperies, facilè ex supradictis simplicibus dignosci; puta si Ventriculus simul siticulosus sit, & calorem sensibiliter ostendet, calidus, siccusque dicetur. Si verò malè concoquat, & super-

superfluitatibus aqueis abundet, frigidus, humidusque appellabitur. Et sic de reliquis.

Advertere autem subdit oportere, ne signa hæc ab aliis visceribus affectis dependant: posset enim Sitis à Pulmone, aut Corde plurimum excalefactis excitari, ut febrientibus contingit; quin & de Jecore inflammato idem docet Galenus 6. de loc. affect. cap. 3. In his autem distinguendis Inspirationem, Expirationem, atque æstum in thorace considerandum inquit, quæ planè ad Pulmonem, & Cor pertinent, ut & inspirati aeris frigidi beneficium, quod sanè, Ventriculi ratione sitibundos, nullatenus juvat. Atque hinc modò deduci potest, quàm benè à plerisque sit putatum, Sitim nonnumquam haberi molestissimam à Pulmone excandescente, qui si fortassè à destillante seroso, ac lymphico humore irroretur, sedatur multum, juxta illud Hippocratis 4. aphor. 63. *Quibus in febribus ardentibus tusses leviter irritantes fiunt, ii non multum siti infestantur.* De qua re in nostris Commentariis Aphorismorum.

Quoniam verò Sitis accidere potest, nedum propter Ventriculi ardorem, verum etiam ob Pulmonis æstum, pergit exinde Galenus ad perquirenda signa intemperierum Pulmonum. Et primò calidioris Pulmonis signum inquit esse majorem, & longiorem inspirationem, expirationemque, quoniam, ex mente ejusdem, Respiratio videtur instituta ad refrigerium Cordis, & ad eventilandas calidas fuligines. Secundò, æstum in thorace longè majorem esse, quàm in hypochondriis. Tertiò, quòd à potu frigidus non statim sitis sedetur, ac si à Ventriculo proveniat, cum tempus aliquod exquiratur, ut per ductus proprios illuc pertingat. Quartò, quòd magis, citiusque refrigeretur Pulmo à potu frigidus, quàm calidus, cum tamen Ventriculus etiam à potione calida temperetur in Siti. Quintò demum, quòd Pul-

mones excalefacti etiam inspirato frigido aere temperentur, secus verò Ventriculus. Sed de usu Respirationis infra.

CAPUT LIX.

LXV. in Galeno.

Signa Pulmonis frigidi.

T E X T U S.

ET hoc maximum sit frigidi Pulmonis indicium; ut verò frigidum inspirantes manifestè molestiam sentiunt, & frigiditatem, ità & caliditas est ipsis amica: sed & pituitæ excrementa cum sreatu, & tussi expuunt.

P A R A P H R A S I S.

Pulmonis frigidioris indicia ex opposito referuntur; sensibilis frigidae inspirationis læsio, nam frigidum pectori inimicum, & ex Hippocrate 3. aphor. 23., qui debile pectus sunt sortiti, tusses, pleuritides, peripneumonias, aliasque ægitudines hyeme vagantes facillimè incurrun. At verò sicut hi à frigida inspiratione offenduntur, sic è converso à calido aere juvantur. Expuunt præterea isti excrementa pituitosa, & compacta, nedum tussi, sed etiam simplici sreatu, superabundante in his serosa colluvie, & ob pectoris languorem, in asperam Arteriam decumbente. Quòd si propter imbecillitatem adhuc nequeant excrementa hæc expui, & excreari, ut in senio contingit, aderit quidem Tussis, sed citra expectorationem, ut dicitur 2. aphor. 40. *Rauedines enim, & gravedines in valdè senibus coctionem non admittunt*, eoque minùs expurgationem: Quare procedente tempore

re Astmatici fieri solent, vel etiam Em-
pyici, aut Hydropici.

C A P U T L X.

LXVI. in Galeno.

Signa Pulmonis sicci, vel humidi.

T E X T U S.

(T. 74.) **P**ulmonis autem siccitates
excrementis vacant, &
pituita, & vocem claram efficiunt: quem-
admodum humiditates obscuram reddunt,
ac raucam: Et cum vehementius, aut acu-
tius loqui studuerint, tunc intercidunt ex-
crementa.

P A R A P H R A S I S.

QUæ Pulmonem siccio-
rem attestan-
tur, referuntur duo, nempe ex-
crementorum, ac pituitævacuitas, & vox
clara. Carent quidem excrementis, tum
vaporosis, tum pituitosis sicci Pulmones,
etenim aqueæ superfluitates absumuntur,
& expiratione, aut etiam transpiratione
insensibiliter evaporant. Vox verò clara
fit, quoniam Trachea, & ramuli asperæ
Arteriæ, quò sicciores sunt, eò læviga-
tiores; unde per ipsos celerrimè Aer, &
vox excurrit: neque enim aliunde vox rau-
ca evadit, nisi quia fistula Aeris ab humi-
dis superfluitatibus inconvenienter irro-
ratur, & quodammodò in suis glandulis,
& membranula intumescit, aut inæqua-
liter afficitur; unde via scabra, & non æ-
què pervia fit: qua ratione experimur Tu-
barum sonitus tremulos fieri, & clangores
quosdam edere, auditui injucundos, cum
ductus illarum plus justo à Tubicinibus hu-
mescunt, & halitu, vaporeque oris, ni-

Tom. V.

miùm irrorantur: Quod & ex Catar-
rho, ac Tussi diuturna similiter contin-
git.

Ex adverso subdit, humiditates, ean-
dem obscuram, ac raucam reddere: sed &
cum vehementius, aut acutius homines lo-
qui studuerint, tunc intercidunt excre-
menta. Siquidem in vehementiori, & a-
cutiori voce, pulmones coguntur aerem
efficacius, violentiusque protrudere, a-
deòque seipsos in suis porulis, & vacuita-
tibus constringere, unde excrementa sero-
sa, ibidem collecta, sursùm in Tracheam
propelluntur, à quibus vox intercipitur,
cogiturque in medio cursu desistere, ut ex-
crementa ipsa illuc delata expuantur, &
Tracheæ ductus reddantur liberiores. Id-
ipsum etiam non rarò evenit ob compres-
sionem impensius habitam in partibus, &
glandulis laryngi adjacentibus, cum in vo-
ce acutiori, vehementiorique illæ pluri-
mum constringuntur, subindeque conten-
tas serositates deponere coguntur. Ve-
rùm aliqua alia etiam de his recensea-
mus.

Digressio de Motu Pulmonis.

QUandoquidem hic à Galeno de Re-
spiratione, & Motu Pulmonis
mentio facta est, supervacaneum non erit
breviter etiam hoc loco nonnulla alia de il-
lo recensere, quæ aliàs videbantur omis-
sa. Et quidem quamvis in, Respiratione,
motus Pulmonis habeatur, non tamen ex-
indè deducere certò licet, Respirationem,
& motum Pulmonis idem esse; siquidem
Respiratio propriè pertinet ad Thoracem,
ejusque musculos, ac potissimum ad Se-
ptum transversum; motus verò Pulmonis
sejunctus omninò est ab illius amplificatio-
ne, constrictioneque. Optimè namque
Sennertus lib. 1. Institutionum cap. 11., &
cap. de Apoplexia in Praxi, observat non

G

dila-

dilatari omninò Pulmonem ad motum Pectoris, cùm Avium Pulmo dilatetur sine Pectoris amplificatione, eò quòd in ipsis osseum est, & immobile. Atque hinc idem Auctor enucleat, cù Apoplectici non subito extinguantur, cessante motu Musculorum Thoracis, atque respiratione penitus extincta, ut contingit in fortissima Apoplexia, ex testimonio Galeni 2. *aphor. comment. 42.*, quia scilicet, etsi motus Thoracis desinat, remanet tamen, saltem ex parte, motus aliquis in pulmone, quo vita sustineri possit, juxtà illud ejusdem Galeni 6. *de loc. aff. cap. 5. Impossibile est viventem non respirare, & respirantem non vivere.* Quamobrem rectè quoque monet Nicolaus Chesneau lib. 2. *observat. cap. 1.*, *absurdum esse*, inquit, *si Respiratione sit omninò virtuti animali referenda, à qua muscoli moveantur, cogitare, omnibus partibus Corporis motu, & sensu privatis, ipsam manere propter vitæ necessitatem: necessitas quidem viget, at deficiente instrumento, ad opus perficiendum, omninò invalida est, qualiscumque illa fuerit. Aliquod igitur respirationis Instrumentum statuendum est spiritu animali non indigens ad motum, quo, aliis deficientibus, quædam adhuc, hujus motu, servetur respiratio, propter vitæ necessitatem, etiamsi Cordi tandem non sufficiat.* Hæc Chesneau. Hanc eandem sententiam fusiùs prosequutus est Thomas Bartholinus peculiari Opusculo, *de substantia, & motu Pulmonum*, cohærenter observationibus Anatomicis Marcelli Malpighii, quemadmodum etiam refert in sua Anatome Renovata cap. *de pulmonibus*.

Sensu insuper patet, ad quamlibet Thoracis amplificationem, Aerem continenter asperam Arteriam, ejusque tracheolas subire: at cui usui, non benè constat. Aristotelei, & Galenici nonnisi ad Cordis fervorem, & Pulmonis æstum temperandum, existimarunt, quibus as-

sentiri visus est Cartesius, Sanguinem motu attenuatum, arbitratus, aeris frigiditate condensari, ut evadat vitalis fomes flammulæ Cordis. At quis unquam id tribuet Ranis, aliisque aquatilibus, quæ licet calore ferè destituantur, respiratione tamen egent? quin etiam ex adverso in hypocaustis, aliisque locis calidissimis, animalia benè vivunt, absque eo, quòd Aer frigidus exhauriatur, attemperationi Cordis inserviens. Sed & cui bono, insuper, attenuatus sanguis condensari debet, ut iterum per motum Pulmonis, & Cordis rarefiat? Circulus equidem inutilis in hoc esset admittendus. Alii cum Cassendo, tom. 2. *de Animalibus cap. de Respiratione*, arbitrantur, motus Respirationis usum esse, ut transeuntis sanguinis per Pulmones, impuritates absorbeantur, & per expirationem, ac tussim, (si fortasse solito crassiores fuerint) educantur. Verùm quamvis Pulmones, pro rata sua, emunctoria sanguinis, & Cordis vitæ fontis, dici possint, non tamen rectè huic tantum usui, & quidem vilissimo, videntur additi; neque ad hoc solum Aer conferens dici debet, cùm cæteroqui in humidis corporibus, seu Sanguinem ferofiore mactis, perquam optimè is circuitum absolvat, nec tamen per Pulmones ferositates istæ emungantur. At verò opinatus est Paracelsus suggeri ab Aere per Pulmones Cordi spiritum quendam vitæ fovendæ necessarium: cui communis Medicorum assertio consentire videtur, qui existimant Aerem in spiritus vitales transmutari, ex doctrina Hippocratis lib. *de alimento* dicentis: *Principium alimenti Spiritus*, idest Aeris, *respirationem esse*. Sed non facilè suaderi potest, cur ex defectu Aeris, tam brevi tempore Animal vita defungatur. Potior Respirationis usus, & Pulmonum motus, visus est aliis, Trajectio sanguinis è dextro in sinistrum Cordis Ventriculum per Pulmones, qui nisi aere

āere distendantur, praterfluentem Sanguinem nec admittunt, nec deferunt. At facto experimento à Roberto Kook, ut refertur in Actis Anglicis, innotuit superstes animal in vita esse, pulmonibus vel immotis, neque eorum depressionem, seu quietem, sanguinis motum impedire, aut mortis causam esse. Unde colligit idem Author, potius novi aeris defectu Animal interire.

Quamvis ergo difficile admodum sit, de præcipuo usu Respirationis, & motus Pulmonis aliquid certi determinare, cum ipsemet experientissimus Robertus Boyle se adhuc post multa tentamina ignorare fateatur: qui nihilominus attentè consideraverit innumeras, quæ exinde emergunt, utilitates, profectò affirmabit, non undumtaxat usui ejusmodi motum inservire. Vox etenim inde formatur, & loquela perficitur; comprimitur Abdomen, & chylosa materia per tubulos lacteos, & thoracicos in Cor protruditur: ejus quoque beneficio olfactus fit, & vel boni, vel mali odores hauriuntur, inutiles ferocitates, ac vapores è pectore, & pulmonibus extruduntur: sternuitur pariter, atque extussitur: è dextro in sinistrum Ventriculum Sanguis traducitur, cum constet animalia pulmonibus, & respiratione carentia unico tantum esse prædita Ventriculo, & Infantes intra uterum peculiari ductu, per quem Sanguis ad Cor deferatur, absque pulmorum expansione, gaudere. Sanguis ipse illac pertransiens floridior, ac repurgatior evadit, propter Aëris mixturam: nullibi enim, quàm cum in pulmonibus est sanguis, floridus, purus, ac rutilans magis conspicitur, ut observat Richardus Lovver, in suo *de Motu Cordis* Opusculo: id quod etiam in educto è Venis sanguine, & Aëri in aliquo vase exposito, palam fit. Denique debetur & Aëri quoque vis contemperandi æstum Cordis, & Pulmonis, cum & febrientes sub-

inde, & peripneumoniaci, à recenti, frigidoque Aëre plurimum allevantur, ut notarunt pariter Aristoteles, & Galenus. Atqui huic commodo non quilibet Aer satis est, sed medius inter nimium tenuem, & omninò crassum, ut aliàs in nostra Theoretica, & in Commentariis super Aphorismos Hippocratis meminimus.

CAPUT LXI.

LXVII. in Galeno.

De Voce.

TEXTUS.

(T. 75.) **N**on tamen ipsa Vocis magnitudo à caliditate, sicuti neque parvitas à frigiditate fit: sed altera quidem asperæ arteriæ latitudinem sequitur, & vehementiorem efflatum: parvitas verò à contrariis advenit causis. Quare neque semper, neque primum, sed ex accidenti, & solas naturales temperaturas, non autem adventitias vocis magnitudo, aut parvitas sequitur. Quoniam etenim talia instrumenta temperaturæ ratione sunt facta, ad hæc autem consequitur hujusmodi vox: idcirco contingit ex voce de naturali temperatura ratiocinari.

CAPUT LXII.

LXVIII. in Galeno.

De leni, & aspera Voce.

TEXTUS.

Nam & lenis vox arteriæ lenitatem consequitur, sicuti & aspera asperitatem. Lenitas igitur arteriæ moderatam sequitur temperaturam: asperitas verò siccitatem. Asperitas etenim fit ab inæqualitate duri Corporis. Arteriam verò duram similiarium partium, ex quibus constat, siccitas efficit: inæqualem verò dispersæ in eisdem humiditatis defectus.

CAPUT LXIII.

LXIX. In Galeno.

De Voce acuta.

TEXTUS.

Eodem modo neque acuta natura vox, si ne angustia faucium, neque gravis sine atitudine fieri potest. Angustia igitur ab insita, atque innata nascitur frigiditate: latitudo autem à caliditate. Differentiis igitur naturalium Vocum hæ, quæ ex affectu aliquo fiunt, sunt proportionales, quæ & ipsæ indicia sunt causarum, à quibus oriuntur, de quibus in libris de Voce sufficienter distinximus. (T. 76.) Reliquæ verò partes animalis interiores exilia habent temperaturæ indicia: tentandum tamen ea ex iuvantibus, atque nocentibus agnoscere, ac præterea naturalium potentiæ operationes. Dictum verò est in tertio de Causis Accidentium, quod cuiusque potentiæ virtus, & vitium

temperatura principalis existat. Temperaturarum itaque indicia jam explanavimus.

PARAPHRASIS.

DE Voce hoc loco, tribus Capitibus, speciatim Galenus agit, quæ Pulmonis, & Pectoris motum sequitur, atque adeò Aeris propulsionem, repercussionemque ad laryngem, & palatum, pro ejusdem modulatione: cùmque superius dixerit Vocem claram indicium esse Pulmonis siccioris, raucam verò humidioris, propterea ne quis putaret, illam immediate consequi temperaturas, non verò organorum vocalium conformationem, ac structuram, tacitam quandam difficultatem solvit, inquiens: Vocis magnitudinem non quidem à caliditate, sicut nec illius parvitatem à frigiditate provenire: & rationem affert, quia nulla intercedit connexio proxima, & immediata inter vocem, & calorem; neque res quælibet, quia calida est, vocalis erit, aut magnivoca, & è converso. Et quamvis Hippocrates 6. epidem. dicat, calidos maximam vocem habere, frigidos parvam: cui consentit Aristoteles 5. de Generat. Animal. & in Problemat. itemque Avicenna fen. 10. tertii, intelligendi tamen hi sunt, non quòd immediate magnitudo Vocis à calore dependeat, vel à frigiditate ejusdem parvitas, sed solum, quòd per calorem partes vocales denotentur ita benè conformatæ, ut ab amplitudine ductuum vocaliores sint; siquidem Vox magna, vel parva, immediate provenit ab amplitudine, vel angustia ductuum Aeris, & præsertim Arteriæ asperæ, & laryngis, ubi Vox efformatur, nec non ab impetu majori, vel minori efflatus ejusdem Aeris: quæ sanè arguunt vel calidam, vel frigidam earundem partium temperaturam, cum robore, vel languore virtutis. Hinc Galenus hoc loco subdit:

Quo-

Quoniam etenim talia instrumenta temperaturæ ratione sunt facta, ad hoc autem consequitur huiusmodi Vox; idcirco contingit ex Voce de naturali temperatura ratiocinari.

Ut prætereà Galenus ostenderet, Vocis diversitatem proximè, & immediatè à structura organorum provenire, exemplum affert Vocis lenis, & asperæ. Ait enim: Nam & lenis Vox Arteriæ lenitatem consequitur; Aspera verò, ejusdem asperitatem. Mox subdit: Lenitas Arteriæ moderatam sequitur temperaturam, asperitas verò siccitatem, quoniam asperitas fit ab inæqualitate duri Corporis: duram autem Arteriam, similarium partium, ex quibus constat, siccitas efficit: inæqualem verò, dispersæ in eisdem humiditatis defectus. Eodem modo Acuta Vox non sine angustia faucium, seu laryngis, fit. Angustia igitur à frigiditate dependet, latitudo autem à caliditate.

At qua ratione homines mutant vocem ex acuta, & exili, in gravem, & sonoram, cum ad pubertatem pervenerint, & semen gignere cœperint? Et ratio dubitandi est, quia nullus consensus inesse videtur inter Testes, & asperam Arteriam. Verùm Hippocrates in hanc rem 2. epidem. sect. 1. docet, quòd tussis diuturna cessare solet superveniente testiculorum tumore; & vicissim tumor, superveniente tussi. Et 2. epidem. sect. 5. ait, Vocis gracilitatem solùm solvi à Testiculorum varice. Aristoteles etiam 5. de Histor. Animal. cap. 14., ex Vocis mutatione, inquit, & testium magnitudine, innotescere tempus Pubertatis: & 7. de Histor. Animal. cap. 1. subdit: dum juvenes semen emittunt, vocem mutare incipiunt in asperiores, non tamen digniores; & 9. de Histor. eorundem cap. 5. observat in Gallinaceis castratis cristam pallescere. In idem coincidit quoque Galenus 2. de Temper. cap. 5. & 6. epidem. 4. comm. 27. At consensus hic

ex Anatome magis elucet, vel per venas, & arterias mammarias descendentes, consentientes cum venis, & arteriis ascendentibus ex Utero, & Hypogastrio; vel per nervos per pudenda diffusos, dependentes ex ramo vocali, & costali: quin & duo alii ramuli, recurrentes dicti, Epiglottidem circumcingentes, testes pertingunt, ex quibus manifesta communio.

Reliquorum viscerum interiorum Temperaturæ facilè, ex dictis hætenus, innotescunt, præsertim verò à juvantibus, & nocentibus, ac prætereà à naturalium potentiarum operationibus: Atque ita concludit in hoc Capite Galenus partium omnium dissimilarium Temperaturas. Nunc ad signa transit partium instrumentarum, secundum propriam structuram consideratarum.

CAPUT LXIV.

LXX. in Galeno.

Signa Naturæ Instrumentaria.

T E X T U S.

(T. 77.) **C**irca magnitudinem verò, vel formationem, vel numerum, vel situm, quæcumque quidem sensibus subjiciuntur errata, cognitu facilliora sunt: quæ autem sensu percipi nequeunt, quædam difficulter cognoscuntur: quædam autem nullo modo cognoscuntur. Capitis igitur magnitudo, ac figura, & Cerebri simul, in propatulo sunt, & de his antea diximus. Sic & quæ thoraci sunt, & quæcumque ad scapulas, & humeros, vel brachia, vel cubitos, vel extremas manus, vel coxendices, vel femora, vel tibias, vel pedes attinent, non est difficile cognoscere, sive secundum formationem, sive secundum

dum magnitudinem ex his aliquid non rectè se habeat, sive secundum numerum, sive secundum partium, ex quibus constant, composituram; singulorum etiam operationis detrimenta facile patent, quæ autem intra Corpus sunt, non omnia possunt agnosci.

P A R A P H R A S I S.

QUoniam ad initium hujus Libri dixerat Galenus, duo in universum concurrere ad naturalem cujuscumque Corporis constitutionem, debitam nempe primarum qualitatum in primis, & simplicibus particulis contemperationem, & organicarum partium convenientem structuram: postquam hucusque latè egisset de signis temperierum tum totius, tum principalium Corporis partium, percurrit nunc indicia malæ compositionis earundem, intra limites tamen sanitatis: etenim non desunt, qui Sanitate quidem fruuntur, bonaque temperie; sunt tamen in aliquibus membris vitiiati, & vel in magnitudine, vel in figura, vel in numero, vel in situ. De his igitur sermonem faciens, inquit, quòd quæcumque sensibus subjiciuntur errata, cognitu facillima sunt, ut Capitis magnitudo, vel parvitas, aut ejusdem inconcinna figura, Thoracis impropertio, brachiorum, manuum, aut digitorum, amplitudo, exilitas, aut defectus artuum; itemque in numero, situ, cæterisque vitium. At verò, quæ sensu percipi nequeunt, quia scilicet interiores Corporis partes occupant, ex læsionibus propriarum actionum, aut ex tactu, ut in Splenis, vel Jecoris tumoribus, aut etiam ex sensu ponderis, vel doloris, qui ab eodem patiente percipitur, dignoscuntur: quibus addi quoque possunt excrementa ex illis prodeuntia, ut in Intestinis, Renibus, & Vesica, licet non omnia possint agnosci.

C A P U T L X V.

L X X I. in Galeno.

De Ventriculo.

T E X T U S.

CUjusdam enim Ventriculum adeo parvum, ac rotundum, ac pronum secundum hypochondria situm habentem inspexi, ut manifestè ex circumscriptione propria, & videntibus, & tangentibus appareret.

P A R A P H R A S I S.

EORUM, quæ intra Corpus sunt recondita, exemplum afferens hoc Capite, fatetur, se cujusdam Ventriculum adeo parvum, ac rotundum, & pronum secundum hypochondria situm habentem, aliquando inspexisse, ut ex circumscriptione propria, & videntibus, & tangentibus manifestè appareret. Verum, hæc potius ex Anatome nota fiunt: dissectis enim cadaveribus, detecta sunt plurima Viscerum interiorum incommoda, ac maleficia, quæ sensus hominum latuerant, sanè prodigiosa; eorumque observationes innumerae extant relatæ apud eodem Authores.

CAPUT LXVI.

LXXII. in Galeno.

De Vesica.

T E X T U S.

Sic & cujusdam Vesicam contigit intueri ita expositam, ac parvam, ut si quando urinam tardius excerneret, tumor quidam circumscriptus manifestè cerneretur, non tamen aliud ex interioribus quidquam mihi unquam manifestum præbuit indicium. Tentare autem oportet, quam maximè fieri potest, virtutem ipsorum, ac vitium, etsi non certa scientia, artificiosa saltem conjectura comprehendere, veluti exempli gratia in Hepate.

P A R A P H R A S I S.

Fatetur pariter hoc alio Capite, se aliquando vidisse cujusdam Vesicam ita expositam, ac parvam, ut si quando urinam tardius excerneret, tumor quidam circumscriptus ad pubem manifestè cerneretur. Quamobrem organa illa, quæ ex contentis faciliè in tumorem attolli possunt, sensu tactus, & visus, dignosci queunt, an vitium aliquod in formatione contraxerint. Reliqua verò manifestum indicium minimè præbere possunt, sed solum conjecturis de illis suspicari licebit, ut idem Galenus tum hic, tum sequenti Capite, de Hepate parvo, exemplum affert.

CAPUT LXVII.

LXXIII. in Galeno.

De Hepate.

T E X T U S.

Vidi enim aliquos, & quidem quamplures, quibus venæ erant angustæ, & totum Corpus colore privatum: quod si plusculum cibi assumpsissent, qui præsertim flatibus excitandis aptus esset, & crassus, ac tenax, nonnulli quidem veluti pondus quoddam insidens, atque suspensum in profundo dextræ hypochondriorum partis sentiebant: nonnulli verò cum quadam tensione dolorem sentientes. In his quidem verisimile est Hepar esse parvum, atque angustos meatus habere.

P A R A P H R A S I S.

Ut ostenderet, qua artificiosa industria quis conjectare possit de vitio viscerum internorum, refert præsentī Capite, se vidisse aliquos, quibus venæ erant angustæ, & totum Corpus colore foedatum; quod si plusculum cibi assumpsissent, præsertim qui flatibus excitandis aptus esset, itemque crassus, & tenax foret, nonnulli quidem veluti pondus in profundo dextri hypochondrii sentiebant; nonnulli verò, quandam cum dolore tensionem: in his autem verisimile existimasse, Hepar esse parvum, ejusque meatus angustos. Unde ex angustia venarum, ex malo colore cutis, & ex pondere, vel tensione in hypochondrio dextro, post assumptos cibos, potissimum flatulentos, licebit de parvitate Jecoris conjicere. Id ipsum de Splene malè affecto conjectandum foret, si hæc omnia in sinistro hypochondrio evenirent.

CAPUT LXVIII.

LXXIV. in Galeno.

De Homine pituitoso vomente bilem.

TEXTUS.

Alterum vidi, cujus totus habitus pituitam præseferbat, quotidie tamen bilem pallidam evomebat. Censui igitur inspicienda alvi excrementa, in quibus minimum bilis apparebat. Quare conjectura quadam comprehendere eum meatum, qui biliosum egurgitat humorem, non minimam ejusdem partem ad imum ventriculi locum, quem græci pyloron, idest ostiarium vocant, effundere, ut in quibusdam apparet animalibus. Ex quibus id constat, quod plurimum ad eorum, quæ latent sensum, confert cognitionem, ea, quæ ex sectionis inspectione habetur, peritia, & operationum, atque utilitatum inventio. Quicumque igitur facultatem dignoscendi hujusmodi corpora, quæ ita lapsa sunt, consequi cupit, oportet ipsum in sectionibus, ac in operationum, atque utilitatum inventionibus exercitari. Scripsimus verò de omnibus seorsum in tractatibus aliis, de quibus in fine libri omninò proposuimus facere mentionem, ut discendicupidi intelligant, quæcumque discere optaverint, ex quonam possint haurire tractatu. Sed tamen de hisce satis.

PARAPHRASIS.

Aliud exemplum tradit, pro conjiciendo vitio in Cysti fellea, ductu Biliario, & Pyloro, cujusdam Hominis, qui habitu Corporis erat pituitosus, quotidie tamen bilem pallidam evomebat; excrementa verò alvi ne quidem bilis minimum referebant. Quare conjectura quadam comprehendit, porum in ipso felleum

ad pylorum, non ad intestina tendere, quo bilis ipsa effundebatur; unde vomitus flavus, ac fæces haudquaquam felleo humore tinctæ egerebantur. Hinc infert Galenus, quòd ad eorum cognitionem, quæ sensum latent, plurimum conferat notitia Anatomica, desumpta ex sectionibus Cadaverum. Quamobrem inquit; Quicumque facultatem dignoscendi hujusmodi Corpora, quæ ita lapsa sunt, consequi cupit, oportet ipsum in sectionibus, ac in operationum, atque utilitatum inventionibus, idest in partium usibus, exercitari. Hinc quæ, & qualis utilitas ex Anatome oriatur, quisque ex his clarissimè percipiet. Et hætenus de signis Corporum salubrium: Nunc de signis Corporum ægrotantium.

CAPUT LXIX.

LXXV. in Galeno.

Quomodo cognoscantur Corpora ægrotantia.

TEXTUS.

(T.78.) **Q**uæcumque verò ut nunc insalubria sunt, hoc est quæ jam ægritudinem patiuntur, dignoscere & hæc ipsa oportet. Quæ quidem subjiciuntur sensui, ex eorum, quæ ipsis insunt secundum naturam, permutatione, in magnitudine, colore, figura, & numero, & situ, & ea, quæ est secundum duritiem, & mollitiem, & frigiditatem, & caliditatem differentia. (T.79.) Quæ autem visum effugiunt, ut summam dicam, ex operationum lesionibus, aut his, quæ excernuntur, aut doloribus, aut tumoribus præter naturam, aut horum quibusdam, vel omnibus.

P A R A P H R A S I S.

EXpletis signis Corporum salubrium secundum suas differentias, prosequitur sequentibus Capitibus recensere indicia Corporum Insalubrium, & Neutrorum. Facto autem initio ab Insalubribus, affert signa Insalubrium ut Nunc, seu eorum, quæ jam ægritudinem contraxerunt, & actu ægrotant. Illa verò dividit in signa affectuum, qui sensibus subjiciuntur, & in signa affectuum, qui sensibus non patent. Primi generis sunt, quæ petuntur ex magnitudine, colore, figura, numero, situ, duritie, mollitie, frigiditate, caliditate, & similibus. Secundi generis verò, quæ à læsis operationibus, ab excretis mutatis, doloribus, tumoribus præter naturam, aut omnibus simul, aut aliquibus. Quibus in genere consideratis, descendit nunc ad singulorum Viscerum affectiones internoscendas. Et primò quidem Cerebri, ut mox.

C A P U T L X X.

LXXVI. in Galeno.

De signis Cerebri patientis.

T E X T U S.

(T. 80.) **P**articulatim autem, quæ quidem sunt in Cerebro ægræ dispositiones, aut dementiæ speciebus, aut sensuum, aut imaginationum læsionibus, aut actuum, qui secundum electionem fiunt, aut ex his, quæ excernuntur per palatum, vel nares, vel aures, aut horum, qui ei dolores eveniunt, differentiis.

P A R A P H R A S I S.

JUxtà nuper tradita signorum genera, ab operationibus Cerebri læsis, de ejusdem ægritudinibus primò judicat: Cùmque operationes Cerebri aliæ principales sint, ut Imaginatio, Ratiocinatio; aliæ verò à Cerebro quidem dependeant, sed ad quinque sensus externos pertineant, atque utraq; vel abolitè, vel diminutè, vel depravatè lædi possint, propterea ab omnibus indicia desumit, ut ex singulis Cerebri ægritudines, & animalium operationum læsiones, innotescant. Incipit autem ab Actionibus depravatis, & à Deliramentorum speciebus, cùm in his proximè Cerebrum offendatur, ad quod illæ propriè pertinent, & sive sola Imaginatio, sive sola Ratiocinatio lædatur, vel etiam utraq;. Secundò memorat læsiones sensus, & motus animalis, sub quibus comprehenduntur Epilepsiæ, Apoplexiæ, ParalySES, Tremores, Lethargi, similesque. His tertio addit, quæ per palatum, nares, & aures excernuntur, sub quibus excreta, & retenta vitia continentur, ut in Catarrhis, destillationibus, gravedinibus, cæterisque. Quarto demum recenset omnium dolorum differentias, puta gravantis, pungentis, instantis, pulsantis, aliorumque, ex quibus dignoscuntur dolores Capitis, & Meningum, itemque Oculorum, Aurium, & similibus. Hæc autem signa generaliora dumtaxat voluit hoc loco commemorare Galenus, nam particularia petenda sunt ex libris de locis affectis ejusdem.

CAPUT LXXI.

LXXVII. in Galeno.

Signa Cordis patientis.

TEXTUS.

(T. 81.) **Q**Uæ verò in Corde fiunt, ex difficilis anhelitus speciebus, & palpitationibus, quæ ipsis contingunt, ex pulsibus quoque ejus, atque arteriarum, & ab excandescents iræ celeritate, aut tarditate, à febris, & refrigerationibus, & in colore differentiis, ac eis, qui ipsi adveniunt, doloribus.

PARAPHRASIS.

Signa Cordis patientis octo proponit. Primum desumit ex speciebus difficilis anhelitus. Secundum ex tremulis motibus, qui ipsi contingunt, puta ex palpitatione. Tertium ex pulsibus tum ipsius Cordis, tum Arteriarum, ab ipso dependentium. Quartum ab excandescents iræ celeritate, aut tarditate. Quintum à febris. Sextum à refrigerationibus partium, præsertim extimarum. Septimum à differentiis colorum in cute apparentium. Octavum à doloribus, qui ipsi eveniunt. Hæc autem signa in syndromen relata, plenè de omnibus Cordis affectibus attestantur, quoniam vel immediatè, vel mediatè saltem, à Cordis constitutione, ejusque operationibus, promanant, & sive Cor ad calidum, aut frigidum intemperetur, & sive ex defectu sanguinis, ac spirituosæ ejusdem substantiæ, sive à mala ipsius conditione, obruente, aut dissipante, vel etiam exsolvente, aut congelante; & vel ab extrinsecus comprimente corpore, vel ab interiùs occupante, aut opplente ejusdem ventriculos, & cavita-

tes arteriarum, ac Sanguinem ipsum inficiente, aut depravante exoriantur; ut ex alibi dictis clarissimè patet.

CAPUT LXXII.

LXXVIII. in Galeno.

Signa Hepatis patientis.

TEXTUS.

(T. 82.) **Q**Uæ autem in Hepate ex defectu humorum, atque abundantia, & ad id quod præter naturam eversione, & colore malo: ac præterea ex permutatione naturæ in his, quæ ad alimentum diductionem, aut superfluitatum attinent excretionem, sed & ex gravitatibus, & tumoribus, & doloribus non modo his, qui in eo ortum habent, verùm & in illis, qui compatiendæ ratione proveniunt, quemadmodum in aliqua vel spirandi difficultate, vel tussis specie.

PARAPHRASIS.

Signa Hepatis ægritudines demonstrantia, recensentur, humorum defectus, vel abundantia; degeneratio eorundem à statu naturali in præternaturalem; malus cutis color: læsa Sanguinis per Corpus distributio: vitiosa excrementorum egestio, eorum præsertim, quæ per Jecur transcunt, vel ab eodem immediatè derivant, ut est fellea, & biliosa superfluitas, atque urinæ depositio, ac deformatio: gravitas, vel dolor ad Hepatis regionem, seu in dextro hypochondrio, tumor ejusdem, tentio, aut durities, ac denique spiritus gravis, seu respiratio impedita, cum tussi, quæ sicca à Medicis solet appellari, ut evenit in obstructis, Jeco-

Jecore tumidis, aliisque similibus, quem-
admodum idem Galenus observavit in Me-
dico Siculo 5. de loc. affect. cap. 7.

CAPUT LXXIII.

LXXIX. In Galeno.

Signa Ventriculi patientis.

T E X T U S.

(T. 83.) **S**ic & Ventriculi affectus agnoscitur, ubi in concoctione, & appetitu humidi, vel sicci alimenti, vel superfluitatum excretionem delinquitur. Ita etiam ex singultibus, eructationibus, nauseis, vomitibus, & ipsis eorum, quæ evomuntur, speciebus.

P A R A P H R A S I S.

Pari modo dignoscetur Ventriculus affectus, ex mala concoctione, & vitiato appetitu, ex egestionem superfluitatum crudarum per vomitum, aut per secessum, ex singultibus, eructationibus, vel acidis, vel nidorosis, nausea, subversione, inflatione, tensione, itemque humoralium excrementorum dejectione, aut indigesti, vel corrupti cibi per alvum excretionem; ac tandem ex doloribus, aut tumoribus ipsum infestantibus: quæ omnia ab actionibus propriis ejusdem Ventriculi læsis ob fermenta digestiva vitiata, vel propter tunicas, fibrasque Ventriculi substantiam constituentes, relaxatas, aut contractas, ex circumscripto ipsius situ facillimè immutescent.

CAPUT LXXIV.

LXXX. In Galeno.

Signa Thoracis patientis.

T E X T U S.

(T. 84.) **I**ta & Thoracis agnoscuntur affectus, ex spirandi difficultatibus, tussibus, & doloribus, qui in ipso fiunt, & ex eorum, quæ cum tussi expuuntur, differentia. (T. 85.) Sic & asperæ Arteriæ ægritudines, difficiles anhelitus, & tusses, & dolor in loco, & quæ expuuntur, & vocis offensiones ostendunt. (T. 86.) Secundum verò eandem proportionem, & in aliis omnibus accidit partibus: Nam ex tumore, dolore, & operationum læsione, & excrementorum differentia sumentur indicia. (T. 87.) Tumores autem præter naturam in inflammationibus, scirrhis, œdematis, & erysipelatis sunt explorandi. (T. 88.) Dolor autem quemcumque obsederit locum, aut continuitatis solutionem, aut subitam alterationem ostendit. Solvitur autem continuitas incisione, exesione, fractione, & tentione. Alteratur verò substantia, caliditate, frigiditate, humiditate, siccitate. (T. 89.) Læditur autem operatio tripliciter, aut quia debiliter, aut quia vitiosè, aut quia nullo modo fit.

P A R A P H R A S I S.

Affecti Thoracis signa quatuor recenset hoc Capite Galenus, difficilem nempe Respirationem, Tussim, Dolores costarum, & Sputa. Asperæ verò Arteriæ ægritudinum indicia refert ad difficiles anhelitus, tusses, dolores ejusdem, sputa, & vocis læsiones. At verò licet multum inter se conveniant utriusque of-
fen-

fensiones, poterunt tamen facile interno-
sci: Tusses enim plerumque ex aspera Ar-
teria dependentes, siccae solent esse; ex
Thoracis autem, aut etiam Pulmonis vi-
tio, esse solent humidæ. Sic etiam dolo-
res in Thorace sensibiliores sunt, levio-
res, vel nulli, & solum cum sensu pon-
deris in affectionibus Pulmonis: Medio
autem modo se habebunt, qui in aspera
contingunt. Respiratio pariter gravior,
vel levior, crebrior, vel rarior, cum ster-
tore, vel sine, fiet, si aspera potius cum
tracheolis, vel Pulmo, secundum suam
substantiam afficiatur: secus si Thorax ex-
trinsecus, aut alia pars circumposita di-
vexetur. Verum dolor in Pleura, ac Me-
diastino acutior, & molestior semper erit,
cum sensibili Respirationis læsione, qua
præsertim parte, nempe superiori, Pul-
mo eidem alligatur.

Non dissimili modo conjectandum, sub-
dit Galenus, de affectionibus aliarum par-
tium, ex tumoribus nimirum, doloribus,
operationibus læsis, atque excremento-
rum diversitate, pro eorundem viscerum
affectorum differentia, usque vario.
Tumores verò rediguntur ad Inflamma-
tiones, Erysipelata, Scirrhus, Oedemā-
ta, ex quorum varietate humores quo-
que varii exinde malè affecti dijudicantur;
ut infra.

Quoniam autem Dolor inter præcipua
signa partium affectarum numeratur, ad-
dit hic Galenus, illum aut continuitatis
solutionem, aut subitam partis alteratio-
nem subsequi. In alteratione verò, ut il-
la dolorem inferat, tria ex eodem Gale-
no requiruntur 12. meth. cap. 7. & 1. de
symptom. causis cap. 6. Primum, ut alte-
ratio subito fiat: Secundum cum violen-
tia; Tertium, quòd præter naturam sit:
siquidem in feminis effusione ex vehemen-
ti concubitu, licet quadam violenta, &
subita alteratio accidat, quia tamen præ-
ter naturam non fit, dolorosa non est: sic

pariter in Rifu, Titillatione, cæterisque
voluptuosis Corporis commotionibus. Cæ-
terum Alteratio subito, & violenter illa-
ta, neque sine humoris virulenti præsen-
tia fieri potest, ut propterea tenuem sal-
tem materiam omninò exigat, à qua par-
tes compunguntur, quemadmodum alias
à nobis ostensum est.

Hanc insuper dolorificam alterationem
omnes quatuor qualitates, caliditatem,
frigiditatem, humiditatem, & siccitatem
afferre posse docet hic idem Author,
quamvis 2. de compos. Medicam. secundum
loca cap. 1. ad humiditatem dicat nullum
consequi dolorem, illam scilicet conside-
rans solam, & simplicem, non verò cum
caliditate, vel frigiditate conjunctam, ut
seipsum explicat 1. de Natura Humana
comm. 6. Sed & neque istæ ab humoribus
sejunctæ unquam in humano Corpore in-
venientur, ut partium continuitatem sol-
vant, aut naturalem constitutionem al-
terent, doloremque afferant, etsi non
manifestè, ac sensibilibiter, saltem incon-
spicuè, & insensibilibiter, ut alibi dictum.
Soluta denique continuitas, incisione per
ensem: exsese per venena, aut eroden-
tes, pravosque humores: fractione, per
contusiones, ictus, & vulnera; ac demum
tensione, ac inflatione per flatum, infer-
tur. Postremò operationes omnes in uni-
versum tripliciter lædi posse tum hic, tum
alibi passim edocuit, abolitè nimirum,
diminutè, ac depravatè: ut cum nullate-
nùs fiunt; vel saltem sensibilibiter fieri non
videntur: aut imperfectè, ac debiliter so-
lùm; vel demum fiunt aliter, ac natura
fieri deberent.

CAPUT LXXV.

LXXXI. in Galeno.

De Differentia eorum, quæ excernuntur.

TEXTUS.

(T. 90.) **Q**Uæcumque autem excernuntur; (nonnulla ut affectorum locorum partes: nonnulla ut excrementa: nonnulla ut in ipsis secundum naturam contenta) singula propriam facient indicationem. (T. 91.) Dictum est autem de hisce omnibus plenius in tractatu de locis affectis; quem nullus ante nos aut in Artem, idest methodum rededit, aut ad absolutam perfectionem deduxit: quemadmodum & in omnibus aliis evenit, quibus initium quidem aliquod ab Antiquis est datum, non tamen absolutum est opus. Ægrotantium itaque Corporum ex tractatu illo indicia sunt sumenda. Eorum autem, qui in ægritudinem lapsuri sunt, & qui sanitati restituendi, præsens doctrina complectitur.

PARAPHRASIS.

Eorum, quæ excernuntur, tria genera constituit, ex quibus internæ ægritudines dignosci possunt: Videlicet partium solidarum, ut Pulmonis, ramentorum intestinalium, Renum, Vescicæ, & similibus; quæque dicuntur excreta toto genere præter naturam, ut & puris, fænici, sanguinis, vel simplicis, vel commisti, aut degenerati, vel grumefacti; & denique succorum, seu liquorum naturalium, ut chyli, vel cibi nondum digesti; itemque urinæ, & fæcum, quæ licet excrementa sint, naturaliter tamen flatutis horis, & locis, detineri debent, ac deinde ad certum tempus expurgari.

Ab horum autem excretionē, vel quantitate inconvenienti, vel qualitate depravata, vel non debito tempore, modo, aut loco habita; aut ejus fortasse rei, quæ nullatenus excerni oporteret, partes affectæ facillè dignosci possunt, ut plenius se egisse testatur in libris de locis affectis. Et hætenus de signis Corporum ægrotantium. Nunc de signis futurarum ægritudinum, & Corporum Neutrorum.

CAPUT LXXVI.

LXXXII. in Galeno.

Signa futuræ ægritudinis.

TEXTUS.

(T. 92.) **E**orum igitur indicia, quibus ægritudinis periculum imminet, mediam formam habent, inter ea, quæ sanis, & quæ ægrotantibus eveniunt. Siquidem sanis omnia secundum naturam insunt: præter naturam verò ægrotantibus, quatenus ægrotant. In confinio autem horum ea, quæ sunt Corporum neutrorum indicia: quorum nonnulla quidem sunt ex eorum genere, quæ secundum naturam, sed vel qualitatibus, vel quantitativis, vel temporibus permutata: quædam autem ex his, quæ præter naturam, sed minora his, quæ ægritudinibus adsunt. Atque idcirco hæc quidem Corporum dispositiones, quæ in ægritudinem casura monstrari, sunt ex Neutrorum genere, atque unà, ea, quæ ipsa indicant signa. Primò enim hæc sanitatem ostendunt, secundò autem ægritudinem: Et fiunt eadem signa secundum ad aliquid habitudinem, Neutra, & Insalubria: quæ quidem præsentem dispositionem ostendunt, Neutra; quæ verò futuram præmonstrant, Insalubria. (T. 93.) Eadem verò ratione, & quæcumque ægrotantibus signa salutaria appa-

apparent, dicentur quidem salubria, quia futuram sanitatem ostendunt; dicentur etiam agra, quatenus præsentem ostendunt ægritudinem: Neque in ambiguo est, quod quæ sunt utrorumque indicativa, Neutra dicentur secundum unum quoddam Neutri vocabuli significatum. Neque verò mirari oportet eadem signa tres in diversis habitudinibus servare rationes, quæ & Salubria, & Agra, & Neutra dicantur. (T. 94.) Secundum verò alterum significatum, quæcumque his, qui à morbo referuntur, insunt, signa Neutra appellamus, neque in alio significato accipiunt ea, quæ senibus insunt. Hæc quidem omnia pluribus, & conceptibus, & rationibus, subjiciuntur: quæcumque verò in his, qui integra sanitate fruuntur, inter salubria tantummodò computantur, & quæcumque ægritudinibus insunt, neque futuram prænunciant sanitatem, soli & hæc agrorum conceptui subjiciuntur. Sed de his quidem postea dicetur. (T. 95.) Nunc quæ futuram præmonstrant ægritudinem, prius exequamur: Cum verò sit eorum differentia duplex, prius ea pertractemus, quæ quantitativis, vel qualitativis, vel temporibus, non autem propriis speciebus ab eo, quod secundum naturam evariant: veluti ciborum appetentia intenta, vel dissoluta, aut quæ non servet tempus consuetum, aut quæ ad edulia non usitata feratur, aut ad excretionem cibi superfluitatum, quæ aut pauciores, aut plures, aut humidiores, aut duriores existant. Sic humidiorum excrementorum vel defectus, vel superabundantia præter consuetudinem naturalem, aut in colore, aut in consistentia varietas aliqua, aut in tempore excretionis, & vigiliæ plures; ac somnus, aut non consueto tempore. Eodem modo potus pluris, aut paucioris, calidi, aut frigidi insolens appetitus; sicuti & rerum venerearum usus immodicus, aut intempestiva concupiscentia: & plures, aut pauciores sudores, quàm convenient: &

ad motus torpor, aut si moveri tentaverint, gravitas, aut vehemens exsolutio, menstruum occultatio, vel immodica, aut diminuta evacuatio. Sic & quæ per ora venarum Græci hæmorrhoidas appellant, fit Sanguinis effusio. Sed & si voluptas in cibo, potuque aut sit priori voluptate similis, futura indicium est ægritudinis; hebetudoque animi non naturalis, aut oblivio quædam inconsueta, aut somni, qui pluribus imaginationibus abundant, quàm prius: auditus, & odoratus, visusve hebetiores, aut turbulentiores, & (ut simpliciter dicam) quæcumque secundum naturam inerant, hæc quidem augmentata, hæc verò comminuta, hæc verò temporibus quibusdam, aut quantitativis, aut qualitativis immutata. Siquidem & ipsius Corporis moles, aut major, aut minor, aut magis alba, aut magis rubra, velut lividior, aut nigrior, ructusque, & sternutamenta, & flatus plures, aut pauciores his, qui secundum naturam; sic & quæcumque per nares, vel palatum, vel aures, per quos meatus Cerebrum expurgatur, vel temporibus, vel quantitativis, vel qualitativis immutata. Hæc igitur omnia ex genere eorum sunt, quæ secundum naturam. (T. 96.) Morsus autem ventris, vel in ore ventriculi, vel in aliquo intestinorum, aut cum alvus subducitur, aut cum vomitus excitatur, aut cum mingitur, sive aliquis alius dolor mediocris ex genere quidem existit eorum, quæ præter naturam: non tamen qui ita se habent, agrotare dicuntur: sicuti neque qui Capite gravantur, aut dolent, aut vigilant, cum nondum in consuetis impediuntur operationibus. Hic enim in huiusmodi dispositionibus agrotandi terminus est; atque idcirco in eo, quod ad aliquid eandem dispositionem agram, atque neutram appellabimus: nam pro vigore potentiæ, quæ vel facile sustinet, vel vincitur unaquæque ex his, quas antea diximus, vel morbus est, vel neutra dispo-

dispositio. (T. 97.) Sic & quaecumque in sensibus, non in eo, quod magis, aut minus invicem differunt, sed toto genere sunt præter naturam. Et hæc sunt signa morborum, donec modica fuerint, & nondum hominem à consuetis operibus sufficiunt amovere. Talia verò sunt in gustu quidem vel salsæ, vel amaræ, vel alicujus alterius qualitatis sapor nobis judicatur, sive in omnibus quæ bibuntur, aut manducantur, aut præterquod aliquid assumatur, saliva ipsa talis sentiatur. In odoratu autem, quando alicujus unius qualitatis sensum habemus nullo odorabili præsentem, aut cum plura differentia naribus admovemus, omnia veluti similia sentimus: sæpius verò nihil sentimus, aut aliquid fœtens, etiamsi nihil adsit, quod fœteat. Quantum verò ad auditum, soni, & strépitus, ad id, quod præter naturam pertinent: quemadmodum in visu, quaecumque ante oculos apparere creduntur nigra, & atra, & cærulea, & rufa, & flava, & nonnulla rotunda, nonnulla autem oblonga, quædam gracilia, quædam crassa, oculis prætendi videntur. In sensu autem Tactus, cum inæqualitas aliqua, vel spissitudo, vel gravitas, vel tentio, vel torpida, vel ulcerosa dispositio, in toto Corporis habitu sentitur: sic & in singulis partibus vel tentio, vel compressio, vel morsus, vel gravitas, quando modicæ fuerint, ac minimè firmæ, neutram quidem dispositionem adesse demonstrant, futuram verò ægritudinem prænunciant.

P A R A P H R A S I S.

CUm hucusque latè nimis egisset Galenus de signis Corporum Salubrium, & Insalubrium, ad exactam nunc omnium Signorum notitiam, quod reliquum erat, prosequitur referre indicia Corporum Neutrorum, atque eorum potissimum, quæ Decidentia, & Convalescentia appellantur. Et quidem Neutra Deci-

dentia primùm docet, mediam formam habere inter ea, quæ sanis, & ægrotantibus accidunt. Sanis enim omnia secundum naturam insunt, ægrotantibus verò præter naturam. Neutrorum autem Nunc indicia, subdit, aliqua esse secundum naturam, sed cum recessu in quantitate, qualitate, & tempore; aliqua verò præter naturam, sed non cum tanto recessu à mediocritate, adeòque minora his, quæ sunt ægritudinis. Secundum Naturam intelliguntur, quæ accidunt quidem conformiter Naturæ, sed vel plus justo, puta cum quis immodicè appetit, vel appetit quæ frigida sunt, aut acida, aliavè; vel etiam tempore indebito. Præter naturam verò dicuntur, cum pertinent quidem ad statum præternaturalem, sed cum leviori recessu, nempe cum adest dolor, sed exiguus: cum committitur cruditas, sed levis, &c. Hinc infert, signa Neutrorum dici posse respectu diversorum Neutra, & Ægra: Neutra quidem, quatenus præsentem indicant statum; ægra verò, quatenus futuram ægritudinem præfagiunt. Quin & eadem ratione signa in ægrotantibus apparentia, ait esse posse salubria, quia futuram sanitatem portendunt; & ægra, quoniam præsentem ostendunt ægritudinem: & neutra, quatenus sunt utriusque indicativa; ut est exemplum in Urina concocta febrientium, sputo sanguineo pleuriticorum, sudoribus, &c.

Signa insuper Convalescentia communia esse possunt tum convalescentibus, tum senibus. At in convalescentibus considerata sunt cum spe salutis, eò quòd significant recessum Morbi, & pristinae Sanitatis regressum: In Senibus verò statum senectutis talem, qualem ætas senilis suffert, ac expostulat.

Post hæc proponit Galenus plura signa Neutrius Decidentia, quæ ab his, quæ sanis insunt secundum Naturam, prodeunt; facta tamen mutatione in quantitate,

tate, qualitatē, vel tempore. Exemplificat autem illa in ciborum appetentia intensa, vel dissoluta, vel etiam intempestiva, aut quæ ad edulia non usitata fertur: in Excretionibus, aut pluribus, aut paucioribus, humidioribus, aut durioribus: similiter in superabundantia, vel defectu excrementorum, eorumque mutatione coloris, aut consistentiæ: in vigilia, aut somno, vel breviori, vel longiori, vel intempestivo: in egestionē Menstruorum ex Utero, & ex hæmorrhoidibus, aut retenta, aut immodica, aut diminuta: in rei Veneræ concupiscentia, usuque immoderato, aut importuno: in Sudore copiosiori, vel pauciori, aut etiam infueto: Corporis torpore, aut lassitudine: Animi, & mentis hebetudine, vel oblivione: in Insomniis variis phantasmatibus refertis: Auditus, Odoratus, Visusque imbecillitate, aut turbulentia: in Corporis mole adaucta, vel imminuta: cute ejusdem dealbata, vel nigrefacta, rubra, aut livida: Ructibus, sternutamentis, flatibus: per Aures, Nares, Palatum expurgationibus, aliisque hujus generis similibus, si fortasse quantitate, qualitate, tempore, aliterve fuerint immutata, aut à consueto Naturæ salubriter operantis recedentia. Hæc equidem, aliaque plura, cum apparuerint, futuram planè ægritudinem præmonstrabunt, & eò graviores, quò magis à statu mediocri, naturali, & consueto recessum fecerint, quæ cum notissima sint, non est, ut in longius protrahamus.

Quod ad signa præterea, quæ conveniunt quidem sanis, sed præter naturam fiunt, minora tamen, quàm quæ conveniant ægris, ait esse, Morsum Ventris, aut oris Ventriculi, vel Intestinorum; aut ejus doloris, qui fit, dum fæces, vel urina excernuntur, aut cum vomitus excitatur; sive aliquis alius dolor mediocris est, ut in his, qui capite gravantur, aut

dolent, aut vigilant, nondum tamen à consuetis operationibus impediuntur. Sic pariter quinque sensuum læsiones judicandas esse subdit: etenim si operationes sensuum parùm mutantur, aut à consueto evariant, futuras ægritudines indicant, adeoque signa Neutra erunt. At verò si toto genere præter naturam evadant, ita ut impediunt actiones Naturæ debitas, tunc non Neutra signa futuram ægritudinem ostendentia dicenda erunt, sed signa ægra, attestantia ægritudinem præsentem. Dat exemplum in Gustu, salivā copiosiori, falsa, amara, insipida, aliave, similiter cum percipiuntur odores nullo existente objecto odorabili; vel cum odores rerum non discernuntur, aut aliquid foetens percipitur, etiamsi nihil adsit, quod foeteat. Pari modo, cum rumor, murmur, vel strepitus, intra Aures audiuntur; ut & in Visu, cum creduntur objecta apparere nigra, cærulea, flava, rotunda, aut oblonga, gracilia, vel crassa; aut cum plura, vel mutila, Oculis prætendi videntur; atque in sensu Tactus, gravitas, vel tensio, torpida, vel ulcerosa, aut pruriginosa dispositio: itemque compressio, morsus, vel gravitas, aliudve simile in singulis partibus corporis. Quæ omnia si modica fuerint, ac levia, vel minimè firma, ac stabilia, neutram dispositionem demonstrant, & futuram ægritudinem prænunciant: graviora verò, firma, ac stabilia, præsentem ostendunt: Itaque quoque hæc eadem in delicatioribus Corporibus indicant præsentem, in robustioribus futuram; idque etiam magis, minusve, pro vigore, ac robore virtutis fortiori, vel debiori; quæ scilicet vel facile sustineat, & vincat, vel contra vincatur, ac tandem deprimatur: nam in primo casu, Neutra erit dispositio; in secundo casu Morbus, & Ægritudo. Et sic de reliquis.

CAPUT LXXVII.

& ultimum II. Lib.

LXXXIII. in Galeno.

Signa Corporum Ægrotantium.

T E X T U S.

(T.98.) **A**T quæ jam in ægrotantibus signa videntur, ex quibus nonnulla salutem, nonnulla mortem portendunt: prima quidem salubria, altera verò genere quidem ægra, secundum speciem autem pernicioſa dicuntur. (T.99.) Sumuntur autem, ut universaliter dicamus, ex operationum virtute, ac vitiis: Secundum partem verò ex particularium operationibus, quarum genera antea diximus: Primum quidem eorum, quæ principia existunt: secundum verò illorum, quæ à principiis ortum habent: & tertium eorum, quæ ex seipsis gubernantur; à principiis autem quasdam derivationes habent. Quartum siquidem genus eorum, quæ tunc diximus, ex se quidem ad aliquid prænosendum inutile est: secundum accidens autem & ex his aliquando præcognitiones erunt: quemadmodum & ex excrementis, ex his quidem compatiendi ratione, ex excrementis autem semper, quoniam coctionis, & incoctionis signa continent. (T.100.) Quare fieri non potest, quin omninò significant aut naturam materie, aut materiam naturæ, aut neutrum neutro dominari. Salubria quidem signa dicentur, Natura superante: Insalubria verò, superata: Neutra autem, quæ pugnas habent æquales; sed quæ quidem manifestam indicant coctionem, ex salubribus sunt: sicuti quæ cruditatem, ægra: Quæ verò neque coctionem, neque cruditatem manifestè ostendunt, ex Neutorum sunt natura. Sunt

Tom. V.

verò & Neutra, quæcumque nunc quidem hoc, nunc verò contrarium significant, veluti digiti denigrati. Talia etiam sunt. Critica, idest decretoria accidentia, de quibus omnibus in libris de Crisi dictum est: sicuti etiam de his, quæ ad unamquamque attinent operationem, in his libris, in quibus de Causis Accidentium agitur. Quare omnium horum singulorum materiam ex eisdem libris colligere oportet. Ego verò prolixitati parcens hic sermoni de signis finem faciam; transgrediar autem ad illum, qui de Causis est.

P A R A P H R A S I S.

EXpositis signis futuras ægritudines prænunciantibus, Methodum postremò edocet Galenus prænoscendi salutem, aut mortem in ægrotantibus: & signa quidem salutem portendentia, salubria appellat; præsignantia Mortem, secundum genus vocat ægra, in specie verò pernicioſa.

Salutem, aut Mortem portendentia desumenda esse docet ex Virtute, aut Vitiis, robore, aut languore operationum, partium præsertim principalium. Si enim operationes istæ validæ sint, ac robustæ, bonus eventus indicabitur; si verò malæ fuerint, & imbecillæ, eventus malus prælagietur. Secundò sumuntur indicia ab operationibus partium, quæ principales immediatè, proximèque sequuntur, ut sunt Arteriæ, Venæ, & Nervi, ex quibus benè, vel malè affectis, pari modo de salute, aut interitu prognosticandum: sic læsio in Nervis, ut punctura, convulsio, distentio, sideratio, pessima est, & non rarò lethalis. Itemque Aneurisma in Arteriis: Erosio, aut laxitas in Venis, ut in Hæmorrhagiis, & Varicibus. Tertiò sumuntur signa ex læsionibus partium, seu Viscerum internorum, potissimum Ventriculi,

H

In-

Intestinorum, Vesicæ, Renum, Lienis, Pulmonis, ex quarum partium læsionibus, plus justo gravioribus, plerumque Mors contingit. Quartò capiuntur indicia à læsione partium independentium, idest neque tribuentium, neque recipientium, ut sunt Cartilagines, Ligamenta, Ossa, glandulæ, à quibus licet signa Salutis, aut Mortis, proximè, ac immediatè deduci nequeant, quia tamen alias partes nobiliores læsas in consensum trahere solent, periculo non carent, ut in Tumoribus, Doloribus, Fracturis, aliisque similibus. Denique ex coctione, vel cruditate excrementorum, & peccantium humorum, ut præsertim ex urinis, sputo, sudore, pure, signa Salutis, vel Mortis colliguntur. Etenim ab excretis vitiosis, humoribus crudis, crassis, diversimodè coloratis, aut permixtis, vel contra concoctis, & convenienter edomitis, Naturæ languor, vel robur arguitur, adeoque Morbo, & Causæ morbificæ, vel prævalens, vel succumbens, sit illa tandem superanda, vel superatura. Quòd si Res hæc in ambiguo sit, puta si nec Natura superet, concoquat, & secernat excrementa, pravosque humores; nec viceversa superetur,

ac evincatur à multitudine, & pravitate eorundem, tunc sicut neque in melius, neque in pejus itur, ità nec sanitatem, nec mortem ostendet, proptereaque signa erunt Neutra primi significati, idest per exclusionem utriusque extremi. Quæ autem modò sanitatem, modò Mortem pollicentur, erunt signa Neutra tertii significati, ut sunt digiti denigrati, de quibus Hippocrates in *Prognosticis* inquit, modò significare mortificationem caloris, modò criticam depositionem humoris melancholici ad articulos. Ità quoque sunt evacuationes in morbis habitæ, quæ aliquando criticæ sunt, cum conferentia, & tolerantia factæ; aliquando verò sunt symptomaticæ, & perniciosæ, juxta ea, quæ idem Galenus edocet in *lib. epidemiorum*, præsertim super historia Philisci, & in libris *de Crisibus*, ac *de symptomatum Causis*: quibus in locis fusè de his se egisse hoc loco memorat. (a) Atque ità prolixitati parcens, sermoni de signis finem imponit, & Nos quoque finem huic II. Libro faciamus. Qui verò latiore sermonem de his exquirat, legat Prosperū Alpīnum peculiari libello *de Præ-sagienda Vita, & Morte in Ægrotantibus*.

(a) V. etiam Gal. lib. de Constit. Art. Med. cap. 18.

LIBER TERTIUS

ARTIS MEDICINALIS

GALENI

PROOEMIUM.

CUm superius, (a) super Primum, & Secundum Librum Artis Medicinalis Galeni Paraphrases nostras tradiderimus, Corporum nimirum, & Signorum, Salubrium, Insalubrium, & Neutorum, Naturas, ac differentias, quantum Ratio postulabat, prosequuti: Reliquum nunc est, ut de Causis similiter Salubribus, Insalubribus, & Neutris, quæ supererant explicandæ, edisseramus; cum ex antea traditis, Medicina, tota quanta est, circa Salubrium, Insalubrium, & Neutorum notitiam versetur. Pro Causis autem, potissimum hoc loco intelliguntur, quæ Procatarticæ Græcis appellantur, atque ex his, quæ Remediorum vices gerunt, quoniam istæ Salubritatem, Insalubritatem, & Neutralitatem, inferre possunt; sub quo sensu Causæ in præsentiarum accipiuntur.

At quoniam Causæ hoc modo sumptæ, vel Sanitatem conservantes, vel Morbos abigentes, vel Sanitatem reficientes, aut ab imminentibus ægritudinibus præservantes, vel denique quæ ab iisdem evaserunt Corpora, restaurantes, esse possunt, propterea Galenus, ne quidquam intentatum relinqueret, de his omnibus hoc Tertio Libro agit: & primum quidem de Causis Conservantibus Sanitatem, quarum consideratio ad eam Medicinæ partem spectat, quæ græcè Evectice dicitur, idest boni habitus Corporis Conservatrix: mox de Causis Curativis, unde Therapeutice; deinde de Causis Præservantibus Corpora Neutra, ne in ægritudinem labantur, indeque Prophylactice: postremò de Causis Reficientibus Corpora Convalescentium, & Senum, quæ Medicinæ Pars Analeptice vocatur, idest Refectiva, seu Resumptiva Corporum, lubricam sanitatem habentium. Quibus in genere præcognitis, singulorum nunc Capitum expositionem, ac Paraphrasim, metodo hætenus in cæteris servata, prosequamur.

CAPUT I.

LXXXIV. in Galeno.

De Causis Salubribus, Insalubribus,
ac Neutris.

TEXTUS.

(T. 1.) **Q**Uoniam verò & hanc, hæc quidem salubres, & item insalubres, hæc verò neutra: primum de Causis salubribus erit sermo. Quia verò & nonnullæ quidem conservatrices, nonnullæ vero effectrices sanitatis, sunt autem & tempore, & dignitate priores Conservatrices, incipierendum est à Conservatricibus. Cum igitur non unum tantum sit sanum Corpus, sed plura, ut supra definivimus, in eorum singulis propria erit Causa conservatrix: siquidem omnis Causa in eo, quod ad aliquid, existit. Hic igitur denuò sumendum initium ab optima Corporis constitutione, ac quæ ei salubria sint, considerandum. (T. 2.) Eorum autem inventionem ipsius rei natura insinuat. Si enim impatibile, atque inalterabile esset Corpus, semper optima constitutio perduraret, neque Artis præsidio indigeret. Quoniam verò alteratur, corrumpitur, & vertitur, neque eundem servat prioris status tenorem, ea ratione auxilium desiderat.

PARAPHRASIS.

NECTIT primum Galenus sermonem huius cum præcedentibus Capitulis. Postquam enim de Corporibus, & Signis hæctenus egisset, se nunc acturum pollicetur de Causis, quas pari ratione dividit in Salubres, Insalubres, & Neutras; atque de Salubribus primo loco se velle sermonem habere ait; cumque Cau-

sæ esse possint vel Conservantes, vel Efficientes sanitatem, subdit, oportere primum agere de iis, quæ sanitatem conservant, quia istæ tempore, & dignitate priores sunt Effectricibus: tempore quidem, quia sanitas prior est morbo, qui cum accedit, sanitatem recessisse supponit; dignitate verò, quia dignior morbo sanitas est; nam sanitas perfectionem, morbus verò imperfectionem significat.

Conservatrices præterea Causæ tot sunt, quot Corpora conservanda, quoniam ad aliquid referuntur, suntque de genere relativorum; adeoque cum Corpora sana, conservatione egentia, plura sint, in primo Libro huius Operis memorata, de omnibus hic etiam mentionem facit: Et primò quidem de Causis Conservantibus Corpus saluberrimum, ex quarum cognitione reliquæ facillimè inotescunt. Et quamvis saluberrimum Corpus videatur nullatenus egere causis Conservantibus, eò quòd statuatur veluti Regula, & Mensura cæterorum, assimileturque Statuæ Polycleti, in qua nullus excessus, aut defectus; quia tamen ejusmodi Corpus inalterabile, & impassibile nusquam est, nec si esset, posset perpetuò exactam illam sanitatem possidere; propterea fit, ut etiam conservatione opus habeat, saltem ad corrigendos, removendosque leves, & exiguos à mediocritate recessus, seu defectus insensibiles, ut alibi à Nobis notatum est. Si enim, subdit hoc loco Galenus, impatibile, atque inalterabile esset Corpus, semper optima constitutio perduraret, neque Artis præsidio indigeret. Quoniam verò alteratur, corrumpitur, & vertitur, neque eundem servat prioris status tenorem, ea ratione auxilium desiderat. Hæc ille.

CAPUT II.

LXXXV. in Galeno.

Quot modis nostrum Corpus alteretur.

TEXTUS.

(T. 3.) **S**ecundum quot igitur alteratur modos, tot auxiliorum, hoc est Causarum Conservatricum genera habebit, quas ex his, quæ dicta sunt, liquet esse ex correctivarum genere; sed quia paulatim correctiones faciunt, antequam omnis ingruat noxa, non Præservantes à futuro malo, sed præsentis status Conservatrices Medici appellant. (T. 4.) Alteratur igitur Corpus à nonnullis quidem necessario, à quibusdam verò non necessario. Dico autem necessario, quæ nulla est evitandi ratio: non necessario autem reliqua: Nam Aerem quidem nos ambientem semper attingere, comedereque, ac bibere, & vigilare, & dormire, est necessarium: ensibus autem, & exitiis feris obviare, non necessarium. Quare circa primum causarum genus versatur Ars Corporis conservatrix; circa secundum autem minimè. (T. 5.) Quot igitur numero sint ea, quæ ex necessitate Corpus alterant, distinguentes, proprium in singulis eorum causarum salubrium genus inveniemus. Inest igitur unum quidem ex ambientis aeris adhæsu: Alterum verò ex motu, & quiete & totius Corporis, & partium singularum: Tertium ex somno, & vigilia: Quartum ex his, quæ assumuntur: Quintum ex his, quæ excernuntur, vel retinentur: Sextum ex Animæ affectibus. Ex his necesse est aliquo modo affici Corpus: Ab Aere quidem ambiente, quia aut calefit, aut frigeat, aut exiccatur, aut humectatur, vel secundum horum patitur conjugationem, aut in tota alteratur substantia. Ex motu verò, & quie-

te, cum utraque modum exceßerint, aut calefactum, aut refrigeratum, aut humectatum, aut exiccatum, vel aliquid secundum horum patiens conjugationem. Sic & ex somno, & vigilia ipsum pati est necessarium, secundum eandem rationem: & ex Animæ affectibus, & ex his, quæ assumuntur, aut excernuntur, aut retinentur. Hæc siquidem omnia, partim quidem protinus, & evidenter, partim verò per alias causas medias alterant Corpus, & sanitatem corrumpunt; & de eorum singulis seorsum scripsimus in tractatu, qui de Salubribus inscribitur. (T. 6.) Omnia igitur nunc dicta genera, materię quædam sunt salubrium causarum, at usu opportuno adhibito, causæ fiunt conservatrices, atque salubres; sed ubi à modo deliquerint, insalubres redduntur. Unde etiam liquet ex his nullam harum rerum exteriorum, aut salubrem, aut insalubrem à nobis existimari oportere, at easdem potius in eo, quod ad aliquid esse, quandoque quidem salubres, quandoque verò insalubres. Nam ubi motum Corpus desiderat, exercitatio quidem salubris, otium autem insalubre: cum verò eget quiete, otium quidem salubre, exercitatio autem insalubris; eodem modo de cibis, & potibus, & de aliis omnibus statuum. Horum enim singula quando, ut necessitas Corporis exigit, cum mensura, & qualitate opportuna adhibentur, salubria fiunt: at cum citra omnem necessitatem, ac præter modum asseruntur, insalubria. (T. 7.) Atque hæc duæ sunt circa salubre, & insalubre intentiones, rei scilicet, quæ adhibetur, qualitas, ac quantitas. Neque enim est rationi consentaneum etiam temporis occasionem, quæ in his, quæ dicta sunt, continetur, veluti tertium aliquod ab eisdem diversum introducere. Si enim tali, & tanta re oblata egeat Corpus, nemini dubium, quin etiam in tempore asseratur. (T. 8.) Occasio siquidem temporis inde ortum habet, quoniam fluxibile, ac facile muta-

bile est mortale Corpus, ac pro transmutationis modo aliis alio tempore eget auxiliis. Quare non est tertium aliquod præter ea, quæ dicta sunt, temporis occasio: Sæpius autem ea occasione tanquam tertio quodam ob eam, quam diximus, causam, ad docendum uti consuevimus. (T. 9.) Quoniam verò in his ipsis intentionibus, & aliæ Causæ salubres, & id, quod propositum est, genus continetur, rursus easdem repetamus. (T. 10.) Optimæ igitur Corporis constitutioni, cum circumfusus aer fuerit in temperie positus, earum rerum, de quibus nuper diximus, quietis scilicet, ac motus, somni, vigiliæ, & eorum, quæ assumuntur, atque excernuntur, exquisita mediocritas conveniet: cum verò Aer à temperie recesserit, tantum à mediocritate evariare oportet, quantus fuerit ab optima temperatura recessus. (T. 11.) Hi verò sunt mediocritatis scopi: in Aere quidem ambiente, ut neque horreat Corpus propter frigus, neque sudet propter æstum. (T. 12.) In exercitiis autem cum primum lassari ceperit Corpus, confestim quiescere. (T. 13.) In cibis autem coctionis perfectio, & excrementorum modus in quali, quantoque conveniens: æqualis verò in his, quodam modo est coctioni, appetitus. Quare neque præside egeat, qui singulorum, quæ assumuntur, quantitatem metiatur. Optima siquidem Natura quantum appetit, tantum etiam concoquit. (T. 14.) Sic & somno modum ipsa Natura præfinit his, qui optimam Corporis constitutionem sunt sortiti, & tunc à somno excitantur, cum corpus ampliori quiete non eget. (T. 15.) Cumque talem victus rationem adhibuerint, nullum est in eorum excrementis delictum, quæ vel per ventrem, vel per urinae meatus, vel per totum Corpus egeruntur. Nam priora quidem ex mediocritate eorum, quæ assumuntur, temperantur; totum verò Corpus salubriter perficere facit exercitii usus moderatus. (T. 16.)

Liquet autem ab ipsis caveri oportere omnes animi immodicos affectus, videlicet Iræ, Tristitiæ, Excandescentiæ, Timoris, Invidiæ. Hæc enim alterant, atque à naturali statu Corpus avertunt.

P A R A P H R A S I S.

Tot prætereà Auxiliorum, seu Causarum Conservatricum genera esse ait, quot sunt modi, quibus Corpora alterari possunt, quoniam ex eodem Galeno 2. Meth. cap. 13. 9. Meth. cap. 12. & lib. de opt. sect. ad Thrasybul. cap. 45. Unum nonnisi unum indicat. At verò quia Causæ Conservantes, etiam Corrigenes hic appellantur, dubitari sana ratione potest, quid ex ipsis corrigi debeat. Ad quod dicendum ex doctrina ejusdem Galeni, Corporum vitia, vel sensibilia, vel insensibilia esse. Sensibilia curatione egent, ut tollantur: Insensibilia verò correctione, quæ quodammodo ad Conservationem pertinet; unde optimè hic ipsemet inquit, quod quia paulatim Auxilia correctiones faciunt, antequam omnis ingruat noxa, hinc non præservantes à futuro malo, sed præsentis status Conservatrices Causas Medici appellant. Verum de nominibus non est diutius disceptandum.

Quot autem modis Corpus alteretur, pergit Galenus enarrare, atque à nonnullis causis necessariò, à quibusdam verò non necessariò in universum affici posse ait. Causas necessariò alterantes appellat, quas nulla ratione vitare valemus; reliquas verò humana solertia evitabiles, uti sunt omnia fortuita, & contingencia, non necessariò alterantes vocat. Exemplificat hoc in Aere, cibo, potuque, somno, & vigilia: Aerem enim nos ambientem, ait, semper attingere, comedereque, ac bibere, & vigilare, ac dormire, est necessarium; ensibus autem,

Ex exitialibus feris obviam ire, non necessarium. Quare concludit circa primum causarum genus versari Artem Corporis conservatricem, circa secundum autem minime.

At hic dubitare contingit, qua ratione Causæ necessariò alterantes, ut Aer, Cibus, Potus, Somnus, Vigilia, & reliquæ, Nonnaturales à Medicis dictæ, vocentur hic à Galeno Conservatrices? Si enim conservandi vim haberent, cum conservatio per similia fieri dicatur, proculdubio alterantes dici non possent, quoniam causæ alterantes videntur nobis contrariæ, conservantes verò similes. Verùm dicendum, Conservatrices Causas esse pariter alterantes, neque aliter conservare posse, nisi alteratione, vel in Corporibus ipsis inducta, vel in contrariis alterantibus extrinsecis, ne scilicet sanitatem præsentem turbent, & ægritudinem afferant: qua ratione in nostra Methodo dictum, Conservationem à similibus haberi.

Non est autem prætereundum, ejusmodi Causas necessariò alterantes vocari à Medicis Nonnaturales, ad differentiam Causarum Naturalium, & Præternaturalium. Sicut enim Naturales Causæ sunt, quæ Constitutionem Corporis naturalem, & sanam ingrediuntur, aut fovent, & naturæ aptæ sunt semper juvare: Præternaturales è converso, quæ eandem turbant, & morbosam reddunt; ita Nonnaturales ponuntur esse, quæ indifferentes sunt ad juvandum, & ad nocendum. Unde duæ conditiones in universum his attribuuntur: altera, ut sint necessariae, atque inevitabiles: altera, ut sint indifferentes ad juvandum, & ad nocendum; atque juvent, aut noceant, pro vario earumdem usu, opportuno, vel importuno, tempestivo, vel intempestivo, moderato, vel immoderato.

Causas hæc Conservatrices Corporum

salubrium progreditur ulteriùs particulatim enarrare, eas nimirum, quæ partem Medicinæ Hygieinæ dictam, constituunt, atque in universum sex esse; videlicet ambientem Aerem: Motum, & Quietem: Somnum, & Vigiliam: ea, quæ assumuntur, nempe Cibus, & Potus: ea, quæ excernuntur, idest Excrementa: & demum Animi Passiones. Quæ sanè Causæ si Corpus ad bonum alterent, puta si illius operationes validas, & Naturæ conformes reddant, dicentur Conservatrices, & Salubres; si verò ad malum alterent, atque ad ægritudines disponant, dicentur Insalubres, & Morbificæ. Verùm hoc loco considerantur potissimum ut salubres, sanitatemque conservantes, ut dictum.

Sed multa hic in Galenum afferri solent. Primò, quòd varius, & inconstans sit; siquidem *libro de opt. sect. ad Thrasybul. c. 24. & 40. & 5. de tuenda valetud. cap. ult.* Nonnaturales causas ad quatuor dumtaxat reducit, videlicet ad ea, quæ assumuntur; ad ea, quæ fiunt Animo, vel Corpore; ad ea, quæ excernuntur, aut retinentur; & demum ad ea, quæ foris adhibentur. Cui tamen objectioni sit satis dicendo, Galenum alibi memorasse quidem Causas Nonnaturales dictas, sed minùs distinctè, hic verò ex professio de ipsis agere, adeoque exactiùs easdem esse prosequutum. Quin si ea, quæ alibi ab eodem dicta sunt, perpendantur, profectò has easdem in præsentì Libro recensitas contineri observabimus: etenim ea, quæ assumuntur, comprehendunt Cibus, & Potus: ea, quæ fiunt Animo, vel Corpore, involvunt Motum, & Quietem, Somnum, & Vigiliam, Animique passionem: sub his, quæ excernuntur, aut retinentur, comprehenduntur Excreta, & Retenta cujusvis generis: & demum quæ foris adhibentur, complectuntur nedum Aerem, & quæcumque ad Aerem referuntur,

tur, verum etiam balnea, unctiones, lotiones, & similia.

Objiciunt alii, mancum, & diminutum hoc in loco fuisse Galenum in enumerandis hisce Causis Nonnaturalibus: nam inquit, multas alias recenseri posse, quæ idipsum agunt, ut Cœlestes influxus, Ignem, Aquam, Terram, Halitus, Vapores, atque ex his Metereologicas impressiones, tum Aqueas, tum Igneas, quæ minimè sub assignato Causarum Nonnaturalium numero comprehenduntur. Verum Cœlestes influxus, si qui sunt, ad Aerem commodè reducuntur; nam non alio modo Corpora humana afficere possunt, quàm alterando prius Aerem. Sic pariter Ignis, Aqua, Terra, Halitus, Vapores, & Meteorologicæ impressiones ad Aerem revocantur; etenim vel in Aere, vel per Aerem corpora nostra alterant.

Videtur ulterius ob stare, quòd Somnus, & Vigilia, Motus, & Quies, ut & Animi passiones sint potius operationes animales, adeoque pertinere debeant ad Causas Naturales, non ad Nonnaturales; unde superfluous videatur assignatus Nonnaturalium Causarum numerus. Sed Respondetur, ejusmodi operationes non considerari hic, prout à viventibus Animalibus proficiuntur, sed ut aliquid in illis operantur, ac efficiunt, nempe varios Animi, Cordis, & Sanguinis motus. Sic à Somno torpescit Corpus, crassescit Sanguis, & Cerebrum gravatur; A Vigilia verò cuncta attenuantur, commoventur, & exaeandescunt. A Quiete pariter, & Motu, atque ab Animi Pathematibus pulsus diversimodè afficiuntur, & Corpus universum vel refrigeratur, vel calet, vel rubet, vel albicat, vel rarescit, vel constipatur. Hinc prædictæ operationes animales formaliter, (ut loquuntur Scholastici) consideratæ, pertinent ad Causas Naturales, efficienter verò ad Causas Nonnaturales. Patet evidenter in Animi Pathematibus,

quæ cum vehementia fuerint, nedum Morbos, sed etiam Mortem asferre possunt, ut de immoderato Gaudio, ac subito, & repentino Timore, refert Galenus 12. meth. cap. 5. & 2. de symptom. Caus. cap. pariter 5.

Objicitur demum, quòd imminutus, ac imperfectus sit Senarius hic Causarum Nonnaturalium Numerus; quoniam balnea, frictiones, unctiones, cucurbitule, aliaque hujus generis, causæ etiam conservantes dici possint. At Balnea, frictiones, & cætera, ad prædictas sex Res bene quoque revocantur, & præsertim ad Inanitionem, aut Repletionem; nam ista vel aliquid ponunt, & immittunt in Corpus, vel aliquid ab eo detrahunt: si ponunt, ac immittunt, pertinent ad Repletionem; si detrahunt, spectant ad Inanitionem. Nitamen dicere velis, quòd, quia non sunt causæ necessariò alterantes, potius ad Curativas, quàm ad Conservativas Causas pertineant, cum nonnisi Morbos, & Causas morbosas respiciant.

Statutis itaque sex his Causis Nonnaturalibus, & Sanitatem conservantibus, pergit deinceps Galenus referre alterationes, quæ tum Aeri, tum Corpori humano exinde accidere possunt, atque inquit: *Ab Aere quidem ambiente, quia aut calefit, aut frigesit, aut exiccatur, aut humectatur, vel secundum horum patitur conjugationem, aut in tota substantia alteratur: calefit in æstate, frigesit in hyeme, exiccatur in Borea, humescit in Austro. Similiter ex accessu Solis ad nostrum verticem, incalescit, frigescit verò in ejusdem recessu: in Lunæ phasibus, ac permutationibus, incrementis, aut decrementis perturbatur: in Eclipsibus, in Orbitibus, & Occasibus Stellarum tum errantium, tum inerrantium: in Æquinoctiis, ac Solstitiis, aliisque diversimodè permittatur, de quibus speciatim agit Hippocrates in l. de Aer. Ig. & loc., ubi Astronomi-*
cam

eam agnitionem Medicis inculcat, & vix errare Medicum posse inquit, qui ejusmodi mutationes præsentire novit. A varia prætereà locorum, & Regionum conditione, diversimodè quoque Aer afficitur: sic Boreales Regionis frigidiores observantur; calidiores verò Australes: Montanæ frigidæ, calidæ Maritimæ. Idipsum de afflatu Ventorum vario, de Mephitibus, Vaporibus, Exhalationibus, aliisque dicendum.

At quid intelligat Galenus per alterationem Aeris in tota substantia, gravior est hujus loci difficultas. Plusquam Commentator exponit Aeris corruptionem, cum scilicet secundum suam substantiam corrumpitur. At impossibile in primis est, ut Aer secundum suam substantiam corrumpatur: si enim semel corrumpereetur, ampliùs in pristinam naturam redire nequiret. Deinde nec Galenus in textu de Corruptione meminit, sed solùm de Alteratione, cum dicat, *Aut in tota alteratur substantia*: Modò Alteratio Corruptio non est, neque ad substantiam pertinet, sed ad qualitates, ex doctrina ejusdem Galeni, & Aristoteleorum. Haly exposuit, per alterationem in tota substantia, putredinem procedentem à putridis halitibus, qui per Aeris substantiam diffunduntur, potissimùm à locis palustribus, mephitibus, mineralium fodinis, & similibus elati. Verùm, quamvis verum sit halitus per Aerem diffundi, & commistòs illum conspurcare, ac respirationi infensum reddere, non tamen per ejusmodi halitus dicetur revera Aer in sua substantia alteratus, cum in sua Natura alterari, mutarique non possit, sed solùm per misturam halituum contaminari, adeoque halitus ipsi noxii sint, & infenssi, non Aer; ut proptereà, si isti abigantur, ac dissipentur, Aer in sua substantia, depuratus, & immunis remaneat.

Pro solutione hujus difficultatis liceat

hic parumper digredi, atque Naturam Aeris breviter examinare: non enim apud omnes convenit, cujus naturæ ille sit. Stoici, ut refert Galenus 2. *de simpl. Medic. facult. cap. 2.*, quos etiam sequitur, tum 8. *de usu partium cap. 3.*, tum lib. *quod Animi mores Corporis temperiem sequantur cap. 4.*, itemque Cardanus lib. 2. *de Elementis cap. 4.* Aerem frigidum humidum constituunt; Aristoteles verò 2. *de Generat. & Corrupt. cap. 3.* humidum in prædominio, & calidum in subdominio esse docet. Alii æquè calidum, humidumque faciunt. Et quidem juxtà horum opinamenta videtur ex una parte dici posse humidus, quia ex doctrina ejusdem Aristotelis, non propriis, sed alienis terminis continetur, secundum definitionem Humidi ab eodem Aristotele traditam: videtur ex altera debere dici siccus, quia Corporibus non adhæret, nec illa madefacit; cum cæteroqui ex mente ejusdem, quodcumque Corpus humidum, sui adhæsu, necessariò humefaciat, quemadmodum experimur in Aqua, cæterisque liquoribus humidis. Præ summa insuper sui ténuitate, ac raritate, calidus etiam dici potest, cum caloris proprium sit attenuare, & rarefacere. Denique frigidus non abs re etiam appellabitur, quandoquidem Respirationi necessarius est, & Respirationi, (adeoque Aeris intromissio in Pulmones) inducta ponitur ab eodem Aristotele, & Galeno, ad Cordis fervorem attemperandum.

Verùmenimverò longè, latèque falluntur, qui Aeris Naturam ab hisce qualitatibus definire conantur. Si enim istiusmodi qualitates essent illi propriæ, intrinsecæ, & naturales, nunquam sine illis posset Aer inveniri, essentque ab illo inamovibiles, cum tamen non ita sit, suaque natura semper idem persistat, sive calidus, sive frigidus intensè evadat. Esset insuper perpetuò in statu sibi violento, cum

cum illum assidue experiamur, variis, innumerabilibusque qualitatibus mutationibus obnoxium fieri, & modo extreme calidum, modo summe frigidum, humidum, aut siccum, & vix unquam momento temporis sub eodem statu unius qualitatis permanentem. Neque satis erit dicere, quod licet humiditas actualis in Aere deperdatur, nunquam tamen pereat humiditas insita, & virtualis, quæ necessaria est ad conservandam Aeris naturam. Nam quemadmodum extincta caliditate, & siccitate Ignis actuali, perit illic Ignis natura, ac prorsus extinguitur; nec præter illas qualitates actuales, ullus unquam alias virtuales in illo somniavit; sic pariter, præter actualem humiditatem Aeri tributam, aliam virtuales effingere omnino chimericum est. Eadem ratione, absumpta universa humiditate actuali ex Aqua, puta cum ad ignem exposita tota evanescit in auras, Aqua ipsa deficit; ita & in Aere dicendum est. Frustrà ergo recursum habent ad virtuales alias qualitates, solummodo mente confictam, qui ejusmodi difficultates effugere student, ut & alias, quæ eisdem innumeræ opponi possunt. Verum nostrum institutum non est de his hoc loco pertractare.

At verò dicetur Aer sua natura non quidem calidus, aut frigidus, neque siccus, aut humidus, sed tenuis, permeabilis, fluidusque solum, quia his, tanquam sibi dumtaxat propriis, nunquam orbari potest. Ad calorem autem, & ad frigus æquè indifferens est, & sive calefiat, sive frigefiat, nunquam à sua natura declinat, illasque commodè, & sine ullo sui detrimento uniformiter admittit. Hinc & Aqua, cui Aer affinis est, naturam suam à frigore nec recognoscit; siquidem si eidem frigus ex naturali proprietate competeret, cum in flumine congelascit, vel concrevit in nivem, aut glaciem, non solum superficie tenuis, sive quâ parte Aeri fri-

gido coheret, sed etiam secundum totam suam crassitiem, & usque ad imum, congelascere deberet: quin & si summe frigida foret, cur ab Aere boreo intensius refrigerari, & in gelu commutari posset? sicut etiam super affuso nitro, ac sale, aut vasi aquam ipsam continenti, circumposito? Verba plura planè dabunt, ut effugiant, sed solutiones solidas nunquam. Cæterum de natura Aeris latius agemus inferius Opusculo de Recto usu sex rerum nonnaturalium, Capite de Aere.

Ex his modo notum fiet, quo pacto Aer in sua substantia, ac natura alteratus dici possit. Cum enim expansum quoddam sit, tenue, permeabile, ac fluidum, si in his, quæ ejus naturam, & substantiam constituunt, permutetur, in sua substantia dicetur alteratus: id quod dupliciter generatim accidere potest; vel cum is immodicè crassescit, & constipatur, ab halitibus, aut vaporibus, plus justo per ipsum intermixtis, ut in cryptis, cellisque vinariis, mephitis, ac fodinis metallorum; vel cum plus justo distrahitur, & rarefit, ut in altissimorum montium fastigiis, in exuctu machinæ Pneumaticæ Boyleæ, absumpta, vel compressa substantia illa, quam vi elasticâ præditam voluit, nostræ respirationi quammaximè necessaria; unde Aerem recentari oportere, in ejusdem usum, pro Animalium vita, aliàs ostensum.

Postquam de varia Aeris alteratione egit Galenus, mentionem facit de cæteris Causis nonnaturalibus, quo nimirum pacto corpora humana possint alterare. Et à Motu, ac Quiete, cum modum excefferint, plurima detrimenta illis accidere ostendit. Nimius enim Motus vires enervat, spiritus dissipat, sanguinem attenuat, & membra cuncta Corporis delafat. Quies verò immoderata torpidum Corpus reddit, excrementa multiplicat, & constipat, eorumque egestionem impedit,

pedit, sanguinem crassum, & inertem efficit: omne siquidem nimium Naturæ inimicum dicitur Hippocrati 2. aphor.

§ I.

Ex Somno pariter, & Vigilia non dissimilia incommoda proficiscuntur, si immoderata fuerint; nam Somnus quietis species est, Vigilia verò, motus. Quamobrem sicuti ex Somno moderato, & convenienti, vires reficiuntur, membra roborantur, & totum Corpus viget; ita ex adverso, ab immoderato torpet, & opprimitur. Sic itidem ex Vigilia mediocri egeruntur excrementa, & sensus omnes acuuntur; ex immodica verò elanguent. Unde læsiones ab una Causa inductæ, corriguntur ab opposita; quamobrem ab eodem Hippocrate dictum: *Ubi Motus lassitudinem facit, quies statim aufert.*

Ab his præterea, quæ assumuntur, excernuntur, aut retinentur, non levia mala quoque Corporibus contingunt. Quantum etenim Cibi, & Potus humana Corpora alterent, cuique notum, siue substantia in illis consideretur, siue quantitas, aut qualitas diversa; exinde enim multoties Corpora afficiuntur, ut proinde plurimum subinde gravata, præter naturam alterentur, & pereant: Atqui nulum alimentum adeò purum invenitur, quin ex eo excrementum aliquod non exoriat, quo postmodum diutius detento, vel intempestivè excreto, alia incommoda non derivent. Quod si quævis alia à Cibus, potibusque abesset alteratio, ea saltem inevitabiliter semper accidit, agere nimirum, & pati in ventriculo, atque in intestinis, pro eorundem dissolutione.

Ea insuper, quæ retinentur, aut excernuntur, quotidiana potissimum excrementa Corporis, qualem, & quantam similiter afferant alterationem, notissimum quoque est, & præsertim si retineantur, quæ retinenda non sunt, aut excernantur,

quæ non debent excerni; aut etiam si immodicè, aut parcè, si intempestivè, si non debito, convenientique modo, aut per loca penitus insueta, & incongruentia. Ab his enim gravia semper detrimenta exoriuntur.

Postremò ab Animi pathematibus Corpora multifariam affici posse, certissimum pariter est: nam ex Ira plus justo incallescunt, ex Timore refrigerantur, ex Lætitia elanguent, ac dissolvuntur, ex Mœrore exarescunt. Ità quidem plurimi extremo Gaudio, ac subito Timore periere: ob Iram plerique in furorem acti sunt: ex Amore alii tabidi evaserunt: à diuturna Mœstitia melancholici plures facti sunt.

Expositis Causis Nonnaturalibus, quibus Humana Corpora affici, & alterari possunt, prosequitur Galenus referre, quo pacto eadem salubres, vel insalubres fiant; atque salubres esse docet, si opportuno, ac recto usu, fuerint adhibitæ; insalubres verò, si usu importuno, ac inconvenienti. Convenientem autem, rectumque usum consistere subdit, in debita quantitate, & qualitate, itemque in tempore: inconvenientem è converso, in oppositis. Exemplificat in Motu, de quo inquit: *Ubi Motum Corpus desiderat, Exercitatio quidem salubris, Otium autem insalubre: cum verò eget Quiete, Otium quidem salubre, Exercitatio autem insalubris. Eodem modo de Cibus, & Potibus, & de aliis omnibus statuendum. Horum enim singula, quando ut necessitas Corporis exigit, cum mensura, ac qualitate opportuna adhibentur, salubria fiunt; at cum citra omnem necessitatem, ac præter modum afferuntur, insalubria.* Hinc nulla Causa nonnaturalis ex se, suaque natura salubris, aut insalubris dici potest, sed tantummodò per respectum ad Corpora: si enim sua natura salubris, vel insalubris foret, semper, & cunctis talis esset: at Cibus uni salubris, alteri insalubris est, & quod

quod uni prodest, alteri nocet, præsertim tempore, modo, quantitate, ac qualitate non servatis; itaque per relationem ad Corporares externæ, & Nonnaturales dictæ salubres, aut insalubres erunt. Notabilis est in hanc rem historia relata à Galeno 6. *de locis affect. cap. 4.* de Viro illo, qui ex obitu uxoris, ob abstinentiam à Venere, in inappetentiam, malamque ciborum digestionem inciderat, quam deinde ad pristinam consuetudinem rediens, recuperavit. Qui usus ergo huic salubris fuit, aliis non paucis insalubris esse solet. At hic in dubium vocari potest, cur Galenus hoc loco, ordinem, modum, & tempus omiserit, quæ sanè in libris *de Causis morborum*, & *alibi*, magni fecit. Et quamvis plusquam Commentator Turisanus ista putet reduci posse ad quantitatem, & qualitatem, quarum hic speciatim Galenus meminit: congruentius dicendum, sub temporis opportunitate, hoc eodem Capite memorata *textu 7.* illa comprehendere. Sed hæc parvi, vel nullius momenti sunt.

Incipit post hæc Galenus docere, quomodo Corpus saluberrimum debeat à prædictis sex rebus nonnaturalibus conservari: atque primum observat, num Aer temperatus sit: talis quippe esse debet, ut optimæ Corporis constitutioni congruat; unde & cibi, potusque, motus, & quies, somnus, & vigilia, aliæque causæ superius memoratæ, cum moderamine quoque instituentur. At si Aer fuerit intemperatus, oportebit pro illius correctione, tantum reliquas causas nonnaturales à temperatura media recedere, quantum & ipse Aer ex opposito ab eadem temperatura recesserit, ut scilicet una Causa alteri oppugnans, se mutuò corrigant, & temperaturam Corporis moderatam conservent, sed tanto cum recessu à mediocritate, quantum Aeris intemperies indicabit, ne violentia, aut exces-

sus in correctione subsequatur, indeque damnum Corpori conservando contingat.

Neque mirum videatur, quod potior rationem habendam esse voluerit de Aere Galenus, quam de alia quacumque Causa nonnaturalis. Siquidem longè majorem alterationem patitur Corpus ab uno Aere, quam ex reliquis aliis nonnaturalibus Causis: Hic enim continenter inspiratur, & intimas, præcipuasque partes Corporis, ac præsertim vitales subit, simulque cum sanguine commiscetur, & penetralia Cordis, aliorumque viscerum pervadit; quin & undique Corpus ipsum circumambit, & transpirationem tanto perè sustinendæ vitæ necessariam, vel plus justo promovet, vel retardat, aut perturbat. Cibus verò, Potus, Motus, Quies, Somnus, ac Vigilia, plerumque ad plures horas differuntur, & sine noxa intermittuntur, imò quandoque etiam ad dies integros. Major insuper alteratio evenit ex Aere, quam ex aliis; quoniam illius vitia non tam facile corriguntur; at verò læsiones à motu, promptè admodum quiete tolluntur, & quæ à vigilia inferuntur, rependuntur illicò per somnum, quæque à cibo, convenienti dieta: quod secus accidit ex Aere, ut patet. Jure ergo optimo potentior Causa dicitur Aer, quam reliquæ Causæ nonnaturales.

Tradit autem Galenus indicia moderati Aeris, ex quibus à mediocritate recessus deinde internoscantur, atque inquit: In Aere temperato mediocritatis terminos esse, *ut neque horreat Corpus propter frigus, neque sudet propter æstum.* At hoc videtur ferè impossibile inveniri, nisi tamen per comparisonem ad Corpora habitantium intelligatur: qua ratione solemus nostrum Aerem Parthenopæum supra cæteros commendare, utpotè non admittentem tam facile extremum frigus, aut æstum, per comparisonem ad alia climata calidiora, vel frigidiora.

Ad indagandas autem Aeris intemperies, frigoris, aut caloris, humiditatis, aut siccitatis exuperantis, plura sagax Recentiorum Philosophantium diligentia Instrumentorum genera adinvenit, Thermometri, & Barometri, Hygrometri, aut Brestometri: quorum usum, veluti jam satis cunctis notum, explicare consultò prætermittimus.

Sicuti temperatum Aerem Corpori temperato convenire inquit Galenus, ita pari modo de exercitio statuendum subdit, atque eò usque temperatum Corpus exercendum esse ait, quousque lassari cœperit: quod etiam insinuat 2. *de tuend. valetud. cap. ult.* Addit autem, non quidem omninò ad lassitudinem perveniendum, aliter Corpus defatigaretur, adeòque insalubris fieret exercitatio; sed cum primum lassari videbitur, quiescere oportere; unde lassitudo talis sit, qualem quies facile levet, ut idem Galenus docet *cit. 2. de tuend. valetud.* ex tali enim exercitio plurima juvamenta Corpori contingunt, præsertim verò robur musculorum, sanguinis repurgatio, excrementorum depositio, atque excretio, halituum perspiratio, sensuum perspicacitas, alimenti distributio, & alia hujus generis plura, quorum meminit idem Galenus *eod. 2. de san. tuend. cap. 2.*

De Cibo, & Potu insuper quatuor tradit indicia, optimam Corporis temperaturam indicantia, perfectam scilicet Ciborum concoctionem, debitam excrementorum quantitatem, appetitum coctioni proportionatum, & uniformem cujusvis cibi habitudinem.

Pari modo de Somno ratiocinatur, quòd qui optima Corporis constitutione fruuntur, moderatum somnum habeant, & tunc à somno excitentur, cum Corpus ampliori quiete non eget.

Quoties igitur in his omnibus mediocritas servabitur, egestionem quoque ex-

crementorum moderatæ erunt, nam ipsæ sequuntur ciborum quantitatem, & qualitatem, convenientemque coctionem. Inter cæteras autem egestionem per universos Corporis ductus habitas, speciatim eam memorat, quæ perspiratione peragitur, quamque ait potissimum ab exercitiis promoveri. Et quidem tanta est hujus evacuationis utilitas, licet insensibilis, ut idem Galenus pluries illam commendaverit, aliisque omnibus prætulit, quemadmodum deducitur ex *lib. 8. Meth. Medic. c. 3. & 11. ejusdem cap. 8. & 1. de differ. febrium 3.* unde si fortasse intercipiatur, impediaturque, putredines, febres, corruptiones, inflammationes, & alias hujus generis ægrotudines suboriri dicat. In hujus comprobationem industriè quidem deprehendit Sanctorius, longè plus abscedere ex humano Corpore insensibiliter percutim, quàm per aliam quancumque partem patentiore, sensibilia Corporis repurgamenta, ut fusè ostendit in *sua Medicina Statica.*

Transit ad Animi affectiones, & inquit: *Ab his* (idest benè valentibus, & temperatis Corporibus) *caveri oportere omnes Animi immodicos affectus, videlicet Iræ, Tristitiæ, Furoris, seu Excandescentiæ, Timoris, Invidiæ: hæc enim alterant, atque à naturali statu Corpus averunt;* quin subdit, *libro de ludo parvæ pilæ,* majorem sollicitudinem habendam esse in moderandis Animi motionibus, quàm in corporalibus motibus leniendis. Et quidem sana ratione: sunt enim hi nostri hostes intestini, à quibus maximoperè formidandum. Verùm de Recto Usu sex Rerum Nonnaturalium tam in statu Corporis Sano, quàm in Morbo, sejunctim inferiùs agemus, peculiari opusculo. Interim Galenum prosequamur.

CAPUT III.

LXXXVI. in Galeno.

De Venereis.

TEXTUS.

(T. 17.) **V**enereorum verò juxta Epicuri sententiam nullus est usus salubris. Revera autem confert, si tantum intervalli in eorum usu adhibeatur, ut neque resolutio aliqua sentiat, & ipse seipso homo quodammodò levior factus, ac melius spirare videatur.

(T. 18.) Tempus verò ad utendum opportunum, cum omnium in rerum circumstantium exquisita mediocritate Corpus fuerit constitutum, cum scilicet neque supra modum plenum, neque vacuum extiterit: neque in calore, aut frigore, aut siccitate, aut humiditate exceßerit Corpus. Quod si aberrare contigerit, parvus sit error. Melius autem illi calefacto magis, quam infrigidato, & pleno, quam vacuo, & humectato potius Corpore, quam exiccato, uti venereis.

(T. 19.) Horum autem singulorum quæ dicta sunt, qualitas in optima Corporis constitutione est eligenda. Exercitii quidem, in quo totius Corporis partes æqua proportionem moventur, ita ut non aliæ quidem ultra modum fatigentur, aliæ verò citrà. Cibi autem, & potus optimam habeant temperiem. Sunt enim maxime convenientes naturis optima temperatura præditis: Eadem in reliquis etiam est ratio adhibenda.

(T. 20.) At si quod ab optima constitutione defecerit Corpus, non autem vehementer, & Causæ, quæ ipsius sanitatem conservant, ad proportionem mutantur. Sed cum multa sint ejusmodi Corpora, per singula genera seorsum dicendum. Quod igitur in temperatura similarium partium exariat, instrumentariarum autem

servat commensurationem, duplicem habet salubrium causarum formam: alteram quidem earum, quæ ipsius conservant temperaturam: alteram verò earum, quæ ad optimam transferunt. Quæ itaque ipsius temperaturam conservant, tantum à Causis optimè temperatæ naturæ distabunt, quantum & totius Corporis temperatura ab illa exariabit. Calidiora siquidem Corpora calidioris victus rationem exposcunt, frigidiora autem frigidioris, & sicciora siccioris, & humidiora humidioris, ac secundum conjugationem calidiora, ac sicciora, calidioris, ac siccioris: eadem in reliquis etiam conjugationibus proportionem servata.

(T. 21.) Rectè siquidem causarum utetur materia, qui naturales earum potentias agnoverit, veluti quod motus, defectus alimenti, vigiliæ, excretio, & omnes animi affectus corpus exiccant: at quæ his contraria existunt, humectant. Ità verò & de calefacientibus, & refrigerantibus vitæ institutis, de cibis, & potibus, atque (ut simpliciter dicam) de iis omnibus, quæ circa Corpus sunt, qui materias noscit, & potentias, is salubribus utetur causis, similia similibus offerendo, si quidem ejus propositum fuerit eandem, in qua acceperit, Corporis servare temperaturam.

(T. 22.) Quod si permutare, atque ad melius traducere statuerit, alterum est hic salubrium causarum genus, his quidem, quas nuper diximus, contrarium, æqualiter verò declinans ad alteram partem à benè temperatis, & mediis, quæ optimis convenire naturis dicebamus. Calidior siquidem, ac siccior temperatura à calidioris, ac siccioris victus ratione ad exactum bonæ temperaturæ habitum minimè transfertur. At talium erit usus necessarius, quæ tantum eis, quæ benè temperatæ existunt, frigidiora sint, atque humidiora, quantum & Natura Naturam in caliditate, & siccitate superabat.

(T. 23.) Nam tale causarum genus naturales corrigit in-

tem-

temperantias: Alterum verò, de quo supra diximus, temperaturam conservat. Est autem utriusque vicissim apud Medicos usus necessarius. Nam cum plurimum suppetit ocii, corrigere oportet, ac sensim ad meliora transferre. Neque enim Natura patitur eas, quæ subito fiunt, alterationes. Hominem autem necessariis occupationibus districtum, in eodem præstat habitu conservare. (T. 24.) Quo pacto igitur & hoc ipsum primum causarum genus conservativum appellamus? Nam fortè magis alterativum, & curativum, & naturalium defectuum correctivum, vocare conveniebat. Quoniam ad universum sanitatis genus referentes, non ad eas, quæ secundum speciem, differentias, quæcumque sanos conservant, conservativa omnia vocamus, sive præter id, quod sanitatem conservant, ad melius totam traducant temperaturam, sive pristinum tantummodò habitum tueantur: at quæ deteriore statum efficiunt, insalubria. (T. 25.) Quæcumque igitur similem habent in omnibus Corporis partibus intemperiem, simili egent pro curatione, quæ verò dissimilem; dissimili. Nam fieri potest, ut Venter frigidior sit, quàm oporteat, Caput verò calidius, atque utrumque propriis egeat auxiliis. Ac ratione eadem singulæ aliæ partes, cum fuerint aut præter modum humidiores, aut sicciores, aut calidiores, aut frigidiores, suæ intemperiei victum exigunt accommodatum. Neque igitur ex æquo omnes tales corporis partes exercebimus, neque æqualiter humectabimus, aut exiccabimus, aut tale aliud quippiam agemus. Plenius verò de his diximus volumine illo, quod de Salubribus inscribitur.

P A R A P H R A S I S.

VENEREORUM usum inter Causas non-naturales reponendum esse docet Galenus 1. de tuenda valetud. cap. ult. il-

lum ibi referens ad Motum, quamvis reduci quoque possit ad Inanitionem, cum per ipsum aliquid è Corpore educatur. Cum igitur ad Causas Nonnaturales merito revocari debeat, dubitatur hoc loco à Galeno, an aliquando sit Causa salubris, quoniam ex superius dictis Nonnaturales Causæ salubres evadunt, quoties moderamen, & temporis opportunitatem servant.

Primum autem refert sententiam Epicuri, qui cum omnem coitum damnasset, nunquam Veneris usum salubrem esse opinatus est, ea nimirum ratione, quia per feminis evacuationem putabat, particulam quoque Corporis viventis abscedere, adeòque illud quoddammodò diminutum remanere, more quo Arbores mutilæ fiunt, cum ab ipsis furculi, ac ramuli rescinduntur, ut telluri inferantur. Hanc eandem sententiam multò antea edocuerat Democritus, coitum semper nocuum arbitratus; quin & parvam etiam Epilepsiam illum appellabat, ut refert idem Galenus 3. epidem. comm. 1. Hinc obiter notandum, quàm falsò plerique vulgarium, omnem voluptatis sensum, adhuc turpem, impigerint Epicuro. Is enim tam pudicus, castus, continens, simul atque temperatus, sobrius, & abstinens fuit, ut ei similem, aut æqualem, inter Ethnicos Philosophos, invenire frustrà sit putatum; quemadmodum latè nimis ostendit Eruditissimus Gassendus in ejus Vita. Neque verò hic à Galeno alius Epicurus ab illo memoratur, ut perperam aliqui crediderunt.

Et si autem ita existimaverit Epicurus, docet tamen contrarium Galenus, & Venerereorum usum, utpotè salubritati conferentem commendans, *Revera autem, inquit, confert, si tantum intervalli in illorum usu adhibeatur, ut neque resolutio aliqua sentiatur, & ipse seipso homo quoddammodò levior factus, ac melius spirare videatur. Quo verò tempore utendum eo sit,*

sit, mox subdit: *Illum opportunum esse, cum Corpus neque supra modum plenum, neque vacuum extiterit, aut in calore, aut in frigore, aut siccitate, aut humiditate excesserit*; itaque in exquisita mediocritate sit oportet, aliter per usum Veneris, aut calefieret, aut refrigeraretur Corpus, aut humesceret magis, aut tabefieret, cum quodlibet horum ab immoderato coitu accidere possit; siquidem Veneris usus de genere motus, & exercitationis est, ac propterea modo suo calefacit, refrigerat verò, quoniam dissipat spiritus: humectat pariter, cumulat ex mala digestionem excrementis; ac denique exiccat, propter immodicam humoris evacuationem.

Vitandus insuper concubitus est post nimium exercitium, in vehementibus animi passionibus, post vigiliam diuturnam, vel soporem, cum ab his non leviter Cerebrum offendatur, atque eò magis, si postmodum adjiciatur Veneris usus.

Quòd si, subdit, *aberrare contigerit, parvus sit error, & potius calefacto, quam infrigidato Corpore, potius pleno, quam vacuo, & humectato: ita enim minus malum erit*. Animadversione autem dignum est, Galenum, parvum dixisse errorem esse debere, quia omne nimium Naturæ inimicum est: & Corpus potius plenum, quam vacuum, plenitudine non tam ciborum, ac Ventriculi, quam Vasorum, ac totius: exinde enim minus damnum vereri est.

Postremò ex Hippocrate 6. *epidem. sect. 3.* prodesse dicitur Coitus Corporibus pituitosis; & quòd inflammationes prohibeat in inguinibus, Capitis gravitati occurrat, atque conferat foeminis in affectibus hystericis, & menstruorum suppressionibus, ut subdit etiam Galenus 6. *de locis affect. cap. 5.* si tamen moderatus sit. Contrà verò si fuerit immoderatus, ac intempestivus, vitam breviam, senectutem

accelerat, Cerebrum debilitat, sensus omnes labefaciat, Ventriculum languidum reddit, cruditates cumulat, concitat fluxiones, articulos labefacit, nephritidem inducit, sanguinis sputum promovet, ad hæticam, & tabem disponit, & plurimas alias ægrotudines affert, quas præ cæteris retulit Aetius lib. 3. *peculiari capite de Nocumentis immoderate Veneris*. Sed de re hac satis. Qua autem ratione qualitas, & quantitas exercitiorum, sicut etiam ciborum, & potuum, ejusmodi Corporum constitutioni, aliisque adhibenda sit, inferius dicemus.

Quoniam verò de conservatione Corporis saluberrimi hucusque meminerat, prosequitur nunc agere de causis salubribus conservantibus Corpora, quæ licet sana etiam sint, recedunt tamen aliquantulum ab optima, & perfectissima constitutione. Inquit ergo: *Si Corpus ab optima constitutione defecerit, non autem plurimum, aut vehementer, causæ pariter sanitatem conservare valentes, pari modo, secundum eandem proportionem variabunt*. Cumq; Corpora multa sint, propterea, juxta eorundem varietatem, diversimodè conservanda erunt. Et quidem causæ Corpora temperata conservantes, sed cum aliquo recessu à temperatissimo, unius generis sunt, cum pari gradu à mediocritate recedunt; ut cum E. g. conservari ponitur Corpus uno gradu caloris à mediocritate recedens, per causas alterantes, cum distantia à mediocritate unius pariter gradus caloris, conservabitur: alterius verò generis, cum ad meliorem statum illud reducunt, atque ad mediam, & optimam transferunt constitutionem, opposita qualitate intercedente, per uniformem gradum à mediocritate recedentem; ut cum Corpus calidum per recessum unius gradus à mediocritate reducitur ad mediocritatem per frigus, cum accessu unius similiter gradus. Hinc calida Corpora usu cali-

calidorum conservabuntur, primo conservationis modo; itemque frigida frigidis, humida humidis, & sicca siccis, pari ratione. Secundo conservationis modo, per reductionem ab oppositis. Verum ex his duobus modis, tutior, ac melior semper erit, qui per reductionem fit; quoniam in primo conservandi modo, exacta qualitatum mensura, remediorumque certa per gradus substitutio, haberi nequit. Quamobrem Galenus *lib. de opt. sect. ad Thrasylbul. cap. 19. & 28.* universam Artem Medicam Correctivam esse ait: correctio autem per contraria, non verò per similia perficitur: Id autem commodè, ac facillimè etiam peragetur, removendo, vel retundendo causas, quæ ejusmodi caloris excessum inferre potuerunt.

Insinuat ulterius Galenus, reliqua Corpora sana, sed intemperata, ad meliorem statum reducenda esse, non quidem causis similibus, sed contrariis; quæ tamen tantum distent ab optima constitutione, quantum distant Corpora ab eadem declinantia; unde calidiora frigefacientibus, frigidiora calefacientibus emendabuntur, si non semel, aut unico remediorum genere, saltem iterato, aut multiplici, ut tutior conservatio, ac reductio habeatur. Cautè igitur in adhibendis causis reducentibus Corpora in meliorem statum procedendum est; ne subito, ac affatim, sed sensim reductio fiat: nam subitas, ac violentas mutationes Natura non patitur: plurimum enim, ac vehementer alterare, calefacere, aut refrigerare, simileve aliud agere, nocuum dicitur ab Hippocrate 2. *aphorism. 51.* Quare summa exquiritur in Medico prudentia in instituendis ejusmodi correctionibus, ne Corpora perturbentur potius, quam conserventur. Verumtamen promptè admodum hoc idem peragetur, remotione, aut correctione causarum, hos effectus intemperierum inferentium: nam quemad-

modum intemperies istæ à causis nonnaturalibus plerumque inducuntur; ita per remotionem, correctionemque earumdem, in pristinum statum Corpora subinde intemperata revocantur, nisi tamen partes humorales, aut solidæ, talem non contraxerint impressionem, ut in morbosam constitutionem illa deduxerint: quo casu non amplius conservatione, aut simplici correctione, sed omnimoda curatione egebunt; de qua inferius.

At gravem sibi ipsi Galenus solvendam proponit difficultatem, qua scilicet ratione hoc Causarum reducentium genus conservativum dici possit, cum contrariis actionibus peragatur. Cui tamen ipsemet satisfacit, inquiens, salubrium Causarum seriem dupliciter considerari posse, vel respectu totius generis, seu latitudinis sanitatis, & hoc pacto Causæ istæ conservativæ dicuntur, quoniam conservant Corpora intra sanitatis limites; vel respectu ejusdem sanitatis differentiarum, quæ peculiarem Corporum sanorum constitutionem comprehendit, puta eorum, quæ aliqualem recessum habent à mediocritate; & in hoc sensu, Reductivæ appellantur, quoniam sanitatem intra limites suos peculiariter constitutam, ad optimam, & moderatam quam maximè revocant, atque adeò in meliorem statum, respectivè ad præcedentem, reducunt. Attamen adest aliqua differentia inter Curationem, & Reductionem: Siquidem Curationem, per medicamenta instituitur, directè, confestim, & quodammodò violentè operantia, fugando scilicet causam morbosam cum morbo, & symptomatis adjunctis, media aliqua sensibili evacuatione, aut inversione, commotioneque. Reductio verò fit sensim, & sine ulla violentia. Accedit, quòd Curatio tollit vitia sensibilia, & manifesta Corporum, extra limites sanitatis delapsorum. Reductio verò solum corrigit vitia in-

sensibilia, intra latitudinem sanitatis posita.

Cum Corpora insuper sana intemperata sunt in omnibus partibus, intemperie simili universali, conformi etiam reductione, per universum Corpus instituenda, tractanda docet. Cum autem dissimilem patiuntur intemperiem in diversis partibus, puta si Ventriculus ad frigidum, Caput verò ad calidum intemperetur, tunc propriis auxiliis, & convenienter corrigentibus, reducenda erunt: quare ad Ventriculum calefacientia, ad Caput frigefacientia, adhibenda, modo quo supra.

CAPUT IV.

LXXXVII. in Galeno.

De Causis salubribus partium Instrumentariarum.

TEXTUS.

(T. 26.) **I**nstrumentariarum autem partium causæ salubres, quemadmodum & hic ab optima constitutione delinquitur, ita & invicem distabunt. Aliæ enim sunt salubres erroribus, qui in formatione consistunt, aliæ his, qui in magnitudine, vel numero, vel positu. (T. 27.) In formatione igitur plures contingunt errores: nam & figura partis, & si qua in ea cavitas est secundum Naturam, vel meatus, vel orificium, vel asperitas, vel lenitas, quando à naturali mediocritate recesserint, si quidem parum hoc patiantur, salubrium Corporum retinent appellationem; si verò amplius, insalubrium. Quod si tantus fuerit recessus, ut operationi afferat detrimentum, jam ægrotare dicentur. Secundum quantitatem autem excessus, at-

que defectus, ad easdem ducit differentias. In numero, sive una, sive plures, quæcumque ex similaribus partibus fuerint, aut deficient, aut superabundent. Ex hoc genere etiam sunt, quæcumque in nobis substantiæ præter naturam consistunt. Reliquum est aliud genus, quod ad situm cujuslibet simplicis attinet partis, in quo & ipso quatuor sunt omnes differentiæ. Prima quidem, quæ optima existit, secunda verò, quæ parum evariat, atque ideò salubre adhuc efficit Corpus: & tertia, quæ insalubre, quando amplius à modo recesserit: & quarta, quæ jam ægrum recessu plurimò reddit. (T. 28.) Quæcumque igitur partes in figura delinquant, veluti quæ lesæ, varæ, & obliquæ appellantur, hæ, cum nuper natus adhuc tenellus est, formatione, atque alligatione, ad naturalem traducuntur habitum. Quod si jam aucto infante ad duritiem pervenerint, emendari non possunt. Sic errores quidem, qui ad cavitatem attinent, cum adhuc augeri perseverent, correctionem admittunt; cum autem jam ad ultimum pervenerint, nullus est remedio locus. Cavitates igitur quiete, atque alligatione parvæ redduntur, magnæ verò, partium operatione, & spiritus retentione: sic & quæcumque foramina, oraque. (T. 29.) Et quidem quæ naturalem magnitudinem partes exuperant, quiete, ac comoda alligatione minores redduntur: augentur autem & naturali motu, & frictione moderata, & quibuscumque aliis plus sanguinis attrahere natura aptis. Deficientes verò partes, quæcumque ex sanguine ortum habuerunt, corrigi quidem non est impossibile: quæ autem ex semine, propemodum impossibile existit; licet tamen aliquando loco eorum alia facere, quæ usum haud dissimilem præstent. Earum verò omnium Natura opifex est: Medicus autem minister: Quæ verò numero excedunt, his ablatio causa salubris existit. Inspicere verò oportet in quibus id fieri possit; nam si impossi-

le appareat, transponere tentandum est. Eadem est & eorum, quæ in situ vitia sunt, emendatio. (T. 30.) Neque in obscuro est, quod duo sæpius, aut tria vitia eandem partem possunt occupare, sicuti in eo, qui ventriculum parvum simul, atque rotundum, atque adversus septum habuit incumbentem. In ipso etenim magnitudo, formato, ac situs erant depravati: temperatura quoque frigidior existebat. Hic nullo artificio ad naturalem habitum transferri poterat, at, ne adeo infestaretur, erat remedio locus. Nam quoniam repleto ventriculo, difficultate spirandi premebatur, minus cibi, at magis alimento opportuni, & qui non difficulter subduceretur, ter die assumebat. Alteri verò, cui obstructio in hepate ob vasorum angustiam sæpius contingebat, extenuans victus ratio causa salubris inventa est.

P A R A P H R A S I S.

A Causis conservantibus Corpora in temperata, transit Galenus ad pervestigandas causas conservantes Corpora in compositione vitiosa. Et quoniam in compositione possunt Corpora quadrupliciter deficere, vel in conformatione, vel in magnitudine, vel in numero, vel in situ, quatuor propterea proponit causas ejuscemodi Corpora malè affecta conservantes, intra sanitatis latitudinem posita, sed parùm à mediocritate declinantia. Enumerat autem primùm omnes species errorum, qui in hoc contingere possunt, scilicet in Conformatione, Magnitudine, Numero, & Situ, quique tamen exigui, parvi, & insensibiles esse debent; aliter si magni forent, & valdè sensibiles, pertinerent potius ad Corpora Insalubria. In Conformatione autem considerantur Figura, Cavitas, Meatus, Orificium, Asperitas, & Lenitas, si fortassè à naturali mediocritate recesserint. In Magni-

tudine esse potest defectus, vel excessus, sicut pariter in Numero: si nimirum partes desint, aut superabundent. In Situ denique, si evariant à debito, & naturali loco.

Quo autem pacto possint isti errores emendari, subdit, inquiens: si foetus tenellus adhuc sit, & recens natus, facilè alligatione, fasciis, similibusque artificiois corrigentur vitia in figura; at si jam adultior factus sit, & partes obduruerint, inemendabile vitium existimabitur. Ità de cæteris defectibus observandum, cum etiam Magnitudines, & Numeri adaucti, possint alligatione, constrictione, pressioneque diminui.

Neque verò prætereundum, quod in his defectibus corrigendis, multum quoque valet victus ratio convenienter instituta: nam magnitudines adauctæ inedia plerumque tolluntur, & victu pleno deficientes restaurantur: Viæ adstrictæ, alimentis attenuantibus, & aperientibus laxantur, & laxæ viceversa adstringentibus, & incrassantibus coarctantur: Et sic de reliquis. Hinc addit Galenus, quod cui obstructio in Hepate ob vasorum angustiam sæpius contingebat, extenuans victus pro remedio inventus est. Exercitiorum pariter recta administratio, in Aere convenienti, prodesse pluries consuevit; unde comperimus quosdam à nativitate decolores, ob vasorum angustiam, solo usu exercitiorum, & in aere calidiori, ac tenuiori, in meliorem statum pervenisse. Sic etiam, qui conquerebantur de magnitudine molis, & obesitate Corporis, vidimus non semel in graciliorem habitum perductos, victu extenuante, & parco, exercitiis, & egestionibus per alvum, aut per urinam, promotis. Contrà verò graciliores, somno, quiete, aere crasso, humidoque, fuisse levatos. Reliqua ex ipso textu Galeni clarissima sunt, nec latiori egent explicatione.

CAPUT V.

LXXXVIII. in Galeno.

De Solutione Continuitatis.

TEXTUS.

(T. 31.) **R**eliquum igitur id morbi genus est, quod & similibus, & instrumentariis partibus commune existit, solutio scilicet continuitatis, quam quispiam fortè his unquam adesse negaret, qui integra sanitate fruuntur, quoniam semper sit passio. Quem sanè latet eandem in omnibus generibus fore dubitationem. Nisi enim operationis læsio sensibilis, sanitatem ab ægritudine separet, sed qualitatem tantummodò dispositionis introspeciamus, perpetuæ passibilitatis dogma necessario recipiemus, cum nullus sit, qui omnes operationes optimas habeat; sed de hoc quidem, ut quod logica potius contemplatio sit, seorsum consideretur. (T. 32.) Salubres verò causas, in his, quos nemo dubitat agrotare, deinceps percurramus, à mala temperatura exordium facientes. Hic verò prius distinguamus, quæ omnes ferè Medici prætermittunt: alias quidem, esse salubres Causas ejus intemperantiæ, quæ jam facta est: alias autem illius, quæ & adhuc fit: sicuti etiam alias ejus, quæ futura est. (T. 33.) Hujus itaque postremæ, hæc quidem in præservativa artis parte continentur, hæc verò in salubri. Primæ autem inter omnes in curativa tantummodò, sed ejus, quam mediam inter utramque locavimus; in præservativa, & curativa. Jam enim factam, atque existentem ægritudinem curare oportet, sed quæ nondum quidem adest, at futura est, prohibendum est ne fiat ab ea, quæ est in Corpore, dispositione. Ejus autem, quæ adhuc fit, quod quidem factum est, curare

opus est: quod autem futurum, prohibere ne fiat. (T. 34.) Prohibebitur autem sublata ea dispositione, quam sequi natura apta est: Talis verò dispositio causa antecedens appellatur. Facta autem ægritudo curabitur, soluta ea dispositione, à qua primum ea, quæ secundum naturam, læditur operatio, quam quidem & ipsam morbi causam (al. essentiam) dicimus esse.

PARAPHRASIS.

Superioribus Capitibus de vitiis Temperierum, & Compositionis, egerat Galenus, nunc de vitiis solutæ Continuitatis, quæ communia appellat, sermonem habet. Communia autem esse dicit, quia tam similaribus partibus, quàm organicis soluta continuitas competit.

At illicò sese offert enodanda difficultas, quomodò solutio continuitatis competere possit Corporibus fanis. Cui tamen plenè idem satisfacit, parvam inquiring, continui solutionem, seu insensibilem, unde actiones minimè lædantur, ad Corpora salubria revocari, cum ista non constituant corpora extra limites salubritatis: qualia profectò sunt, levia ulcuscula, ut & parvæ extuberantiæ, nempe calli, porri, & similia. Additque rationem, quia nisi sensibilis operationum læsio sanitatem ab ægritudine separaret, perpetuæ passibilitatis dogma necessario reciperemus, cum nullus sit, qui omnes operationes optimas, ac penitus illæsas exerceat.

Quoniam verò Remedia sanitatem efficiencia triplicia esse possunt, alia nimirum, quæ auferunt ægritudinem jam introductam: alia, quæ ab imminente præservant, quibus scilicet in corporibus dispositio est, ut facilè decidant: & alia denique, quæ resumptiva appellantur, quoniam tollunt malam dispositionem reli-

quam

etiam in statu convalescentiæ; idcirco Galenus omnes ejusmodi status Corporum referens, ut singulis congrua remedia adhibeat, prosequitur uniuscujusque status convenientem reductionem, correctionemque commemorare.

Facto autem exordio à mala temperatura, primum distinguit intemperiem in eam, quæ adhuc fit, & in eam, quæ facta est, ac denique in eam, quæ futura est. Et quidem remedia adversus futurum morbum, vel sunt præservativa, vel sunt conservativa. Præservativa impediunt morbum ne accedat, fugando, vel corrigendo causam antecedentem. Conservativa pertinent ad partem Medicinæ salubrem, qua per ea, quæ sanitatem firmiorem reddunt, resistunt causis ægrotare facientibus. At si morbus jam factus sit, tunc curatione omninò egebit, per contraria absolvenda. Si denique actu fiat, partim curatione, partim præservatione opus habet: curatione quidem respectu ejus, quod forsan introductum est; præservatione verò relatè ad id, quod adhuc introductum non est, sed est in proxima dispositione, ut introducatur.

Quomodò autem prohibenda sit futura intemperies, ne fiat; inquit, illam inhiberi auferendo causam antecedentem: Factam autem ægritudinem tolli, ablata ea dispositione, quæ primò lædit partis operationem.

At quid pro causa antecedenti, quidque pro dispositione, quæ primò lædit operationes, intellexerit Galenus, apud Expositores non convenit. Nos omissis aliorum expositionibus, dicimus causam antecedentem hoc loco sumi, quæ simul cum dispositione viscerum morbum immediatè ponit. Si E.g. quis incidat in febrim tertianam, vel sit proximè casurus in illam, non solum hic feбри obnoxius redditur, ejusque symptomatis, quibus illa sociatur, verum etiam habet in seipso

pravam alicujus visceris habitudinem, seu dispositionem, quæ generat, vel inficit eum humorem, qui proximè febrim tertianam parit, & per suos circuitus revocat: cumque talis humor nonnisi à viscere illo malè se habente ducatur in actum febrilis repetitionis, propterea mala talis visceris dispositio peccantem humorem assiduò progignens, vocatur hic à Galeno Causa antecedens, unde in textu habet: *Talis verò dispositio Causa antecedens appellatur*. Atque hinc experimur eos morbos esse curatu difficiles, qui habent malas has viscerum dispositiones fixas, persistentes, & contumaces, itaut ex diuturno illorum vitio, prævi semper humores generentur, ex quibus morbi illi foveantur, & conservantur.

Quod ad dispositionem pertinet, quæ primò lædit operationes, intelligi debere dicimus, malam quandam partium, & sanguinis, aliorumve humorum habitudinem, foventem febrim, seu fermentum febrile, aut cujusvis alterius morbi: quoniam enim illa se habet ut causa, morbus verò ut effectus; propterea hic nunquam tolli poterit, nisi mala illa partium, & humorum dispositio fuerit ablata. Hinc ex græco Codice legitur, dispositionem lædentem primò operationem, esse morbi *αἰτίαν*, idest Causam; etenim instar Causæ morbum fovet, & quousque evicta, secreta, ac deposita non fuerit, morbus non desinit.

CAPUT VI.

LXXXIX. in Galeno.

De communissima intentione Curativa.

TEXTUS.

(T. 35.) **C**uratio verò unam præcipuam, ac communissimam habet intentionem ad id, quod est dispositioni auferendæ contrarium. Ex hoc siquidem genere sunt causæ illæ omnes, quæ sanitatem efficiunt: secundum partem verò ex unicuique dispositioni contrariis. Calido igitur affectui causa frigida contraria existit, frigido autem calida, eademque in cæteris proportionem. Etenim si omne immoderatum est præter naturam, moderatum verò secundum naturam, necesse est omnino ut immoderatum ab immoderato contrario ad mediocritatem redigatur. (T. 36.) At manifestum est, quod secundum potentiam, non autem imaginationem, & calefaciens, & refrigerans, & quæcumque alia huiusmodi oportet assumere. Voco autem secundum potentiam, quod re ipsa verè tale existit, quale esse dicitur: secundum imaginationem autem, quod ex prompto quidem sensu tale esse imaginamur, cum tamen verè tale non sit. Sed quæ sint hæc ratione distinguenda diximus in his libris, in quibus de simplicium medicaminum potestatibus agitur. (T. 37.) Ad inventionem autem salubrium causarum, quæcumque quidem ut ad eam, quæ jam facta est, egritudinem, causæ salubres existunt, via illa doctrinæ (hoc est methodo) utendum, quæ id, quod imaginamur, ab eo, quod talem habet potestatem, separatur. Quæcumque verò ut ad eam, quæ adhuc fit, & hac eadem via, atque illa præterea, ex qua egritudinum causæ inveniuntur. (T. 38.) Esto enim, si ita contigerit, in humoribus putrescenti-

bus accendi febrem: indicatio in huiusmodi est evacuatio, atque alteratio, hæc quidem, quæ putredinem finiat, manente adhuc causa, (al. substantia) evacuatio verò, quæ totam ex Corpore substantiam educat. (T. 39.) Sed dicta quidem alterationis species concoctio existit; quam ubi invenerimus à quibusnam causis fieri contingat, tunc utique eorum, quæ hoc pacto salubria sunt, scientiam tenebimus. (T. 40.) Evacuaciones autem fiunt & per sanguinis emissionem, & clysteris usum, & per urinæ vias, atque eam, quæ per cutim fit, transpirationem, ac præterea per eam, quæ fit ad partes oppositas, attractionem, atque ad alias propinquas derivationem. Nam & ad hoc idem genus pertinet citare menstrua, atque ora venarum, quæ Græci hæmorrhoidas appellant, aperire, & per palatum, naresque expurgare. Cum igitur & hæc materias invenerimus, quibus in qualitate, & quantitate, & modo usus adhibitis evacuatio fit, in ipsa Artis parte salubria invenientur, atque eorum omnium inventio traditur in eo volumine, quod de Arte Curativa inscribitur. (T. 41.) Eadem ratione in aliis tribus intemperaturis, si unum commune præceptum observabimus, ut unamquamque prius, quæ efficit causam, rescindamus: Deinde ita ad illam, quæ ab eadem causa facta est, egritudinem accedamus, causarum salubrium inventionem faciemus. (T. 42.) Secundum verò compositas intemperaturas, ex simplicibus compositio monstrabit salubria præcepta, cum hæc quoque studuerimus pro magnitudine intemperaturæ eidem conveniens invenire remedium. Veluti si contigerit, quod in decem quidem numeris ad caliditatem majorem, quam naturæ conveniat, decidat Corpus: septem verò ad siccitatem majorem, tunc salubrem causam in huiusmodi affectibus esse oportebit, decem quidem numeris frigidior, septem verò humidior. (T. 43.) Si igitur ipsi particula affectæ

fectæ admoveatur tale remedium, tanto sit frigidius, atque humidius, quantum exigit partis affectû indicatio. Quod si particula affecta in penitioribus locis sita sit, machinari oportet insuper tale invenire salubre remedium, cuius vis nequaquam in itinere antea solvatur. Si itaque calidius esse oportuerit eo, quod est moderatum, non solum tantam habeat caliditatem, quantum exigit morbus, sed ultra eandem mensuram tantum adjiciatur, quantum ex situ, ut pertingere possit ad locum patientem, sit necessarium. Si verò frigidius, non simpliciter tantum frigiditatem oportet augere, sed & materia quoque prius est animadvertenda. Si enim crassarum sit partium, non admodum poterit ad profunda penetrare: at potius contrarium præstabit effectum spissando superficiem, atque densando. At si tenuioribus partibus constet, poterit sanè plurimum subire profundum. Idem in humectantibus, atque exiccantibus accidit, in quibus crassitudo, atque subtilitas partium substantiæ est inspicienda. (T. 44.) A situ quidem loci affecti, ut nuper diximus, invenit indicatio salubre remedium: à formatione autem, & situ simul, quando effluxus sensibiles, atque ad alium locum foraminibus patentes habuerint, aut his omninò caruerint. Quos enim effluxus ad principales deferri partes cognoverimus, advertemus, atque ad illas impellemus, quæ minimè sunt principales. (T. 45.) Illud verò manifestum, quod earum, quæ intemperaturam efficiunt causarum, curatio sit per evacuationem: nam ipsæ intemperaturæ sola alteratione sanantur.

P A R A P H R A S I S.

OUoniam præcedenti Capite retulit modum, quo generaliter tractari debeant Intemperies factæ, quæque partim sunt factæ, & partim fiunt, & quo

demum pacto futura tractandæ sint; hoc præsentī Capite exordium faciens ab his, quæ factæ sunt, curationem illarum prosequitur, atque inquit, præcipuam, & communissimam intentionem in his esse, adhibere id, quod dispositioni auferendæ sit contrarium. Neque id tantummodò intelligendum in curationibus morborum ex intemperie, verum etiam in omnibus quibuscumque ægritudinibus, cum par ratio in cunctis vigeat ad curationes ritè, rectèque peragendas. Hinc libro de Constitut. Artis cap. 12. & 3. meth. cap. 3. duo dicuntur esse Axiomata, universam facultatem Medicam comprehendentia: alterum, quæ sunt secundum naturam, similibus conservare: alterum verò, quæ præter naturam, contrariis auferre. Quod qua ratione intelligendum sit, alibi à Nobis est fuisse explicatum. Sed & Galenus hic, ut rationem contrarietatis in curatione servandæ summam saltem referret, addit, secundum naturam esse Moderatum, præter naturam verò Immoderatum; etenim, inquit, si omne Immoderatum est præter naturam, Moderatum verò secundum naturam, necesse est omninò, ut Immoderatum ab Immoderato contrario ad Mediocritatem redigatur.

At ex adjectis verbis non levis exurgit difficultas; unde scilicet Galenus dicat, Immoderatum ab Immoderato contrario ad mediocritatem reduci: si enim utrumque extremum immoderatum est, quomodo ad mediocritatem reduci poterit; Immodè qua ratione Immoderatum erit contrarium Immoderato? cum potius contrarietatem servare debeat cum Moderato, quia Immoderatum, & Moderatum dicunt oppositionem.

Ad quam difficultatem dicendum pro Galeno, nomine Immoderati intelligi Remedium, quod ut morbo similiter immoderato opponatur, eique refragetur, oportet ut pari excessu à mediocritate de-

clinat: Puta si morbus fingatur calidus ut duo, Remedium, ut illum infringat, ac superet, pari recessu duorum graduum à mediocritate in frigiditate debet excedere; unde morbus excedens in calore per duos gradus, dicetur immoderatus in una qualitate, & remedium frigidum in gradu similiter secundo, etiam dicetur immoderatum, cum duobus gradibus à mediocritate declinet. Hæc autem mutua actione, & passione refranguntur, & reducuntur tandem ad mediocritatem Naturæ consentaneam. Atque hinc etiam solvitur, cur Remedium, & Morbus mutua servant contrarietatem, simulque morbus immoderatus opponatur quoque sanitati, mediocritatem exigenti, sub varia scilicet ratione considerata, ut patet.

Pergit ulterius Galenus examinare, quodnam sit hoc Contrarium, quod in curandis morbis necessarium sit: & inquit, ea, quæ habent vim curandi, esse oportere talia secundum potentiam, id est quod reipsa talia sint, sive operentur per se, sive per accidens; non verò per imaginationem: Unde calefaciens, & refrigerans, & quæcumque alia hujusmodi, oportet assumere. Et sensus est, ut remedia contraria morbo sint talia secundum potentiam, seu revera, ac reipsa talia, qualia esse dicuntur, & operari debent: non verò secundum imaginationem, si fortasse ex apparenti sensu, seu prima, ut dicitur, facie, talia esse imaginemur, sed revera talia non sint. Et quidem pleraque medicamenta ad sensum videntur habere vim refrigerandi, & reipsa non refrigerant, sed calefaciunt; contra alia existimantur calida, & natura sua calida non sunt.

Verum exquirendum hic esset à Galeno, unde Remedia potentia talia judicanda sint, ad differentiam eorum, quæ secundum imaginationem, & ex prompto,

primoque sensu talia esse imaginamur. Et Ratio difficultatis pendet ex eo, quia omnia Remedia, sive calida, sive frigida, sive alterius virtutis sint, non nisi per sensum nobis innotescunt, atque adeò non videntur alia excogitari posse ab iis, quæ ex sensu talia esse imaginamur. Fortasse autem voluit Galenus sub his verbis distinguere Remedia potentia talia, ab his, quæ secundum imaginationem, ut edoceret Medicos, ne in dignoscendis medicamentis deciperentur. Sunt enim plerique, qui ex vulgi dumtaxat Criterio, dijudicant de virtutibus Medicamentorum ex Colore, & Visu, aut etiam ex Tactu, Gustatu, aut Olfactu, in quibus sæpè sæpius falluntur. Sic omnia acida, frigida à nonnullis existimantur, cum tamen pleraque acida, caustica sint, & escharotica, aut etiam potenter dissolventia. Sunt multa, quæ ad tactum frigida videntur, cum cæteroqui plurimum caloris intuitu assumpta excitent. Odora licet plerumque calida esse soleant, non rarò tamen cum frigiditate copulantur, ut in floribus Plantarum. Albicantia frigida, rubra calida creduntur, cum contrarium in multis sit, & ita de plerisque aliis.

Sunt qui his non fidunt, sed toti sunt in effectibus notandis: & quidem nil intimius in rerum notitiam ducit, quam effectuum perquisitio. At cum in effectibus multa quoque omittantur, ex quibus error emergere possit, propterea neque ab his rectum judicium semper elicitur; sic plerique Opium frigidum existimant, quia somnum inducit, putatum fieri à refrigerato, & humectato primo Sensiterio, ex doctrina Aristotelis, & Galeni: Albumen Ovorum frigidum pariter existimatur, quia in vulneribus, & hæmorrhagiis, fluentem sanguinem compefcit; cum tamen ista potius calida censenda sint; si quidem Opium inflammabile, & vaporosum est; & ex albumine ovi dissolutio, ac

præcipitatio fit fœculentiarum in compositionis; quin & ab eodem distillato Aqua elicitur potenter deobstruens, & attenuans. Vitriolum frigidum creditur, at tamen Spiritus illius & Oleum erodunt, & rubefaciunt. Tartarum similiter, cum sapore acidiusculum gustetur, putatur frigidum; ventrem tamen solvit, ejusque oleum Venenum sapit. Nitrum adeo frigidum apparet, ut exinde liquores etiam congelascant, si Vasi extrinsecus admoveatur; cum tamen spiritus ejusdem per destillationem elicitus, erodat, & interimat. Et alia hujus generis sexcenta. Sed quod est admirabilius, hæc eadem aliter operantur diluta in aquis, aliter redacta in pulveres, & aliter sublimata in Sales, Spiritus, & Olea: quæ aliquos juverunt, aliis nocuere; immò & uni eidem aliquando profuere, aliquando evasere infensissima, ut proinde fiat, nil certi uspiam subinde ex effectibus colligi posse, etsi ab his, quæ frequentius evenere, probabiliorem conjecturam facere soleamus.

Unde autem tanta varietas? Crediderim ex varia, diversaque actione, passioneve, quam subeunt, præsertim interius assumpta, cum his, cum quibus commiscantur in ventriculi cavo, & intestinis id evenire; succis nimirum multigenis inter se invicem commistis, qui degeneres plerumque in statu morbofo Corporis, cum diversa glandularum, membranarum, fibrarumque Ventriculi habitudine, necnon appendicum intestinalium, ac liquorum illuc confluentium, pancreatici scilicet, & fellei, constitutione varia, & plerumque etiam mutata, in causa sunt, ut illa invertantur, extravertanturque, infruantur, depraventur, exacuantur, ac diversimodè permutentur, in figura, situ, motu tum locali, tum fermentativo, cæterisque: quo proinde fiat, ut ob diversam Ventriculorum affectionem, ac succorum conditionem variam, differen-

tes, ac varii excitentur effectus, penèque admirabiles, & non rarò etiam inter se invicem diffformes, dissentanei, dispares, atque oppositi.

Esto autem hæc ita sint, videntur tamen in Medicamentorum vim, facultatemque dignoscendam rationabilius duci, qui primum illa in suas partes componentes, ope Chymix, solvere satagunt, deindèque ex illis pervestigant vires, & efficacias eorundem. Neque insuper ex puris solum qualitatibus illas deducunt, sed ex salibus, spiritibus, aquis, aliisque similibus, quæ particulas continent, non calidas, seu frigidas, sed calorificas, aut frigorificas, & quatenus cum fermentis Viscerum, & præsertim Ventriculi, ac Intestinorum, motum, & actionem excitant in fermentatione variam: & quidem calida dicuntur, si fermentescendo turgeant, & acutius partes vellicent, ac sanguinem acuant, atque in motum vehementiorem, celerioremq; adigant; si autem ex adverso temperent potius, infruant, aut etiam figant, frigorificæ dicuntur. Quare ex sensu, quem Corporibus, & partibus inferunt, frigida, aut calida appellantur. Hac quippe ratione ex putatis vulgò frigidis simplicibus, ut præsertim sunt olera succulentiora, nempe Endivia, Borago, Cichorium, Hepatica, Malva, & similia, plurimum aquæ elicitur per destillationem; nil verò, aut modicum nimis salis, nullusque spiritus: Ex aliis plantis olentioribus, minusque succulentis, qualia Eruca, Nasturtium, Rosmarinus, Salvia, Becabunga, &c. & Sales, & Spiritus plurimi extrahuntur. Unde quò simplicia aromatica magis fuerint, & ligneam, seu durioram texturam participaverint, eò quoque spirituosiora, & salsuginosiora observantur, quorum deinde causa calorem in nobis excitant, cum assumuntur, & calida ex illato illo sensu, denominantur.

Verumenimverò, inter sensus Corporis universos ad vires simplicium internoscendas, dijudicandasque, fidelior longè cæteris videtur esse Gustatus, in quo scilicet minor deceptio accidere possit, eò quòd majorem habeat cum Stomacho, & Ventriculo communionem, ubi istiusmodi sensationum, caloris, aut frigoris, aliusve qualitatis, judicium depromitur. Hinc quæ acria gustu percipiuntur, calorifica, attenuantia, dissolventia fiunt: quæ acida, figentia, coagulantia, & acritatem temperantia: quæ amara, deobstruentia, aperientia, & acorem corrigentia: quæ insipida, refrigerantia, absorbentia, relaxantia: quæ falsa, incidentia, aperientia, abstergentia, & sic de aliis.

Galenus itaque per ea, quæ secundum imaginationem sunt, intelligit inefficacia, impropria, & non ex natura rei talia, sed solum ex communi, ac vulgari hominum conceptu, aut existimatione, talia credita, quibus vulgaris solummodò fiducia prodesse solet: puta si quis exhiberet Spiritum Vini, aut Ceraforum agrestium, aliudve simile nive frigidum, vulgò crederetur tale quid frigidum esse, quia sic ad sensum apparet, cum tamen reipsa tale non sit.

Sed nec omninò à Galeni mente alienum esset, si quis diceret, secundum Imaginationem intelligi ea, quæ nullam vim in Natura habent, sed solum per magicas impressiones, characteres, philtrea, amuleta, & similia, morbos fugare putantur; cum & Galenus ipse memoret fuisse suis temporibus Pergami Præstigiatores, quorum tanta fiducia freti ægrotantes, nedum seipsos illorum curæ committebant, sed sanabantur. Magicis hisce Characteribus magnam quoque fidem præstare visus est Paracelsus, (a) ut proin-

de Librum conscripserit de Magica Medicina, ad curandas ferè universas Corporis ægitudines. Porro nec desunt, qui nostra ætate Morbos curasse testentur per Transplantationem in Saxa, Arbores, Fluvios, similesque, & aliter, aliterque per Magicam sympathiam, ex ipsis adhuc excrementis ægrotantium.

Verùm in his Imaginatrix summè valet, cui tanta vis inest, ut sanguinem, spiritus, omnesque humores Corporis commovendo, & agitando, in causa sit, ut materia morbifica alicubi hærens excutatur, & vel sensibilibus, vel insensibilibus educatur; Quamobrem excitato repente Gaudio, cum certa spe recuperandæ salutis, plerique convaluere; quippè Natura, veluti obruta, subinde resipiscens, omnes conatus adhibet adversus causam morbificam, quousque tandem illam vincat, & extra Corpus depellat. Hinc etiam fit, ut quò magis ægroti Medicis, & medicamentis fidunt, eò celerius ab illis juventur, & in pristinam salutem redigantur, ut pluries compertum.

Concludendum igitur ad mentem Galeni, Remedium Curativum Contrarium Morbo, reipsa tale esse debere, quod vim, seu potentiam habeat causam morbificam superandi, & expellendi, quocumque tamen modo id operetur, sive per se, sive per accidens, sive actione immediata, sive mediata, sive aliter, aliterque, dummodò certa illius notitia ex pluribus, conformibusque experimentis deducta sit.

Quemadmodum in ægitudinibus factis, ità etiam in ægitudinibus, quæ partim factæ sunt, & partim adhuc fiunt, operandum præterea docet, tollendo nimirum causas antecedentes, & removendo dispositiones viscerum, si fortasse illas foveant, & conservent: in utrisque enim par ratio militat; siquidem quæ curant,

(a) Tit. Archid. Magic.

si antequàm Morbus accesserit, adhibeantur, præservant, & præservantia, curantia quoque sunt, antevendo morbum imminetentem, & expellendo, aut saltem corrigendo causam morbosam, quæ jamjam morbum esset illatura, nisi citò educeretur, aut domaretur: medicamenta namque semper adversus causas morbosas oppugnant, quæ planè in utroque casu intra Corpus sunt.

Quoniam verò in exemplum Morborum, qui partim fiunt, & partim facti sunt, proponit in textu Galenus Febres humorales, ex putrescentibus humoribus progenitas, idcirco indicationem curativam in ipsis duplicem facit: alteram quidem pertinentem ad evacuationem: alteram respicientem alterationem: atque illam respectu habito ad materiam humoralem peccantem, quæ tota ex Corpore educi debet; istam verò respectu putredinis, quæ corrigi, & emendari expostulat: quam correctionem, Alterationem esse dicit, *quæque putredinem finit, manente adhuc substantia, seu causa*. Subdit insuper, hanc alterationis speciem esse *Concoctionem, quam ubi invenerimus à quibusdam causis fieri contingat, tunc utique eorum, quæ hoc pacto salubria sunt, scientiam tenebimus*. Quorum verborum sensus est, quòd non solum satis sit ad alterationem febrium assequendam, quamcumque in genere alterationem adhibere, sed in specie talem, quæ concoctio sit. Unde aberrant à Galeni mente, quicumque contendunt alterationem per primas qualitates in universum fieri debere: & quidem oppositas Morbo: siquidem in febribus putridis vult Galenus talè esse oportere, quæ concoctio sit: modò concoctio ex sententia ejusdem, ope caloris fit, nec à refrigerantibus haberi potest. Verùm quomodò res hæc se habeat, alibi à Nobis est examinatum, in nostro *Traçtatu de Febris*, ubi omnia ad indebitam sanguinis, cætero-

rumque liquorum fermentationem quàm facillimè revocavimus. Quare & nunc, Putrescentium humorum vitium, dicemus, indebitam illam fermentationem habitam à mistura aliorum succorum à sanguinis diathesi naturali degenerum, qui nisi à sanguine per concoctionem, seu secretionem, sequestrationemque in filtris, cribrisque Corporum repurgentur, ac deinde expellantur, febris non deerit: Alterationem verò intelligemus, perturbationem illam, commotionemque Corporis inde exorientem, & potissimum in pulsu conspicuam, aut etiam in cæteris operationibus sensibilioribus, quæ per ejusmodi concoctionem, secretionemque, ac postremò per evacuationem omninò sedabitur.

De evacuationibus verò peccantium humorum, febrimque foventium, sermonem deinceps facturus, omnia illarum genera recenset, atque indistinctim febribus convenire posse memorat, ad egerendos putridos, vel putrescentes humores. Ait enim: *Evacuationes autem fiunt & per sanguinis missionem, & clysteris usum, & per Urinæ vias, atque eam, quæ per cutim fit, transpirationem, ac præterea per eam, quæ fit ad partes oppositas, attractionem, atque ad alias propinquas derivationem*: quibus etiam adjicit *Menstruorum, & hæmorrhoidum citationem, & per palatum, ac nares expurgationem*. Verùm hæc, & similia debebunt in quantitate, & qualitate modum servare, ut salubria fiant, concludit in textu Galenus. Ex quibus verbis præstatur nobis occasio agendi, quando, & quomodò prædicta medicamenta in febribus sint administranda. Non enim Galeni mens est hoc loco omnes ejusmodi evacuationes in omnibus, & singulis febribus putridis promovere, sed aliquas in aliquibus, alias in aliis; alioqui si simul omnes provocari deberent, procul dubio diffformes, ac oppositas evacua-

tiones tentare simul oporteret, cum tamen per eas vias peccantes humores ducendi sint, per quas Natura se velle exonerari demonstrat. Adde, quod multæ aliæ Evacuationis species sunt hic omissæ, quæ non rarò juvare observatæ sunt, puta Vomitus, Dejectiones, Sudores. Igitur voluit tantummodò has veluti in exemplum plurimarum aliarum commemorare; & quidem, non ut illis simul Medici in curandis febribus uterentur, sed quod modò his, modò illis, prout occasio tulerit, & diversæ indicationes abscindendi causam morbosam, occurrerint.

Primum autem sanguinis mittendi usum, & opportunitatem perpendamus. Nemo unquam inficias ibit, aliquando sanguinis evacuationes sponte Naturæ promotas febricitantibus contulisse: quandoquidem & in Ægris Epidemiorum, & in aliis innumeris, passim in praxi observatis experientia demonstravit, superveniente è naribus hæmorrhagia, momento ferè temporis, acutissimas adhuc febres desisse, absque ulla recidiva. Sic etiam erumpentibus menstruis, lochiisque, antecedenter suppressis, denuò profluentibus, fœminas à gravissimis morbis fuisse liberatas; sicut pariter & Viros plurimos à supervenientibus hæmorrhoidibus. Solum de eventu à sanguinis detractione, Arte instituta, perpetuò dubitatum fuit, quoniam ab his, quæ sponte Naturæ fiunt, evacuationibus ad eas, quæ Arte sunt peragendæ, conveniens illatio, ritè, rectèque deduci nequit, attenta nimirum temporis opportunitate. Difficillimum namque est, & ferè impossibile, certo, convenientique tempore eam sanguinis quantitatem detrudere, quæ exigentiæ morbi, & causæ morbificæ congruit: sed & eam venam, per quam ipsa levare petit, quis unquam poterit divinare? cum cæteroqui loca conferentia in evacuationibus observare semper expediat. Educere insu-

per illum humorem, qui reverà morbum facit, & non alium, longè difficilius est, qui tamen non rarò alicubi hæret, aut restagnat, ut in apicibus arteriarum, vel in glandulis Corporis, vel in intimioribus partium penetralibus. Præterea sanguinem educere in ea Corporis affectione, quæ ejusmodi depositionem expostulat, & in ea circumstantia symptomatum, & partium affectarum, ne subindè vires deficient, vates exquiritur Apollo, cum aliunde Natura seipsam levet, aut saltem levare debeat, citra virium diminutionem. Hæc, & alia plura tam scitu necessaria sunt, ut conveniens sanguinis evacuatio succedere nequeat, si unum, vel alterum ex his fortasse deficiat, ne grave damnum ægrotanti sit adfuturum, nulli alii evacuationi comparandum; quoniam per hanc vires plurimum enervantur, & multo magis, quàm per aliam quamcumque viam.

Multoties insuper Natura sanguinis evacuationes per certas quasdam partes molitur, quæ si per alios ductus haberentur, non proficerent. Sic in pleuritide, prodest sanguis per os excretus; per secesum verò proximam mortem portendit. Nephriticis, & Melancholicis hæmorrhoides supervenientes salutares fiunt, cum tamen si per vomitum sanguis educeretur, vel per Renes mingeretur, ægri periculo non vacarent. Menstruis erumpentibus à gravissimis morbis fœminæ liberantur, quæ si sanguinem dejicerent, vel evomerent, non ita. Lochia suppressa, si per Uterum redeant, bonum; per alias partes verò, grave nimis est, & periculosum.

Itaque sanguinis evacuationes sponte Naturæ promotæ, & salubriter peractæ, referendæ sunt ad eas, quæ criticæ dicuntur, cum scilicet Natura evictam jam causam morbificam, morbumque ipsum depellit, ac eliminat. Nemo unquam au-

tem in Re Medica tam felix fuit, ut potuerit Crisim, absque peculiari Naturæ conatu, perficere, quidquid in hanc rem jactet Helmontius. Incertum igitur, dubium, immò non rarò fallax, & periculosum ejusmodi, ex sanguinis educatione, beneficium; cum cæteroquæ ex adverso certissimum sit spirituum dispendium, & virium exolutio. Quòd si fomes febrium partibus solidis insit, ut in tuberculis intraneis, abscessibus in glandulis, aut inflammationibus etiam exiguis partium internarum, quæ fieri poterit, ut sanguinis missione removeri, aut educi queat, quemadmodum in spina digito infixæ? Quamobrem non mirum, si plerique non tam facile de humano Corio periclitari cupientes, ab illius præcipiti administratione se abstineant, non quòd illam aliquando, (& potius præservationis gratia) in aliquibus non commendent, sed quòd periculosa alea sit plena. Si quandoque autem in usum remediorum ducenda illa sit, potius in plethoricis, opiparis, vinolentis, & quibus sanguis in suo circuitu remoram patitur, venæque amplæ nimis, turgidæque fiunt, & Corpus totum veluti ingenti gravamine oppressum, seipso ponderosius persentitur; adeoque vel ad deplendam multitudinem, si qua est, vel ad citandum sanguinis motum, fortasse alicubi præpeditum tutius administrabitur; ut alias meminimus.

Quòd ad Clysteris usum pertinet, fertur inter medicinalia præsidia introductus ex Ibi ave Ægyptia, quæ exonerandi ventris gratia, Nili aquam adunco rostro in anum immittens, retenta diutius excrementa deponit: quamquam Helmontius non vereatur pudendum medentium subsidium illum appellare, & aliquando ex nimia acritudine gravia nocumenta ægro- tantibus attulisse fateatur. Verùm licet Clysteres ex acribus medicamentis injectos, ob nimiam, violentamque irrita-

tionem intestinis illatam, gravia damna nonnunquam excitasse haud inficiemur, non tamen interdicens omninò sunt, qui ex levioribus, & laxantibus componuntur. In febribus enim assiduò ad intestina solent superfluitates humorum deponi; unde interjectis vicibus juvabit illas per alvum educere, & ventrem oppletum exonerare: quare admonet, & prudenter, Hippocrates 4. de rat. vict. t. 20. de Angina, & Pleuritide agens, ut alternis diebus clysteres febrientibus injiciantur.

At verò ferendi non sunt, qui ex injectis clysteribus etiam Ventriculum, & gracilia intestina exonerari posse putantes, in præconcepam opem conficere solent decocta, & misturas varias ad effectum usum diversimodè comparatas. Siquidem ex Anatome jam satis innotuit, ad principium Intestini Coli valvulas inesse, quibus ascensus ad superiora impeditur. (a) Nò negaverim tamen ex depositis inde excrementis, locum reddi capaciorē pro receptione aliorum excrementorum à superioribus intestinis derivantium, quoniam per motum eorundem peristalticum perpetim superfluitates superiorum ad inferiora protruduntur. Hac eadem ratione contingit, ut adhibitis podici balanis excrementa à ventre depellantur, irritatione per fibras, & membranas intestinorum supernis partibus communicata. Hinc etiam non rarò accidit, ut ab acribus balanis, aut enematibus vomitus periculosissimus successerit: etenim ab ejusmodi irritamento intestinis vehementer illato, potuerit Pylorus molestè adeò affici, & contorqueri, ut sursum retractus Ventriculum coegerit ad vomendum. Non dissimili modo vomitus contingit, cum lingue fastigio vix Mercurius emeticus gustatur,

(a) Repugnat his quoque tota Mechanica Chylosis.

tur, aut aliud potentissimum Vomitorium.

Unde denique tanta utilitas ab ulu clysterium in febrientibus speranda sit, dubitari hic non incongruè potest, atque eo magis, quoniam in febribus, putridis dictis, seu humoralibus, peccantes humores intra venas conclusi statuuntur, qui nunquam à Natura deponuntur ad alvum, quam prius concocti fuerint, & à reliquis salutaribus succis secreti: modò longè admodum distare ponuntur humores putrescentes in febribus, sive in venis majoribus, sive in venis minoribus putrescere dicantur, quàm ut per alvum excerni, aut ad vias intestinorum deferri possint.

Sed facilis est solutio, si considerentur, quæ nuper Anatome detexit, peculiare scilicet ductus inesse, per quos ad alvum impuritates humorum deiciantur, sed & potissimum Vvirsungianum, & Choledochum, deferre succos quosdam, qui simul commisti, atque indebitè fermentescentes plurimarum etiam causæ sunt ægritudinum; sicut ex adverso, convenienter repurgati multis ægritudinibus finem faciunt. Observatione pariter Graciffii, (quæ refertur in Ephemeridibus Germanicis, & in Actis Anglicis) ab assumpto medicamento purgante commoti humores per ductum Pancreaticum, & Choledochum ad intestina promoventur; quin & infusione liquorum cathartorum in Venis facta, pari modo, per prædictos ductus catharsis accidit. Per Arterias quoque mesentericas, tendentes in glandulas intestinorum, non rarò etiam humores educuntur, unde fit, ut aliquando à catharticis validioribus dyfenterie cruentæ progignantur, vel etiam sanguis syncerus educatur, relaxatis nimirum oscillis earundem, aut etiam erosio glandulis, quibus illæ in suis extremitatibus occluduntur.

Amplius per vias Urinæ sæpissimè quoque febrium causam materiale evacuari,

ac propterea febres ipsas desinere, certissimum est, atque iteratis experimentis comprobatum: Unde motus Galenus commendat in febribus diureticorum usum 2. prognost. à tex. 26. usque ad 38. si per eas partes videatur Natura peccantem materiam velle detrudere. Et 1. ad Glaucon. cap. 15. eadem in curatione Tertianæ proponit; imò etiam redundantibus serosis humoribus diuretica exhibet in libris de tuenda valetudine, ad illos per urinam educendos. Per transpirationem insuper humorales febres desinere possunt. Tanta enim est, quæ per poros Cutis fit humorum resolutio, ut maiorem ex assumptis cibis excrementorum partem completatur: quamobrem in febrientibus perutilis nimium censeretur illa debet, in quibus halitus, & vapores affluenter admodum exuberant.

Inculcat prætereà Evacuationem illam, quæ fit per *Attractionem* ad partes oppositas, atque ad alias propinquas per *Derivationem*. Verùm in hoc valdè dissentiant Interpretes. Siquidem plerique in Præservatione solum Revulsionem per distantissimas partes faciendam opinantur; In Curatione verò potius per propinquas, ejus opinionis sunt Curtius, Fuchsius, Acachias, & Manardus. At Laurentius Joubertus per proximas semper, nunquam per distantes illam faciendam esse contendit. Petrus Brisottus, & alii, in principiis morborum putant esse revellendum per proximas, in fine verò per remotas partes. Sanctorius demùm conditiones has non necessariò requiri in Revulsione, & Derivatione arbitratur, sed modò per distantissimas, modò per proximas partes Revulsionem fieri posse docet; atque in hujus probationem affert plura Galeni loca, præsertim verò 5. Meth. cap. 14. ubi is applicat emplastrum ex thapsia futuræ coronali, ad revellendum à Cerebro: & 6. epidem. comm. 2. tex. 31. inhiærens Hip-

pocra-

pocrati afferenti in Oculorum fluxione, ad fauces revellere oportere, ait, *hoc unum esse remediorum revellentium genus, ut diuturnas fluxiones ad fauces revellamus, acribus medicamentis: & comment. 3. 6. epidem. tex. 22.* laudat Sabini sententiam, qui in fluxu sanguinis è naribus, venam Cubiti, gratia revulsionis, secabat: & 5. *meth. cap. 8.* inquit, dum rumpitur aliquod vas in pulmone, venam cubiti protinùs esse secandam, revellendi gratia; & *lib. de cur. rat. per sangu. miss. cap. 6.* subdit, in Pleuritide Venæ sectionem factam in contrario latere, vel obscuram, vel post multum tempus aliquam utilitatem afferre: & denique *comment. 2. in 6. epidem. tex. 9.* docet, quòd revellens locale est retrahens ad proxima, & non ad remota. Enigitur quàm inter se dissonent Galenus, ejusque Commentatores. Verùm ejuscemodi Revulsiones, postquàm de Sanguinis Circuitu statutum est, ab Aula medica recessere, nisi tantùm de Nomine ludere velimus, quòd illæ, quæ inter initia morborum fiunt, & præsertim à partibus distantioribus, Revulsiones dicantur, veluti in usum ductæ, ne humores magis confluant in partes affectas; quæ verò in aliis temporibus peraguntur, ad confluxum humorum diminuendum, vocentur Derivationes: quamquam & in hoc plerumque accidat, ut à remotioribus partibus factæ, remeantem sanguinem magis, magisque commoveant in affectam partem, atque inducta vasorum depletione, eandem languidam reddant, & concretum, remorantemque ibidem sanguinem, minùs aptum deserant fermentationi, ac maturationi, vel etiam resolutioni: cùm sanguis è venis eductus citatiorem efficiat eum, qui per arterias redire debet, in detracti supplementum, nisi alia obstiterint: & qui restagnat, spiritibus orbatu difficulter in fermentationem promoveatur.

Postremò Evacuationes memorat Galenus per citationem Menstruorum, ac aperitionem venarum hæmorrhoidalium; nec non per palatum, & nares expurgationem, quæ licèt viscerum particularium repurgamenta sint, nihilominùs valdè quoque prodesse possunt febricitantibus, in quibus omnes ferè evacuationes supprimi solent. Equidem menstruorum eruptiones, nedùm febres, verùm etiam plures alias gravissimas ægritudines terminare consueverunt, depositis nimirùm in vasa uterina totius Corporis superfluitatibus. Idipsum per venas hæmorrhoidales non rarò fit, ex quibus non tam sanguis fœculentus, quàm serosa quædam glutinamenta acido-muriatica repurgantur, in manifestum Corporis levamen, cùm potissimùm moderamen servant, tum in quantitate, tum in tempore. Sed & videntur venæ istę conditionem referre Varicum, quæ sicuti non rarò brachiis, cruribus, ac tibiis accidunt, ità & podici, utero, cæterisque partibus contingunt; unde cùm sponte sua laxantur, & sanguinem illum stagnantem deponunt, à multis morbis vindicant, præsertim à melancholico, & maniaco delirio, ut testis est idem Galenus pluribus in locis Epidemiorum. Cæterùm per Palatum, & Nares expurgatio, pariformiter conveniens, & salutaris febrientibus censenda est, quia non solùm Caput à superabundantibus humoribus præsertim lymphicis exonerat, sed etiam Cerebrum simul unà validum ostendit, benèque se habere in repurgandis propriis excrementis. Accedit, quòd sæpè numero febrientibus accidere solent dolores Capitis, sopores, surdastritates, gravedines, quæ per ejusmodi repurgationes desinunt, & si futuræ sint, prævertuntur.

Postquàm hætenùs Galenus docuit, Intemperiem factam, contrariis tolli: futuram, causam abscindentibus: & ex facta, ac futura mistam partim auferentibus,

bus causam, & partim contrariis, malam in Corpore dispositionem tollentibus; ut exemplificavit in febribus putridis: nunc idem operandum quoque ait in reliquis intemperiebus, ab humoribus etiam, seu causis materialibus originem habentibus: ac proinde generale præceptum profert, ut in omnibus ægritudinibus materialibus, prius causa auferenda sit, quam effectus, sive qui fit, sive qui factus est; licet quandoque simul, & semel unico remedio utrique oppugnari possit, ut est exemplum in febre ardente, cui potus Aquæ frigidæ remedio est, tum ad retundendam febrem, tum ad depellendam causam morificam per sudorem, urinam, aut dejectionem.

Quoniam verò Galenus in indicationibus curativis exequendis, ordinem quandam servandum esse docet, quæ nimirum prius, quæ posterius adhibenda sint; Nos propterea breviter, quinam debeat esse talis ordo in morbis, & indicationibus complicatis, conveniens duximus examinandum. Et quidem omnia indicantia ad tria universaliter reducit idem Galenus 3. *meth. cap. 9.* & 7. *meth. cap. 12.* Primum est Urgens: Secundum, Causa principalis: Tertium, Causa sine qua non, sive impedimentum. Pro exemplo affert Ulcus cum inflammatione, sorditie, cavitate, & sanguinis profluvio: Ubi sanguinis profluvium est indicans urgens, quia ab eo vitæ periculum imminet: Inflammatio est indicans secundum in genere causæ, quoniam acritudine, ardore, & irritatione fovet, vel efficit ulcus. Sordities denique est Tertium indicans, & causa sine qua non, sive impedimentum; etenim nunquam cavitas ulceris replebitur, nisi prius fordida colluvies auferatur.

Quod autem in ulcere exemplificat Galenus, id ipsum expediet observare in omnibus aliis ægritudinibus. Nam Urgens in quocumque affectu illud est, quod virium jacturam ægro minatur, adeoque

vitæ periculum: & huic primò vacandum, quia vita nostra viribus sustinetur, & spes recuperandæ salutis in virium robore reposita est. Hinc Galenus 10. *meth. cap. 3.* cuidam juveni febre acuta laboranti, cibum in ipsa accessione exhibuit, nempe tres cyathos cremoris ptisanæ, & duos cyathos vini albi tenuis, ob virium languorem; quamobrem æger ille, etsi antea sine voce, & sensu jaceret, statim oculos sustulit, & tum audire, tum loqui, tum adstantes nosse cœpit. Hac eadem ratione multoties accidit, ut ab urgentiori symptomate curatio prævertatur, & symptomati urgentiori primùm occurratur, sprete interea causa, & morbo, ut dicitur 12. *meth. cap. 1.*

Secundò, si Urgens jam desierit, tunc Causæ principali vacandum, quoniam per illius ablationem, necessario morbus cum adjunctis symptomatis desinet.

Tertia indicatio sumitur ab Impedimentis, quæ ab eodem Galeno vocantur Causæ sine quibus non: ut si E. g. in vulnere, ensis frustulum relictum sit, vel ossis fragmentum: vel in sputo sanguinis pus, vel concretus sanguis alicubi hæreat, procul dubio nisi ista auferantur, nunquam morbus curabitur.

Cæterum in remediorum exhibitione, illud perpetuò ante oculos habendum in morbis complicatis, ut id eligatur, quod licet uni affectui non multum conferat, saltem alteri non obsit, documento Hippocratis 1. *epidem. 2. tex. 5.* dicentis: *Id in Morbis perpetuò observa, ut si non juves, videas ne saltem noceas.* Quare optimum consilium erit, ac prudenti Medico dignum, quod potius eligatur remedium parum uni juvans, sed nihil alteri nocens, quàm valdè juvans uni, & nocens aliquantulum alteri. In quam rem doctè concludit Sanctorius: *Medicos, qui statim in occasione non urgenti, multam sanguinis copiam evacuant, vel abundè electivè purgant,*

gant, à præceptis Hippocratis, & Galeni recedere, qui jubent, Medicos ita tutò procedere, ut non noceant ægris.

A Curatione intemperierum simplicium pergit Galenus ad curandas intemperies compositas, quæ facilè ex simplicibus indicationibus patefiunt. Hinc si Corpus incidat E. g. in ægritudinem calidam siccam, contrariis medicamentis occurrendum frigidis humidis; & in quo gradu caliditas, & siccitas exceßerint, pari quoque gradu excedere debeant frigiditas, & humiditas. Verùm quæ hoc loco proponuntur à Galeno, solum mente excogitari possunt, at ne vix quidem physicè peragi; (a) cùm nemo unquam potuerit gradus excessus qualitatum certa mensura determinare, nec minùs deinde pari gradu contraria remedia exhibere, & morbo opponere. Quis hic magnus Apollo?

Quamvis insuper æqualia Morbo Remedia, sed oppositis viribus pugnantiâ commendet Galenus in curatione, illa tamen in partibus exterioribus usui esse posse ait, in quibus nulla reluctatio, vel modica sit. At si partes Corporis intimiores afficiantur, remedia debebunt esse morbo efficaciora, & cum tanto excessu, quantum virtutis illorum in itinere creditur posse consumi. Unde si E. g. quis intemperiem frigidam in Jecore pateretur cum excessu graduum duorum, deberet remedium exhiberi per ostanto calidius, quantum, postquàm pervenerit ad Jecur, excedentis caloris amiserit, ut solummodò retineat æqualem in gradu calorem, morbo in gradu secundo frigido, contrarium. Pulcherrimum sanè documentum, sed ad praxim irreducibile. Ipsemet etiam Galenus 3. meth. cap. 7. inquit: *si quantum agendum ad unguem perciperem, utique qua-*

lem fuisse Æsculapium mente concipio, talem me esse putarem: sed quoniam id fieri non potest, certè ut quoad homini licet, quàm proximè accedam, tum ipse me exercere decrevi, tum alios, ut idem faciant, adhortor. Idipsum fusa oratione confirmat 3. meth. cap. 3. ac tandem concludit: *Pharmacum ad unguem proprium, nec scribi omninò potest, nec dici.*

Ulteriùs, varium debere esse remedium Galenus docet, non solum propter varietatem intemperierum, sive calidarum, sive frigidarum, magis, vel minùs recedentium à naturali statu; verùm etiam ex diversitate situs partium affectarum, magis, vel minùs reconditarum; sicut etiam formationis earundem: puta si meatus fuerint reaserati, vel constipati, aut si partes affectæ fuerint nobiles, vel ignobiles, capaces, vel incapaces humorum, ad ipsas confluentium; ut & resolutioni faciles, vel difficiles. Nam ex his omnibus variæ Remediorum formulæ expostulantur, & varia Medicamentorum genera, tum viribus præpotentia, tum dosi adaucta. Denique concludit, quòd causæ intemperiem facientes, vel foventes, evacuatione tolluntur; intemperies verò ipsæ sola alteratione curantur.

CAPUT VII.

XC. in Galenò.

Curatio solutionis Continuitatis in parte carnosâ.

TEXTUS.

(T. 46.) **C**ontinuitatis autem solutionis curatio, intentionem quidem habet unionem, quæ in partibus quidem instrumentariis impossibilis est: in similaribus
K verò

(a) Galenus in textu memorat ultra gradus VIII. etiam X.
Tom. V.

verò non semper possibilis. At quandoque sicuti in carnosis sanitas conglutinatione perficitur, nihil verò differt, neque si coallitum appellaveris. (T.47.) Ipsam verò antecedit, quando vulnus majus extiterit, partium applicatio distantium, quæ ex formationis genere existit. Ut autem hæc ipsa firma, ac stabilis fiat, & alligatio cogens in unum, quæ distant, & fibulæ, & suturæ utiles sunt. (T.48.) Coalescere autem facit ea, quæ invicem distant, ac pristinam restituit unitatem ipsa Natura. Nostrium verò opus est, ut diximus, primum quidem applicare extrema distantium partium, secundum autem, ita ut in unum coacta sunt, conservare: & tertio loco cavere, ne quid labris ulceris intercitat: & quartò ipsam partis substantiam conservare salubrem. (T.49.) Sed quo pacto & primum, & secundum impleamus officium, dictum est, tertium verò in cogendo in unum partes distantes exequemur, si nihil extrinsecus incidere permittamus. Quoniam sæpiùs usu venit, ut pilus, aut oleum, aut aliqua alia humiditas interveniens earum, quæ copulandæ sunt, partium unitatem impediat. In eo autem quod sequitur tempore per suffusionem tertia intentio retinetur. Ipsam verò suffusionem, ex ejusdem, & contrarii loci divisione, & figura opportuna comparare oportet. Partis autem substantiam salubrem per ea, quæ mediocriter exsiccant, conservabimus. (T.50.) Hæc quidem est solutæ continuitatis curatio, cum ipsa sola seorsum in carnosâ parte constiterit. Quod si alicui alteri morbo conjungatur, plures sunt indicationum intentiones, quas in compositorum, vel complicatorum, sive ut cuique appellare libuerit, doctrina trademus. In præsentî autem sermone ad reliquas unitatis solutiones accedendum.

P A R A P H R A S I S.

HActenùs de curandis Intemperiebus, tum simplicibus, tum compositis verba fecit Galenus; nunc qua methodo curari debeant continui solutiones, agere profequitur.

Et primum inquit, solutionem continui secundum se indicare unionem, quoniam quæ à reliquis partibus sejunctæ sunt, cum eisdem connexionem expostulant, ut totum perfectè integrent, & componant; cumque partes Corporis solutionem subeunt esse possint vel simplices, seu Similares, vel compositæ, Organicæ, & Instrumentariæ dictæ; idcirco subdit unionem in partibus instrumentariis esse impossibilem; in similaribus verò non semper possibilem. Et quidem in partibus organicis solutio insanabilis reputatur, ut cum Nasus, Auris, vel Digitus, abscissus est, atque à toto omninò sejunctus: In partibus verò similaribus non semper facilis esse potest; siquidem licet partes carnosæ faciliè refarciri queant, ob majorem sanguinis confluxum; spermaticæ tamen dictæ, ut ossa, membranæ, ligamenta, vel difficulter uniuntur, vel si uniuntur, potius per callum, seu, ut ajunt, per secundam Naturæ intentionem, agglutinantur. Ità namque, quod ossa soluta, & fracta unit, non est os, sed callus: & quod continuat, ac necit cartilaginem, vel ligamentum, nec cartilago, nec ligamentum est, sed quid tertium ipsis aliquantò durius; secus verò in carne soluta, quod restituitur, revera Caro est; unde hæc unio vocatur à Medicis, secundum primam Naturæ intentionem; illa verò per secundam.

Cur autem Galenus priùs meminerit de curatione solutionis continui, quàm de curandis morbis in mala compositione, de qua re Argenterius Galenum carpit: Ratio

tio afferri potest, vel quod voluerit ab illis morbis exordiri, in quibus Natura sola satis esse potest curationi, ut sunt morbi in intemperie, postmodum de illis agere, in quibus Natura Medicum adiutorem expostulat, ut sunt morbi in solutione continui; & ultimo demum loco de iis, in quibus plerumque sola Medici industria absoluitur curatio, ut sunt luxationes, fracturæ, & similes pertinentes ad malam compositionem. Vel etiam quod voluerit ab illis morbis initium facere, qui nostris sensibus manifestiores esse solent: manifestiores autem sunt solutiones unitatis, quàm malæ compositiones. Vel demum quia ordinem, utpotè in his exponendis inutilem, servare noluerit, sed solum proponere, ac Tyronibus offerre, quæ facilius, ac promptius addiscuntur, ut sunt morbi in intemperie, & continui solutione. Verum hoc parum refert.

At verò an hæc continui solutio referenda sit ad morbos partium similarium, aut dissimilarium, an ad Morbos ambarum, gravior est inter Doctores controversia. Galenus nedum hic, sed etiam *libro de differentiis Morborum cap. 11.* & alibi, Morbum communem similaribus, & dissimilaribus partibus facit, quoniam per eam utraque partes indiscriminatim offenduntur. At contrarius ex una parte est Averroes 3. *Collig. c. 14.* asserens continui solutionem convenire solum partibus similaribus: solutionem contigui (ita dicendum putat) organicis. Ex altera verò parte Falloppius, & Argenterius existimant, solutionem continui nullo modo convenire similaribus, sed solum dissimilaribus partibus, & organicis.

Ratio Averrois est, quia partes instrumentales fiunt ex similaribus contiguis, & non continuis; quare dum solvuntur, contigua, & non continua separantur.

Falloppius verò adversus Galenum affert, quod nulla pars similis in solutio-

ne continui amittat propriam actionem, quoniam secta Carne, caro nutritur, concoquit, secernit, & alia sibi naturaliter convenientia peragit: igitur subdit, continui solutionem non esse affectum partium similarium.

At quis non videt, per solutionem continuitatis utrasque species partium æqualiter affici, simulque lædi operationes similarium partium, & organicarum? Cum enim organicæ ex similaribus constituantur, profectò cum istæ solvuntur, necessariò illæ nexum amittunt, & viceversa. Nec unquam quis imaginabitur posse solvi compositas, non læsis simplicibus; aut solvi simplices, illæsis compositis, quæ ex simplicibus constituuntur, & integrantur.

Ad Argumenta autem Averrois, & Falloppii respondetur: & ad primum dicitur Galenum solitum esse confundere continuum cum contiguo: etenim idem seipsum explicans, quid nomine continui intelligat *cit. lib. de differ. Morbor. cap. 11.* clarè ostendit, se lato modo continuum sumere, prout comprehendit continuum, & contiguum: siquidem memorans ibidem ægritudines solutæ continuitatis, confundit divulsas partes ex toto, & ex parte, itemque fractas, convulsas, & similes. Hac eadem ratione Aristoteles 1. *meteor. cap. 2.* accipit continuum pro contiguo, cum ait, *oportet Mundum hunc inferiorem esse superioribus latioribus continuum.* Constat autem sublunares has regiones non continuas, sed contiguas tantummodò esse Cælorum Orbibus.

Ad Falloppii argumentum dicitur, quod licet in solutione continui non amittantur operationes partium, cum revera non aboleantur, attamen negari non potest, quod vel diminuantur, vel depraventur; quoniam partes solutæ imperfecto modo operantur in nutritione, coctione, & similibus, & quandoque etiam depravan-

tur, eò quòd pus generent, & non rarò etiam carnem excrescentem, aut fungosam gignant.

Sed adhuc dubitare contingit ex textu, cur Galenus dixerit impossibile esse partes instrumentales, & organicas disjunctas posse agglutinari, cum aliàs ipse dixerit, præsertim 2. de semine, & 13. meth. venas, & arterias puerorum sectas posse refarciri: venas autem, & arterias ipsemet Galenus vocat partes instrumentales l. de diff. morb. c. 4. Verùm respondet Sanctoriùs distinguendo duas species partium instrumentarum: aliquas enim inquit concurrere ad aliarum partium instrumentalium, seu organicarum compositionem, & hujusmodi sunt venæ, arteriæ, nervi, muscoli; alias verò partes instrumentarias esse per se, & sua natura organicas, cujusmodi sunt, Manus, Pes, Oculus, Auris, quæ tantummodò concurrunt ad compositionem totius Corporis. Cum autem Galenus dixerit, partes instrumentales, si fortasse rescissæ sint, agglutinari non posse, intelligendus de organicis per se, & sua natura talibus; neutiquam verò de instrumentariis primo modo consideratis. Vel etiam dici potest, quòd loquatur de iis, quæ agglutinantur per primam intentionem, seu per medium ejusdem naturæ, puta cum caro rescissa refarcitur per alimentum homogeneum, nempe per sanguinem, quo carnes nutriuntur, & augentur: id quod minimè accidit in partibus organicis per se, suaque natura talibus.

Atque hinc patet solutio alterius difficultatis, quæ adversus hunc Galeni textum afferri posset, quòd scilicet pars organica etiam per se talis à cæteris partibus rescissa refarciri adhuc possit, ope, ac industria peritissimorum Chirurgorum, quemadmodum ferunt summa sui gloria, atque admiratione exercuisse Tagliacotium Chirurgum Bononiensem, qui Nasos regenerare sciivit, & in pluribus executus est.

Ea enim Nasi regeneratio organica minimè est, sed tantummodo similis, eò quòd solum reproducatur caro in vertice Nasi, quæ pars similis est, non organica. Quo pacto intelligendus quoque est Hippocrates 6. aphorism. 19. ubi docet: *Cum discissum fuerit os, cartilago, vel nervus, aut genæ particula tenuis, vel præputium, neque augetur, neque coalescit*. Nam Galenus in commentario, particulas illas, *neque augetur, interpretatur, neque generatur*; quia revera non generatur pars similis abscissæ, vel qualis abscissa est, sed alia apparenter solum, & superficie tenus tantum illi similis; quin & non rarò manifestè conspicitur, omninò difformem deperditæ refarciri, ut patet in callo reproducto in osse, cartilagine, & similibus.

Est tamen diligenter adnotandum, maximam adesse differentiam inter Solutionem continui, & Avulsionem, quam Græci ἀπόσπασµα dicunt, cum scilicet una pars separatur ab alia, ut contingit in ossibus luxatis, in tendinibus, & musculis separatis, citra læsionem partium similarium adjacentium. Hæc enim pertinent ad malam compositionem, vel in figura, vel in situ vitiatam. Solutiones verò continui partium rescissionem, ac deperditionem cum disjunctione, seu nexu soluto, referunt, adeoque refarcitionem, & regenerationem alicujus rei exposcunt. Ad exequendam autem partium solutarum connexionem, coitionemque, quatuor proponit Galenus à Medico esse peragenda, ubi tamen illa simplex est, & in partibus carnosissimis evenit. Primum, ut partes distantes simul alliget, & connectat. Secundum curet, ut commissæ, & colligatæ, firmæ, ac stabiles conserventur. Tertium, ut prohibeat, ne quidpiam inter labia vulneris incidat, vel remaneat. Quartum, ut ab extrinsecis alterantibus tueatur, fatis simul cum parte vulnerata circumjacentibus partibus. Quæ sanè utillima curatio-

nī, sunt à Medicis impēnsē consideranda.

Et quidem antequam fiat vulneris agglutinatio, oportet, partes per solutionem continui distantēs redditas, rectē adduci, simulque ritē committi, præsertim si vulnus magnum sit. Secundō adductas, unāque commissas firmiter stabiles conservari, ne denuō disjunctæ impedimento sint agglutinationi. Tertiō in hac adductione, & labiorum vulneris commissura, cavendum, ne extrinsecum aliquid interjiciatur, quod refarcitionem impediat; unde conferet partem vulneratam optimē abstergere, ac abluere, vel vino austero, vel aqua ardentī, similiye liquore. Quartō demum, ut labia vulneris perfectē unita conserventur, adhibendam esse docet ligaturam, futuram, vel fibulam. Statuuntur autem ligaturæ ab Hippocrate, & Galeno in *libro de iis, quæ fiunt in Medicatrina*, & ex Avicenna 4. 4. tract. 1. cap. 3. trium generum. Alia dicitur ligatura Retentiva: Alia Glutinatoria, dicta vulgō *Incarnativa*: Et alia Expulsiva, seu Expulsoria appellata. Prima instituitur pro retinendis medicamentis partibus vulneratis applicitis. Secunda fit per fascias, ut labia unita conserventur, & ulcus ipsum facilē agglutinetur. Tertia denique, cū hinc, & illinc ad latera vulneris adhibentur pulvini, vulgō plumbacula, seu linteola replicata ad comprimenda labia, & partes adjacentes vulneris, ut excrementa propellantur, atque in cavum illius nihil decidat, aut profluat. Ligatura verō, quæ hoc loco à Galeno commendatur, secundi generis est, quæ scilicet per fascias labia partis vulneratæ alligat, & unit.

Trium quoque generum referuntur Sutura vulneribus adhiberi solitæ. Prima dicitur Glutinatoria, per quam labia adducuntur, & conservantur. Secunda, Suppressoria, per quam labia vulneris consuntur, more pellium. Tertia dicitur Re-

tentiva, seu Conservativa, & fit, ut medicamenta detineantur, quousque vulnus coaluerit; labia verō vulneris aliquantulum inter se distent, ut saniem, & pus emittant, ne ab illo detento relaxentur. Verū de his fasciis, & futuris legantur præ cæteris Tagautius l. 2. *Chirurgicarum Institutionum*, & ex modernis Scultetus in *Append. Chirurg. Instrum.*

At quid Fibulæ Antiquis essent, aut ex qua materia conficerentur, dubium est apud Chirurgos. Et quamvis Oribasius affirmet illas ex ære, ferro, aut auro compositas, atque Circuli formam retulisse: nostris tamen temporibus horum usus nullus ampliū est, sed loco illarum inductum est gluten, quod tutissimum est, componiturque ex albumine ovi, bolo Armenia, thure, sarcocolla, mastiche, sanguine draconis, polline, fuligine fabrorum, gypso, tragacantho, & resina pingui ad consistentiam mellis. Eo enim tam fortiter labia vulneris devinciuntur, ut nonnisi difficillimē sejungantur. Verū Recentiorum Chirurgorum industria compertum est, vulnera simplicia felicissimē curari solis balsamicis medicamentis, quibus partes vulneratæ roborentur, puris generatio arceatur, prohibeaturque ambientis Aeris alteratio: quæ videntur esse tria principaliora requisita, citæ, & facili curationi vulnorum recentium, magnoperè necessaria. Balsama autem ex rebus aromaticis, & resinosis componi solent, puta resina terebinthi, gummi de tacamacha, mastiche, thure, hyperico, consolida, balsamina, & similibus in vino, vel aqua ardente infusis, & maceratis, aut etiam exinde destillatis. Hac ratione confecta est Aqua Neapolitani dicta, oleum Cicinelli, balsamum Innocentianum vocatum, &c. Verū inter plurima, hoc accipite efficacissimum, tutissimum, ac facillimum medicamentum, ad quævis vulnera simplicia accommodatissimum: Quod recipit, *Vitrioli Romani ad solem cal-*

cinati unc. ii. , picis colophonie unc. iii. , terebinthina Veneta unc. i. ÷ succini pulverati unc. i. , aquæ ardentis optimæ lib. ii. , hyperici p. ii. , myrrhæ , & thuris pulverati , singulorum unc. sem. Ponantur in vase vitreo benè clauso ad solem , vel ad caminum , ac intereà per vices agitentur ; atque ita post tres , vel quatuor dies liquor poterit in usum adhiberi .

Modus autem illo utendi , talis erit . Primum exprimatur vulnus , ut si quid sanguinis in illo hæserit , benè detergatur ; immò , si oportuerit , etiam vino , vel aqua ardente abluatur , ita ut nil sanguinis concreti , aut grumefacti , alteriusve rei extraneæ , intra vulnus relinquatur : deinde labia simul committantur , & uniantur : mox balsamum adjiciatur , & petiis , ac fasciis ligetur , ut meliùs labia conserventur unita , nullusque aer admittatur ad partis vulneratæ alterationem : nam his ritè , rectèque adhibitis , vulnus brevissimè sanatum ibit .

Sed tamen adhuc alia plura parari possunt , & quidem efficacissima balsamica , & vulneraria medicamenta , ex nostratibustantum plantis elicta ; ut & ex Abiete , Pino , Ulmo , Quercu , Lentisco , Cypressso , Hedera præsertim arborea , & muraria , cæterisque similibus , sive sponte , sive incisione , gummosis , ac resinosis , permistis cum hyperico , millefolio , balsamina , poligono , pyrola , alchimilla , caryophyllata , aliisque vulnerariis ; si nimirum simplici infusione in vino veteri , ejusve spiritu , ad solem , vel in fimo , vel super cineres calidos , sensim , sensimque digerantur , ad exactam tincturarum extractionem . His quoque meretur adnecti , quod ex Oliva tum fera , tum domestica , ineunte æstate , incisa , gummi colligitur : Mirum enim quàm efficacius suaviusque , supra notatis admistum , in leniendis doloribus , & vulneribus sanandis , operetur ; ut propterea nil Nobis am-

plius exquirendum , aut ulteriùs sperandum sit ab exoticis Indiarum simplicibus : id quod nonnulli religiosè nimis & fatagunt , & inquirunt : quasi verò iis Natura , benefica , pia , & liberalis Mater , nobis verò dira , injusta , & avara Noverca fuerit . Sed hæc obiter .

Quòd si fortè vulnus profundius sit , quàm ut simplici ligatura , & commissura , satis sit ad agglutinationem ; tunc adhibenda quidem balsamica agglutinantia , sed intereà relinquenda est in vulnere aliqua declivitas , vel facienda subfluxio , per quam & balsamum injici queat , & pus , quod fortasse progignitur , possit expurgari ; siquidem ejusmodi vulnera in carne profundiora , exposcunt carnis abscissæ regenerationem , quæ rarò sine pure perficitur ; & ex altera parte pus illud omninò debet expurgari , cùm sit impedimentum regenerationis prædictæ .

Quoniam verò in curandis vulneribus partim Naturæ opera , & partim Medici diligentia necessaria est , proinde Galenus utriusque opus memorans , ait , ad Naturam pertinere , ut coalescant ea , quæ invicem distant , & soluta unitas ad pristinum redigatur ; unde carnis regeneratio , & unitatis solutæ restitutio , solius Naturæ opus est . Medici verò opus erit in unum adducere , & colligare partes ex vulnere distantes redditas : sic colligatas , firmas , ac stabiles conservare , & prohibere cujusvis corporis in vulnere permanentionem , removendo quæcumque ejus agglutinationem impedire possunt . Quin idem Galenus 3. *Meth. cap. 4.* præcipit cujusvis aeris in vulnus penetrationem esse inhibendam , ne pars affecta ullatenùs alteretur .

Quo autem pacto possit Medicus prohibere , ne aliquid vulneri superaccidat , aut intra labia vulneris intercidat , subdit Galenus : & quidem in principio , quando labia vulneris adducuntur , omni dili-

gentia curandum, ne lateribus vulneris adhæreat capillus, pilus, gutta olei, aut aliqua alia humida substantia; quoniam hæc impedimento sunt agglutinationi, & partium coitioni; unde idem Galenus *cit.* 3. *Meth. cap. 4.* docet, ichorem maximè impedire agglutinationem, atque ob id jubet exsiccantibus utendum. Post adductionem labiorum, prohibeat in posterum Medicus, ne alieni humores illuc delabantur, aut confluant: nam facilè ad partem vulneratam, veluti debilem redditam, humores defluunt, ut dicitur 3. *de natural. facult. cap. 13.* Hinc quàm malè Chirurgorum plerique in curandis vulneribus olea adhibeant, unguenta, frondes, & folia herbarum delaxantia, itemque usui turundarum insistant, à Galeni mente recedentes, quisque norit. Sed quàm ex adverso, & scitè quidem diligentissimus nostri temporis Chirurgus Cæsar Magatus *de Rara Medicatione Vulnerum*, plurimis fretus rationibus, & autoritatibus, aliter medicandum opinetur, nemo est, qui non commendet, ut proptereà legi mereatur.

Hinc porrò, & sapienter quidem, agunt, qui in curandis vulneribus, stagnantem primùm sanguinem è cavo vulneris, quantocyùs fieri possit, vel ore, vel siphonis ope, summa diligentia omnem penitus extrahunt, & exsugunt, ne ibidem hærens corrumpatur, (unde malum omne) quinimò pars vulnerata, unde quaque deterfa, & balsamicis deinceps fota ad cicatricem exactius perducatur, & quàm citissimè persanetur. Fuit, & non ità pridem apud Nos, plebejus quidam homo, omni literatura penitus ignarus, qui solo sucu vulnerum, quotidie inito, cava, & profunda etiam ulcera felicissimè curabat, non alio præsidio usus, quàm detenta parte ulcerata ab extrinsecis alterantibus custodita: id quod vulgus incantationi putabat adscribendum.

Si prætereà cum solutione continui, alia accidentia conjungantur, tunc indicationes curativæ plures erunt, ut in Morbis compositis, sive complicatis. Quæcumque autem illa sint, commodè reduci poterunt ad tria illa superiùs ex Galeno recensita, videlicet ad Urgens, ad Causam principalem, & ad Impedimenta, de quibus jam supra actum est; unde prudenter dijudicabitur, quid ante quod, vel quid cum quo, vel quid post quod sanari debeat, vel possit; quemadmodum Galenus ipse in servando ejusmodi ordine curationis insinuat, 7. *meth. cap. 12.*

Ex pluribus autem symptomatibus, quæ vulneribus accidere solent, præcipuum, & cæteris periculosius est Hæmorrhagia, proptereà qua ratione possit Medicus eidem occurrere, breviter aperiamus.

Et quidem in communiori praxi toti sunt in pluries mittendo sanguinem, gratia, ut inquiunt, Revulsionis, ex partibus oppositis, ac distantioribus. At minuitur quidem, sed non sistitur sanguis repetitis ejusmodi detractionibus; quin & non rarò, concitato potius ejusdem motu, impetuosius is irruit in partem vulneratam, veluti redditam debiliorem, ideòque abundantius egreditur; nisi etiam tam langueant vires, ut in vitæ discrimen ægrum adducant, vel saltem tardissimæ curationis vulnus efficiant. Insistunt alii ligaturis, frictionibus, cucurbitulis, atque interea parti vulneratæ admovent pulveres quosdam adstringentes, ex aloe, bolo Armenia, terra sigillata, sanguine draconis, hypocistide, acacia, myrtillis, balauistiis, rosis siccis, pilis leporinis, aliisque, unà simul permistis cum albumine ovi; quæ medicamenta, cum localia sint, & pulverata, fluenti sanguini remoram quodammodò faciunt, sed non plenè opitulantur. Hac planè ratione vulneribus sanguinem fundentibus pro-

fuisse credendum, lotiones aquæ frigidæ apud vetustiores in usu habitas: nam oscilla venarum, & fibras partium corrugando, sanguinem sistere poterant.

At verò quæ hætenus ex innumeris medicamentis sanguinem fluentem ex vulnerata parte, sistentibus, efficaciora in Praxi observata sunt, censentur potiones vulnerariæ, pluries assumptæ; Extrinsecus verò Pulvis sympatheticus, & Aqua aluminosa vitriolica. Potiones vulnerariæ parantur ex consolida, hyperico, alchimilla, fanicola, pyrola, dictamno, bistorta, tormentilla, rubia, aristolochia, pilosella, rhapontico, equisetio, centinodio, caryophyllata, plantagine, zedoaria, betonica, cornu cervi, cortice ligni guajaci, ligno lentiscino, visco quercino, fantalis, gummi tragacantho, balsamo peruviano, & similibus, quæ sanguinem moderari, & fibrillas venarum, ac arteriarum corrugare, & constringere creduntur. Hæc autem primùm infunduntur, deinde decoquuntur in aquis, vel puris, vel chalybeatis, usque ad consumptionem tertiæ partis, atque ad dosim quatuor, vel sex unciarum, mane, & sero exhibentur, addendo guttas aliquot balsami sulphuris, vel peruviani, vel tolutani, aut cum spermate Ceti, vel sperniola Paracelsi juxta descriptionem Crollii, & Hartmanni. (a) Ex his quoque pulveres Traumaticos dictos alii faciunt ad eundem finem. Optimum etiam est infundere essentiam sanguinariæ, seu centinodii, aut etiam succum depuratum ejusdem, vel urticæ. Conferentes etiam sunt trochisci Gordonii descripti à Valerio Cordo, & à Sgobbio in suis Pharmacopœis. Sunt etiam apud nonnullos in magno pretio magisterium, tinctura, &

syrupus coraliorum rubrorum; at quia ex coraliis elicita tincturæ fraude non carent, infideles sunt.

Quod verò attinet ad pulverem Sympatheticum, is mirabilis semper in sistendo sanguine est observatus, sive supra partem vulneratam admoveatur, sive supra intinctum recenti sanguine linteum inspergatur, ac deinde detineatur in loco, ab omni aeris inclementia libero. Scripsere de hoc pulvere, ejusque viribus, Viri undequaque clarissimi, præsertim verò Digbæus olim Angliæ Cancellarius, peculiari libello *de Pulvere Sympathetico*, Laurentius Straußius, Nicolaus Papius, Erysius Mebryus, & novissimè Pater Hieronymus Vitalis Clericorum Regularium, qui summis rationibus ejus usum licitum quoque esse demonstravit, tum ex naturali, tum ex morali Philosophia. (b)

Conficitur autem ex Vitriolo Romano purissimo, non verò vulgari, aut Cyprio. Ejus quantitas ad libitum, mense Julio, vel Augusto, repetitis primùm ablutionibus, atque à partibus impuris separationibus per filtrum, aut chartam emporeticam, recolligatur, ut summam suam nanciscatur viriditatem; crassiusculè deinde contundatur, & ferventioribus Solis radiis per dies xv. circiter in phiala vitrea rotunda, ut iis undequaque verberetur, exponatur, quousque perfectam calcis formam adipiscatur. Servetur postmodum in vase vitreo benè clauso, & in loco sicciori, ne per aeris nitrosum humorem recrudescat. Huic tandem ità præparato superaddunt æquam gummi tragacanthi portionem, itemque sarcocollæ, & gummi Arabici sub-

(a) De potionibus Vulnerariis V. præ cæteris etiam Quercetanium in sua pharmacop.

(b) Qui tam pro, quam contra hunc pulveris usum scripsere, extant uno volumine recollecti, quod Theatrum Sympatheticum inscribitur.

subduplum, ut maiorem vim, & efficaciam, in sistendo sanguine assequatur: nec abs re; licet aliqui id haudquaquam necessarium arbitrentur. Ejus insuper usus ex Papinio hic est. Vulneribus recenter inflatis, & sanguinem fundentibus, immergitur linteum mundum, idque vel ex lino, vel ex cannabe confectum, donec fluente sanguine penitus intingatur: huic statim inspergendus postmodum pulvis est, & alio linteo hæc involuta simul asserventur in loco temperato, eoque vel vicino, vel à patiente parum distito, ne scilicet immodica intersit intercapedo.

Quo autem pacto pulvis hic operetur, etiam si videatur indistans agere, longa, ac pereleganti sanè oratione, pluribus ostendunt præcitati Doctores, atque in primis Digbæus, qui complura alia exempla, in hujus argumenti comprobationem congerit. Neque ex eo, quod satis manifestatio non appareat, superstitionis ille culpandus est: nam, ut inquit Plinius, multa sunt Naturæ miracula incomptæ adhuc rationis, & in Naturæ majestate penitus abdita. Et Pater Cabæus de Meteoris lib. 4. cap. 4. qu. 2. de hac eadem re verba faciens, sic habet: *Sunt aliqui effectus, de quibus videtur ab aliquibus dubitatum, utrum absolvant omnino à medio, ut est illa ratio medendi vulneribus, quæ curantur applicando medicinam crustis sanguine infectis: dicunt enim sic curari vulnera in quacumque distantia equaliter. Nec res omnino superstitioni obnoxia censerì debet; nullus enim intervenit actus Religionis nec veræ, nec falsæ; nec medicamentum ipsum ullam habet speciem falsi cultus: est enim simplex omnino medicamentum, omnino simplici modo applicatum; neque ex eo, quod causam ignoras, debes statim Dæmoniacum exclamare, quasi verò omnia noveris naturalia, & sint in te omnes sapientiæ apices transfusi. Hactenus Cabæus. Et quidem*

multa sunt in Naturâ, quorum effectus prospicimus, causas verò penitus ignoramus. Si enim supra fæces humanas calidas cinis inspergatur, mox Tenesmus accidit, cum ardore, & excrementis sanguineis. Si secundinæ foeminarum, aut earumdem lochia in sordidis locis detineantur, præsertim in vasis, ubi urina asservatur, gravissima symptomata exoriantur, ut Author est Sennertus. Si lactans mulier lac in prunas emulgeat, statim illi ubera sterilescunt. Si dum ova à Gallina incubantur, unum assetur, reliqua etiam deperduntur, ut testatur Pater Kircherus in *Arte magnetica*. Cithara fides æquè tensas cum alia retinens, ad alterius contactum resonat. Vina in doliis fluctuant, cum Arbores efflorescunt, ac germinant. Genitivæ notæ Puerorum exasperantur, cum poma, quæ representant, quotannis ad maturitatem perducuntur. Atque his alia innumera. Si igitur hæc naturaliter eveniunt, cur pulveris hujus activitatem superstitionem, aut dæmoniacam dicemus? Sunt quippe per Aerem diffusi halitus, atque instar catenæ devincti, ideoque mutuò communicantes vim, quæ cæteroqui nobis occulta manet, cum sensus nostros effugiat, eo ferè modo, quo plerumque observamus per Aerem vapores, dum pluviae imminet, in filamenta Araneorum telis similia, dispersos. Hi autem vapores ita devincti, atque per Aerem diffusi, cum è sanguine vulneratæ partis exhalant, simul cum halitibus vitriolicis commiscuntur, & devinciuntur, unaque communicant: quapropter sanguinem ex vulnere fluentem figendo, & fibrillas partium corrugando, medelam afferunt. Hac sanè ratione Canes vestigiis Hominum, Leporum, Avium, & similibus insistentes, olfactu illa distinguunt: Itemque Vultures, è remotissimis etiam regionibus, Cadaverum corpora perquirunt, & insectantur. Idque genus alia.

Val-

Valdè convenit cum Pulveris sympathetici activitate, vis, & efficacia ejus Unguenti, quod quia vulneribus medetur, si armis sanguine intinctis adhibeatur, *Armarium* dicitur. Adhibetur autem Armis, quibus vulnus inflictum est, vel alteri simili instrumento, eodem sanguine maculato, quod deinde conservatur in loco sicco, ab omni alteratione aeris immuni, eo prorsus modo, quo tractari solet pars ipsa vulnerata: qua enim ratione alteratur ferrum istud, eadem omninò pars ipsa vulnerata afficitur. Interim verò abluì, & detergi debet vulnus urina patientis. Verumtamen hinc fit, ut plerique non incongruenter existiment, curationem non ab unguento, supra ferrum adhibito, sed ab urina proficisci, quæ suo sale abstergit, ac emundat vulneratæ partis sorditiem; unde postmodum Carnis regeneratio ope, ac beneficio Naturæ; quemadmodum in Canibus iterato linguæ delinctu experimur.

Hujus Unguenti descriptionem variam referunt Authores, quocircà quibusdam de illius curatione, totiusque facti veritate occasio dubitandi data est. Verum quæ ex Paracelso, (qui primus Author hujus remedii creditur, quamvis longè vetustius referatur apud Germanos) desumpta est, sic se habet, ut accuratius recollegit Rodolphus Goglenius, peculiari tractatu, *De Unguento Armario*, & ante ipsum retulit Jo: Baptista Porta *Mag. Natural. lib. 8. cap. 12. Sumitur Usnea concreta in Calvaria hominis suspensi, aliave morte violenta perempti, atque in aere derelicta, Mumia vera, & sanguis humanus calens, singulorum unc. i., adeps humanus ad unc. ii., oleum lini, terebinthina, & bolus Armenia, cujusque drachm. ii.* Miscentur omnia simul in Mortario, servanturque in vitro oblongo, & angusto. Atqui vult Goglenius id conficiendum esse Sole existente in Libra, & Usneam esse colligen-

dam Lunâ crescente, & in domo Veneris commorante, (a) vel etiam Luna versante in Piscibus, ejusdem Veneris exaltatione. At alii supervacanea ista putant. Verum qui plura, & curiosa, de vi, & compositione hujus Unguenti, & quæ tam pro, quàm contra illud objecta sunt, legere desiderat, consulat *Theatrum Sympatheticum*, ubi etiam eruditissimam Jo: Baptistæ Helmontii disputationem, *De Magnetica Vulnerum curatione*, inveniet, quæ etiam inter ejusdem Opera impressa deinde fuit. Nobis autem satis sit hæc innuisse. Cæterum de eo, ipsiusque efficacia, fides sit penès allatos Authores.

Quoniam verò superiùs spondimus referre velle remedia, quibus Medicus possit occurrere omnibus symptomatis, quæ vulneribus accidere solent, idcirco ad exactam hujus rei notitiam breviter illa percurramus.

Et quidem primò, si ex lecta Vena, aut Arteria sanguis abundanter profluat, ne habeatur in promptu pulvis sympatheticus, licet Chirurghi ferro candenti orificium venæ, vel arteriæ incisæ occludere satagant, inducta nimirum eschara; quia tamen id plerumque nimium horribile videtur, tutius, ac præstantius erit frustulum aluminis crudi, ad modum turundæ, venæ, aut arteriæ orificio intrudere, & obligare: mirum enim quàm efficax sit Alumen in sistendo sanguinem. Aqua pariter ejusdem Aluminis dissoluti, aut etiam Vitrioli Romani, pulvinulo lineo, aut gossipio applicita id ipsum præstat, eamque veluti mirificam summè deprædicat Petrus Borellus in suis *Centuriis Observationum*: qua etiam Bilsium insignem nostræ ætatis Anatomicum, vivorum animalium sectionem instituisse creditur, abs-

(a) Tauro scilicet, aut Libra.

absque ulla sanguinis effusione. Aliam Aquam describit Magatus *lib. 1. cap. 63.*, quam dicit esse præstantissimam ad cohibendum sanguinis profluvium. Sed & nuperimè magnis laudibus extollit *suum liquorem Stypticum* Jo: Cornelius Meber, ex Vitriolo, & Alumine pariter compositum, atque *Anchoram sauciatorum* appellat, apud quem vide. (a)

Quod si neque ab his profluens sanguis sistatur, (potissimum cum incisa arteria est) tunc ultimum remedium erit sectam arteriam, aut venam per longum denudare, & serico, vel lineo vinculo utrinque obligare, ut sanguis per alios contiguos, aut proximiores arteriæ ramulos, diffusus, aliò per circuitum divagetur. Quo sanè artificio in patente Aneurismate curando, nonnulli usi sunt, inita scilicet hinc inde ligatura in arteria tumefacta, ductoque sanguine interjacente. At verò in hoc opere exequendo accurata plurimum, & diligens Chirurgi peritia exquiritur.

Non rarò parti vulneratæ supervenit inflammatio, quæ vel vulnus reddit curatur difficilior, vel etiam gangrænam minatur, & corruptionem: propterea ad ipsam cohibendam instituunt Chirurgi repetitas sanguinis missiones, tum revulsorias, tum derivatorias dictas.

Ad partem verò vulneratam adhibent Repellentia, & quidem refrigerantia, ut oleum rosaceum, lac, poscam, decoctum sumach, plantaginis, & portulacæ, succum solani, sempervivi: pulveres baccarum myrti, & rosarum rubrarum: cataplasmata ex farina hordei cum lacte, vinum rubrum austerum, in quo decocti sint cortices granatorum, & similia. Sed

ista plerumque nil proficiunt, nisi etiam in pejus vulneratam partem deducant. Quare præstabit Aqua spermatis Ranarum, sperma Ceti dilutum aliquo liquore amaricante, puta in decocto Absynthii. Apud cordatiores verò Chirurgos est in usu lotio aquæ ardentis, qua pars roboratur, & restagnans humor exsolvitur. A valdè refrigerantibus omninò cavendum admonet Galenus. 2. *ad Glauc. cap. 2. & 13. meth. cap. 12.*, quoniam partem mortificant, & putrefactionem arcessunt, aut saltem consistentiores humores reddunt difficulter resolubiles.

Nonnunquam etiam accidit, ut vulnera evadant sordidiora, & quandoque etiam cum carne flaccida, & fungosa; quin etiam aliquando pars affecta exindè vergit in gangrænam, aut sphacelum: quomobrem totis viribus incumbendum, ut vulnus mundum conservetur, & quoad fieri potest, omni forde detergatur, absumpta carne inutili, ac fungosa, adeoque Gangræna prohibeatur. Id autem fiet partim internis, partim externis præsidiiis. Internis quidem, exhibitis alchalicis, bolo Armenia, coraliis, cornu cervi, oculis cancrorum, terra Lemnia, sigillata, &c. Itemque decoctis ex ligno sassafras, lentisco, C. C. crudo, ebore, consolidida, hyperico, visco quercino, zedoaria, scordio, & similibus; victuque attenuante, & exiccante. Extrinsecus verò admoveantur lotiones ex absynthio centauro, marrubio, myrrha, aloë: nec non unguentum Ægyptiacum, aut Apostolorum vinum myrratum, Aqua, seu balsamum Neapolitani, Elixir proprietatis, diasulphur Rulandi, seu balsamum sulphuris. Ad carnem excrecentem est in usu alumen ustum, spongia usta, tutia, ærugo æris, aloë. Utuntur alii præcipitato, cum unguento aureo: & alii pulvere quodam composito ex æquis portionibus myrrhæ, aloës, farinæ lupinorum, cen-

(a) In ultima impressione Vratislav. ann. 1687. cui accessere descriptiones Aquarum styptic. D. la Fæur, & D. l'Emery.

centaurii minoris, radicis aristolochiæ, veratri nigri, & C. C. usti, quo sordes, & excrementa tenaciora mirificè detergun-
tur. Efficaciùs operatur Aqua, quam describit Paulus Barbette in sua Chirurgia, atque componitur ex alumine crudo, & viride æris, ad singulorum drachmas duas: decoquuntur hæc in vino ad libr. i. ÷, usque ad consumptionem quartæ partis, deinde facta colatura, additur camphuræ drachm. i. Ne verò ab usu hujus aquæ circumstantes partes offendantur, præstabit uti pulvere composito ex gallis immaturis, balaustiis, alumine usto, thure, & myrrha, cujusque drachm. i. sanguine draconis, ærugine æris, & cerussa, singulorum drachm. semis.

In Gangræna denique intrinsecùs exhibeantur diascordium, theriaca, mithridatium, antidotus magna Matthioli, aqua prophylactica, aqua magnanimitatis, elixir vitæ, aqua theriacalis, theriaca Germanorum, magisterium coralliorum, sal volatile C. C., antimonium diaphoreticum, & alia hujus generis. Extrinsecùs verò conferunt caustica, ut oleum vitrioli, oleum ejusdem philosophicum, absynthiacum rectificatum, calchantum ustum, alumen, præcipitatum rubrum. Sed tutiùs, ac mitiùs operatur calcinatum magnum Paracelsi, unguentum Ægyptiacum, trochisci de minio: quibus non suffragantibus, deveniendum ad resectionem, & ustionem, juxta illud Ovidii

Immedicabile vulnus

*Ense recidendum est, ne pars sincera
trahatur.*

Eschara autem ex causticis, aut ex igne inducta, sensim decidet unguento rosaceo, & violaceo, butyro, aliisve similibus, ac postmodum, deterfa pars sarco-
tici tractabitur.

Sæpè tandem cum vulnere conjungitur febris, quæ etsi symptomatis conditionem

referat, atque adeò vulneris curationem sequatur, non tamen omninò contemnenda est. Quare si gangrænam imminentem, vel concomitam habeat, omnia alexipharmaca convenient: si inflammationem, dissolventia, & sudorifica: si sorditiem, & purulentiam, exiccantia, & alchali-
ca: & sic de aliis.

Si postremò vulnus fracturam ossis conjunctam habuerit, expostulabitur primùm partium ossis fracti mutua commissura, quæ peritissimi Chirurgi industriam, ac diligentiam exquiret: mox tabulis, ac fasciis, ad id comparatis, oportebit unde quaque os fractum obligare, & in omnimoda quiete detinere, itemque vulnus balsamicis per siphonem injectis confovere. Quòd si frustulum ossis fortasse in vulnere relictum sit, omnis industria adhibeatur, ut debitis instrumentis eximatur; sin secùs, ad cicatricem vulnus perducatur; siquidem non rarò evenit, ut post multum tempus, squamulæ istæ sponte Naturæ prodeant, atque vi ejusdem Naturæ, per fibras motrices expellentis, egrediantur. In hanc rem summè quoque proderit, Emplastrum stypticum dictum Paracelsi, & Crollii, quod superpositum vulneribus mirabiliter extractionem adjuvat eorum, quæ fortassis intra vulnus re-
licta sunt.

Si præterea cum fractura ossis, ut fieri solet, adjungatur Contusio, & Attritio, optimum erit contusas partes linire cum succo foliorum sambuci ex vino expresso, nam sanguinem livescentem discutit, & partes roborat, non neglectis interea portionibus vulnerariis suprà descriptis. Utuntur alii spiritu vini camphurato, aut Aqua vitæ Reginæ Hungariæ. Verùm de curatione ossis fracti fusiùs agemus sequenti Capite.

CAPUT VIII.

XCI. in Galeno.

De solutione continuitatis in Osse.

TEXTUS.

(T. 51.) **F**ractio igitur est continuitatis in osse solutio, quæ quantum ad intentionem primam, insanabilis existit; quo verò ad secundam, aliquo modo sanabilis fit. Prima igitur intentio est coalitus partium, qui ob ossis duritiem fieri non potest. Secunda alligatio, quæ fit callo supernato partes fractas circumalligante. Calli autem generatio, qua quidem ex materia, & à Natura fit, est & ad alia communis, qua verò formam ossi vicinam habet, ex ejusdem fit alimento. Molle verò, & puerile os coalescere potest. (T. 52.) Sed perrarò fit talis affectus, quin cum altero societur. Magna enim ex parte musculi adjacentes unà cum corporibus aliis fractis ossibus patiuntur. Quare & curationis intentio oritur duplex, quarum altera quidem circa ossa, altera verò circa corpora adjacentia versatur. Sed hæc quidem in carnosarum partium complicatis dicentur affectibus. Nunc verò de fractionibus dicendum. (T. 53.) Quoniam enim harum sanitas callositate procuratur, ut autem callus generetur proprii ossis alimenti superfluitatem naturæ suggerere oportet. Hanc verò superfluitatem in qualitate, & quantitate servare modum, est necessarium: idcirco & ratio victus est adhibenda, quæ tantum, ac talem influere ossibus sanguinem præparet, qualis, & quantus generando callo sit opportunus. Quoniam verò per fracti ossis cavernas idem effunditur sanguis, ejusdem qualitatem, & multitudinem animadvertere oportet, atque ita vel sicciorem, vel humidiorum victum instituire. Sed hæc omnia

in libris, in quibus de curandi ratione tractatur, plenius sunt explicata.

PARAPHRASIS.

P Ræcedenti Capite Galenus egit de Curatione solutæ continuitatis in Carne, nunc tradit modum curandi fracturam, seu solutionem continui in osse: nam ex eodem 3. meth. cap. 1. quod dicitur vulnus in carne, vocatur in osse fractura. Inquit autem fracturam ossis, quantum ad intentionem primam, esse insanabilem: & sensus est, quod os fractum restitui in pristinum non potest per medium ejusdem generis, sicuti unitur caro soluta, quæ per medium carneum ejusdem naturæ restituitur. At quoniam ossa per cal- lum, qui est medium differens, ac difforme, agglutinantur, idcirco dicuntur per intentionem primam insanabilia, licet per secundam intentionem sanari possint. Ad- dit tamen Galenus in textu, coalescere posse ossa fracta in Pueris per primam intentionem, quoniam per eam ætatem, mollia sunt. Neque enim alia ex ratione in adultis ossa per primam intentionem nequeunt agglutinari, nisi quia progressu ætatum evadunt duriora, unde nequeunt admittere in sui substantiam mollis alimenti agglutinationem: quamobrem ut notat Galenus 6. aphorism. comment. 19., ossa fracta per callum unita, veluti vinculo quodam circumducto constringuntur in superficie; in profundo verò minimè agglutinantur. Ut autem Natura facilius ossa fracta per callum jungat, oportebit Medicum illius Adjutorem esse, atque addeò quatuor omninò necessaria persolvere. Primum oportet ossa fracta extendere, & in suum locum coaptare: quod peractum dignoscetur, cum conformantur in figura, magnitudine, & longitudine cum partibus sanis, nullamque habent asperitatem, eminentiam, cavitatem, aut inæqua-

qualitatem. Secundò necesse est, ità adducta, & coaptata ossa in suo naturali situ conservare: quod fit per ligaturas, fascias, ferulas, seu tabulas ligneas apprimè commissas, & fractis ossibus circumductas. Tertiò advertere oportet, ne aliquid inter ossa fracta committenda intercidat, aliter impediretur agglutinatio. Quartò demum opus est ossa prædicta, & membra adjacentia fovere, ac roborare, ne in illa, tanquam ad partem læsam, confluant excrementa, & præternaturales humores; in quem finem solent adhiberi lotiones ex vino rubro austero, auctoritate Hippocratis *libro de Fracturis*; aliudve huic simile. Intereà autem, dum Calli generatio desideratur, jubent Chirurghi (ut admonet etiam hoc loco Galenus) alendum esse Patientem cibus similiter glutinosus, uti sunt far, oriza, maxillæ, interanea, & pedes animalium, aliaque hujus generis, prout tamen Ventriculus per concoctionem tulerit.

Quoniam verò subdit Galenus, per rarò accidere fracturam ossis, sine adjacentis carnis, membranæ, aut nervi læsione; proptereà inquit, curationem dirigi quoque debere, nedum ad coaptationem, & agglutinationem ossis fracti, verum etiam ad partium adjacentium consolidationem. Et quamvis idem Galenus hoc loco summam tantum Methodum tetigerit curandi circumscriptas partes fracti ossis; Nos tamen addimus, illas convenienter foveri succo foliorum sambuci cum vino expresso, vel etiam farina florum sambuci, addita subdupla portione chamæmeli, & absynthii, simulque mistis cum oleo sambucino ad formam cataplasomatis: quamquam & nunc nostratum Chirurgorum usus sit fovere partes ipsas Aquavitæ camphurata, vino myrrhato, aut aliquo balsamo ex iisdem composito. Quòd si partes adjacentes combustæ sint, fortasse quia vulnus sclopo inflictum sit,

tunc maximè proderunt olea, vel unguenta ex eodem sambuco concinnata. Oleum autem ex floribus sambuci sic conficitur. Flores sambuci recenter contusi in vase vitreo reponantur, deinde affundatur oleum olivarum clarissimum, & vetus: macerentur ad solem, vel in loco calido, per dies xv.; deinde decoquantur, & facta expressione, abjectisque floribus decoctis, alii injiciantur, & denuò per alios xv. dies macerentur: postea simili modo decoquantur, & exprimantur: quod percolatum est, in vase mundo conservetur ad usum. Simile oleum ex medianis corticibus sambuci extrahunt Augustani in sua Pharmacopœa. Linimentum verò efficacissimum describit Platerus in suis Observationibus hoc pacto: Accipit Cortices medianos sambuci, & succum foliorum teneriorum ejusdem, ad partes æquales, olei lini loti aqua florum sambuci partem sesquialteram, olei rosacei, & axungie porcine itidem lotæ, subduplum, thuris pulverati partem unam, ceræ citrinæ optimæ quantum satis. Hec omnia decoquit in aqua florum sambuci olla benè clausa, & cum refriguerint, innatans unguentum colligit, & reponit.

Eo deinde membrum, flamma, aut pulvere pyrio, oleo, aut aqua ferventi, aliterve combustum, illinit, ac postea linteis mollibus obvolvitur. Simile aliud linimentum affert Matthiolus *cap. 168. super iv. Dioscoridis*, apud quem vide. Paratur etiam ex lixivio, & oleo sambucino aliud, quod ex lactis colore, quem refert, *Lac Aureum* appellatur. Debent autem lixivium, & oleum sambucinum benè simul agitari, & commisceri, ut lactis colorem acquirant, atque tunc adhibetur feliciter ad ambusta, præsertim, cum ad Gangrænam exulceratio inclinaverit. Applicatur tamen calidè, vel eo imbuantur lintea, & superimponantur: Dolores namque lenit, & putredinem, ac corruptionem prohibet.

Si Fracturâ ab instrumento contundente potius, quàm ab vulnerante orta sit, atque adeò conjunctum habeat livorem in parte, tunc statim à principio poterit exhiberi pulvis Mefvæ contra casum in vino rubro austero, & exteriùs livescenti parti applicetur aqua ardens, in qua dissoluta sit Camphura: licèt in praxi ordinaria utantur oleo rosaceo, cum pulveribus rosarum rubrarum, & myrtillorum, superposito brassicæ folio. At si ex contusione pars in tumorem sit elata, tunc interiùs proderit sanguis hircinus cum pulvere oculorum Cancrorum præparatorum, & spermate Ceti. Exteriùs verò Emplastrum ex eodem spermate Ceti, descriptione A. Mynsicht, vel fodicationum Paracelsi.

Inter ossium omnium fracturas, longè periculosiores sunt, quæ Cranio contingunt, ideoque de his speciatim aliqua subnectamus, & peculiaris curationis methodum tradamus.

Cranii vulnera diversimodè contingunt. Aliquandò enim Cranium solam Rimam contrahit, & quidem in superficie tantum, nec interiùs penetrat: cumque sanies in ea collecta reliquum ossis, & subjectam membranam corrumpere possit, proinde summa diligentia detegenda illa erit, & conspicua reddenda, adhibitis interea iis, quæ sanguinis fluxum sistere possunt, potissimùm ex albumine ovi, & pulveribus adstringentibus. Ubi postmodum sanguis destiterit, nec ampliùs profluit, abradendum os est, usquequò Rima desierit; idque etiam ex documento Galeni 6. meth. cap. ult. Deleta Rima, vulnus curetur more solito, & prout superius notatum est, per balsama convenientia: periculum enim, quod ex Rima imminet, illa cessante, desinit; quoniam sanies intra Calvariam serpere, & internas partes corrumpere nequit. Quot autem, & quanta immineant mala ex Cranii Rima, perstrinxit Hippocrates lib. de

Vulneribus Capitis n. 27. inquiens: Cum quis os fractum, aut ruptum, aut contusum, aut quocumque alio modo scissum intelligens, per errorem deliquerit, & neque raserit, neque perforaverit, ante decimum quartum diem febris corripiet, ut plurimum in hyeme, in æstate verò post septimum diem febris corripit, & postquàm hoc factum fuerit, ulcus colorem amittit, & ex ipso pauca sanies profluit, & quod inflammatum est, ex ipso emoritur, os corrumpi incipit, & fit valde nigrum; postremò pallidum, aut valde album, & desipiens æger moritur. Ad id autem præcavendum maxima in Chirurgo peritia expostulatur, præsertim cum ad medullarium, seu ad os vitreum abrasio necessaria est; siquidem inde sanguis affluentiùs manare solet, exactam impediens deraisionem; quamobrem assiduò spongia, vel gossipio, posca imbuta, opus erit, ut ejus ope sistatur sanguis profluens. Quòd si Rima universam ossis crassitiem occupaverit, tunc solent Chirurgi perterebrationem instituere instrumentis ad id comparatis, ut sanies exitum habeat, & Meninges, ac Cerebrum minimè pervadat. Verùm quia hæc, utpotè nimis horrida, & laboriosa, nostris temporibus ferè exolevit, proinde solutis balsamis dumtaxat utuntur, ad prohibendam puris generationem. Eodem prorsus modo operandum in vulneribus Capitis cum sede Teli, facta solùm, si oportuerit, asperi ossis abrasione, ne asperitas ipsa impedimento sit curationi. (a)

Solet etiam cum vulnere capitis conjungi contusio, & tunc licèt plerique etiam ossis abrasionem commendent, qua parte livor ex contusione apparet, satis

ta-

(a) *Fracturarum in Capite differentias, & nomina diversa vide apud Galenum libro finitium Medicarum eidem adscripto.*

tamen erit balsamis partem illam fovere, & cætera præsidia administrare, quæ in reliquis ossium contusionibus memorata sunt.

Denique si Cranii portio ex vulnere sit abscissa, sed absque eo, quod dura Meninx detecta sit, curatio, sicut in cæteris ossis vulneribus dictum est, perficienda. Si verò membrana detecta appareat, tunc solent Chirurghi laminam pluribus foraminulis pertusam, ad illius custodiam, & puris repurgationem, superponere, & Meninges, ac Cerebrum contegere. Verum hæc peritiam potius experti Chirurghi, quàm theoriam expostulant. Et de his satis.

CAPUT IX.

XCII. In Galeno.

De Punctura Nervi, & Tendonis,
seu Chorde.

T E X T U S.

(T. 54.) **N**ervi verò, & Tendonis punctura propter sensus excellentiam, & quoniam hæc pars principio continuatur, prompta est ad Nervorum convulsionem excitandam, ac tum præsertim, cum nihil extrorsum expirat obcæcato cutis vulnere. Aperiendum est igitur, atque exiccandum substantia tenui, quæ usque ad ima Nervi offensi possit penetrare. De his verò exactè diximus in libris de Arte medendi conscriptis. (T. 55.) In simplicibus quando hujus generis affectibus salubrium causarum forma talis existit: In compositis verò complicatur ulceribus. (T. 56.) Prima quidem cavitas, quam non alterum affectum, sed ulceris differentiam esse arbitrantur. Est autem non differentia hujusce-

modires: sed alterum aliquod totius ægritudinis genus, in quo ipsius substantiæ jactura facta est. Et quidem curatio in duplici morbo duplicem exigit intentionem: Nam continuitatis solutio, unitate: substantiæ autem jactura, generatione indiget. Paulò verò supra generationis intentiones expositæ sunt. (T. 57.) Quod autem primum quidem hunc affectum oporteat sanare, demum unitatem restituere tentare, ipsa rerum Natura commonstrat. Cum itaque repletum quidem fuerit cavum, ulcus verò ad æqualitatem perductum, alteram intentionem aboleri contingit: nam media existente inter labia ulceris ea carne, quæ nuper est genita, partes quidem distantes uniri est impossibile, unde fit, ut alia sit intentio perquirenda. Intentionem autem consequemur ex eo, quod est secundum naturam ipsi parti comparando: erat autem eidem secundum naturam cute obduci. Quare hoc ipsum à nobis procurandum, aut si hæc intentio effectum sortiri non potest, simile aliquid cuti, carnem scilicet, quæ cutis naturæ vicinæ sit, instaurare oportet. Est autem hujusce modi, quæ & sicca, & calli similitudinem præsefert. Ad cicatricem igitur obducendam necessaria erunt exiccantia, ac si ne mordacitate adstringentia medicamenta: (T. 58.) Ita & si sordities aliqua fuerit adnata, intentio quidem erit abstergendi, & erit medicamen salubre abstersivum: eorundem verò materiam in libris, in quibus de medicaminibus agitur, scripsimus. Et quidem si aliqua inflammatio, vel attritio, aut tumor prædurus, idest scirrhus, aut mollis, & laxis, idest œdema, cum ulcere fuerint, prius eorum curationi intendere oportet, eas sequendo vias, ac rationes, quas prius exposuimus. Sic & si aliquid ulceri illabatur, ad illabentium curationem intendendum. Eodem pariter modo, si aliqua intemperies ulceratum locum obderit, ad ejusdem intemperiei remedia ante veniendum. Sed de his quidem satis.

P A R A P H R A S I S.

AD exactam omnium vulnerum tractationem, postquam Galenus de Curatione fracti ossis egit, prosequitur agere de Punctura Nervi, & Tendonis, quæ longè gravior, & periculosior est. Appellat autem in Nervo, & Tendone puncturam, ad differentiam vulneris in carne, & fracturæ in osse, ut superius meminimus. Docet verò primum Nervorum, & Tendonum puncturas esse periculosissimas, triplicem ob causam, quarum primam esse inquit, sensus vehementiam: sunt enim Nervi organa sensus Tactus, neque pars quælibet sensus est capax, nisi per Nervos: Cum igitur Nervi vulnerantur, seu punguntur, ob sensus excellentiam acutissimè quoque dolent: Dolor modò primum, & præcipuum locum retinet inter symptomata vehementiora. Secundam verò ait esse, subsequenter Cerebri læsionem, quoniam Nervi vel immediatè, vel mediatè per Spina[m] Cerebro cohærent, propterea dolor, & læsio Nervis illata statim transfunduntur in Cerebrum, non sine ingenti operationum animalium læsione. Hinc prompta etiam est convulsio, per quam omnes partes nervosæ ad suum Principium contrahuntur. Tertiam denique inquit esse acris ichoris in punctura Nervi retentionem, undè magis, magisque perpetim ille vellicatur, & irritatione conatur expellere id, quod præ acritudine Nervum, & Cerebrum molestat. Dictum est, hæc omnia potissimùm accidere in Nervi punctura; nam si fortasse Nervus omninò rescinderetur, minoris periculi certè foret, ut infra dicetur.

His de Punctura Nervi præmonitis, pergit deinde referre Methodum Curativam illius, quam his propemodum verbis describit; *Obcæcatum Cutis vulnus aperiendum est, atque exiccandum substantia te-*
Tom. V.

nui, quæ usque ad ima Nervi offensi possit penetrare. Et sensus est, quòd in obcæcata punctura cutis, & carnis, Ichor, qui ex punctura promanat, quique ex partibus adjunctis, atque ex ipso liquore nerveo, confluit, in Nervo puncto restagnans, minimè expirat, nec repurgari potest; quo circa aperiendum vulnus est, ut liberè totus Ichor egrediatur, qui est causa gravioris mali in punctura Nervi, puta convulsionis. Mox debet etiam exiccari, & tenui aliqua substantia absorberi, quam 6. meth. cap. 2. & 3., ubi fusiùs de hac re agit, dicit esse Terebinthinam Laricinam, & Abietinam, cum cera, pice, & pulvere Euphorbii, molli gossipio exceptam.

At videtur Galenus in vulneribus Nervorum, & Tendonum valdè diminutus, cum solius puncturæ mentionem faciat: possunt namque Nervi, & Tendones cedi, & vulnerari, per longum, per latum, & transversaliter; id quòd objicit Galenus Argenterius.

Verùm non sine ratione solius puncturæ hic ille meminit; quoniam hæc potissimùm Nervi læsionem determinat: cæteræ autem dissociationes non solum Nervis, sed cæteris etiam partibus conveniunt. Atqui Methodus Definitiva, quæ hoc in libro sustinetur, percurrit solum Capita rerum, & non longam, latamque omnium materierum tractationem. Cæterùm plura de his cupienti adeundus est Sextus Liber de Methodo medendi.

At graviùs dubitare contingit, cur Galenus in textu dixerit, paucum Ichorem retentum in punctura Nervi, ob illius mordacitatem, convulsionem afferre. Et ansam dubitandi præbet idem Galenus, qui inhærens Hippocrati 6. aphorism. 39., duplicem assignat convulsionis causam, Inanitionem scilicet, & Repletionem, exemplo ex fidibus, vel exiccatis, vel humefactis, desumpto, id ipsum confirmans: mordacitas autem Ichoris in punctura Ner-

vi, neque per Repletionem, neque per Inanitionem videtur convulsionem parere posse. Sed in Galeni Operibus versatus facile difficultatem istam diluet. Is enim, *12. meth. cap. ult.* quatuor causas convulsionis constituit: & quidem præter Inanitionem, ac Repletionem, affert quoque humorem tenuem, & mordentem, atque ingens frigus. Dixit autem *textu 39.6. aphorism.* Inanitionem, & Repletionem esse dumtaxat Convulsionis causas, potius ut conveniret cum doctrina Hippocratis, quam ut ex mente sua id ipsum referret. Unde deduci potest, quam sagaciter Galenus; pro libitu sententiam mutare consueverit, & pro re nata, modò in hanc, modò in aliam, & quandoque etiam in oppositam, inclinare, prout res exigere videretur. Nisi tamen in utriusque Authoris gratiam dicere velimus, duas alias ex mordente humore, atque ex frigore deductas causas, commodè etiam ad Inanitionem, & ad Repletionem revocari posse; nam pungens, & mordens humor, aut replendo, aut inanendo molestat: & frigus, constipando, corrugandoque, etiam pro rata sua detinet humorem, qui causa convulsionis est.

Quamvis autem ex Punctura Nervi convulsio præsertim oriatur, non tamen quis exinde putet, alia, & quidem gravissima subsequi non posse. Sic & Tremorem, Stuporem, Paralysem, motus Convulsivos; & Vomitus; & quandoque etiam mentis Obstupescientiam, Delirium, cæteraque similia supervenisse Praxis edocuit. Veruntamen frequentius Convulsio comes ejus est, quoniam immediatius ex punctura utraque Nervi membrana afficitur, ex pia, ac dura Matre procedens, quæ medullarem Nervi substantiã investit. Quamobrem suspicari fas est, medullam Nervi affectam, aut obstructam, Paralysem potius, ac Stupores afferre; Vomitus verò, Delirium, aut Obstupescientiam subsequi, cum præter particularis Nervi læsionem,

vitium quoque Cerebro communicatur: id quod accidit, vel ex pure ibidem genito, aut ichore corrupto, vel ex inflammatione, aliave simili affectione, membranas simul, & medullarem substantiam colladente. Hinc affecto Cerebro ea in parte, quæ Nervorum principium est ab acritudine mordentis humoris, vomitus accidit, compatiente nimirum Ventriculo, qui plurimas nervorum propagines inde recipit, & tum à conjugatione vaga, tum à vertebra lumbaribus. Quamquam etiam crediderim id pariter accidere solere ob connexionem, quæ Ventriculum inter, & Diaphragma intercedit; cui per fibras Stomachus tenaciter adhæret, ac propterea mutua vellicatione simul unà concutuntur, ut patet in Singultu, in quo Ventriculus simul, Septumque transversum commoventur; quin & in Rifu, ad concitatam Diaphragmatis motionem, Stomachus etiam commovetur, & Thorax, atque Abdomen, pariformiter coafficiuntur.

Quemadmodum ex vomitu, vulneratis Nervis, superveniente, conjicimus Ventriculum compati Cerebri passionem; ita pariratione, si convulsio vulnus consequatur, lethum imminere scribit Hippocrates *5. aphorism. 2.* quoniam nedum nervi per vulnus affecti designantur, verum etiam Cerebrum, nervorum principium; unde fibræ nerveæ, & membranae, nervorum substantiam medullarem circumobvolventes, proritatæ contrahuntur, & convulsionem subeunt, quam denique mors subsequitur.

At qua de causa punctura nervi adeò sit periculosa, ut convulsionem, & mortem afferat, secus verò ejusdem resectio, dubitabit hic non incongruè aliquis. Sed eisdem fiet satis dicendo, idcirco convulsionem in nervis punctis concitari, quia ex punctura, & ichore inde exudante, fibræ non sectæ proritantur, & convelluntur.

At

At verò fibris nerveis penitus resectis contractio nulla fit, nec partes nerveicæ præcisæ concuti possunt, eo quòd non amplius cum reliquis nervis, & Cerebro communicent. Attamen licet nullus metus convulsionis ex resecto nervo immineat, pars nervi nihilominus rescissionem passa, in sensu, & motu plurimum languet, cum sensus, & motus per nervos habeatur. Hinc Galenus 6. meth. cap. 3. inquit: *Si totus Nervus præcisus est, nullus metus (idest convulsionis) instat; debilis tamen particula manebit.*

Sicut de Nervo puncto, ita etiam de Nervo ex parte tantum dissecto, valde timendum, quoniam à fibris dissectis noxa non dissectis infertur; quamobrem fluxiones, inflammationes, convulsionem, dolores, & alia hujus generis promptè admodum illis accidunt. Jure ergo Galenus cit. 6. meth. cap. 3. facta comparatione inter nervum per transversum vulneratum, & per longum, statuit, majus vitæ periculum imminere ex transverso vulnere, ob rationem nuper traditam: quod etiam confirmat Avicenna 4.4. tra. 1. cap. 1. inquiens, *vulnera cadentia secundum longitudinem in Nervos, salviora esse cadentibus in latitudinem: Villus enim, subdit, sanus læditur ex vicinitate incisi.*

Quod dictum est de vulneribus Nervorum, pari modo intelligendum de sectionibus Tendinum, quoniam hi nerveam conditionem participant: constant enim ex nervea, & ligamentosa substantia; unde ratione substantiæ nerveæ sunt etiam sensitivi. Verum tamen est, quòd in horum vulneribus non adeò sævi dolores accidunt, neque tam prompta, & facilis convulsio, ob mistam ex ligamento substantiam. Magis tamen ob Tendinis vulnus læditur motus, quàm sensus, quoniam motui musculari Tendines sunt additi, suntque præcipua musculi pars.

Animadversione autem dignum est,

quòd licet ut plurimum vulnerati nervi convulsionem, & dolorem ingentem afferant, aliquandò tamen sine dolore afficiuntur, & tunc quidem cum putrescunt, ac mortificantur. Id quod maximoperè notandum, ne Medici decipiantur in Praxi, putantes nervos à læsione immunes, quia vulnus citrà dolorem est. Siquidem vel à pravitate materiei; vel ex inconvenienti, aut importuna frigefacientium medicamentorum applicatione; vel ex inflammatione, corruptionem nervi subeunt, ut propterea, sine doloris sensu, adhuc mortem afferant.

Postremò de curatione Puncturæ Nervorum aliqua attingamus. Galenus in hoc textu, ut superius memoratum, aperiendum primò suadet vulnus in cute, quousque pertingat nervi puncturam, ut exinde facilius possit Ichor absorberi, & exsiccarì. Absorbendum autem, & exsiccandum esse Ichorem hunc tradidit, 6. meth. citato, & lib. 3. de compos. Medicam. per genera cap. 2. medicamento quodam ex Euphorbio composito. Recipit enim: *Cera partem i, Euphorbii partes xii, Terebinthina, & Picis cujusq; partem dimidiam.* Verum pro varietate corporum, vel molliorum, vel duriorum, modò permiscet oleum, modò sagapenum, galbanum, & opoponacem; modò etiam sulphur; modò etiam herbas amaricantes, halinitrum, stercus Columborum, &c. ut apud eundem legere est cit. 3. de compos. medic. per genera cap. 2. & 3., ut & apud Antiquiores Chirurcos, Jo: de Vigo, Tagartium, Falloppium, Paræum, & alios. At verò Recentiores adhibent in puncturis nervorum oleum ex Terebinthina, Balsamum Sulphuris Terebinthinatum, Oleum de lateribus Philosophorum, Oleum Cerae, Essentiam Hyperici, Aquam vitæ camphuratum, Oleum ex Balsamo Peruviano destillatum, aut ex gummi ligni guajaci, lignoq; ipso. Apud Nostrates est in

usu Oleum Apparitii, ut & Oleum Cicinelli dictum. Maximè etiam prodest Oleum elicatum ex visco quercino, & ex floribus Sambuci suprâ descriptum. Sed inter cætera præstat quod sequitur. *℥. myrrhæ electæ, & mastiches singulorum drac. iiii, sarcocollæ drac. ii ÷ aloes drachm ii, thuris drac. i ÷ radicis tormentillæ, & tutiæ, cujusq; drachm. i.* Redigantur in pulverem, & deinde addantur olei ovorum, & hyperici singul. unc. semis, balsami sulphuris drachm. ii, olei thuris, & terebinthinæ stillat. utriusq; drac. semis, cere quantum satis, & secundum Artem fiat Unguentum.

Quòd si dolor adjungatur, & urgeat nimis, juvabit primùm, dolorem ipsum sedare; & quidem, vel oleo lumbricorum terrestrium ritè parato, vel ovorum, vel florum chamæmeli, vel sambuci, vel rosarum, in quo lumbrici terrestres ebullierint, unâ cum convenienti portione anethi, & liliorum alborum, Sedato dolore, detegatur postmodùm Nervus semotacuta, & vulnus amplificetur, nec aliud deinceps adhibendum, quàm oleum ex Terebinthina stillatitium, vel oleum cere, aut oleum juniperinum, hypericonis, de tacamahaca, aut ex balsamo Peruviano. Galenus multa ex Fossilibus admiscebat: ut Turiam, Spodium, Calcem pluriès lotam, & similia, quæ nostris temporibus ab usu recessere. Neque insuper oleosa, & pingua Nervo denudato admovenda sunt, quoniam putrefactiva. Unde Galenus ipse cit. 6. meth. cap. 3. inquit: *Sanè oleo perfundere tale ulcus non oportet:* quod tamen de relaxantibus intelligendū, secus de roborantibus, & per destillationem elicitis, vulgò *Quintessentiis* dictis. Pari ratione frigefacientia fugienda sunt: nam frigidum ex Hippocrate nervis est inimicum 5. aphorism. 18. , & 20. dicitur convulsiones excitare.

Verùm si Nervus vulneratus, aut solutus minimè sit, sed solummodò contusus,

tunc, etiam sicutis detecta sit, conferent ea, quæ supra notata sunt pro curatione contusionum, atque optima præferimèrit Aqua ardens camphurata, Elixir proprietatis, oleum de lateribus Philosophorum: licèt in Praxi ordinaria adhibeant Chirurghi Cataplasmata ex farinis fabarum, & lupinorum, cum pulveribus rosarum rubrarum, & modico vino. Utuntur alii oleo calente chamæmelino, vel rosaceo, vel irino, superpositis foliis caulium. At superius memorata tutiora, & salubriora semper erunt; quoniam, ut nuper meminimus, ex Hippocrate, & Galeno, Relaxantia, Adiposa, & Frigefacientia nocua sunt nervis, & partibus nervosis:

Hactenùs de methodo curandi continuitatis solutiones, & quidem simplices, Carnium, Ossium, Nervorum, Tendinum; nunc agere profequitur Galenus de Methodo curativa vulnerum complicatorum. Complicari autem inquit, simulque cum vulnere, vel ulcere conjungi, primò cavitationem, quæ sui repletionem petit, per carnis regenerationem. Nisi enim cavitas impleatur, & caro amissa regeneretur, proculdubio neque vulnus, neque ulcus curari poterunt. Et quamvis carnis regeneratio solius Naturæ opus sit, debet tamen Medicus ejusmodi opus adjuvare, vel saltem auferre impedimenta, quæ regenerationem ipsam remorari possunt. In hunc usum inducta sunt omnia Sarcotica dicta, præsertim sub forma Pulverum, ut sunt, Thuris, Aloes, Myrrhæ, Boli Armeniæ, &c. Itemque Unguentum Apostolorum, de Tutia, de Betonica, de Cerusa, Basilicum, Mirabile; quibus non rarò utile est admiscere Epulotica ad saniem, & excrecentem carnem fungosam auferendam; veluti sunt Ceratum de Minio, Diapalmas, Æs ustum lotum, Terra Cadmia, pulvis gallarum, & corticum granatorum, Alumen ustum, de quibus suprâ.

Sæpè etiam conjungi solet cum ulcere

Sordities, proinde subdit Galenus, tollendam illam esse abstersivis medicamentis, & ad ejusmodi usum sunt Mel rosaceum, Terebinthina, farina fabarum, & lupinorum, vel decoctum eorumdem, & hordei. At efficaciora sunt Vinum myrrhatum, vel in quo absynthium ebullierit, aut lithargyrium aureum, Aqua aluminosa, Aqua ferrea, Aqua calcis, vel in qua dissolutus sit lapis medicamentosus Crollii, vel Vitriolum sive crudum, sive in calcem redactum, Aqua vitæ camphurata, Elixir proprietatis, &c. Nosces autem ulcus bene abstersum esse, partim ex colore rubicundo, partim etiam ex sensu vellicationis, quem eadem medicamenta inferent super ulcus adhibita, ut monuit Galenus 4. de Compos. Medicamen. per genera cap. 2.

Subdit prætereà complicari cum ulcere Inflammationem, cujus curatio quo pacto procucuranda sit, superius est notatum. Solùm hîc adjicere oportebit, aliquando inflammari ulcus ex confluxu sanguinis, vel alterius liquoris, ad partem ulceratam, fortasse debilem redditam, ab ipsa continui solutione, quemadmodum à Galeno animadversum 3. de Naturalibus facult. cap. 13. Quare ne illa præ languore fluentes humores detineat, roborantibus remediis fovenda est. Sed & non rarò ob impeditum sanguinis circuitum per arteriolas, & venulas adjacentes, id ipsum evenit, quo casu dissolventibus, inflammatio feliciter desinet. Unde non irrationabiliter Moderniores ope Aquæ ardentis camphuratæ, aliusve liquoris dissolventis, & roborantis simul, assequi solent.

Pari ratione procedendum in Attritione, & Contusione, quoties cum ulcere complicantur; inde enim corruptio imminet in parte attrita, aut contusa, ut docet Galenus 12. meth. cap. 7. Abstinendum autem à maturantibus, seu pus moventibus, si præsertim timeatur de læsione nervi; sed loco horum adhibeantur foyentia na-

tural em partis calorem, itemque aperientia, ac dissolventia, qualia sunt balsamica superius memorata.

Minimè verò hîc præteribimus, quandoque ulcera ad cicatricem difficulter pervenire, quia ut loquitur Galenus 4. de compos. Medicam. per genera cap. 2., Sunt Cacoethica, & vitium aliquod in parte recognoscunt, ut propterea succum alibilem depravent, ac vitiosum reddant: vel etiam sunt Dysepulota, vitium ex infecto sanguine, & ab alimento partis, assiduò resumentia, ut gallica lue infectis accidit. Et quidem Cacoethici ulceris signa sunt, labia illius squalida, & arida, absque sanie, nequidem ichorosa, ex Galeno 4. meth. cap. 2.; itemque pars ulcerata, asperior, ac durior reddita. Id autem non tarò etiam accidit ab usu medicamentorum nimium exsiccantium; aut quia pars affecta sua natura, vel ex diuturna ægritudine plurimum exaruit. Dysepuloti verò signa referuntur, si remedia nihil proficiant; si ulcus semper amplificetur, ac sordescat; si ulceris labia tumida appareant; si sanies, plusquam ratio exigat, exuperet; si ulcus ingentem dolorem afferat, præsertim cum manibus contrectatur. Atque hinc in priori casu expostulantur medicamenta impinguantia, & humectantia, relata à Galeno 4. meth. cap. 2.: in posteriori verò, exsiccantia, & detergentia, quorum idem Galenus meminit 4. de compos. medicam. per genera cap. 1., ut speciatim est Alumen, Spongia, Terra Cadmia, ærugo Æris, Aqua ardens, Vitriolica, aut Aluminosa.

Regenerata carne in ulcere, præsertim cavo, omnis industria in posterum adhibeatur, ne pars ad cicatricem perducta, signata, aut maculata remaneat. Id, quod quamvis ab omnibus desideretur, à paucis tamen expleri solet. Referam proinde hîc aliqua ad delendas cicatrices, & signaturas ex vulneribus relictas, plurimum effica-

cia, Commendatur primum in hanc rem oleum ovorum, si eo diutius pars fauciata liniatur. Utuntur alii oleo ex nucleis, & corticibus persicorum per destillationem elicitum: Apud quosdam dicitur expertum oleum ex favo mellis destillatum, & præsertim ubi pili desiderantur. Ceratum ex mucilagibus, & lixivium ex cineribus salicis, & visci quercini, ac foliorum quercus, proclamatur ab aliis. At efficacius, frequentique usu magis comprobatum est decoctum ungulæ Asini pluries repetitum; itemque illius adeps, vel oleum exinde chymicè elicitum, si post ablutionem ex decocto, pars læsa sæpius liniatur. Efficacissimum quoque est hoc linimentum, quod ℞. boracis Venetæ drachm. iii. camphuræ scrup. i. fellis bovini drachm. i., olei myrrhæ drachm. ii., axungie gallinæ unc. semis m. & f. linimentum. Atque hoc aliud: Pulveris radice serpentariæ, & ireos sing. drachm. iii. seminum meliloti, & raphani, utriusq; drachm. i. testarum ovorum combustarum drachm. semis, ceræ albæ drachm. i. ÷, thuris drachm. i. sacchari candidi drachm. iii. gummi tragacanthi, aqua rosar. dissol., unc. i., axungie anseris quantum satis: m. & f. linimentum. Nigras cicatrices delet oleum, in quo radix bryoniæ albæ, & nigræ, decocta sit; itemque decoctio styracis calamitæ in vino. Similiter spuma argenti cum succo rosarum albarum lota: oleum balsaminæ, cum radice cucumeris sylvestris trita: oleum myrrhæ: chrysocolle cum camphura trita, & medulla bubula illita. Ad fuscas etiam, & varicolores cicatrices confert oleum de been albo: unguentum ex plumbo loto, & ærugine, oleo rosaceo decoctis. De succo hederæ scripsit Q. Sere-nus:

At succis hederæ pulchrescit fœda cicatrix.

Quod si adeo crassa sit cicatrix, ut adhuc supra cutim superemineat; tunc adhiben-

da erunt exedentia, sed præ cæteris tutius erit oleum sulphuris, aut chalcanti; deinde nova cicatrix inducenda cerato de cæ-russa, aut diapalma, lamina plumbea superligata. Verumtamen, stultum esse, ait Celsus lib. 5. cap. 25., ut quis, decoris causa, rursus & dolorem, & medicinam sustinere velit. Et de præsentī Capite satis.

C A P U T X.

XCIII. in Galeno.

De speciebus Morborum secundum Formationem.

T E X T U S.

(T. 59.) **N**unc verò transeundum est ad formationis genus, quod in plures secatur differentias. At ab eo, quod evidentissimum existit, exordium est sermonis faciendum, quod ex figuræ permutatione contingit. In his igitur, qui adhuc crescunt, possibile est plurimarum partium figuram emendare: in his autem, qui jam aucti sunt, minimè. Intentio verò in iis, qui curationem admittunt, ad contrarium eversionis adducere. Si verò fractione aliqua non rectè conformata alicujus membri figura fuerit vitiata, cui substantia callosa innasce prævenerit: si quidem hæc adhuc recens extiterit, perfringere oportet, ac rursus rectè conformare, deinde callum superinducere.

P A R A P H R A S I S.

Superioribus Capitibus, de Methodo, & Indicationibus curativis, pertinentibus ad Morbos intemperierum, & solutionis continuitatis, satis abundè Galenus egit;

git; in sequentibus nunc agere prosequitur de Remediis indicatis à mala Corporis, & partium conformatione; quoniam ex alibi probatis, sicut sanitas perfecta exigit naturalis Temperiei, formationis, & continuitatis syndromen; ita ex opposito morbus ex unoquoque horum trium genere vitiato illico emergit. Conformationis autem vitia plura esse possunt, eo quod plura ad organorum perfectam compositionem requiruntur, quæ commodè reducuntur ad quinque classes, seu mavis dicere species, nempe, quæ figuram, & superficiem, meatum, seu cavitatem, & orificia, magnitudinem, numerum, & situm comprehendunt: De his omnibus propterea agendum sibi proponit Galenus, facto tamen exordio à notiori, videlicet à Figuræ permutatione, quæ nostris sensibus, & præsertim visui, patentior sit.

Advertit autem primum, quod in iis, qui adhuc crescunt, possibile sit, non solum unius, sed etiam plurium partium vitiatam figuram emendare: in iis verò, qui jam aucti sunt, & adultiores redditi, haudquaquam possibile esse, subdit.

Sed & insuper animadvertit intentionem curativam ejusmodi depravatæ Figuræ adimplendam esse per adductionem partis malè figuratæ in oppositum: etenim membrum E.g. distortum, ita in oppositum adducere, extendere, extorquere, aut aliter commovere oportet, donec debitam æqualitatem, & convenientem figuram adipiscatur, atque in eadem, quoad possibile est, detineatur, & conservetur, ligaturis, fasciis, ferulis, aliisque mechanicis instrumentis, prout res exegerit, opportunè accommodatis; pari sanè ratione, ac de fracturis ossium supra meminimus.

Quod si præterea propter Chirurgorum incuriam, aut inscitiam, membrum malè conformatum, in suum naturalem situm non benè redactum sit, considerandum

monet, an ingēnitus callus recens videatur, an inveteratus, & obduratus sit; nam si recens fuerit, prius à perito Chirurgo callum infrangendum jubet, mox partem malè formatam, & non rectè repositam, aptè conformari oportere, ac deinde callum denuò superinduci debere, subdit. At verò si callus appareat inveteratus, obduratusque, quia tunc sine gravi dolore frangi nequit, nec absque convulsionis, inflammationis, vel alterius gravioris mali periculo, satius erit membri deformitatem sufferre, quàm in vitæ discrimen patientem adducere. Quo sanè factum, cur Galenus in textu, de curatione malæ figuræ, in qua callus obduruerit, nequidem verbum fecerit.

Quoniam verò malæ figuræ in conformatione partium contingunt potissimum, (exceptis his, quæ à nativitate sunt ingēnitæ) ex luxationibus; idcirco ad illarum notitiam clariorem, in suas species illas referamus.

Tres autem in universum (licet Celsus duarum solummodo meminerit, quæ veræ luxationes sunt) recensentur. Prima, cum ossa, quæ juncta erant, dehiscunt, vel, ut Celsus loquitur *lib. 8. c. 11.*, os ab osse disjunctum est: quæ luxatio cognoscitur præsertim ex eo, quia pars in sua mole major, & crassior est reddita. Secunda est, cum ossa elongantur propter molliem ligamentorum, quamvis hæc non videatur esse vera luxatio: sed tantummodo elongatio, aut delaxatio ligamentorum: dignoscitur autem, quia si os, & caro adjecta comprimantur, aut contrahantur, in suum situm restituuntur, cum cæteroqui suspensa, inordinatis motibus huc, illucque revolvantur. Tertia est, cum Caput ossis à suo sinu, & loco excidit, & hæc propriè vocatur Luxatio; & si omnino à sua sede, & adhæsu, excidat, dici solet vulgò *Dislocatio*; si verò imperfectè solum extorqueatur, aut paululum à suo

situ dimoveatur, appellatur à Barbaris *Distortura*, ab aliis Subluxatio, signa cujus sunt: Motus articulo, & membro debitus penitus amittitur: insolita eminentia, vel concavitas, quæ parti non convenit, nec antea aderat, post luxationem manifestè conspicitur: membrum ipsum contrahitur, ac brevatur, relatè ad aliud sibi correspondens, quoniam musculi ossibus alligati semper ad propria capita retrahuntur: denique membrum luxatum proportionem, & æqualitatem non servat cum alio, in statu naturali constituto, nec in mole, nec in figura, neque in situ, neque in superficie, præter dolorem, tumorem, aut etiam ruborem in parte luxata supervenientes: Hæc autem magis, minusve fiunt, pro ratione majoris, vel minoris læsionis in Articulo luxato, ut visum quoque est Paulo Æginetæ, utque etiam pro varietate causarum, sive externarum, ut sunt casus, ictus, extorsio; sive internarum, ut præsertim sunt defluxus humorum; unde variant quoque symptomata, luxationes vel comitantia, vel subsequencia.

Qua autem methodo ossa luxata curari debeant, docet Galenus *comm. 2. in Librum Hippocratis de Fracturis*: Primum enim membrum luxatum extendi debet; deinde os in proprium situm reponi, ne denuò amoveatur; tertio, fasciis circumligari; & tandem ità benè collocari, ut nequeat vitium, aut quodcunque impedimentum pati in calli generatione, aut in perfecta repositione. Quamobrem in curatione luxationum totum opus Chirurgicum exquiritur, ut propterea in his, diligentia, aut negligentia operantis satis manifestè reluceat. Verùm legantur super hoc Hippocrates, ejusque Commentator Galenus, in Libro de *Articulis, & Fracturis*, necnon Celsus, Paræus, Scultetus, & alii.

Verùm enim verò, Luxationes cætero-

qui difficillimæ curationis, fiunt sæpè numero facilè curabiles in Puerulis ob carniū teneritudinem, & ossium mollitiem: quinimmò, ut superius notavimus ex Galeno, etiamsi in tenerrima illa ætate frangantur, per primam intentionem agglutinari solent. Hinc sæpissimè observatum, pueros malè in figura, & articulatione conformatos, quacumque diligentia adhibita, in naturalem structuram fuisse redactos: ut non semel Ego vidi in his, qui, divaricatis cruribus, aut distortis tibiis, pedibus, brachiis, ob incuriam Nutricum, aliter, aliterve in tenella illa ætate vitiatis, læsi erant; quod secus adultioribus evenit. Quòd si fortè accidat, luxatum, ex mala ossis in pristinam sedem repositione, non fuisse rectè curatum, cupiatque convenientius, perfectiusque sanari, remissio in suum naturalem locum osse luxato: primum emollientibus, & laxantibus medicamentis malè figuratas partes relaxare, & emollire oportebit; mox difformatorum ossium novam luxationem inferre, ac denuò in suum naturalem situm ossa committere. Nec defuerunt, qui deformitatem Corporis sufferre nequeunt, ejusmodi cruciatibus se exposuerit. Accepi aliquandò à dignissimo fide viro, Amicum quendam, & conterraneum suum, qui de speciositate Corporis plurimum gloriabatur, cum fortè fortuna fracturam ossis Tibiæ majoris passus, & incongruenter restitutus, ejus distortionem subire nollet, dira, miraque in seipsum crudelitate sponte sua Tibiam denuò fregit, ut à perito Chirurgo iterum commissa, perfectè sanitati restitueretur, quemadmodum bono fato evenit: tantum valuit vehemens Animi pathema, ut illum impulerit evidentissimum mortis periculum subire. Ridicula etiam, & curiosa planè est historia relata à Sanctorio cujusdam Bergomensis Chirurgi, in frangendis callis ossium versatissimi, qui cum patientem quendam tibia distortum, valdè

valdè timidum conspiceret, atque adeò operationi chirurgicæ renitentem, stricto ense, illum vehementi impetu in terram dejecit, mox repentiè Tibiam fregit; deinde summa lætitia eundem osculatus, congruis remedijs, miroque artificio, fractum os reposuit, & in pristinam salutem revocavit. Sed hæc uti sunt prodigiosa, & rara Artismiracula, ita quoque difficillima, & nimium periculosa.

C A P U T XI.

XCIV. in Galeno.

De Obstructione.

T E X T U S.

(T. 60.) **E**st verò & Obstructio ex eodem genere egritudinum, quæ quidem ex lentis, & crassis humoribus fit, unam & ipsa habens intentionem morbo contrariam: dico autem apertionem. Causæ verò salubres sunt abstergentia, atque incidentia medicamina. Quæ verò fit à stercore duro, quod intersepit intestinum, primum quidem habebit duritie remedium ex humidis; pinguibusque clysteribus, demum ex acribus evacuationem exposcet. Quæ autem à lapide fit in vesica, in præsentī quidem transpositionem requirit: integræ verò sanitatis causam, incisionem, & extractionem: humiditatis autem, quæ præter naturam in parte continetur, sanatio in omni moda evacuatione consistit, quemadmodum etiam in suppuratis. Immodica autem repletio immodica evacuatione curatur, ut cum sanguis intra venas redundat. Sic & quibuscumque, vel in ventriculo, vel in intestinis, vel arteria aspera, vel pulmone, pus, aut sanguis continetur, integra evacuatio est necessaria. Superflui autem ci-

bi, aut potus; adhuc recentis assumptio ab evacuatione corrigitur. Quæcumque igitur in pulmone, vel pectore continentur, cum tussi educuntur, sed à medicaminibus extenuantibus. Quæcumque verò in hepate, vel venis, vel arteriis, vel renibus, aut per urinam, aut per ventrem. Sed per urinam quidem ab iis, quæ vehementer extenuant, per ventrem verò ab iis, quæ attrahendi, aut aperiendi ora vim habent. Quæcumque verò in superiori ventre comprehenduntur, per vomitum: quæ autem in inferiori, per subductionem. Sed quæcumque sub cute, per sectionem, vel ignem, aut per medicamina adurentia: sic verò aliquando quæcumque in aliqua naturali cavitate, ut in thorace. (T. 61.) Et ut summam dicam, quidquid præter naturam in aliquibus partibus continetur, sanationis intentio est ablatio, quæ si fieri non possit, transpositio. Quæ verò non sunt ex toto genere præter naturam, at quantitate damnantur, in his intentio est de vacuatio. At inventio eorum, quæ ad ipsorum sanationem perducunt, partim quidem ex affectu, plurimum verò ex ipsis affectis particulis sumitur.

P A R A P H R A S I S.

A Vitiis malæ conformationis in figura transit Galenus ad perquirenda remedia curativa egritudinum in mala conformatione Meatuum, seu Cavitatum Corporis. Ex his autem refert primum vitia Obstructionis, quæ contingit meatibus exiguis, aliquo humore præternaturali repletis, & infarctis. Hanc autem in exiguis meatibus Obstructionem inquit fieri à lentis, & crassis humoribus. Et quamvis alibi, præsertim verò 1. de differ. febrium, & 9. meth. c. 1. & 3. de tuenda valetud. cap. 10. Obstructionem fieri dixerit, vel à crassis, & glutinosis succis, vel etiam à copiosis humoribus; unde cit. lib. de differ. febrium, etiam à sanguine, & bile

bile obstructionem fieri posse confitetur. Nihilominus, quia frequentius crassi humores obstruunt, rarius verò multi, quibus nec tam facile Corpus scatere solet; idcirco omisit hoc loco eam, quæ à multis, & copiosis humoribus gigni potest, veluti rarissimam; cum cæteroqui methodus Definitiva per frequentiora, & summaria Capita divagetur. Adde quòd inferius etiam mentio fiet de altera specie obstructionis, quæ à multitudine humorum provenit.

Ceterum crassi, lentique humores promptissime obstructionem inferunt, quoniam sua crassitie facile adhærescunt, & consistunt, præsertim cum meatus angusti sunt, ut præ angustia humores inibi contenti fluitare nequeant. Hinc subdit idem Galenus in textu, unicam, & communem intentionem, seu indicationem curativam in tollendis obstructionibus esse aperitionem, atque adeò usum medicamentorum deobstruentium, qualia sunt omnia incidentia, & abstergentia, & consequenter attenuantia, & aperientia. Antiquis in hanc rem erant in usu mel rosaceum, oxymel, rhodomel, hiera, syrupus de tribus, & quinque radicibus, de capillis Veneris, & hujus generis alia. Sed nostris temporibus ampla remediorum sylva rei Medicæ accessit ad aperiendum, attenuandum, incidendum, deobstruendumque, valde conferentium. Præprimis autem sunt, quæcumque ex Tartaro sunt composita, itemque ex chalybe, & salibus plantarum, potissimum absynthii, centaurei, tamaricis, &c. quæque lixivialia, & fixa dicuntur. Succedunt his omnia aloetica, & amaricantia; similiterque salita, acria, & quæ à Medicis calida, seu calorifica appellantur. Ex pluribus autem deobstruentium, & aperientium Medicamentorum formulis, aliquas hic Nos selegimus usui magis accommodas, magisque compertas. Et quidem pilulæ Tartareæ,

seu Melanagogæ dictæ plurimè fiunt à Quercetano, qui in illarum commendationem inquit; Virtutem earum nunquam satis laudari posse. Verum quia ipsarum descriptio longa satis est, & peritissimam Pharmacopolæ manum exigit, idcirco in earum locum subrogari possunt Pilulæ tartareæ Bontii, quæ recipiunt: *Aloes socotrinae electæ drachmas tres, gummi ammoniaci cum aceto scyllitico dissoluti, & depurati, unc. i. ÷, tartari vitriolati scrup. ÷*: fiat secundum artem massa. Dosis à *scrup. i. ad drachm. i.* manè: sumi etiam possunt ante cœnam *ad scrup. semis*, sed iteratò, & per vices, ad conservandam alvum lubricam. Tantæ sunt apud Hollandos æstimationis, inquit Schræderus, ut piaculum habeant publicas, & communes eas facere. Aliam Pilularum tartarearum descriptionem affert idem Schræderus, quæ efficacissimæ quoque sunt, non solum ad deobstruendum, verum etiam ad repurgandum imum ventrem à tartareis, & mucosis humoribus, & ità se habent. *℞. Aloes lucidæ cum succo fragorum lotæ unc. i. resinæ ammoniaci drachm. iv. salis Martis dulcific. & essentia Croci an. drachm. i. magisterii tartari drachm. ii. extracti gentianæ, cum tinctura tartari eliciti, quantum satis. M. & fiat massa*, Dosis *drachm. semis* ante cœnam. Non minoris efficacis est pulvis hic tartareus compositus ex *unc. i. foliorum sennæ, & ex drachma una seminum anisorum, & altera feniculi, scrup. ii. Cinnamomi, drachm. vi. crystalli tartari, & sacchari ad sufficientiam*. Cujus dosis à *drachm. i. ad ii.* in jure, vel vino albo. Omitto hic Tartarum vitriolatum ritè præparatum, sive solitarie sumptum, sive permistum cum electuariis congruentibus; itemque pulverem Cachecticum Quercetani admirandarum virium in omnibus affectibus imi ventris cum obstructione, & crassorum humorum farragine; nec non salern Tartari, ac

Tincturam ejusdem, & Chalybis, atque alia hujus generis innumera, quæ in dies à Prædicantibus exhiberi solent in omnibus obstructionibus Jecoris, Lienis, Uteri, Mesenterii, &c. cum jam notissima sint.

De loco autem, ubi istiusmodi obstructiones contingant, dubitari non incongruè potest. Galenus eas communes inquit esse omnibus meatibus angustis, quos alibi exponit esse, Venas potissimum, non solum Mesaraicas dictas, verum etiam quascunque Capillares, seu quæ in poros partium desinunt. Verum, cum ex detecta sanguinis circulatione jam satis constet, eum in partes meare per arterias, atque ex his deinde in venas traduci: potius dicendum obstructiones accidere in apicibus arteriarum, aut in ipsis poris partium; quoniam sanguis semel venas ingressus, ex angusto in latiore locum transfertur, nec denuò per easdem vias redire potest, impredientibus valvulis per venarum longitudinem dispositis; nisi tamen inter valvulam, & valvulam remoram patiat, aut vitio sui, aut earumdem valvularum laxitate, ut in Varicibus. Sed & in apicibus arteriarum quandoque restagnans sanguis febres parit, & quidem acutas, ac continuas, tamdiù duraturas, quamdiù concrevens sanguis ibidem perstiterit: eo autem dissoluto, & vel per cutim, ac sudorem, aut per vias urinæ repurgato, desinit febris. Atque hinc fortasse motus Galenus 2. de differ. febrium, Tertianas continuas existimavit ab humoribus intra venas minores putrescentibus pendere: melius sanè dixisset, intra arterias minores, seu arteriarum capillamenta.

At verò, quamvis obstructiones plerumque fiant in Arteriarum apicibus, atque in meatibus angustioribus Corporis, quandoque tamen observatæ illæ etiam sunt in ductibus amplioribus. Refert namque Theodorus Kerckringius in suo *Spici-*

legio Anatomico, se aliquando observasse coagulatum sanguinem polypum imitantem in ramo venæ cavæ, auriculam dexteram Cordis pertingente. Memini me etiam simile quid vidisse in cadavere cujusdam tabe gallica extincti, in ramo venæ cavæ ascendentis, & in Arteria pulmonica, seu vena arteriosa dicta: sed & chylum, seu materiam glutinosam concretam, ibidem hæere posse, & pseudopolypum referre in Asthmaticis, & pectore Hydropticis; probabile admodum est, cum in his partes spirituales multum langueant, pulsus intercidant, & animi defectus sæpe sæpius accendant. Atqui in dextro, sinistroque Cordis ventriculo concrevere sanguinem, potissimum ex violenta morte defunctis, passim alii meminere, quamvis id ab impedito motu sanguinis, & Cordis, evenerit ex strangulatu. Sic & tophos, lapides, vermes, tubercula, aliaque his similia in venis, & arteriis genita, cystifellea, ductu pancreatico, cæterisque meatibus Jecoris, Lienis, Cerebri, Mesenterii, Renum, aliorumque viscerum non semel inventa testantur, Schenckius, Bartholinus, aliique plures, quos Bonetus, & Ephemeridum Germanicarum Collectores, retulere; ut jam novum non sit, hæc veluti nova rememorare.

Attamen prætereundum non est, quòd plerumque obstructiones Jecori à nonnullis attributæ, revera debentur glandulis Mesenterii, aut Pancreatis, in quibus facilius humores stagnare, & concrevere solent; Unde Fernelius, plurimarum ægritudinum occultas causas inde proficisci, non irrationabiliter est arbitratus.

Pari ratione suspicari quoque licet de Obstructionibus vasorum lymphicorum, per quæ continuò limpidus quidam humor excurrit: quin crediderim non rarò febres, aliasque graves ægritudines ab ejusmodi restagnante lymphâ exoriri; unde

Cor-

Corporis refrigerationes, inæquales horripilationes, faciles, promptique sudores, statim à principio, præsertim circa caput, pectus, & cervicem, tubercula cutanea, faucium inflammationes, aliæque similia exoriuntur, quæ non raro etiam fluxionum, catarrhorum, & lassitudinum conditionem mentiuntur, ac Medicos decipiunt sub specie febrium catarrhalium, cum tamen pessimæ deinde fiant, & sæpe sæpius per disruptos abscessus internos, cum eventu lethali ægrotantium, se manifestent, vel etiam in sudores diaphoreticos dictos desinant, ex gangrænismo scilicet glandularum Mesenterii, aliæve adjacentis visceris: id quod urinæ plerumque testari solent, quæ prius inculpatæ videntur, mox turbidæ, crasseque, & flavescere sedimento saturæ conspiciuntur, in necem; & ubi primum febres videbantur leves, & minus periculosæ, mox à noctu successivè ingravescentes, in repetitionibus subintrantes, sensim, occultèque continuæ evadunt, non sine aliqua capitis læsione. Atque hinc, quoties sudor promotus impeditur, aut à frigore externo in ipso habitu Corporis cohibetur, juxta cutim concrevit lymphæ, & vitatur, atque venenatam ferè conditionem adipiscitur. Sed & glandulæ, quæ innumerae, licet exiguæ, sub cutim dispersæ manent, lymphicum humorem resorbentes, tumescunt, potissimum verò in collo, faucibus, & ad linguæ radicem: quo circa frictiones, focus calidi, victus attenuans, & similia plurimum in his conferre consueverunt. Ab hac insuper lymphæ vitata, atque ab obstructione lymphicorum ductuum, & glandularum subcutanearum tumefactione, pendere quoque credendum est febres illas, quas Elodes Græci vocarunt, & Nos sudatorias dicere solemus, quoniam per universa tempora accessionum ægros ad sudandum commovent, ac disponunt, sed absque ullo

beneficio. Ab obstructione præterea vasorum lymphaticorum, præsertim in hepate, pulmone, liene, renibus, subcenturiatis glandibus, cerebro, aliisque visceribus glandulosis, hydropes oriri nuperrimæ Anatomicorum observationes detexerunt; unde hydatides, seu vesiculæ aqua repletæ in prædictis visceribus inventæ sunt, ut notavit etiam Galenus.

De obstructione Nervorum postremo nullus dubitat. Siquidem à Cerebro, assiduò nervis, eorumque substantiæ medullari suggeritur succus quidam albicans, fluidus, roridus, ac nerveus dictus, quo partes corporis nutriri existimant Anglici cum illorum duce Vvarthono. Is autem si fortasse ab obstructione remoram patiatur, vel etiam vitio sui, aut Cerebri, consistentior evadat, gravia mala subjectis organis contingunt, ut Paralyces, Catalepses, Cæcitas, Surditas, pro varia subjectarum partium offensione.

Obstructioni opposita est viarum laxitas, ex qua neque id, quod naturale est visceri, commodè retineri, nequecrementa corporis convenienter, debitoque tempore repurgari contingit, sed sponte sua defluunt, atque huc, illucque deponuntur. Sic ex relaxatis intestinorum fibris, defluit quandoque chylus, à suis impuritatibus non secretus. Ex venis, aut arteriis Mesenterii, Jecoris, aut Lienis profluit sanguis, ut in fluxu hepatico dicto, & in fluore hæmorrhoidum continuato, & similibus. Evenit autem ejusmodi laxitas viarum, vel à languida viscerum textura, ac fibrarum laxitudine, vel à sanguinis, fortasse serosioris, fluidiorisque redditus, flacciditate; vel etiam à relaxatione valvularum, quibus ferè cuncti ductus corporis in suis extremitatibus muniuntur, cum scilicet à mala ejusdem sanguinis habitudine delaxantur, vel etiam proritantur, & eroduntur. At quamvis causæ istæ laxitatis

mea-

meatuum frequentiores esse soleant, non raro tamen accidit, immodicas egestionem haberi, tam utilem, quam inutilem humorum, adhuc ab obstructione: quod sane quibusdam videbitur Paradoxum. Verum qui structuram Corporis, & meatum illius bene norit, facile dijudicabit posse ejusmodi evacuationes immoderatas nonnunquam ab obstructione pendere, cum videlicet ductus, per quos humores meare debent, obstructi fuerint, nequeantque illos admittere, & in suis cavitatibus excipere; unde postmodum sponte sua per alios ampliores ductus defluant, & egerantur. Ita quidem sapientissime experimur in lactearum venarum obstructionibus, feces nimium lubriciores, copiosioresque vacuari, quæ deinde, non adstringentibus, sed deobstruentibus medicamentis desinunt. Quamobrem novi plurimos hisce ægitudinibus affectos brevi fuisse sanatos usu chalybeatorum, & deobstruentium medicamentorum: quod & passim quoque compertum in sceminis cachecticis, menstruorum fluxui obnoxiiis, quæ vino chalybeato, aliove simili ex chalybe composito medicamento, revalescunt. Non dissimili ratione curatos aliquando vidi Tabidos usu vini chalybeati, vel etiam salis Martis, ejusve essentiae, aut tincturæ, sicut pariter à roborantibus, sed dissolventibus simul, quia Tabes originem habebat à fermentis, seu succis coagulatis, vel à concreto, acidoque sanguine, in extremis arteriis stagnante, quo neque alimentum partibus accedere poterat, neque sanguis præ acore idoneus erat nutritioni: chalybeata autem medicamenta utrumque vitium emendarunt. Tanta autem est pernicies coagulatorum, ut non abs re existimaverint Methodici morbos omnes ad adstrictum, & laxum revocare; ut per morborum genera vaganti perspectum esse potest. Non tamen hinc negaverim quandoque etiam chalybeata con-

ferre fluoribus intestinorum, cum acidum exorbitans absorbent, & corrigunt: compertum enim est majori ex parte ejusmodi fluores oriri ab acido abundanti, ac exaltato in pancreate, ejusque ductu, nec convenienter coercito à succu felleo, indeque communicato sanguini, aut liquoribus cum sanguine consentientibus, vel ab eodem derivantibus; ut proinde mirum non sit, si in his affectibus plurimum usus chalybis conferat ut & absorbentium, atque acidum temperantium medicamentorum. Sicut ex chalybe, ita ex ære, & multo magis ex auro, eadem beneficia proficisci posse crediderim, ope magis, minusve depurati sulphuris, quod in se continent, suo sale correctis; atque hac planè ratione liquores ex auro elicitos quibusdam profuisse, putandum, salva venditantium impostura.

Quoniam obstructio fieri quoque potest in ductibus Corporis latioribus, propterea in hujus exemplum tradit Galenus in textu, eam, quæ à stercore duro fit in intestinis. Accidit enim non raro intestina, & præsertim Colon, aut Ileum, à retentis fecibus obstrui, tumefieri, & dolere; unde non solum Alvi stypticitas, & cavitatis obstructa sequitur, sed etiam (quod gravius) colicus dolor acutissimus, & quandoque etiam egestio fecum per os, ut in Volvulo. Duo verò subdit Galenus in hac obstructione, & fecum retentione indicari: alterum quidem, quod pertinet ad duritiem emolliendam; alterum verò ad alvum sollicitandam. Primum expletur per clysteria humectantia, laxantia, & pingua: Secundum, per acria. Humectant autem, & laxant decocta, & juscula ex herbis emollientibus, ut sunt malva, althæa, mercurialis, beta, viola, &c. nec non butyrum, oleum, adipēs animalium, oleum amygdalarum dulcium, liliolorum alborum, chamæmeli. Stimulant verò, & sua acritudine irritant intestina, hiera

hiera-picra, colocynthis, fenna, urina, vinum, sal, saccharum rubrum, diaphœnicon, benedicta laxativa, &c. Verùm in his cautiùs agendum est, ne plus justo lacerata intestina, potiùs per òs egerant, quàm per alvum; vel etià ab irritamento, majori fortasse dolore excitato, phlogosin, aut inflammationem subeant: Sed & aliquandò observatum valvulam intestini Coli ab acribus, & irritantibus medicamentis erosam fuisse.

Inter Obstructiones latiorum ductuum, ponitur à Galeno ea, quæ in Vesica à lapide fit; & hujus, inquit, curationem duplicem indicare: & quidem, cum lapis in Vesica contentus impedit urinæ exitum, quia meatum urinarium occludit, expostulatur transpositio, & remotio lapidis ab eodem meatu, quæ fieri solet usu Catheteris, candelæ cereæ, specilli, vel alterius similis instrumenti. Si verò integra curatio, per ejus ablationem, desideratur, necessaria erit excisio Vesicæ, & lapidis extractio. Inciditur autem Vesica, vulnere facto inter Testes, & Anum, deinde cum forcipe denticulata extrahitur lapis. Verùm ad hoc exequendum maxima diligentia, & peritia Lithotomi exquiritur, ne scilicet ad Vesicæ sectionem, & lapidis extractionem sequatur hæmorrhagia, inflammatio, & gangræna, quam deinde inevitabiliter mors excipit. Quod si lapis in Vesica contentus exiguus sit, poterit sine incisione extrahi, ope cujusdam instrumenti tribus limis compositi, ut non semel in praxi à peritis Chirurgis peractum vidi.

Quantùm autem in his diligentia Lithotomorum excreverit, mirum: cum jam citra ullum vitæ periculum, & felici cum successu Vesicam dissecant, ac lapides extrahant; etsi Hippocrates in suo *Jure jurando* spononderit se nunquàm vesicam incisurum, quoniam sectio hæc valde periculosa, & sæpius lethalis tunc

temporis fortasse erat. Sed & nunc plurima quoque medicamenta lapidem frangentia inventa sunt, ex saxifragia, ononide, fragaria, ligno Indico, herba turcica, & thee, cum cinere scorpionum, millepedum, leporis usti, pulvere lapidis judaici, sanguinis hircini, nitri fixi, salis ammoniaci, vitrioli Romani, spiritu nitri dulcificato, balsamo salis, aliisque innumeris, quorum Practici meminere. Non possum autem non hic animadvertere in eos, qui in affectibus renum, & vesicæ statim ab initio diuretica exhibent, & indiscriminatim cujuscunque generis acetosa, succum limonii, spiritum vitrioli, salis, & similia, putantes ab his arenulas, & tartareos succos, ac lapillos ipsos comminui, commodeque repurgari, decepti ex eo, quòd ab illorum usu urinam sabulo, & arenulis scatentem aliàs prodire viderint. At plerumque acida istiusmodi crudos succos in ventriculo, vel in ductibus intestinalium, & mesenterii contentos, deferunt in renes, & vesicam, atque actione cum illis inita, in arenulas, & calculos permutant, nisi etiam ipsorum tubulos infarciant, & oppleant. Cautè igitur in horum exhibitione procedendum, & ubi venter crudis succis abundat, ejusque ductus infarcti creduntur, ab illis abstinendum. Poterunt verò solùm propinari, repurgato prius ventriculo per vomitum, atque exoneratis intestinis per clysteres, ita ut renes mox promptè pertingant, eorumque tubulos obstructos depleant, ac exonerent, citrà alterius novi humoris depositionem. Atque hinc nunc patet, qua ratione acida aliquando dissolvant, & quandoque etiam coagulent, aut una simul humores quosdam diluant, & alios concretos, & consistentes reddant.

Obiter etiam hic adnotare juvabit, opiata, & narcotica medicamenta plurimum

rimùm aliquando conferre calculosis. Con-
fopita quippe Natura, atque usu opia-
torum, dolore levata, ductus, & fibræ
Plenum, quæ præ dolore tendebantur,
sensim laxantur, atque ita deponunt,
quod ipsorum cavitatibus continetur. Sic
in atrocissimo Renum dolore à calculo,
pluries vidimus ab usu laudani opiatu mo-
derato, inducto sensim somno, non so-
lùm dolorem desisse, verùm etiam pau-
lò post calculum fuisse excretum. Con-
sulerem propterea in his casibus permi-
scere semper cum diureticis, vel lithon-
tripticis, leviora saltem opia, philo-
nium, tripheram, theriacam recentem,
& similia, dositamen moderata; ne plus
debito soporem inferant: qua in re maxi-
ma Medici prudentia expostulatur.

Humiditatis autem, subdit in textu Ga-
lenus, *quæ præter naturam in parte con-*
tinetur (idest in aliqua Corporis cavitate)
sanatio in perfecta, & omnimoda evacua-
tione consistit; quemadmodum etiam suppu-
ratis. Quibus verbis tradit aliud exem-
plum obstructionis in meatibus amplio-
ribus, præsertim verò Thoracis, cum à
pure in Empyematicis oppletur; cujus
curativa indicatio in omnimoda illius e-
vacuatione consistit. Debet enim pus non
solum educi, sed etiam omninò repur-
gari; tum quia res est, ut ajunt, toto
genere præter naturam; tum quia nisi
ex toto evacuetur, semper verendum,
ne à diutina illius mora, tandem pulmo-
nis substantia lædatur, & ob sanguinis
infectionem, Tabes, & Mors postmo-
dum subsequatur.

Neque verò de suppuratis solum pro-
priè dictis intelligendus est hoc loco Ga-
lenus, verùm etiam de quocumque mo-
do, pectore, & pulmone gravatis, quo-
niam in utroque casu fit in pectore hu-
moris repletio, de qua Galeni mens est
hic sermonem habere; unde sub his
verbis, & Tussis humida comprehendi-

tur, & destillatio, & abscessus, & quid-
quid in pectus delabens, illius cavum
opplet, & aggravat.

Quamvis autem Galenus dicat in his,
omnimodam, ac perfectam evacuatio-
nem esse necessariam, non tamen illa u-
nica vice tota simul promovenda est,
docente Hippocrate 6. *aphorism.* 27. *Qui-*
cumque Empyæ, aut Hydropici uruntur,
aut secantur, si pus, aut aqua affatim e-
xeat, omninò moriuntur. Itaque per vi-
ces facienda, ut facilius illa toleretur.

Quomodo prætereà puris ex pectore
omnimoda evacuatio tentanda sit, ab eo-
dem Hippocrate ibidem, & alibi, in-
sinuatur, per sectionem scilicet, vel u-
stionem; adeoque per Paracentesin, quem-
admodum sunt exequuti Aetius, Ægi-
neta, alique tum Græci, tum Arabes,
tum Latini. Ex his autem nonnulli vo-
lunt sectionem faciendam esse inter co-
stam, & costam, in ipsis musculis inter-
costalibus; alii verò inurendam caustico,
aut ferro candenti terebrandam esse co-
stam, malunt, ut evitetur sectio mu-
sculorum simul, cum sectione venarum,
arteriarum, & nervorum: (a) Verùm no-
stris temporibus utrumque jam exolevit,
propter Chirurgorum imperitiam, aut
timiditatem.

Neque solum antiquitus fieri consuevit
sectio, aut inustio in pectore, sed etiam
in regione Jecoris, cum illud inflam-
matum in suppurationem desisset, ut de-
ducitur ex eodem Hippocrate 7. *aphorism.*
46. *Quibus purulentum Jecur aduritur, si*
purum pus effluat, & album, salvi fiunt;
si verò subcruentum, feculentum, ac fæ-
tidum, pereunt.

At quoniam ejusmodi sectiones, aut
inustiones vix, aut numquam, à Chi-
rur-

(a) V. nostram Praxim C. de Empyem.

rurgis nostrò tempore tentari solent, propterea per alias vias puris evacuatio procuranda erit. Ex pluribus autem ductibus, per quos videtur illa posse promoveri, putà per secessum, per urinam, per vomitum, per sudorem, per tussim, nulla tamen tutior, ac utilior ea est, quæ tussi, & anacatharsi peragitur.

Per alvum enim, vel impossibilis est, quia nullus ductus patet ex pectore ad intestina; vel lethalis fit, dicente Hippocrate in *Coacis prænotionibus*: *Empyicis à pulmone pus duci per alvum lethale*: & 6. *aphorism.* 16. *Pleuritide, aut Peripneumonia detento, diarrhœa superveniens, malum*: quoniam oportet purulentam materiam per pulmones ad cor transvahi, & deinde ex arteriis, ob celerem sanguinis circuitum in universum ferè Corpus diffundi, priusquam per intestina exactè deponatur, egeraturque.

Per urinam, licèt testetur Galenus 6. *de loc. affect.* cap. 4. posse aliquando pus in pulmone, vel thorace collectum, per urinæ vias expurgari; id tamen difficillimum, & rarissimum sanè est, vix in praxi observabile: neque viæ, per quas puris transmigratio è pectore in renes fieri creditur, hætenus patuere, tametsi Anatomici multa commententur, vel per venam Azygon, consentientem cum vena cava, ut vult Falloppius; vel per venas Septi transversæ cum venis emulgentibus communicantes, ut opinatur Bartholomæus Eustachius; vel per arteriam venosam, sinistrumque Cordis ventrem ad arterias emulgentes, ut verisimilius putatum à Galeno, ex mente Dioclis: semper etenim magna incommoda inde sequerentur in pulmone, corde, & universo sanguine arterioso, ex transitu purulentæ materiæ ad Renes usque. Non negaverim tamen quandoque portenta hæc in Natura videri, cum ex Galeno 7. *aphor. comm.* 54. juxta sententiam Hippocratis re-

feratur: *Validam, ac fortem Naturam invenire sibi, parareque vias, per quas se ipsam ab impuritatibus exoneret*. Certè mille alii ductus in Corpore sunt nobis inconspicui, quamquam plurimos Recentiorum Anatomicorum solertia nuperimè detexerit, Antiquis penitus ignotos, & fortasse alios Posteritas inveniet, qui nos hucusque latent. Hinc meritò idem Galenus 1. *meth. cap.* 3. totum Corpus dixit esse transpirabile, & conflubile, quia quaquaversum humores fluere, ac repurgari possunt.

Per vomitum etiam fatetur Sylvius Deleboe Empyematicos sanatos, assumpto vomitorio ex rebus antimonialibus: & Rulandus gloriatur usu cujusdam *Aquæ* à seipso *benedictæ* appellatæ, quamcumque ægritudinem pectoris, præsertim Pleuritidem, & Empyema, felicissimè curasse; quod pariter testantur Hartmannus, Rolfinchius, Gruillingius, Hofmannus, & alii. At quis unquam, nostra præsertim ætate, ejusmodi remedii genus tentare ausit? cum dicat Hippocrates 4. *aphor.* 8. *Tabidos per superiora purgari non debere*.

Per sudorem denique, licèt multæ pectoris ægritudines sanentur, ut de Pleuritide, & Pulmonia refert Quercetanus, & Nos non semel experti sumus: crassities tamen, & densitas puris haud poros cutis subire solet, ut sudore tandem dissolvatur, impredientibus etiam magna ex parte pleura, quæ membrana est densa, ac dura, nec non musculis intercostalibus internis, & externis, cum panniculo carnosio, & adipe.

Quamobrèm reliquum est, ut promptior, ac facilior exitus puri non aliter pateat, quam per tussim, & anacatharsim; cum per eam Diaphragma contrahatur, pectus universum concutiatur, pulmo exagitetur, & Natura ipsa extremos conatus adhibeat, ad puris expulsionem, per

per asperæ arteriæ trachæolas; quamvis hoc neque sine magno discrimine perfolvatur, tum ex violento, & continuato motu thoracis per tussim, tum ex transitu puris per pulmonem, ejusque mora diuturna in cavo pectoris, tum ex facili infectione sanguinis circulantis.

Verùm quo pacto pus in Thorace collectum pulmonem pervadat, & per Tracheam expurgetur, inquisitione dignum est. Sunt qui suspicantur, pulmones sua raritate instar spongiæ imbibere purulenta materia, eamque deinde per tussim repurgare. Sed nupera observatione Malpighius, & cum eo Bartholinus, detexit substantiam pulmonis esse constructam innumeris vesiculis sinuosis, & orbicularibus, ad similitudinem alveolorum in favis Apum; atque ante hos notavit Harveyus in suis *Exercitationibus de Generatione Animalium*, trachæolas asperas per Pulmonis substantiam extensas, illius superficiem undequaque pervadere, quod in Avibus manifestè observare licet; quin Helmontius etiam pulmones constituit recta pervios esse, & aerem in cavum pectoris protrudere; unde pectore vulneratis, citra pulmonis læsionem, accidat, aerem internum efflari, & externum intra pectoris capacitatem per vulnus admitti.

Quocumque autem pacto se res habeat, probabiliter conjectamus, pus in cavitate pectoris collectum per pulmonum vesiculas, ex ipsius puris contactu præternaturaliter hiantes, recipi, ac per tussim expurgari: quoties verò ductus isti opplentur, vel vesiculæ contabescunt, quia impeditur transitus Aeris, & pus excipi à pulmonibus nequit, difficultas spirandi cum stertore, & raucedine, sequitur, pureque retento gravatur thorax, & suffocatur animal.

Sicut de retentione Puris in pectore dictum, quod omnimodam evacuationem expostulare docuit Galenus; ità de reli-

Tom. V.

quarum cavitatum repletionibus agendum insinuat; unde inquit: *Sic & quibuscunque vel in Ventriculo, vel in Intestinis, vel aspera Arteria, vel Pulmone, pus, aut sanguis continetur, integra evacuatio est necessaria*. Sanguis enim in his cavitatibus restagnans, concrevit primùm, & in grumos abit, deinde corrumpitur, & vertitur in pus; unde postmodum emergunt damna gravissima, Conjungit autem cum pure sanguinem Galenus, quia non minoris nocimenti sanguis est, cum extrà propria vasa remoratur, quàm pus ipsū sit: is namque per moram corrumpitur, & corruptio optimi pessima fit; quare non magis pus, quàm sanguis extrà vasa, constituere dicitur symptoma toto genere præter naturam, sive in excretis, sive in retentis vitiatis.

Subdit similiter, superflui cibi, aut potus, adhuc recentis, assumptio, à devacuatione, (al. *abvacuatione*) corrigitur. Ubi tria advertenda occurrunt: primùm quòd superfluous cibus, aut potus evacuatione opus habet, non verò conveniens, & moderatus; qui sicut exigitur à Natura pro sui conservatione, ità quoque retineri omninò debet, non evacuari. Secundum, quòd tunc cibus superfluous evacuari debet, cum recens assumptus est, quia tunc promptè per vomitum egeritur, secus verò cum plures horæ præterierint, nisi tamen præ nimio languore Ventriculi digerere nequeuntis, adhuc in ejus cavo permaneat; nam aliter si longum tempus transactum sit, & vasa lactea, seu chyli-fera jam subierit; non amplius vomitioni locus erit. Tertium, quòd Galenus superfluum cibum, aut potum, inquit à devacuatione corrigi, idest diminuta, seu moderata evacuatione, non verò integra, & omnimoda, prout de pure superius dixerat. Cibus enim in ventriculo receptus, est res naturalis, & solùm quantitate immodica nocuus evadit; at verò pus sua na-

M tura

tura omninò præternaturale est, sive modicum, sive immodicum fuerit; quare omnimoda evacuatione eget: at cibus sola diminutione, quanta satis est ad moderandum, corrigendumque superfluitatis excessum.

Quoniam insuper superius dixerat humores contentos in cavitatibus corporis esse omninò evacuandos, sequentibus textibus modum docet promovendę ejuscemodi evacuationis, & medicamentorum id exequentium genera. Et primùm, quæcumque in pectore, vel pulmone continentur, cum tussi, inquit, educi, & per medicamenta extenuantia. Ubi signanter advertendum, proponi hìc à Galeno in morbis pectoris extenuantia: quare longè admodum ab illius mente recedunt, qui in his ægritudinibus, incrassantia, & impinguantia exhibent.

Secundò docet, quòd quæcumque in Hepate, vel venis, vel arteriis, vel Renibus continentur, aut per urinam, aut per ventrem excerni debeant: per urinam quidem ab his, quæ vehementer extenuant; per ventrem verò ab his, *quæ attrahendi, aut aperiendi ora vim habent*, græcè Anastomotica dicta. In eadem ferè sententiam incidit, quòd ab eodem edocetur 13. *meth. cap. 15.*, ubi simam, seu concavam lecoris partem per alvum; gibbam verò per ea, quæ modicè urinam movent, purgandam esse consulit. Medicamenta autem urinam moventia inquit debere esse vehementer extenuantia, tum quia hæc aperiunt, incidunt, & per vias urinæ promptius ducunt; tum etiam quia obstructions, ex superius dictis, à crassis humoribus dependent, ideoque incidentia, & vehementer extenuantia expostulant. At verò per ventrem evacuantia oportere esse docet, *quæ attrahendi, aut aperiendi ora venarum vim habent*. Ex quibus verbis, quid sibi voluerit Galenus intelligendum, addubitant Expositores. Verùm si meminerimus eorum,

quæ alibi idem Galenus edocuit, præsertim autem in libris *de naturalibus facultatibus*, & *de simplicium medicamentorum facultatibus*, ubi ex professo pluries repetit medicamenta purgantia trahere humores sibi similes, puta Rhabarbarum bilem, Agaricum pituitam, Sennam melancholicam, & alia hujusmodi; pariratione, ac Magnes ferrum, & Electrum paleas rapit, facile intelligemus ea, quæ attrahendi vim habent, electiva medicamenta voluisse indicare, sive quæ similitudine substantiæ, aut à proprietate, peculiare sibi humores attrahere dicuntur. (a) Id autem num veritati consonum sit, aliàs à Nobis est ostensum; præterquamquòd jam unicuique perspectum puto, attractiones hujusmodi nullas esse. Quid insuper intelligat per ea, quæ vim habent aperiendi ora, seu (ut in Græco Codice scribitur) Anastomotica, dubitare etiam contingit. Aliqui exponunt acria, & erodentia: Nonnulli quocumque modo aperiencia, sive sint purgantia medicamenta, sive cucurbitulæ, sive venarum aperiencies, suctionesque per hirudines: Argenterius, quæ obstructas venas aperiunt: Sanctorius solùm præparantia, juxtà illud Hippocratis 2. *aphorism. Corpora cum quispiam purgare voluerit, oportet fluida facere*. Sed melius dicendum, per Anastomotica intelligi hìc à Galeno purgantia vehementiora, quæ scilicet indiscriminatim quoscumque humores educere valent, sanguinem liquando, & ora venarum, aut arteriarum referando, propter nimiam illorum irritationem: cujus generis sunt, colocynthis, scammonium, elaterium, helleborus, & similia, quæ parum, vel nihil recedunt à conditione venenorum erodentium; unde ab his sæpè apius sequi solent diarrhœæ irrestantibiles.

(a) Meminit etiam hujus attractionis cap. 95. *istius operis*.

biles, dysenteriae, cholerae, &c. eo quod præter glutinamenta à viscosis humoribus inducta in orificiis meatuum, & in glandulis ibidem sitis, ab obstructione, abradant non rarò etiam villosam illam crustam intestinorum, ex glandulis simul una, mutuòque connexis, naturaliter ingentam, & pro eorumdem tutamine superficietenus appositam. Quare, quæ attenuando, incidendo, ac detergendo lentos, crassosque humores potenter evacuant, Anastomotica medicamenta dicuntur. Sed & ab usu immodico Aloes impræparatae, Venarum, aut Arteriarum ora adaperiri quoque compertum est, indeque hæmorroidas excitari, & immoderatè fluere, cunctis patet; ut & in Coxendicum doloribus, & Ischiade, ex injectis acris clysteriis, cruentos, & mucosos humores educentibus.

Docet tertio, quod quaecumque in superiori ventre continentur, per vomitum educenda sint; quæ verò in inferiori, per subductionem. Pro ventre autem superiori intelligit hic Galenus, Ventriculum, & alia viscera in regione Epigastrica contenta; Pro ventre verò inferiori, intestina, & reliqua contenta in regione Hypogastrica. Humores itaque stagnantes in ventriculo, & visceribus adjunctis, per vomitum educere magis expedit; è reliquis verò visceribus inferioribus, mesenterio, intestinis, promptius per alvi subductionem; & ratio esse potest, quia per eos ductus fieri debet evacuatio, per quos citius, tutius, & jucundius humores educi possunt: modò per vomitum citius, & facilius educuntur, qui Ventriculi cavum occupant; sicut per secessum, qui continentur in Intestinis, & Mesenterio. Neque verò Galenus ait, humores contentos in intestinis medicamento purgante evacuos esse, sed solum per subductionem educendos: subductio autem potius ope clysterum, quam medicamentorum purgan-

tium exercetur. Debent prætereà subduendi humores ita in intestinis residere, ut obstructionem, & cavitatis repletionem faciant, uti superius de facibus obduratis, & diutius retentis, dicebamus.

Quartò docet, sub cute contenta per sectionem, vel ignem, aut per medicamentata adurentia evacuari debere. Sub cute contenta intelligenda sunt, non solum humores in glandulis cutis coacervati, verum etiam abscessus, tumores, gangrenæ, &c. quæ aliquandò sectione, aliquandò ustione, vel igne actuali, vel causticis, aperiri debent, ut exinde peccans materia egredi, & convenienter repurgari possit.

Sed cur Galenus omisit attenuantia, & resolventia tamquam tutiora, proposuit verò caustica, & alia chirurgica præsidia vehementiora? Ratio est, quia cum hic ageret de obstructionibus harum partium, & obstructiones ex supradictis plerumque fiunt à crassis, tenacibusque succis, qui vix solventibus, & attenuantibus cedere solent; propterea illis omissis, solum meminit aperientium, & causticorum. Hinc in his semper expostulatur opera Chirurgi per sectiones cum lanceola, & per ustiones cum ferro candenti, vel causticis.

Postremò revocans in epitomen omnes, & quascumque obstructionum species in quacumque parte Corporis factas, docet, quod quidquid in universum in aliquibus partibus præter naturam continetur, sanationis intentio, seu indicatio curativa, sit illius ablatio, quæ si fortasse exequi non possit, fiet transpositio. Ea verò, quæ non sunt omninò præter naturam, sed quantitate solum molesta, indicant tantummodò devacuationem.

Remedia denique, quæ ad ipsorum sanationem perducunt, desumi debent, partim ex natura ipsiusmet affectus, partim etiam ex ipsis affectis particulis. Tria proinde ex hoc textu adnotanda occurrunt: pri-

mum, quòd ea, quæ in aliqua cavitate continentur, & toto genere præter naturam sunt, ut pus, vermis, lapis omninò debent auferri; & si hoc peragi nequeat, saltem transpositio tentetur, ut in lapide obstruente collum vesicæ, qui cathetere transponendus est. Secundum quod quæ non sunt toto genere præter naturam, sed solùm quantitate nimia peccant, ut cibus in ventriculo, & sanguis in venis abundans, ab evacuatione solùm, seu diminutione curantur. Tertium, quòd inventio remedium à duplici fonte haurienda est, ab affectibus scilicet, & à locis affectis. Sic variant indicationes curativæ morborum à varietate partium affectarum, ex 1. de locis affectis cap. 1. neque illud idem medicamentum, quod convenit inflammationi gutturis, prodest etiam inflammationi oculi, pleuræ, vel stomachi, & sic de aliis. Hinc idem Galenus 13. meth. cap. 16. & seq. advertit, in Arte medica nullam esse majorem difficultatem, quàm perfectè cognoscere indicationem desumendam à partibus affectis: & 1. methodi, objurgat Thessalum, qui dicebat spatium sex mensium totam Medicinam addisci posse; etenim ablata contemplatione partium affectarum nêdum spatium sex mensium, sed etiam spatium sex dierum, tota Medicina addisci poterit.

CAPUT XII.

XCV. in Galeno.

De Asperitate, & Levitate.

TEXTUS.

(T. 62.) **Q**uæcumque partes verò, ob id quòd exasperatæ naturalem amiserint habitum, his levitas na-

turalis est restituenda, ossa quidem levigando, arteriam autem asperam, vel linguam leniendo humidis, quæ nihil mordeant, & lentorem habeant. Sed quibuscumque levitas præter naturam inest: asperitas est revocanda medicaminibus, quæ sufficienter abstergant, & parùm adstringant. (T. 63.) Quæcumque verò vel obstructions, vel angustiae meatuum alias sequuntur agritudines, ab illarum curatione prius est incipiendum: ostensum siquidem est in libro de Differentiis morborum, quod & inflammationibus, & duris, laxisque tumoribus, & siccitatibus aliquandò immodicis, ac præterea vitiosis partium continentium figuris, ea, quæ nuper diximus, sapius adveniunt; sicuti & quibusdam tumoribus eorum corporum, quæ sunt in ambitu. Quòd si nonnulla ex proximè dictis invicem complicentur, varias habebunt indicationes. Sufficiet autem in uno tanquam in exemplo, habuisse sermonem, quoniam de omnibus in libris de Arte curandi plenius sumus exequuti. (T. 64.) Supponatur cuipiam particula multitudinem sanguinis influi, adeo ut intendatur in ea venæ non majores tantum, sed etiam parvæ, quæ prius sensum effugiebant, nunc verò jam plenæ visu comprehenduntur, sicuti plerumque in oculis ob tunica albedinem manifestissimè patet: par siquidem est, quòd & alia vasa, quæ latent sensum, jam plena distendantur, non dum & ipsa ob parvitatem visui manifesta, & jam periculum imminet, ne quod ex vasis exudat, ad spatia vacua, quæ in medio sunt, effundatur, aut ne jam parvum aliquod sit effusum. (T. 65.) Hujus quidem affectus sanatio intentionem habebit evacuationem, aut ut manifestiori vocabulo utamur, ab evacuationem, si quidem morbus erat immoderata partis repletio. Necessarium igitur est ut aut superfluitas retrocedens evacuetur, aut per ipsam patientem particulam. Retrocedet autem vel impulsæ, vel attractæ, vel transmissæ, vel horum uno ali-

aliquo modorum; vel omnibus. Per locum verò patientem evacuabitur, partim quidem manifestè, & sensibiliter, partim verò in vapores resoluta. (T. 66.) Si igitur universum Corpus plus a quo plethoricum fuerit, per patientem locum minimè evacuandum. Nam si scarificationibus, aut sectionibus, sensibiliter evacuabimus, plus ratione excitati doloris attrahemus. Si verò calefacientibus dispergere tentabimus plus erit id, quod vi caloris ad partem attrahetur, quàm dispersum. Quòd si in eo elaborabimus, ut quod influxit, retrocedat, corpus plenum non admittet. Ad hæc igitur ambo totum Corpus evacuare oportet, aut omninò ad contraria loca retrahere, quod patienti particulæ insit, quo perfectò opere prius à parte repellendum, quàm dispergendum. Quanto enim per maiora vasa fit, tanto expeditior est evacuatio. (T. 67.) A patiente verò loco, adstringendo, ac refrigerando repellemus, sed & exinanita loca attrahunt ad seipsa quæcumque reperiuntur. Hoc siquidem ostensum est in eo volumine, in quo de Potentiis naturalibus agitur. Et vasa præterea vigore ex medicaminibus adstringentibus addito, à se ad alia remittent. (T. 68.) Si igitur hac via superfluum omne retrocesserit, benè se res habet. At si aliquid fuerit in parte retentum, conjecturandum erit, id lentum, ac crassum existere, atque ea ratione jam coactum, atque adstrictum, ut cum difficultate extrahi possit. Fieri autem potest, etiamsi non ejus natura sit, ut ad spatia, quæ in medio sunt, sit effusum, in quo casu tunc ad id veniendum esse tempus suadet, ut hoc ipsum, quod reliquum est, per patientem locum evacuemus; imponendo superjacentibus partibus ea, quæ influentem humorem repellendi vim habent. Maxime verò evacuabis, si in spatiis intermediis aliquid contineri conjectura assequeris, & scarificationum auxilio, & medicaminum, quæ vim habeant dispergendi. (T. 69.) Sed quoniam hæc omnia

vires calidas habent, ejusdem verò temperaturæ opus est mordere, quando caliditatis modum excesserit, cavenda ex eis sunt vehementissimè calida, ac tum præsertim, cum patiens locus inter summa fuerit. Neque enim parvus excitabitur dolor, si præter proprium affectum insuper mordeatur, omnisq; præterea dolor fluxiones commoveat. Quod igitur mediocrem caliditatem obtinet, in his sensum doloris non invehit, atque eo amplius omni dolore vacat, si humidum extiterit. (T. 70.) Et quidem quicquid per summa hæret, potens est id medicamen dispergere, quod etiam validas non habuerit ad dispergendum vires. Quod si summè quidem partes omni noxa caruerint, id verò quod evacuari oporteat, in penitioribus partibus fuerit, intendendus, atque augendus dispergentis medicaminis calor, cum dubitandum sit, ne prius quàm profundas attigerit partes, interim vires amittat. Neque tamen ex eo summa partes aliquem dolorem sentiant, cum omni vacent affectu. Quare nunc hæc duo simul invitant ad calidiorum pariter, atque acrium medicaminum usum, & summa partes, quæ tolerant, & profunda, quæ egent. Hæc igitur ex situ particulæ indicatio assumebatur. (T. 71.) Deinceps verò si quid ad sanitatem deficiat, consideremus: neque enim parvum aliquid deesse videtur. Affectæ partes, in quibus fluxionis superfluitas retinetur: nonnullæ quidem raræ, & laxæ, & molles natura existunt: nonnullæ autem densæ, & pressæ, ac duræ. Priores igitur faciliè evacuantur; reliquæ autem acrioribus evacuantibus, ac præterea tenuiores partes habentibus egent, atque eo etiam magis, quanto profundior situm habuerint. Hæc igitur tibi rursus sit indicatio altera, à particulæ patientis substantia. (T. 72.) Alia verò à formatione simul, ac situ. Supponatur enim, si ita contigerit, in hepate esse proximè dictum affectum in angustis vasorum finibus, impactis humoribus, qui vel lenti, ac tenaces, vel

crassis existant, vel superabundent. Nonne in promptu est primum quidem crassitiem una cum lentore, & tenacitate, cibis, & potibus extenuantibus ad subtiliorum partium substantiam transferri oportere? Secundo autem loco, non per angustos, ac invisibiles solum, sed per latiores etiam meatus quicquid infestum existit, esse evacuandum? Sunt enim in hepate venæ non minus amplitudine, quam numero excedentes. Terminantur autem hæ quidem in gibbis ad venam cavam; hæ verò in cavis ad portam; unde facillimum tibi est futurum, ubicumque pressi, ac stipati humores fuerint, eosdem expeditè evacuare, trabendo quidem ad ventrem his, quæ attrahendi vim habent, medicaminibus, eos humores, quicumque in venis ad cava hepatis pertinentibus sunt acervati: ad urinæ verò meatus promovendo per cavam venam, quicumque in venis ad gibba pertinentibus sunt. (T. 73.) Sed præter supradictas, alia est indicatio ab hepate ipso, veluti à venarum principio: Nam cum non tantum seipsum regere natura aptum sit, ut pleræque animalis partes, sed venis præterea virtutem largiatur, periculum imminet, ne, si ejus vigor perfusionibus, & cataplasmatibus relaxantibus fuerit resolutus, & ipsum primum ad sui opus, atque omnes subinde venæ, ejus ratione imbecilles efficiantur. Quare in ejus curationibus aliqua ex adstringentibus medicaminibus miscere oportet. Sed quoniam in profundo admodum loco situm est, dubitandum erit, ne adstringentis medicaminis vis exolvatur, nisi ab aliqua altera subtilium partium substantia, qualis aromatum est, traducatur. Melius verò fuerit, si & ipsum adstringens medicamen protinus etiam aromaticum fuerit: nam si duas habuerit naturæ insitas qualitates, ac potestates, valentiùs operabitur. (T. 74.) Et quidem evacuetur, quod præter naturam in membrum confluit; servet autem humorum modum naturæ convenientem. Quare & illa ani-

madversio à nobis est in hoc adhibenda, ne quid ab humoris confluentis qualitate ejusdem membri temperies sit alterata, si pituita naturam tenuerit, ad frigiditatem: si verò bilis, ad caliditatem; ut hanc ipsam curantes intemperiem, sanitati exquisitè restituamus. Curabimus autem contrariam ex adverso afferentes qualitatem, quemadmodum in intemperaturarum curationibus diximus, quantum unumquodque calidius, aut frigidius factum est, tantum refrigerantes, aut calefacientes. Quare & hic rursus agnoscenda est ipsius secundum naturam temperies. Nam quo pacto sciemus, quantum in frigiditate, aut caliditate à naturæ modo recesserit; aut quando à frigefaciendo supersedebimus, si hos latuerit ea, quæ est secundum naturam caliditas? Ita verò & si frigidius effectum calefaciemus, ignorantes frigiditatis naturalis modum, neque opportunè calefacere, neque in tempore à calefaciendo desistere poterimus.

P A R A P H R A S I S.

AD Morbos malæ conformationis pertinent etiam vitia Asperitatis, & Lævitatis, quippe quæ debentur membris secundum propriam constitutionem, & præcipuè secundum superficiem, consideratis.

Non omnes partes naturaliter exigunt Asperitatem, vel Lævitatem, sed quibusdam conveniens est Asperitas, ut sunt Venter, & Intestina, qua parte interiorius vestiuntur; aliis verò Lævitas, ut sunt Ossa, Lingua, Oesophagus, venæ, arteriæ, nervi; unde si ab his deficient, præternaturaliter affectæ, morbosas edunt operationes, & quandoque non sine gravi vitæ periculo, ut in Lienteria, & Cœliaca passione.

Primum autem in hoc Capite Galenus docet, quod partes exasperatæ, & quæ naturalem lævitatem amisere, in pristinam,

nam, & convenientem habitudinem sint restituendæ. Exemplificat hoc in ossibus, aspera Arteria, & Lingua. Ossa enim exasperata debent lævigari; aspera Arteria, & Lingua liniri medicamentis humidis, & lentorem habentibus.

Quo autem pacto Ossa lævigentur, non docet hoc loco Galenus, sed Chirurgorum opera, abradente ferro, id peragitur; quamvis etiam nonnulla medicamenta abstergentia in hoc aliquid conferant, ut sunt pulveres myrobalanorum, folia ficus, pulvis vitrioli, & lapis medicamentosus Crollii. In cæteris verò Asperitatibus, præsertim Gulæ, & asperæ Arteriæ, ex quibus vox, & deglutitio offendi solet, profunt lenientia, & humectantia, ut diacodion, syrupus de papavere erratico, de crysimo Lobellii, de helenio, de liquiritia, de althæa, de violis.

Lævitas verò immoderata curatur vel abstergentibus, vel adstringentibus, & roborantibus. Abstergentibus quidem, cum partes natura rugosæ esse debent, & plurima glutinositate circumobducuntur, ut accidit Ventriculo crassis succis infarcto, qui proinde nequeat, ob amissam rugositatem, cibos continere; quamobrè abstergentibus medicamentis illo glutine detergi debet, & à mucosis humoribus repurgari. Adstringentibus verò, & roborantibus tollitur, cum fibræ, tum Ventriculi, tum Intestinorum adeò delaxantur, ut non solum debitam rugositatem amittant, sed etiam nequeant cibariam, aut chylosam materiam detinere, illamque deorsum delabi sinant, ut in Lienteria, quam non immeritò lævitatem Intestinorum Hippocrates appellavit 6. *aphorism.* 1. Hinc colligi potest ad mentem ejusdem Galeni, quòd Lævitas intestinum, & ventriculi, atque adeò ciborum subita egestio, duplici ex causa possit provenire, aut scilicet ex nimia, impactaque glutinositate succorum restagnantium, atque ad-

hærentium Ventriculi fundo; aut ex fibrarum ejusdem, & Intestinorum laxitate, eorumque villosa, ac glandulari crusta plurimum deterfa, aut etiam abrafa; vel etiam ex utrisque: id quod plerique Medicorum læsæ Retentrici, Expultrici, & Concoctrici virtuti tribuere consueverunt. In priori casu indicantur detergentia, incidentia, & attenuantia succorum crassitiam; in posteriori verò roborantia, & fibras in pristinum tonum reducentia, ut sunt Aromatica. Perperam igitur nonnulli in praxi ejusmodi fluxus lientericos à calore immoderato pendere putantes, toti sunt in exhibendis medicamentis refrigerantibus, & nonnunquam magno cum ægrotantium detrimento. Et quamvis Hippocrates in his casibus aliquando commendat ptisanam, *i. de rat. vict. in acut.* 18. & alibi; illam tamen non exhibet tanquam infrigidantem: hac enim ratione potuisset commendare aquam frigidam, acetum, succum granatorum, & similia; sed quia est nutrienda, & impingua, adeoque tollens asperitatem, vel suo lentore lævitatem resarciens. At verò non hinc penitus negaverim posse etiam aliquando ejusmodi fluxus à vitiatis, depravatisque fermentis, vel Ventriculi, vel Intestinorum tenuium, exoriri; atque adeò infrigidantibus, sed roborantibus tamen liquoribus corrigi, & emendari. Sed hæc accuratum Medicum expostulant.

Quoniam verò potest Asperitas alias ægritudines consequi, præsertim obstructionem, vel angustiam meatuum, & hæc adhuc alias affectiones subsequuntur; proinde Galenus *sequenti textu* docet, à principalium ægritudinum ablatione curationem esse exordiantem. Exemplificat autem in Tumoribus præter naturam, ab humorum confluxu dependentibus, quoniam exinde statim fit angustia meatuum; itemque si ob intemperiem febrilem, & excedentem siccitatem constipantur pori,

& ductus Corporis constringuntur; vel etiam, cum ob vitiatam figuram, mutatumque situm, prædicti meatus impediuntur, quemadmodum in luxatis accidit. In his itaque, aliisque similibus casibus, in quibus meatus occluduntur, impediuntur, opprimuntur, aut obstruuntur, inquit Galenus, neutiquam Asperitates, aut Obstructiones tolli posse, nisi prius auferantur ægritudines principales, à quibus illæ originem ducunt. Quare si à Tumore aliquo habeatur compressio, & angustia meatuum, hæc tunc auferetur, cum tumor ille fuerit ablatus, ut fusiùs se egisse ait, *in libris de Differentiis Morborum*.

Subdit præterea, quod si plura simul complicentur, variæ quoque exurgent indicationes, putà si jungantur simul Obstructiones, & Tumores, ex affluxu sanguinis, lævitas, vel asperitas vitiata cum læsione operationum, deberent omnia indicantia reduci ad illa tria generaliora, videlicet ad Urgens, ad Causam principalem, & ad Impedimenta, seu Causam, sine qua non, documento ejusdem Galeni 3. meth. cap. 9. & 7. meth. cap. 12. atque juxta diversitatem eorumdem, vel ab uno, vel ab altero curatio esset inchoanda. In horum autem comprobationem dat exemplum in textu Tumoris, ex affluxu sanguinis, multitudine peccantis, adeo ut propter eam, non solum venæ majores, sed etiam parvæ, & capillares intendantur, ac tumescant; & tunc per evacuationem, seu potius ab evacuationem, diminutionemque tantæ multitudinis, curationem inchoandam docet; quoniam ex Hippocrate, quæ multitudine fiunt, evacuatione sanantur.

At verò hinc manifestè deducitur modus generationis Tumoris, seu Apostematis; ad cujus uberiores intelligentiam, aliqua hæc in medium afferamus.

De Tumoribus.

Fit quidem Tumor ex Galeno, tum hic, tum alibi, cum Sanguis ex majoribus venis in minores fertur, easque plus justo opplet, atque ob nimiam vasorum repletionem, sanguis in proximiora spatia effunditur, ubi restagnans, & poros partium implens, ac obstruens, Tumorem, & Apostema efficit. Quod verò sanguis inflammationem efficiens, à majoribus in minores venas transfundatur, ostendit Galenus exemplo Ophthalmiæ, quæ inflammatio est tuniciæ Adnatæ oculorum, ubi venulæ illæ quamvis exiles tumescunt, ac turgent, ob affluxum sanguinis ab aliis venis majoribus circumstantibus.

Verum licet Galenus Inflammationem, ac Tumorem fieri dicat à confluxu sanguinis à venis majoribus in minores, revera tamen confluxus hic à venis in venas nullus est, sed ab Arteriis in poros partium, & in venas fit, cum motus sanguinis sic procedat, ex alibi traditis. Itaque contingit Tumores in partibus exoriri, cum sanguis extra propria conceptacula vagatur, & restagnat, ut propterea à confluyente novo sanguine, circumire nequeunte, partes in Tumorem attollantur, rubeant, doleant, inflammentur.

Undè autem accidat, sanguinem naturaliter in motu positum, alicubi remorari, & inhaerere, ac proinde tumorem, & inflammationem parere, causa multiplex esse potest, quæ tamen ad triplicem commode revocabitur, videlicet ad vitium ipsiusmet sanguinis, vel alicujus alterius humoris cum sanguine permisti: ad vitium partis, in qua Tumor fit: & demum ad vitium ductuum, seu meatuum, partem ipsam pertinentium; putà arteriarum, venarum, vasorum lymphicorum, & glandula-

dularum, ubi anastomoses plerumque fiunt. Vitium sanguinis varium esse potest; primò quantitatis, ut in hoc textu exemplificat Galenus, & fortasse in Corporibus plethoricis, ut ex lauta victus ratione, & vita sedentaria aliquando evenit; cum cæteroqui rarissimè fiat, ut tanta sanguinis quantitas adaugeatur, ut vasa distendat, ac tumefaciat; quandoquidem sicut Natura (in statu sano) in necessariis non deficit, ita in superfluis minimè abundat. Secundò vitium qualitatis, sive ex se, sive ex mistura alterius humoris, videlicet si plus justo glutinosus, atque indigesto, crasloque chylo saturus sit: si effoetus, suaque vivacitate elastica orbatus, ut nequeat exiles arteriolas, & partium poros lubire: si acidus, & facile concreescens: si acer, & mordax: si falsus, & muriaticus, aut aliter partibus infensus, ut illum in propriis porulis non admittant, sed potiùs respuant, ac propellant, (ex quo fortassis erysipelatosa inflammatio) aliòque deponant. Ex mistura verò alterius humoris, præsertim lymphæ consistentioris, aut acidæ alicujus liquoris, per corpus oberrantis, aut nimium superabundantis, & exaltati, aut plus justo dilutioris redditæ, ut nequeat felleum liquorem temperare, nec convenientem, debitamque fermentationem promovere. Ab his namque in sanguine vitiis, lentor quidam, atque in illius motu aliqualis remora contingit, ut coagulatione, & gravamine, sensim alicubi hæreat, & poros obstruens, impedimento sit, quo minùs novi sanguinis accessu, pars languidior reddita, in tumorem attollatur, ac inflammetur, fortassis etiam in ingentem molem elevanda, nisi per alios arteriarum ramulos, in alios, aliosque venarum ductus, beneficio naturæ, sanguis traducatur, qui perpetim per easdem partes circumire, illasque irrorare deberet.

Vitium partium, vel ab internis, vel

ab externis causis fieri potest. Ab externis quidem, cum à frigore obrigescent, densantur, aut obstupefcent: à siccitate nimia corrugantur: ab intenso calore delaxantur, & rarefiunt; & ab abundanti humiditate crascescent, plurimisque excrementis imbibuntur. Similiter à contusione, vel vulnere, si comprimantur, aut scindantur, & à mutuo adjacentium partium nexu dislocientur: nec non à venenis, & medicamentis vehementioribus, præsertim verò causticis, & excharoticis, rubificantibus, corrugantibus, stupefacientibus, aliisve, si offendantur. Ab internis verò, nempe humoribus indebitè fermentantibus, & depravantibus sanguinem: ab impedita halituum perspiratione: à fermentis partium degeneratis: à retentis cujusvis generis excrementis: ab indigestionibus, & cruditatibus, viscerum naturalium meatus infarciuntibus, aut illorum constitutionem perturbantibus, aliisque similibus; undè sanguis infici, acescere, lentescere, hebetari, aut aliter, aliterve vitari contingat: vel demùm quia cum eo permiscetur quod eidem infensum est, aut ab eo non secernitur, nec repurgatur, quod inutile est.

Denique vitium ductuum, seu meatuum, præsertim arteriolarum exilium, vasorum lymphicorum, glandularum, & pororum viscerum, in causa aliquando est, ut sanguis remoretur, & inflammationem afferat. Cum enim ductus isti plus justo exigui fiunt, & angusti, aut etiam extrinsecus compressi, quia nequit per ipsos sanguis convenienter permeare, & glandulæ aliquo fortasse præternaturali succorepletæ, circumgyrantes liquores excipere nequeunt, impedimento circulationi proinde sunt, & remoram sanguini faciunt, qui deinde sensim, sensimque tumefactionem parit. Hinc Inflammationes frequentiores sunt hyeme, quàm æstate, & magis tempore aquilonio, quàm austrino;

quo-

quoniam tunc densatur cutis, pori constipantur, coarctantur ductus, & sanguis ipse aliquatenus concretior evadit: quod secus, vel rarius in æstate. Hac quippe ratione non rarò etiam evenit, ut à simplici fibrarum, sive carnearum, sive membranacearum corrugatione, contractione, extorsione, mutato, depravatoque situ, & convenienti earumdem expansione, nedum tensio accidat dolorifica, cum sensu phlogosis; verum etiam, circumjacentes partes collædantur, nequeuntibus scilicet liquoribus per eas partes refluentibus recta meare, non sine suspicione, & graviori periculo imminentis inflammationis: quæ tamen omnia usu emollientium, laxantium, & diluentium medicamentorum, quibus fibræ contractæ, aut tensæ in pristinum situm restituuntur, momento ferè temporis desinunt, & revalescunt; uti non semel in praxi expertus sum.

Quòd verò de Putredine humorum in Inflammationibus nonnulli commentantur, adeò improbabile videtur, ut longa confutatione non egeat, cum putredo sanguinis, si aliquando contingat in arteriis, aut venis, mortem irreparabiliter secum trahat; quin & omnes simul species Tumorum, ex istorum assertionem afferre deberet, cum ipsi dicant à Sanguine putrido Inflammationem, à bile Erysipelas, à putrescente pituita Oedema, & à melancholia Scirrhum fieri. Modò omnes isti quatuor humores una simul (ut volunt) commisti, ob mutuam communionem, ad putredinem unius simul pariter reliqui computrescerent, & reciprocas affectiones inferrent. Non tamen negandum, quòd à restagnante sanguine, atque ab inflammatione jam contracta, putredo deinceps subsequatur: siquidem sanguis, ubi à suo motu defecerit, & alicubi hæserit, statim acescit, putrescit, & corrumpitur, vertiturque in pus, quod maturati apostematis indicium est. At verò si

quis confundere velit putredinem cum vitio sanguinis per indebitam fermentationem inducto, ultrò concedemus, dummodo in re conveniamus, & in Natura.

Illud autem hic minimè prætereundum, ejusmodi genera Morborum in magnitudine adaucta, seu in tumore partium, ab influo, restagnanteque sanguine procedentia, tribus simul perpetuò complicari, videlicet intemperie, seu depravata partium similarium constitutione; mala organicarum structura, in magnitudine, ac figura; & continuitatis solutione, vel præsentem, vel imminente, ob nimiam laxitatem, expansionem, aut ulcerationem cutis, aliussve membranæ, partem tumefactam ambientis. Quamobrè tumefactæ partes rubore, albore, vel nigrore afficiuntur; itemque sensu doloris, ardoris, vel refrigerationis, majoris tamen, vel minoris, prout pars ipsa tumefacta, magis, minusve sensitiva, & materia restagnans tenuior, vel crassior fuerit, ut infra. Quia etiam ratione nonnulli tumores, non solum citò ad maturitatem perducuntur, verum etiam aliquando sponte sua resolvuntur; secus alii; & quidam indolentes, alii verò maximè dolorosi sunt.

Partes magis obnoxie Tumouribus inflammatoriis, plerumque sunt carnosæ, ut & Viscera interna Corporis, Jecur, Lien, Pulmo, Renes. Glandulæ autem potius abscessus subeunt, qui Tumores sunt ex decubitu humorum, plerumque inutilium, & crassorum, in partibus glandulosis depositi: hæ quippe cum facillimè excipiant, & difficulter admodum deferant, aut aliò deponant, ob carentiam fibrarum, proinde in his Tumores diuturniores, & non facilè maturabiles contingunt. Solent etiam abscessus fieri in intercapedinibus articularum, ubi superfluitates humorum colligi solent, dicente Hippocrate 4. aphor. 74. Quibus speratur futu-

futurus abscessus in articulis : urina multa, crassa, & copiosa liberat ab abscessu. Verum non desunt, qui sicuti Tumorem cum Apostemate confundunt, ita quoque Apostema ab abscessu non discriminant; quamvis revera Abscessus referant depositionem, & decubitus humorum factum in cavitatibus articulorum, vel in glandulis, quas conglomeratas appellant Recentiores Anatomi. Sed hæc distinguere parum refert. Percurramus nunc breviter singula Tumorum genera, præmissa prius eorumdem Natura.

Definitur Tumor in genere congruentius (ex Tagautio) juxta mentem Galeni *lib. de Tumoribus initio*: quod sit *Incrementum naturalem statum cujusvis partis in Corpore excedens, & læsionem actionis inducens*. Dicitur Incrementum naturalem statum in Corpore excedens, seu, quod in idem recidit, Morbus in mala compositione, quod ad magnitudinem adauctam, quia revera partes mole quadam adaugentur, & increscunt, cum tumescunt. Dicitur, actionis læsionem inducens, ad differentiam ejus magnitudinis, quæ in obesitas plerumque accidit, quam tamen nemo unquam Tumorem appellavit, quoniam licet, vel secundum totum, vel secundum aliquas partes, obesi distenti sint, non tamen præter naturam se habent, quoniam actiones læsas non subeunt, eo quod, rigorose loquendo, nondum naturales salubritatis limites, ex vi adauctæ illius magnitudinis, sunt transgressi: morbosarum autem dispositionum proprium est, actiones naturales lædere.

Vetustioribus Chirurgis mos fuit, Tumores omnes præter naturam dividere in Apostemata, Pustulas, & Exituras. Apostemata nominabant Tumores majores, potius quantitate, ac mole, quam qualitate infensos. Pustulas verò dicebant Tumores minores, & adeo exiguos, ut potius qualitate, quam quantitate læde-

rent. Demum Exituras appellabant Tumores illos, quos Latini Abscessus dicunt, seu Decubitus, ac Depositiones, nedum in unam, sed etiam in plures Corporis particulas, ut non raro accidit in Bubonibus sub axillis, & in inguinibus, atque in maculis in Cute erumpentibus. Sed hæc divisio jam neglecta manet apud Recentiores Chirurgos.

Consuevere alii Tumores universos in longè plures differentias distinguere, desumptas à substantia, seu materia, quantitate, accidentibus conjunctis, partibus affectis, & causis efficientibus. A substantia, seu materia, ut biliosi, sanguinei, phlegmatici, ac melancholici. A quantitate, ut magni, & parvi. Ab accidentibus conjunctis, ut calidi, frigidi, duri, & molles, dolentes, & indolentes. A partibus affectis, ut Ophthalmia in oculo, Angina in faucibus, & gutture, Pleuritis in pleura, ac pectore. A causis denique efficientibus, sive extrinsecis, sive intrinsecis; unde Fluxiones, Congestiones, Decubitus.

Verum Galenus tum *cit. lib. de Tumoribus*, tum *13. meth. & 2. de Arte Curat. ad Glauc.* omnes Tumorum differentias ad eas solum revocavit, quæ ex confluentibus humoribus dependent. Quare à materia flatulenta, flatuosi Tumores dicuntur, ab Avicenna Apostemata ventosa: à materia sanguinea, græcè vocatur flegmone, latinè Inflammatio: à materia biliosa, græcè Erysipelas, Arabicè Ignis sacer: à phlegmate, seu pituita, Oedema, Arabicè Undimia: ac denique à melancholica materia, Scirrhus appellatur, Arabicè Sephirus. Ex his insuper simplicibus oriuntur compositi, seu complicati Tumores; unde qui à sanguine prædominante, cum bile permixto fit, Phlegmone Erysipelatodes nuncupatur; prædominante verò bile appellatur Erysipelas Phlegmonodes: sic pariter Phlegmone Scir-

Scirrholes, & Scirrhus Phlegmonodes; aut Phlegmone Oedematodes, & Oedema Phlegmonodes, prout sanguis melancholicæ, aut phlegmati prævaluerit, vel vice versa.

Ad has tanquam principales Tumorum differentias reliquæ aliæ à Medicis reducuntur: & quidem ad Phlegmonem pertinere ponuntur, Phyma, seu Tuberculum, Furunculus, Carbunculus, græcè Anthrax, Gangræna, & Sphacelus, latinè sîderatio. Ad Erysipelas referuntur Herpetes tum miliares, tum exedentes, Arabicè Formicæ, Ignis Sacer, pustulæ cholericæ, & Phlyctænæ. Ad Oedemata revocantur Atheromata, Steatomata, Melicerides: sic dicta à similitudine contentorum in prædictis Tumoribus Oedematosis: itemque Strumæ, seu Scrophulæ, & Leucophlegmatia, seu Hypofarca. Denique ad Tumores Scirrhosos referuntur Cancri, græcè Carcinomata dicti, Elephantiasis, seu Lepra, & Morbus Sancti Lazari nuncupatus, valde similis Scabiei, quæ Plora græcè appellatur. Sub Scirrhis etiam Tumoribus comprehenduntur Verrucæ, seu Porri, Calli, Dracunculus, Lichen, seu Impetigo, & Vitiligo. Nos hic, omissis aliis, solum de quatuor principalioribus agemus, & unâ simul Causas, & Curationes eorundem prosequemur, quoniam ab his reliqui omnes facillimè innotescunt.

De Phlegmone.

Phlegmone, seu Inflammatio, Tumor ille est, qui ex sanguine, in Cutim, aut Carnes, & Viscera effuso, dependet, cum calore, rubore, & dolore, tensionem, ac pulsationem præternaturalem excitans. Ex sanguine quidem fit, ut attestantur præsertim color, dolor, & pulsus; uti etiam facilis maturatio, atque ex incisio-

ne, sanguinea excretio. Aliquando tamen, quia propter acritudinem, nimiamque sanguinis tenuitatem, non multum partem attollit, & acutum dolorem affert, cum ardore ingenti, faciliq; resolutione, meretur nomen Phlegmones Erysipelatodis; sicut pariter Oedematodis, vel Scirrholdis; si nimirum cum glutine plurimo, vel cum lymphâ permisceatur, aut ab acido coagulante concreascit, & obdurescat. Sanguis autem inflammationem efficiens, debet in cutim, & panniculum carnosum, vel in carnes musculosas, aut in interna viscera effundi, docente etiam Galeno lib. de inæquali intemperie cap. 3. ubi modum, quo calida fluxio tumorem, & inflammationem efficiat, his verbis exponit: *Calida fluxio, ubi in muscolum procubuit, primum majores arteriæ, venæque opplentur, ac distenduntur, ab iis minores, atque ita res procedit, donec ad minimas sit perventum. In iis ubi valent erimpacta fluxio est, nec amplius contineri potest, partim ejus per ipsarum ora, partim per tunicarum foramina percolatur, & transmittitur, tum verò spatia ipsa vacua, quæ inter prima sunt corpora, fluxione implentur. Sic omnia ab humore, omnique ex parte incallescunt, ac persunduntur. Sunt autem hæc nervi, ligamenta, membrana, caro ipsa, & ante hæc arteriæ, ac venæ, quæ scilicet & primæ, præter cætera, vario dolore afficiuntur, quippe interius à fluxione tum excalescunt, tum distenduntur, ac divelluntur, distrahunturve; exterius non modo excalescunt, sed etiam premuntur, ac degravantur: reliquæ verò particulae, aliæ quidem calefiunt tantum, vel comprimuntur, aliæ utroq; modo laborant: Atque hic morbus Phlegmone nominatur. Hæcenus Galenus. Idem etiam docet 10. meth. cap. 6. ubi sanguinem calidum in aliquam partem procumbentem majora ejus vasa distendere, inquit, & ab his ad minora procedere, à quibus deinde foras exudat in*
ea

ea spatia, quæ inter vasa sunt, ut etiam omnia, quæ in Carne habentur, loca inania occupet. Atque hinc, ex duobus modis, quibus Tumores in universum progigni dicuntur, fluxione scilicet, & congestione, calidi, ut præsertim est Phlegmone, & Erysipelas, fluxione fiunt; frigidi verò, ut Oedema, & Scirrhus, potius congestione. De qua re infra.

Quoniam verò symptomata Phlegmonem comitantia, præter tumorem, sunt calor vehemens, summus rubor, dolor ingens, pulsationis sensus, tensio partis, & renixus ejusdem, si fortasse digito comprimatur; propterea adjectum est in definitione, cum calore, rubore, & dolore, tensione, pulsationeque: ex quibus indiciiis certò Phlegmone dignoscetur, & à cæteris tumoribus distinguetur; quoniam hæc omnia satis manifestè demonstrant sanguinem in parte tumefacta restagnantem, unde præternaturalis fermentatio exurgit, quam comitatur dolor, pulsatio, tensio, & calor vehemens: quemadmodum etiam deducitur ex Galeno citato libro de Tumoribus, & 13. meth. Et quamvis Hippocrates Phlegmonem consueverit cum Phlogosi, juxta morem Antiquorum, confundere, ut etiam meminit idem Galenus 2. ad Glauconem 1. & 4. acutor. 21. & 13. meth. cap. 1., quin imò lib. de differ. Morbor. & sympt., Phlegmonem bifariam accipi posse doceat, uno modo pro omni effervescentia, quam Græci propriè Phlogosim appellant; altero modo, pro Tumore ex sanguine progenito, & propriè Phlegmone dicto; Nihilominus idem Galenus comm. 4. in 6. epidem. 1., pro Tumore præter naturam cum dolore pulsatorio, & resistantia, illum intelligendum esse docet, prout communis loquendi usus apud Recentiores invaluit, atque etiam post Galeni tempora usurparunt Ægineta, Aëtius, Oribasius, cæterique.

Causas Phlegmones externas faciunt

Chirurgi contusiones, diruptiones, fracturas, vulnera, ulcera, luxationes, id. quæ genus alia, quæ in causa sunt, ut humores in parte læsa remoram patiantur, aut etiam aliunde defluant, & congerantur, nequeunt resolversi, vel aliò deferri, impedito potissimum eorumdem circuitu, atque labefactata parte, ex causis prædictis. Internam verò dicunt esse Sanguinem, vel quantitate vasa replentem, & in minoribus vacuitatibus impactum, ut loquitur Galenus 13. meth. cap. 2. 3. & 5., vel etiam qualitate ipsis infensum, ut idem ibidem subdit. At verò, quoniam ex doctrina ejusdem tum citat. loc. tum 2. de Arte Cur. ad Glauconem cap. 1. Phlegmone esse potest vel Erysipelatodes, vel Oedematodes, vel Scirrholes, propterea fit, ut vitium sanguinis in qualitate, vel acredinem biliosam, vel glutinositatem, & crassitiem phlegmaticam, vel denique terrestitatem, aciditatemque melancholicam referat. Et quidem de acredine, & glutinositate, nulli dubium, attestante idipsum Galeno 2. de Arte Cur. ad Glauconem cap. 1. & 13. meth. cit. quia ut dictum, ob acritudinem sanguinis fit Phlegmone Erysipelatodes, & per crassitiem, Oedematodes; Hinc Galenus eodem 2. ad Glauconem 1. ait: Et quidem in earum (scilicet inflammationum) singulis, vel jam putruit id, quod influit, aut in membro constrictum putrescit, & vel crassum est, vel tenue, & vel optimum, vel acre. De terrestitate verò, aciditateque sanguinis, præterquamquod Galenus ipse, cap. de Scirrho, eodem 2. de Arte Cur. ad Glauconem, docet illum fieri, ex humore lento, & crasso, qui partibus, quæ indurantur, tenaciter infigitur, & crebrius etiam Medicorum imperitia paratur, cum vehementer erysipelata, & inflammationes adstringunt, & infrigidant: Suadet quoque ratio; etenim, si acidum sua natura coagulans, & figens est, procul dubio cum præ-

prævalet, Sanguinem in suo motu aliquatenus præpeditum inficit, & in angustioribus ductibus, aut poris partium, magis, magisque contaminat, & hærentem efficit, unde impactus, densatusque tumorem inflammatorium excitat. Hoc pacto intumescunt Lien, Pancreas, Mesenterium, Uterus, aliæque partes glandulares; nec non sæpè etiam hæmorrhoides tument, & inflammantur, non sine gravi sensu doloris, & ruboris. Ostendit hoc idem subita à restagnante sanguine concretio, seu coagulatio, quam deinde sequitur suppuratio cum febre, de qua Hippocrates 2. aphorism. scripsit: *Dum pus conficitur, rigores, (seu ut alii malunt,) dolores, & febres accidunt magis, quam jam confecto.* Concrevit autem, & coagulatur sanguis ab acido superabundanti, aut exaltato: quæcumque enim acido abundant, promptè fermentescunt, si cum aliis permisceantur. Sic Mercurius cum Spiritu Nitri, oleum Tartari cum Spiritu Vitrioli, Coralia cum aceto, & alia hujus generis. Atque hinc modò est, quòd in Inflammationibus percipiunt patientes acutissimum doloris sensum in ea parte, ubi primùm sanguis restiterit; itemque pulsationem: ac intumescantiam, eo profus modo, ac in panificio fermento acido, experimur. Accedit, quòd exinde etiam sequitur facilis ex inflammatione suppuratio, & citior quàm in cæteris; quoniam per acidum promovetur fermentatio, sine qua suppuratio fieri nequit. Constat autem evidenter restagnantem Sanguinem in Inflammatione acidiorum fieri, proindeque grumescere, & longè magis ex grumefactione acidum evadere; unde postmodùm suppuratio. Neque enim ex eo solum, quòd Sanguis alicubi remoretur, suppurationi subjicitur: nam sanguis è venis eductus, & in vase aliquo asservatus, minimè in pus vertitur, licèt corrumpatur: & in Utero, ac Vesica, ubi nonnun-

quàm ad plures dies detinetur, sine ulla suppuratione, in grumos concretus dumtaxat educitur; quia nimirum in fermentationem non est adactus, diluto scilicet acido, resoluto, aut infracto. Sed & neque in Scirrho, ubi acidum potenter exorbitat, pus gignitur, quia plus justo fixum, ac tartareum, fermentationem non promovet, sed omnia sibi subigit, & congelat; adeoque quacumque commotione privat. Quòd si fortè fortuna in fermentationem adigatur, vertitur in venenum, & horrendum Cancrum, penitus exitialem, progignit.

At quamvis Acidum ad suppurationem promovendam necessarium esse dicamus: non tamen quis putet corpulenti alicujus humoris acidi nimiam quantitatem ad hoc opus exquiri, cum satis sit spiritus quicumque tenuis, & volatilis vapor, vi potius, ac virtute, potens in motum fermentativum adigere, quicquid alicubi impactum hærescit, si præsertim in vasis angustioribus constipatus, & occlusus vigorem nanciscatur, quemadmodum in Aceto stillatio, & in Spiritu nitri experimur, ac passim observamus in obstructionibus Pancreatis, aut Lienis, in Hypochondriacis, & Scorbuticis, in quibus sæpè sæpius pustulæ cutaneæ comparent cum livore, gingivarum erosiones, imi ventris inflationes, Stomachi ardores, æstuationes, rugitus, ructus, animi præfocationes, & similia: quæ cum nonnunquam fugacia sint, appareant, dispareantque momento, nonnisi à tenui, volantique acido exoriuntur; quamobrè jure optimo scribit Sylvius Deleboë, se nondum potuisse medicamentum invenire, quod acidum exuperans adimat, vel infringat, sine totius Corporis incommodo; siquidem plerumque tenue, vaporosum, & oberrans est, ut adnotavit Helmontius, vi potius, atque efficacitate molestus.

Hinc quoque palam fit, quo pacto sanguis,

guis, ex arteriis in poros partium trajectus, momento ferè temporis restagnet, & inflammationem pariat. Tenuis namque hic vapor, seu spiritus acidus, cum sanguine commistus, vel etiam in ipsa met parte excitatus, vitio sui, aut alieno, ut antea dictum, sensim poros constipat, & sanguinem pertranseuntem figit; unde postmodum pororum obstructio, arteriolarum, & glandularum corrugatio; indeque succedentis sanguinis restagnatio major, atque adjacentium partium carnosarum tumefactio, quam postremo tensio, ardor, pulsatio, rubor, & reliqua symptomata superius memorata consequuntur, quæ quousque ex fermentatione, suppuratio, ac postea diruptio non successerit, nunquam desinent.

Atqui animadversione dignum est, quòd licet aliquando in febribus continuis sanguis in apicibus arteriolarum remoretur, & concreseat, non tamen exinde inflammationes conspicuæ fiunt: vel quia patent alii ductus, per quos sanguis in venas permeare possit; vel quia obstructiones istæ contingunt in glandulis solum, & non in carnibus; vel quia tales non sunt, ut transeunti sanguini impedimento omnino sint; vel quia beneficio transpirationis, tenuiores saltem partes evolant, & ope febrilis commotionis crassiores attenuantur; vel quia meatus per longum patuli sunt & sanguinem aliquantulum tantum in globulis concrecentem, non tamen omnimodè obstruentem, nec penitus circuitum impredientem excipiunt; vel tandem quia acidum tanti non est, ut inflammationem pariat; aliave de causa, quæ sanè multiplex esse potest. Et quidem causæ variæ esse possunt, quamvis non omnes nobis cognitæ, cum à vario situ, figura, motu, partium habitudine, diversaque porositate, cæterisque proficiantur. Sed & neque necesse est, ut acidum perpetuò præcedat, cum possit etiam una simul à

remorante sanguine acor adipisci, ex multis sive intrinsecis, sive extrinsecis accidentibus, quæ ægrotantibus præstò esse solent. Sic si pars musculosa, cæteroqui perfectè sana, urticæ flagello E. g. verberetur, mox statim in tumorem attollitur, rubet, & calet cum ardore, quia ex vibicibus, ab urticæ aculeis parti inflictis, tonus ejusdem, & pori cutis illicò permutantur, & motus sanguinis interturbatur; unde postmodum inflammatio, rubor, dolor, ardor. Idipsum evenit ex contusione, vulnere, fractura, & similibus.

Quod ad Curationem. Communiter putant præcipuam indicationem curativam consistere in peccantis sanguinis educatione. Quoniam enim præcipua Inflammationis causa ponitur plenitudo, ea proinde tolli creditur sanguinis missione; unde Galenus 1. *aphorism. comm.* 23. scripsit, nullum aliud in inflammationibus internis efficacius præsidium seipsum invenisse, quàm sanguinem detrahere ad animi defectionem usque: quod etiam testatur *cit.* 2. *ad Glauconem*, & 13. *meth. c.* 5. & *seq.* Et quidem detrahendum sanguinem suadere videntur nedum peccantis humoris conditio, sed & febris, quæ inflammationem comitatur, quæque continua, & acuta esse solet: dolor, & rubor partis, totius massæ sanguineæ fervor, ex urina rubente, indicatus: sitis, vigilia, inquietudo, & similia; quæ nemo uspiam inficiabitur. Solum de Tempore, & Quantitate dubitatur, an scilicet quocumque tempore, & ad animi defectionem usque, sanguinis detractio fieri possit. Et primum de tempore, existimaverim Ego solummodò in principio licere, hoc est cum inflammatio fit, aut proximè futurum est, ut fiat; secus verò cum est facta, & jam sanguis extra propria vasa restagnaverit: Tunc enim, neque qui peccat educitur, neque inflammatio facta tollitur: & ex altero capite, stagnantis sanguinis resolutio, aut matu-

maturatio impeditur ; igitur solum in principio , cum sanguis remorari coeperit , detrahi potest , ad eam tamen quantitatem quam vires , ætas , & habitus Corporis tulerint : per id enim temporis , motus sanguinis missione celeratur , citaturque , ne hæreat , remoretur , ac congelascat , & si fortasse multitudine (saltem propter nimiam sui expansionem) extuberet , convenienter diminuetur , citrà virium jacturam , quocircà affluxus ad partem parcius fiet : arteriæ namque crebrius per systolem , ac diastolem pulsantes , sanguinem ipsum magis attenuant , ac per suos ductus promovent , nec non etiam transpirationem , & exsolutionem adjuvant , ut etiam vapor ille , ac spiritus figens aliquatenus dissolvatur , & evaporet , more quo vinum in indebitam fermentationem adactum , levi quacunque evaporatione defervesceat , & in meliorem statum remittitur ; quin & acidi liquores ad liberiores aërem expositi , hebescere solent . Cæterum parum refert num à partibus remotioribus , aut proximioribus , oppositis , aut directis , sanguis detrahatur , sive , ut ajunt , evacuatione revulsoria , vel derivatoria ; etenim haudquaquam proderit sanguinis missio , quia ex hac , vel illa vena fit , sed solum quia eo tempore peragitur , quo inflammatio nondum peracta est , atque ad impediendum , seu potius ad diminuendum in partem laborantem copiosorem sanguinis affluxum ; quamvis haud inutiliter putaverim (si fieri posset) eam venam esse secandam , quæ proximiores anastomosis cum arteriis , partem ipsam inflammata irritantibus , init . Quo sensu intelligendus Hippocrates 6. aphorism. cum inquit : dolente parte Capitis postica venam frontis secandam esse , quoniam hæc proximiores cum parte dolente communionem habet .

Phlebotomia insuper ad animi defectionem instituta jam diu exolevit , saltem ex

eo , quia nunc non toleratur ; Quare in praxi hærent potius Avicennæ dicenti meliorem esse numeri repetitionem , quam accretionem quantitatis : quamquam & in hoc probabiliter existimem , quod si semel instituta venæ sectio non profuit , neque pluries repetita in posterum sit profutura . Verum de hac re alibi à Nobis fuisse actum est .

At verò purgans medicamentum locum penitus non habet , contraindicante ipsa inflammatione ; quamobrem dissolventibus potius deinceps insistendum , atque ad suppurationem vergente Phlegmone , maturantibus . Inter dissolventia specialiora sunt Carduus benedictus , Angelica , Carlinæ , Zedoaria , Hypericus ; & ex Animalibus cornu Cervi , oculi Cancrorum , pulvis , & sal Viperarum , calculus repertus in cystifellea Herinacei terrestres , sperma Ceti , sanguis Hircinus , coagulum Leporis , lapis Bezaar verus : Ex mineralibus verò Stibium diaphoreticum , Sulphur auratum Antim. , magisterium coralliorum , terra Melitensis , Mercurius diaphoreticus . Ex his autem , mihi in usu est sequens mistura , quæ recipit : *Decoctiois florum hyperici , & cardui benedicti unc. iii. , sanguinis hircini drac. i. , syr. de papavere eratico unc. i. ÷ , spiritus terebinthi , vel balsam. sulphur. anisati , (vel melius) spiritus theriacal. camphor. gutt. v. m. & exhibeatur .* Quod si patiens desideret formam solidam , tunc exhibeo ; *Spermatis Ceti , vel coaguli Leporis scrup. i. vel drac. semis , antimonii diaphoretici rite preparati gr. xii. , cum conserva florum hyperici , vel alterius similis , quantum satis f. bol.* Pro potu ordinario conferret decoctum C. Cervi crudi limati , vel cardui benedicti , vel aqua ex albumine ovorum destillata , aliave similis : quare resolutio quoad fieri potest , promovenda est . Quod si inflammatio commodè resolvi non possit , ad suppurationem perdu-

catur ,

catur, oleis primùm lenientibus, amygdalarum dulcium, chamæmelino, liliorum alborum, unguento filii Zacchariæ, adipe suillo, vel vervécino, decocto malvæ, & althææ, cum axungia veteri: deinde etiam emplastro de mucilagibus; & si appareat aliquod pravitatis indicium, cum theriaca veteri: proderit quoque emplastrum fodicationum Paracelsi tertiæ intentionis; vel ex decocto radicis liliorum, & althææ, spermate Ceti, tragacantho, & cera, fiat Emplastrum, five Cerotum.

Perducta ad suppurationem Inflammatione, caustico, vel incisione illa aperiat, ut pus exinde progenitum repurgetur. Mox detergentibus, & mundificantibus ulcus ad plures dies adaperit detineatur; Et tandem ad cicatricem perducatur pulveribus sarcoticis, aut balsamis arte paratis, licet in hoc multum indulgendum sit parti ulceratæ: id quod prudentiæ Chirurgorum relinquitur. Cibus interea sit attenuans, potus modicus, & incolatus in Aere tenui, & calido. Cætera ex alibi dictis petantur.

De Erysipelate.

Erysipelas Tumor est præternaturalis originem ducens à Sanguine tenuiori, & acriori, plerumque per cutim, aliquando etiam per viscera diffuso. Et quidem quod à Sanguine acriori, tenuiorique dependeat Erysipelas, patet, tum ex levi, vel nulla partis inflatione; tum ex nullo, vel modico renisu, cum pars affecta tangitur; tum ex facili resolutione, eo quod nunquam, vel rarissimè (idque cum phlegmonodes, vel oedematodes est) ad suppurationem terminetur; tum demum quia, facile de parte in partem transvolat, & per plura membra vagari solet.

Tom. V.

Atqui nedum sola cutis eo affici consuevit, sed etiam non rarò partes internæ Erysipelate divexantur, ut de Utero speciatim scripsit Hippocrates 5. aphorif. 43. Si in utero fiat erysipelas, lethale. Sic pariter Pulmo, Jecur, Cerebri meninges, aliæque partes Erysipelate afficiuntur, ut pluries per Anatomen innotuit.

Erysipelas faciunt Medici cum Chirurgis verum, & non verum, seu legitimum, & spurium. Verum dicunt, quod ex tenuissimo sanguine (seu purabile, ut ajunt) fieri putatur: Non verum autem, quod ex corpulentiori humore progignitur; unde Phlegmonodes, Oedematodes, vel Scirrholes dicitur, prout Sanguis, Phlegma, aut Melancholia, sive crassior, & aquosior, vel sæculentior humor, in illo contentus apparuerit; aut etiam major, vel minor Sanguinis affluxus in parte restagnaverit.

Sed & nonnumquam Erysipelas ex se solum morbi vicem gerit, aliquando verò refert symptomatis conditionem. Morbus ex seipso est, cum primùm in lædendo conspicitur, & febrem subsequenter, vel comitem habet, quæque ad ipsius mutationem, ac varietatem, mittescit, vel augetur. Symptomatis verò conditionem refert, cum multo post febrim acutam sequitur, atque ad febris incrementum, aut decrementum, diversimodè permutatur, & augefcit, vel decrefcit; quinimò solet non leviter, superveniente Erysipelate, illa remitti, deposita nimirum ejus causa materiali ad habitum Corporis, & præsertim in partibus infernis, unde Hippocrates, Erysipelas ab internis ad externas partes ferri, bonum dixit. Atque hinc melius semper, ac tutius, si ad inferiores, quàm ad superiores partes, Caput scilicet, Faciem, Pectus, deferatur.

N

Por-

Porro à Nobis alibi dictum (a) etiam à lymphæ, seu sero sanguinis, acidiori reddito, Erysipelas exoriri, quoniam ex Helmontio, liquor ex Erysipelate manans non amarus, sed ex acido-salfo mistus est.

Ejus indicia notissima sunt, & cuique conspicua. Rubet enim, ad flavum aliquantulum inclinans, Cutis, cum ardore: Serpit, & sensibilibus de parte in partem rubor diffunditur, citrà ingentum Cutis elationem: Febris à principio adjungitur, imò aliquandò cum levi rigore inter initia se prodit, instar Tertianarum; & pro varietate affectarum partium dolor, pulsatio, ac tensio, major, vel minor percipietur; Urinæ plerumque rubent, sed tenues esse solent, nisi tamen ab adnexa febre, aliter permutentur, quæ licet sæpè sæpius, symptomatis vicem gerens, non multum negotii faceffat, solet tamen aliquando aliunde procedere, & erysipelatis malitiam ostentare. Quamobrem si illa Erysipelati superveniens, motum, ac morem istius minimè sequatur, gravior erit, malè affecti Corporis, ob pravam multorum humorum dispositionem, indicia referens, qui cum nequeant omnimodè extramitti, majori sui parte, vasa interna sanguinis occupant, & symptomaticam Erysipelatis depositionem ostendunt.

Hinc de illius Prognosi varium iudicium faciendum est. Nam si febris desinat, vel saltem remittatur, superveniente Erysipelate, idque in partes potius inferas divagetur, melius: secus verò, si contrarium accidat. Pari modo in misto, spurioque Erysipelate prognosticandum: siquidem eo sensim evanescente, cum febris, aliorumque symptomatum,

successiva remissione, signum salutare erit: incrementum verò febris, præsertim cum partes superas occupaverit, aut in suppurationem vergat, malum: ex Hippocrate 7. aphorism. 20. Semper enim circa caput, & faciem comparens periculosum observatum est, ob facilem Meningum Cerebri læsionem; quod sanè diuturnæ vigiliæ, vaniloquium, aut multiloquium, sopor, inappetentia, nimia sitis, alvi profluvium, difficultas respirationis, aliaque hujus generis symptomata supervenientia portendere solent. Denique in spurio Erysipelate, si pustulæ, aut vesiculæ ichore plenæ compareant; si à pressione partis fovea relinquatur: si in suppurationem tendat: si livescat: si repente dispareat; malum, & plerumque lethale.

Pro Curatione, victus ratio sit attenuans, & attemperans. Videntur Carnes, & Vinum præsertim generosum. Potus sit refrigerans, quin & à Thoma Bartholino, *peculiari tractatu de Nivis usu in Medicina*, etiam ex Nive commendatur. Profunt Aquæ stillatitiæ ex Carduo benedicto, vel stellato, scorfonaria, pimpinella, eryngio, fragaria, acetosa. Acræ ex adverso, & calorifica dicta, pingua, & dulcia, nocua sunt; sicut etiam motus omnes tum Animi, tum Corporis.

De Phlebotomia ambigua res est. In Praxi ordinaria creditur prodesse, ob vitium in sanguine contractum, & ratione etiam febris adjunctæ, cum ardore, siti, & lingua arida. At contrarium existimant alii cum Avicenna, qui sanguinem frænum bilis vocat: hæc enim per phlebotomiam magis effervesceret, & adaugeretur; quin & illa, quæ incutim effusa est, facile per misionem retrocederet, & partes internas nobiliores invaderet. Attamen in hoc distinguendum putant alii, num scilicet Erysipelas

(a) In nostra Praxi.

verum, an spurium sit, & num symptomatice, vel criticè comparuerit, siue num febrim sequatur, cum ejusdem remissione; an verò potius præcesserit, indeque alia symptomata sint subsequuta; & num deniq; in principio, an verò in statu Morbi. Si namque Erysipelas verum sit, meliùs existimant à sanguinis missione abstinendum: competere verò solùm posse (quo pacto dictum in Phlegmone) & statim inter initia, si Phlegmonodes sit, atque à suppressis Catameniis in foeminis oriatur. Contra verò si Oedematodes fuerit, vel Scirrholes, nulla ratione convenire, ob misturam phlegmatis, seu lymphæ crassioris, vel alius terrestrioris, acidi, & melancholici humoris. Similiter si febrim consequatur, indeque illa remissa sit, comparente Erysipelate, nec sanguis detrahi debet, eo quòd Crisis conditionem referat. Denique si unquam locum habere videatur, statim inter initia tentetur, vel ad deplendum, vel ad temperandum sanguinis orgasmum; nullatenus verò, aut in statu, aut in declinatione. Horum omnium ratio clarè patet ex supradictis; etenim cum verum est Erysipelas, materia peccans tenuis est, & sponte sua evanescit, ac diffilatur, quæ fortè per missionem retenta, & denuò cum sanguine commista, irreparabile damnum pareret. Pari modo cum Erysipelas febrim comitem habet, sui vires non excedentem; quoniam salutarem sanguinis repurgationem ostendit, aliud tentare non expedit, ne critica depositio turbetur ex 1. *Aphorism.* 21. Ità de cæteris. Conferantur hùc, quæ alibi à Nobis dicta sunt, de Curatione Erysipelatis in *Praxi*.

At quid Galenus de missione Sanguinis in Curatione Erysipelatis senserit, breviter nunc etiam recenscamus. Planè ex capite 1. *lib. 2. ad Glauconem*, & ex 13. *meth. cap. 8. ac. 14. ejus-*

dem cap. 3. clarissimè deducitur, phlebotomiam non commendasse in exquisito Erysipelate, sed solùm in Erysipelate Phlegmonode, ut præ cæteris animadvertit Tagautius *lib. de Tumor. præter naturam cap. de Cur. Erysipelatis*. Quin idem Author ex eodem Galeno deducit septem de curando Erysipelate Aphorismos, quorum primus: *In exquisito Erysipelate sanguinem ne detrahit.* Et ultimus: *Si Erysipelas non exquisitum fuerit, sed Phlegmonodes, præsertim ubi sanguis in Corpore exuperat, sanguinem mittito.* Quæ distinctione adhibita, facilè conciliari putat Paulum Æginetam cum Galeno: nam cum Paulus secandam venam præcipit in Erysipelate, quòd Capiti, seu faciei oboritur, de Erysipelate Phlegmonode intelligendum arbitratur, sæpissimè faciem invadente. At Galenus de legitimo Erysipelate loquutus, sanguinem nullatenus mittendum esse docet.

Quod insuper pertinet ad Medicamentum purgans, licèt nonnulli indiscriminatim in Erysipelate purgare audeant, desumpta indicatione à biliosa Cacoehymia. Nihilominus, si standum ejusdem Galeni doctrinæ, & authoritati, procul dubio, juxta præfatam distinctionem, dicendum, haudquaquàm purgandum in Erysipelate phlegmonode, licere verò in oedematode, vel scirrhole, ut pluribus insinuat idem Galenus *cit. 2. ad Glauconem* 1. Idipsum deducendum ab adjuncta febre, quæ si plenitudinem humorum consequatur, timeaturque de affluxu eorumdem in partem aliquam nobiliorem; sedato priùs, quoad fieri poterit, fervore, & dolore, leve aliquod purgans exhiberi poterit; in quem usum commendatur Rhabarbarum, cum decocto, vel pulpa tamarindorum: vel Cremor Tartari juxta descriptionem Quercetani: vel etiam syrupus de cichorio cum rhabbaro, aliudve simile.

Postremò circatopicà, & specifica medicamenta: erat in usu apud Galenum admove-re parti Erysipelate affectæ inter initia succum solani, sempervivi, portulacæ, psyllii, hyoscyami, lactucæ, cichorii, cucurbitæ, & lenticulæ sylvestris, ut *cit. 2. ad Glauconem*, & 14. *methodi cap. 3.* memorat: Et Avicenna adhibere consuevit aquæ frigidæ perfusionem, ut hydrelæum, cerussam, acetum, oleum rosarum omphacinum: quibus alii addidere lac, unguentum rosaceum, unguentum album, decoctum althææ, & alia hujus generis refrigerantia, de genere repellentium dicta. Verumtamèn quotidianus usus edocuit, ejuscemodi medicamenta oleosa, & pingua partem affectam in putrefactionem deducere, & non rarò in gangrænam; undè accuratiores Chirurgi ab his abstinent, & solum repellentia adhibere non reformidant in Erysipelate exquisito, atque cum ardore, ingentique dolore sociato, & ubi nullus metus est, ne in partes internas repat; quin & cum illis quoque admovent dissolventia, cum foliis Nicotianæ, Brassicæ, Sambuci, & similium; quamquàm tutius semper sit ista cavere, & humorum acritatem temperantibus, ac absorbentibus uti, de quibus infra.

Insistunt proptereà Recentiores dissolventibus, & acutiem humorum retundentibus lituris, ut sunt lotiones ex Aquis florum sambuci, & spermatis Ranarum, cum myrrha, camphora, chamæmelo, & meliloto. Helmontius commendat sanguinem Leporis illitum, itemque columbinum, aut perdicum, alii, Felium, & Canum. Boyle, & Du-Hamel spiritum vini, quem nunc in frequentissimo usu Nostrates habent: Nonnulli alii lixivium parant ex cineribus Sambuci. Alii admovent carnem bubulam recentem: alii aquam stillatitiam

spermatis Ranarum: alii vinum myrrhatum tepidum. Sed satis erit (nisi dolor, & ardor nimis urgeat) partem Erysipelate affectam pannis coopertam, & moderatè calidam detinere: nam moderato calore sensim extenuatur, & dissolvitur Erysipelas, atque in furfures abit.

Ad promovendam verò resolutionem, præservandasque partes internas à recursum peccantium humorum, valdè conferunt sudorifica, sed blandiora, atque ex vegetalibus, aut animalibus desumpta, ut decoctum florum hyperici, cornu Cervi, dictamni, betonicæ, scordii, contrajervæ, cardui benedicti, cum sanguine hircino, vel leporino, pulvere oculorum cancrorum, spermate ceti, cornu cervi præparato, extracto scordii, vel speciebus diascordii, sale cardui benedicti, absynthii, centaurii, & similibus, de quibus alibi à Nobis actum est.

De Oedemate.

O Edema definitur à Galeno 14. *methodi cap. 4* & 2. *ad Glauconem cap. de Oedemate*, quod sit *Tumor laxus, & indolens, ex pituitoso humore in partem aliquam influente*. Vel etiam quod sit *Tumor præternaturalis albus, mobilis, & indolens, à pituitoso humore, per congestionem frequentius, varius per affluxum humorum, progenitus*, ut à Recentioribus describitur. Pro pituitoso autem humore, lymphicum intelligunt, crassum tamen, lentum, & acidum.

Duplex etiam refertur, sicut de Erysipelate dictum. Alterum quidem exquisitum, ac legitimum, quod ex sola, & pura pituita, seu lymphâ dependet. Alterum spurium, & compositum, ex pituita, seu lymphâ, cum aliis humoribus commista; unde Oedema phlegmonodes, erysi-

erysipelatodes, & scirrholes exoritur, pro varietate sanguinis, bilis; vel melancholicæ cum pituita permixtæ: sive potius pro conditione varia ejusdem lymphæ acrioris, aut acidioris redditæ, vel à fermentis partium variis, vel à mora, motuque fermentativo in eadem inducto.

Hinc causæ Oedematis ponuntur, internæ quidem, præfati humores phlegmatici, & crudi, aut soli, & impermixti, aut cum aliis humoribus sociati, quos melius Recentiores lymphicos appellant, vel simplices; vel acore, acritudine, aut falsilagine vitiosa inquinatos. Externæ verò, quæcumque possunt ejusmodi crudos succos progignere, vel jam genitos alibi detinere. Quare Aeris constitutiones Austrinæ, aut Aquiloniæ, cibi glutinosi, potus gelidarum aquarum, sudores retenti, cæteræque evacuationes consuetæ, per vomitum, per urinam, per uterum, aut per secessum, impeditæ: vita sedentaria, habitus Corporis obesus, aliaque hujus generis, ejusmodi tumores oedematosos inferre valent.

Cum ergo Tumor visu albicans, & tactui laxus, ac mollis sit, prementi digito foveam relinquens, & cum nullo, vel nimis exiguo dolore, insensibilique calore, conspicitur, Oedema est: quocirca rarò, vel nunquam ad concoctionem perducitur, etiamsi multa, & valida fomenta adhibeantur; quin potius, si aliquandò secundum partem tenuiorem resolvi videatur, quæ remanet ita crassior, & consistentior evadit, ut irresolubilis, & incoquibilis fiat. Hinc difficillime solet esse curationis, & potissimum si in partibus glandulosis, & circa articulos, in tophos convertatur, eoque magis si puerulos, vel decrepitos invadat.

Quod ad Curationem, præ primis instituenda est ratio victus attenuans, & in cunctis sex rebus nonnaturalibus aperiens, ac dissolvens: Quare Aer vergat ad cali-

dum, sitque tenuis, & apricus, cum Tumor hic in diutissimum tempus protrahatur. Cibi sint attenuantes aromatibus conditi, cinnamomo, pipere, zingibere, croco, cæterisque, cum herbis aperientibus, petroselino, asparago, apio, sampsucho, nasturtio aquatico. Potus sit, vel aqua ex salsa, & assafrâ, lentisco, visco quercino, aniso, cinnamomo; vel vinum album, tenue, & quod diuresim promoveat. Vitentur glutinantia, humeficientia, excrementosa, cruda, acida, oleosa, pinguis, dulcia, consuetæ evacuationes omni studio concitentur; & alvus interjectis saltem vicibus, si fortassis refractaria sit, cienda, vel clysteriis ex hiera, agarico, diaphœnicone, rhodomelle, cum decocto rutæ, hyperici, mercurialis, parietariæ, rorissinari, althææ; vel saltem acibus balanis ad eundem finem comparatis.

Sanguinis detractio penitus interdicenda est, cum neque ab humore peccante indicetur, neque toleretur à patientis corporis constitutione. Potius purgantia per vices, & per epicrasin, locum habebunt, quæque phlegmagoga, & hydragoga dicuntur; ut præsertim, pilulæ de ammoniaco Quercetani, de Mastiche compositæ, aloephanginæ, cochinæ, electarium Alexandrinum, caryocostinum, aliudve simile. Post hæc, decocta dissolventia, ac sudorem leniter provocantia, atque etiam, si opus sit, sudatoria naturalia Puteolana, aut Pythecusana.

Supra partem affectam adhiberi poterunt discutientia, attenuantia, ac dissolventia, ut præ cæteris est Emplastrum de tacamahaca compositum, fodicationum Paracelsi, & ex galbano crocatum. Efficax non rarò compertum est, quod sequitur: *Ex sulphure crudo, cineribus vitis, & sale gemmæ ad partes æquales, cum farina fabarum, terebinthina, & cera ad sufficientiam, adjecto oleo nucum ad proportionem.*

Prodest quoque hoc Cataplasma, ex radicibus *althææ*, *bryoniæ*, & *ebuli* singulor. unc. ii. foliis *salviæ*, *rutæ*, & *sabiniæ*, cujusque ad m. j. Decoquantur in vino diluto cum modico *lixivii*, addendo sub finem acetiparum. Facta demum forti expressione, addantur *farinæ fabarum* unc. ii. cineris communis unc. semis, *salis communis* drac. vii. fermenti panificii unc. i. ÷. olei *chamæmel.* unc. iii. *adipis ursi*, vel *vulpis* unc. ii. & secundum Artem f. Cataplasma.

Quod si Oedema ad suppurationem tendere videatur, tunc applicentur ea, quæ illam adjuvent, ut est Emplastrum ex radicibus *althææ*, *liliorum*, cæpis coctis, limacibus, fermento, seminibus lini, & axungia, cum stercore columbino. Ad idem facit unguentum *althææ* compositum, Filii *Zachariæ*, c. *croceum*, ex quatuor gummatibus, & de mucilaginis. Maturaturn ferro candenti aperiatur, deinde mundificato ulcere adhibeatur unguentum Apostolorum; vel fiat unguentum ex *galbano*, *ammoniaco*, *resina terebinthi*, *pice*, & oleo veteri. Proderit etiam Emplastrum fondicationum tertiæ intentionis *Paracelsi*, & *stypticum Crollii*.

Ad Classẽm Oedematũ referuntur Meliceris, Steatoma, & Atheroma, quæ solum differre dicuntur pro diversitate materie in eisdem contentæ, referentis nempe conditionem mellis, adipis, vel pultis, aliufve rei consimilis tenacis, & consistentis, quæ sanè à varia lymphæ peccantis conditione diversificantur; si nimirum magis, vel minus glutinosa, & tenax fuerit, dulcis, aut insipida, acida, pontica; alba, fusca, aut aliter depravata apparuerit; & quandoque etiam propriis folliculis comprehensa. Quin, si articulorum intercapedines occupaverit, simulque unâ appendices musculorum, cum tendinibus, & ligamentis obsederit, excitabit genera illa Tumorum, quæ vulgò *Spinæ ventosæ* appellantur, & *exostoses* in ossium capiti-

bus ingenerant, læsis similiter periostiis, & glandulis mucilaginosiis eorundem; unde postmodum partes adjacentes sensim quoque contabescunt, & elanguent.

De Scirrbo.

Scirrhum appellant Medici Tumorem illum præternaturalem, qui ex humore lento, crasso, tartareo, & melancholico dicto originem ducit; quique durus, renitens, & doloris expers est.

Licet autem ex humore plerumque melancholico fieri dicatur, nil tamen obstat, quin etiam aliquando fiat ex lenta, crassaque pituita, facilè concrecente, & tophacea dicta, qualem gypseam Medici nuncupare solent, ut deducitur ex *Caleno* 14. *meth. cap.* 3. & 2. *ad Glauc. cap.* 4. cum maxima sit analogia inter melancholiam terream, & pituitam crassam, & concretam. Atqui lenta, & tenax lymphæ, acorem præcipuè austerum nacta, id totum efficit, cum tunc tartaream conditionem adipiscatur, & tantum non saxeam, si sale aliquo figente, vel à toto, vel ab hypochondriis, confoveatur.

Duas etiam faciunt Scirrhi differentias, & vel exquisitum, & legitimum; vel spurium, & illegitimum illum nuncupant, prout unus, & simplex humor, vel multiplex, & permistus in ejus generatione concurrerit; quamobrem, & Phlegmonodes, & Erysipelatodes, & Oedematodes dici etiam consuevit, à commistione vel sanguinis, vel bilis, vel pituitæ; sive potius ab humore tartareo, lymphæque crassiori, acidam magis, aut acrem conditionem nacta; quemadmodum de aliis dictum est. At verò gravior, periculosiorque fit, qui ab acido nedum figente, & austero, sed etiam pungente, atque erodente, progignitur, quod cum in fermentatione m facile adigatur, nedum dolorem excitat, verum

rùm etiam erosionem, ac febrim, ut propterea procedente tempore degeneret in Carcinoma; & non rarò etiam in Cancrum ulceratum, seu adaperitum, ex quo modicus, & ichorosus sanguis extillans, arsenicalis planè, ac stygiæ aquæ naturam sapit; unde Hippocrates occultorum, ac patentium Cancrorum nomina desumpsit, & Medici omnes, post ipsum, ab atra bile progenitos dixerunt impossibilis curationis.

Hinc causæ; & signa patent manifestè. Nam cum Tumor durus, & indolens observatur, in habitu Corporis melancholico, præcessereque causæ, crassos, tartareos, ac melancholicos humores progignere valentes, præsertim verò diuturniora animi pathemata, cum mœstitia, timore, anxietatè, vigiliis, haudquaquam de Scirrhi natura ambigendum. Variabit autem in materia humoralis, si durior, aut mollior; si cum nullo, vel cum aliquo dolore societur; si colorem referat omninò lividum, aut aliquatenus albicantem, vel rubentem. Quod si prætereà erosionem ostendat, cum majori dolore, ac febre, in Cancri naturam degenerabit.

Putatur Scirrhus sua natura incurabilis; ideòque vix, ac ne vix quidem, audent Medici, aut Chirurghi, illum attingere, aut quibusvis Medicamentorum generibus contrectare: sed & peior, cum degeneraverit in Cancrum, de quo Hippocrates 6. aphorism. 38. scripsit: *Cancros occultos habentes melius est non curare, curati enim citius pereunt.* Solum ergo convenienti victus ratione uti licebit, ut in longius tempus deferatur, sine graviore noxa patientis. Quare Aeris incolatus talis sit, ut malitiam humoris sensim corrigat; sicut cibus, & potus attemperans, atque acorem, & crassitiem humoris emendans. Animi pathemata vitentur, præsertim quæ mœstitiâ afferunt; atque consuetæ evacuationes Corporis debitum morè servant.

Venæ sectio nullatenus convenit, nisi tamen in foeminis, à suppressis, retentisque menstruis originem trahat, in quibus illa promoverè utile semper erit: etenim his plerumque accidit, in mammis, aut utero potissimum, Scirrhus pati.

Purgantia nonnisi in Cacochymis adhibeantur, quæ etiam blanda, & levia sint, ne partes affectas, aut humores magis lacerant; unde, cum opus fuerit, pilulæ tartaræ, & de ammoniaco, diasena, diatartarum, aqua solutiva, & syrupus de fumaria majori, aliaque hujus generis solummodò, in usum ducenda erunt.

Topica nullatenus suppurantia, aut maturantia sint, sed tantummodò lenientia, ac dolorem sedantia, si is valde urgeat. Cæterum incisiones, inustiones, aut causticorum administrationes omninò periculosæ, & nocuæ.

Interiùs verò exhiberi poterunt, quæ acorem humorum temperant, & crassitiem diluere valent, ut quæ ex chalyberitè præparato, & correcto, atque ex testaceis, & alkalicis fixis conficiuntur, locum dumtaxat habebunt, vitatis penitus acutis, aromaticis, spirituosus, & acribus; sicut & acidis, glutinosis, ac figentibus. Quæ denique Cancro, præsertim ulcerato, conveniunt, petantur à Chirurgis, quorum opera in his potissimum expostulatur, ferro, aut igne: quamquam nec isti audeant illum contrectare, quin potius appellent: *Noli me tangere.* Et de Tumorbibus hæc satis sunt. Reliqua in prædicto cap. 93. à Galenò recensita, facile ex nuper dictis elucescunt, proindè transeamus ad alia.

CAPUT XIII.

XCVI. in Galeno.

De Morbo secundum Numerum.

TEXTUS.

(T. 75.) **S**ed quoniam de his satis diximus, transire jam tempus ad ea, in quibus numerus non est secundum naturam. Cum verò duplex sit eorum differentia, quibus quidem aliqua particula deficit, his intentio est alteram efficere subministrando Naturæ eo, quo diximus paulò ante, modo. At quibus superabundat, hanc rescicare oportet, aut scalpello, aut igne, aut medicamine, quod urendi vim habeat. Hæc igitur omnia ferè sanare possibile est. At non æquè omnia generari possunt, ut in libro de semine diximus. Quædam verò sunt, quæ etsi generari non possunt, licet tamen pro ipsis alterum efficere, quemadmodum in osse ex toto sublato, alteram substantiam in ejus sede reponere à carne, atque osse differentem. Est enim, quæ in ejus gignitur loco, quædam veluti caro, callosa, vel callus carnosus, & processu temporis magis, ac magis ad calli duritiem transfertur, cum ab initio carnis potius imitetur naturam. Quacumque verò parte sublata, cum neque eandem secundum speciem, substantiam, neque similem efficere possumus, tertia nobis intentio, quendam decorem invenire, quemadmodum in mutilationibus.

PARAPHRASIS.

P Rater ægritudines ad malam formationem pertinentes, sunt & aliæ, quæ in numero, sive quantitate discreta partium, Corporis constitutionem integram componentium, consistunt; atque

de his nunc breviter etiam Galenus agit. Hæ autem vel in defectu, vel in excessu esse possunt. Deficiunt in numero partes, ut cum Dens, Nasus, Digiti, Manus, vel à Nativitate defuere, vel aliqua de causa externa, aut etiam interna, avulsæ, aut rescissæ sunt. Excedunt verò si ex mala formatione plures quàm deceat, sint ingenitæ. Et summatim edocet, excedentes in numero, esse auferendas, vel sectione per ferrum, vel ustione per ignem, cum ferro candenti, vel ope causticorum medicamentorum. Deficientes verò, aut restauratione similis, aut adiectione æquipollentis, ut dictum in resectione carnis, ossium, ligamentorum, &c. In mutilationibus autem membrorum, adjicere licebit solum, quod deformitatem minuat, vel auferat, atque adeò decorem, quoad fieri possit, cæteris partibus, totique Corpori inducat. Quæ ratione novimus quosdam ex mutilatis, brachio, tibia, aut pede, tam affabrè per Artem sibi ligneas illas partes accommodasse, ut etiam opera quæcumque usualia peragerent; adeoque & manibus apprehenderent; & incederent, aut starent pedibus, sine manifesta, & conspicua deformitate. Ad avulsos, vel decisos dentes, mirum sanè, quàm dexterè Moderni quidam Artifices Dentarii, nedum paucos dumtaxat dentes, sed & totam illorum seriem, ordinem, structuramque perbellè restituerint, ut ne vix quidem eorundem defectum quispiam internosceret. Cætera petantur ex superius dictis.

C A P U T XIV.

XCVII. in Galeno.

De Morbo secundum Magnitudinem.

T E X T U S.

T. 76.) **C**ommunicat autem hoc genus totum cum eo, quod ad Magnitudinem pertinet, nam quodcumque ex eo est secundum naturam, illi propinquum existit. Id verò tantum se junctum est, ac separatum, quod inter ea, quæ sunt è genere præter naturam, connumeretur. In quo quidem prima intentio est ablatio. Si verò hæc impossibilis existat, secunda est transpositio, quemadmodum in suffusionibus. Quæcumque verò non integris partibus, sed partium tantummodò particulis deficiunt, aut excedunt Naturæ modum, resectio quidem, vel generatio in his, quæ deficiunt; ablatio verò, & abolitio in his, quæ superabundant. Quare neque in ipsis altera est intentio, neque medicaminum forma genere diversa.

P A R A P H R A S I S.

Pro curatione Morborum in Magnitudine, duo etiam remediorum genera proponit: unum quidem in Ablatione ejus, quod excedit, aut in Restitutione ejus, quod deficit; quemadmodum supra dictum est: Alterum verò in transpositione, ut in suffusionibus oculorum, in quibus humor ante pupillam oculi concretus, atque ad instar Telæ, & Panni densatus à peritis Medicis Oculariis deponitur, ita ut pupilla libera remaneat absque ulla opacitate. Id ipsum agendum in Transpositione lapidis hærentis in vesica, qui etiam per Ablationem, aut per Attritionem in fragmenta, ut facilius extraha-

tur, auferri debet; sicut pariter in Polypo Narium, Cerumine Aurium, aliisque similibus: quamvis hæc alius generis esse videantur; de qua re parum interest hinc movere quæstionem, veluti ad propositum nostrum nihilum penitus conferentem.

C A P U T XV.

XCVIII. in Galeno.

De Morbo secundum Situm.

T E X T U S.

(T. 77.) **S**ed jam veniendum est ad reliquum salubrium Causarum genus, quod ea Corpora emendat, quæ in situ sunt vitiosa: veluti Luxationes, & intestinum in Scroto. Fit autem hoc ex violenta tensione, atque impulsu: hoc verò ex dilatato, ac rupto continente. Quare, & duplex sanandi modus, alter quidem ad oppositam partem ei, ad quam facta est permutatio, intendendo, atque impellendo. Alter verò id, quod continet firmitus, solidiusque reddendo. Quibus verò viis, ac rationibus singula inveniri possint, in lib. de Arte curandi explanavimus.

P A R A P H R A S I S.

Non hinc de vitiis, quæ nonnunquam à Nativitate acciderunt, in situ partium malo, ut cum Oculi in fronte, Brachia in femoribus, Pedes non antrorsum, sed retrorsum vergunt, aut aliter partes aliæ Corporis sunt vitio Formationis progentæ, agendum: Nam hæc ad Monstruositatem potius pertinent, quàm ad Morbos; sed solum de vitioso situ in partibus luxatis relicto, vel in Intestino in Scrotum prolabente, aut etiam in Inguinibus prolapso, quemadmodum Galenus

intextu meminit, exempla Morborum in situ afferens. Quare luxationes hinc propriè intelligendæ erunt, cum os ab osse adedò dimovetur, ut debitum situm non servet, ac proinde præter dolorem, impedimento est motui ipsius Articuli, & muscutorum, eidem adjacentium, læditurque pariter figura, & conveniens, ac naturalis habitudo illius membri. Indicatio autem curativa in his erit remittere, ac reducere membrum luxatum in suum pristinum, & naturalem situm; illudque reductum in longius tempus detinere, ac conservare, quousque fuerit exactè colligatum, perfectèque cœnitum, & conjunctum, cum reliquis ossibus Articuli. Tunc autem exactè repositum illud judicabitur, cum dolor desierit, atque in motibus hinc, illucque nullus tristis sensus percipietur; itemque tumor, inflammatio, rubor, aliaque symptomata, quæ prius ex luxatione acciderant, penitus recesserint. Quo facilius in opere peragendo summa Chirurghi peritia, ex Anatome, & articulationis ossium notitia, expostulatur, quæ tamen plerumque deficit, potissimum apud Nostrates, qui partem hanc chirurgicam, in reponendis ossibus luxatis, penitus neglexere, illamque ad Rusticos, & Plebejos, maxima ipsorum ignominia, delatam, nullatenus revocare satagunt.

In Intestini prætereà delapsu, sive in Scrotum, sive in Inguina, eadem opera Chirurgorum exquiratur, qui primùm lenientibus, ac laxantibus oleis, vel unguentis, intestinum in suam sedem reponere, & collocare debent; mox cerotis, emplastris, ligaturis, aliisque similibus, detinere; & si fieri possit, etiam Peritoneum relaxatum, aut dissolutum conglutinare, & confirmare conentur, evitando causas omnes, quæ violenti concussione deinceps impellere, dilatare, aut relaxare possint. Porro hæc sicut facilius in Puel-

lis salubriter peragi solent; ita in adultioribus parùm, vel nihil proficiunt.

CAPUT XVI.

XCIX. in Galeno.

De Causis Præservativis.

T E X T U S.

(T. 78.) **C**onsequens est, ut ea omnia exequamur, quæcumque in superiori sermone dicere distulimus. Vocant autem eadem Præservativa. Est autem horum triplex secundum genus differentia. Prima quidem Hominis, qui integræ fruitur sanitate: Secunda verò ejus, quæ non integrè valet: Tertia ejus, qui ægrotat. Primum igitur genus ad salubrem attingit Artem, atque in duas, ut antea diximus, dividitur Partes: Secundum verò ad præservativam spectat. Tertium ad curativam. (T. 79.) Hoc autem universum genus circa humores præcipue negotiatur, quos neque lentos esse oportet, neque crassos, neque aquosos, neque plurimos, neque vehementer calidos, ac frigidos, neque mordaces, neque putredini obnoxios, neque venenosos. Nam ubi acuti fuerint, generant morbos. Augentur verò nonnunquam eadem ex causa, quæ ab initio generavit. Illud autem plerumque accidit, ut sua alteratione reficiant eos, qui sunt in Corpore humores. (T. 80.) Intentio verò, & horum sanatio duplex existit, alteratio, & evacuatio. Alterantur igitur, vel ab ipso Corpore concocti, vel ab aliquibus aliis facultatibus, quæ vim medicamentosam habent. E quorum numero etiam sunt ea, quæ exitialium ferarum venenis adversantur, ac præter ea pharmaca, quæ deletoria, hoc est venena, appellantur, trans-

mutant. (T. 81.) Evacuantur autem salubris calidis medicaminibus, & purgationibus, & clysteribus; & sudoribus, & vomitibus. Hæ igitur sunt communes evacuationes. Proprie autem ex locis, in quibus coacervantur, assumuntur, ut in libris de salubribus ostendimus, tertio præsertim, ac quarto, in quibus de lassitudinibus egimus, ac reliquis dispositionibus, quæ lassitudini natura proximæ sunt. Promptius enim evacuantur per ventrem quidem, quæcumque in primis venis continentur superfluitates; quæ autem in his, quæ in hepate sunt, per urinæ meatus: atque in toto corpore per sudorem: sicuti quæ in capite, vel per palatum, vel per nares, vel per utrumque: quæ verò sunt in spatiis thoracis laxioribus, per guttur simul cum tussi, quæ in renibus sunt, vel vesica per urinam. At attrahendi ex omni loco ad oppositas partes communis indicatio est ad quam maximè distantia: derivandi verò ad vicina. (T. 82.) Quæcumque verò hujuscemodi curant dispositionem, causas salubres appellamus: sicuti insalubres eas, quæ adaugent, & neutras, quæ neque obsunt, neque juvant. Posset verò quispiam neque omninò causas appellare, quemadmodum major pars sophistarum, qui rerum quidem differentiam invenire contemnunt, plurimum verò temporis in nominibus conterunt, contra quos in aliis uberius disseruimus. At pars quidem Artis Præservativa talis est.

P A R A P H R A S I S.

QUandoquidem Universa Medicina, tota quanta est, versatur circa Corpus, vel conservandum, vel curandum, vel præservandum, juxta triplicem illius statum Salubrem scilicet, Insalubrem, & Neutrum. Postquam hæcenus Galenus de prioribus duobus sufficienter egisset, supererat de præservandis Corporibus generaliora quædam præcepta

recensere, quæ tam præsentis Capite, quàm sequenti, prosequitur, ad totius hujus Operis complementum, utque præservativam Medicinæ partem ex integro complectatur, triplicem præservandorum differentiam exponit, atque unicuique, quæ convenient remedia, breviter commemorat.

Prima quidem ponitur Hominis, qui integra sanitate fruitur, ne in ægritudinem cadat: Secunda ejus, qui non integrè valet, sed ne in pejus ruat, atque in pejorem ægritudinem labatur, præservari debet, & quod fieri potest in meliorem statum revocari, ut in statu Neutro: Tertia demum ejus, qui ægrotat, ne tandem desinat in interitum, sed à morbo revalescens, in pristinum sanitatis statum reducatur. Quamobrè subdit, Primam, pertinere ad Partem Medicinæ salubrem, idest Conservativam, quæ propterea ope conservationis Corpus ab Insalubritate tueatur: Secundam penitus, ac omnimodè spectare ait ad Præservativam: Tertiam denique ad Curativam. At verò, quoniam quidquid boni, vel mali Corporibus accidit, ab humoribus, & potissimum à sanguine, benè, vel malè se habente, provenit; proinde inquit, Intentionem primam in cunctis esse, erga ejuscemodi humores, vel corrigendos, vel repurgandos: cùmque multifariam isti, si à sua naturali crasi desciverint, peccare possint, in copia nimirum, si exceßerint; in vitio verò, si lenti, & crassi, vel tennes, & nimium fluxiles, atque aquosi: si plus justo frigidi, vel calidi: si acres, mordacesque evaserint; si in putredinem, aut corruptionem abierint, aut aliter, aliterque affecti fuerint, adhuc in veneni naturam commutati; propterea ad ejusmodi defectus corrigendos, ac tollendos, præcipuæ indicationes dirigendæ erunt; quin & insuper, unde istiusmodi vitia processerint, sedulò inquirendum, ut si

ve correctione solùm, sive etiam evacuatione promota, deleantur. Redigit autem omnem sanationis, & præservationis viam ad duas principales, unam, quæ alteratione, alteram, quæ evacuatione perficitur. Si namque humores non multum à naturali statu recesserint, sintque faciliè emendabiles, sola alteratione, correctio neque in pristinum statum salutarem reducitur. At verò si in alienam, atque Naturæ penitus inimicam, conditionem degeneraverint, erunt prorsus eliminandi, & perfecta, exactaque evacuatione, extra Corpus educendi. Id ipsum agendum quoque erit in exitialium ferarum venenis, atque in iis, quæ pharmaca deleteria nuncupantur, aut etiam venena propriè dicuntur, utpotè quæ ex diametro humoribus, & partibus solidis adversantur, atque idcirco insidiantur vitæ, & fomitis vitalis filum præcidunt. Quæ autem evacuationum genera, ad id exequendum adhibere oporteat, ad duas etiam classes revocat: & quidem alias communes, & generales appellat, ut quæ per cathartica, clysteres, vomitoria, sudorifica peraguntur: alias particulares nuncupat, & uniuscujusque partis proprias, quales speciatim fiunt per nares, aures, os, de quibus alibi à se actum dicit. Verumtamen promptius semper, atque expeditius, quæ superfluitates in primis ductibus coacervantur, per ventrem, & secessum educuntur: quæ in Hepate sunt, per vias urinæ (ea tamen distinctione adhibita, de qua supra ex eodem meminimus, num in parte, ejus gibba, vel concava), quæ per totum Corpus sunt diffusæ, sudoribus: quæ in capite, per palatum, per nares, vel per utrumque sputo, moco, fursure, quæ autem collectæ sunt in spatiis pectoris laxioribus, per guttur, simul cum tussi, quæ in Renibus, vel vesica, per urinam. Sed & servandam quoque esse, subdit, Revulsionem, & Derivationem, aut ad

distantes partes, aut ad vicinas. De quibus omnibus cum abundè satis superius dictum sit, non est ut hic inutiliter repetentes in longius sermonem istum distrahamus. Solùm superaddere convenit, hæc omnia appellari à Galeno causas Salubres, sive conservantes, sive efficientes sanitatem, si malas ejusmodi humorum, aut partium dispositiones, adimant: Insalubres verò, si inferant, foveant, vel adaugeant: Neutras denique, si neque proficiant, neque officiant, vel etiam, si modò juvent, modò noceant, pro ratione, quamquam & has, nec omnino causas posset quispiam appellare, quemadmodum major pars sophistarum, qui rerum differentias invenire contemnunt, postremo loco concludit. (a)

CAPUT XVII.

C. & ultimum in Galeno.

De Parte Artis, quæ Convalescentes reficit, & Senibus congruit.

T E X T U S.

(T. 83.) **Q**uæ autem reficit, atque instaurat, in Convalescentibus, & Senibus locum habet. Quæ verò sit horum dispositio, & à quibus præcipuè causis ad naturalem reducitur habitum in libris, in quibus de medendi Artè tractavimus, abundè explicavimus; sed nunc per capita dicetur. (T. 84.) Dispositio igitur talis est. Probus quidem, sed exiguus est sanguis, atque una cum ipso spiritus animalis, atque vitalis: ipsæ verò particule solidæ sicciores, & idcirco eorum vires sunt im-

(a) V. etiam Gal. lib. de Confit. Art. Med. cap. 19.

imbecilliores ; atque earumdem ratione corpus universum , frigidius . (T.85.) Causæ verò salubres , quæ hanc emendant dispositionem , ut uno comprehendam capite , sunt quæcumque præsentaneum , atque securum exhibent alimentum : secundum partem , autem , in motibus moderatis , & cibis , potibusque , ac somnis consistunt . (T.86.) Sunt verò motus materiæ , vehicula , ambulationes , frictiones , & balnea ; & ubi non parum se ex his profecisse senserint , paulatim se ad consueta opera transferant ; Cibus autem assumunt in principio quidem humidus , & concoqui faciles , neque frigidus : ac cum progressi fuerint , eos etiam , qui plurimum præstant alimentum . Potus verò opportunus est , vinum quidem ætatem habens mediocrem , in substantia autem purum , atque perlucidum , quod scilicet vel substarum , vel album existat , atque suaviter olens : gustui verò neque aqueum omnino , neque cum aliqua insigni qualitate , aut dulcedine , aut adstrictione , aut acritudine , aut amaritudine sentiat . (T.87.) Ut autem proximè diximus , de hisce omnibus in libris de Arte curandi conscriptis , plenius disseruimus . Nunc enim neque omnia particulatim recensere est nostri propositi institutum , sed solum capitum mentionem facere intendimus eorum , quæ in aliis voluminibus latius explicavimus . Quorum omnium si prius , & numerum , & qualitatem exposuero , finem Libro imponam . Diximus itaque prius , quod alter est Liber , in quo de constitutione Artis Medicinæ disseruimus . Antecedunt autem eum alii duo de Constitutione Artium : sed hi quidem una cum hoc , cui nunc extremam manum adjecimus , seorsum sunt ab aliis libris , in quibus plenior doctrina explicatur . Illi verò talem inter se ordinem habent . De Elementis quidem secundum Hippocratem liber unus , &c.

Generaliora dumtaxat Capita Analæptices hic tantummodò rememorare velle fatetur Galenus ; cum de iisdem specialius alibi se egisse testetur ; præsertim verò in libris de *Methodo Medendi* . Quæ propterea convalescentibus , & Senibus contingant , solummodò referens , malam in illis dispositionem exoriri docet ex sanguinis potissimum mutatione partibus inducta . Equidem licet plerumque sanguis in his probus sit , est tamen exiguus , debilis , effœtus , spiritibus neutiquam abundans , aut prævalens , adeoque tum in organis vitalibus , tum in animalibus deficiens : quare & vires imbecilliores in ipsis observantur , & operationes omnes elanguent . Hinc Corpus totum frigidum tactu percipitur , & in cunctis partibus siccus apparet : id quod qua ratione senibus præsertim accidat , latè à Nobis superius monstratum est , ob mutatam sanguinis diathesim .

Quæ ergo causæ possint illatam hanc Corpori dispositionem emendare , aut etiam in meliorem reducere , præcipuè referuntur , quæcumque scilicet rectum usum sex rerum nonnaturalium comprehendunt ; speciatim verò , quæ alimenti rationem habent , eamque moderatam . Sed & desumendas quoque illas esse , subdit , à motibus , & exercitiis convenienter adhibitis ; itemque somno ; vigilia , aeris incolatu , cæterisque . Quamobrè cibi facilis sint digestionis , non frigidi , seu frigorifici dicti , nec crudi , crassi , viscosi : Senilis enim ætas ab his non leviter offenditur ; & convalescentia Corpora , præ languore , ex præcedenti ægritudine contracto , ab eisdem pariter læduntur ; & præsertim si ventriculus adhuc langueat . Potus sit quoque moderatus , & opportunus , quique vini usum per antecedentes ætates contraxerunt , ad senium

nium perducti, mediocritatē servant; quin, & vino veteri solūm, penitusque depurato, atque omni feculenta, & sulphurea parte exuto, utantur; coque vel subflavo, vel albo, suaviter olente, gustui grato, & facilē digestibili, quemadmodū idem Galenus l. 5. de san. tuend. c. 5. pluribus insinuat. Neque solūm peculiaris ratio habenda est ciborum, & potuum, sed & Aeris quoque, atque exercitationum, & evacuationum consuetarum cujusque statui Naturæ convenientium, & eorum præsertim excrementorum, quæ assiduò progignuntur, de quibus peculiari Capite idem Galenus agit 1. de tuend. valetud. cap. 14. Et quoniam quæ per poros cutis insensibiliter perpetim transpirant, majorem illorum partem implent, observatione Sanctorii, iis propterea specialiùs incumbendum, potissimum ope, & beneficio frictionum, quas ex mente Hippocratis Galenus ipse pluribus Capitibus 2. libro de tuend. valet. examinavit, & ad sanitatem conservandam maximoperè commendavit; quippè quæ poros cutis amplificando, ac humores in glandulis subcutaneis conten-

tos extricando, dissolvendoque, plurimum conferunt ad sanguinis repurgationem, adeoque ad sustentationem vitæ, præsertim in senibus, quibus manifestior, ac laboriosior exercitatio præscribi nequit. Quamobrēm idem Galenus lib. 5. c. 3. ejusdem Operis, afferens illud Hippocratis: *Senum nemo quietem ex toto postulat; sed nec exercitium vehemens*, subdit: *Cen enim ventulo quodam excitari, accendique calor eorum desiderat, vehementiore autem motu deicitur.* (a) Verum de his omnibus, peculiari Opusculo, de Recto usu sex rerum nonnaturalium, latius mox agemus, ubi etiam cujuscumque status Corporis habitudinem, & qua methodo tractari debeat, in usum practicū reducemus. Quocirca finem his imponamus. Cætera, quæ in calce huius Capituli Galenus memorat de Libris à se conscriptis, quorum notitiam opus hoc præire debere ait, eosque propterea singulatim enumerat, cum unicuique vestrum ex ipsius Galeni textu patere possint, nec peculiarem explicationem exigant, consultò prætermittimus. Atque ita esto.

F I N I S.

A. M. D. G.

D E

(a) Totus quintus Liber de San. tuenda in gratiam Senum conservandorum scriptus est, quem vide. Sicut etiam de Const. Artis Med. cap. 20.

RECTO USU

SEX RERUM NONNATURALIUM.

P R A E F A T I O.



I quæ unquam alia, ad Rem Medicam, ritè, rectèque faciendam, utilis, ac necessaria est pertractatio, planè quæ de sex Rebus Nonnaturalibus dictis, in-

stitui solet, longè, latèq; cæteris omnibus præcellit, & utilior simul est, ac præstantior: quippe quæ ad Corporis humani sanitatem conservandam, aut præservandam, morbosque abigendos, maximoperè confert, immò omninò necessaria est. Cùm enim Rex Nonnaturalis, causæ sint necessariò alterantes, utque loquitur Fernelius, circumtensa nobis teneant retia, à quibus evadere non est datum, quinimò iisdem perpetim indigeamus; propterea fit, ut industriam omnem, omnemque curam adhibere necessum sit, ut pro temporis opportunitate ipsis convenienter utamur. Quamobrem jure optimo Galenus 3. *Artis Medicæ*, & alibi, inter reliquas causas omnes, Corpus humanum sive ad bonum, sive ad malum alterare valentes, illas prætulit, atque in re Medica specialius considerandas esse monuerit; unde plerisque consultum, iis tantummodò opportunè, congruenterque administratis, humanæ salutis, atque incolu- mitati, satis, superque prospici posse. De his ergò propositum Nobis est, breviter, ac dilucidè, peculiari hoc Opusculo, in usum Hominum salutarem,

utiliora referre, atque examinare, ut unusquisque suæ possit, (sine aliorum auxilio) propriæque valetudini consulere.

Quænam autem istæ sint, non est quòd multum elaboremus: Constat enim apud omnes, Nonnaturales causas esse, quæ indifferentes simul sunt ad juvandum, & ad nocendum, & quarum usus, ad vitam conservandam, omninò necessarius sit. Hæ autem communi voto recensentur, Aer: Cibus, & Potus: Motus, & Quies: Somnus, & Vigilia, & Inanitio, ac Repletio: & denique Animi passiones; ad differentiam Causarum Naturalium, & Præternaturalium, quarum illæ perpetuò aptæ natæ sunt juvare; hæ verò penitus, penitusque nocere.

Sed & istæ solùm inevitabiles simul sunt, ad contradistinctionem earum: quæ contingentes, ac fortuitæ appellantur, adeòque prudenti hominum consilio, evitabiles fieri possunt; uti sunt Ictus, Casus, bestiarum Occursus, idque genus alia: At verò cuique patet, vitam absque Respiratione, adeòque sinè Aere, diutiùs servari non posse: atque ad instaurandas partes Corporis, quæ jugiter consumuntur, necessaria esse esculenta, & potulenta; ad quæ exquirenda, exolvendaque, Motu Corpus egere; ob absumptum verò ex motu sanguinem, viresque labefactas, opus esse Quie.

Quiete, sicut pariter Somno, & Vigilia ad easdem instaurandas, & ad naturales simul, & animales operationes alternatim peragendas; itemque alibiles ex assumptis cibis partes, Corporis partibus ad nutritionem suggeri, inutiles verò, & excrementosas repurgari oportere; proindeque Repletionem, & ex adverso Inanitionem necessarias esse: ac postremò, quia mala, vel bona assiduò nobis occurrunt, quæ Animum alterant, ac perturbant, totumque corpus exagitant, & variis, variisque pathematibus, ex varia, diversaque illorum apprehensione, obnoxios reddunt, illis propterea perpetuò affici, atque alterari contingit.

Harum ergo rectum, convenientemque usum in posterum explicaturi, quæcumque ad praxim Medicam magis facere videbuntur, sigillatim referemus, & examinabimus, exordium capientes ab Aere, omissis interea iis, quæ ad Physiologicam partem pertinent, utpote quæ à Physicis sunt accuratissimè pertractata.

De Natura, differentia, & usu Aeris.

QUAMVIS nonnulla de Aeris Natura superius memoraverimus, non tamen abs re factum puto, si aliqua alia in clariorem illius notitiam hic denuò referamus, & ibidem prætermissa adjiciamus.

Et quidem primò, à veritate nimium aberrant, qui Aeris Naturam à primis putatis qualitatibus desumunt; nam præterquamquòd in his nec ipsimet conveniunt, cum Stoici illum sua natura frigidum humidum constituent, quibus assentiri videtur Galenus, (a) subscribit-

que Cardanus: Et Aristoteles 2. de Gener. & Corrupt. c. 3. humidum in prædominio, & calidum in subdominio fateatur: & alii æquè calidum, ac humidum: Vallesius verò 1. contr. 3. temperatum; & Averroes (b) aqua humidior: ac demum alii ad explendam latitudinem binarum qualitatum, illum in gradu octavo humidum, calidum in septimo, & frigidum in primo faciant; quis tamen est qui non videat posse Aërem omnes suscipere qualitates, cunctisque alterationibus obnoxium fieri, atque adeò non ab his ejus naturam esse desumendam: si namque qualitates istæ essent illi propriæ, insitæ, ac naturales, ab eodem profectò unquam separari nequirent, & per assiduam earundem mutationem, illum in perpetuo statu violento detinerent, cum nusquam sua propria, naturali; temperie frueretur, & nuspiam sub eodem statu unius, ejusdemque qualitatis diutino tempore permaneret, ab una in aliam, per levissimum momento, transilire coactus. Sed & ea ratione, cunctas eidem appingere, juxta doctrinam Aristotelis, æquè benè liceret; quandoquidem ex superius dictis, quælibet ex putatis his primis qualitatibus eidem attribui potest: quin & incorrupta substantia, fervens adhuc in in æstu, & algens in hyeme, siccus in Borea, & summè humescens in Austro, æquabiliter conservatur.

Cum itaque cunctis ejusmodi mutationibus obnoxius sit Aer, & omnes propemodum qualitates prompte, & amicabiliter amplectatur, nullam exinde perpeffus in sui substantia corruptionem, ac æquè bene cum ipsis omnibus consistat, nihilum substantialiter immuta-

(a) Gal. 2. de Simpl. med. fac. 2., 8. de usu partium 3. l. quod An. mores, &c. l. 4. Cardan. 2. de Elem. c. 4.

(b) Collect. 2. cap. 2.

tatus; profectò dicendum à prædictis qualitatibus naturalem suam constitutionem non emendicare. At verò quod proprium, atque inseparabile assiduò in Aere experimur, id est, ut Corpora quæcumque ambiat, suaque fluiditate, tenuitateque cuncta pervadat, ac subeat, & quaqua versum, sive impulsus, sive distractus, sive compressus, & sive aliter, aliterve alteratus, aut commotus, diffundatur, atque ex vi elastica resiliat, tumeat, & attollatur. Quare in hac fluiditate, permeabilitateq; ab insito, ingenitoque elatere, substantialis, naturalisque illius constitutio reponenda videtur. Id autem si fortassis amittat, statim in sua substantia permutatur. Dupliciter verò hoc illi accidit, vel cum immodicè crassescit, aut constipatur, ut in fodinis Metallorum, in subterraneis cryptis, cellis vinariis, aliisque similibus; vel cum plus justo distrahitur, attenuatur, & rarefcit, ut in altissimorum Montium fastigiis, & in Machina Pneumatica Boylea, quemadmodum alibi à Nobis est demonstratum. Fluiditas autem hæc adeo est cum elatere conjuncta, ut tota videatur ab illo penitus procedere, qui sicuti convenienter per illum interspersus, naturalem Aeris statum conservat, ita ex adverso constipatus, aut distractus ejus naturam conturbat, & permutat. Hinc si Aer tantam aliquandò patiatur constipationem, concretionemque, ut suo elatere privetur, fit, ut crassescat, ut aqua sibi analogæ: & si rarefactionem, distractionemque omnimodam subeat, assimiletur Ætheri sibi attiguo: ad Naturam enim utriusque accedit; & medius, qui inter utrumque Aer est, Respirationi & animalium, præsertim terrestrium, vitæ tuitioni, utilis, ac necessarius propterea fit: quare qui ob summam coarctationem, aut exsolutionem, elatere destitutus, aut eodem ne vel minimum re-

centatus, aut etiam pravis halitibus, aliunde suggestis, coinquinatus, & pestifer est effectus, ad Respirationis usum ineptus evadit.

Et quidem innumera ferè sunt, quæ Aeri infensa, naturalem ejus constitutionem permutare possunt: unde, fluiditate vitiata, mala plurima Corporibus contingunt. Præ primis autem, halitus, ac vapores ex Terra, & Aqua erumpentes, Aerem diversimodè conspurcantes, nedum elaterem inficiunt, distrahunt, aut contrahunt, sed etiam Sanguini, & Cordi, nocumento sunt, ut evenit ex fodinis, Terræ hiatibus, voraginibus, Aquis stagnantibus, lacunis, cadaveribus insépalatis, mephitis. A Ventis quoq; Cometis, procellosis Imbribus, aliisque meteorologicis impressionibus Nive, Grandine, Pluvia, Pruina, Caligine, Aer non leviter inficitur, & inquinatur. Ex accessu pariter, & recessu Solis à nostro vertice, à quibus Temporum vicissitudines, nedum algores, & æstus, verum etiam aliæ, ex causis aliis nobis ignotis, alterationes, immutant, turbantque Aerem, quem plus solito, exinde comprimi, aut distrahi contingit; itemque ex Eclipsibus, ortibus, & occasibus stellarum, solstitiis, æquinoctiis, aliisque, uti testatur Hippocrates in libris *de Aere, Aquis, & locis* & 1. & 3. *Epidemiorum*. Incrementis etiam, & decrementis Lunæ phases plurimum pariter immutant, alterantque Aerem, sicut etiam ejusdem depressiones, elationesque in suis Perigæis, & Apogæis, in quibus illum densari, aut expandi pariformiter experimur, quemadmodum ex Barometris, & Hygrometris instrumentis palàm fit.

Quod ad Aeris differentias pertinet, quamvis ille sua natura simplex nullas differentias patiatur, quas Scholastici essentielles appellant; à Medicis tamen consideratus, quatuor accidentales subit

desumptas à Substantia, Situ, Motu, & Qualitatibus illi supervenientibus.

Ratione Substantiæ, alius Aer dicitur crassus, alius tenuis, alius purus, & serenus, alius impurus, & nebulosus. Ratione Situs, vel Aer est montanus, vel maritimus, vel campestris, & vel apertus, aut valle conclusus. Ratione Motus, dicitur Aer mobilis, instabilis, & intransquillus; vel contra stabilis, tranquillus, & immobilis. Postremò, quod ad Qualitates, alius est lucidus, luminosus, & apricus, alius obscurus, caliginosus, & opacus: alius frigidus, alius calidus, alius humidus, alius siccus. Sed & siccus prætereà dici potest, vel negativè; ob inopiam imbrium, & ventorum australium; vel positivè, propter caloris excessum, ut tempore vigentis Caniculæ, cum à nimio Solis æstu, Aer summè exarescit, & extenuatur; vel denique propter misturam halituum, è mineris erumpentium, quarum vis sit humidos vapores absumere, aut deprimere, vel etiam à flatu ventorum borealium, nebulas, & vapores fugantium, aut figentium, & depellentium ad ima; ut in diuturnis serenitatibus.

Sed & præter has, possunt quoque aliæ similes, Artis industria comparari, unitantum loco, vel domui aptabiles; putà cum ex Aquis odoriferis, aut Aromatibus, peculiari quadam vi, facultateq; imbuitur Aer, ut in affectibus Capitis, vel Pectoris, in hystericis affectionibus, doloribus articulariis, aliisque benè, vel malè olens, ac diversimodè vaporosus efficitur, his, aut illis halitibus affectus, qui valeant roborare, aut rarefacere, diaphoresim, aut sputum movere; idque genus alia. Id quod in Natura quoque, peculiari quorundam locorum habitudine comperimus, ubi scilicèt vel à Thermis, & fossiliis, ac mineralium fodinis, præsertim Sulphuris, Vitrioli, Mercurii,

Æris; vel à cultura plantarum odoriferarum, quo præsertim tempore florent, ut Rorismarini; Croci, Jalsomini, Rosarum, Auranciorum, Citriorum; vel contra à malè olentibus Papavere, Cicuta, Nappello, umbrisque noxiis arborum, ex quibus non semel compertum, gravi somno soporari, aut aliter infici, diutiùs ibidem immorantes.

De usu Aeris postremò, magna est inter Doctores controversia. Attamen major illorum pars existimat Respirationi inservire, cum Respiratio describatur, *Aeris per Os, & Nares attractio*, atque impossibile videatur viventem non respirare, & respirantem non vivere. Verumtamen neque in hoc inter illos convenit, cui usui Respiratio ista, & Aeris attractio sit. Aristoteles, & Galenus ad Cordis æstum, & sanguinis fervorem attemperandum; Cartesius ad sanguinem nimio motu attenuatum, aliquantisper figendum, cui videtur etiam inhærere Deleboe Silvius *Disputationū Medicarum* 7. Gassendus ad repurgandas transcurrentis per pulmonem sanguinis impuritates. Recentiores verò Anatomici ad promovendum circulantis sanguinis trajectum, è dextro in sinistrum cordis ventriculum, per pulmones, deservire arbitrantur.

Verùm hæc (ut in nostra Theoretice latius dictum) non omni ex parte ejus usum in Animalibus explent; is enim nisi assiduò recentetur, planè tuendæ vitæ ineptus evadit, ut in occluso undique conclavi, aut dolio, experimur. Quamobrem existimavit Paracelsus, quidpiam inesse Aeri vitali elixiri valde analogum, quod restaurandis spiritibus inserviat, & vitæ fomitem tueatur: de qua etiam re alia multa retulimus *Cap. de Respiratione*. Porro Aeris ope, nedum Respiratio peragitur, verùm etiam Loquela, Olfactus, Auditus, Visus, qui non nisi intermedio Aere perficiuntur. Sed & peruti-

rutilis quoque valde est, quæ per poros Cutis fit perspiratio absque Aere impossibilis; quin & tota ejusdem vis, atque efficacia in tenui illa substantia consistere videtur, quæ per ipsum diffusa, elastica appellatur, & elateris nomine insignitur: quæ forte absumpta, distracta, vel compressa, reliquum Aeris inutile prorsus remaneret.

Quenam sit Salubrior Aeris constitutio.

QUæsitum hoc in sanis dumtaxat Corporibus proponitur examinandum: Nam in ægris, pro Morborum, & Causarum Morbosarum varietate, varius Aer est præscribendus. Quare omni ægritudine remota, quæritur hic solummodo, quinam Aer salubrior sit existimandus, ad Hominum vitam, sanitatemque conservandam.

Galenus 3. *Artis Med. t. 10.* In Corporibus optimè constitutis Temperatum Aerem salubriorem arbitratur. In iis verò, quorum à mediocritate, vel ab optima constitutione aliquis est recessus, tantum, inquit, ab ipsa mediocritate evariare oportere, quantus ab ipsa recessus factus fuerit. Ratio deducitur ex eo, quia vita humana, ejusque naturalis constitutio, cum benè valet, intra limites mediocritatis versatur; quamobrem Aer illi aptandus, temperatus quoque, & mediocris esse debet, velut eidem maximè conformis, & consentaneus. Si enim præcalidus esset, Corpora extenuaret, sanguinem funderet, dissolveret, labefacteret, adeoque naturale robur infringeret. Hinc Aristoteles *lib. de longitudine, & brevitate vitæ*, scripsit, Æthiopes, aliosque torridas regiones habitantes brevissimam vitam vivere, dissipato nimirum nativo illorum calore, ab exurente ejus climatis

conditione. Et contrà, si frigidior Aer foret, poros Cutis constipando, beneficia perspirationis impediret, & sanguini per pulmonem refluxo plurimum obesset, omnesque partes spiritales læderet, cum frigidum Pectori officiat. Neque leviora mala imminerent ex Aere vel humidiori, vel sicciori, cum ex Hippocrate omne nimium Naturæ sit inimicum; quin & ille delaxaret, hic plus justo extenuaret.

Illum autem Temperatum Aerem esse subdit, in quo nec horret Corpus propter frigus in temporibus hybernis, nec sudat propter æstum in æstivis. At hic vix mente concipi potest, cum nullibi sit reperibilis. Propterea commendatur alius æquivalens ab eodem 5. *meth. cap. 12.*, qui scilicet, nec nimium sublimis, & montanus sit, nec multum depressus, ac humilis, ut in vallibus; cujusmodi ipse subdit esse Aerem Stabiensem, & Vesuvianum in nostra Campania, quod etiam suos ægros è Græcia mittere consueverat.

Quoniam ergo temperatus omninò Aer vix invenitur, neque semper licet medium inter sublimem, & depressum habere, aut Stabiensem Aerem incolere; conveniet propterea, ex reliquis omnibus Aerem seligere, tanquam salubriorem, qui ad siccum potius, quam ad humidum inclinet, cohærenter Hippocratis documento 3. *aphorism. 15.* dicentis: *Ex Anni Constitutionibus in universum siccitates sunt imbris salubriores, & minus mortiferae.* Siquidem in siccitatibus, superflua humiditates, quibus plerumque Corpora abundant, & vita humana opprimitur, resolvuntur, & nedum beneficio inspirationis, sed etiam perspirationis, quemadmodum fuisse Galenus ostendere prosequitur in *commentario ejusdem Aphorismi*: Atqui experimur quoque Montanos, Maritimos, aliosque siccum Aerem incolentes, diutius, ac salubrius vivere, quam habitantes humidum, & in Vallibus conclusum,

ant campestem, vaporibus plus iusto refectum; quandoquidem siccitas membra omnia confirmat, sanguinem ab impuritatibus emundat, sensus acuit, corpora agilia reddat; contrà verò humiditas delaxat, emollit, inquinat, hebetatque. Hinc etiam loca humida inhabitantes, facile putrefactiones incurrunt, fluxiones, torpores, cachexias; ut proinde scripserit idem Hippocrates 3. *aphorism.* 5. Australes ventos, uti humefacientes, auditum hebetare, caliginem visui offundere, caput gravare, tarditatem, ac languorem inferre.

Nec obstant, quæ à quibusdam objici solent: & primò, quòd ex eodem Hippocrate 3. *aphorism.* 9. in Autumno exitiosi morbi fiant: Ver autem saluberrimum dicatur, cum tamen Autumnus siccus sit, & Ver humidum. Nam respondetur cum Galeno, eundem Aphorismum exponente, Autumnum non tam ratione siccitatis exitiales morbos inferre, quàm ob illius summam inæqualitatem; quandoquidem in eodem die modò calor, modò frigus viget; unde idem Hippocrates ibidem *textu* 4. inquit: cum eadem die modò calor, modò frigus persentitur, autumnales morbos expectare oportet. Alias quoque causas affert idem Galenus eodem loco, quas & Nos latius in nostris commentariis super Aphorismos, sumus prosequuti.

Nec obstat 2. quòd Senectus idcirco inter ætates pessima sit, quia sicca: optima verò Pueritia, quia humida. Nam Respondetur siccitatem in senibus nocuam fieri, quia interna, & immoderata, quæque juncta est calori nativo jam languescenti. At verò siccitas in Aere desideratur, quia externa, qua scilicet humida, & copiosiora excrementa absumi, extenuari, & digeri possint: Constat siquidem evidenter longavius, & salubrius vivere siccos senes, quàm humidos, & excrementosos: quamobrem si in his humida

ista excrementa ab Aere sicco absumantur, melius, & connaturalius degent.

Nec obstat 3., quòd propria Aeris qualitas dicatur humiditas, non siccitas, adeoque illa potius, quàm ista sit præferenda. Nam respondetur ex dictis Naturalem Aeris qualitatem esse potius fluiditatem. Sed etsi humiditas foret, adhuc ipsa consideranda esset non respectu ejusdem Aeris, sed Nostri, quæ excedens, & immoderata, humana corpora superfluitatibus adauget, cum Aer humidus, si ulterius vaporibus, & imbribus humefcat, impurus fiat, adeoque humanæ vitæ infensissimus evadat.

Quinam Aer quibus Corporibus sit utilior.

HActenus de Aeris constitutione salubriori, ad Humanam vitam in genere consideratam, comparata; nunc singularum Aeris differentiarum respectu uniuscujusque Corporis, tum sani, tum ægrotantis, juvamenta, & detrimenta referamus, ut exinde prudens Medicus variam Aeris habitudinem, singulis Corporibus, vel benè, vel malè valentibus, adaptare sciat.

Et quidem primò, crassus Aer confert macilentis, iisque omnibus, quibus Cutis forte fortuna, vel à nativitate laxior est, facile in sudores extillans, vel in transpirantes halitus uberius evaporat; unde Corporis marcor, virium dispendium, crebra destillatio, sanguinis eruptio, aliudve simile contingit. Crassus similiter Aer prodest podagricis, & catarrho obnoxiiis, ex nimia succorum tenuitate, acritateque: Vigilibus item, & Iracundis: quippe in his crassior sanguis desideratur, qui Aeris beneficio facillimè acquiritur, præsertim quia per inspirationem sensim in pulmonibus ab illo crassescit; mox ve-

to per Cor in Corpus universum delatus, non solum reliquos succos pedetentim in-
crassat, condensatque, sed etiam visce-
rum fermenta temperat, & moderatur.
Contra verò tenuis Aer, & apricus com-
mendabilis est obesis, succiplenis, pitui-
tosis; itemque obstructis crudis, humi-
dis, cachecticis, gravedinosi, cute ni-
mium adstrictis, somniculosis, atque ad
Hydropem, & affectus Asthmaticos pro-
clivibus. Obscurus, & opacus ex adver-
so, vigilibus, lippis, ophthalmicis, &
cephalalgia laborantibus. Purus insuper,
ac serenus Aer, quamvis cuicumque Cor-
pori, ætati, & habitui laudabilis sit,
specialius tamen commendatur stupidis,
atque ingenio, ac memoria hebetibus,
Asthmaticis, animi deliquio, aut palpi-
tationi obnoxiiis. At verò impurus, mul-
tis vaporibus refertus, qualis est caliginosus,
aut nebulosus, licet omnino nocuus
videatur, utpote qui sanguinem, & spi-
ritus perpetim inficere possit ad vitæ inter-
necionem, aliquandò tamen contulit in
Pestilentiis, quarum venenum acre, &
arsenicale fuit; fertur enim interdum de-
sisse pestes sævissimas, aere ex industria
crassiori reddito, & multis vaporibus in-
quinato, ut olim Bizantii contigit per
sterquilinia, carnes animalium putrefa-
ctas, malèque olentes, & similia. Atque
hinc fortasse evenit, cur Urbes, & Op-
pida crassiorem aerem, ex stagnantibus a-
quis, & locis palustribus, sortita, im-
munia à pestilentiis sæpenumero observen-
tur, cum reliqua purioris, tenuiorisque
aeris, vehementer admodum affligantur.
Cæterum in hoc multum quoque valet
consuetudo, vel ab ipso primo ortu, in-
colatus, per quam naturalis quædam ha-
bitudo contrahitur, vel etiam ex diutur-
no tempore contracta sit: Quæ enim con-
suetudine sunt minus molestare solent; & con-
suetudo altera natura dicitur.

Quod ad Motum, & Quietem præte-

rea, haud commendabilis ex æquo est,
tàm perpetuò quiescens, & immobilis,
quàm assiduò mobilis, & immodicè ven-
tis agitatus: uterque enim veluti à medio-
critate declinans, vitæ humanæ noxius fit.
Conferens autem est, qui leviter ventis
perflatur, iisque præsertim orientalibus,
qui nimirum valeant congestos vapores
diffilare, ac discutere, ne moram in aere
contrahentes illum inquinent. Sed & ex
ventis ipsis, melius semper erit perflari
aerem ventis borealibus, quàm australi-
bus: hi siquidem illum turbant, humefa-
ciunt, inficiunt; illi purificant, exic-
cant, serenant. At verò, quoniam aer
recentari assiduò debet, idcirco immobi-
lis penitus improbatur; Occlusus siquidem
aer pessimas, & graves affert, exitialesque
ægritudines; quoniam exinde vis elastica
plurimum depravatur, & inidonea fit vi-
tæ tuitioni, nisi etiam opprimat, & suf-
focet.

Quod ad situm insuper, Montanus aer
plerumque salubrior esse solet, nisi tamen
frigidior plus justo sit, & ventis continen-
ter agitetur. Non sit autem penitus aver-
sus à Sole, nec in omni tempestate nivo-
sus, aliter nocuus fieret pectori, ac pul-
moni, & solum tolerabilis in æstate. Ma-
ritimus verò, utpotè calidior, utilis qui-
dem est in affectibus Pectoris, ex crudis,
crassisque humoribus, progeneris; at ve-
rò nocuus, ex tenuibus, acribus, & sal-
sis. Vallium aer omnino perniciosus, quip-
pe qui immobilis, nebulosus, crassus, æ-
state calidissimus, frigidissimus hyeme.
Campestris demum medio quodam modo
se habet, atque eo melior erit, quo à lo-
cis palustribus, lacunis, mephitibus, re-
motior fuerit, & salutaribus ventis suavi-
ter commotus: juxta stagnantes aquas,
aut inter paludes situs, nocuus omnino
reputatur, veluti nebulosus, caliginosus,
& crassus, pravisque halitibus infectus.

Demum calidus, apricus, confert in

affectionibus à frigore ortis, & in quibus sudor desideratur; nam poros aperit, humores attenuat, atque à centro ad circumferentiam illos promovet. Contrà verò frigidus, conducibilior est in his, quibus Cutis laxior est, facilèque transpirans. De febrientibus solùm hoc esse potest, quoniam aer sit illis congruentior: Nam ex uno capite videtur conferre frigidus, ad fervorem, & æstum Corporis temperandum; ex altero, cum poros cutis corrumpet, sudoresque impediatur, tantoperè illis salutare, nullatenus commendabilis videtur. Verumtamen, ut utrique commode consulatur, juvabit, ægros pannis quidem moderatè contactos detinere, ne conspiciata cute sudor inhibeatur, sed liberior ceteroqui aer, jugiterque recentatus hauriatur. Hecticis autem, atque ex diuturna ægitudine extenuatis, frigidus undequaque aer capitur, quo nimirum acritudo febris retundi possit, & sanguis ab omnimoda dissolutione præcaveatur. Hinc Hippocrates 3. *aphorism.* 10. Autumnum tabidis malum esse dixit: & 1. *aphorism.* 16. Victum humidum febricitantibus commendavit. Luminosus insuper aer nocet omnibus affectionibus oculorum, præcipuè verò inflammationi: itemque morbis Capitis cum dolore, & vigilia conjunctis, Phrenitid, Maniæ, Cephaleæ, quibus opportunior est opacus. Contrà verò soporiferis affectionibus, Lethargo, Comati, Apoplexiæ, prodest lucidus, & apricus, qui quodammodò à sopore ægrotantes excitet. Verum in his, aliisque similibus, respiciendum semper ad causas morbos inferentes, vel conservantes; nam si illæ frigentes sint, & coagulantes, lucidus, tenuis, & calidus aer exposulabitur; si verò dissolventes, & attenuantes fuerint, potius frigidus, crassus, & opacus exquiratur. Ita de aliis. Attamen consuetudo non minimùm attendenda est, quia sicut in cæteris, ita in aeris electione multum

prævalet: nam cæteris paribus, semper aer patrius, & consuetus melior insueto censendus erit, nisi tamen aliundè manifestè noxius videatur; unde compertum, habitantes loca palustria, vel campestria melius, & salubrius quandoque degere in proprio, & consueto aere, quam si in alienum transferrentur, licet puriorem: tantum valet usus, & consuetudo inveterata: quod & in cibis, & potibus pariformiter experimur.

An, & quando liceat Aerem mutare, & quibus in ægitudinibus.

PLura hic simul exquiruntur, planè in Praxi Medica summopere scitu necessaria. Primum autem, an simpliciter loquendo expediat aliquando mutare aerem; idque tam sanis, quam ægris Corporibus.

Et dicendum prodesse non rarò, tam sanis, quam ægrotis aeris incolatum mutare. Sanis quidem documento Celsi *lib.* 1. *cap.* 3. dicentis: *Ex salubri in gravem prima hyeme, ex gravi in eum, qui salubris est, prima æstate, transire melius est.* Et sensus est, quod ex aere salubri, idest temperato, in gravem, scilicet calidiorum, ineunte hyeme, est transeundum; ex gravi verò, hoc est calidiorum, aut etiam sicciore, in salubrem, idest temperatum, æstivo tempore, præsertim inter initia, migrandum est. Hæc autem mutatio potissimum necessaria videtur, cum formido est, ne ex mora in gravi aere, per æstatem febres sint adfuturæ; vel contrà, in aere laxiori, frigidiorique per hyemem immineant ægitudines, algoris inclementiam subsequentes. Quod si Regio mutanda non videatur, cum & Celsus ipse admonet: *neque ex salubri loco in gravem, neque ex gravi in salubrem transitus sanis tutus*

tus est; fortè quia omnis mutatio, & præfertim maxima, humano Corpori nocua sit, ex Hippocrate 2. *aphorism.* 51.: præstabit saltem mutatione vestium uti ad versus aeris inclementias, documento Vallesii super 3. *Artis Medic. comment.* 3., ubi, in variis temporum mutationibus, etiam per singulos dies licere inquit, vestibus modò simplicibus uti, modò duplicibus, & modò delicatioribus, modò crassioribus. Aëgris verò, Cælum quoque mutandum aliquandò est, monitu Hippocratis *epidem.* 6. *sect.* 5., ubi *in morbis*, inquit, *mutare Cælum conveniens est*: Quod explicans Galenus in *commentario*, subdit, mutationem Cœli prodesse, cum ad aerem morbo contrarium pertransitur.

At quibus in morbis id liceat, subdubitare secundo juvat. Quoniam enim morbi vel acuti sunt, & breves, qui scilicet vix quadragesimum diem transcendunt; vel chronici, & longi, qui ad menses, & annos integros producantur: idcirco videndum, an in utrisque tutò liceat aerem mutare. Et sanè in chronicis nulli dubium, quòd aeris mutatio, nedum conveniens, & tuta sit, sed etiam saluberrima, præsertim cum ad salubriorem, vel patrium, transmigatur, ex eodem Hippocrate *cit.* 6. *epidem. sect.* 5. Cum enim Morbi Chronici ab humoribus crassis, atque hærentibus proficiantur, adjuncta sæpè numero mala viscerum habitudine, non solum nullum timetur periculum ex eorundem commotione, quæ potius desideratur, sed etiam speratur ab ejusmodi aeris, & loci mutatione, facilior illorum discussio, extenuatio, & resolutio. Hinc experimur nullum majus remedium in hisce diuturnis egritudinibus inveniri, incolatus mutatione, ut subinde aer tenuior tenaces humores incidat, atque extenuet, seseque quaqua versum insinuans, & poros cutis referans, Corporis impuritates difflet, absumat, aut exterius propellat. Atqui in affectibus

Pectoris, ac Pulmonis, mirum quàm efficaciter operetur, seipsum cum sanguine præterfluente commiscendo, & sensim universas impuritates absumendo, ulcere deterfo, ac roborata parte patiente; ut etiam empyicos, asthmaticos, phthisicos, hydropicos ex Pulmonis vitio relevet, atque in meliorem, salubrioremque statum perducatur: quod sanè passim evenit in locis ad Vesuvi calcem sitis, atque ad oras sulphurarias Puteolanas; ubi sulphuris, vitrioli, & aluminis fodinæ inveniuntur.

At verò in morbis acutis major est inter Authores difficultas: quandoquidem illi plerumque gignuntur ex humoribus tenuibus, & facilè mobilibus, qui promptè nimis commoventur, & fermentationi subjiciuntur, aut de loco in locum facillimè feruntur. Hinc communi voto noxiam in illis putant practici aeris mutationem, & præsertim cum febribus conjunctis, iisque continuis.

Verum tamen duo dumtaxat casus excipiuntur. Primus cum non propriè aer mutatur, sed locus solum, & habitatio cum scilicet de una domo insalubriori ad aliam salubriorem pertransitur, ut de humili, humidaque casa, obscura, tenebrosa, aut de carcere, in liberiores, altioresque habitationem mutatio fit. Secundus, cum aer causa ægritudinis est, vel efficiens, vel fovens; veluti cum pravis vaporibus est inquinatus, maligna, pestilentique contagione infectus, aliisque similis. Unde Celsus *lib.* 2. *cap.* 1. *Pessimum Cælum esse dixit, quod ægrum fecit, adeo ut in id quoque genus, quod natura pejus est in hoc statu, salubris mutatio sit.* Quamobrè opus omninò erit aerem mutare, quando is occasionem præbet ægrotandi, ex eodem Celso *lib.* 1. *cap.* 10.

Quo autem tempore id tutius liceat, tertio loco dubitare contingit. Et quod pertinet ad morbos materiales, & chronicos, conveniunt omnes, quòd purgato

prius corpore (si tamen expediat) quam-
primùm aeris mutatio facienda sit, inter
initia scilicet incipientis morbi, antequàm
ille altiores radices figat, juxtà illud:

*Principiis obsta: serò Medicina pa-
ratur,*

*Cùm mala per longas invaluere mo-
ras.*

Quod ad Morbos verò acutos, & præ-
sertim febres, solent Practici, transacto
saltem septimo die aeris mutationem per-
mittere: ante septimum verò penitus in-
hibere; ut nimirum prætereatur primus
impetus acutorum, & ne humores per mo-
tum magis concitentur. Verùm semper
ac aer occasionem præstitit agrotandi, vel
saltem ægritudinem fovendi, putaverim
Ego statim prima, secunda, vel tertia
ad summum diem, mutationem esse facien-
dam; priusquàm morbus incrementum
adipiscatur; nam in augmento morbi mi-
nùs tuta mutatio est. Cæterùm quod ad
tempora Anni, nemo audet in his nostris
Regionibus mutationem aeris, aut loci,
commendare, diebus canicularibus, &
sub Autumno, quousque iteratis imbri-
bus, & flante Borea, fuerit aer omnimo-
dè repurgatus. Experientia enim constitit
plurimos periisse ex ejusmodi inconsidera-
tis mutationibus; quamquàm & in id sum-
mè valeant itineris incommoda, per æ-
stum, pulverem, vigiliam, ciborum, &
potuum varietatem, idque genus alia;
quæ si fortasse vitarentur, non adeo de ae-
ris mutatione timendum foret, præsertim
cùm in salubriorem, & patrium illa fieret.

*Quo pacto Aer, cum pravus
est, corrigi possit.*

PRudenter equidem Galenus pluribus
in locis admonet, nullam morbi cu-
rationem esse inchoandam, non prius fa-
cta convenientis aeris electione, quippe

qui multum conferat ad morbum, causam-
que morbi profligandam, restituendam-
que sanitatem. Verùm quia non semper
commodus huic fini aer invenitur, nec ab
eo, in quo æger degit, secedere licet,
ideirco, si quæ in eo sunt incommoda, ut
arceantur, aut emendentur, præstabit hic
breviter, ex Artis industria comparare;
ut nimirum in morbi curationem concur-
rant omnia, quæ illius exequutionem ex-
plere valent. Quoniam autem aeris vitia
ad tres classes revocari possunt, videlicet,
quæ substantiam aeris, motum, & qua-
litates spectant, horum propterea corre-
ctiones breviter recenseamus.

Si ergo vitium aeris sit in substantia,
fortè quia pravi halitus, ac vapores per
illum dispersi, minantur corruptionem,
depravato è latere, aut nimium distracto,
vel plus justo compresso; quo citiùs fieri
potest, causa ejusmodi pravitatis adima-
tur. Quare si ab Aquis stagnantibus pro-
veniat, illæ aliò deducantur, excavatis
in hunc finem foveis, referatisque canali-
bus. Si à cadaveribus insepultis, sterqui-
liniis, aliisque excrementis, illa sepelian-
tur, cumentur, aut aliò transferantur:
mox verò pravi halitus per aerem dispersi
ope Ignis dissipentur: nil enim efficacius,
citiùsque aerem perficit, quàm Ignis, quo
legimus Hippocratem è Græcia pestilen-
tias abegisse, sylvis integris incensis, &
combustis. In idem conferunt fumigatio-
nes Aromatum, thuris, styracis, benzoi-
ni, myrrhæ, calami aromatici, bacca-
rum juniperi, ligni aloes, itemque lauri,
rorismarini, myrti, & similium.

Si deficiat in motu, forsitan quia occlu-
sus, & quietus plus justo est, quòad fie-
ri possit, flabellis, ventilabris, & folli-
bus agitetur; Contrà verò, si nimium mo-
bilis, atque ventorum afflatu plurimùm
agitatus, claudatur ad eas partes, unde
flatus ipsi perspirant.

Si denique intemperatis qualitatibus af-
fecta-

ficiatur, calefiat igne, & aromatibus, incenso quoque spiritu vini, si frigidior. Temperetur verò gelidarum aquarum infusionibus, & fonticulis, itemque acetorofaceo, & flabellis, si caleat nimium. Sic pariter in cæteris occurrendum, prout necessitas expostulaverit.

Quoniam verò majora, & procul dubio pejora damna ex aere emergunt, propter turbatam ejusdem fluiditatem, ubi nimirum plus æquo densatus, aut distractus est; propterea constipato aeri Ignis præsentaneum remedium erit: Aqua verò, Acetum, & his analoga conferent eidem rariori reddito. Expertum enim est in fodinis metallorum, ubi aer densior invenitur, fossiores tunc posse vivere, cum ignis ipse in iis perdurat, nec extinguitur: maxima namque intercedit analogia inter Ignem, & Animantium vitam. Sic in Crypta Anguiana prope Puteolos, sicuti Animal quodcumque intermoritur, nisi citò in liberiores aerem extrahatur, ita & flamma quaecumque perit, & suffocatur. In rariori, distractiorique aere Aqua frigida remedium est; quandoquidem inter aerem, & aquam maxima cognatio inest: quo sanè auxilio sibi subitam opem attulerunt, qui per altissimos Peruvianæ Regionis montes iter facientes, periculum vitæ in respiratione subibant.

Neque leviora his mala incurrunt, qui varium in itineribus aerem, diversi generis halitibus infectum, inspirantes, pravis, malignisque febribus subjiciuntur: eo enim sanguis in pulmonibus diversimodè subactus, veneni conditionem nascitur, atque tum Cordi, tum cæteris partibus perniciosus evadit; quippe qui per fermentationem indebitam, vel in coagulationem, vel in dissolutionem tendit, utramque vitæ inimicam, prout halitus cum aere permisti, figendi, vel dissolvendi vim sortiti fuerint, veluti ex variis, diversisque Terræ hiatibus, specubus,

voraginibus, aut fodinis, in sublime elati.

Præstabit ergo in his, ut iter facientes ejus generis medicamenta assiduò ore detineant, quæ pravos aeris halitus infringant, ac moderentur: Sic plerique se præmuniunt, mansis matutino tempore aromatibus, cinnamomo, caryophyllis, croco, mastiche, styrace, benzoino, ambra grisea, ligno aloes, roremarino, theriaca, mithridatio, antidoto magno Matthioli, cæterisque similibus: alii epoto vino generoso: alii julapio vitali, vitæ elixire, proprietatis, aut magnanimitatis, aqua theriacali, aut spiritu theriacali cum camphora, aliquo tamen grato liquore temperatis: & rustici assumpto solum allio, de quo Æmil. Macer. (a)

*Allia qui mane jejuno sumpseris ore:
Hunc ignotarum non laedet potus aquarum,*

Nec diversorum mutatio facta locorum.

Fertur quoque ad hoc idem valdè efficax Ruta, ex qua plerique antidotum confecere ad pestem præstantissimum, caricis, nucibus, & ruta commistis. Idipsum alii fatentur de Angelica, seu Carlina, de Scordio, Scorsoneria, Ruta capraria, Valeriana, aliisque. Sunt qui loco horum utuntur potius pilulis odoriferis, quarum formulæ plurimæ referuntur ab Authoribus, in tractatu de Febre pestilenti; quasi verò istæ suo odore opitulentur spiritibus, & Capiti, cum tamen aeris correctioni parum, vel nihil suffragentur. At præcellit cunctis Camphora (seu Caphura) tum olfacta, tum assumpta, adversus quancumque aeris infectionem, rectè tamen adhibita, & cum aliis convenienter commista; Ea etenim volanti sua substantia

(a) Lib. 1. c. 5. ex illo Virgil. *Allia serpillumque herbas contundit olentes.*

tia vapores malignos potenter discutit, aut invertit, quapropter præcavet, ne inspirati sanguinem inficiant, ac depravent; & si verum est, quod non ita pridem prodidit P. Athanasius Kircherius in *Scrutinio de Peste*, vagari per aerem in Pestilentibus, & aeris infectionibus, Vermiculos quosdam, qui de Corpore in Corpus contagiosam labem transferant, & imprimant, planè nil æquè potens erit, aut efficacius excogitari poterit, quod valeat vermiculos istos fugare, expellere, & enecare, quàm Camphora, vel olfacta, vel manibus contrectata, cum hæc tota in halitus disperdatur, & quàm citissimè corpora quæcumque subeat, ac pervadat. Jure ergo optimo celebriores Medici, præstantioresque Pharmacopolæ, in Antidotis contra Pestem, camphoram semper adjungere. At mihi plura essent in animo de illius efficacia commemorare, ut quæ nostris temporibus ferè neglecta, in usum sanè laudabilem redigeretur; sed nec locus, nec tempus permittit, ut in his diutius immoremur; satis propterea sit hæc obiter innuisse. Cæterum ad roborandos spiritus, attenuandumque sanguinem, & ventriculum vigorandum, nil præstantius oleo Cinnamomi stillatio, ad guttas aliquot, cuicumque alii liquori permisto. Et de Aere satis.

De Cibo, & Potu.

Post Aerem nihil est quod vitæ tuendæ magis necessarium sit, quàm Cibus, & Potus, quandoquidem utriusque usu, jugis viventium consumptio restauratur, & sanguis ipse, perpertuo suo circuitu exsolutus, extenuatusque, quodammodò, novi cibi, & chyli suggestu, revalescit, vigoratur, & reviviscit, ne scilicèt in suo motu, unde pendet vita, deficiat. De his ergò, tamquàm causis, ad vitam su-

stinendam omninò necessariis, simulque ad juvandum, & ad nocendum indifferen- tibus, hic selectiora referemus, atque in usum medicum revocabimus, omissis inutilibus, & supervacaneis.

De Natura, & differentiis Cibi, & Potus.

Cibus hoc loco, sub duplici respectu à Medicis consideratur, vel uti distinctus à Veneno, & Medicamento, vel ut quid differens à Potu. Sub priori sensu, significat omnem, & quæcumque substantiam, ex quacumque materia desumptam, humano corpori nutriendo idoneam. Venenum enim (a) id dicitur, quod naturam nostram non tutatur, sed corrumpit, adeoque potius illam mutat, quàm mutetur in eam. Medicamentum verò, quod nec mutat, nec mutatur, sed alterat solum, commovetque Naturam ad sui levamen adversus morbos, causasque morborum. Alimentum demùm mutatur, & vertitur in substantiam partium. Cum igitur Natura concoquendo superat, commutatque res in sui substantiam, atque per chylosim vertit eas in sanguinem, & carnes, Alimentum inde fit, & Nutri- mentum Corpori; At verò cum ipsa ab assumptis, potius commutatur, corrumpiturque, Venenum emergit. Cum denique medio quodam modo, patitur solum, & alteratur, & neque superat, ac vincit, nec vincitur, & superatur, medicamentum exoritur. Hinc autem est, cur uni venenum fiat, quod alii cessit in alimentum, vel medicamentum, & viceversa: varia enim Corporum habitudo, succorum, ac fermentorum dispositio, Visce- rum,

(a) V. Gal. 3. de Temperam. 4. & 5. de simpl. med. fac. I., & I. ejusd. oper. I. & alibi.

rum, & Ventriculi præsertim, diversa constitutio, multum in hac re valet.

Sumitur secundo Cibus, ut quid differens à Potu, & ita significat omnem solidam substantiam, quæ mansa, ac dentibus attrita, in nutrimentum abit. Quæ ratione Theologi Morales, res, quæ potantur, aut sorbentur, etsi sint alibiles, aut instaurantes, ad cibos, & alimenta non referunt, ut est chocolates, vinum, julapium quodcumque, elixir vitale, &c. Pepones verò, mala aurea, citria, & similia, licet nihil nutrant, quia tamen dentium molitura egent, jejunium frangere dicuntur: quamquam & plura ex his ad classem Medicamentorum revocentur.

Sed de Cibo, atque Alimento, notabile est, quod Hippocrates admonuit *lib. de Alimento*, illud scilicet triplex esse: & quod *Nutrimentum* est, & quod *velut Nutrimentum*, & quod *futurum* est *Nutrimentum*. Primi generis Alimento est, quod immediatè nutrit, & in aliti substantiam migrat: Secundi generis est Alimento, quod proximè est ut nutriat, nempe chylus, appellatus ab Hippocrate, *velut Nutrimentum*: Terti generis est Alimento futurum, quod remotè se habet ad nutritionem Corporis peragendam, licet habile sit ut nutriat, quemadmodum Cibus omnis, qui ingeritur, vel præparatur, ut edi possit; & de hoc potissimum hinc agendum erit, veluti de re indifferenti ad juvandum, vel nocendum, sed cæteroqui ad vitæ conservationem necessaria.

Hoc itaque pacto consideratus, acceptusque Cibus, multas habere potest differentias, quas Medici cum Montano *aphorism. 1. comm. 4.* ad decem revocant, cum decem in universum in cibis considerari possint, videlicet Substantia, Quantitas, Qualitas, Modus, Usus, Compositio, & Simplicitas, Condimentum, Motus, Ordo, & Locus.

Quod ad Substantiam, illa vel ad nutritionem, vel ad succum nutrientem refertur. A nutritione, aliqui cibi multum, & vehementer nutriunt, ut carnes vitulinæ, suillæ, caponum; alii verò parum, ac debiliter, ut sunt olèra. A succo autem nutriente, nonnulli sunt boni succi, ut testes gallorum, ova forbilia: alii mali succi, ut carnes bubulæ, caprinæ.

Quod ad Quantitatem, datur cibus Plenus, Tenuis, & Mediocris. Plenus non solum vires tuetur, sed augeat. Tenuis minuit potius. Mediocris tuetur solum, & conservat. Rursus Plenus, vel multum, & benè nutrit, ut carnes vitulorum, caponum: vel multum, & male nutrit, ut legumina, pisces; carnes bubulæ. Tenuis verò, quia modicè nutrit, & parcus est; idcirco subdividitur in simpliciter tenuem, exquisitè tenuem, tenuissimum, & exquisitè tenuissimum. Simpliciter tenuis, minuit potius vires, quam augeat, ut fuit Ptisana Antiquorum. Exquisitè tenuis, est idem tenuis simpliciter, sed minori quantitate exhibitus. Tenuissimus, qui ad maximam inedia accedit, ut sunt uvæ passæ, caricæ, amygdalæ, certis tantum temporibus exhibitæ. Exquisitè tandem tenuissimus, est omnimoda inedia, ut cum reficiuntur solum ægrotantes per certa intervalla, tincturis alchermes, julapio vitali, aqua cinnamomi, & similibus.

Quod ad Qualitates: istæ in cibis considerantur, vel tactiles, vel gustabiles, vel olfactiles. Unde dantur Cibi calefacientes, refrigerantes, humectantes, exiccantes, duri, molles, densi, rari, graves, leves, &c. Sic Aromatici dicuntur calorifici; herbacei frigorifici; succulentum humectantes; aridi exiccantes. Similiter duri, ut carnes assæ, vel fumo exiccata: molles, ut elixæ, juscula, & olèra: densi, ut cotoneum: rari, ut ficus; graves, ut panis azymus: leves, ut panis

nis fermentatus: asper, ut panis nauticus: læves, ut butyrum, & omnia pingua, ac oleosa. Ad gustabiles referuntur Cibi dulces, ut mel, saccharum; amari, ut lupini, glandes, cacao; acerbis, ut fructus immaturi, & omphacium; austeri, ut mespila, sorba, cydonia, immatura. Ab olfactu, aliqui odorem redolent, ut mentha, amaracus; basilicum; alii malè olent, ut allia, cæpæ, porri.

Quod ad Modum, aliqui sunt nimium excrementosi, ut olera, radices, fungi: alii modicum proferunt excrementum, ut ova forbilia, testes gallorum, lac recens.

Quod ad Usus, nonnulli cibi sunt merè cibarii, ut panis, caro: alii sunt simul cibarii, & potulenti, ut lac, uvæ, fructus, melopepones, succus carniū: alii demum, sunt simul cibarii, & medicamentosi, ut pruna, cerasa, manna, semina melonum, & quæcumque possunt urinam, sudorem, vel secessum etiam promoveri.

Quod ad Compositionem, & Simpliciter; quidam sunt simplices, quemadmodum fuere à natura geniti: alii compositi, & artis industria comparati, & diversimodè conditi.

Quod ad Condimenta, pari modò, dantur cibi non solum compositi, sed salamentis variis confecti: alii simplices, & absque ullo condimento parati. Inventa autem sunt ejusmodi condimentorum varia genera, ad stomachi gratificationem, præsertim in vomitibus, nausea, alvi dejectionibus, aliisque ægri tudinibus, in quibus ægrotantes adeò cibos abhorrent, ut cogendi sint, ut illos capiant, multifariam saltem præparatos.

Quod ad Motum, sive localem, sive fermentativum, digestionis, distributionisque; nonnulli cibi sunt facilis di-

gestionis, ac distributionis, ut jura, ova recentia, cerebella animalium; alii verò difficilis, ut ostreæ, spondyli, ac pisces testacei; itemque caseus vetus, pedes Animalium, Limaces, Testudines.

Quod ad Ordinem, aliqui veluti labiles, facilèque corruptibiles, primo loco ingeri solent: alii solidiores, ac duri secundo loco. Plurimum autem refert in cibis assumendis, ordinem servare, ut fusè nimis edocuit Galenus *de causis Morborum, & Symptomatum*, ad tuendam valetudinem, ægri tudinesque vitandas.

Postremò quod ad loca, ex quibus alimenta comparantur; dantur cibi ex Tellure elicit, ut radices, fructus, semina, folia: ex animalibus alii, ut carnes, pisces: ex animalium partibus, ut testes, mammæ, ac viscera: & demum ex partibus eorundem spuris, & impropriis dictis, ut sanguis, lac, serum, ova.

Quod insuper attinet ad potum, hic propriè significat liquidam quamcumque substantiam, quæ humefacere, & sitim sedare apta sit. At verò necesse non est, ut frigida illa sit, quippe multa sunt, quæ etsi calida, vel calorifica putata, sitim leniunt, vel extinguunt, veluti vinum, ejusque spiritus, decoctum Cooffè, & herbæ Thee, Chocolates, aliaque hujus generis. Hinc falluntur, qui putant, potum propriè sumptum refrigerandi, humectandique facultatem exigere, adeoque solum Aquam gelidam sitim sedare posse: hæc namque in vera siti, quæ humidi carentiam sequitur, magis expostulatur; secus, cum à lymphæ, & salivarii roris crassitie, ac viscositate provenit, & falsa dici solet. Verum de hac re alias.

Sed & nec minùs decipiuntur, qui verum potum arbitrantur esse oportere, qui tria præstet, tresque essentielles conditiones participet: nempe quòd sitim sedet:

det : ad ciborum in vētriculo elixationem conferat : & ut alibilem substantiam in omnes corporis partes devehat . Si quidem , ut dictum , sitim multa alia temperant , præter Aquam : satis enim est , si lympham , serumque sanguinis absumptum , resarciant : Coctio autem , quæ in vētriculo peragitur , humido solum eget , non frigido liquore : quin nec defuere , qui absque ullo potu , aut repotulenta , cibos quamoptimè confecerint ; quoniam isti ope quorundam succorum acido-acrium in vētriculo dissolvuntur , more quo metalla diluuntur Aquis stygiis , & non elixantur . Denique benè chylus , per vasa lactea trajectus , pressione musculorum Diaphragmatis , & Abdominis per ductus Thoracicos protruditur in Cor , indeque per universas arterias unà cum sanguine circumit . Sunt & in visceribus tantæ efficacitatis fermenta , ut etiam ab exsucco chylo liquorem extrahant , non dissimili modo , ac ex rebus durissimis novit Ars Spagyrica oleosos liquores , spiritus , & aquas elicere , ope ignis , aut mistura aliorum corporum , compagem partium ex mistis dissolventium . Itaque videtur Potus à Natura potius institutus ad reficiendam in propriis ductibus lympham , serumque , quod sanguini , per Cordis venticulos refluenti , ad vitæ tuitionem usui est ; atqui nedum ex aqua , cæterisque liquoribus , verum etiam ex cibis ipsis , ope dissolventium succorum hæc haberi possunt ; quamobrem necesse non est , ut Potus essentialiter frigiditatem exigat ; sed nec aliquando humiditatem , cum satis sit , ut per liquiditatem , fluxilitatemque in suo circuitu sanguinem sustineat . Dixi per liquiditatem , fluxilitatemque non humiditatem , quoniam pleraque fluida sunt , sed non humida , ut sunt hydrargyrus , spiritus vini rectificatus , aliaque hujus generis ; immo & Aer ipse , qui perpetim nos am-

bit , & inspiratur . Et è converso , nonnulla sunt humida , & quæ manifestè humefaciunt , sed non fluitant , quinimò tenaciter adhærent , ut olea pleraque chymicè destillata .

Suas quoque Potus patitur differentias . Et primò dividitur in Potum Simplem , Potum Alimentarium , & Potum Medicamentosum . Simplex Potus dicitur , qui solum extinguendæ siti videtur addictus : cæterum non nutrit , ut alimentum , neque alterat , aut aliquam evacuationem promovet , ut medicamentum : cujus quidem generis ponitur pura , & simplex Aqua . Alimentarius , quodammodò nutrit , vel saltem spiritus , & vires reficit , quale est vinum , lactura consumpta , & similia . Medicamentosus denique , præter vim , facultatemque sedandi sitim , pro rata sua etiam alterat , & aliquam evacuationem promovet , sive per sudorem , sive per urinam ; unde extant potiones sudorificæ , diureticæ , & similes .

Secundò dividitur Potus in Naturalem , & Artificialem . Naturalis absque ulla Artis industria , Naturæ solummodo beneficio , Animantibus est concessus , qualis est pura Aqua . Artificialis verò , qui ab Arte est inventus , ut sunt omnes aquæ medicatæ , Cerevisia Germanorum , Birra Turcarum , aliaque his similia . De Vino autem controvertitur , num ad Naturales , an ad Artificiales Potus referri debeat , cum ex una parte Naturalis dici possit , eo quòd sit succus uvarum expressus ; ex altera verò dici debeat Artificialis , quoniam exigit non solum uvarum pressionem , sed etiam fermentationem , & à fæcibus purgationem , ac multa alia per humanam solertiam investigata . Cæterum multæ aquæ medicatæ , ut cinnamomi , anisorum , hordei , falsæ , &c. ad Artificiales referri debent ; aliæ multæ ad Naturales , cum pleraque Aquæ Ther-

Thermales medicamentosæ sint, & aliquæ ventrem laxent, aliæ urinam cieant, aliæ excitent sudorem; præter eas, quæ ad usum externum adhibentur, ut ad scabiem, ad ægritudines oculorum, ad articulorum dolores, ad renum calculos, &c. At verò, quia frequentiores Potus sunt Aqua, & Vinum, de his speciatim aliqua recenseamus.

De Aqua, & Vino.

Primùm hic dubitandum occurrit, an reverà Aqua, præsertim Naturalis, & Simplex, nutritioni apta sit. Et communior sententia est, illam nullatenus nutrire: quia Nutrimentum, ut vult Aristoteles, debet esse compositum, eo quòd mistis corporibus usui sit. At verò simplex Aqua est, immò Elementum purum credita, adeoque nutritui inepta existimanda. Alimentum prætereà, ut partibus nutriendis adhæreat, atque in illarum substantiam convertatur, aliquam præferre debet consistentiam, & glutinositatem; Aqua verò utpotè omnino fluxilis, nequit partibus appingi, adeoque alibilis esse non potest. Attamen extant ex adverso, quæ suadeant, illam pro rata sua etiam nutrire, cum experiamur Aquæ potores, & abstemios, plus reliquis pinguescere: imò plerique referuntur ad plures menses solo aquæ potu, & absque ullo cibo vitam sustinuisse. Verumtamen ipse putaverim Aquam solam propriè non nutrire, sed augmentationem nutritionis coadjuvare, scilicet nutrimentum jam antea cum sanguine commistum, & congestum, diutiùs conservando, atque à dissolutione tuendo; adeoque hac ratione Vitam ad aliquod tempus sustinere posse. Cum enim portio sanguinis glutinosa, quæ in alimentum partium cedit, perpetuo circuitu

continenter absumatur, & extenuetur, epotæ Aquæ beneficio tenaciùs consistit, ac diutiùs in suo glutine perseverat, ut propterea non tam facilè diluatur, & liquecat. Sed & fermenta dissolventia retundendo, sanguinis circuitum remorando, partium exsolutionem, perspirationemque impediendo, id ipsum peragens Aqua, poterit subindè Vitæ dissolutionem retardare, atque in longius tempus illam protrahere.

Quamquam autem Aquam simplicem, ac puram alere non posse, probabilius videatur, eo quòd partibus agglutinari nequeat; si tamen interiùs talem salium compagem, aut liquores quosdam inveniat, ex quibus facilè in coagulum vertatur, haudquaquam inepta penitus fiet nutritui, cum aliunde constet plerasque plantas, ut cucurbitarum, cucumerum, melopeponum, & similibus, superaffusis perpetim aquis, intrà paucos dies sensibilibiter increescere, dilutis scilicet ex Terra salibus, nutritui conferentibus. Sicut insuper durissima corpora, quibusdam liquoribus aspersa, mollescent, & alia liquidissima congelascunt; ita etiam poterunt intrà Corpus obmistrum similibus succorum, aquea, & fluida nimis, condensari; atque è converso densa, ac dura liquefieri, fluidaque reddi, in peculiaribus saltem Corporum constitutionibus. Id ipsum confirmant gemmæ, lapides pretiosi, crySTALLUS, glacies, ex aquis per salia quædam congelatis, solida reddita.

Sed & insuper Aqua, multa planè comoda, quæ nutritioni conferunt, affert, quæ breviter complexus est Vallesius *lib. I. suæ Methodi*: & quidem sitim temperando, cum illa præsertim ab æstu, & lymphici humoris inopia dependet, calidos vapores, humoresque quaquaversum effumantes reprimit, & ebullientes compescit; inutilia excrementa per sudores;

res, & urinam promovet: & demum alvum non raro lubricat: quæ omnia salubritati Corporis plurimum proficiunt, adeoque saltem indirectè nutritioni, ac vigori.

Quænam autem Aqua ad potum ordinarium salubrior censenda sit, solet hic ulterius ab Authoribus examinari. Et licet Hippocrates *lib. de Aere Aquis, & locis* doceat, (a) sanum, & benè valentem nullam aquam distinguere debere, sed quamcunque obviam bibere, ex iis tamen, quæ frequenter potari solent; nihilominus melior semper reputatur à Galeno *lib. de Ptisana cap. 2. & 1. de simpl. medic. facult. cap. 4. & 5.*, quæ limpida est, omni odore, sapore, & colore carens; siquidem ista syncerior, & impermistior est: id quod videtur alia phrasi edocuisse idem Hippocrates *cit. loco*, cum inquit, Aquas pro potu debere esse *albas, dulces, & fragrant*: ubi pro *albis* puræ, pro *dulcibus*, gustui gratæ, & pro *fragrantibus*, nihilum mali odoris redolentes, intelligendæ sunt. Idem quoque Hippocrates *aphorism. 5. t. 26* Aquam illam commendavit, quæ citò calet, & citò refrigeratur, inquit: *Aqua, quæ citò calet, & citò refrigeratur levissima est*: non tam pondere, quem virtute, ac puritate: quod scilicet facile meatus Corporis pervadat, nec impuritates defarat; inde enim arguitur nil cum illa permisceri, quod valeat ejusdem distributioni obicem ponere, aut puritatem inquinare, ut ex vitriolicis, sulphureis, aluminosis, ferreis, & similibus accidit.

Quæ igitur prædictas conditiones melius referat, videtur esse Aqua, è radicibus Montium extillata, & quodammodò per filtrum traducta, omnique impurita-

te exuta. Contrà verò mala est, quæ è Terra limosa, & fæculenta exoritur, & ubi Vermes, Hirudines, aliaque prævæ conditionis animalcula immorantur.

Quæ prætereà excurrit per loca saxosa, & Soli est exposita commendatur: improbatur ex adverso, quæ restagnat, Solemque aversum habet. Huic succedit Aqua Pluvia, diutiùs tamen asservata in Cisternis convenienter ad hunc usum extractis, & quæ ex una in aliam cisternam deposita, & collecta sit. Ex aquis verò pluviis, meliores illas idem Author existimat *epidem. 6. sect. 4.*, quæ decidunt cum tonitru, temporibus æstivis; siquidem, ut interpretatur Vallesius, sunt à Sole concoctiores, atque è vaporibus sublimiùs elatis, provenientes. (a) Verùm, quæ per vernale tempus decidunt, probæ quoque sunt. Post Aquas pluvias referuntur Puteales, quæ tamen è petrosis locis, multùmque excavatis, extillant; unde quò puteus magis altus est, latus, adpertus, capax, & ventilatus, eò melior. Has sequuntur Aquæ fluviales, modò istæ liberè excurrant, & cum stagnis non communicent; quæque è medio gurgite hauriantur, & deinde per filtrum trajiciantur: quo pacto Romani Aquam Tyberis repurgare consueverunt. Pessimæ demum sunt stagnantes è lacubus relectæ, palustres, atque ex glacie, niveque liquatæ, ex eodem Hippocrate *cit. lib. de Aer., Aqu. & loc.*, unde *aphor. 5. text. 24.* inquit: *Frigida qualis nix, & glacies, pectori inimica: ruses movet, sanguinis sputum, destillationes, &c.*

His nunc succedunt Aquæ Thermæ, quæ inter sese differunt, pro varietate metallorum, & fossilium, per quæ transeunt, vel in quibus innascuntur. Et quidem ful-

(a) Quisquis sanus est ac valet, is nullum discrimen faciat, sed semper eam, quæ præsens est, bibat. Hipp.

(b) V. Comm. nostr. sup. Aphor: 26. 5.

sulphure alvum movent, abstergunt, & urinam promovent, quandoque etiam dysenteriam, & ardorem urinæ excitant. Nitrosæ urinam, & menstrua provocant; in longum autem usum adhibita diabetem afferrent, & stomacho nocerent. Bituminosæ, meatus Corporis infarciunt, sitim excitant, uterum, & vesicam lædunt, caput gravant. Ferreæ, & Chalybeatæ abstergunt, deobstruunt, incidunt: succos Corporis, & sanguinem acore infectos corrigunt, & quandoque, hac eadem ratione, fluxus inhibent, & adstringunt: Aluminosæ, & Maritimæ cutim abstergunt, & emundant, atque impauctos in ejusdem glandulis humores attenuant, & exsolvunt; alvum tamen, & intestina corrodunt, si interiùs assumantur. Mercuriales, ventrem laxant, & vermes enecant. Quæ verò solum ad externos usus adhibentur, ut sunt Aquæ thermales Puteolanæ, & Pythecusanæ, Lucenses, Nucerinæ, Spadanæ, & similes, ad sudorem promovendum, tumores dissolvendos, artus roborandos, detergendos renes, aut vesicam, aliterve, late describuntur à Lombardo, Capacio, Savanarola, Jafolino, ab Heers, Helmontio, Chesneau, aliisque, quos legere est.

Denique Aquæ medicatæ, & artificiales, variæ quoque sunt, pro affectuum varietate, ex diversis simplicibus, sive per decoctionem, sive per destillationem elicita, ut ex carduo benedicto, scorfonaria, betonica, cinnamomo, aniso, ligno guajaco, salsa, china, & similibus, ut passim apud Practicantes.

Vinum præterea hic sumitur, quod propriè apud Nostros Vinum dicitur, ex Uvis è Vite domestica carptis, atque expressis, subactis, & fermentatis. Illud autem quamvis varium esse soleat, debile, potens, album, rubrum, tenue, crassum, dulce, austerum, acidum, sulphureum,

aliudve; generaliter tamen acceptum, ad differentiam Aquæ, cæterorumque Potuû, plurimas utilitates afferre solet; quarum præcipuæ sunt, quòd languido ventriculo opituletur, coctionem adjuvet, spiritus promptè reficiat, urinam promoveat, lac augeat, Corpus calefaciat, sensus omnes roboret, ingenium acuat, & Cor exhilaret; unde Galenus *lib. quod Animi mores corporis temperiem sequantur cap. 5.* scripsit: *Moderatum Vinum, & concoquit, & distribuit, & sanguinem creat, & nutrit.* Moderatum autem dixit; nam immoderatum omninò nocet, cum præter ebrietatem, Apoplexiam, Aphoniam, Paralytim, Soporem, Convulsionem, Vomitus, Cardialgiam, Febrim, aliasque gravissimas ægritudines afferat.

Vini differentia multæ sunt, quas refert Hippocrates 3. *de Rat. Viæ. in acut. a text. 1. ad 8.* illæ autem brevitatis gratia ad sex commodè revocari possunt, ex doctrina Galeni *eodem loco*; quoniam sex in illo considerantur, videlicet Substantia, Color, Sapor, Odor, Virtus, & Tempus.

Quod ad Substantiam, idem Hippocrates *cit. loco* dividit Vinum in crassum, seu vinosum, & in tenue, seu aquosum. Crassum, & Vinosum, quod firmiter, & maximè reficit, licet difficulter concoquatur, & multum recrementi tartarei in visceribus relinquit, unde etiam facile obstruit, inebriat, stomachum gravat, & meatus urinarios inquinat. Tenue verò, seu aquosum, græcè *Oligophorum* dictum, citò quidem digeritur, & meatus permeat, sed vel nihil, vel tenuiter restaurat; quin & non rarò ventrem laxat, sudorem movet, urinam multiplicat, ac attenuat: quod confirmat pariter Galenus 3. *de natural. facult. cap. ult.* Quod ad Saporem, dantur vina dulcia, styptica, austera, subacida, & acerba. Dulcia

cia obstruunt, & flatus excitant; styptica, & auftera constipant: subacida, & acerba, viscosos succos gignunt, & flatus movent; & si omninò acida sint, intestina compungunt, & torminibus afficiunt. Quod ad Colorem, sunt vina rubra, & alba: Rubra roborant, & adstringunt: Alba laxant, & aperiunt. Sed & rubra rursus, vel ad Nigrorem inclinant, & præter vim adstrictoriam, difficillimè concoquuntur, quia plurimo tartaro abundant: vel Cerasorum succum æmulantur, & solent esse facilioris digestionis, ac stomacho magis amica. Alba etiam, vel flava sunt, vel omninò alba, ac quodammodò coloris expertia. Flava sunt melioris nutrimenti; Alba verò, coloris expertia, solent esse tenuiora; ni tamen Arte sint ita comparata: siquidem cujusdam generis vina sunt artificiali quadam industria plurimum albescentia, potissimum quæ fermentationem non subiere, attamen potentia admodum sunt, ac generosa. Quod ad Odorem; aliqua bonum odorem redolent, alia verò omnino inodora sunt: semper autem odorifera meliora reputantur. Quod ad Virtutem: aliud vinum est potens: aliud imbecillum. Potens ferè totum vertitur in spiritus, cum destillatur; Imbecillum verò, ferè totum in phlegma. Quod ad Tempus demum: alia Vina sunt antiqua, alia sunt recentia. Antiqua, vetustate temporis, veluti concoctiora, & depuriora, semper meliora sunt. Recentia verò omnibus fermè visceribus inimica, quippe quæ flatus excitant, meatus obstruunt, ventrem gravant, & tartarea, phlegmaticaque materia ventriculum, cæteraq; viscera opplent. Hinc experimur in destillationibus per alembicum, copiosiores, perfectioresque spiritus elici ex vino veteri, paucos, & debilissimos ex recenti; quinimò Mustum, si

destillationi subjiciatur, in arduentes spiritus non evaporat, sed totum in tartareum, insipidumque phlegma convertitur.

Sed cum Vinum ex prædictis varia præstet commoda, & multa quoque incommoda afferat; controversi propterea solet, cujus naturæ ipsum sit, calidum ne, an frigidum: In utramque enim partem Veteres inclinarunt. Et quidem Macrobius 7. *Saturnal. cap. 6.* frigidum illud esse existimavit, nam præterquamquod, præ cæteris liquoribus melius, citiusque sitim plerumque sedet, potentissimè inebriat, sensus obtundit, mentem hebetat, & summo sopore quodammodò opprimit; unde Hippocrates 5. *aphorism.* scripsit: *si ebrius quispiam repente obmutuerit, convulsus moritur, nisi febre corripiatur.* At verò, nisi illud frigidum foret, ejuscemodi mala neutiquam pareret; & nec per febrem illa desinerent. Sed & Empedocles, Vinum quoque dixit Aquam putrefactam; unde Versus.

Vinum est putrescens, ligni sub cortice, lympa,

Attamen ex adverso Plato in *Timæo*, Vinum appellavit, *calefactorium Animæ, & Corporis*: quamobrem 2. *de legibus*, illud Pueris interdixit, ne Ignis Ignei, ut ipse loquitur, adjiceretur. Aristoteles etiam 27. *sect. Probl. 4.* Vinum, inquit, sua natura calidum, sedare tamen sitim magis, quàm Aquam.

Verum, probabilius videtur, Vinum non calidum, sed calorificum esse appellandum, quoniam per spiritus, quos nostro sanguini citò communicat, effectus excitat calefactorios, etenim pulsus celebriores, & vehementiores reddit, sanguinis circuitum promovet, poros cutis, & meatus omnes aperit, sudorem, & urinam prolicit. Afferit autem Morbos soporiferos, cum immodicè potatur, idque tum pluralitate vaporum, Cerebrum, &

nervos opplentium, & gravantium, tum etiam quia copiosiores succos in Cerebrum defert, qui cum deinde non possint convenienter, & illico distribui, atque per sua emissaria repurgari, sensus hebetant; & nisi somno digerantur, aut febris discutiantur, non raro plus justo gravando, encant: quamobrem idem Hippocrates eodem 5. aphorism. citato subdit, aut ubi ad horam pervenerit, qua crapula solvuntur, vocem recuperet. Hinc quoque patet, cur dixerit Aristoteles cit. sect. problem. Vinum dilutum magis inebriare, quia majorem succorum copiam in Caput transfert.

Sed quis unquam Fracastorio assentiri poterit, qui vinum siccum arbitratus est, lib. de Temperam. Vini cap. 7., adversus communissimam Philosophorum, & Medicorum sententiam? (a) Verum qui observaverit Vinum præsertim potens, & vetus, majori sui parte, in Aquam ardentem commutari, & in spiritus facillimè inflammabiles converti, qui deinde manibus contrectati non humefaciunt; certè Fracastorii opinamentum non penitus, veluti paradoxum, admirabitur, si præsertim dictatis Aristoteleis velit inhærere. At verò ex his deducere Nobis liceat, per quot ambages versentur, qui nudis quatuor putatis primis qualitatibus, universam Philosophiam coarctatam volunt.

Quibus in morbis Aqua, vel Vinum conferat.

Sicuti non omnia, quæ in humanum usum deducta sunt, singulis sunt utilia, vel nocua, cum quæ uni prosunt, alii obesse soleant: Sic Aqua, & vinum

non omnibus simpliciter noxia, vel salutaria dicenda sunt. Quo planè modo plerique hominum falluntur, qui cum noscant seipsos benè Aquæ usu valere, cunctis aliis potandam Aquam insinuant, & multis laudibus commendare non desinunt; cum tamen præjudiciis exuti, passim experiamur, plerosque non levia damna pati, vel à minima Aquæ potatione, salubriusque vivere, moderato Vini usu, & è converso. Sed & id prætereà mente tenendum, per varias ætates, modò unum, modò aliud proficere consuevisse; quandoquidem ætatum mutatione variant in Nobis succi, & fermenta Viscerum, præsertim stomachi; quibus aliquando contingit usu Vini, & quandoque Aquæ potu indigere, salubriusque conservari: neque solum per ætates varias, sed per diversas quoque particulares ventriculi affectiones, quandoque vinum levius ferri, gravius aquam: interdum verò ex adverso, graviolem molestiam à vino persentiri, eo quod fortasse in acorem vertatur, quàm ab aqua, quæ facilius toleratur, & vincitur, immò acorem ipsum efficaciter temperat, & emendat. Senes pariter nonnulli, ac stomacho imbecilles, non raro Aquæ potum melius digerunt, citiusque cibos conficiunt, quàm usu Vini: quòd si fortasse aliquando parcè sumpserint, nedum statim illud eructant, sed & ventre inflantur, constipantur, dolent. Id autem nequiquàm, ut ipsi conqueruntur, adaucti caloris maleficio, qui in illis potius deficit, quàm exuperet; sed ob permutatam prædictorum succorum crasim, ut in Hypochondriacis sæpissimè compertum. Itaque non semper Vinum, nec omnino Aqua commendabilis in universum est, aut cunctis indiscriminatim præscribenda, generali quadam, immutabili lege; sed pro ratione.

Et quidem in sanis optimè admonuit Celsus lib. 1. cap. 1. nullam certam, ratamque

(a) V. Arist. in Probl. Gal. 1. de san. tuend. c. 11. & 5. ejusd. op. cap. 5. Avic. fen. 1. 3. c. de Melanch. &c.

que regulam esse stabiliendam; cum inquit: *Sanus homo, qui & bene valet, & sue spontis est, nullis obligare se legibus debet.*

Hunc oportet. varium habere vitæ genus, &c. Pro ratione tamen Corporum, & Constitutionum, modò Vinum, modò Aqua commendanda est: etenim Corporibus succiplenis, humidis, debilibus, magis Vinum, quàm Aqua conferet. Contrà verò picrocholis, & robustioribus, potiùs conveniet Aqua. Sed & pro ætatis varietate, ac consuetudine, id ipsum usui aptandum: Nam senes, & consueti potiùs Vino: Pueri, & Fœminæ Aqua regendi sunt. Exercitati insuper, & laboriosam vitam ducentes, coguntur Vino uti crassiori, ac potentiori: otiosi verò, & sedentarii, vel Aqua simplici, aut medicata, vel ad summum, Vino tenuiori. Ità de cæteris.

Quod ad ægrotudines verò, nocet Vinum in omnibus affectibus Capitis, præsertim ex acri, & bilioso sanguine progenitis: nam exinde cerebrum magis vaporibus per sanguinem delatis ex vino gravaretur. Similiter in omnibus fluxionibus, ex tenui liquore provenientius, quæ faciliùs ab usu vini concitantur: qua ratione experimur, maximè lædi eos, qui articulariis doloribus cruciantur, à vini potu. Pari ratione reprobatur vinum in vulneribus, ulceribus, luxationibus, & fracturis, ne humores in partem affectam magis influant, illamque exasperent. Cæterùm estò ratione ægrotudinis, Vinum omninò prohibeatur, poterit tamen aliquandò permitti, si consuetudo in contrarium vigeat, obftet senectus, & ventris imbecillitas. Ne verò grave damnum ab ejus usu subsequatur, levius, quo fieri poterit, concedetur, vel saltem benè dilutum, & modicè potatum: illud enim in gratiam virium, imbecillitatis ventriculi, senectutis, & consuetudinis, tantummodò permittitur. In aliis autem ægrotudinibus quibuscumque, in quibus desideratur

concoctio, ac dissolutio crudorum succorum, vis aperiendi, ac deobstruendi, promovendi menstrua, ac sputum, itemque attenuandi, incidendi, roborandi, vinum semper commendabile erit, magis tamen album, quàm rubrum, veluti facilioris distributionis, & transitus per vias urinarias, quale est vinum oligophorum dictum, sed non acidum; nisi tamen alvi fluxus rubrum potiùs expostulet. Quamquàm, ubi vinum sanum sit, de coloribus superstitiosè nimis agere, non sit opus.

At in febrientibus major difficultas esse solet, num Vinum, an Aqua illis conveniat. Et quamvis plerisque creditum sit, vinum illis nocere, prodesse solùm aquam; si tamen Authoritates Veterum, & Rationes, ac Experimenta consulamus, inveniemus vinum potiùs esse commendandum. Hippocrates enim, & Galenus, alique è Græcis celebrioribus, vinum in febribus permisere, non solum in gratiam stomachi, sed etiam ad coctiones peccantium humorum adjuvandas, & ad febrem ipsam breviandam; quemadmodum colligere est ex libris de Ratione Viæ in Acutis, & de Methodo medendi: Illud autem album, & oligophorum dictum, seu tenue erat, quo scilicet sitis simul unà etiam sedari meliùs posset. Sed & ratio ipsa suffragatur, cum experimentis. Siquidem febres desinunt coctione, sequestratione, & expulsionem peccantis humoris, qui cum sanguine commistus fermentationem indebitam promoverat: modò vinum potiùs, non aqua, hæc omnia præstat: quamobrè plerisque novimus unico, sed largo vini generosi potu, tam affluenter sudasse, ut momento febrem averruncaverint, neque solùm in declinatione universali, vel in statu, ut aliis quoque accidit ex potu aquæ, sed etiam inter initia, vel in augmenti decursu. Verùm in his peculiaris ratio semper habenda est, habitudinis

Corporis, ætatis, consuetudinis, anni temporis, & symptomatum febrim comitantium; nam in deliriis, inflammationibus internis, sudoribus diaphoreticis, aliisque similibus, tuta non foret talis temeritas.

In hypochondriacis præterea dubitari potest, num etiam vinum conferat. Et licet in gratiam Ventriculi, summè imbecillis, vinum videatur commendabile, eo quod flatus illis infensissimos, discutere queat; nihilominus experimentis satis constitit, illud officere, non tamen ratione caloris, quem falsò insimulant; sed potius ratione acoris, quem suscitatur, vel magis exasperat. Acidum enim quod in ipsis exuperat, sive inconspicuum, sive manifestum, in causa est, ut vinum facillimè acescat, copiosiores flatus excitet, coctionem interturbet, viscera torminibus, atque æstuationibus afficiat. Hinc majus longè emolumentum nonnulli ex aquæ usu nanciscuntur, meliùsque se habent, cum illa acorem diluat, & retundat; adeoque fermentationibus, atque hypochondriorum æstibus obsistat, ventrem laxet, & falsa fermentorum invertendo, ac dissolvendo, tumultuariam viscerum agitationem, perturbationemque temperet, ac fedet. Atque hinc etiam fit, cur nonnulli, etsi stomacho valdè debiles, meliùs sufferant aquæ, quàm vini potum; quoniam stomachi fermentum molestam illam, turbatamque passionem, ex vino habitam, usu aquæ neutiquàm subit. Porro plerisque non leviter contulere, aquæ per infusum cinnamomum, anisum, lignum sassafras, aliudve simile; & quibusdam aliis salutaris fuit aqua chalybeata, vel ex fonte, chalybis, aut ferri conditionem referente, ut apud Nos est elicta, vel etiam artificialiter comparata.

Denique in usu vini, hæc specialiter sunt advertenda, ut nunquàm jejuno stomacho potetur, nec in fine prandii, vel

coenæ: solet enim non rarò coctionem ventriculi interturbare, præsertim cum potens fuerit, in debili Ventriculo. Puellis non permittatur, neque imbecillum caput habentibus, aut in soporem proclivibus. Moderatum præterea sit; nam immoderatum omninò nocuum, potissimum si merum illud fuerit, crassum, acidum, nec dum benè fermentatum, aut ex vario vinorum genere commistum; itemque melle, aut saccharo concinnatum: ista enim semper visceribus infensa sunt. De eo verò, quod per filtrum colatur, ac depuratur, controversia est, quæ adhuc sub Judice manet. At licet communiùs credatur nocuum illud omninò esse, existimaverim tamen innoxie potari posse, usum tamen moderato, modò sit per iteratas repurgationes ab omni tartaro defecatum. Mala etenim ex eo solùm oriri possunt, cum sæculentum est, aut cum aliis corruptis vinis commiscetur; & quidem vel vapidis, vel fugientibus, vel acescentibus, & degeneratis: quo pacto solent Oenopolæ mangonizantes, vina adulterata reconcinnare, & corrupta pro dulcibus, sanis, & suavibus vendere. Cæterum vina fermentata, vetustiora, & penitus defæcata, meliora semper sunt, ac salubriora.

De recta ratione victus corporum sanorum.

EX hætenus dictis colligere nunc est, pro recto usu Ciborum, & Potuum ad sanitatem Corporum conservandam, præferendam semper esse simplicitatem ac parcitatem, varietati, compositioni, & copię. Meliùs enim, ac faciliùs chylicationis opus ex illa in ventriculo peragitur, quàm ex ista, eo quod succi digestivi ineptiores semper fiant ad multigenam ciborum copiam dissolvendam, quàm ad modicam, simplicem, & uniformem; præ-

præfertim verò si eorundem compositio, ac mistura, talis, ac tanta sit, cum multitudine conjuncta, ut Ventriculo gravamen, fermentis digestivis inertiam, & dissolutioni tarditatem inferat; unde postmodum cruditates, obstructions, dolores, tumores exoriantur. Quamobrè scitè quidem dixit Hippocrates, *lib. de Flatibus: Dissimilia, & inæqualia alimenta seditionem in Ventriculo excitare*; eo quòd aliqua citius, ac facilius, alia ferrius, & difficilius concoquantur. Hinc propterea experimur salubrius, diutiusque vivere frugatiores Homines, helluones verò brevius, & insalubrius. Vivitur enim exiguo melius, (a) & Natura paucis sanè contenta est. Jure ergo in vulgatum Adagium abiit: *Plures occidit Gula, quàm Gladius*. Mente proinde perpetuò tenendum Monitum illud M. Brasavoli.

Pone Gulae metas, ut sit tibi longior ætas

Esse cupis sanus? sit tibi parca manus.

Atque illud aliud:

Ut vivam, edam. vivere non ut edam. (b)

Facta autem comparatione inter labiles, & solidos cibos: sanè illi, quacumque tamen consuetudine seclusa, istos præcedere debent. Cum enim ex Anatome constet, cibos eundem ordinem intra Ventriculum fervare, quo fuerunt assumpti, & qui prius sunt dissoluti, ac digesti, in intestina descendere; planè si duri, ac solidi primùm ingerantur, impedimento quadantenus erunt labilioribus: quocircà hi diutius detenti, facilè acescunt, corrumpuntur, & in deleterios humores mutantur. Hac quippe de causa Diarrhœæ, Dysenteria, Cholera, Ventris tormina,

Febres, aliaque consimilia sæpissimè in Praxi visa sunt, ab inverso assumptorum ciborum ordine, provenisse: ut etiam notavit Galenus *l. 3. de symptomat. caus. cap. 1. & alibi*. Dixi seclusa quacumque consuetudine, nam qui aliter his vesci consueverunt (ut præ cæteris sunt Hispani) vel nullæ, vel leviori noxæ subjiciuntur. Vetusta namque consuetudo vertitur in Naturam: & quæ consueta sunt, minus molestare solent. Quæ autem his à quibusdam opponuntur nullius profectò momenti sunt, attenta potissimum Anatomæ veritate, & chylificationis opificio, per succos digestivos ope fermentationis habito, ut jam cunctis notum.

Tempus insuper cibandi illud sit, quod usu, & consuetudine, pro diversa Corporum habitudine, & constitutione, ætate, & varietate exercitiorum, comparatum est; itemque pro varia Anni tempestate, regione, aeris incolatu, cæterisque similibus; Etenim juxtà horum varietatem quibusdam lautius prandere, parcius cœnare conveniet: aliis ex adverso, prout ab usu melius ipsis profuisse comperire. Sic negotiis diurnis addicti, laboribus, exercitiis, itineribus, expedit parcius prandere, largius cœnare: contra aliis. Quamquàm in universum, magis semper commendabilis sit Cœna frugalior, iis præfertim, qui lucubrationibus incumbunt, & civilem vitam ducentes, lautius prandere solent, juxtà illud.

Ut sis nocte levis, sit tibi Cœna brevis.

Cæterum num bis, vel semel in die sumendus cibus sit, ex ipsiusmet Ventriculi habitudine, ac vigore, deducere licebit, & prout quisque in seipso noverit. Verumtamen id præcipuè animadvertendum ex Schola Salerni, ut

Tu numquàm comedas, stomachum nò noveris esse

Purgatum, vacuumque cibo, quem sum-

(a) Claudian. in Ruffin.

(b) Confer. Horat. *l. 2. serm. 2. & Pl. l. II. cap. 52. victum parcum, & simplicem commendantes.*

sumpseris ante.

Ex desiderio id poteris cognoscere certo.

Hæc sint signa tibi subtilis in ore saliva. (a)

Ex Qualitatibus modò Ciborum, crudi, frigidi, crassi, acerbi, duri, pingues, & oleosi, plerumque nocui sunt, præsertim stomacho debilibus: Coctionem enim, & distributionem retardant, calorem infringunt, spiritus, & liquores chylo destinatos hebetant, & obtundunt, ventriculum aggravant, excrementa multiplicant, cruditates, & obstructions pariunt, & cuncta ferè mala progignunt. Quòd si his frigida potationes (ut nostris præcipuè temporibus) adjungantur, longè graviora damna exoriuntur. Atque hinc, ex effrænata Gulæ libidinibus, gelidisque tum Aquarum, tum Vinorum, aliorumque artificialium liquorum frequentissimis potationibus, cuncti nunc ferè valetudinarii sunt, lubricamque sanitatem, brevemque vitam degunt. Grati verò suavesque Ventriculo cibi, etsi ferè semper commendabiles sint, attamen moderationem servare debent: Nam aromatibus conditi, variisque salsamentis confecti, tandiù conveniunt, quamdiù stomacho sunt gratificaturi, si fortè langueat, aut tardè admodum cibos conficiat. At verò quamquam consuetudo multum hac in re valeat, non tamen est tam longè à Naturæ modò removenda, ut in insalubritatem transeat, & ægotandi causa fiat. Multa enim quæ in Juventute sufferri solent, succedentibus ætatibus nocua evadunt, etiamsi diutinus illorum usus præcesserit: quæque in Modo, Ordine, & Tempore antea contulerunt, progressu temporum, & ætatum non leviter offi-
ciunt, mutata nimirum corporis, & partium constitutione.

Singulorum denique Esculentorum, & Potulentorum Naturas, Vires, & Facultates, qui nosse cupit, legat Authores de Re Cibaria tractantes, præsertim verò Galenum de Alimentorum facultatibus, Jo: Bruyerinum, Arnoldum Villanovanum, Arnoldum Freitagium, Cl. Deodatum, Balthassarem Pisanelum, Castorem Durantem, Ludovicum Nonnium, Henricum Mundium, aliosque.

De victu ægotantibus ministrando.

EX tribus Medicinæ præsiidiis, quibus adversus ægrotudines jugiter à Medicis dimicatur, Diætetico, Pharmaceutico, & Chirurgico, primum sanè sibi locum vendicat Diæteticum: nec immeritò, quoniam cæteris utilius, præstantius, magisque necessarium est. Utilius quidem, quia ad vires conservandas dirigitur, sine quibus Morbi, & Causæ morbosæ nullatenus fugari possunt: Præstantius, ac nobilius, quia ubi reliqua ad curandum, aut præservandum, sunt instituta, Diæteticum ad conservandum specialius colimat; modò apud omnes constat, partem Medicinæ conservatricem longè, latèque præcellere Curatrici, ac Præservatrici: quin etiam solius sæpissimè Diætæ recta administratione, nedum conservamus, sed & commodè præservamus, atque abigimus morbos. Magis denique necessarium est; nam non semper ægroti medicamentis egent, ut sanentur; at verò semper opus habent, ut alantur, in gratiam virium conservandarum. (a) At verò sicuti Cibus opportunè exhibitus maximè confert, ita ex adverso nocuus omninò evadit, ubi importunè, excedenter, &
non

(a) Galen. 3. de loc. aff. 6.

(a) V. Celsum lib. 3. c. 4.

non convenienti modo administratur; Proinde factum; ut tam Veteres, quam Recentiores Medici in rem hanc plurimum incubuerint, & varias diversasque Regulas in alendis ægrotantibus constituerint. Horum autem omnium primus communi voto proclamatur Hippocrates, in ipso qui singula ad id facientia exactissime examinaverit, quemadmodum colligere est ex pluribus ejusdem Operibus, in quibus rectam Victus rationem edocuit, speciatim verò lib. 1. *Aphorismorum*, & de *Ratione Victus in acutis*, de *Diata*, & de *Morbis*, ubi Regulas sanè aureas in rectè administrando maximo hoc Medicinæ præsidio tradidit. Nos propterea illius documenta sectantes distinctè eandem persequemur, ordine, ut decet, congruentiori.

Primum autem, facta comparatione Morborum acutorum, cum chronicis; quia in illis coctiones, secretiones, sequestrationesque morlificarum causarum citius perficiuntur, adeoque breviorum Natura cum morbo pugnam init; frugalior cibus exhibendus est; lautior verò in chronicis, ne scilicet propter temporis diuturnitatem vires concidant, documento Hippocratis *aphorism. 1. text. 9.* ubi *Conjectari oportet*, inquit, *an æger sufficiat perdurare, quousque morbus constiterit, &c.*

Si verò acuti morbi cum evacuationibus sociantur, largior victus commendatur, damnatur tenuis, ex doctrina ejusdem, tum 2. *aphorism. 22.* dicentis, *Morbi ab evacuatione pendentes, repletionem sanantur*: tum 1. *aphorism. 4.* ubi tenuis victus vituperatur in acutis, in quibus non convenit; uti sunt morbi ab evacuatione procedentes: quemadmodum advertit in *commentario* Galenus. Id ipsum confirmat Celsus, cum inquit: *Sicut in morbis, in quibus initium est ab evacuatione, nullum majus remedium veloci refectio; ita nullum majus damnum jejuniis, aut parco cibo.*

At contra in acutis ab humorum copia pendentibus, tenuis victus optimus erit: autoritate ejusdem Hippocratis 2. *aphorism. cit.* Si namque largior victus exhiberetur, procul dubio majora excrementa cumularentur; cum tamen ex eodem Hippocrate 2. *aphorism. 10.* *impura Corpora quanto magis nutris, tanto magis lædis.* Accedit, quòd in his vires languere non solent, quippe quæ non longam cum morbo pugnam inierunt, adeoque multo cibo non egent, ut reficiantur.

In Chronicis præterea cum extenuatione conjunctis, nedum aliquanto plenior cibus exhibendus est, sed humectior: in his enim solet sanguis acritate, & falsilagine muriatica plurimum dissolvi, atque adeò suo glutine privari: unde ad retundendam acritatem, atque ad impediendam ejusmodi dissolutionem, conferet cibus humefaciens, uti sunt jura, etiam ex glutinantibus medicamentis concinnata. Verum in chronicis cum obstructione, tumore, scirrhus, convenientia alimenta attenuantia, licet paulo pleniora: attenuantia quidem, in gratiam obstructionis; paulo pleniora verò, ad conservandas vires, ratione diuturnitatis temporis. Ubi notare decet, aliud esse victum tenuem, aliud attenuantem; tenuis enim vires diminuit, & saltem per accidens sanguinis quantitatem detrahit; attenuans verò tuetur vires, & quandoque etiam auget, licet humores incidat, & tenuiores reddat; immò etiam meatus omnes Corporis refert; ut cum E. g. carnibus, illarumque juribus incoquimus petroselinum, samfuchum, cinnamomum, crocum, & similia:

Quoniam verò non solum victum, qualis deceat, ægrotantibus præscribere convenit, sed etiam opus est, ut debito tempore exhibeatur; propterea in acutis morbis, quia brevis est pugna inter Naturam, & Causam morbificam, citòque Augmen-

tum imminet, parcior cibus per ea tempora ministrandus, ne scilicet distrahatur Natura ab opere coctionis, atque ab inutilium succorum secretionem, quæ tantopere necessaria est. Circà declinationem verò, plenior offerri poterit, ut vires restaurentur, sed tamen non plenissimus, ne eadem opprimantur, aut suffocentur: advertendo pariter quòd admonuit Hippocrates eodem 2. aphorism. 7. *Quæ longiori tempore extenuata sunt corpora, lentius reficere oportere, breviori verò, ocyus; pro ratione.*

Nedum autem toto tempore ægritudinis acutæ, sed in Temporibus ejusdem particularibus, per singulas accessiones, varietas in cibando servanda est. Et quidem ineunte particulari accessione, cibus exhibendus non est, ex eodem Hippocrate 1. aphorism. 11. ubi dicitur: *In principiis Accessionum cibum dare nocuum est: & in ipsis Accessionibus abstinere oportet.* (a) Pro Accessionibus verò intelligenda sunt tria illa particularia tempora cujuscumque Paroxysmi. Principium scilicet, Augmentum, & Status. In principio namque si cibus exhiberetur, præter ventriculi gravamen, & cruditatem, febris procul dubio exacerbaretur, & facile posset in deteriorem commutari. In Augmento, & Statu, omnia symptomata ingravescunt; propterea à cibi exhibitione, deteriora illa fierent, gravata nimirum, & fortassis etiam succumbente à cibo Natura. Hinc in omnibus periodicis febribus tria ista tempora, omninò cibus vacua, transigi debent. Neque solùm in febribus, sed in quibuscumque aliis ægritudinibus, quæ periodum quamdam servare solent, & statis temporibus exacerbantur, totum illud tempus exacerbationis, & repetitionis, prætereundum, ne magis Natura per cibum

affligatur, & copiosiora excrementa cumulentur. Satis autem erit, in gratiam virium conservandarum, si per intervalla, instaurantes quædam potiones, tincturæ, aut elixiria, cochleatim offerantur; cibus verò, postquam ægritudo remissionem subierit, exhibeatur.

Insuper, quia febres, vel intermittentes sunt, vel continuæ; diversa ratio in utrisque servanda est in cibis ministrandis. Et quidem in intermittentibus, commodius semper tempus cibandi erit, in horis à febre vacuis, cavendo tamen, quoad fieri poterit, futuram accessionem, ut per horas sex, aut septem saltem, ante futuram accessionem, cibus offeratur; & vel plenior, ac solidior, vel parcior, magisve, minusve liquidus, pro ratione virium, ætatis, anni, temporis, consuetudinis, & peculiaris constitutionis ægrotantis. In Continuis verò sat erit tempus ipsum declinationis expectare, ut docuit Hippocrates 1. de rat. vict. in acut. text. penult. inquit: *tempus danda sorbitionis optimum est, cum calor ad pedes descendit, & reliquerit Cor:* quod sanè in declinatione contingit.

In febribus autem, quæ per dies impares exacerbantur, plenior cibus concedi poterit in diebus paribus levioribus; parcior verò in imparibus, ut potè gravioribus; servando tamen variam cibi conditionem, liquidiorum, vel solidiorum, pro ratione habitudinis ægrotantis, & virium necessitate; si nimirum ægri fuerint picrocholi, graciles, jejunium non ferentes, vel è converso.

Cum verò febres nedum continuæ sunt, sed subingredientes, quarum scilicet accessiones repetunt in declinatione prioris, & antequam una desinat, altera subintrat; melius erit cibum offerre in medietate status prioris accessionis, antequam, in ejusdem declinatione, principium posterioris accedat: Nam cæteris paribus, semper gra-

(a) V. Commentaria nostra super hoc.

gravius damnum imminet ex cibo exhibito inter initia accessionis, quàm in statu: cumque unius accessionis declinatio sit principium alterius, oportebit à cibo abstinere in declinatione primæ, cum hæc confundatur cum principio secundæ accessionis. Verùm in his Casibus non solidus, sed liquidus cibus esse debet, uti sunt iura, aliquantulum tamen vigorata testibus gallorum, ut & liquores carniū, seu carnes ipsæ consumptæ in Balneo Roris, & deinde expressæ, aliudve simile.

Quamvis autem initia Accessionum febrilium omninò vitanda sint, admonet tamen Galenus 10. meth. cap. 5., posse aliquandò refectivum aliquod exhiberi, si corpora picrochola sint, & stomachi imbecillitate laborent, adeout in animi defectionem facillimè incidant, qualis erat ille, cujus ipse ibidem meminit, qui in singulis accessionibus animo linquebatur, cum Ventriculi titillatione, & languore. At verò his satis erit, per aliquod tempus ante accessionem jusculum aliquod exhibere, vel etiam micam panis vino albo diluto maceratam.

Si prætereà accessiones febrilium adeò producantur, ut duas ferè integras dies comprehendant, quemadmodum in febris illis, quas Græci Tritæophyes appellabant, hoc est extensas Tertianas; quia æger tam longam inedia m sufferre non potest, præstabit, transacto augmento, jusculum exhibere, aliudve simile jentaculum, & deinde in declinatione paulo largiùs alere; ita tamen, ut saltem horis sex, vel septem, futuram accessionem cibus antecedit. In Semitertianis verò, græcè Hæmitritæis, quarum accessiones recurrunt graviores per dies impares, & in paribus, litèt mitiùs, continuò perseverant; parcior cibus, & liquidus in imparibus, paulò plenior, & solidus in paribus, offerri poterit, modò hic facilis semper sit digestionis, & boni nutrimenti.

Circumscripta autem quacumque consuetudine, melius erit bis saltem singulo quoque die naturali ægrotantes alere; & quidem horis matutinis, utpote plerumque quietioribus, cibo solidiori; liquidiori verò vespertinis, aut nocturnis. Unica siquidem comestio in singulos dies, ut plurimum insufficiens est, si modica; gravans verò, & nocens, si larga. Dixi circumscripta consuetudine: nam si cæteroqui fuetus æger foret in statu sano, semel in die cibum sumere, non est duplici perperam gravandus in statu morbofo, in quo naturales operationes valdè deficiunt. Dixi insuper cibo solidiori, & horis matutinis, quia plerumque quietiores istæ sunt in ægrotantibus: quod si fortasse secùs accideret, eligi debebunt, quæ minùs molestæ sunt. Idipsum observandum erit in febris, quæ suos paroxysmos proferunt anticipantes, vel postponentes, ut nimirum tempus illud eligatur, quod remissius videbitur, vel omninò febre vacuum, cavendo tamen, ab imminente accessione, quòad fieri poterit. Cæterum in cibus liquidioribus præferatim, jusculis, minùs errabitur, cū ab his minùs Natura gravetur: atque in hoc laudandi profectò sunt Romani Medici, longè cæteris, in cibandis ægrotantibus, cautiore.

In febris denique Continentibus dictis, quæ scilicèt accessionibus, iteratisque paroxysmis carent, quietiores adhuc horæ eligendæ sunt: Hæ autem erunt, quæ minùs symptomatibus molestantur. Quòd si febris sint Homotonæ, idest eundem semper tenorem servantes, cibandi erunt ægrotantes horis consuetis tempore salutis, eo quòd in his Natura refici consueverat. Idemque dicendum in Increscentibus, & Acmaisticis dictis. Verùm in his parcè nimis alendi sunt febrientes, & solùm in gratiam virium conservandarum, si fortasse langueant. Quòd si ægrotantes ferendo sint, ut valeant impetum febris effugere

abl.

absque cibo; melius erit omni prorsus alimento abstinere: ubi verò vires langucant, parùm, & sæpè illæ reficiantur liquoribus instaurantibus per vices, & moderatè exhibitis. Verumtamen in cunctis respiciendum semper ad ætates, habitudines corporum, consuetudines, Regiones, & Anni tempora: quamobrem Pueri, largiori semper victu tractandi sunt, cum in ediam ferre non possint; contra Senes, multo cibo non sunt gravandi, sed modico, ac repetito, ne vires concidant. Sic quoque aliter alendi sunt graciles, quàm obesi, illi quidem pleniori, ac humidiori; isti verò tenuiori, & sicciori. Ex consuetis plenius cibandi sunt Hispani, Germani, aliique, qui in statu salutis lautiori cibo fruuntur; partius verò insueti, ut Itali, præsertim Romani, & Neapolitani. Idipsum dicendum de Regionibus: Incolentes enim Regiones frigidissimas, ut Boreales, solidioribus alimentis; tenuioribus verò, habitantes Regiones meridionales: qui si fortasse uberius alendi forent, potius parum, & per vices, instaurantur. Denique quod ad Anni tempora, parcius Æstate, & Autumno, & cibis facilioris coctionis; largius Hyeme, & Vere, solidioribusque alimentis cibentur. In universum postremò frugalior cibus ægrotantibus convenientior semper est, saltem ratione causæ morbificæ, quæ à cibo plurimo incrementum non debet, ne morbum protrahat, nec naturam aggravet, aut à sequestratione, secretionemque peccantium humorum retardet, aut impediat.

*Quenam repletio peior Panis,
an Carnis.*

AD calcem hujus tituli de Cibo, & Potu placet curiosam hanc disceptionem in medium proferre, atque examinare, quam licet nonnulli alii proposuerint,

exactè tamen nondum illam explicuisse mihi visi sunt. Pro Pane autem Triticeum intelligendum: nam qui ex hordeo, milio, ceterisque leguminibus, conficitur, in controversiam hanc non cadit.

Jamdiù ex Avicenna *fen. 3. i. doct. 2. cap. 7.* effatum viguit *Repletionem omnem malam esse, Panis autem esse peiorem*: cui inhærens Jacobus de Partibus Avicennæ Commentator, rationem quoque adjecit, inquiens: *Repletionem Panis esse malam, quia stomacho diù injacet, gravans ipsum plurimum, & opprimit pectoralia; & si descenderit tandem de stomacho non benè digestus, oppilabit Hepar, & Mesaraicas. At Carnes minori nocumento sunt, quia plus proportionantur humano Corpori, & minùs premunt pectoralia, & si transeant indigesta ad Hepar, & Mesaraicas, minùs stabiles, & magis curabiles oppilationes inducunt, quàm Panis.* Hinc factum; ut dictum istud in commune Adagium abierit, & Panis esum immoderatum longè peiorem esse carnibus, omnes propemodùm proclamaverint. Verùm ex adverso Alii, perpendentes Panis substantiam optimam esse, cunctis acceptam, Nationibus omnibus, quibus Triticum innotuit, familiarem, stomacho semper gratam, ac salutarem, vitæ humanæ sustentandæ valdè accommodam, pro eadem acriter pugnarunt, & Adagium illud in Carnis esum immodicum verterunt; ut proinde autument: *Omnem Repletionem malam esse, Carnis verò, non Panis, pessimam*; quemadmodùm præ cæteris nuper rimè ex multis recollegit Gaspar à Réjes, peculiari quadam dissertatione, quæ est octuagesima quinta sui *Campi Elysii Jucundarum Quæstionum*, ubi pro Pane multa congerens, in Carnis esum immoderatum, effatum istud inculcat.

At verò Mihi, ne utrique injurius forem, distinctione procedendum visum semper est, & comparatè solum ad varias, differentesque Ventrui constitutiones, & Cor-

Corporum habitudines, diversosque usus è primordiis Vitæ acquisitos, modò ex uno, modò ex altero, immodicè sumpto, gravia damna evenire posse sum persuasus; ità tamen, ut à Carne ex facili corruptione noxam, à Pane verò, ob tardiores in ventriculo dissolutionem, subindeque exortam ingentem fermentationem, molestamque tumefactionem, fateri cogamur.

Et quidem Leones, Lupi, Ursi, Canes, ad plures, & plures libras crudas carnes devorant; Panem verò vix ad paucas ingerunt, quasi verò benè noscant, futurum exinde sibi detrimentum majus, cum tamen Carnibus immodicis si graventur, vel evomunt, vel per alvum corruptas illas egerunt, & exonerantur. Ex adverso Equi, Boves, Asini, Muli, si multo frumento fatientur, doloribus, ac cruciatibus ventris impensè admodum torquentur, mox etiam toto Corpore tumefacti pereunt. Cursorum Equum, de genere eorum, quos Barbaros vulgò nuncupant, aliquandò medium crepuisse vidi, quia ab Hero, ut victoriam in cursu allequeretur, intritè ex vino generoso, antea pastus fuerat. Sunt nonnulli, qui mecum de Ventriculi languore, tarda que digestionem, cum non levi Ventris gravamine, conquesti sunt: cognito autem, quòd non aliunde id proveniret, quàm ab esu Panis inter edulia immoderato, indicta iisdem illius temperantia, sine ullo alio medicamento, molestiam illam evaserunt. Moderatus enim Panis, & benè fermentati, usus, ciborum dissolutionem adjuvat; immoderatus verò impedit, ac in longius tempus potrahit; non sine magno ventriculi fastidio. Atque hinc fit, ut pauca, ac durissima excrementa intestinalia egerant, qui multo Pane, omni-que furfure exuto, vescuntur; cum alias furfuroso usi, sicuti non multum inde nutriuntur, ità fæces copiosiores, lubricioresque reddunt. Sed & animadversione quoque dignum, quòd multo Pane saturi,

nil deorsum, aut sursum egerunt, etsi ventriculo graventur; Carnibus verò repleti, facillè per utramque partem exonerantur: fortè quia in his fibræ ventriculi liquore carniū delaxantur; in illis verò à glutinè Panis corrugantur, & contrahuntur; ut proinde nonnisi peracta dissolutione, cibariam massam deponant. Accedit quòd Septentrionales Populi, qui in quotidianum ulum carnes fumo, aut Sole arefactas habent, benè, ac salubriter vivunt; Panem autem, si aliquandò eo utantur, gravius, molestiusque ferunt: tantum usus, & consuetudo prævalet. Est hic Neapoli Nobilissima quædam Familia, è genere illorum, qui pro Stemmate Amaranthum, immortalitatis Amantem, habent, in qua et usu Avito vetustissimo, nullus à teneretate, pane vescitur, carnibus verò cujuscunque generis saturantur sine ullo sanitatis incommodo. Sed ecquis unquam piscibus crudis, locustis, aliisque similibus apud Nos vesceretur, quemadmodum legimus commodè nutriri Septentrionales Americanos, sine sale, aliove condimento convenienti, nisi assiduus à Nativitate usus intercessisset. Non ità pridem fuit hic Neapoli, qui sine ullo vitæ detrimento echinos, & crudos, & suis corticibus spinosis indutos, maxima cum facilitate devorabat, & promptè etiam digerebat; locustas item, spondylos, aliaque testacea. Ex adverso alium novi, qui ab esu fructuum Echinorum immoderato, Diabete incurrerit, & Mortem; & alios plures, qui à spondylis, ostreis, limacibus, diarrhœam, dysenteriam, aut lenteriam passi sunt, periculosissimam. Sunt & alii plurimi, qui ab esu labilium ciborum male se habent; duriores verò, solidioresque cibos & benè expetunt, & meliùs concoquant. Sic ex fructibus, qui labiles sunt, & facillè corrumpuntur, plerique promptissimè ægrotant, alvo soluta; ab aliis verò durioris, solidiorisque substantiæ, non

non item: fecus alii, & alii multi. Hinc fateri decet, non omnibus æquè futurum, aut ex Pane, aut ex Carnibus immodicè esitatis, detrimentum, sed pro diversa Corporum, & fermenti stomachici habitudine, usuque vario.

Facta autem utriusque comparatione, quamvis ab esu carnum immoderato magna successura sit noxa ob faciliorem illarum in alio corruptionem, nihilo tamen minùs à panis satietate, propter tardiorrem ipsius exsolutionem, diuturnioremque in ventriculo moram, aut etiam ob ingentem inductam in sanguine fermentationem, majus damnum contigit experi-ri. Carnes equidem facillimè corrumpi, ac putrefieri cunctis liquet, potissimum cum à fermentis viscerum digestivis, ad tantam copiam inidoneis, in alibilem substantiam verti nequeunt, sed vel in acorem, vel in nidorem fætidum transmutantur; quo circà gravamine, aut irritamentò ventriculi fibrillis illato, velevomuntur, vel dejiciuntur putrefactæ, & corruptæ. At verò Panis per hoc idem, quòd multi, & boni nutrimenti sit, abundantique glutine saturi, nocentior, si plus justo ingeratur, evadit. Ventrem enim aggravat, & opprimit, illiusque fermenta hebetat, & glutinosa sua substantia obtundit, fibras coarctat, & nonnisi diuturno nimium tempore dissolvitur; unde longam nimis moram ibidem contrahens, molestam tumefactionem, anxietatem, doloremque gravantem, & instantem affert, non sine graviore periculo, præsertim si per immodicam fermentationem, acorem, acritatemque excedentem excitet, & sanguinem etiam inficiat. De Tritico in aqua elixo, scribit Galenus 1. de alimentor. facult. cap. 7. se aliquando, propter panis penuriam, cum duobus adolescentibus consociis ipsum elixum comedisse, & per totum sequentem diem saturum nil aliud edere potuisse; quod & idipsum à Rusticis ejus lo-

ci edoctus, grave, & concoctu difficile illud tandem esse concludit, viresque magnas habere, validèque Corpus nutrire, ac robur maximum conciliare: quòd fortasse respicientes nonnulli apud Athenæum lib. 3. Deipnos. Panem ex Tritico confectum sic dictum voluere, ob alimenti copiam; ideòque apud Latinos Panis à Pan græcè, quòd *totum*, & *universum* significat, appelletur. Idipsum confirmat Alexander Aphrodiseus probl. 66. lib. 2. Panem omnium ciborum maximè nutritium existimans: quòd autem alimenta substantiæ sunt alibilioris, eò difficilius, tardiusque digeruntur, ac proinde diutius in ventriculo detinentur, unde non levis illi noxa. Id sanè pro rata sua experiuntur, qui in pane, & Vino jejunantes, omnem famem uberiori pane explere coacti, ob promotam vehementem, ex longiori mora in ventriculo, fermentationem, ingentem acorem primùm persentientes, mox gravem per totum illum diem, laboriosamque molestiam patiuntur. Notum quippe cunctis est, usu panis nimio, distendi plus justo arterias, & venas, totumque Corpus majorem in molem assurgere, meatus infarciri, ac plurimum impediri perspirationem, respirationemque; quamobrem coactus fuit Sylvaticus, licèt contrariæ assertionis propugnator, *controvers. 6.* affirmare, quod *quæcumque optima sunt, si propter copiam corrumpantur, eorum corruptela multo sit deterior, quàm eorum, quæ minus bona sunt.* Jure ergo ad quæsitum: *Panis nutritio, an Carnis melior?* respondit olim Petrus Hispanus: *Panem magis, & melius nutrire accidentaliter, quòd tardè convertatur, & multum immoretur; Carnem verò magis nutrire naturaliter, quia citius digeritur, & citius dissolvitur.* Hac eadem, & multo validiori de causa, Panis Azymus, subcineritius, aut non benè fermentatus, graviore ponderis Ventriculo fit, & tardioris digestionis, ob mul-

multam, glutinosamque substantiam alivam. Hinc non absre indictum Hebræis, ex Ægypto discessuris, diùque iterfacturis, ut Pane Azymo vescerentur, cum lactucis agrestibus, diathesi sanguinis mirificè opitulantis; ut & Eliæ, ad longum iter sustinendum, provisum de Pane subcineritio. Sed & Ambylum pariter, Pastilli edules siliginei, cæteraque edulia, ex farina intrita, & absque fermento compacta, plurimi sunt nutrimenti, adeoque tardæ nimium dissolutionis, præsertim in stomacho debilibus. Atqui notabile equidem est, quòd Celsus lib. 2. cap. 24. Panem sine fermento inter res stomacho idoneas reposuit, & c. 25. fermentatum Panem inter res stomacho alienas; quin & cap. 28. *Panem fermentatum*, scribit, *facile intus corrumpi, non fermentatum difficile*; unde eodem cap. 25. statuit: *non quidquid boni succi est, protinus stomacho convenire, neque quicquid stomacho convenit, protinus boni succi esse*. Quare concludendum non magis ex carniū esu immodico, quàm ex pane intemperanter assumpto, inductam saturitatem nocuam fieri: id quod probandum proposueramus. Nil enim in Natura tam bonum est, ut aliquando obesse non possit; nec ex adverso tam malum, ut alicui interdum non proffit, attenta præsertim corporum habitudine, & varia, diversaque ab incunabulis consuetudine acquisita, ut aliàs quoque innuebamus. Quamquam haud inficiari queam multas species Carniū ad saturitatem usque ingestas nullius ferè incommodi in quibusdam observari, ut præsertim experiuntur Apuli in esu Carniū Vervecinarum, toto tractu ejus Regionis, quippe quæ tam salutare sunt, & boni succi, ex peculiari illius climatis, & fertilium pascuorum conditione, ut nedum benè nutrant, & faciliter digerantur, sed (quod majus) Corpori floridam salubritatem impertiantur, quemad-

modum & de Vervécibus Hispanis, eisdem ex causis, circumfertur. Idipsum testantur ab esu Carniū Vitulinarum Accolæ Promontorii Minervæ, Massæ Lubrensis, Surrenti, Vici Equensis, & adjacentium locorum, ubi nedum Vituli Vaccarum, sed & Sues salubres Carnes proferunt, absque ullo Corporis detrimento, ad satietatem usque comestas: quod secus de Panibus accidit.

De Motu, & Quiete.

Motus à Medicis consideratur ut Causa Nonnaturalis, comprehendens sub se omnem exercitationis speciem, per quam Corpus benè, vel malè affici potest: Quamobrè describi solet, quod sit, *Manifesta Corporis agitatio*. Sunt qui etiam Animum ad ejusmodi agitationem referant, quoniam ex Hippocrate 6. epidem. sect. 5. Hominum cogitatio dicitur Animæ deambulatio. Verùm hæc ad Animi passiones potius revocanda videtur, quia in illis Animus reverà commovetur, & perturbatur. Quies ex adverso describitur, quod sit *Mansio, Stabilitas, seu Otium Corporis*. Sicut enim per Motum Corpus eundem situm non servat; ita per quietem in eodem consistit, & otatur. Id autem intelligendum tam secundum totum Corpus, quàm secundum partes: nam dantur quædam genera Exercitiorum, in quibus partes solum moventur, ac exercentur, ut in Arte Sutoria, in Rota Figuli, &c.

Motus autem ex Galeno 2. de san. tuend. cap. 2. triplex est, Simplex Motus, Exercitium, & Labor. Simplex Motus intelligitur, per quem ita leviter Corpus agitur, ut nec ad sudorem, nec ad anhelitum, nec ad lassitudinem deveniat, ut est moderatus incessus. Exercitium est Motus sensibilior, qui ex Galeno cit. loco, com-

comprehendit respirandi frequentiam, & sudoris exitum. Labor demum, adhuc major Motus est, & complectitur non solum sudorem copiosum, sed etiam defatigationem, cum anhelitus difficultate. Quies ex adverso duplex etiam est, simplex scilicet quæ adeo levis, & brevis est, ut Motus potius videatur, quam Requies: & Magna, quæ cum otio confunditur. Est autem Otium talis, ac tanta Corporis, & Vitæ tranquillitas, cum omnimoda Motus vacatione, ut si paucas quasdam operationes demas, ad Mortem referri possit, cum Vita nostra in operationibus consistat: otiosi autem non solum ab immoderatis, & mediocribus sed etiam à consuetis, & levibus exercitationibus desistunt.

Etsi autem ita inter se differant Motus, Exercitium, & Labor, consueverunt nihilominus Medici Vetustiores, illos confundere; Sic Hippocrates *epidem. 6. sect. 6.* Exercitium, & Laborem pro eadem re usurpat, cum inquit: *Labor, Cibus, Somnus, Venus, omnia mediocria*: ubi pro Labore Exercitium intelligit. Et eodem *6. epidem. sect. 4.* Labor, inquit, *Cibum præcedat*. Et *2. aphorism. 8. ubi fames*, ait, *laborandum non est*; id est, non exercendum. Galenus quoque *5. de san. tuend. cap. 11. & 1. ejusdem operis cap. 8.* confundit Motum cum Exercitio, dicens, dari triplicem speciem Exercitii: nam, *vel movemur à Nobis ipsis, vel ab Aliis, vel à Medicamentis*. Sed & sæpius referuntur veluti inter se plurimum differentia, ac distincta; quemadmodum ex eodem Galeno *2. de san. tuend. cap. 2.* ubi per mutationem anhelitus distingui dicitur Exercitium à Motu. Idem etiam *3. Artis Medic. t. 12. in exercitiis*, inquit, *cum primò cæperit lassari Corpus, quiescendum*: lassitudo autem laborem sequitur; quod idem docuerat Hippocrates *2. aphorism. 48.* inquit, *In omni Corporis motu, ubi labo-*

rare cæperit, quies statim lassitudinem auferit. Ubi verbum *laborare*, non sonat *exerceri*: fallum enim est, quod inter initia exercitiorum lassitudo accadat, & quiescendum sit. Quare Exercitium rigorosè à Labore distinguitur, quia Labor lassitudinem affert; secus verò Exercitium; necesse autem non est, ut semper in exercitiis sudor habeatur, cum aliquibus saltem non sit ita facilis; unde in his satis erit, per lassitudinem, & anhelitus difficultatem, Exercitium à Labore discriminare. Hinc sudor, lassitudo, & respirandi difficultas non simul omnibus præcipienda, sed pro Corporum ratione varia.

Præterea ex Galeno *cit. 2. de san. tuend. cap. 8.* Duplex Exercitium distinguitur: Syncerum unum, Operosum alterum. Syncerum dicitur, quod nullum opus ad extrâ relinquit, cujusmodi est Cursus, Lucta, Digladiatio, Ludus parvæ pilæ &c. Operosum verò, quod post se opus aliquod relinquit, ut Fossio, Fabricatio, Piscatio, Venatio. Alia insuper Exercitiorum genera, velocem Corporis motum exigunt, non tamen vehementem laborem, aut grande rebur, veluti est ludus parvæ pilæ. Alia ex adverso, vehementem laborem exquirunt, & robur validum; nullam tamen in operando velocitatem; ut est Fossio, ponderum Elevatio. Alia demum utrumque comprehendunt, ut Remigatio. Inter hæc autem, prætulit idem Galenus Ludum parvæ pilæ libro, quem de eodem inscripsit, *cap. 2.*, quoniam omnia membra indifferenter exercet, neque multum virium dispendium affert, cum grande robur non exigat.

Verum & in his advertere juvat, quod idem Galenus *cit. loc.*, & Avicenna *sen. 3. p. doctr. 2. cap. 2* de accidentalibus quibusdam exercitiorum differentiis docuerunt, illas scilicet desumi posse vel à Moyente, vel à Mobili, vel à Tempore, vel à Spatio, vel à Loco. A Moyente, vel valido,
vel

vel imbecilli, desumuntur vehementes, & debiles exercitationes: Vehementes ut Fossio, Lucta, Digladiatio, Saltatio, in quibus validissimæ vires requiruntur: Debiles, ut Ludus palmaria pilæ, Disci jactus, levis Choreia, in quibus tam validæ vires non expostulantur, licet citior agitatio exquiratur. A Mobili, aliud Exercitium est totius Corporis, aliud alicujus tantum partis: ad primum revocatur Ludus parvæ pilæ: ad secundum, Vociferatio Scriptio, Rotæ circumvolutio. Rursus vel Mobile à seipso movetur, ut in prædictis exercitationibus; vel ab alio, ut in Lætica, in Sella, in Rheda, in Navi. A spatio desumuntur Exercitationes breves, vel longæ. A Tempore, celer, & tarda, diurna, nocturna, matutina, vespertina. A Loco demum, si hic est publicus, Exercitium ibidem peractum, dicitur Gymnasticum; si privatus aut est acclivis, vel declivis, planus, vel asper, ad solem, vel ad umbram. Qui autem plura de his scire statagit, adeat eruditissimum Mercurialem in sua Arte Gymnastica.

Quantam autem diligentiam Veteres in ejusmodi Exercitiorum generibus adhiberent, mirum sanè est; quandoquidem, ut refert idem Galenus *cit. lib. de san. tuend.*, antequàm ad exercitia accingerentur, primum Corpora lavabant, atque à sordibus detergebant; mox oleis, & non raro odoriferis, inungebant; deinde alvum exonerabant, atque etiam, si fortassis oporceret, usu clysterium: postmodum exercebantur ad sudorem usque; postremò quam optimè, sudorem, & recrementa cutis abstergebant, & sedato Corpore ad mensas accumbebant. Neque hæc perperam quis putet acta, sed summo planè judicio: quippe Cutis primum lota, atque à sordibus deterfa transpirationi promptior evadit, quæ viventibus cunctis summoperè necessaria est. Ne verò deinde exaresceret ab exercitiis, consultò inungebatur. Alvi postea

exoneratio perutilis omninò erat, ne propter exercitia obdurescerent excrementa, aut diutius detenta dolores excitarent, & ægritudines parerent: Exercitia autem ad sudorem usque producta, omnia prorsus Corporis inquinamenta depellebant, cum omnibus constet majora emolumenta nobis accidere perspiratione, & sudore, quàm quacumque alia evacuatione: graviora etenim mala nobis eveniunt ab excrementis in glandulis præcipuè cumulatis, atque ab impedita transpiratione. Denique sudoris deterfio omninò necessaria erat: siquidem sudor detentus in habitu Corporis refrigescit, & fluxiones, febresque parit. Ad hæc omnia cibus postremò, & quies consequerantur; quoniam ad instauranda membra, per laborem defatigata, alimento, & quiete opus erat.

Quæ commoda, atque incommoda, Motus, & Quies afferant.

Multa præstat commoda Motus, multa Quies; ut propterea non omnibus indiscriminatim; aut hæc, aut ille prescribendus, vel interdicens. Et quidem simplex Motus sanguinem ab excrementosis humoribus, aut halitibus repurgat, extenuando quæ crassa sunt, difflando verò, quæ tenuia: coctionem, distributionemque alimentorum adjuvat: obstructioni opitulatur, referendo meatus, & incidendo crassos, tenacesque succos: putredini, ac corruptioni resistit, nam ab otio, & quiete immoderata stagnantes humores facillimè corruptioni subjiciuntur: viscera quoque, & articulos confirmat; unde fortiores fieri eos experimur, qui assiduis exercitationibus sunt addicti: quin & podagrici, postquam tenuiores, molestioresque humores fuerint resoluti, maximam à motu utilitatem nanciscuntur. At verò,

verò immoderatus, atque importunus in multis nocere potest; præsertim verò, coctionem ciborum sollicitando, illam non perficit, sed turbat; simulque cum excrementis portionem chylosam confundit; ut propterea infarctus viscerum afferat, sanguinem conspurcet, ac febrim excitet, præsertim si tempore æstivo, aut autumnali, sub sole fiat. Eadem de causa, nonnumquam affert inflammationes, erysipelata, dolores potissimum Articulorum; siquidem per exercitationem immoderatam necdum humores fluxiliores evadunt, sed etiam Artus ipsi delaxantur. Labor demum, non nisi in iis Corporibus proderit, quæ multis, crassisque succis abundant, ad eosdem attenuandos, & per sudorem digerendos. Cæterum nocet natura debilioribus, quia vires atterit, corpus exiccat, & humores nimium concitando, febres, & inflammationes inferre potest.

Quies ex adverso, si moderata sit, vix oberit: etenim per eam, veluti alternatim habitam, digestio peragitur, ac promovetur: alimenta distribuuntur: egeruntur excrementa: nec fuliginum transpiratio retardatur: vires reficiuntur, sanguine exinde non inquinato: membra Corporis instaurantur, non delassantur: quamobrè non immeritò cecinit Ovidius. 4. *Heroid.*

Quod caret alterna requie, durable non est:

Hæc reparat vires, fessaque membra levat.

Contrà verò Otium inutile prorsus est, immò nocuum; quandoquidem alimenti distributionem inhibet, meatus obstruit, excrementa constipat, caput vaporibus replet, Cor, & sanguinem crassis succis inquinat, totumque Corpus pinguedine, & lentis humoribus obruit; unde pigrum, decoloratumque illud efficit, segnemque animum reddit, & sensus omnes, tum internos, tum externos hebetat. Hinc idem Poeta: 1. *de Ponto*,

Cernis, ut ignavum corrumpant otia Corpus;

Ut capiant vitium, ni moveantur Aquæ?

Etenim ut benè Lucretius:

Semper in assiduo motu Res quæque geruntur. (a)

Solum autem ad vulnera consolidanda, & fracturas ossium glutinandas conducibile est, cum ista motum non admittant, ne scilicet fasciæ, ligaturæ, laquei, moveantur, & medicamenta agglutinantia à sua sede removeantur; quin & partes ipsæ uniri commodius possint per quietem. Cæterum in reliquis omnibus omninò vitandum. Quòd si Animi quoque Otium adjungatur, profectò malorum omnium origo fiet. Hinc idem Ovidius *de Remedio Amoris*, admonuit, illud esse omninò fugiendum, cum cecinit;

Otia si tollas, periire Cupidinis Arcus,

Da vacuæ menti, quo teneatur, opus.

Quæritur Ægisthus quare sit factus adulter;

In promptu causa est, desidiosus erat.

Atque ante ipsum Hippocrates scripsit lib. 2. *de Diæta*, Corpus, & Animum hebetare: nam, ut ex eodem 2. *Aphorism.* 51. omne nimium, periculosum est, & Naturæ inimicum. Perperam ergo voluere Alcibiades, & Erasistratus, (b) Quietem ad sanitatem tuendam plurimum conferre, referente Galeno 1. *de san. tuend.* cap. 8.; si præsertim isti de extrema Quiete, seu Otio, sermonem habuerint; quippe experimur Homines in carceribus detentos; Pifces

(a) lib. 1. *de Rer. Nat.*

(b) Fortè isti de Quiete, & Tranquillitate Animi intellexerunt: Nam Tranquillitas Animi hæc est vita Hominis. *Eccles.*

sces in piscinis clausus; & Aves in Aviariis coercitas, minus salubriter vivere: immò Aerem ipsum, & Aquam, in corruptionem abire, si diù immota maneant, & restagnent. Contrà verò carnes defatigatas, vividiores, salubrioresque evadere.

Rectè itaque docet Galenus 1. de san. ruend. cap. 3. duobus humanam vitam egere, *deperditi* scilicet *institauratione*, & *excrementorum resolutione*; quorum primum præstat Quies, secundum Exercitatio. Atqui non immeritò Aristoteles 1. Cæli, & 2. Meteororum, dixit, si Cælorum motus desineret, Mundum planè universum fore corruturum: Et Nos alibi latè monstravimus Vitam nostram, & cuiusvis Animalis in motu, atque exercitio operationum, consistere; quin & in Plantis ipsis, quæ videntur motu carere, nuperrimè M. Malpighius, succi nutritii circuitum perennem quoque detexit, qui si fortasse interrumpatur, statim intereunt.

De Recta Motus, & Quietis Administratione.

QUandoquidem ad vitam sustinendam modò Motus, modò Quies necessaria est, videndum hic proptereà, quibus, & quandò Motus, aut ex adverso Quies conveniat.

Et quidem primò de Operationibus Naturalibus dubitari ante omnia solet, num Ciborum confectioni, ac distributioni conferentior sit Motus, an Quies.

Pro utraque parte sunt, qui pugnent. Galenus enim *lib. de cibis boni, & mali succi cap. 2.* Quietem potius commendare videtur; unde 7. *meth. cap. 12.* docuit, lautiolem esse debere Cœnam Prandio; quia post cœnam somnus, & quies, post prandium ferè semper Motus sequitur: at verò melius, subdit, peragi co-

tionem quiete, & somno, quàm motu, & exercitio: & rationem assignat, quoniam calor, coctionis opifex, per motum dissolvitur, ac forinsecus distrahitur; colligitur verò, & ad interiora revocatur, quiete. Contrarium verò tuetur Joubertus *lib. 1. Paradoxor. cap. 7.* pluribus contendens, prodesse magis motum ad coctionem perficiendam, quia per motum calor acuitur, humores attenuantur, & cibus citiùs ad intestina delabatur; quamobrè fieri inquit, ut laboriosi homines pluries in die cibum sumere cogantur, quia citiùs, meliusque cibos digerunt, & conficiunt.

Verùm ad litem hanc conciliandam ipse putaverim, distinctione procedendum: Vel enim de coctione in Ventriculo sermo fit, quæ dissolutio est, & Chylosis dicitur; vel de chyli jam confecti repurgatione, atque ab inutilibus partibus secretionem, quæ in intestinis tenuibus peragitur, & distributione perficitur. Si de prima sermo fiat, certè conferet magis Quies; si de secunda, potius Motus. In prima enim succi Ventriculi dissolventes, digestivi dicti, per quietem minimè distrahuntur, aut evanescunt, quoniam hi, cum per arterias in Ventriculi glandulas extillant, & beneficio succi nervei volatilis foveantur, si fortasse per motum sanguis extenuetur, ac exolvatur, & volatilis illa substantia evanescat, aut languet, pauciores, inertioresque communicabuntur; quiete verò abundantiores confluent, à sanguine vegetiori suggesti. Accedit, quòd per motum, septum transversum in respiratione cum adjunctis musculis abdominis citatur, adeoque intempestivè nimis, cibum nondum benè in Ventriculo confectum, ad intestina protrudit. Contrà verò, si sermo sit de distributione, conferentior motus erit; nam hæc peragitur in Intestino tenui, per separationem inutilium partium ab utilibus,

Q

quæ

quæ deinde in venas lacteas inferi debent : modò plurimùm ad hoc conducit Motus, qui faciliorem reddit ejuscemodi intro-
missionem . Adde , quòd per motum viæ referantur , attenuantur humores , & dissolutio illa , quæ ex mistura succi pancreatici , & fellei in intestinis tenuibus fit , citiùs promovetur . Verùm hæc in Corporibus sanis intelligenda , & semota quacumque consuetudine ; nam in morboſis , fortasse aliter disponenda res foret ; sicut pariter in consuetis ab assumpto cibo statim exerceri : idque potissimum , si de exercitio propriè dicto , non verò de labore intelligatur : hic enim indifferenter omnia consumit , & utiles simul , ac inutiles partes extenuat , ac dissipat . (a)

Dubitari secundò potest , quibus Corporibus , Habitibus , atque Ætatibus , conducibilior sit exercitatio , vel quies .

Et dicendum , quòd loquendo de omnimoda quiete , seu Otio ; nulli certè aut Corpori , aut ætati proderit , nisi solum in quibusdam casibus , & ægritudinibus , de quibus suprà . Unde benè Galenus 5. de san. tuend. cap. 11. dixit : *nullus unquam ex omnimoda desidia benè se habuit* . Solum ergò difficultas erit de Motu , & Exercitatione majori , vel minori ; quibus scilicet magis conveniat exerceri , quibus minùs . Et quidem maximè omnium primi , Senes essent exercendi , quia cum finis exercitationis sit alimentorum distributio , & excrementorum resolutio , procul dubio senes potiùs , quàm juvenes , excrementis abundantes , & carnes , ac vias constipatas , porosque adstrictos habentes , motu , atque exercitatione indigerent . Verùm quia ad Motum exercendum virium robur exquiritur , & membrorum firmitudo , quæ Senili ætati deest , exercitatio nequit illis imperari . Quamobrem Galenus 5. de san.

tuenda cap. 3. Senibus , paulò robustioribus tantùm , modicum præcipit exercitium ad reficiendas vires ; more quo levissimæ flammula modica agitatione viviscit . Prætereà licet Juvenes , ob virium robur , maximum exercitium sufferre possint , non tamen omnibus indiscriminatim illud permittendum : laxos namque poros habentes , facilèque sudantes , macilenti , piccrocholi , destillationibus obnoxii , ne per exercitia magis extenuentur , & in tabem incidant , motu immodico abstinere debent . Hinc his Hippocrates *epidem. 6. sect. 4 t. 15.* quietem potiùs , & refrigerantem potum commendat , ut scilicet acris illorum Sanguis temperetur , & humores consistentiores fiant . Excluduntur pariter , qui ex hæreditaria contagione obnoxii creduntur Podagræ , Ulceribus , Erysipelati , aliisque similibus ægritudinibus , eo quòd per motum facilè humores attenuarentur , & ad debiles , affectasque partes , confluerent . Cæterùm obesis , succiplenis , phlegmaticis , serofa colluvie scatentibus , obstructis , conferentior motus erit ; quippe qui per sudorem tantam humorum copiam minuire potest . Pueri denique , utpote molles carnes , facilèque diffilabiles habentes , non sunt admodùm exercendi , ne immoderata exsolutione absumentur , & internam consumptionem subeant ; & sicut ex Hippocrate 1. *aphorismor.* in ediam isti ferre non possunt , ita nimia exercitatione nullatenus extenuentur . Attamen , qui humidiores observantur , & obstructionibus , aut cruditatibus obnoxii sunt , præcæteris exerceantur . Hinc quibus calculosa dispositio imminet in Vesica , motus commendatur , documento Hippocratis *lib. de Aere , Aquis , & locis* , ne scilicet crassi , tenacesque succi in vesicam decumbant ; sed potiùs per sudorem , vel per alios ductus Corporis , resolvantur .

(a) Confer. comm. nostrum super 1. lib. aphor.

Dubitari tertio potest, quo tempore magis conferat Exercitium. Et sane communi voto fatentur Medici, salubriora esse exercitia matutina; Unde Hippocrates 6. *epidem. sect. 4.* dixit *laborem, cibum præcedere debere, & 3. de diata* clarius expressit, à *Cæna deambulandum non esse, sed solum surgendum, aut standum; manè varò deambulationibus utendum.* Quod idem confirmat Galenus 5. *de san. tuend. cap. 11.* Equidem Cibus per nocturnum somnum digestus, melius matutino exercitio distribuitur, & excrementa tum alvi, tum reliquorum viscerum, promptius deponuntur, & evacuantur. Accedit, quòd Corpora ventre plena si exercerentur, facile obstructions incurrerent, intromissis nimirum chyli portionibus, nondum benè repurgatis, in vasa chyliifera. Verum in his, sicut in cæteris, plurimum valet Consuetudo, secundum quam unusquisque exercitii tempus, & modum, in seipso determinabit. (a)

Idipsum profectò dicendum de Exercitii qualitate, ac duratione. Plerique enim sunt, qui nisi diutius, & vehementius exercentur, non benè valent: Alii contrà, si parumpèr excedant, in morbos incidunt. Verum tamen semper conferet, intrà limites mediocritatis se continere; etenim Hippocrates, *Laborem, Cibum, Somnum, Venerem, mediocria esse debere*, scripsit: & Galenus, *cum primum lassari Corpus cæperit, quiescere oportere.* Respiciendum autem perpetuò ad vires est, & pro illarum ratione, vel plus, vel minus exercitia præscribenda erunt; ubi enim illæ tulerint, diutius, cum verò ferendo non sunt, parcius, leviusque exercendum.

(a) V. etiam Cels. l. 1. c. 2. 3.

De Somno, & Vigilia.

Quid Somnus, quid Vigilia sit, nec adhuc benè constat apud Aucthores. Aristoteles enim *libro de Somno, & Vigilia cap. 1.* Vinculum, illum appellat, *primi Sensiterii*, quod ex ejusdem mente, Cor, est. Et *cap. 4. ejusdem libri*, *Conventum esse Caloris*, ait, *ad intima.* Galenus verò, pluribus in locis, sed præsertim 2. *de symptomatum causis cap. ult.*, & 2. *aphorism. comm. 3.*, *Cerebri refrigerationem* definit: & *lib. 2. de symptom. causis*, *Animalium facultatum Quietem* nuncupat; unde visum est plerisque, *Temporaneam operum animalium feriatiorem*, illum ex eodem, describere. Sed & Homerus Somnum appellavit *Animarum quietem*, quemadmodum refert idem Aristoteles *cit. lib. de Somno, & Vigilia.* At verò Argenterius *lib. 1. de Somno, & Vigilia cap. 12.* maluit per privationem eundem definire, cum dixit, aliud non esse, nisi, *ipsum non sentire*, ad differentiam Vigiliæ, quam *ipsum sentire*, definivit. Sed longum nimis esset per singulas tum Veterum, tum Recentiorum sententias diuagari; quamobrem satis Nobis erit, id cunctis acceptum profiteri, Somnum esse, *Statum illum Corporis Viventis, in quo sensus omnes sopiti, ac quodammodò ligati, manent.* Vigiliam verò ex adverso, *cum illi soluti, atque in exercitio sunt positi.* Unde autem id accadat, latè in nostra Theoretice sumus prosequuti, cum ex variis, diversisque causis fieri possit, ut illi soporentur, aut contra dissolvantur, quas hic proinde consultò omittimus, eo quòd potius ad Physiologiam pertineant. Non est tamen prætereundum, quòd à causarum varietate, atque ab affectione diversa Cerebro illata, evenit, ut Somnus

modò Naturalis, modò Morbosus evadat; ille quidem temporaneus, & conferens; hìc verò multum protractus, & nocens; unde postmodum multæ emergunt differentiæ, ut alius somnus sit longus, alius brevis, alius profundus, alius levis; itemque vel continuatus, vel interruptus, turbulentus, vel tranquillus, cum somniis, vel absque, & sic de cæteris. Verùm quæ magis ad partem Medicinæ practicam facere videntur, hìc examinemus.

Quænam sint commoda, atque incommoda Somni, & Vigiliæ.

QUAMVIS Somnus, & Vigilia, sibi vicissim succedentia, ad vitæ sustentationem perutilia sint, immò etiam necessaria; si tamen immoderata fuerint, & importuna, omninò nocent. Quare Hippocrates 2. aphor. 3. inquit: *Somnus, & Vigilia, utraque modum excedentia, malum.* Et textu 4. subdit: *Nec satietas, nec fames, nec quidquam eorum, quæ Naturæ modum excefferint, bonum.* Itaque moderata esse debent: hac enim dumtaxat ratione summopere conferunt; Et quidem moderatus somnus animum recreat, & viscera humectat defatigata, ac lassâ restaurat, spiritus reficit, coctionem adjuvat, fluxiones prohibet, dolores sedat, acres humores temperat, tenues, ac mobiles compescit. Vigilia verò moderata, vitalem calorem acuit, sanguinem crassum attenuat, excrementa promovet, alimenti distributionem, & fuliginum perspirationem faciliorem reddit. Contrà verò Somnus si fuerit immoderatus, præter Corporis, & Animi segnitiam, excrementorum evacuationem retardat, caput vaporibus opplet, sanguinis circuitum remoratur, sen-

sus omnes, præsertim internos hebetat, & ea omnia mala parit, quæ Otium. Sed & immoderata Vigilia, spiritus, & sanguinem extenuat, vires dissipat, & totius Corporis languorem inducit, unde etiam mala graviora, febres, Animi defectiones, virium languores, & similia, exoriri possunt.

Quo tempore Somnus sit congruentior.

SECLUSA quacumque consuetudine, conaturalius, atque opportunius dormiendi tempus est nocturnum: suo enim silentio Nox blandè admodum somnum allicit, & conciliat, atque ob Solis absentiam, cum minus sensus ab externo lumine distrahantur, faciliùs planè consopiantur: quamobrè summa ratione ejuscemodi tempus videtur à Natura comparatum, pro animalium quiete, ut per diem defatigata, ac labefactata ob vigiliam, & exercitia, nocturno somno, reficerentur. Dictum est, seclusa quacumque consuetudine; nam si fortasse aliis temporibus usus dormiendi sit inductus, procul dubio consueto tempore dormiendum; documento etiam Hippocratis 2. pronost. 11. unde qui noctes insomnes ducunt, lucubrationibus, aliisque operibus addicti, & vel matutino, vel meridiano tempore consuetudinem dormiendi nacti sunt, consuetum tempus servare poterunt: Consuetudo etenim altera Natura dicitur. Vitandus autem erit somnus meridianus ab iis, qui Capitis affectionibus sunt obnoxii, nam per somnum meridianum Cerebrum graviter afficitur, & vaporibus oppletur, eoque magis si inconsuetus ille sit, uti rectè etiam monet Avicenna 3. p. doctr. 2. cap. 9. Atque hinc Schola Salernitana cecinit.

*Sit brevis, aut nullus tibi somnus
meridianus:*

*Febris, pigrities, Capitis dolor, at-
que Catarrhus;*

*Hæc tibi proveniunt ex somno meri-
diano.*

Solet etiam somnus vespertinus Cere-
brum gravare, ut & quicumq; alius inde-
bitus, & insuetus, veluti inductus ab aliis,
quàm à vaporibus cibi assumpti. Exci-
piuntur autem somni lassitudinem, & de-
fatigationem insequentes; hi quippe las-
situdinem auferendo, & consumptas vires
instaurando, quocumque tempore pro-
sunt.

Sed quot horas dormire liceat, adhuc
dubitari solet. Et quamvis plerique sint,
qui velint sex, aut septem horarum spa-
tium fatis esse somno indulgere; nihil-
ominus in hoc, sicut in reliquis, cer-
ta meta præscribi nequit; cum non ea-
dem sit singulorum hominum Natura,
& Constitutio: etenim nonnulli longiori,
alii breviori somno opus habent, pro
varia Corporum habitudine, usu, exer-
citiis, cibis, & potibus assumptis, aliis-
que. Respiciendum quoque est ad Anni
tempora, ætates, & Hominum status:
nam longiores Hyeme, & Vere exigun-
tur; Æstate, & Autumno breviores. Pue-
ri diuturniori somno egent, breviori
Senes. Exercitatum, & laboriosam vi-
tam ducentes, longiorem; breviorē,
otiosi expostulant. Idipsum de Obesis,
& Gracilibus dicendum est; siquidem
diutius hi, parcius illi dormire debent.

*Quinam sit melior, ac salubrior
dormiendi modus.*

PUtat Avicenna lib. 1. fen. 3. doct. 2.
cap. 9., inter initia somni prodesse,
in dextrum latus decumbere, quia ex ta-
li decubitu Ventriculus ab Hepate ma-

gis fovetur, & in chylicatione adju-
vatur, quæ ope caloris ab eodem pera-
gi creditur; quin & ex hoc decubitu Cor-
minus affici, & molestari existimatur.
At utrumque non tanti est, ut dormi-
re in sinistrum latus aliis salutare non
sit: etenim chylicatio perfectius absol-
vi poterit in fundo Ventriculi carnosio-
ri, atque in sinistrum latus inclinante,
ubi à superincumbente Jecore, (si for-
tasse confectioni ciborum conferat,)
magis illa promovebitur. Neque exin-
de timendum de Corde, quod suis in-
terseptum involucris, atque interjecto
Diaphragmate, minimè turbari, aut affi-
ci potest, cibo intra ventriculum conclu-
so; dummodò tamen moderatus ille sit;
nam si immoderatus, à quocumque de-
cubitu is oberit. Accedit, quòd Decu-
bitus, primo somno, ad dextrum latus,
nocet Pyloro, qui Rector chylicatio-
nis dicitur Helmontio; & in sinistrum
factus, quia à confluentiori succo, seu
fermento Ventriculi digestivo citius illa
promovetur, non leviter proderit. Qua-
re non magis in unam, quàm in alteram
partem decumbere posse rationi consen-
taneum videtur. Verùm tamen in hoc
consuetudini quoque standum esse, me-
lius semper existimaverim: ut quemad-
modum unusquisque decumbere consue-
vit, somnum capiat; dummodo ægritudo
aliqua nil obstat, per quam necesse sit
commodiorem situm sibi deligere. Sic Hy-
pochondriaci, splenetici, palpitationi
cordis obnoxii, alique non faciliè suffe-
runt lateris sinistri decubitum, alii ex ad-
verso pro ratione: ut in Pleuriticis,
Empyicis, Hepaticis experimur. Porro
in sanis valdè conferet, situm interjectis
vicibus mutare, ut primo somno decum-
bentes in dextrum, experrecti volvan-
tur in sinistrum, & vice versa: hac enim
ratione cibus in ventriculo melius con-
ficitur, & portiones ejusdem dissolutæ

facilius per pylorum deducuntur in intestina. Vitandus autem omninò decubitus supinus, veluti infensus Respirationi, & nocuus Diaphragmati, unde insomnia mala, Cordis oppressiones, Incubi, & suffocationis pericula. Proni etiam decubitus mali sunt à superincumbente spina, totoque Corpore, supra Thoracem, non sine vitæ periculo. Permittuntur autem in stomacho debilibus, in doloribus Ventris, & Intestinorum, exigente non rarò, id ipsum Natura, qua plerumque patientes ipsi in primum decumbere compelluntur, ut levamen aliquod nanciscantur.

De ægrotantium decubitu.

Accuratissimus Hippocrates, sicut ex omnibus accidentibus, quæ ægrotantibus eveniunt, indicia, vel bona, vel mala exactissimè deduxit, & posteris mandavit; ita ex eorundem decubitu plurima recollegit, planè ad praxim Medicam summoperè conferentia; unde solers Medicus conjicere possit salutarem, vel exitiosum eorundem eventum. Is equidem I. *pronostic.* hæc de decubitu ægrotantium protulit. Conveniens, & salutaris Decubitus in ægris, talis esse debet, qualis in statu sano consuevit, scilicet ut cubet ægrotus vel in dextrum, vel in sinistrum latus, cervicæ, manibus, & cruribus parùm inflexis. Mali enim sunt decubitus supini, manibus, cruribusque diductis, atque extensis: Pejores, si proclivis ille jaceat, aut è lecto delabatur in pedes; qui si præterea nudi inveniantur, & pannis minimè contecti, nec calentes, sed potiùs tepentes, aut frigefacti, vel etiam ad lividum colorem vergentes, adhuc graviores, pravæque ægritudinis indicia erunt, atque eo magis, si manus simul una con-

sentiant, & cervix inæqualiter dispersa, ac distracta collabascatur. Tales enim decubitus internam viscerum agitationem designant, adeoque inflammationem, vel præsentem, vel imminentem. Non rarò etiam delirium prænunciant, & hærentis alicubi Sanguinis notæ sunt, extremamque virium labefactionem, à vitiata ejusdem diathesi, significant. Lethale etiam signum esse solet, hianti ore ægrum dormire: maximam enim in organis respirationis læsionem portendit, sicut pariter gravem Cerebri, & Nervorum affectionem, si incommissis palpebris dormiat, & labia inæqualitèr dimoveat. Cubare insuper in Ventrem, reductis cruribus, dolorem viscerum naturalium significat, modò decubitus hic consuetus non fuerit tempore salutis. Velle præterea in acuto morbo ægrotantem assiduò residere, malum est; & longè pejus in affectibus Pectoris, ac Pulmonis: quod sæpissimè observamus in Peripneumoniis. Denique jactare crura, velle è lecto surgere, integumenta remove, se nudare, fascias solvere, festucas colligere, flocos evellere, aliudve simile insolitum, & inconveniens peragere, internæ inflammationis, & delirii argumenta sunt.

Quibus in morbis somnus, & in quibus vigilia conveniat.

Nulli dubium quòd in omnibus soporiferis affectibus, Lethargo, Caro, Comate, Apoplexia, Somnus oblit, adeoque illum permittere calamitosum: quin potiùs omnino incumbendum, adhuc medicamentis dolorem inferentibus, vigiliam excitare. Contrà verò in Delirio, Pervigilio, aliisque similibus, omni industria Somnus est conciliandus. Similiter in internis Inflammationibus somnus prohibeatur ex Hippocrate 6.

epidem sect. 5., Sicut etiam in febribus sudorosis, quas Græci Helodes, & Typhodes appellant, vitandus est; itemque inter initia omnium accessionum febrilium. Contrà: verò commendabilis in ægitudinibus ex cruditate progentis, pariterque ex fluxionibus, catarrhis, cæterisque cum dolore, & destillatione conjunctis, vel in quibus sudor exoptatur, aut virium resectio.

Verùm in Paroxyfmis febrium subdubitare contingit, quo tempore minus periculosum sit, dormire. Et sanè ingruente accessione dormiendum penitus non est, pari ratione, ac de usu Cibi scripsit Hippocrates *i. aphorism. ii.* ne Natura à Causa morbifica magis opprimatur. Sed neque in augmento ejusdem, ne febris protrahatur, aut deterior fiat, motu Cordis per somnum tardiori reddito, qui tunc amplior fieri debet. Vitandus quoque est in Statu, in quo multoties criticæ evacuationes evenire solent, ne fortassis impedian- tur, aut retardentur. Excipitur autem Sudor, qui à somno facilius promovetur: Hinc Medici communiter in Praxi universam præcipiunt accessionem absque somno esse transigendam, immò etiam si fieri possit, transacta declinatione, dummodò tamen febris de genere intermittentium sit, & intervallum aliquod inter unam, & alteram accessionem admittat; sin secus, tutior somnus erit in ipsa declinatione, antequàm novus ingruat paroxysmus. Cæterùm in aliis febribus procedendum, quo pacto superius, de cibi exhibitione, dictum est.

An liceat, post assumptum pharmacum catharticum dormire.

Vulgò hætenùs putatum, nullimodè dormiendum esse post assumptum catharticum, ne per somnum impediat evacuationis, quæ ab assumpto Pharmacum exquiratur; quippe somnus evacuationes omnes vel detinet, vel retardat, excepto sudore. Addunt Hippocratis auctoritatem, qui *4. aphorism. t. 14. & 15.* consulit, post assumptum helleborum ad motiones magis ducendum esse Corpus, si major evacuatio exoptetur: somnum verò esse conciliandum, quotiescumque sistere convenit. Verùm distinguenda sunt tempora pro hujus Quæsti resolutione. Vel enim Sermo est, de tempore immediatè post assumptum pharmacum, & planè non solum licebit, sed summo- pere conferet dormire, potissimum si medicamentum fuerit assumptum sub forma pilulari: tunc enim per somnum melius illud in Ventriculo dissolvetur, seu, ut ipsi dicunt, actuabitur, pro citiori, & efficaciori Ventris solutione. Postquam verò fuerit dissolutum, & actuat- um, à somno erit penitus abstinendum, ne evacuatio impediatur. In praxi siquidem experimur, ab assumptis catapo- tiis, seu pilulis, posse etiam ad horas somnum protrahi, ut solida illarum forma diluatur, & in intestina vis cathartica earundem delabatur, ubi nimirum Evacuatio ex confluxu succorum fellei, & pancreatici, promovetur. In aliis verò Medicinis potabilibus ad horam circiter dumtaxat somnum permittere licebit, ob faciliorem eorundem dissolutionem; dummodò desit periculum gravaminis capitis, aut vomendi metus. Quòd si purgans Medicamentum ejus sit generis,

quod simul cum cibo exhiberi solet, tunc longè magis permittendus somnus erit: qua ratione compertum pluriès est, ple-rosque commodè medicinas solutivas retinuisse, quas cæteroqui paulo post evomere consueverant. Atqui in hoc peculiaris cujusque habitudo attendenda semper est, sicut & consuetudo, ac usus uniuscujusque Corporis.

Sed an hæc eadem militare possint in Medicamentis Vomitoriis? Equidem in his dispar est ratio: Nam Cathartica Dejectoria vires suas non exferunt, nisi postquam intestina gracilia subierint, & ex mixtura cum succis pancreatico, & felleo, molestam, irritantemque motionem intestinis attulerint, qua quicquid in se continent, quæque in adjunctis partibus subsistunt, motu peristaltico propellunt. At verò Vomitoria per Ventriculi solummodo subversionem, ac nauseam, operantur, quo fit, ut vix post semihoram, vel horam integram, vomitum cieant: quapropter Somnus in tam brevi spatio permitti non potest; quin imò si accideret, noceret, impedita vomitione, indeque excitata Cardialgia, vel Syncope: quamquam à conditione varia ejusdem, vel vehementioris, vel levioris, gravius, vel mitius damnum esset adfuturum. De reliquo, in aliis Medicamentorum generibus, sive illa per sudorem ducant, sive per vias urinæ, somnus conferet; neque enim promptius, faciliusque sudor prodit, quam in dormientibus. Sputum denique, & Anacatharsis vigiliam exposcit; unde soporifera, & opiata, in excreationibus cumtussi potissimum, nocua sunt, nisi solum, ut acres, falsasque destillationes temperent, vel ut materiam extusliendam reddant concoctiorem; attamen hæc cum moderamine. Et de Somno, & Vigilia satis.

De Repletionē, & Inanitione.

Nomine Inanitionis, & Repletionis, non hic omnis Evacuatio, ac Repletio intelligenda est, sed ea dumtaxat, quæ in statu sano præsertim fit, Excrementorum nimirum, aut Alimentorum, qua prorsus egemus; & eorum quidem, ut exoneremur, ne ab iisdem cumulatis opprimamur; istorum verò, vel ut vacuati repleamur, vel ut viribus destituti, reficiamur. Cum enim Repletio, & Inanitio inter causas Nonnaturales communiter ex Galeno referantur, & istæ indifferentes sint ad juvandum, & ad nocendum; simulque necessariae ad vitæ conservationem; profectò nomine Repletionis, Alimentorum illa intelligenda erit; & nomine Inanitionis, hæc, Excrementorum. Quæ verò in statu morbofo egerenda sunt, quamvis ad evacuationis genus referantur, quia tamen non semper accidunt, neque illis perpetuò indigemus; proinde haudquaquam ad causas Nonnaturales, sed ad Præternaturales, & Curativas revocantur.

Itaque de his solum Inanitionibus, & Repletionibus sermo hic agendus foret, quæ vitæ humanæ conservationem necessariò comitantur, vel consequuntur, ut illa incolumis, quoad fieri possit, perseveret: qua ratione erunt simul causæ omninò necessariae, & indifferentes ad juvandum, & ad nocendum: nam sicut moderata, & opportuna repletionē, refici-mur, ac sustinemur; ita immoderata, & importuna gravamur, atque opprimimur, & non rarò etiam graviter ægrotamus. Quod idem ex adverso evenit ab Inanitione, etenim si egerantur, quæ convenienter egeri debent, uti sunt excrementa, passim cumulari solita, & ex diversis coctionibus, ac secretionibus emergentia, pro-

sunt;

sunt; si verò detineantur, obstant. Hæc autem non solum ex alvo, & ex viis urinæ; verum etiam ex sputo, mucos narium, sordibus aurium, sudore, transpiratione, aliisque deducenda sunt.

Verum quamvis hæc Inanitio, ut dictum, intelligenda dumtaxat sit Excrementorum, naturaliter contingentium, Evacuatio, quia nihilominus apud Medicos comprehendere quoque solet omnem, & quamcumque ab humano Corpore egestionem; propterea generaliter sumpta, describi solet, quod sit, aut *Alimentorum*, aut *Excrementorum*, aut etiam *partium solidarum*, extra Corpus educio. Et quidem, ut Inanitio propriè habeatur, necesse est, ut id, quod evacuatur, expellatur extra Corpus; nam si non extra Corpus expelleretur, sed ab uno solum viscere in aliud transmitteretur, evacuari dici non posset: cujusmodi sunt Decubitus, & Abscessus humorum in articulos, vel in glandulas. Sed & insuper corpulentum esse debet, & humorale, quod ejicitur; unde mutationes in situ, alterationes, correctionesque, aliæque hujus generis motiones, minimè dicuntur evacuationes, cum reverà nil educatur, sed solum corrigitur, mutatur, accommodatur, vel emendatur. Præterea evacuantur non rarò Alimenta, putà cum per vomitum cibi, & potus, vel corrupti, vel crudi, vel immutati ejiciuntur; aut etiam cum in Lienteria, aut Cœliaca affectione alimenta egeruntur eo ferè modo, quo fuerunt ingesta. Amplius, sæpè etiam evacuantur excrementa, vel spontè Naturæ, vel ab assumpto pharmaco, ut cum faeces subducuntur, vel putres, corruptique humores evacuantur. Denique non rarò partes ipsæ solidæ Corporis excernuntur, quemadmodum contingit in ulceribus Pulmonum, Renum, Vesicæ, Intestinorum; itemque cum in ossium fracturis Squamæ, aut cum in vulneribus, & ulceribus, ex-

crescentes carnes, aut fungosæ, vel etiam putrefactæ, atque ab aliis sejunctæ extrahuntur.

Attribuuntur Inanitioni complures differentiæ, quæ desumuntur à principio Inaniente, & Evacuante, à Modo Evacuationis, ab Eventu, à Virtute Evacuantium, & à Loco. Hinc vel Evacuatio à Natura inchoatur, & ab eadem perficitur, & dicitur Naturalis; vel ope medicamentorum promovetur, & dicitur Artificialis. Et quamvis universæ evacuationes à Natura sint, & ope ejusdem absolvantur; nihilominus, quas sola Natura inchoat, & perficit, Naturales propriè dicuntur; Artificiales verò, quæ auxilio medicamentorum; & Medici ministerio, provocantur.

Ab Evacuationis Modo, vel Sensibilis, vel Insensibilis appellatur. Sensibilis, in qua quod excernitur sensibus patet, ut Sudor, Vomitus, Sputum. Insensibilis, in qua quod excernitur sensum nostrum effugit, ut in Resolutione Tumorum, perspiratione Cutis, aliisque crisis, per quas Morbi, & causæ morbificæ desinunt, absque ulla manifesta evacuatione.

Ab eventu, alia completa est, alia incompleta. Completa, cum totus humor morbum faciens educitur; quod ex confentia, & tolerantia, dijudicandum monuit Hippocrates 1. *aphorism.* 2. Incompleta, cum non totus: id quod conicere solemus ex perseverantia Morbi, & symptomatum adjunctorum, aut ex Recidivis. Ad hanc classem imperfectarum Evacuationum reducuntur Translationes, Depositiones, & Decubitus humorum; siquidem per ejusmodi translationes, non rarò solet morbus præcedens mitescere, sed deinde vel regredi, vel in alium commutari. Sed & in his notare decet, num à parte nobili ad ignobilem, vel vice versa Decubitus fiat: primi generis propriè dicitur Abscessus, & Decubitus: secundi

gene-

generis dicitur Raptus, & Irruptio. Hinc apud Græcos *Apostasis*, *Metastasis*, *Diadoche*. Si autem translati humores in partibus ignobilibus confederint, & persistent, salutare: ad partes nobiles verò delati, lethale. Quare, ut abscessus salutares sint, non solum universum peccantem humorem transpositum necesse est, ut referant; verum etiam à parte nobili remotissimum, atque in partibus ignobilibus, & capacibus, persistentem, itemque coctioni, suppurationique obtemperantem; ut in Parotidibus, Bubonibus, Abscessibus sub axillis, cæterisque similibus, est experiri.

Ab Evacuantiis insuper Virtutem, alia Inanitionem dicitur *Eradicativa*, alia *Minorativa*: per illam peccantes humores omnino eliminari solent; per hanc solummodo diminui. Ad hanc ultimam reducuntur Evacuationes illæ, inter initia morborum habitæ, quas Medici Symptomaticas appellant, bonas quidem in ratione Causæ, quæ diminuitur, malas verò in ratione Signi, quoniam significant multitudinem, aut pravitatem peccantium humorum. Inmediæ etiam diuturnæ aliquo modo inanire dicuntur, ob novi alimenti defectum, & insensibilem præcedentis subtractionem.

Postremò à Loco, alia Evacuatio dicitur Universalis, alia Particularis. Universalis, quæ totum Corpus indifferenter evacuat. Particularis, quæ determinatas tantum partes. Inter universales recensentur ex Galeno 2. *aphorism. comm. 17*. Sanguinis missio, & Purgatio, & alibi, etiam Sudor. Ad Particulares revocantur Anacatharsis ex pectore, Vomitus ex ventriculo. Sputum ex faucibus, &c.

Quod secundò pertinet ad Repletionem, illa opposito modo describitur, quòd sit, *Immissio alimentorum, vel excrementorum intra Corpus, præter Naturæ institutum*; vel ut placuit Galeno *lib. de plenitudine cap. 11*. *Copia humorum in universo Ani-*

malis corpore: ubi sub nomine humorum, comprehenduntur tum alibiles, & utiles, tum excrementosi, & inutiles. At verò, ut hi plenitudinem faciant, præter Naturæ institutum intra corpus colligi debent: nam conveniens alimentorum assumptio intra ventriculum, debita quantitas sanguinis intra Venas, & Arterias, idque genus alia, plenitudinem non efficiunt. Itaque extrà modum, & ultrà Naturæ exigentiam immissa, aut cumolata, veram tantummodo Repletionem constituunt. Sed & Alimentorum, vel Excrementorum, aut Humorum excedens quantitas Repletionem reverà facit: nam si fortasse flatus, spiritus, vapores, aliudve non corpulentum, in vasis Corporis increbrescerent, et si amplificare, & inflare possent, plenitudinem tamen, ac repletionem neutiquam inferrent.

Suas quoque Repletio differentias habet. Et quidem ratione materiei, alia dicitur humoralis, alia excrementosa: alia vera, quæ omnium: alia spuria, quæ unius tantum humoris: alia universalis, quæ in toto Corpore, alia particularis, quæ in una tantum parte: alia, quæ ad vasa dicitur, alia, quæ ad vires; quoniam ex Galeno *cit. lib. de Plenitudine cap. 3. & aphorism. 2. comm. 17*. Repletio est quid Relativum, respiciens vel vasa, quæ humores continent, si fortasse plus justo repleantur; vel vires, quæ ipsorum copiam sustinere debent, si fortassis à plenitudine opprimantur, vel graventur: quamquam nil penitus inter se invicem utramque hanc plenitudinem differre putet Ludovicus Mercatus *lib. 2. de Recto Præsidiis usu, cap. 4.*, quod etiam bonâ fide testatur Vvalæus in *sua Meth. Medend.* & nunquam se observasse unam sine altera fateatur; sed & ipse vix alterutram hætenus reperiisse affirmare ausim.

Traditur tamen Plenitudinis quoad vires indicium: Impotentia regendi Corporis

ris pondus, absque ulla causa manifesta, & cum nil penitus præcesserit, quod Corpus delassare potuerit; quemadmodum deducitur ex Hippocrate 2. aphor. 5., ubi spontaneas lassitudines morbos prænunciare scripsit; unde Galenus lib. de curandi ratione per sanguinis missionem cap. 4. cum quis, ait, solita munera exercere nequit absque eo, quod erratum aliquod commiserit, plenitudinem quoad vires, ex pravis humoribus, atque excrementis, Naturam opprimentibus, adesse significatur. Hæc insuper Repletio, secundum triplicem Corporis virtutem, Naturalem, Vitalem, & Animalem, triplex quoque dicitur, ex doctrina ejusdem Galeni cit. lib. de Plenitudine, & 9. meth. cap. 10. Interdum enim virtus Animalis gravatur, ut ex sensu ponderis, & pigritiæ in motu, atque operationibus Corporis. Aliquando virtus vitalis opprimitur, ut ex Pulsuum inæqualitate, & arteriarum compressione. Denique sola virtus naturalis gravatur, ut ex tarda excrementorum egestionem, & naturalium operationum ad coctionem, & nutritionem pertinentium, tarditate.

Postremò Repletio, quod ad Vasa, vel Plethorica, vel Cacochema dicitur. Plethorica, in qua boni, & laudabiles humores superabundant, quemadmodum de Athleticis meminit Hippocrates. Cacochema verò, cum humores pravi exuperant: qui si omninò inemendabiles sint, non solum cacochemiam, sed cacoethiam efficiunt. Internoscuntur autem cacochema, & cacoethica Plenitudo ex malo Corporis habitu, cutis colore fædato, mala partium nutritione, pruritu, carbunculis, doloribus, tumoribus, aliisque in unam, vel aliam Corporis partem erumpentibus; quin & pro varia eorumdem conditione, solent Medici cacochemiam pituitosam, biliolam, vel melancholicam accusare: at non ex eo, quod reverà humores isti præcesserint in statu

sano Corporis, sed quod ob malam viscerum habitudinem, & fermentorum vitium, præternaturaliter emerferint; unde & hi, & multigeni alii, crassi, viscosi, acidi, salsi, acres, austeri, acerbi, serosi, tartarei, flavi, virides, nigri, similesque ex variis, vitiatisque fermentationibus, ac misturis, inter sese habitis, exoriuntur, præsertim à chylo, sero sanguinis, lympa, succo felleo, & pancreatico, depravatis.

Quoniam verò ex malo horum humorum apparatu, atque ex plenitudine cacochema, lassitudines contingunt: unde Segnities, Defatigatio, Ineptitudo, Torpor, & Impotentia in operationibus vitæ; propterea opportunum judicavi hic aliqua de Lassitudinibus memorare. Quare sit.

De Lassitudinibus.

QUoties Corpus pravis humoribus repletur, vel in omnibus, vel in aliquibus functionibus vitæ tuitioni necessariis deficit, potissimum verò in iis, quæ ad Sensus, & Motus animales spectant; unde lassitudo, & quædam defatigatio totius sequitur, ex qua conjiciunt Medici imminentem, ac futuram aliquam ægritudinem subesse; propterea videndum hoc loco, quid nomine Lassitudinis sit intelligendum.

Et quidem Lassitudo describi solet, Impotentia regendi Corporis pondus, ut deducitur ex Galeno 2. aphorism. comm. 5. & 3. epidem. comm. 2. Ab ejusmodi enim impotentia iudicium sumitur præternaturalis, & morbosæ corporis constitutionis, quoniam facillimè percipitur, & cuicumque obviam fit. Quis namque non conjectabit malè seipsum habere, cum in motibus peragendis, & in sustinendo corporis pondere, impotentem se agnoverit? etiam si

iamsi nullum aliud indicium pateat ex pulsu, respiratione, nutritione, & similibus. Quamobrēm rectē Hippocrates ex hoc solo indicio 2. *aphor. t. 5.* futuras, & imminentes ægitudines prænuñciavit. Hinc sequitur, Lassitudinem ad symptomata esse referendam, cū sit tristis, & molestus quidam sensus Corporis in ejusdem motu locali. Cūque quodlibet symptoma morbum, & causam morbi subsequatur, propterea præcedere oportebit vitium aliquod in membris sensui, & motui destinatis: Hæc autem affectio ad classem dolorum reducetur; nam lassitudo non sine aliquo dolore fit; unde pro causa recognoscet prævos humores per sensitivas partes diffusos, vellicantes, ac pungentes, aut saltem distendentes, vel gravantes.

At verò, quoniam molestus ejuscemodi sensus triplex esse solet, proinde Lassitudo triplex quoque est, documento etiam Galeni *cit. 2. aphor. comm. 5.*; (a) nam vel sequitur sensum tensionis, & dicitur Lassitudo Tensiva: vel fit cum sensu inflammationis, caloris, & ardoris, & dicitur Phlegmonosa, seu Inflammatoria; vel denique fit cum sensu ulceris, & dicitur Ulcerosa. In Tensiva, Corpus tensum percipitur, adeòut difficulter flecti possit: & fieri solet vel à copiosis humoribus musculos, & vasa distendentibus; vel à flatibus cavitates partium plus justo inflantibus. In Lassitudine Phlegmonosa, inflammationis sensum inferente, persentitur quidam sensus ardoris, & æstuationis, inductæ potissimum à sanguine acriori, & inflammabili, seu fermentescibili. In Ulcerosa denique percipitur molestia quædam lacerans, & disspescens partes motui addictas, ob humorum acritatem, falsedinem, aciditatem, similemve. Ex his autem veluti

simplicibus Lassitudinis differentiis, exurgunt aliæ compositæ, passim ab Authoribus memoratæ, putà Lassitudinis Tensivæ Ulcerosæ, Ulcerosæ Phlegmonosæ; Phlegmonosæ Tensivæ, & Tensivæ ulcerosæ phlegmonosæ; prout molesti sensus vel aliquarum, vel omnium prænarratarum differentiarum participes sunt; quamobrēm pro varietate earundem, non solum indicabuntur præjacentes vitiosi humores, verum etiam futuræ ex his ægitudines prædicentur.

Sed qua ratione Hippocrates dixerit *cit. 2. aphorism. 5.* Lassitudines morbos prænuñciare, cū tamen mox dictum sit, illas morbos, & causas morborum sequi, nempe vitiosos humores. Verum Lassitudines, & aliquos morbos, & causas morborum leviores consequuntur; & alios graviores portendunt. Sequuntur quidem depravatam actionem sensus Tactus, putà dolorem, ex pravis humoribus inductum; portendunt verò alios graviores, nempe inflammationes, febres, similesque, cū scilicet pravi illi humores in fermentationem indebitam adacti, intimiores corporis partes subierint, & principaliora viscera infestaverint.

Non est autem hic prætereundum, quòd memoratæ Lassitudines spontaneæ esse debent: nam si fortasse causam aliquam manifestam consequantur, putà defatigationem ex labore, aut exercitio immoderato, facile per quietem desinunt, ut dicitur etiam 2. *aphorism. 48.* Plurimum autem interest inter Lassitudinem, seu Defatigationem à causa interna illatam, & à causa externa proveniente: siquidem hæc sola quiete superatur; illa verò non nisi edomita, vel educta causa interna humoralis, à qua originem desumit.

Sed adhuc dubitare contingit, quomodo Lassitudo, species quædam doloris sit, cū tamen dolor continui solutionem consequatur. Et dicendum solvi quodammodo

(a). V. etiam Gal. 1. 3. de san. tuend.

dò continuum in lassitudinibus, ab ipsis humoribus distendentibus, vellicantibus, aut inflantibus partes. Siquidem continui solutio in dolore requisita non semper facta esse debet, sed sufficit, si fiat, si non sensibilibiter, & conspicuè, saltè insensibilibiter, & inconspicuè. Et quamvis Galenus etiam intemperiem causam doloris fecerit, illa tamen subita, ac violenta esse debet, quæ propterea, acritati humoris juncta sit oportet; neque ex nuda tantum qualitate proveniens, adeoque absque humoris vellicantis, mordentis, aut prementis, presentia, haberi nequit: quare continuitatis solutionem, saltè inconspicuam, necessario comprehendet.

Ex his denique deducitur diversimodè occurrendum esse spontaneis Lassitudinibus, prout variæ illæ fuerint, & diversam humorum conditionem indigitaverint. Siquidem Phlegmonosæ, & cum sensu inflammationis, & ardoris junctæ, recta victus ratio temperans opitulabitur, adhibitis quoque medicamentis ardorem, & acritatem corrigentibus. In Tensiva præter congruam victus rationem, expostulantur flatus discutientia, & acorem in humoribus emendantia. In Ulcerosa denique convenient, quæ falsos, acresque humores, muriaticam conditionem adeptos, corrigere possunt, aut etiam extrà Corpus educere. Cæterum in omnibus semper proderunt, quæcumque vim habent sanguinem à suis superfluitatibus emundare, illasque per diaphoresim, aut per diuresim sensim, sensimque promoverè.

De rectè instituenda Inanitione, & Repletionē.

Generale documentum hac in re præ oculis semper habendum, ut qui humores humano Corpori, vel conservando, vel alendo, conferre posse videntur, sint

omnino detinendi, nullaque ratione vacuandi; Contrà verò, quicumque inutilēs, excrementosi, malèque affecti fuerint, omni prorsus industria sint abigendi: id quod potissimum in quotidianis excrementis servandum est, ut sunt fæces, lotia, cutaneæ evaporationes, sputa, aliaque è corpore expurgari solita, pro varia tamen corporum constitutione, & habitudine.

Sed ut singula singulis referamus. Humidiora, succiplena, pituitosis excrementis latentia, destillationibus, ac fluxionibus obnoxia corpora, omni jure, & per vias urinæ, & per sputa, & per narium emunctionem, & per transpirationem, & per sudorem, & per victus rationem attenuantem, in meliorem statum sunt reducenda. Contrà verò, quæ gracilia sunt, acribus humoribus abundantia, & calorificis ægitudinibus obnoxia, in humectantem victum inclinent, & potius per alvi subductionem, leniter tamen, repurgentur. Idem dicendum de Corporibus exercitatis, aut ex adverso otiosis. Pueri prætereà, præsertim voraces, ob multa excrementa, quæ congerunt, inanitione, tum per vias urinæ, tum per intestina, conservandi. Adolescentes verò, & Juvenes, pro ratione varia habituum, & exercitiorum, diversimodè tractandi erunt. Viri denique, & Senes, quia temperatiores in victu esse solent, nulla manifesta evacuatione, per medicamenta molestandi sunt; nisi tamen videantur in unam, aut alteram ægitudinem inclinare. Plerumque autem conducibilior illis esse solet, quæ per sputum, atque anacatharsim, vel etiam per vias urinæ, evacuatio fit. Cæterum in ægitudinibus, Inanitiones quoque variæ esse debent, pro causarum, & partium affectarum varietate, de quibus in Praxi. Speciatim autem in Fœminis, Menstruorum conveniens purgatio promovenda semper est: sicut enim ab illis commodè fluentibus,

bus, benè plerumque se habere solent; ità ex adverso, in diversas, gravesque ægitudines incidunt, cùm deficiunt, vel supprimuntur. Idipsum dici debet de Evacuatione illa, quæ plerisque in virilitate accidit, ex hæmorrhoidibus. Siquidem cùm hæc per intervalla, & moderatè contingit, salutaris esse solet, atque à plurimis ægitudinibus præcavere; ut dicitur 6. aphorism. 11. & 6. epidem. sect. 3. At verò immoderata, vel quæ inerat penitus suppressa utraque multorum malorum causa evadit, præsertim Tabis, aut Hydropis, ex eodem Hippocrate ibidem.

Quod ad Repletionem verò, illa opposito modo administranda est; cùm scilicet Corpus plus justo fuerit inanitum: Nam quemadmodum, quæ repletionem fiunt, inanitione sanantur, ità vicissim per inanitionem inducta, tolluntur repletionem. Hinc in Corporum extenuationibus, dejectionibus, & alvi profluviiis, hæmorrhagiis, aliisque, quibus illa immodicè inaniuntur, convenienti refectio, repletioneque utendum: ea tamen distinctione, quam memoravit Hippocrates 2. aphorism. 7. inquit; *Quæ longo tempore extenuata sunt corpora, lentè reficere oportet: quæ verò brevi, breviter*: habito pariformiter respectu ad stomachum, & vires, si ferendo sint.

Quoniam verò inter ea, quæ replere, aut inanire solent, vel nullus, vel immodicus Veneris usus, à Medicis recensetur; breviter propterea videamus, quæ commoda, vel incommoda ille afferat. Et quidem iis, qui ex plenitudine laborant, ob lautam victus rationem, vitamque sedentariam, conferre solet, quemadmodum & ipsa Natura, in spontaneis pollutionibus, seipsam exonerans, ostendit. Juvat insuper in humidis corporibus, & in morbis ex pituita ingruentibus documento Hippocratis 6. epidem. sect. 5. dicentis: *Veneris in Morbis ex pituita, utilis*. Moderata ta-

men illa esse debet; nam immoderata plus justo debilitans, officit; etenim corpus exiccat, & Tabem, quam Dorsalem Hippocrates appellavit, infert: capiti, nervis, & articulis nocet. Quamobrem sicuti commendabilis videtur in corporibus succiplenis, sanguineis, robustis, otiosis, ita omninò vituperanda est in gracilibus, extenuatis, stomacho, & cerebro languidis. Atqui præ oculis monitum illud habendum à Virgilio de Ufu Bacchi, & Veneris, depromptum.

Vina sitim sedent: natis Venus alma creandis

Serviat: hos fines transiluisse, nocet.

Sed an majora mala accidant ex Inanitione, an ex Repletionem, non inutiliter dubitatur. Verumtamen, non de quacunque Inanitione, ac Repletionem proponitur difficultas, sed de immoderata solùm: nam si de moderata sermo fiat, proculdubio utraque vix nocere potest; quippe vita nostra utraque omninò eget, ut supra probatum. Itaque de immoderata, & Naturæ consuetum debitum excedente, tantummodò queritur. Et licet tam Inanitionem, quàm Repletio immoderata perniciofa sit, nam omne nimium Naturæ inimicum; & neque satietas, nec fames, cùm modum excedit, conveniens est: Nihilominus si comparentur damna ex utrisque provenientia, fatendum omninò erit, majora semper esse, & graviora ab Inanitionem procedentia, quàm ex Repletionem: nam quæ ab Inanitionem fiunt, viribus directè adversantur, cùm ex illa istæ protinùs fatiscant, & exsolvantur. Modò cùm vires languent, vel deficiunt, vita quoque deficit. Hinc Hippocrates etiam in iis, quæ ad victum pertinent, tenuem exquisitè, damnavit, veluti viribus oppugnantem, cùm dixit: *In tenui victu ægri delinquant, quo fit, ut magis ledantur*. Sed & facilius quoque occurratur Repletionem, si fortasse excesserit diffi-

facilius verò, & quandoque etiam nullatenus, inanitioni; cum facilius semper sit detractio, quam Adjectio. Qua fortasse etiam ratione, lethalem dixit Hippocrates, convulsionem ab evacuatione immoderata dependentem: quod sanè ex Repletionē nil tale quidpiam prælagivit.

Ex Inanitionibus autem, periculosior semper censenda est, quæ alimentorum, & præsertim sanguinis, sit, undecumque is prodeat: quippe exinde Vitæ thesaurus exhauritur. Ex locis verò, perniciosior ex Hippocrate censetur, si per partes superas, quam si per inferas egeratur; servata tamen pari evacuationis quantitate, & citrà quamcumque corruptionem, aut partium exulcerationem. Post sanguinis inanitionem, nocua putatur chyli egestio, modò continua sit, & languorem Ventriculi, ejusque fermenti vitium, consequatur: nam si fortasse à cibis proveniat, vel quantitate excedentibus, vel qualitate infensis, minùs mala existimatur, veluti à causis externis inducta. Gravis ulterius Inanitio est illorum humorum, qui fermenti loco sunt, & coctionibus, ac secretioribus viscerum conferentes. Unde immodica fellei humoris, & succi pancreatici, ac lymphæ evacuatio, periculosa semper est. Extenuatio item immoderata seri Pericardii, non rarò perniciosa fuit; quemadmodum sectionibus cadaverum pluries innuit: inde enim Cor in suo motu adeò offenditur, ut tandem hebescat, & desinat. Ad hanc classem reducuntur egestionēs partium solidarum, & si fortasse ex organis, magis vitæ necessariis, puta Cerebri, Cordis, Pulmonis, aliorumque prodeant (quippeque sanguinis motum tutantur, vel promovent) omninò mortiferæ erunt; aliarum verò partium non item. Sic expertum aliquando Pulmonum apices extremos, aut Hepatis, ut & mucronem Cordis, & corticem Cerebri superficialium, mortem nullam attulisse, etsi vulnere, vel

ulcere sauciata, ut ex Paræo, Aquapendente, Hildano, Bartholino, aliisque memoratur. Inter reliqua denique excrementa copiosiora, nondum benè liquet, cuinam Inanitioni majus periculum tribuendum sit. A sudore nimio, & ubertim fluente, licet plerique in Tabem postremò sint deducti; nihilominus adhuc multi referuntur ad annos integros sudasse, citrà ullum vitæ periculum; modò tamen febre caruerint. Ab alvi dejectionibus ferè perpetuis plurimi sunt qui evaserint, quamvis diarrhoeæ morbosæ limites attigerint, citrà tamen Intestinorum erosionem. At verò urinæ profluvium passi, vel nulli, vel pauci memorantur, qui diutius vixerint, fortè quia tanta urinæ quantitas serum sanguinis, & lympham exhaurit, quæ maximè omnium vitæ tuitioni, & gyræmati opitulantur. Quòd si non solum urina ubertius profluat, sed etiam referat conditionem mellitam, qualis in Diabete observari solet: nedum periculosior est, sed omninò lethalis, si præsertim cum febre conjuncta sit, quemadmodum in praxi pluries compertum; exsolutum scilicet sanguinem designans. De ceteris tandem egestionibus, Sputo, Narium muco, Vomitu, si Naturæ consuetum servant, nil est, quod exinde timendum sit, cum plerique sive Natura, sive usu inveterato, facilè sibi fecerint ejuscemodi evacuationes, & absque ullo vitæ incommodo: quamquam per vomitum habita gravior aliquanto esse possit, & progressu temporis exitiosa evadere; stomacho nimirum labefactato.

Non dissimiliter dicendum de eorumdem excrementorum retentione. Sudor enim detentus, atque in glandulis subcutaneis frigefactus, multoties obfuit, & febrem attulit acutam: aliquando etiam catarthum, ac tussim, cum dolore pectoris; itemque pleuritidem, peripneumonia, re-percussio interiùs sudore, præsertim tempore hyemali. A retento vomitu, sæpe-
pius

plūs Cardialgiæ subortæ sunt, nec non febres, ventris inflationes, dolores intestinorum, iſterus. Aretentis fæcibus, colici dolores, volvuli, tympanites: atque à suppresso lotio, ischuria, vesicæ tumefactio, dolor, febris, & similia. Comparatione autem facta inter Fæcum, & Urinæ retentionem, certè periculosior semper observata est omnimoda urinæ suppressio, quàm fæcum. Etenim istæ ad plures dies citrà ullum vitæ periculum remoratae referuntur, & deinde paulatim excretæ; at verò ab urina per hebdomadam suppressa, etiamsi deinceps excernatur, vitæ periculum certius imminet; & rari sunt illi, qui exinde supervixerint: idque fortè quia urina retenta, (præter sui molem, & salium acrimoniam misturam Vesicæ, Ureteribus, & Renibus infensam) sanguinem, reliquosque humores conspurcat, ac depravat, non sine ingenti principalium viscerum læsione, unde postmodum pulsum exilitas, corporis torpor, sensuum hebetudo, sopor, ac tandem lethargus, vel apoplexia insequuntur: quo mortis genere, ejuscemodi ægrotantes perire consueverunt, obiitque Tycho Brahe Danus, Astronomiæ Restaurator eximius.

Quæ sint in Excretis, & Retentis consideranda.

UT Excreta, ac Retenta, sive utilia sint, sive inutilia, ex alibilibus, aut excrementosis humoribus procedentia, possint generaliter à Medicis, pro salutariis, aut nocuis, stabiliri, sex in universum consideranda sunt, Substantia nimirum rei excretæ, vel retentæ, Qualitas, Quantitas, Tempus, Modus, & Locus.

Quod ad Substantiam videndum, quænam res excernantur, cibus, aut chylus, sanguis, & humores alibiles; an excremen-

tosus, felleus humor, aliisque: itemque num partes solidæ Corporis; ut & Vermes, Lapides, Arenulæ, & similia, quæ dicuntur toto genere præter naturam.

Quod ad Quantitatem, num evacuationes sint immoderate, & modum consuetum excedentes; an verò moderate, & convenientes, habito præsertim respectu ad Corporum constitutiones, habitudines, ætates; pariterque ad morbos, causasque morborum.

Quod ad Qualitatem, num humores excreti acres sint, acidi, salsi, crassi, viscosi, tenues, fætidus, corrupti, nigri, flavi, virides, &c.

Tempus etiam excretionis est observandum, num inter initia morborum, an in declinatione; num post coctionem, secretionemque, an verò in concoctis, commissisque succis inutilibus simul cum utilibus.

Modus pariter excretionis considerandus, num faciliter, an difficulter illi egerantur, putà cum doloribus, anxietatibus, animi deliquiis, aliisque molestiis.

Denique Locus conveniens esse debet, nempe qui Naturæ sit consuetus; unde etiam in statu sano superfluitates Corporis soleant evacuari; ut urina per vesicam, fæces per alvum, neutiquam verò per os.

Hæc eadem consideranda erunt in Retentis; an scilicet retineantur ea, quæ juvare apta nata sunt; an contrà, quæ præter naturam prorsus nocua, corrupta, & excrementosa. In Qualitate, & Quantitate, si degenerent à naturali constitutione, & à consueto Naturæ, atque ea quantitate, quæ congruit Corporis habitudini; etenim licet, E.g. felleus humor in cysti, naturaliter colligi, & conservari debeat, si tamen debitam qualitatem, & conditionem, quantitatemque convenientem non servet, vitiosus erit. In Tempore: etsi serum sanguinis, ac lymphæ utiliter cum sanguine commisceatur, nisi ta-

men statuto tempore fecernatur, & expurgetur, nocet. Sic pariter urina, ac faeces ipsæ, estò expurgari assiduò debeant, nihilominus non statim ac in Vesicam, & Intestina fuerint deposita, egeri debent, sed per aliquod saltem tempus detineri: ità de cæteris. In Modo: sicut facilis semper esse debet Egestio quæcumque excrementorum; ita ex adverso Retentio quælibet humorum utilium oportet ut sit absque molestia. Undè licet Cibus E. g. debeat omni jure in Ventriculo detineri, quousque concoquatur, & vertatur in chylum; non tamen illi molestus sit, oportet; quamobrèm, cum dolorem, anxietatem, aut gravamen affert, morbus est. Denique Loco: necesse equidem est, ut utiles, & salutares humores nedum detineantur, sed in suis quique conceptaculis: uti felleus humor in cysti: lymphæ in vasis lymphicis; sanguis in venis, & arteriis: extrà propria namque vasa stagnantes, omninò nocui sunt. In his igitur omnibus detrimenta Corpori accidunt, etiamsi secundum naturam sint, quæ detineri debent. Hinc scitè quidem monuit Galenus in *Prorrheticis*: *Etiam ex iis, iniquiens, quæ suapte natura utilia sunt, & vitæ consentanea, gravissimas ægritudines proficisci posse; quinimò ab his gravius ægrotantes affici solere, & irreparabilius obire, cum à consueto Naturæ desciverint.*

De Passionibus Animi.

TAmetsi Galenus 3. libro *Artis Medicæ*, ultimum locum, inter sex Res Nonnaturales, Animi Passionibus adscripserit; sunt tamen illæ longè admodum cæteris præferendæ, veluti in alterando efficaciores, cum sint hostes intestini, & nobiscum innascantur, & degant. Quamobrèm idem Author *lib. de ludò parvæ pilæ cap. 1.*, majorem industriam adhibendam

Tom. V.

esse monuit, in regendis Animi Pathematibus, quàm in corporalibus motibus mitigandis, moderandisque: atque eo magis, quò Animus dignitate corpori præcellit. Et eodem 3. *Art. Medic. t. 16.*, liquet, inquit, *ab ipsis* (idest benè valentibus) *caveri oportere omnes Animi immodicos affectus, videlicet Iræ, Tristitiæ, Furoris, Timoris, Invidiæ: hæc enim alterant, atque à naturali statu corpus averunt.* Et quidem tam repentini, ac violenti Animi motus non rarò sunt, ut Rationi minimè obtemperent, & universam Corporis œconomiam subvertant.

Et quamvis de moderandis Animi passionibus agere pertineat ad Philosophos Morales, eo quòd isti in regendos, corrigendosque mores incumbant, cum plerique ob magnum Timorem pusillanimes evadant; & alii ex Ira in Furorem deducantur; & nonnulli alii ob vehementem Tristitiam, sylvestrem vitam ducant; qui deinde, ope Moralis Philosophiæ, Timidi, Audaces redduntur: Iracundi, Timore reprimuntur: & Mœsti, Animi alacritate levantur: Medici tamen pravos ejuscemodi motus corrigunt, & emendant, prout Sanitati detrimento esse possunt: Etenim rectè, inquit Vallesius 1. *meth. cap. 15.*, nil firmius hæret Corpori, quàm quod venit ab Animo; propterea hic ab istis illæ considerantur, prout obsunt, vel profunt Corporis incolumitati: quandoquidem sine corporeis instrumentis, sanguine potissimum, & spiritu, non peraguntur, ad quorum commotionem,urbationemque, salus vel infirmatur, vel confirmatur.

Primùm autem de harum Passionum Origine, primoque fonte, licet à quibusdam dubitari soleat, communiùs tamen ad Appetitum Sensitivum, ità à Philosophis nuncupatum, illas verisimiliùs referendas esse censent, cum exinde reliqui sensus externi corporis, ad variam ipsius

R affe-

affectionem, pariformiter coafficiantur. Equidem Passiones istæ, motiones quædam Animi sunt, per spiritus, & sanguinem, in cunctas partes Corporis delatæ, proindeque varias perturbationes inferentes; ideoque absque motrice aliqua vi, quæ moveat, agitet, atque perturbet, fieri nequeunt. Motrix autem ista Vis, seu Potentia, in organis motui destinatis, potissimum in fibris, tum rectis, tum obliquis, tum transversalibus, aut curvis dictis, atque adeò in contextu, plexuque illo interno Cerebri, unde etiam Nervi originem sumunt, & ubi per arteriolas, purior, ac tenuior sanguinis pars in spiritus volantes, seu in purissimum, limpidissimumque liquorem, quem succum nerveum vocant, vertitur, sita est: quamobrem pro varia affectione, impressioneque eidem illata, diversimodè spiritus, ac sanguis ipse, commoventur, fibræque nervorum exagitantur, ex objectis nimirum jucundis, vel injucundis, vim illam, internumque sensum afficientibus, juxta variam, diversamque simulacrorum in Phantasia representationem, sive ad bonum, sive ad malum incitantium. Neque verò quis exinde deducat varias ibidem inesse facultates, aut distinctas illarum sedes; cum benè omnes istiusmodi operationes ab uno, eodemque principio manare possint, quod deinde secundum varias impressiones diversimodè operetur, & actiones exferat diversas, pro diverso, varioque impulsu indito fibris, nervis, cæterisque partibus Corporis, subindeque sanguini communicato; unde postmodum pallores, rubores, tremores, impetus, hebetudines, aliaque hujus generis suboriuntur. Quod autem à Cartesio dicitur de Glandula Pineali, veluti sede, & organo peculiari harum omnium operationum, non cunctis arridet; quin & nec desunt, qui ex Anatome referant, illam aliquando in dissectis cadaveribus inven-

tam non fuisse, aut etiam repertam petrefactam; cum tamen nulla læsio in Operationibus Animalibus, dum in vivis essent, fuisset observata: quamquam & id potuerit in extremo vitæ spiritu iisdem accidere. At verò istiusmodi Passiones ad Animam Rationalem referre, non videtur rationi consentaneum, cum etsi per spiritus tenuissimos is eam operari fateatur, isti tamen materiales, & corporei, neutiquam cum Rationali Anima Spirituali consortium inire possunt, aut in agere, aut in pati: quo proinde factum, ut ab aliis ejuscemodi Passiones dicantur potius operationes Totius, atque adeò ad totum Corpus animatum pertinentes.

Verum ut ab hisce Physicorum ambagibus extricemur, & quantum ad Rem Medicam facere videtur, breviter Nos expediamus, retento communi loquendi usu, pro explicandis Animi passionibus, ea methodo procedemus, ut nulli oppugnare videamur, admittentes solummodò ea, quæ sine ulla difficultate ab omnibus indiscriminatim, nedum recipiuntur, sed in seipso quoque unusquisque Hominum experitur.

Et sanè certum apud omnes est, ab objectis jucundis, vel injucundis, benè, vel malè afficientibus externos sensus corporis, excitari in nobismetipsis motionem, affectionem, perceptionem, aut si mavis aliter appellare, perturbationem quandam, in interiori sensu, qua Animo commovemur ad prosequendum, vel ad averfandum, fugiendum, & evitandum id, quod Nobis objectum est. Inde autem suscitatur in Nobis impressio, seu perceptio quædam, ex apprehensione ejusdem objecti, vel boni, vel mali, levior, aut gravior in Animo, unde sanguis, & spiritus statim commoventur, unàque simul partes sensitive Corporis diversimodè afficiuntur, ut patet ex pallore, aut rubore cutis, frigore, vel calore, rigiditate, vel laxi-

laxitate membrorum, aliisque similibus. Perceptio autem ista boni, vel mali, jucundi, vel injucundi, tristis, aut delectabilis, nonnisi in Cerebro primum fit, adeoque in sensu aliquo interno, quem liceat cum cæteris appellare Sensum communem, Appetitum sensitivum, aut aliter, ut libuerit; cum aliunde certum sit, Imaginationem ejus objecti in Nobis progigni, cum æstimatione gravioris, aut levioris boni, vel mali, præsentis, aut imminentis, exindeque sequi diversos Animi affectus, Cor, Sanguinem, Spiritus, totumque Corpus perturbantes, ac benè, vel malè afficientes, pro varia perceptorum objectorum impressione. Cum igitur hæc omnia cuique notissima sint, absurdum non erit, Apprehensionem, seu Perceptionem istam ad Imaginativam referre; Æstimationem verò, ad sensum internum, averfantem, aut prosequentem, quem Appetitum sensitivum appellare licebit: ac demum diversas exinde ortas Animi motiones, perturbationes, passionnes (græcè Pathémata) denominare: quæ quidem in suo principio promovente consideratæ, ad Motus, & Actiones pertinebunt; in effectibus verò, quos pariunt, Passiones dici debebunt. In hoc autem neminem, sed & nec Cartesium ipsum, dissentire, crediderim, qui idcirco renuit duos appetitus in parte Animæ sensitivæ constituere, Irascibilem unum, Concupiscibilem alterum, quia *nullam*, ut ipse inquit, *in Anima distinctionem partium fingere possumus*, veritus ne exinde facultates diversas in eadem collocare cogeretur, atque non minùs has duas irascendi, & concupiscendi, quàm innumeras alias, & admirandi, & amandi, & sperandi, & odio habendi, & metuendi, & sic de cæteris. Attamen vocabula ista facultatum, & potentiarum, etiam in operibus mechanicis admittuntur, atque in Cuneo, Væte, Trochlea, Libra, Lance, & simi-

libus, has potentias Mechanici considerant; quamvis nil aliud in ipsis sint, quàm dispositiones, actiones, ac instrumenta motuum, & ponderum movendorum: Sed & cum quis dormit, nec videt, nec audit, & tamen potentiam videndi, ac audiendi benè dicitur habere: Quin & vigilans adhuc, si videre, ac audire nolit, claudens palpebras, & aures obturans, potentias nihilominus illas non amittit, per organa nimirum benè disposita, quibus Anima, remotis impedimentis, ad videndum, & audiendum determinatur. Parùm ergo interest, nomina rebus imponere, aut imposita retinere, pro Nostri intelligentia, dummodò in rebus ipsis conveniamus. Cæterum quis unquam per hæc nomina diversa, diversas potentias, aut distinctas partes in Anima imaginabitur? cum & neque per Intellectum, Voluntatem, ac Memoriam, sive Reminiscentiam, quæ immediatè ab ipsa procedunt, ipsique insunt, quidpiam ab eadem distinctum, ullus unquam est suspicatus. Liceat itaque has voces retinere, ut confusionem in Veterum doctrinis evitemus, & faciliùs, quæ ad nostram rem Medicam faciunt, explicemus.

Ab Appetitu igitur Sensitivo dicto, Animi passionnes profluere concedamus, ex quo Animal à præcedenti sensuum externorum notitia, naturaliter inclinatur ad bonum sensibile, cognitum ut tale, aut declinare conatur à malo, ut tale pariter apprehenso. Quamobrè reliquis sensibus externis præesse dicetur, & eo ferè modo se habere ad Imaginativam, seu Phantasiam, quo Rationalis Appetitus, idest Voluntas, se habet ad Intellectum. Ut enim Voluntas, velut Potentia cæca, ab Intellectu lumine pleno, regulatur, ferturque in bonum ab eodem Intellectu præcognitum; ita Sensitivus Appetitus ducitur in bonum ab Imaginatrice perceptum; quin & pro varia objectorum repræsentatione-

tione, diversimodè commovetur, vel ad prosecutionem, vel ad fugam, objecti apprehensi.

Ejusmodi insuper Appetitus Sensitivus duplex statuitur, Concupiscibilis unus, Irascibilis alter: nam in iis, quæ ad sensus pertinent, movetur Animal ad ea, quæ profunt, vel saltem prodesse videntur; retrahitur verò ab his, quæ obsunt, vel putantur obesse; unde Concupiscibilis Appetitus. Cum verò nititur occurrere obicibus, rei consequendæ fruitionem retardantibus, Irascibilis appellatur. Quamobrèm Concupiscibilis Appetitus tendit in bonum sensibile absolute: Irascibilis verò in bonum sensibile difficile; non quòd difficultatem per se primò appetat, sed tantum ut illam removeat, ac superet, ut exinde bono fruatur. Et quamvis Platonici duplicem hunc Appetitum in distinctis sedibus collocarint, nempe Irascibilem in Corde, & Concupiscibilem in Hepate, ad quos proinde sejungendos Septum transversum interposuisse Naturam, ajebant, quo unus cum altero minimè communicaret; communior nihilominus sententia cum Aristotele existimat, unà simul in Corde utrumque residere, eo potissimum argumento, quòd in Animi passionibus ab utroque Appetitu manantibus, Cor semper commoveatur, ut ostendunt concitati pulsus; siquidem tum in bono sensibili absolute, tum in bono difficili consequendo, Cor afficitur, & pulsus perturbantur.

Atque hinc, profluentes ab hoc Appetitu sensitivo Animi passionibus, idcirco tales dicuntur, quia non sine quodam sensu Voluptatis, aut Doloris fiunt, & cum Appetitus operatur, quodammodo patitur ab objecto, vel jucundo, & delectabili, vel injucundo, & molesto; unde & Imaginatrix potentia vehementer concutitur, & Cor, ac Corpus universum plurimum afficitur, ac perturbatur, commo-

tis unà simul spiritibus, & sanguine, per totum diffusis: id quod tam manifestè patet in Ira, Gaudio, Timore, Mœstitia, ut aliquandò etiam facies palleat, aut rubeat, cutis horreat, lingua titubet, caput vacillet, atque aliter, aliterque Corpus totum concutiat. Hinc modò describi solent Animi Passiones, quòd *sint Motus Appetitus sensitivi circa bonum, vel malum sensibile opinatum, seu apprehensum, & judicatum ut tale, ab Imaginatrice, seu Phantasia, cum aliqua involuntaria Corporis mutatione*. Dicuntur Motus, quia reverà in his Appetitus excitatur, & ad objectum commovetur: non tamen sunt Motus continui, quia non semper, ac assiduò Appetitus ab objectis afficitur. Et quamvis Passiones dicantur in effectu, quia ab illis Corpus patitur; in Radice tamen, seu in Origine, Actiones, & Motus sunt, profluentes ab ipso Appetitu sensitivo, ut dictum. Dicuntur circa bonum, vel malum sensibile, à Phantasia apprehensum, ut differant ab actibus Voluntatis, quæ fertur in bonum, vel malum à Ratione, & ab Intellectu præcognitum: quoniam, ut antea notatum, quemadmodum Voluntas, Potentia cæca, regitur ab Intellectu; ità Appetitus sensitivus regulatur à Phantasia, seu Imaginatrice Potentia. Dicuntur denique, cum quadam involuntaria, seu naturali Corporis mutatione; quandoquidem reverà Corpus subinde ab illis alteratur, & commovetur, sive cum ex Gaudio Cor plus justo expanditur, & facies, ac oculi vividiores apparent; sive cum in Timore, & Mœstitia illud contrahitur, & hi caligant, & pallent; sive cum in aliis affectibus diversimodè perturbantur, & commoventur; in quibus planè aliqua semper corporalis mutatio contingit. In idem fere concidit Cartesii definitio, qua *Passiones istæ, dicuntur Perceptiones, aut Sensus, aut Commotiones Animæ, quæ produ-*

dueuntur, conservantur, & corroborantur per aliquem motum spirituum: Nisi quod in ista, Passiones, ad Principium potius earumdem referuntur: in illa vero, magis ad commotiones, perturbationesque Corpori illatas, veluti effectus, de quibus potissimum hic sermo est, & Nos agere proposuimus.

Ad has insuper Passiones excitandas tria in universum concurrere solent, duo quidem interna, tertium externum. Interna sunt, Appetitus Sensitivus, à quo proximè Passiones emanant: & Phantasia, seu Imaginativa, sensuum omnium Radix, & Origo. Externum verò est objectum, quod Phantasiam primò commovet, per sensus externos: nam nisi objectum externum per sensus apprehenderetur, vel ut bonum, vel ut malum, à Phantasia, certè Appetitus Sensitivus neque moveretur ad illud appetendum, vel fugiendum; adeoque neque Passiones excitarentur, nullaque fieret in Corde, totoque Corpore commotio, ac perturbatio. Itaque, ut Animi passiones inferantur, necesse est, ut objectum jucundum, vel injucundum, triste, aut delectabile, per sensus externos efferatur in Phantasiam, quæ prout illud apprehenderit, firma, stabilique perceptione, sub ratione boni, vel mali, Appetitui sensitivo representabit. Cumque utraque potentia in sensu, motuque Animalis consistat, statim commovet fibras nervorum, per quas traducitur in Cor impressio, & commotio, subindeque sanguis, per arterias influens, diversimodè affectus, & concitatus, fertur per cunctas partes Corporis; unde postmodum universalis, & manifesta concussio, ac perturbatio, sive horrores, frigoris, tremoris; sive ruboris, exardescentiæ, & caloris; sive pallidi, aut rosei coloris, aliussive; pro varia Passionum excitatarum affectione. Hinc in Ira plerumque rubet facies, oculi splendent,

exardescit cutis; quia sanguis concitatur, & effervescit: in Mœllitia, & Timore pallet, livescit, refrigeratur, & contremiscit, quoniam in suo motu lentescit sanguis, concrescit, & quodammodò congelascit: in Gaudio, & Lætitia roseo colore illa perfunditur, & oculi alacriores observantur, à sanguine scilicet vividiori, expansiorique: submittuntur verò ex adverso in Verecundia, & Pudore; & sic de aliis.

Plurimum autem ad hæc conferre solet Corporum habitudo varia: Etenim experimur plerosque nasci proclives ad Iram, alios ad Timorem, quosdam ad Tristitiam, ad Lætitiā alios, nonnullos ad Commiserationem, & alios ad oppositas, diversasque alias Animi affectiones. Pro varia siquidem nedum Corporum constitutione, verum etiam pro dispositione organorum, promptius suscipere solent, unam, vel aliam ab objectis impressionem. Quemadmodum enim exteriora sensuum organa in quibusdam aptiora observantur ad audiendum, videndum, gustandum, tangendum, odorandum, aliterve in aliis operandum; ita & interiora organa, credere licet, ad hos, vel alios motus Animi, esse procliviora, magisque disposita. Hac quippe ratione, pluries ex Anatome compertum, Fortes, & Audaces sortitos fuisse Cor mole parvum, textura densum, & non rarè etiam pilis stipatum: Pusillanimes verò, structura laxius, amplius mole, & vasorum, ac fibrarum laxitate, debilius. Sed & ad idem multum quoque valet sanguinis, reliquorumque humorum constitutio varia; unde qui sanguinem natæ sunt tenuiorem, fluidioremque cum aliqua volanti acritate, proni sunt ad Iram; qui verò contrà, sanguinem sortiti sunt compactiorem, acidiori- que, quem vocant melancholicum, proclives sunt ad Tristitiā; sicut alii ad Læ-

titiam, alii ad Metum, & alii ad alias Animi passiones, pro varia scilicet sanguinis crassi, & habitudine. Hinc etiam comperimus, pueros, & Fœminas esse timidiores, facilèque prolabi in commiserationem, ac fletum; contra verò Viros, & Senes; Immò ipse idem, qui in ætate puerili verecundus, placidus, meticolosus, ac misericors observabatur, ætatum mutatione sæpe sapius indolis oppositæ, differentisque propensionis evadit: non alia certe de causa, nisi quia per ætatum mutationem variant organa, & sanguinis, reliquorumque humorum constitutiones. Ubi enim biliosus, & acer sanguis prævalet, fibræ quæcumque Corporis, & præsertim Nervorum, facilè proritantur, commoventur, & exardescunt. Qui verò acidus, & melancholicus est, coarctat potius, gravat, deprimit; & serosus, ac pituitosus, obstruit, hebetat, laxat. Atqui etiam ex varia organorum structura, sensus quoque, & motus in nobis variant; unde aliqui Auditui, alii Visui, alii Gustui, Olfactu, aut etiam Tactu, cæteris præcellunt.

Verumtamen, uti ex Natura, & Nativitate plerique proclives fiunt ad unam, aliamve passionem contrahendam, ita possunt & alii ex iteratis actibus idipsum per Habitum comparare, cum Habitui per actus acquiratur. Quare etsi quis à Nativitate sit Iracundus, poterit ex oppositis actibus pluries, sapiusque repetitis, mitior, ac placidior fieri: & qui pusillanimis erat, audacior evadere. Oportet autem unum motum per alium oppositum reprimi, & emendari, ut exinde contraria affectio inducatur. In hoc equidem summè valet Rationis, & Voluntatis imperium, ut de Socrate, Hippocrate, aliisque Ethnicis memorant Historici, & passim Nos legimus in Vitis Sanctorum Patrum. Sed & unica etiam volitione

idipsum quisque peragere potest, si vehemens Voluntatis imperium accedat, præpolleat, firmiterque consistat.

Quænam autem, & quot sint ejusmodi Animi pathemata, vix ausim certo numero comprehendere, cum neque inter Doctores tum Veteres, tum Recentiores, de hoc hætenus conventum sit. Id autem factum videtur, quia licet objectum Appetitus Sensitivi unicum sit, nempe Bonum appetendum; per accidens tamen potest esse malum, in quod feratur; idque sive fruitionis gratia quia putatur, ut Bonum, sive gratia averfationis, ut ex illius fuga, Bono fruatur: quo fit, ut Appetitus sensitivus, quemadmodum fertur in Bonum, vel in Malum, putatum ut Bonum; ita & Animi Passiones circa Bonum, vel Malum versentur. Quamobrè Stoici ex hoc objecto voluerunt, quatuor dumtaxat esse Animi Passiones: Vel enim Bonum, aut Malum præsens est, & circa Bonum dixere versari Gaudium, circa Malum, Tristitiam: Vel Bonum, aut Malum, futurum est; & in Bonum futurum, Spem; in futurum Malum, Timorem; unde Gaudium, Spem, Tristitiam, & Timorem, Generales Passiones illi constituerunt. At verò Peripatetici cum Aristotele, non ab Objecto, sed ab Appetitu Concupiscibili, & Irascibili numerum earum desumpserunt, atque idè ad undecim revocarunt; Sex quidem pertinentes ad Appetitum Concupiscibilem; & Quinque ad Irascibilem. Ad Concupiscibilem reduxerunt Amorem, Desiderium, Gaudium, Odium, Fugam, & Tristitiam. Ad Irascibilem verò Spem, Desperationem, Timorem, Audaciam, & Iram. His alii ex Recentioribus duodecimam adjunxerunt, Placiditatem, seu Commiserationem, veluti Passionem Iræ oppositam. Quin & nonnulli alii adjece-
re Pudorem, Impudentiam, Indignationem, Invidiam, Æmulationem, Zelo-

typiam, Pœnitentiam, Admirationem. Cartesius verò innumeras alias recensuit, & quidem longa nimis serie; diversaque methodo distinctas, ut apud eundem legere est, quoniam Passiones ab illarum Radice desumpsit, non verò in effectibus consideravit, quamobrem inter eas, Admirationem fecit primam. Apud Ciceronem, *Tuscul.* 4., quatuor dumtaxat principales Passiones memoratæ referuntur, nimirum Animi ægritudo, seu Tristitia, Lætitia, Metus, & Libido. Per Animi ægritudinem morsum quendam doloris induci ait: per Metum, Animi recessum, ac fugam; per Lætitiā profusam Hilaritatem; per Libidinem effrenatam appetentiam. At his veluti generibus alias tamquam species subiecit, & Animi ægritudini Invidentiam, Æmulationem, Obrectationem, Misericordiam, Angorem, Luctum, Mœrorem, Ærumnam, Dolorem, Lamentationem, Sollicitudinem, Molestiam, Afflictationem, & Desperationem. Metui subdidit Pigritiam, Pudorem, Terrorem, Timorem, Pavorem, Exanimationem, Conturbationem, Formidinem: Voluptati, seu Lætitiæ supposuit Delectationem, Jactationem, & ex malo alieno Gratulationem, Libidini demum subdidit, Iram, Excandescentiam, Odium, Inimicitiam, Discordiam, Indigentiam. Explicat præterea quid per unamquamque passionem ipse voluerit intelligendum, & subdit, Invidentiam, esse ægritudinem, propter alterius res secundas, susceptam. Æmulationem, esse Animi concupiscentiam ex carentia ejus, quo alius est potitus. Obrectationem, esse quandam Zelotypiam, Misericordiam, Animi commotionem ex alterius miseria. Angorem, esse ægritudinem Cor prementem. Mœrorem, ægritudinem flebilem. Dolorem, ægritudinem cruciantem; & ita de cæteris, ut apud eundem legere est. Sed neque de-

fuere, qui omnes Animi passiones ad duas commodè referri posse dixerint, nimirum ad Amorem, & Odium: quapropter desiderium appellarunt, Amorem boni absentis: Lætitiā, Amorem boni præsentis: Spem, Amorem in bonum arduum: Desperationem, Amorem ex arduitate deficientem, Et contrā, Fugam, esse Odium mali absentis: Dolorem, esse Odium mali præsentis; Audaciam, Odium in malum arduum: Metum, Odium ex malo arduo: & Iram, Odium in causam mali.

Sed quamvis tam varii sint in referendis Animi Pathematibus Authores, quia tamen, quæ magis ad Medicum negotium facere videntur, illæ speciatim sunt, quæ Corpus humanum potissimum exagitant, & excruciant, ut facile valeant illud in ægritudines sive graviores, sive leviores adducere; idcirco, omissis aliis, quæ minoris momenti sunt, solum hinc de iis agemus, quæ violentius, molestiusque Corpus afficiunt, atque breviter examinabimus illarum naturam, vim, atque efficaciam, quam tum nocendo, tum proficiendo afferunt; ac denique Remedia, tam physica, quam moralia, quibus easdem corrigere, vel abolere possimus.

Et quidem primo loco sese offert Amor, qui Choragus omnium affectionum appellatur, immò illarum omnium compendium est; quippe Amantes nunc gaudent, nunc tristantur, nunc timent, nunc irascuntur, & modò una, modò alia passione cruciantur. In eo autem definiendo multum variant inter se DD. Plato illum inquit, esse *Appetitum quendam, quo bonum sibi quispiam desiderat*. Alii verò ex eodem descripserunt, *Desiderium Boni*; unde Sanctus Thomas, *Boni complacentiam* illum appellavit; sive ut aliis placet, *Boni, pulchrique possidendi, & fruendi Desiderium*. Medici ferè communiter,

Cordis, & sanguinis ingentem perturbationem, nuncupant; quamobrem *Passio passionum* quibusdam dicitur. Sed nec ex Platonice defuere, qui illum dixerint esse *quandam Animi fascinationem*, unde subdunt, cur tam facile Amantes desipiant, macrescant, & non rarò etiam emoriantur. Vocant alii *primum Appetitus sensitivi motum in bonum sensibile*; quoniam inter cæteras Animi affectiones Amor primum, & specialius fertur in bonum sensibile: cumque bonum secundum eisdem Platonice duplex sit Intellectuale unum, Concupiscibile alterum; hinc etiam Amor, alter dicitur Intellectuali, & Divinus, alter Concupiscentiæ, & Terrestris.

Verùm omiſſis his, quæ de Amoris Natura alii retulere, dicamus Nos, Medicorum more loquendo, Amorem esse, *Affectum Animi procedentem ex Appetitu concupiscibili in bonum sensibile, cum manifesta Cordis agitatione*. Quamobrem Aetius explicans illud Ovidii.

Res est solliciti plena Timoris, Amor. inquit, non solum ex illo Cor, & sanguinem vehementer commoveri, sed esse sollicitam quandam mentis insaniam, qua Amantes de objecto amato perpetuò cogitant, atque ad illud mente feruntur. Et quidem tanta solet esse non rarò ex vehementi Amore Animi perturbatio, ut plerique manifestam desipientiam incurrerint, ac veluti Ecstasi abrepti, fiant cogitabundi, & nec videant, nec audiant, quæ iisdem offeruntur, immò nil rectè prorsus agant, quod cæteroquì, si animadverterent, benè, ac prudenter gestum vellent.

Ex his autem oritur, cur ab Amore partes cunctæ Corporis incalescant, & sæpenuerò febricitent; unde plurimi ad extremum contabuisse memorantur: quoniam sanguis ex perenni Cordis, & Mentis agitatione plus justo extenuatur,

& acrior fit, adeòque ineptus evadit nutritioni, accretionique. Hac eadem de causa Pervigilium, Inquietudo, creber Anhelitus, Suspiria, Anxietas, & alia hujus generis mala plurima Amantes commitantur.

Sed speciatim de Pulsu animadvertere est, illum ex Amore celerem, frequentem, elatum, inæqualem, facilèque mutabilem fieri; unde fertur Erasistratum agnovisse Amorem Antiochi; & Galenum Juvenem amantem Romæ deprehendisse. Et quamvis Galenus ipse dicat 1. *prognost.* 4., nullos esse proprios Amoris pulsus, sed varios, quia nimirum variorum passionum cum illo jungi solent, ad quarum diversitatem diversimodè Pulsus perturbatur: hic tamen pulsus varius, & inæqualis, videtur proprius Amantium, græcè *Eroticus* appellatus. Verùm ejuscemodi pulsus manifestior fieri solet ad præsentiam, vel ad memoriam Rei Amatæ: qua planè industria præfatos Authores ad deprehendendos Amantes, usos fuisse legimus. Hinc ergo patent Amoris incommoda: etenim præter Animi ingentem commotionem, inquietudinemque, plerumque contingunt febres pusillæ, de genere Hæcticarum, macies totius Corporis, pallor ex mala ciborum digestionem, nutritionemque; itemque vigiliæ diuturnæ, deliria, & præsertim melancholia.

Sed tamen ex adverso, ab eodem multa beneficia non rarò manasse referuntur. Narrat si quidem Cardanus de proprio filio, qui cum ignavus omninò, incultus, ac ferè stupidus videretur; ab Amore evaserit perelegans, venustus, sagax, & facundus. Ovidius quoque, Magister Amorum, multa de seipso confitetur, eadem ex causa successisse. Verùm de his dicere non plus decet; cum alioqui omninò certum sit, quòd quæ bona plurima ex Amore Intellectuali

pro-

proficiscuntur, nulla ex terrestri manare possint, nisi solum ad perniciem; ut in ipso filio Cardani, & in Ovidio, præ innumeris aliis evenere.

Pro curatione denique Amoris, multa à Medicis, & Philosophis Ethicis referuntur; licet Propertius dicat:

Omnes humanos sanat Medicina dolores:

Solus Amor morbi non amat Artificem.

Atqui non curatur Amor amatæ rei fruitione, cum subinde potius increbrescat, & per Zelotypiam acrius, vehementiusque divexet. Excogitarunt plerique universum veterem sanguinem è Corpore Amantis esse exhauriendum, ut ex novi sanguinis benigniori conditione fascinum rei amatæ penitus deleteretur: vel si hoc fieri nequeat, esse Corpus ejusdem pluries ab atra, & deleteria infectione repurgandum, quam ipsum contraxisse ajunt: in quam rem & Syrupi, & Aquæ, & Electaria, & Pharmaca, corrigentia simul, & emundantia ejusmodi inquinamenta, commendantur. Exhilarantes prætereà confectiones, emithemata cordialia, ablutiones attemperantes, & alia similia, ab iisdem proponuntur. Verum ista sæpenumerò inutilia sunt, quibus tam fixus plerumque est, & inquietus Animi affectus, ut nisi hic primùm averruncetur, reliqua omnia supervacanea evadant. Quamobrè præstabit contrariis potissimum passionibus, hærentem ossibus Amorem, sensim absque sensu primùm resecare; mox verò præsidia medica superaddere: neque verò ea, quæ tam manifestè iteratis evacuationibus sanguinem debilitent, & exhauriant, sed quæ potius in meliorem crasim reducant, & temperatiorem efficiant: Itaque conferet paulatim in mentem Amantis inferere defectus aliquos rei amatæ, & quidem tum phycos, tum mo-

rales; putà deformitatem, ægritudinem; mox etiam malos mores, infidelitatem, & similes, ut in illius odium, aut aversionem inducatur. Hac enim arte plerique recensentur ab Amore suæ Amatiæ excidisse. Juvabit ulterius applicatio Amantis in studia, negotia, lites, aliasque exercitationes, penitus differentes, ut inde Mens aliò intenta, paulatim rei amatæ obliviscatur: quia sicut Otium fomes est Amoris, ita ex adverso corporis, & mentis exercitatio illum extinguit; unde Ovidius: (a)

Otia si tollas, periere Cupidinis ar-
cus:

Contemptaque jacent, & sine luce
faces.

Et mox,

Finem qui quæris Amori,
Cedit Amor rebus: res age, tu-
tus eris.

Desidiam puer ille sequi solet: odit
agentes.

Da vacuæ menti, quo teneatur
opus.

Affert & idem Ovidius aliud Amoris remedium, inquiens:

Successore novo vincitur omnis Amor.
At hoc potius est novo Amore, & fortasse pejore, veterem eradicare. Conducibilior autem est absentia ab objecto amato, & adhuc efficacior Peregrinatio; unde idem Poeta. (b)

Manat Amor testus, si non ab A-
mante recedas:

Utile finitimis abstinuisset locis.

Verumtamen præstat cunctis, malorum ex Amore derivantium perpertua recordatio, juxta monitum ejusdem Ovidii. (c)

Sæ-

(a) lib. 1. de Rem. Amoris.

(b) lib. 2. de Rem. Am.

(c) 1. de Remed. Amor.

*Sapè refer tecum sceleratæ facta
puellæ :*

*Et pone ante oculos omnia dam-
na tuos. (a)*

Quare & librorum de ejus malis agentium assidua lectio summè proderit; itemque Corporis afflictatio, ciborum multorum abstinencia, cum morigeratis viris conversatio, mortis meditatio, atq; in Deum frequens, ac devota sui ipsius commendatio.

Odium opposita Amoris Passio, sicuti non rarò eidem mederi consuevit, & profuit; ità sæpè etiam, cùm extrà limites excurrit, degenerat in furorem, & nedum Amori, sed etiam Quieti, Paci, & animi tranquillitati adversatur, & officit. Hinc describitur, *Impetus Appetitus Irascibilis in malum sensibile*: Etenim què admodum Amor dicitur motus Appetitus concupiscibilis in bonum; ità ex adverso Odium Impetus Irascibilis in malum. Jungitur etiam cum illo Displacencia, Discordia, Ira, quia per ejusdem affectionem sic perturbatur Cor, & sanguis, itemque Phantasia, imò & Ratio ipsa, ut omnes ferè operationes Corporis immutentur: quamobrèm vultus pallet, riget Corpus, albescunt labia, fauces arctantur, lingua titubat, pulsus deprimitur, oculi turbantur, frons rugatur. Hac de causa, nulla illius commoda memorantur, nisi solùm quod effrænato Amori medela sit. Cæterùm mala innumera ab illo exoriuntur, & quidem tum Animi, tum Corporis; quia, ut dictum, facilè transit in Furorem.

Totis ergo viribus incumbendum, ut illi statim inter initia occurramus, non solùm inducto Amore rei odio habitæ, verùm etiam Animorum reconciliatione, ac pace. Multum etiam in hanc rem valent munera, venerationes, submissiones;

itemque ut in Amore dictum, peregrinationes, vel in res jucundas, ac hilares, congruentes applicationes.

Ira passio affinis Odio, describitur à Philophis moralibus, *Vindictæ desiderium*, seu *Appetitus*: A Medicis verò, ut deducitur ex Galeno 1. de differ. februm. cap. 3. & 2. de symptomat. caus. cap. 5. definitur, *Ebullitio*, seu *Effervescentia sanguinis circa Cor*. Quamquàm idem Galenus 2. de san. tuen. cap. 9., in ejusce sanguinis ebullitione Furorem consistere asserat, cujus accessorium ultionis appetitum esse. Verùm fervor sanguinis Iræ potiùs causa est, procedens ex malo odio habito. Hinc Iracundia familiaris est biliosis, & atrabilariis dictis, ac facillimè æstivo tempore accidit, potissimum ex immoderatis potibus vinorum meraciorum; Unde idem Galenus aphor. 4. comm. 2. Iram, inquit, Temeritatem, atque Immanitatem, seu Ferociam, atrabilarii humoris passionem esse; ut etiam Aristoteles 2. sect. problem. 26. insinuavit.

Incommoda ergò Iræ sunt, quòd febrim non rarò excitet, ut multis quoque ostendit Galenus 1. de differ. febr. cit. cap. 3., nam sanguinem vehementer commovet, atque ad indebitè fermentescendum disponit; promota nimirum parte volatili, ac tenuiori, atque in partem sanguinis glutinosiorem adacta, unde etiam Cerebrum sæpenuerò afficitur, & in delirium, aut pervigilium laceffitur: quare Iracundi proclives quoque sunt ad Maniam, & Furorem. Observatum pariter est, nonnullos ex vehemènti Ira Apoplexiam, vel Epilepsiam incurrisse: quosdàm etiam ferè exanimatos repentina Syncope correptos, in terram concidisse, exsoluto spiritu, vel compresso, ab irrumpente sanguine, Corde. Multa ex adverso commoda asserre potest, præsertim in humidioribus, & crasso sanguine scatentibus: etenim illum attenuando, & serositates, ac flatus discuti-

(a) V. etiam Terent. in Eunuchis.

tiendo, robur quodammodò excitat, & virilem animum efficit, ut propterea Galenus 3. de difficult. respirationis cap. 13., juxta doctrinam Hippocratis epidem. 2. sect. 4. doceat, prodesse nonnunquam irasci, excitandi gratia nativum calorem, præsertim in decoloratis, & frigidis. Notabile est, quòd refert Franciscus Valleriola in suis Observationibus, quendam jamdiu paralyti, ac membrorum contractione laborantem, repentè ferè ex ingenti Ira, constansuisse, quam data opera assidentes promoverant, prudenti Medici consilio.

Denique quòd spectat ad ejusdem Remedia. Corrigitur Ira nedum contrariis passionibus, præsertim Timore, verùm etiam victus ratione, sanguinis acritatem temperante. Quòd si prætereà talis, ac tanta sit, ut in Furorem vergat, tunc omni industria non solùm corrigendus sanguis erit, sed & ab ejuscemodi labe pariter repurgandus, quemadmodum in Mania. Fertur similiter plurimùm in his prodesse Musicam, cum plerique Ira perciti, furorem cantu, & harmonia temperarint: quippe Animi impetus suavi cantu demulcetur; cujus quidem Artis ope, peculiari quadam modulatione, in furorem adacti, coerciti plurimi referuntur.

Timor non infimum locum retinet inter Animi passiones, & licèt circa malum futurum versetur, illud tamen arduum, & difficile esse debet: cui scilicet vix resisti possit; spes tamen omninò extincta non sit, sed adsit, licèt exigua, imminens malum evitandi: quòd si inevitabile prorsus foret, non tam Timor, quàm Tristitia excitaretur. Hinc describitur Timor, *Motus Appetitus sensitivi ex affectione, quam imprimit malum imminens difficulter evitabile*. Ut autem ab eodem affectionis genere procedunt Spes, & Desperatio, ex bono absente arduo; ità Timor, & Audacia ab eodem pariter affectionis genere oriuntur, ex malo imminente arduo. At verò

arduum Malum intelligi debet hoc loco, quod non solùm difficulter vitari potest, sed quod magni alicujus momenti est: etenim si levissimum foret, Timorem non inferret; quamobrem sicuti Spes adhuc fertur in Bonum difficile, & seipsam elevat ad superandam obicis difficultatem; sic pariter ex adverso Metus circa malum se habet; cum ferè ab illo succumberet, nisi ab Audacia sublevaretur. Id autem evenit, quia in Timore sanguis quodammodò refrigeratur, & torpet, imò & Cor ipsum in suo motu plurimùm hebetatur, unde sensim deinde totum Corpus horrore corripitur, & pallore manifesto fœdatur. Quae de causa Timor describitur à Medicis: *Sanguinis refrigeratio, & vitalium spirituum conventus circa Cor, ob imminens aliquod periculum*: cumque modicus, & quasi spiritu depauperatus sit ille sanguis, qui in partes extimas excurrit, propterea fit etiam, ut cutis universa rigeat, ac palleat, & pulsus fiat parvus, & frequens. Quandoque etiam sudor exoritur frigidus, cum scilicet ob ingentem hujus passionis vim, serum è sanguine exprimitur, & effertur in cutim, compressæque glandulae subcutaneæ foras in sudorem illum extrudunt.

Ex hoc nunc patet, quanam sint incommoda, & detrimenta Timoris: is quippe sanguinem condensando, ad circuitum ineptum reddit, atque ob crassitiem, difficulter admodum capillares arteriolas, ac venulas pervadit; unde totius Corporis torpor, & ad tactum manifesta refrigeratio. Si verò repentinus sit, ac violentus, nedum Animi defectionem, & syncopen, verum etiam mortem inferre potest; quemadmodum deducitur ex Galeno 5. de locis affect. cap. 1. At verò plurima quoque ex illo proficiuntur emolumenta: & quidem fluidum plus justo, tenuem, & æstuantem sanguinem reprimit, quocirca ejus fluxui momento ferè mederi solet, cum illum sistat. Non rarò etiam febres quartanas

nās inveteratās sub ipso horroris initio fugavit: etenim incussio repentino, ac inopinato Timore, invertitur quodammodò universus sanguis, & fermentum febrile penitus pervertitur, ac immutatur, vel saltem obtunditur. Solvit quoque singultum, ea propemodùm ratione, qua cohibito spiritu, quicumque motus Septi transversi desinit, aut interrumpitur; indeque Ventrículus commovetur, & excutitur, atque à re eundem molestante liberatur; quare Singultus, Risus, atque etiam Tussis sistitur. Iram denique in furiosis temperat, si tamen is validus, vehemens, & subitaneus sit; aliter potius illam exasperaret.

Quod ad illius Remedia, partim ex contrariis passionibus, partim etiam ex rebus physicis illa petuntur. Ex contrariis passionibus quidem, excitata Audacia: hæc enim directè opponitur Timori; nā quemadmodum Timor sanguinem contrahit, & figit, Audacia ex opposito explicat, & dissolvit: in illo pulsus parvi, & languidi; in hac magni, elati, & vehementes: in illo pallor, tremor, frigus; in hac rubor, impetus, calor: in illo plantus, & ejulatus, animique demissio, in hac firma, & alta vox, atque elatum caput. Remedia verò physica sunt, primò victus ratio eorum, quæ calefaciendi, & sanguinem floridiorem reddendi, apta sunt; quamobrèm Vinum, ejusque spiritus, & quæcumque ex illo confici solent juvamento esse possunt; item omnia aromatica ex cinnamomo, pipere, caryophyllis: similiter ambra grisea, moschus, bezoinum, camphorā, atque ex his paratæ confectioes alchermes, hyacinthina, diambra, omne genus elixiris, & alia quæcumque, Cor, & vitale robur fortificantia, prosunt, & opitulantur.

Sicuti Timor est de malo imminenti, ita Spes est de bono futuro, cui contraria passio est Desperatio, quæ circa bonum

versatur, cujus tamen consequutio impossibilis creditur. Oritur autem Spes ex affectione, quam bonum absens, cum aliqua difficultate conjunctum, imprimit, & non aliter Nos commovet, quàm si arduum revera non foret: id enim intelligitur bonum, vel malum difficile, quod nonnisi difficulter obtineri, aut evitari possit; unde talis motus in Appetitu sensitivo, qui ex prædicta affectione oritur ergà bonum illud arduum, appellatur Spes: Desperatio verò ab opposito, cum per motum illum à boni prosecutione desistimus, veluti putati impossibilis consequutionis. At verò scire oportet, excitatam in Nobis affectionem hanc, respectu boni absentis, tripliciter posse considerari: vel enim refertur ad bonum simpliciter, vel ad illius absentiam, vel denique ad ejusdem difficultatem. Sub prima consideratione, excitatur Amor, qui versatur ergà bonum, ut tale. Sub secunda, excitatur Desiderium, quod dirigitur ad bonum absens. Sub tertia, exurgit Spes, quæ est ad bonum quidem, sed arduum, non tamen invincibile. Et quidem, ut Bonum est, Appetitum Sensitivum allicit: ut absens, laceffit, & provocat: ut difficile, deterret, sed cum credulitate, quòd tandem assequatur. Quòd si difficultas talis, ac tanta sit, vel saltem ita putetur, ut consequutionem desperet, loco Spei, Desperatio exorietur. Hac autem ratione, ferè semper cum Spe jungitur Audacia, per quam non omninò cessamus à Boni prosecutione, quamvis illud difficile Appetitui objiciatur; immò contranitimur difficultati, ut eam tandem superemus. Hinc modò sequitur, cur in Spe vultus appareat hilaris, sed cum aliqua Animi anxietudine, atque impatientia, & totum Corpus exinde commoveatur. In Desperatione verò langueat vultus, deprimantur oculi, & Corpus totum veluti immobile observetur, cum taciturnitate, & morositia.

stitia. Quare sicuti Desperationi totis viribus occurrendum, ne hæreat, cum plurima mala ab ea illicò exoriantur; ita omnis industria adhibenda est, ut Spes perenniter conservetur: est enim de genere earum rerum, quæ numquàm non profunt. Jure ergò finxit Ovidius 1. de Ponto, illam solummodò in terris nobiscum commorantem remansisse, cum cecinit:

*Hæc Dea, cum fugerent sceleratas
Numina terras,
In, Diis invisa, sola remansit humo,
&c.*

Porro per eam Animus sublevatur, & vires sustinentur, ne concidant.

Gaudium, seu Lætitia, quamvis à plerisque ad Rationalem Appetitum referatur, quia tamen adhuc in Appetitu Sensitivo, ad præsentiam objecti delectabilis, excitatur, idcirco, ut differentia aliqua inter utrumque statuatur, appellandam nonnulli propriè volunt Lætitiā, in Appetitu Sensitivo, Voluptatem; Gaudium verò in Appetitu Rationali; Delectatio autem sit utrique communis. Verum hæc sæpe sæpius à Philosophis, & à Medicis confunduntur. Definitur ab his, quod sit *Excessus quidam Concupiscibilis Appetitus, cum manifesta Cordis amplificatione*. A Moralibus verò quod sit *Motus quidam in Appetitu Sensitivo ex præsentia boni sensu percepti*. In utraque definitione Motus dicitur concupiscibilis Appetitus, nam reverà ad hunc pertinet, qui ad præsentiam boni commovetur, & quodammodò exultat: Voluptas enim, ac Delectatio non nisi de bono est, & non solum in sensu interno, sed etiam in externo manifestatur: quandoquidem cum gratum E. g. cibum gustamus nedum delectationem percipimus in ipso Appetitu concupiscibili, verum etiam in Organo Gustatus; quamobrem meritò dicitur, ex præsentia boni, sensu percepti; quia reverà sensus oblectatur circa gratam affectionem extrinsecus

habitam, & intrinsecus deinde impressam; unde etiam vellicationes, titillationes, atque internæ commotiones in sanguine, & partibus solidis percipiuntur, & specialius in Corde, ut patet ex pulsu magno, & elato, ob uberiores sanguinis appulsus. Sed & Septum quoque transversum subinde commovetur, atque amplificatur; quandoquidem facillimè consequitur inde Risus, & Thoracis amplitudo, simulque unà totum Corpus exultat, & roseo colore perfunditur.

Verum enim verò, quamvis tot beneficia afferat Gaudium, & Lætitia, non raro tamen modum excedens, Animum, & Mentem conturbat, imò sanguinem, & spiritus plurimum à Corde segregando, imbecillum, effæminatumque illum reddit, atque inducta virium jactura, exsolutoque spiritu, repente aliquando interitum attulit: ut præcæteris memorat Galenus 2. de caus. symptom. cap. 5. Qua etiam ratione accidit nonnullos immoderato Risu periisse; cujus mortis genere memorantur extincti Sophocles, Dionysius Tyrannus, & Diagoras Rhodius. Sed prodest ex adverso Mæstis, & Melancholicis, in quibus tamen metuenda adhuc est ejuscemodi repentina mutatio, cum interitus his facilius contingat, eo quod depressum Mæstia Cor, effoetusque sanguis, si per Gaudium repente diffletur, facillimè fatiscit, & emoritur. Cæterum si fortasse exigatur ingentis Gaudii remissio, putà, cum spiritus vitales dissipantur, & evanescunt, occurrendum leviter in frigidantibus, & incrassantibus simul, ac roborantibus, ut nimirum ab illis sanguis temperetur, & evolantes spiritus compescantur. Sed & cohibendus quoque erit ejusmodi affectus immoderatus contrariis passionibus, & præsertim si cum immodico, & effrænato risu jungatur, incusso aliquatenus Timore, objecta scilicet re, aliquantulum molesta, itemque repræ-

repræsentatis iis, quæ sensim ad Mœstítiam deducant. Verumtamen hæc non affatim sunt inducenda, ne subitam, ac violentam in Corde motionem penitus contrariam, & non minùs periculis vacuum, excitantia, Vitam in pejus adducant, aut de medio tollant.

Gaudio, & Lætitiæ directè opponitur Mœstítia, quæ *Animi affectus est, in quo desperato Gaudio, ob aliquod malum præsens, vel ut tale putatum, Animal mente, & corde dejicitur, adeòque dolentem, negligentem, sylvestremque vitam ducit.* Necessè est itaque, ut ex objecto malo sensibili, similis affectio Menti, & Cordi inferatur, ut exinde mala impressio universo etiam sanguini inducatur; qui propterea in suo motu retardatus, parumper concrescit, & crassus, terrestris, acidusque evadit. Hinc non solum in organis internis, verum etiam in externis, potissimum in facie, & oculis, ejusce mœroris affectio manifestatur; siquidem vultus livescit, oculi illacrymantur, & totum Corpus manifesto torpore corripitur; quin & Pulsus contrahuntur, ac debilitantur, fiuntque in mœrentibus tardi, rari, pusilli; quoniam sanguis hebescit in motu, & concrescit in crassi. Hæc eadem de causa, ob diuturnam mœstítiam, partes cunctæ Corporis marcorem incurrunt, corrugantur, frigescunt, cum vigilia, inappetentia, & non rarò etiam cum delirio melancholico. Unde patent damna Mœstítix, etenim pigrum, ineptumque hominem reddit, Cor atra fuligine opprimit, & si diù perseveraverit, insaniam parit, per quam societas, conversatio, & quodcumque valet Animum reficere, & exhilarare, molestiam afferunt. Potest tamen ex adverso aliquandò prodesse, si moderata sit, præsertim iis, qui ex immoderato gaudio corde afficiuntur, & in leipothymiam proclives sunt. Excedentem quoque transpirationem inhibet; quamobrè sudori immo-

dico opitulatur, ut & sanguini immoderanter fluenti. Id autem, quod à quibusdam fertur, sapientiozem Animum efficere, autoritate Aristotelis 3. *sect. problem. 1.*, verum omninò non est: etenim ad Sapientiam, Prudentiam, & Ingenium, exquiritur repurgatum, detersumque Cerebrum, unà cum sanguine tenui, florido, ac puro, multisque spiritibus referto: quæ omnia in Melancholicis, & Mœrentibus deficiunt. Atqui Aristoteles cum dixit: *In Republica administranda, in Carminibus pangendis, & in studiis Philosophiæ Melancholicos extitisse optimos*, non intellexit de Melancholicis ex atro, acidoque sanguine, sed solum in rebus agendis graves, seriò animadvertentes, profundèque cogitantes, quales referuntur atrabilarii potius, quàm reverà melancholici (a). Postremò quod attinet ad illius correctionem, commendantur Mœstis, & Melancholicis quæcumque vim habent repurgandi sanguinem à fœculenta terrestritate acida spiritus figente. Quare plurimum in id valet Aer lucidus, tenuis, purus, & apricus; cujus sanè beneficio plerique à diuturna mœstítia convaluere. Res pariter odoræ, gratèque olentes, optimæ sunt: aspectus quoque virentium arborum, deambulationes per loca amæniora, idque genus alia. Verumtamen oportebit ex adverso ea omnia simul unà remove, quæ occasionem mœrendi præbere, vel doloris causam memorare possunt. Quæ arte usâ fertur Græcorum Helena, cum Trojani excidii apud eos mentio fieret. Simul enim suum Nepenthes illis offerebat, & ad res láticas sermonem convertebat, ut Author est Homerus. Hinc Amicorum suavium societas, & musicis instrumentis excitata voluptas, summum remedium mœstis est. Attamen non ideò

cohi-

(a) Legatur Comment. nostr. super aph. 23. 6.

cohibendus eisdem est fletus, & ejulatus, quo plurimum Cor, & Cerebrum atro illo humore exonerantur, & Animus è tanta tristitia sublevatur. Sed cur lacrymæ tam facilè profiliant in moerentibus, quæ non rarò ex nimia lætitia adhuc in gaudentibus comparent? Ratio deducitur ex varia impressione ocularibus glandulis illata; quippe quæ constringuntur, ac exprimuntur propter dolorem in Mœstitia, & amplificantur plus justo in Gaudio: utroque autem modo fieri potest illacrymatio: glandulæ enim oculares, ubi aqueus liquor continetur, sunt instar spongiæ, quæ siue comprimantur, siue delaxentur, contentum liquorem emittunt. Denique ad Mœrorem valde confert somnus: is enim laxat fibras Cordis, Cerebri, & Nervorum, quæ ex dolore, & luctu erant corrugatæ, & contractæ; siquidem ex mœrore dolentes, plurimum conqueruntur de quadam Cordis compressione, & Thoracis angustia: quamquàm hæc ad Diaphragma potius pertineat, quod sicut in Gaudio nimium amplificatur, ita in Mœstitia constringitur; unde etiam Respiratio interrupta, Singultus, Suspiria. Si ergò Somnus Mœrori remedio est, planè quæ vim habent sopiendi, cujusmodi sunt ex opio concinnata, præsentanea auxilia erunt: ejusequidem virtutis dicitur fuisse Nepenthes illud Homericum, à quo suum Joseph Quercetanus, Hartmannus, aliique denominatum voluerunt. Verùm de hoc legi meretur noster Petrus la Seina *peculiari libello*, quem inscripsit, *Homeri Nepenthes*. Verumtamen ex Vino, & Cordis exhilaratio, & Mentis sopor, commodè inducitur ad Mœstitiam abigendam: quocircà in Sacris Literis summo per mœrentibus commendatur: *Date siceram mœrentibus, & Vinum his, qui amaro sunt Animo*.

Ex omnibus autem Animi passionibus dubitare nunc contingit, quæ nocentior,

& perniciosior censenda sit. Et quidem pro singulis sunt qui pugnant, cum omnes pro rata sua, & pro varia Corporum habitudine, gravia, & lethalia symptomata afferre valeant. At verò circumscripta quacunque morboſa, aut imbecilla Corporum constitutione, vel naturali propensione, & consideratis duntaxat Animi pathematibus secundum propriam uniuscujusque affectionem, quam humano Corpori inferre solent: dicendum, quòd vel difficultas proponitur de subito, ac repentino malo, vel de diuturno, fixo, ac propterea difficilius superabili. Si de primo genere malorum sermo sit, profectò efficaciores, periculosioresque erunt, summa, ac inopinata Lætitia, & vehemens, ac repentinus Timor. Si verò de secundo genere, erit Mœstitia, & radicans Amor. Ex Iratis enim, si credendum Galeno, 2. de *Sympt. Causis cap. 5.*, nemo mortuus est; utpotè quia nec calor vitalis in illis infringitur, nec robur virium dissolvitur, ut ipse subdit. Et quidem nemo interit nisi Cordis robore labefactato, quod in Ira potius acuitur, quàm dissolvatur; & licet per Iram portio aliqua sanguinis extenuetur, rareſcat, & exſolvatur, illa tamen modica est; crassa, & glutinosa verò, quæ abundantior, longè magis per Iram viviscit, & perficitur. Cum igitur in Ira non totus sanguis exſolvatur, neque Cordis motus deficiat, sed potius elatior fiat, proculdubio per ipsam neminem interire posse fatendum. Quòd si aliquot historici referant, quosdam ex Ira periisse, certè hi non ex Ira propriè, sed ex alio accidenti, puta extrema inedia, vigilia diuturna, febre, aliove simili, & ferè ex arbitrio, mortem subiere; aut etiam ex voluntaria respirationis cohibitione, quemadmodum fuit Barbarus ille servus relatus ab eodem Galeno 2. de *motu musculorum*, qui cohibita respiratione sibi mortem intulit: sed & nonnulli seipsos quoque ex Ira interfe-

Cerunt, gladio, ruina, veneno. De cæteris Passionibus res est manifesta, quòd ejuscemodi damna inferre nequeunt, quemadmodum ex superiùs traditis evidenter colligitur; exceptis Amore, Mœstitia, Gaudio, & Timore, à quibus Interitus sæpissimè accidit; eo tamen discrimine, quòd ab Amore, & Mœstitia ferrius, citius verò, immò aliquando repente, ex ingenti Gaudio, ac vehementi Timore ut etiam adnotavit Galenus 5. *de locis affect. cap. 1.*, cujus rationem idem attulit cit. 2. *de Symptom. caus. cap. 5.* Experimento pariter pluries constitit, eos, qui ex mœrore mortui sunt, nonnisi post diutinum tempus obiisse, extrema macie consumptos, & penitus tabefactos: quippe ex Amore perierunt (dummodò in furorem adacti sibi ipsis mortem non intulerint,) lenta febre, ac paulatim consumpti sunt.

Pro Praxi denique advertendum, quòd admonet Galenus *lib. de ludo parvæ pilæ*, nil magis conferre ad morbos omnes facile tolerandos, quàm hilari, ac speranti animo esse: cui inhærens Vallesius 1. *meth. cap. 15.* consulit, ut in qualibet ægritudine spem, & gaudium sibi languentes concilient: Plerique enim sunt, qui propter morbi formidinem adeò tristantur, ut illius conditionem longè deteriore redant: contra verò gaudentes, & sperantes, faciliùs morbum sufferunt, & abigunt, sublevata per Gaudium, & Spem Natura. At verò nec prætermittenda est ejusdem Vallesii in hanc eandem rem animadversio: interdum enim egri ob nimium gaudium, summamque spem, quam habent, putantes potissimum ægritudinem levem esse, suaque sponte desitutam, inobedientes, ac immorigerati evadunt, unde plurima in victus genere errata committunt, medicamenta deferunt, & Medico rectè præcipienti non obediunt, quàmobrè morbi causam foyent, & morbum

ipsum exasperant. (a) Ne igitur ejusmodi malè agendi occasio ægrotantibus præbeatur, debet prudens Medicus, vel timorem illis incutere, vel morbum quamvis levem, paulo graviores indicare, vel saltem sub aliquo dubio referre, ut exinde, prudentiores, & cautiores fiant. Verùm sicuti hoc pro temerariis ægris efficacissimum videtur documentum; ita timidus, & pusillanimibus; non rarò poterit esse perniciosum. Quare prudenter, & scitè Galenus 6. *epidem. comm. 2. t. 43.*; ità rem hanc distinctam ferendam voluit: *si ægrum non timidum esse cognoveris, vera ipsi dicere conaberis, nihil eorum, quæ in morbo futura sunt, subtrahens, neque dissimulans; at si timidum; omnia ex quibus ipse meliori animo futurus sit, dicito; neque tamen magnoperè mentiaris.* Hæc ille.

Quoniam verò præter antedicta, maxima quoque exquiratur in ægroto confidentia ergà Medicum, qua sibi promptiùs spem recuperandæ salutis conciliat, atque hæc ex forti Imaginativa promanat, ut propterea plerique Medicorum conati semper sint, illam impensius, quo fieri potuit, commovere; operæ pretium existimavi, hoc loco de Viribus ejusdem, quantum ad Medicum negotium facere videbitur, edisserere, ut exinde quisque sciat, quàm illa in Nobis valeat; proinde sit.

De Viribus Imaginatricis.

DE vi, atque efficacia Imaginatricis facultatis, multa equidem Authores varia, ac propemodum admiranda, literis tradidere, (b) cùm ipsa Radix sit cunctarum passionum in Appetitu sensiti-

vo

(a) Confer. etiam, quod idem inquit 4. *meth. c. 3.* & in 6. *epidem. 2. t. 36.*

(b) V. de Viribus Imag. Thom. Fien. qui ex aliis plurima in unum recollegit.

vo excitatarum, atque animalium operationum sentientis Animæ potior, ac principalior origo. Neque solum in operationibus sensitivis, & motivis, præcipua causa est, sed in vitales etiam, & naturales imperium exercet. Nos eapropter juxta earundem divisionem, quam Medici communiter recipiunt, Animalium, Vitalium, & Naturalium, vires illius prosequemur, selectiora dumtaxat recolligentes.

Et quidem primò in operibus Animalibus maximam vim exserit Imaginatrix; omnes etenim Operationes Animales tum sensitivæ, tum motivæ, ad unicam Imaginativam ipsis præpositam revocantur: sensitivæ quidem, quoniam *Æstimatio*, *Memoratio*, *sensus communis*, & quicumque alius *sensus internus*, re ipsa cum Imaginativa confunditur, aut ab ipsa regulatur, ut latè probatum supponimus ex physicis. *Sensus quoque externi*, ex communi omnium sententia, ab internis sensibus reguntur, atque adeò specialiter ab Imaginativa; unde *Aristoteles* putavit cunctis Animantibus duos tantum sensus esse necessarios, *Externum unum*, putà *Tactum*; *Internum alterum*, nempe *Imaginatricem*: reliquos verò, sicut in plerisque deficiunt, sic ad vitam sustinendam necessarios non esse jure optimo est arbitratus. Motivæ verò operationes, quoniam in musculis, aut per musculos fiunt, planè ab Imaginatrice diriguntur, atque illius ductu, ac regimine peraguntur.

Atque hinc modò est, quòd in ægitudinibus Capitis, in quibus *sensus interni* imminuuntur, vel abolentur, *Apoplexia*, *Caro*, *Lethargo*, *Comate*, sola semper vigeat Imaginatrix, nec unquam deficiat, etsi functiones reliquæ lædantur, nisi tantum cum Animalis interitu; quamobrem depravari dumtaxat potest, ut in Deliriis, nequaquam verò penitus aboleri, ac extinguì, vita superstitè. In somno pariter

Naturali, licèt *sensus omnes* consopiantur, atque in suis operibus feriantur, sola tamen Imaginatrix vigilat, quemadmodum patet in *Insomniis*, in quibus nedum operationes Animales internæ peraguntur, verum etiam nonnunquam externæ, cum dormientes jactemus crura, brachia, totumque corpus commoveamus; sintque non pauci, qui obloquantur, rideant, plorent, ambulent, ut in somnambulis palam est.

In eisdem quoque operationibus internis mira videtur esse hujus Imaginativæ potestas; etenim ob simulacra, tam hærenter eidem infixæ, plerique fuerunt, qui se vitreos existimarint: alii *Naso*, *Capite*, cæterisque membris diminutos: alii se pro *Regibus*, aut *Principibus* habuere: alii se alatos esse; alii se versos in *Angelos*, in *Dèos*. Contra alii, sibi hostes insidiari: alii noluerunt *edere*, *bibere*, *respirare*, *mingere*, ut innumeris exemplis testantur Authores.

In Operibus similiter Vitalibus vim suam non levem Imaginatrix exercet, cum *Respiratio*, & *Pulsus* plurimum immutentur, & variant pro ejusdem affectione varia; sicut in *Delirantibus*, *Melancholicis*, *Ecstaticis*, aliisque est experiri; ut præteream hinc, quæ hætenus de Animi pathematibus est memoratum, in *Corde*, & *sanguine* perturbatis. Hac eadem de causa accidit, *febres* ex vehementi Animi commotione excitari, præsertim ex *Ira*, & *Amore*; vel contra ex repentino *Timore* desinere. Sic etiam *Risus*, *Singultus*, *Oscitatio*, statim desinunt, commota ab objecto inopinato Imaginativa.

In Operibus denique Naturalibus, quàm valeat Imaginatrix, cunctis notum: Nam & *fames*, & *chylicatio*, ac *foecum egestio*, atque *urinæ expulsio*, aliæque naturales operationes vitiantur ad ejusdem Imaginatricis perturbationem. Nonnullis sola *pharmaci purgantis imaginatio* ne,

ne, apprehensioneque, alvi dejectio promota est; aliis vomitus repente concitatus, ab aspectu rei nauseam moventis, vel etiam ab olfactu malè olentis objecti; aliis, tristis alicujus rei apprehensio, totius Corporis horrorem incussit. Sed admirabilius sanè, quòd in partibus generationi destinatis, ex Imaginatione, apprehensioneque delictabilis objecti, contingit, ut etiam noctu, atque in profundo somno, propter insomnia turpia, & obscæna, semen effundatur; quamobrèm fit, ut ferè communiter credatur, plurimùm Imaginativam in foetuum generatione còcurrere; indeque maculatos infantes oriri, diversis stigmatibus affectos, pro rerum, in concubitu, & formatione foetus, apprehensarum, aut concupitarum, varietate.

Morbos quoque Imaginatrix vehemens inferre potest, ut etiam, & remove. Sic plurimi ex forti imaginatione, qua se malè habere arbitrati sunt, in pessimas ægritudines inciderunt. Contrà alii à gravibus ægritudinibus evasere per imagines, manuscriptas chartulas, simulacra, periapta, signacula, quibus fisci, tam potenter Imaginatrici illorum efficaciam impressere, ut seipsos certò inde sanandos crederent, & reipsa sanati sint. Atque hinc plurimi Circulatores ridiculis planè carminibus gravissimas ægritudines profligarunt: unde Paracellus tot amuleta, ac periapta excogitavit; itemque characteres, sigillaria, & numismata descripsit, ad Imaginativam scilicet commovendam, & sublevandam, per quam ingenti spe excitata, Natura morborum causas vinceret, ac debellaret. Hinc etiam Transplantationes morborum in saxa, fluvios, arbores, aliaque insensilia, originem traxere, quæque Arcana, & Secreta dicuntur, à plurimis Authoribus recollecta.

Neque solùm plerique statuunt, Imaginativam vires suas in iisdem Corporibus, in quibus viget, exserere; sed etiam in

alios quoque transferre, ac transfundere posse addunt; cùm asserant inveniri quasdam Hominum species, quales creduntur sub certa Astrorum configuratione geniti, qui morbos in alios inferant, aut excitent: cujus sententiæ faciunt Avicennam, ejusque Interpretes Foroliviensem, Gentilem, Petrum Aponensem, aliosque, qui plurima illatarum exinde ægritudinum exempla congestere ad perniciem usque, sola Phantasie efficacitate. Sic etiam nonnulli alii testantur posse ex adverso, ejusdem activitate, morbos quoscumque sanari; ut de Domitiano Suetonius scribit. Pariter fatentur alii Phantasie vehementis vi, atque imperio, ferocia adhuc animalia compesci, Serpentes avocari, illosque innoxie tractari, & alia planè admirabilia peragi. Ad hanc quoque classem referunt vim Fascini, & Incantationis, qua existimant ab Imaginatricis Virtutis præcellentia unius, alterius Phantasiam veluti inferiorem, ac quodammodò subordinatam, turbari, atque tam violenter commoveri, ut exinde operationes cunctæ lædantur, ac vitientur. Verùm hæc vana omninò sunt, & commentitia. (a) Qua verò ratione contingant, mox clariùs aperiemus, ubi tamen priùs aliqua de Fascino, & Incantamento, paulo altiùs edisseruerimus.

De Fascino, & Incantamento.

INter ea, quæ Naturæ Arcana dicuntur, atque in abditis Philosophiæ penetralibus sunt recondita, Fascinum, & Incantamentum à plerisque collocatur, cùm nedùm de ejus Natura, controversiæ plurimæ, & variæ, à Doctoribus motæ sint, verùm etiam de illius Etymologia, ac significatione, non leviter insuper contendatur. Et

(a) *V. Andr. Libav. in Osvald. Croll. Mag.*

Et quidem Nonnulli cum Martino DelRio *lib. 3. disquis. Magic. quæst. 4. sect. 1.* Fascinum, seu Fascinium existimant Græconymum esse, idem significans, ac Invidentiam apud Latinos: quique in hac re sequuntur Cælium Calcagninum *opusculo de Calumnia*, & Franciscum Vallesium *lib. de Sacra Philosophia cap. 68.* putantes, idcirco invidentiam significare, quia vis fasciandi oculis potissimum inest, ut etiam vulgus opinatur: quin ipsa vox *Invideo*, si Ciceroni credendum, nimium videre sonat; nam qui invidet, nunquam oculos ab eo, cui invidet, removet. Hinc D. Augustinus, relatus ab eodem DelRio *cit. loco*, exponens illud *Deuteronomii cap. 28. Invidebit Fratri suo*, vertit, *fascinabit fratri suo*. At verò Zacutus Lusitanus *lib. 3. Histor. Principum Medicor. qu. 31.* à Fascē, vel Fascia, dictum putat Fascinum, & Fascinium, quia ligat, & quasi fasciat, quem læsit: juxtā quam expositionem, nonnulli apud Lazarum Guttierium *opuscul. de Fascino dub. 1.* Fascinum describunt, quoddam Incantationis genus esse, quo homines itā ligantur, ut liberi non sint, nec suæ mentis compotes. Alii verò, ut refert Daniel Sennertus *Tom. 4. lib. 6. p. 9. cap. 1.*, ut & Zacutus suprā memoratus, Fascinii nomen à fando deductum arbitrantur, eo quòd opinentur, verbis, laudatione, & incantatione Fascinum inferri; quin alii, hac ratione moti, potiùs à verbo Facio, ejus originem desumunt, cùm effascinatores Malefici sint, & perniciem moliantur, ut præ cæteris existimat Nicolaus Perotus *in Cornucop. Martial. epigramm. 2.* Denique nonnulli alii ob id Fascinum nuncupatum volunt, quòd Infantibus potissimum, utpotè mollioribus, ac tenerioribus, in cunis jacentibus, & fasciis obstrictis, noceat.

Sed neque solum in Nominis derivatione tam dubii sunt Authores, verum etiam in ejusdem Natura, ac Definitione; liqui-

dem non omnes illud uniformiter vel describunt, vel admittunt; ut proinde ausim dicere, eximios cæteroqui Philosophos, cùm de aliis rebus accuratissimè disseruerint, Fascinationis tamen Naturam hactenus, parum, vel nihil attigerint, & nullatenus sint assequuti. Verumtamen istud inde accidisse crediderim, quia non omnes conveniunt sit ne Fascinum quidpiam fabulosum, vel dæmoniacum, an verò quid Physicum, & Naturale, & nonnihil etiam cum contagione conjunctum: quare quilibet pro suo arbitratu Fascinationis Naturam descriptam voluit.

Primum autem ex Theologis plerique, super Expositione *cap. 3. Epist. D. Pauli ad Galatas*, (a) Fascinum describunt, esse *Sensuum ludificationem*; siquidem magicis illusionibus per ipsum homines decipiuntur. Alii cum Vairo *lib. 2. de Fascino, cap. ult.* illud inquiunt esse *perniciosam qualitatem, diabolica arte illatam, ob tacitum, vel expressum hominum pactum*: quam etiam definitionem tradit, & recipit Martinus Delrius *super alleg. loco*. Alii, ut refert Sennertus *supra cit. loco*, Fascinum faciunt, *Incantationis genus, quo intuitu, & laudatione, homines, bruta, imò etiam plantæ ipsæ contabescunt, & emoriuntur*. Zacutus prætereà Lusitanus suprā relatus, est, inquit, *Fascinatio, perniciofa quædam qualitas propter odium, vel amorem inflicta*. Sed & Vallesius *cit. lib. de Sacra Philosophia cap. 68.* quia qui benè valent, & deinde agrotant, vel venusti deformes fiunt, fascinati dicuntur, inquit, *Effascinatores esse, qui nimium acutè intuendo, ipsos lædunt, idcirco videtur esse, subdit, Fascinatio, læsio oculis illata, & concepta, profecta ex qua-*
S 2 dam

(a) V. Card. de Vio Cajet. super illud: O insensati Galatæ, quis vos effascinavit, &c.

dam affectione Animi ejus, qui intuetur: quapropter rationem aliquam pulchri, aut expetibilis esse oportet in eo, quod fascinetur, & malignitatis in Fascinatore. At verò Jo: Lazarus Guttierus opusc. de Fascino dubio 3. definit illud esse *Venenum invidio animo illatum, & vel visu immissum, vel verbis ejaculatum*. Addunt alii coelestem influxum, unde Fascinum latius hunc in modum describunt, ut refert Vairus cit. lib. 1. de Fascino cap. 2. *Perniciosa quaedam qualitas, visu, tactu, voce, conjunctim, vel divisim, sub certa Cæli constitutione adhibita, propter Odium, vel Amorem inflicta*. Restrictius verò Sanctacrucius lib. 1. de Morb. & Symptom. cap. 4. Fascinum describit, *Affectum ab oculis videntibus rei visæ communicatum, & in aliqua prava qualitate fundatum*. Denique Jo: Langius Epistol. medic. lib. 2. epist. 36. Fascinum existimat, læsionem quandam esse ob effluvium malorum vaporum venientium ex Corpore venenato, unde Fascinationem ait esse: *Vaporis virulentiam è Corpore noxia, natura ab aliis dissidente: seu defluxum, quo aliorum Corporis habitus, & spiritus, per visum, contactum, invidiam, ob vocis, & maledicæ lingue virulentiam, per vaporis halitum conspurcati*.

Tanta autem in his varietas orta videtur, ut dictum, ex eo, quia non apud omnes æquè constat, an Fascinum sit quid Naturale, an Dæmoniacum, & num etiam Fabulosum potius, ac mente confictum. Etenim nonnulli sunt, qui putant fascinandi vim à Nativitate quibusdam Corporibus inesse, adeòque dari Fascinatores à Natura: cujus opinionis præcipuus est Zacutus Lusitanus. Alii verò existimant solum hoc à Dæmonibus excitari, proindèque rem, omninò Dæmoniacam Fascinationem arbitrantur: hominibus verò inferri per Magiam, & Incantationem, mediante pacto implicito, vel explicito,

cum Cacodæmone. Immò Martinus Delrius disquis. Magic. lib. 3. quest. 4. sect. 1. addit, ejusmodi genus hominum ab ipso Dæmone, speciali quodam stigmate obfignari, Canis, Equi, aut alterius Animalis; vel etiam duplici pupilla, in alterutro oculorum, à cæteris contradistingui: etsi Plinius scribat lib. 7. cap. 2. hos naturaliter ità signatos nasci; quemadmodum Ovidius 1. Amor. eleg. 8. sub persona Licæ Aniculæ Incantatricis memorat. Atque hinc fortasse factum, cur apud Veteres, ad arcendum Fascinum, inventa fuerint Carmina, (seu Versus quidam) in Nuptiis dici solita, & Fescennina appellata, quæ primùm scripsisse, atque in usum duxisse ferunt, Pompejum Festum.

Verùm enim verò quærendum primò est, an reverà Fascinum detur, ex quo Morbi inferri possint: Nam non desunt, qui id penitus inficientur; quamvis plurimi alii sint, qui id affirmant, imò & visu, & voce, & laudatione, præter contactum, & contrectationem, ægrotudines infligi posse contendunt: & primùm de visu afferunt illud Virgilii:

Nescio quis teneros oculus mihi fascinat Agnos.

Adduntque Plinii Authoritatem lib. 7. cap. 2. attestantis in Illyriis inveniri, qui visu effascinent, (a) eosque à cæteris internosci, quòd binas pupillas in unoquoque oculo habeant; unde Ovidius describens Aniculam illam Incantatricem, dixit: (b)

Suspikor, & fama est, oculis quoque pupula duplex

Fulminat, & geminum lumen ab orbe venit.

Quinimò vulgus putat, non solum ab Invidis, Iratis, & Inimicis, sed à quibuscum -

(a) V. etiam A. Gellium lib. 9. cap. 4.

(b) cit. eleg. 8. 1. Amor.

cumque etiam familiaribus, adhuc Amicis, Infantes potissimum posse effascinari; adeout Plutarchus 5. *sympos. qu. 7.* mulieres admoneat, ne diutius Infantes suos ab ejusmodi hominibus inspectari sinant.

De voce etiam, & laudatione adjiciunt, ex eodem Virgilio *Ecloga 7.*

*Aut si ultrà placitum laudarint, bac-
care frontem*

*Cingite, ne vati noceat mala lingua
futuro.*

Idemque testatum à Plinio *lib. 7. cap. 2.* qui scribit in Aphrica integras reperiri familias effascinantium, verbis, & laudatione; unde prodiit, quod vulgò adversus eos, qui nimium laudant, inclament: *Benedicat Deus: (a)*

Postremò contactu idem fieri posse fatentur, ex eodem Plinio *cit. loco*, qui testatur in Æthiopia esse quosdam, quorum sudor contactu noceat, & effascinet: confirmatque Codronchius *de Morbis veneficis lib. 2. cap. 3.* Atqui solo etiam halitu fatetur Plutarchus ex Philarcho *c. 5. sympos. qu. 7.* Thibiorum spiritu, & sermone affectos contabuisse, & ægrotasse, itemque interno odio dumtaxat: quapropter Horatius: *Odio obscuro, morsuque venenat.*

Hiscæ Authoritatibus adjiciunt Rationes. Inquiunt enim ex his generibus hominum vapores, & halitus tam infensos emitti, ut adstantes, præsertim pueros, quorum carnes tenerrimæ, facilè inficiant: qua ratione subdunt, menstruantes fœminas, effluviis malignorum halituum, ex oculis erumpentium, lucidissima specula inficere, lippientibus oculis affectos pari ægritudine, adstantes conta-

minare. Afferunt quoque exemplum de Basilisco, qui visu inficit, & enecat; ac de Lupis, de quibus Virgilius cecinit: *Lupi Moerim videre priores*; eo quòd si primi hominem inspiciant, raucum faciant, pro contactu verò, & contrectatione palam est apud omnes, menstrui sanguinis effluxu, tactas virentes arbores arcieri, abortum prægnantibus inferri, & rabiem Canibus, per ejusdem contactum, aut linctum.

Addunt quoque experimenta, desumpta ex pluribus observationibus Medicorum, qui fatentur se multa genera ægritudinum per fascinum, & incantationem illata, observasse. Sic fatetur Langius *lib. 1. epist. 38.*, vidisse quendam diu acerbissimis doloribus ex fascino cruciatum, qui deinde, ejecto cultro per cutim ex uno hypochondriorum latere, se ipsum occiderit: aperto autem cadavere, inventa in ejus ventriculo fuere diversa fœrramenta, ad formam ferræ, vel cultri, unà cum variis capillorum globulis. Fœminas alias memorat Alexander Benedictus *l. 7. suæ Praxis*, ejecisse acum crinalem cum capillis. Alii plures eodem ferme modo doloribus agitati referuntur, res propemodum extraneas egressisse, ut ex Foresto, Codronchio, Benivenio, C. Gemma, cæterisque fusè colligit Sennertus *c. l. 6. p. 9. c. 3.* Sed & quibusdam suppressam fuisse urinam; aliis carnalem copulam, atque coeundi usum impeditum; aliis excitatum continuò vomitum; aliis Tabem inductam; aliis iteratas synco-
pas, & cætera graviora mala; quæ ad interitum miseros ægrotantes tandem deduxerint, vel saltem nulla arte curabiles.

Attamen ex adverso Jo: Vviersus *De Præstigiis Dæmonum lib. 3. cap. 14.*, in dubium hæc omnia vertit, immò acriter contendit, ab ejusmodi fascinationibus Morbos infligi non posse: quæ verò

(a) De magicis exantationibus plura etiam vide apud Balthas. Bonifac. *ludic. histor. lib. 14. cap. 9. & 10.*

à præcitatiss DD. referuntur, vel omnino fabulosa putat, vel Dæmonum fraude, ac dolo, patrata, potissimum ubi Corpora melancholico humore fuerint affecta: in his enim facilius ejusmodi simulacra malorum imprimuntur, & fortius phantasia perturbatur; unde postmodum diversæ ægritudines, & viscerum affectiones exoriuntur. Sed & præterea subdit, (a) mera esse figmenta, quæ de Lamiis passim recensentur, neque eisdem esse credendum, etsi ore proprio fateantur se aliò à Dæmonibus transferri, ac inter convivas versari, varia, ac diversa videre, aut tractare: etenim se certis experimentis cautum factum confitentur, quòd Lamiæ istæ somno profundo per quasdam inunctiones diutius detentæ, à Dæmone illudantur, objectis Phantasiæ simulacris eorum, quæ se tractasse, vidisse, & perlustrasse ajunt, cum tamen loco motæ nullatenus sint. Refert in hanc rem ex Codronchio, & Porta, historiam cujusdam Vetulæ, quæ pollicita erat se brevi responsa aliundè allaturam, idque ut faceret, jussisse omnes è suo cubiculo egredi, mox vestibulis exutam, unguento quodam se vehementer perfricuisse, & in soporem profundum concidisse, ita ut nullimodè sentiret, adhuc verberata; at verò ubi medicamenti vis desisset, è somno experrecta, multa, se vidisse narravit; maria, montesque transmeasse; cum tamen re ipsa constaret, illam alto sopore detentam intra suum cubiculum jacuisse, adstantibus interea ipsis, quibus sponderat se brevi responsa daturam, rei eventum opperientibus. Hinc concludit, Lamiarum facinora nulla esse, illarumque confessiones vanas, & commentitias, atque solo Phantasiæ errore dumtaxat induci, ut credant, se talia peragere, quæ re-

verà non sunt, sed per somnia dumtaxat à malo Dæmone eisdem objecta: cumque scemina credulæ nimium sint, proinde fieri, ut tenaciter existiment, quæ per somnium illis acciderunt, reverà perpetrasse. In hanc eandem sententiam concesserunt Alciatus, Duarenus, Ærodius, Michael Montanus, Philippus Camerarius, alique plures, apud Delrium *lib. 2. disquis. magicar. qu. 16.* His etiam adde Jo: Baptistam Porta *lib. 2. Magiæ Naturalis cap. 26.* & Leonardum Vairum *lib. 2. de Fascino cap. 13.* At longè gravius est, quod assertur à Gratiano *in caput 12. caus. 26. quæst. 5.* his verbis: *Illud enim non est omittendum, quod quædam sceleratæ mulieres, retrò post Satanam conversæ, Dæmonum illusionibus, & phantasmatibus seductæ, credunt, & profitentur se nocturnis horis cum Diana Dea Paganorum, vel cum Herodiade, & innumera multitudine mulierum, equitare super quasdam bestias, & multarum terrarum spatia in tempeste noctis silentio pertransire, &c.* Quare cum ab his non levis famæ Doctoribus asseratur illud potius à Cacodæmone mulieres inter dormiendum pati, non abs re concludit Vviersus, illas esse potius melius informandas, atque præjudiciis exuendas, quàm ex ejusmodi confessionibus castigandas. Quòd autem valeat Dæmon illas decipere, ac illudere, facile probatur ex eo, quòd benè is possit inter insomnia, atque in profundo sopore, obicere Phantasiæ simulacra illarum rerum, quæ sibi velle prospicere præconciipiunt; sicut enim naturaliter cunctis accidit, solere in somno diversis phantasmatibus affici, seque putare videre, tractare, audire, alloqui, tantà verisimilitudine, ut plerumque complacentiæ, aut displicentiæ non leves suboriantur; ità planè, & multo melius accidere potest, si diabolica sagacitate, atque malitia, phantasiæ repræsententur simulacra rerum, cum

tan-

(a) *lib. de Lamiis.*

tanta claritate, at putent somniantes, re ipsa se talia vidisse, gustasse, audisse, & contrectasse: nil quippe Dæmoni deest, quod fraude, ac dolo perficere nequeat, intra limites Naturæ, ut omnes communiter fatentur: permittente tamen Deo.

Ad conciliandas autem oppositas istiusmodi sententias, distinguere oportebit, quod vel sermo est de Fascino, visu, voce, laudatione, & simplici contactu illato, ut superius ex mente quorundam memoratum, & hoc profectò nullum est, nullumque esse potest in Natura. Vel de eo, quod Dæmonum opificio peragi potest, Deo tamen permittente, & hoc sine ulla difficultate inferri potest; verum tamen per magisteria, & venena naturalia, quibus Dæmon ipse utitur, tanquam rerum naturalium omnium optimè instructus, commovendo, perturbando, & inficiendo humores Corporis, sive, ut communiter dicitur, applicando activa passivis: quamvis, & id rarissimum esse soleat, cum non semper eidem à Deo id agere permittatur.

Et quidem in prima Fascini, & Incantamenti significatione, nemo sanæ mentis unquam affirmabit, posse Corpora infici, aut ægritudines infligi, visu, aut voce, cum effectus reales, quales sunt læsiones operationum, & affectiones morbosæ partium, neutiquam possint absque alicujus Corporis malè affecti contactu, aut contagione, ex uno in alium transferri. Et quamvis per visum aliqui morbi inferri credantur, uti est lippitudo oculorum: isti tamen non ex visu, sed ex palpebrarum affectarum contagione, atque halitibus inde profluentibus, communicari possunt, pari modo, ac de cæteris affectibus contagiosis experimur. Fascinum autem solo visu inferri dicitur, citrà quamcumque apparentem in oculis fascinantium ægritudinem, quæ etsi foret, neque posset in tam distans transferri,

quemadmodum de Fascino vulgò traditur. Quod verò dicitur de Basilisco, de Lupis, aliisque Animalibus, fabulosum est: adhuc tamen si vera forent, quæ de eisdem memorantur, potiùs ingenti, inopinatoque timore, evenire posse dicendum: quoniam ex timore inopinato, subito, ac vehementi, superius dictum est, plurimùm Corpora affici posse: atque hac propemodum ratione dictum à Virgilio, Lupos raucedinem inferre; siquidem ex vehementi Timore vox faucibus hæere solet, & ferè Aphonii fiunt perterrefacti. Et licèt Serpentes, ac præsertim Cerastes, & Aspis, cum coitum affectant, in intuentes hianti admodum ore pestiferos quosdam halitus ad certam distantiam ejaculentur, & oculos intuentium inficiant, & offuscent: id tamen nil commune habet cum Fascino. De voce autem, & verbis res est manifestissima, quod nil reverà naturaliter agant, cum voces semel emissæ statim dispereant. (a) Quod insuper à Virgilio fertur, Serpentes incantationibus ligari, cum inquit.

*Frigidus in pratis cantando rumpitur
Anguis.*

Poeticè dictum puta, ut & de Incantamento Amatorio: nisi tamen ista dæmoniacum opus involvant, de quo infra: Tactus denique licèt possit quasdam ægritudines inferre, ut in scabiosis, reverà tamen illæ nunquam communicabuntur, nisi priùs fuerint in ipso inficiente; unde lepra E. g. non communicabitur nisi a leproso, & lepra infecto; & scabies non nisi ab eo, qui scabie antè infectus sit: at verò effascinatores dicuntur inferre morbos ex Fascino, quos ipsi non patiuntur, nec antè contraxerant. Accedit, quod ea genera Venenorum, quæ in quibus-

S 4

bus-

(a) V. Bonifac. Ludicræ hist. l. 14. cap. 9. & seq.

busdam animalibus sunt, & citrà sui noxam aliis inferuntur, ut in Vipera, Scorpio, & similibus, debent cum sanguine commisceri, & in arterias, ac venas immitti, ut inficiant, ac enecent, nam si fortasse superficietenùs tantùm admoveantur, imò etiam si sorbeantur, nil damni afferunt. Igitur nulla ratione defendi potest quòd effascinantes per contactum aliquid venenosum in Corpus effascinari inferant, aut immittant, ut exinde ægritudo suboriat, & non rarò lethalis. Verùm tamen si tenellos infantes ad manus habeant, poterunt in commissuris ossium eos luxare, & aliter, aliterve extorquere: id quod sanè quicumque malignus homo, citrà Dæmonis operam, agere poterit, si voluerit, in illa tenera ætate.

Quod verò pertinet ad Fascinum ope Dæmonum inflictum, quamvis negari nequeat, id reverà inferri posse, Deitamen permissu; nihilominùs fatendum hoc tantummodò posse à Dæmonibus peragi, usu, ac maleficio rerum naturalium. Cum enim ipsi sciant quid unicuique conducibile, aut contrà perniciosum esse possit, si profectò adhibeant, quæ nocua sunt, quæque agitant, perturbant, inficiuntque humores, vel viscerum actiones depravant, nedum oberunt, sed etiam gravissimas, & quandoq; mortiferas ægritudines excitabunt: qua ratione fieri consuevit, ut sanguinem in acidum, & melancholicum succum permutent, unde postmodum pessimæ, & diuturnæ ægritudines exoriuntur. Sic planè, verisimile est egisse in Job, permissu Dei, quem diversis generibus ægritudinum diu afflictatum legimus in sacris literis. Neque verò necesse semper est, adhibitis intrinsecùs venenis, ægritudines promovere, cum satis quoque esse possit, si illa exterius Dæmon admoveat, & per poros cutis immittat, si per inspirationem impediat, si ti-

morem vehementem incutiat, si excrementa retardet, si humores concitet, ac perturbet, si in intemperantiam alliciat, si in sex rerum nonnaturalium errata hominem inducat, & Phantasiæ, ac Appetitus sensitivi commotione suadeat, ut sponte sua quis delinquat, & à salubritate decedat. Porrò solent non rarò hæc omnia patrare Dæmones ex pacto cum Sagis inito, ut ex testimonio gravissimorum Doctorum constat; quamvis & iidem sæpèpiùs illas tantummodò edoceant, quid agere debeant, ut morbos excitent, aut infausi eventus in rebus agendis illis accidant. Verumtamen hæc rarissimè contingunt, & non nisi permittente Deo.

Sed nec exinde inficiabimur, posse etiam non rarò variis illusionibus Dæmones decipere, persuadentes se gravia mala patrare, quæ reverà nulla sint, si dumtaxat credulitatem, & firmam, fixamque in phantasia opinionem imprimant, ejusmodi damna evenisse, quæ re ipsa nulla fuerint. Sic etiam multoties, cùm præcognoscant aliquem ex malo humorum apparatu intrà breve tempus ægrotaturum, possunt Sagis persuadere, se jam ingentia mala adversus illum, quem ipsæ volunt effascinatam, præparare, cùm tamen morbi illi sint naturaliter eventuri. Eodem fermè modo consueverunt infausos eventus præsagire, non solum singularibus personis, sed etiam integræ Regioni, Provinciæ, Civitati, fortè quia norunt id naturaliter, ex certa serie causarum, superventurum. Ità quoque prædicunt non rarò futuras tempestates, Terræmotus, Caritates, Serenitates, Ventos, Pluvias, quæ cæteroqui naturaliter contingunt. At verò opera merè voluntaria, non nisi ex conjecturis solum, ab inclinationibus hominum deductis, proferre possunt; ut cum de bello, insidiis, litibus, rixis, homicidiis, furtis, aliisque præsagiunt: Quo ergo pacto, plerisque

in

in ejusmodi prænotionibus illudunt, ita in cæteris operibus humanis, & multò magis si naturalia illa sint, decipere possunt.

Solent etiam sæpenumerò per spectra multa damna inferre: puta cum ante oculos objiciunt idola, effigies, species, ac simulacra rerum, terrorem inferentium sive noctu, sive interdiu, potissimum in locis opacis, & tenebrosis, specubus, sylvis, montibus, aliisque; unde postmodum exoriuntur repentinæ in humoribus commotiones, atque adeò febres, aliæque ægritudines, vitæ periculum involventes.

Verum quamvis hæc ope Dæmonum incuti possint, & aliquando in Praxi sint observata præter ea, quæ in re ipsa obsessis fiunt; non semper tamen putandum difficiles curatu ægritudines per Fascinum inferri, ut vulgò creditur: sæpè enim evenit morbos reddi insanabiles, vel ex ignorance causarum, & partium affectarum, vel ex ignorantia remediorum, illis conferentium. Et licet pleræque ægritudines à Sagis ipsis illatæ credantur & Fascini, aut Incantamenti maleficio, referantur ab iisdem inflictæ, & adhuc si se ipsas opifices attestentur, non tamen illis credendum; cum sæpissimè accidat ipsas primum fuisse deceptas, mox etiam alios, & alios falsos esse: Equidem pluries constitit tam Effascinatores, quàm effascinatos falsa credulitate, atque fraudolenti impostura circumventos, fuisse delusos; & sub hac credulitate Dæmonis imperio subiectos, in ægritudines incidisse, ob turbatam ex Phantasia Corporis Oeconomiam; unde se reverà per fascinum læsos existiment, & eò magis, quò cum vehementi ista imaginatione in Mœstitiam, ac Timorem delapsi, evadunt melancholici. Hoc autem pacto fit, cur etiam Hypochondriaci, & qui habitu præditi sunt tristi, & melancholico, quales dicuntur

Saturnini, cogitabundi, timidi, suspiciosi, & similes, facile ejuscemodi ærumnas incurrant: itemque fœminæ, idiotæ, populares homines, aliæque hujus generis personæ. Sunt & alii, qui aliis ex causis ægrotantes, quia ab incongrua, & importuna diversorum medicamentorum farragine curati non fuere, statim de Fascino suspicantur, cum tamen morbi illi naturaliter evenerint, & convenienti methodo tractati curabiles fuerint.

At cum dictum sit, posse Dæmones per Sagas diversimodè morbos excitare, vel saltem futuros, & imminentes prælagere solere; quæri ex adverso potest, an valeant sanitatem amissam restituere, & morbos sive per se ipsos, sive naturaliter inductos, tollere. Et quidem affirmativè dicendum: etenim qua ratione morbos inferre valent, poterunt & illos abigere, & egros in salutem revocare, applicando activa passivis; idque sive sensibiliter, & patenter per medicamenta, cunctis cognita, sive insensibiliter, & occultè, aliena opera, atque industria: humores scilicet commotos, ac depravatos, temperando, aut repurgando. Nil equidem profectò obstat, quin id, quod Homines auxilio Artis, & Naturæ, sæpissimè peragunt, queant etiam Dæmones persolvere, & multò meliùs. In quam rem plurima ab Autoribus exempla referuntur à gravissimis ægritudinibus sanatorum. Verum & in hoc sæpesapiùs Dæmones deludunt, iisdemque ferè modis, quibus superiùs meminimus; ut non rarò observatum in vulneribus, ulceribus, luxationibus, quæ revera sanata non erant, licet adstantium oculis curata viderentur.

Sed adhuc curiosiùs quæri potest, an Dæmones possint Seni juventutem restituere, omnemq; morbum tollere adhuc Deo permittente. Et quamvis multi gravissimi DD. affirmativam sententiam tue-

antur, moti ex eo, quod licet nobis ignotus sit modus recuperandi humidum, quod vocant, radicale, vitæque sustentamentum, per ætates deperditum, bene tamen Dæmoni is notissimus est. Mihi tamen nunquam persuadere potui, quo pacto id Dæmon; (sed nec Bonus Angelus) peragere valeat; quippe hac ratione posset hominem reddere immortalem; nam quo pacto, quæve virtute, posset semel senectutem in juventutem revocare, & omnem morbum tollere, posset, & bis, ter, decies, centies, acjugiter, perpetuòque perficere, atque adeò vitam hominis perpetuare: quod impossibile. At vita nostra suis limitibus conclusa est, cum unicuique constituti sint termini, quos transilire, nisi tantum supernaturaliter, ac speciali Dei favore, non licet. Dæmones autem nulla ratione possunt Naturæ vires transcendere; ut antea dictum est.

Sed tamen potest Dæmon absque ullo cibo, ad certum tempus, hominem conservare, adeoque efficere, ut is inediam diutius sufferat. Etenim si id naturaliter plerisque accidit, ut absque cibo ad plures dies vixerint, negari profecto non debet, multò melius id ipsum præstare posse Dæmones. Sive autem id agant, impediendo sanguinis dissolutionem, sive contrahendo succos ventriculi digestivos; sive subministrando aliquid occultè, quod retundat illorum vim, & causæ consumptivæ efficaciam, parùm refert hinc examinare. Dixi tamen, ad certum tempus; nam cum sanguis iteratis suis circuitionibus vitali elatere destituitur, necessariò instauratione eget, ut vitam in motu Cordis tueatur; nisi etiam & in hoc Dæmones innumerabilibus suis illusionibus imponant.

Sed qua ratione Dæmon potest absque cibo, & potu, in longius tempus vitam hominis conservare, pari ratione valeat,

cibum adeò exquisitum comparare, quo quis seipsum diutissimè ab ærumnis mortalibus tueri queat? Et dicendum nullimodè posse alimentum adeò perfectum naturaliter confici, etiam Dæmonum virtute, quod valeat vitam diutissimè sustinere, atque in perpetuum protrahere. Et ratio est, quia non potest Dæmon agere, quod Naturæ vires transcendat; quod si semel Dæmon id agere posset, non esset cur idiplum pluries, ac pluries perficere nequiret, atque adeò immortalem hominem non redderet, qui cum cæteroqui ab intrinseco mortalis sit, nequit proinde viribus Naturæ ita perfectè restaurari, ut ad interitum tandem non sit desiturus. Quod autem dicitur de Aquila, de Phœnice, de Serpentibus, aliisque per intervalla reflorescentibus; reverà hæc non juvenescunt, nec in perpetuum vivunt, sed solum, assumpto novo alimento vigorantur, & vires, limitatas tamen, resumunt, quæ tandem aliquando desinent. Sic de Aquila scribit Ulysses Aldrovandus *lib. 1. de Avibus*, etiam ex testimonio D. Augustini. De Phœnice verò, omninò fabulosum à peritioribus existimatur, quod reviviscat. Serpentes denique exutis dumtaxat vetustis exuviis, atque resumpto alimento, per aliquod tempus vigescunt, & instaurantur, neutiquam verò in perpetuum vivunt.

At major difficultas est de fructu ligni vitalis Terrestris Paradisi. Siquidem de eo Sacra Genesis habet, quod polluerit vi revocandi homines perpetuò ad juventutem, atque adeò vitæ perpetuitatem tribuendi. Scribitur enim *Geneseos 3. Nunc ergo, ne forte manum suam mittat, & sumat etiam de ligno Vitæ, & comedat, & vivat in æternum*. Ex quibus verbis videtur manifestè deduci, habuisse Pomum illud vim restaurandi vitam, ac propterea illam in perpetuum ducendi. Quin & Vallesius super hoc textu, *lib. de Sacra Philosophia ad mentem Galeni lib. de marcore cap. 3.*, referen-

ferentis Sophistam quendam Ægyptium retulisse Naturalis Mortis causam, non ad Naturæ necessitatem, sed ad ignorantiam agendorum; subdit: si enim homines fructum Ligni Vitalis, vel aliud quid simile non ignorarent, jugiter profectò instaurati perpetuarentur, & in æternum viverent. Verùm acutissimus Scotus 2. *sent. distinct.* 19. *qu. 1.* nullum adhuc putat excogitari posse alimentum, quod id exactissimè peragat; quia nullum alimentum potest in substantiam aliti converti, quin prius in ventriculo non transmutetur, atque adeò agat, & patiatur, & in ejusmodi actione, & passione, pro rata sua alteret, & perturbet Corpus assumentis. Addit insuper idem Author, quòd prædictum Pomum Ligni Vitalis non erat virtutis infinitæ, ex qua infinitus effectus proficisci posset, qualis est vitæ perpetuitas; quamobrè nec ipsum potuisset vitam hominis in æternum protrahere. Quamquàm ad hoc respondeat D. Thomas 1. *part. qu. 97. Art. ult.*, quod id non fecisset Pomum illud unica comestione, sed aliis, & aliis iteratò, prout fuisset opus. Attamen per adjecta verba Geneseos: *Nefortè sumat etiam de Ligno Vitæ; & comedat, & vivat in æternum:* Unica comestio videtur fuisse satis; nisi verò id longævitatē diuturniorem, non veram æternitatem significet. Sed & Lignum Vitæ diversum dicitur ibidem à ligno scientiæ boni, & mali, adeoque aliud à vetito: nam *cap. 2.* duplex lignum memoratur, Lignum Vitæ unum, & Lignum Scientiæ boni, & mali alterum, quod Adæ fuit interdictum. Sed hæc ad Theologos.

At verò qui consideraverit fuisse adhuc in Adamo illas easdem causas nostrę consumptionis, & mortalitatis, quæ in unoquoque homine reperiuntur, procul dubio asserere cogetur, illum suapte natura mortalem ab intrinseco extitisse; fuisse tamen redditum solummodò immortalem, speciali Privilegio, ac dono Dei Opt. Max.,

si præceptum sibi indictum transgressus non fuisset, adeoque in Originale peccatum non incidisset. Quare primi illi Parentes conditi fuerunt cum dono immortalitatis, ea tamen conditione, ac lege, ut si peccarent, donum illud amitterent, quod ex mera Dei liberalitate concedebatur; ideoque relictī in Natura, naturalem moriendi necessitatem incurrerent. Atque hinc etiam patet, quamobrè Apostolus dicat: *per peccatum Mors intravit in Mundum*, quia per peccatum Adæ fuit amissum donum illud immortalitatis. Id quod clariùs liquet ex eo, quia si intra vires Naturæ fuisset alimentum, vel medicamentum valens vitam hominis perpetuare, certè Adam, qui post peccatum, cuncta, quæ in Natura erant, benè etiam novit, nec deinceps amisit, ex scientia sibi infusa, potuisset pariter seipsum perpetuare, & alios posterorē edocere, quo pacto vitam in æternum prorogarent. Cùm igitur id nec novit, nec egerit, profectò dicendum, extrà limites Naturæ illius perpetuitatem fuisse, & non nisi supernaturaliter, ex speciali Dei beneficio. Legi quoque de hac re meretur Helmontius, licet aliter eam examinet, & enucleet.

Verùm unde est, quòd nequeat id naturaliter peragi, atque ex indicto Naturæ ad interitum quodcumque vivens, velit, nolit, festinet? Dux equidem rationes, ex multis, quas retulere DD., mihi semper visæ sunt congruentiores. Altera afferitur ab Avicenna: altera à Vallesio. Inquit Avicenna: Virtutes omnes, quibus homo regitur, & gubernatur, finitæ sunt; ergo tandem is dissolvetur; nam quod finitum est, terminum habet. Subdit Vallesius: Causæ Corpus humanum Consumentes celeriores in agendo sunt Restaurantibus; ergò istæ ab illis tandem præoccupabuntur. Quòd autem Causæ consumentes (sivè externæ, sive internæ illæ dicantur) sint celeriores in agendo, patet; nam simplici

plici alteratione dissolvunt, & consumunt; at verò Restaurantes tot, tantisque præparationibus, & coctionibus egent, ut antequam istæ sint elaboratæ, jam plurima facta sit Corporis consumptio; quippe multum temporis exquiratur ad chylicationem, multum quoque ad secretionem inutilium partium ab utilibus, atque ad harum distributionem longè majus; itemque ad oppositionem, nutritionem, ac repurgationem excrementorum: quare, ubi istæ operationes expletæ sint, & substantia deperdita restaurata fuerit, jam longè major, & celerior consumptio facta est, ut consideranti patet.

Sed jam redeamus in viam. Quoniam superius dictum est, Morbos quosdam à Dæmonibus, maleficio Sagarum, infligi posse, Deo tamen permittente, non abs re propterea erit signa breviter hic tradere, quibus à reliquis ægritudinibus, naturaliter evenientibus, internosci queant, licet perrarum sit, (si fortasse accidant,) quin Medicos adhuc solertes nō decipiant. Et quidem id specialiùs perpetuò præ oculis habendum, ut quidquid videtur ordinem consuetum naturalium Causarum invertere, aut confundere, suspicionem maleficii inferat: etsi enim Dæmones intravires Naturæ dumtaxat operentur, solent tamen ordinem, & methodum naturalium Causarum rarò prosequi, eo fortassis fine, ut magis decipiant, & in errorem agendi homines deducant. Solent etiam sæpè Causas morborum adeò perturbare, ut effectus pariant differentes, complicatos, ac inter se invicem discordes, quibus humana solertia Medici occurrere cū fatagunt, magis prævertant, agitent, & confundant. Sed & quandoque obsistunt medicamentis naturaliter agentibus, atque hoc dolo Medicos, & Assistentes fallere adnituntur, qui cū non videant effectus convenienter sortiri, ut aliàs consueverant, facilè in opposita delabuntur,

& à recta Methodo deviantes, potiùs efficiunt, quàm proficiant. Hinc autem inductus est usus, & quidem salutaris, apud plerosque, benedicendi, atque exorcizandi, quæcumque ægrotantibus exhibentur, ne scilicet illorum vis à Dæmone impediatur, aut retundatur. His igitur, aliisque modis, cū benè possit Dæmon morborum causas fovere, aut illarum ablationem impedire, proinde, quoties à consueto operandi modo, tam Morbi, quàm Causæ morbosæ, nec non etiam medicamenta deflectunt, magnoperè de maleficio verendum. Prætereà licet Dæmon vires Naturæ transcendere nequeat, potest tamen vim, atque illius energiam elevare, ut quodammodo videatur Naturam ipsam excedere, ac superare: quemadmodum enim possunt Homines, artificiali industria, agentia naturalia in suis viribus exacuere; sic & Dæmones idipsum peragere valent: Ità quidem spiritus, essentiæ, olea, salia, ex mistis corporibus elicita potentiùs, ac efficacius agunt, & longè admodum prævalentiora fiunt, quàm ipsa, mista, & impura. Itaque si hæc humano artificio peragi possunt, procul dubio efficacius, ac præcellentius à Dæmonibus persolventur, ac propterea vires Naturæ quodammodo elevabunt; quæ cū Nobis ignotæ sint, videbuntur excellere, & supra Naturam operari. Modi insuper agendi naturalium Causarum nobis occulti plerumque sunt, at Dæmonibus notissimi; unde facilè fit, ut credantur effectus inde provenientes, præpollere Naturæ, & ipsius agendi modum excedere; sicuti aliquando compertum in curationibus vulnerum, nullo medicamento vulneratæ parti patenter admoto.

Cū igitur morbi accidunt ità in suis causis, & effectibus, seu symptomatibus diffformes, ut peritos etiam Medicos in illorum cognitione dubios reddant, planè dubitandum quàm maximè erit de Maleficio.

ficio. Sic etiam si symptomata dissidentanea sint, aut de momento in momentum nunc levia, nunc gravia fiant, nunc exacerben-
tur, & ingravescant, nunc ex adverso
mitescant, & remittantur, sine ulla evi-
denti causa: Si cum morbus pusillus appa-
reat, symptomata graviter molestant,
præsertim de genere vigiliarum, delirio-
rum, dolorum, &c. Si brevi tempore æ-
ger in marcorem deducatur, sine ulla ma-
nifesta evacuatione, aliave conspicua cau-
sa consumente, aut absque signis ejusce-
modi extenuationes comitari, aut præire
solitis: si æger in quibusdam motibus, aut
operationibus impotens observetur, citrà
manifestam ejus partis affectionem, putà
cum legere non potest, etiamsi mente be-
nè constet; non deglutire, licèt fauces
non ægrotent: non concubere, etiamsi
nulla ægritudine in genitalibus afficiatur,
ut non rarò compertum in conjugatis: si
sapiùs animo deficiat, & pulsus non mu-
tentur: si tremor, ac timor repentè inva-
dens, pluries repetat, sine quocumque
animi pathemate, aut nervorum, & ce-
rebri læsionè: si ægritudines chronicæ ad-
modum fiant, & procedente tempore non
ingravescant, aut in vitæ discrimen agrum
adducant, nullisque remediis cedere vi-
deantur, velut ex dolore capitis diuturno,
aut etiam stomachi, observatum: quo-
circa & per philtia, & per pocula amato-
ria, nonnulli ad extremum tabefacti refe-
runtur, atque tam amore cruciati, ut so-
lam Amasiam deperirent. Alia innumera
exempla, ab Authoribus memorata ejusce-
modi ægritudinum, maleficio illatarum,
prætermitto, quæ sanè peritissimis etiam
Medicis fuere admirationi. Quare cautum
omninò Medicum esse oportet, ne in his
fallatur, aut fallat.

Si ergo de morbis ex maleficio illatis
probabiliter timeatur, omnis diligentia
adhibenda, ut quo citiùs fieri possit adi-
mantur. Ad quod assequendum, tria ab

Authoribus generaliora proponuntur,
Magicum unum, Naturale alterum, Ter-
tium Supernaturale, & Divinum; quam-
obrèm hìc breviter videndum, quo licitè
quis uti possit. Et quidem de Divino,
ac Supernaturali nulla potest esse difficul-
tas; quin & hoc summis, iteratisque pre-
cibus à Deo Optimo Maximo jugiter ex-
petendum; nam si, ut superiùs dictum
est, nil queat Dæmon adversus homines
moliri sine Dei permissione, procul dubio,
quotiescumque Deus misericors abnuerit,
ac supremo suo imperio aliter præceperit,
Dæmones, atque illorum opera malefi-
ca, illicò recedent. Itaque orationibus,
exorcismis, Sanctorum Reliquiis, & quod
maximum, Sacramentorum auxilio adver-
sus talem, ac tantum hostem, continen-
ter dimicandum.

Difficultas autem est de Magica Cura-
tione, an illa utiliceat, ut nimirum iis-
dem mediis, quibus morbi inducti fuere,
feliciter arceantur. Et quamvis Paracel-
sus *libro de occulta Philosophia*, doceat,
id licitè exequi posse, instructis in hunc
finem certis Imaginibus, ac Simulacris;
nihilominus impium à cæteris id existima-
tur, cum nulla ratione liceat cum Dæmo-
nibus, sive immediatè, sive mediantibus
idolis, ac characteribus, commercium
habere, quemadmodum ex pluribus Sa-
cræ Scripturæ locis expressè etiam deduci-
tur. Sed neque à Magis, Sagisque, aut a-
liis similis conditionis hominibus id ipsum
expetere decet; quamquàm videatur hoc
à plerisque commendatum: cum id, quod
à Sagis exquiritur, reverà à Dæmonibus
expetatur, etenim quod Sagæ operantur,
per Dæmones agunt, vel potiùs Dæmones
operantur Sagarum precationibus. Ne-
que in hoc satisfacit protestatio, ut benè
advertit Sennertus, nam protestatio ista
erit dictum contrarium factò: atque ob
hanc eandem rationem existimat idem Au-
thor, nec cogendos, aut aliter ad ejus-
modi

modi sanationem, maleficiique remotio-
nem impellendos esse Magos. Neque præ-
tereà inquirere licebit maleficia ipsa, ut
inventae deleantur, & comburantur; quo-
niam, inquit, inquisitio hæc fieri non pot-
est absque notitia à Dæmonibus habita:
modò interdicitur quoque petere consi-
lium à Dæmonibus. Verùm de hac re
Theologi consulantur, & legantur præ-
cæteris Martinus Delrius, Petrus Thy-
ræus, Codronchius, & Sennertus, qui la-
tè materiam hanc exagitant, & exponunt:
Nobis autem satis sit hæc innuisse.

Quod ad Curationem denique Natura-
lem; quamvis plurimùm apud Auctores
controvertatur, num reverà ista in Male-
ficiatis possit adhiberi; quia tamen, ut
superiùs dictum, Morbi, qui putantur à
Dæmonibus inflicti, naturaliter plerum-
que contingunt; proinde hos ope, & au-
xilio Naturæ, ac naturalium medicamen-
torum, benè curari posse credendum. Re-
ctè ergo distinguit hac in re Sennertus, tri-
plex genus morborum, qui pro veneficis
habentur. Primum eorum, qui naturali-
ter contingunt, & solùm attribuuntur ma-
leficio, ac Maleficis, quia à Dæmone
fraudulenter sunt prælagiti. Secundum
eorum, qui à Dæmonibus excitantur, sed
per causas naturales, valentes humores
corporum immutare, ac depravare. Ter-
tium denique eorum, qui absque ulla o-
pera naturalium causarum immediatè à
Dæmone creduntur infligi. Modò, exce-
pto hoc ultimo, cætera genera morborum
benè poterunt medicamentorum auxilio
curari, & aboleri. Verùm tamen, cùm
& Nos superiùs probaverimus, plerum-
que etiam Dæmones illudere, neque ex
se quidquam agere posse, nisi per causas
naturales diversimodè complicatas, pro-
fectò dicendum, ut qua ratione, permit-
tente solùm Deo, Dæmones humana Cor-
pora affligere possunt, ità quoque, per-
mittente eodem, poterunt morbi à Dæmo-

nibus illati convenienter curari, acceden-
te tamen unà simul auxilio supernaturali,
quod repellat Dæmones, ne retardent,
aut impedian actiones medicamentorum,
aliorumque agentium naturalium: quam-
obrè, ut antea notatum, semper prode-
rit medicamenta ipsa ægrotis offerenda, be-
nedictionibus, exorcismis, aliisque præ-
cibus, & auxiliis supernaturalibus fovere.
Attamen oportebit priùs morbum, mor-
bique causam esse cognitam, adversus
quam medicamenti opportunis oppugnan-
dum sit; nam satis non est, remedia quæ-
cumque benedicere, nisi simul conferen-
tia illa sint, & ad morbum, morbique
causam debellandam efficaciter facientia.

Et quidem, si morbi naturaliter sint
progeniti, nil vetat, quin benè, & per-
fectè sanari possint remediis purè naturali-
bus. Si prætereà sint inducti à Dæmoni-
bus, sed sola perturbatione humorum, a-
liarumque causarum naturalium: quia et-
iam istæ viribus Naturæ sedari possunt,
atque in statum naturalem reduci, procul
dubio nulla alia opera exigitur, quàm ut
exacta cognitione earundem causarum,
debitis, & convenientibus medicamenti
corrigantur; impedita intereà Dæmonis
opera, ne activitati remediorum obicem
ponat: quo pacto plurimi sanati referun-
tur à Martino Rulandò, Codronchio,
Jonstono, Henrico ab Heers, aliisque.
In ejusmodi autem Curatione, ea Metho-
dus servanda videtur, quam unusquisque
morbus, pro sui ratione, videbitur expo-
stulare, quamquàm humori melancholico
repurgando specialius sit incumbendum,
cùm plerumque eo Dæmones utantur ad
morbos inferendos, vel conservandos.
Sed & Alexipharmaca quoque semper
proderunt, qualia sunt Hypericum, Ru-
ta, Verbena, Herba Paris, Artemisia,
Abrotanum, Aristolochia longa, & ro-
tunda, Hyssopus, Salvia, Betonica,
Rosmarinus, Citrium, & similia. His
adji-

adficere optimum erit , tum Capitalia , tum Cardiacæ , eo quòd Cerebrum , & Cor præ cæteris soleant in Maleficiis languere ; unde confectio de Hyacinthis , Alchermes , Diambra , Diaplrif , Julep Vitale , Elixir vitæ , Syrupi exhilarantes dicti , de pomis Regis Saporis , Diamargariton utrumque , Antidotus magna Matthioli , & oleum de Scorpionibus ejusdem , summopere conferent . Unguenta denique , suffumigia , lituræ , idque genus alia extrinsecus admota , ex thure , galbano , castoreo , styrace , bezoino , cæterisque , pro varia ægrotantium habitudine , peti poterunt à præcitatæ Authoribus , qui fusiùs de hac re volumina compilarunt .

Pro Coronide tandem , non abs re erit , quæ ad præfervationem à maleficiis commendantur , hic breviter etiam commemorare . Ethnici id præstare posse commenti sunt , Rhamnum , & Alyssum , de quibus Dioscorides scribit , quòd præ foribus domuum appensa , maleficia arceant . Plinius lignum Palmæ præfert , ut & Corium frontis Hyenæ , ac pellem Lupi , ejusque oculos . Alii efferunt cornu Capri . Alii jecur Lupi assatum , ac suffumigatum . Alii commendant Coralium rubrum . Alii Vespertilionem arefactum . Quintus Serenus , Allium . Aristoteles *sect. 20. problem. 34.* Rutam , inquit , effascinationis pharmacum esse : & Theocritus , in sinum inspui , cùm ait : Ne

verò ledar fascino , ter ipse in gremium meum inspui . Labia , & frontem aceto , aut saliva , aut etiam cinere , fuligine , vel fale , linire , putatum aliis salutare : quo fortasse respexit Persius , cùm Satyra secunda cecinit :

Ecce Avia , aut metuens Divum Matertera cunis

Exemit puerum , frontemque , atque uda labella

Infami digito , & lustralibus ante salivis

Expiat , urentes oculos inhibere perita .

Alii alia . (a) Sed hæc vana sunt , & apud vulgus falsò , fortè etiam diabolica fraude , injecta . Id autem certum omnino erit , soli Deo in cunctis fidere , atque eidem unicè se precibus commendare ; nec non specialiter alicui particulari ex Sanctis Patrono sui tutelam committere , potissimum tutelari Angelo , quem sibi in custodiam datum certò scit , itemque Michaeli , & Raphaeli Archangelo , qui dicitur Medicina Dei . Reliquiæ Sanctorum desuper gestatæ efficacissimæ etiam sunt , ut & Cereæ imagines , nuncupatæ A GNUS DEI , à Summis Pontificibus quotannis benedictæ , ac fidelibus distributæ ; si tamen pia devotione recolantur . Verùm præcellit omnibus Gratia Dei : Nam (Apostolus inquit (b) *si Deus pro nobis , quis contrà nos ?* Et de His satis .

A. M. D. G.

*Conatus omnis irritus ,
Quem non Deus adjuverit .*

(a) V. etiam librum Galeno adscriptum de Incantatione . Adjuratione , & Suspensione , ubi multa in hanc rem referuntur , præter citatos Authores .

(b) ad Rom. 7.

INDEX

RERUM NOTABILIVM.

A

- A** Abscessus, & Apostematis discrimen. 186. 187
- Accidentis, & Symptomatis diversa acceptio. 28
- Actiones abolitæ, diminutæ, & depravatæ; quomodo signa sint salubritatis, vel insalubritatis. 29. 30
- Ægrotantium corporum signa. 104. 113
- Ægrotudinis futuræ signa. 109
- Ægrotantium decubitus. 246
- Αἰὼρ quid. 30
- Aer quot modis alterari possit. 117. 121
- Aeris in tota substantia alteratio quid importet apud Gal. 121. 122
- Aeris natura expenditur. 121
- Aeris natura à primis qualitatibus non pendet. 122
- Aeris humiditas virtualis, figmentum. ibid.
- Aer temperatus ad saluberrimum corporis statum maximè facit. 118. 124
- Aeris temperati indicia. 125
- Aeris intemperiem detegentia instrumenta. ibid.
- Aeris natura perperam à primis qualitatibus desumitur. 208
- Aeris natura in quo verè consistat. ibid.
- Aeris constitutio naturalis quibus mutari possit. 209
- Aeris differentia. ibid.
- Aeris usus. 210
- Aeris salubrior constitutio quæ. 211
- Aer siccus humido præstat. ibid.
- Aeris pro varia corporum natura selectus. 212
- Aeris mutatio an & quando liceat. 214
- Aer quo pacto corrigendus. 216
- Αἷμα quid. 41. 42
- Alimentum quid. 218. V. Cibus.
- Alimenti triplex acceptio ex Hippocrate. 219
- Alterationis in febribus nomine concoctio venit secundum Galenum. 138
- Amantium pulsus. 264
- Amoris natura. 263. 264
- Amoris commoda. 264
- Amoris remedia. 265
- Amuleta an in morbis prodesse possint. 138
- Amuleta ad maleficia vitanda. 287
- Analeptice Medicinæ pars quæ. 115
- Analeptices præcepta. 205
- Analytica methodus quæ. 6
- Anamnesticæ signa quænam. 25. 26
- Anastomotica medicamenta quæ. 169. 177. 178. 179.
- Anatomia incruenta, quæ industria à Bilsio instituta. 154
- Aneurismatis duplici ligatura curatio. 155
- Animi mores quo sensu dicantur Temperamentum corporis denotare. 73
- Animi pathemata ad causas naturales, an ad nonnaturales, referenda sint. 120
- Animi pathemata corpus variè alterare possunt. 117. 123
- Animi pathematum recta institutio. 125
- Animi passionum vis. 257
- Animi passionum natura, & origo. 257. 259
- Animi passionum definitio. 260
- Animi passionibus triplici concurrente causa excitantur. 261
- Animi passionibus excitantur etiam habita ratio-

- ratione corporis texture. 261
Animi passionum differentia juxta Stoicos. 262
Animi passionum differentia juxta Peripateticos. ibid.
*Animi passionum differentia juxta Cicero-
nem.* 263
*Animi passiones ad Amorem, & Odium
omnes reducuntur secundum aliorum o-
pinionem.* ibid.
*Animi passionum differentia juxta Autho-
ris sententiam.* ibid.
Animi passionum quanam nocentior. 271
*Animi passio quanam ad morbos omnes
conferat.* 272
Antecedens causa quæ per Galenum. 133
Aperientia medicamenta. 170
*Apoplectici quomodo absque respiratione
ad aliquod tempus vivere credantur.* 97. 98.
*Apospasma, seu Avulsio in quonam dif-
ferat à solutione continui.* 148
Apostasis quid. 250
Apostema. V. Tumor.
Appetitus sensitivus Passionum animi fons. 259
*Appetitus sensitivus in Concupiscibilem,
& Irascibilem dividitur.* 260
Aquæ natura à frigore non pendet. 122
Aqua pura an nutritioni apta. 222
Aquæ potus commoda. ibid.
Aqua quæ pro potu eligenda. 223
*Aquarum Thermalium differentia, & vi-
res.* ibid.
Aquæ potus quibus in morbis conveniat. 226
Aquæ usus an sanis conferat. 227
*Arteria in vulnere secta quibus remediis
occludatur.* 159
Asperæ Arteriæ cum Testibus consensus. 101
Asperæ Arteriæ læsæ signa. 108
Asperitatis, & Lævitatis morbi. 187
Atheroma quid. 198
Attractio in medicamentis nulla est. 178
Audacia Cordis calorem significat. 66. 67

Tom. V.

B

- Balsama Vulneraria varia.* 149
*Balsami ad vulnera simplicia effica-
cissimi descriptio.* ibid.
*Biliosus vomitus quomodo in homine pitui-
toso fieri possit.* 104
Bolus in inflammationibus. 189

C

- Cacoethica ulcera, quæ, & quibus tra-
ctanda.* 165
Calculus. V. Lapis.
Calor in nobis nonnisi à sanguine. 51
Calvitii causa. 49. 52.
Calvitium siccitatem cerebri denotat. 55
Camphoræ præstantia. 217
Cancros occultos curare non expedit. 199
Canitiei causa. 60
*Capilli cerebri constitutionem designare pos-
sunt.* 46. 50
Capillorum crispitudo unde. 49
*Capillorum cita ab ortu succretio calidum
cerebrum significat.* 50. 52
Capillorum coloris causæ. ibid.
*Capilli recti, ac rufi frigidum cerebrum si-
gnificant.* 54
*Capitis dispositio cerebri constitutionem si-
gnificat.* 34
*Capitis magnitudo, parvitas, & figura,
quid significet.* 35. 36
Caput magnum unde. 36
Capitis figura naturalis quæ. 35. 36
Caput magnum, an parvum melius. 37.
38
*Capitis varia conformatio quid ex Physio-
gnomia denotet.* 38. 39. 40
Capitis vulnera cum rima, & sede teli. 159
*Caro in vulneribus succrescens quibus me-
dicamentis tollenda.* 155
Carnis an panis pejor repletio. 234
*Cartesii de Glandula pineali opinio non o-
mnibus arridet.* 258

T

Cata-

- Cataplasma ad Oedema.* 198
Catarrhi frequentes frigidum arguunt cerebrum. 54
Causa Salubris, Insalubris, & Neutra.
7. 8. Ejusque differentia. 9. 10
Causæ Procatarticae à Galeno examinatae.
 115
Causæ Conservantes, Curativæ, Præservativæ, & Reficientes. *ibid.*
Causæ Conservatrices, & Effectrices examinantur. 116
Causæ Conservatrices tot sunt, quot sunt modi, quibus corpus alterari potest. 116.
 118
Causæ necessariò, & non necessariò alterantes, quæ. 117. 118
Causæ nonnaturales cur dicantur à Galeno conservatrices. 119
Causæ Naturales, Nonnaturales, & Præternaturales. *ibid.*
Causæ salubres corpora conservantes, quæ.
 126. 128
Cerebri constitutionis signa. 33. 38. 41
Cerebri substantia subtilis quid importet apud Galenum. 43
Cerebri bona temperatura quanam, ejusque signa. 46
Cerebri calidi signa. 50
Cerebri frigidi signa. 54
Cerebri sicci signa. 55
Cerebri humidi signa. 56
Cerebri calidi, & sicci signa. *ibid.*
Cerebri calidi, & humidi signa. 57
Cerebri frigidi, & sicci signa. 58
Cerebri frigidi, & humidi signa. 60
Cerebri læsi signa. 105
Calybeatis medicamentis quomodo alvi fluxus curari possit. 172
Chorda. V. Tendo.
Cibi aromatici calidum cerebrum lædunt.
 52. 53. & contra. 54
Cibi solidiores cur à quibusdam promptius digerantur. 89
Ciborum assumptorum commoda, & incommoda. 117. 122
Cibus in accessione à Galeno exhibitus ad vires reparandas. 144
Ciborum immodica assumptio quomodo curari debeat. 169. 178
Cibi, & potus recta administratio. 218
Cibus propriè quid. *ibid.*
Ciborum variæ differentia. 219
Cibus Plenus, Mediocris, & Tenuis, hujusque subdifferentia. *ibid.*
Ciborum usus in sanis. 228
Cibi ordine sunt assumendi. 229
Ciborum assumendorum tempus. *ibid.*
Cibus quoties in die sumendus. 230
Cibus qualis, & quo tempore ægrotantibus exhibendus. 231
Cibus quo tempore febricitantibus exhibendus. 232
Cibus quandoque in paroxysmis exhiberi potest. *ibid.*
Ciborum digestio motu melius an quiete peragatur. 240
Cicatrices delentia medicamenta. 223
Clysterii usus unde Medicis innotuit. 141
Clysterii usus an recipiendus. *ibid.*
Clysteribus an ventriculus, & superiora intestina exonerari possint. *ibid.*
Clysteribus quomodo possint humores febrem foventes educi. *ibid.*
Coitum parvam Epilepsiam vocabat Democritus. 121. V. *Venereorum usus.*
Colorum natura examinatur. 47
Colores ex primis qualitatibus non pendent. *ibid.*
Colores à lumine variè reflexo, & refractio oriuntur. *ibid.*
Colores perperam dividuntur in Reales, & Apparentes. 48
Colorum diversitas distinctè explicatur. *ibid.*
Commemorativa signa. V. Anamnestica.
Compositiva methodus quæ. 6. 7
Compositio partium organicarum variari potest in conformatione, magnitudine, numero, & situ. 130. 131
Concoctio in febribus dicitur Alteratio à Galeno. 139

Concupiscibilis Appetitus quid. 261
Conformationis depravatæ variet species. 169
Conservantium causarum usus. 126
Conservativa sutura quæ. 149
Continui solutionis vitia. 132
Continui solutio in parte carnosâ quomodo curanda. 145
Continui solutionis curatio in partibus organicis impossibilis, in similaribus non semper possibilis. *ibid.*
Continui solutio an partibus omnibus competat. 147
Continui solutio in quo differat ab avulsione. 148
Continui solutionis unio solius Naturæ opus est. 145. 150
Contrariorum ope fit reductio. 120. 129.
Et quomodo. 130
Contraria secundum potentiam, & secundum imaginationem. 136
Contusiones cum vulneribus conjunctæ quibus medicamentis tractandæ. 156
Contusiones ulceribus junctæ quibus curandæ. 165
Convalescentia corpora ad quamnam neutrorum differentiam sint reducenda. 23
Convalescentes quomodo tractandi. 205
Convulsionis causa ex Hippocrate manitio, & repletio, quibus Galenus addit humorem acrem, & ingens frigus. 161
Cordis temperiei in genere signa. 65
Cordis calidi signa. 66
Cordis frigidi signa. 68
Cordis sicci signa. 61
Cordis humidi signa. *ibid.*
Cordis calidi, & sicci signa. 70
Cordis calidi, & humidi signa. 71
Cordis frigidi, & humidi signa. 72
Cordis frigidi, & sicci signa. *ibid.*
Cor parvum in fortibus, magnum in meticulosis repertum. 68. 69
Cordis læsi signa. 106
Corpus Salubre, Insalubre, & Neutrum. 7. 8
Corporis universi Temperaturæ signa. 79

Corpus quot modis alterari possit. 117. 118
Cranii rima quomodo curanda. 159
Cranii vulnus cum sede teli quomodo tractandum. 160
Cranii contusio, vel abscissio quibus remediis curanda. *ibid.*
Curatio quomodo differat à reductione. 129
Curationis faciendæ præcepta generalia. 130
Curatio faciendâ per contraria, & quomodo. 136
Cutanææ obstructions sectione, igne, & causticis curantur ex Galeno. 179. 180

D

Dæmones quomodo possint morbos inferre, vel curare. 280
Dæmones an possint senem juventutem restituere. 281
Dæmones an possint animalium vitam absque cibo, & potu conservare. 282
Dæmoniaca ægrotudines quomodo à naturalibus distinguantur. 284
Dæmoniicarum ægrotudinum curatio. 285
Decidentia corpora ad quamnam neutrorum speciem sint referenda. 23
Decubitus ægrotantium. 246
Definitiva methodus quæ. 5. 6
Dejectoriis evacuantur humores in ventre infirmo contenti. 179
Derivatio an admittenda admissa sanguinis circulatione. 143
Desperationis natura, & incommoda. 268. 269
Diadoche quid. 250
Dietetica Medicinæ pars reliquis præstat. 230
Diagnostica signa quænam. 25
Διάφορα quid. 42
Diapantos quid. 10
Dislocatio quid. 167
Diureticorum in febribus usus. 134. 142
Doctrinarum ordini inherentium numerus, & dignitas. 5. 6
Dolor dupliciter fit ex Galeno. 107. 108
T 2 **Dolor**

Dolor ex alteratione an, & quomodo fieri possit. 108
Dyssepulota ulcera quæ, & quibus tractanda. 165

E

E *Lodes febres quæ, & earum causa.* 172
Empyematis curatio in quo consistat. 169. 175

Empyematicorum paracentesis. 176

Empyematicorum pus an possit per intestina deijci. *ibid.*

Empyematicorum pus quomodo possit per vias urinæ educi. *ibid.*

Empyematici quomodo vomitoriis levari possint. *ibid.*

Empyematicorum pus per sudorem minimè educi potest. *ibid.*

Empyematicorum pus in cavo thoracis collectum quomodo possit per thoracem expurgari. 177

Epicurus castus, & sobrius ex Gassendo. 127

Epitopoly quid. 10

Eroticus pulsus quid. 264

Erysipelas quid. 193

Erysipelatis differentia. *ibid.*

Erysipelatis causæ, & signa. *ibid.*

Erysipelas circa caput periculosum. 194

Erysipelatis curatio an venæ sectione institui possit. *ibid.*

Erysipelas an catharticum admittat. 195

Erysipelati an & quæ topica admovenda. 196

Evacuationes quænam in febribus conveniunt. 134. 139

Evacuationes per revulsionem, an per derivationem sint faciendæ. 142. 143

Erecticæ Medicinæ pars quæ. 115

Excrementa oculorum, narium, & aurium modica calidum cerebrum significant. 52. & contra. 54

Excrementorum varia genera. 108. 109

Excrementa corporis variè illud alterare possunt. 117. 123

Excretorum variæ conditiones. 256

Exercitium à Motu, & Labore distinguitur. 238

Exercitium Sincerum, & Operosum exhibet Galeno. *ibid.*

Exercitiorum variæ differentia. 239

Exercitii tempus. 243. V. *Motus.*

Exituræ quid apud Antiquos. 187

Expulsoria Ligatura quæ. 149

F

F *Aciei partes calidæ, & rubentes calidum cerebrum significant.* 50. 51

Facultatum vocabula non omninò rejicienda. 259

Fames cur sitim præcedat. 87. 94

Famis definitio Aristotelica, & Galenica manca. 92

Famis genuina definitio, & causa. 92. 94

Famem pingua retundunt, & quare. 92

Famem excitantes succi acres unde in ventriculum confluant. *ibid.*

Fames ne sit tolerabilior an sitis. 94

Fascini etymos, & natura. 274. 275

Fascinum an Naturale sit, vel Dæmoniacum. 276

Fascino an morbi inferri possint. 276. 279

Febres humorales curandæ evacuatione, & alteratione. 134. 139

Febres quas evacuationes admittant. 134. 140

Febres usu Clysterum an, & quomodo tolli possint. 142

Febris vulnere accidens quomodo curanda. 156

Febres malignæ quandoque sub specie Catarrhalium decipientes, & quomodo. 172

Febrium sudatoriarum causa. *ibid.*

Febricitantes an vinum potare possint. 227

Febricitantes cibandi ratio. 232

Fibula apud Antiquos quemnam usum habuerint in vulneribus. 149

Figure corporis depravata quomodo emendanda. 167

Flammæ, & Vitæ animalium analogia. 217

Fœminæ cur opinionem quàm citissimè mutant. 45

Formationis læsæ morbi. 166

Formationis vitia quæ. 130. 131

Fracturæ ossium quomodo curentur. 157

Fracturis adjacentes partes quibus medicamentis fovendæ. 158

Fracturam comitantia, vel consequentia symptomata quomodo curanda. 159

Fracturæ Cranii quomodo specialius tractandæ. 160. V. Ossa.

Frontis varia figura quid denotet ex Phygionomicis. 41

G

Alenus in philosophando liber 2

Gangrænâ sistentia medicamenta quæ. 156

Gaudii natura, commoda, & incommoda. 269

Glutinatoria ligatura quæ. 149

Glutinatoria sutura quæ. *ibid.*

H

Hæmorrhagia quomodo sistatur. 151

Hæmorrhagia an venę sectione curari possit. *ibid.*

Hæmorrhoidales venę fluentes in febribus prodesse possunt. 134. 143

Hegemonice facultates quæ. 35. 41

Hepar inter partes principes minimè numerandum. 32

Hepar quomodo possit cordis calorem infringere. 67

Hepatis calidi signa. 73

Hepatis frigidi signa. 74

Hepatis sicci signa. *ibid.*

Hepatis humidi signa. 75

Hepatis calidi, & sicci signa. *ibid.*

Hepatis calidi, & humidi signa. 76

Hepatis frigidi, & humidi signa. *ibid.*

Hepatis frigidi, & sicci signa. *ibid.*

Hepatis parvi signa. 104

Hepatis lesi signa. 106

Hepati obstructiones quandoque falsò tribuuntur. 171

Horistica methodus quæ. 6

Hydrops ex obstructione Vasorum lymphicorum. 172

Hydrophobia affecti cur aquam refugiant. 91

Hypochondriaci an vinum potare possint. 228

I

Jecur. V. Hepar.

Imaginatricis maxime facit ad morborum curationem. 138

Imaginatricis facultatis vis in functionibus animalibus. 272. In vitalibus, & naturalibus. 274

Imaginatricis morbos excitare, & tollere potest. *ibid.*

Immoderatum sit ne contrarium Immoderato, an Moderato. 135

Inanitionis nomine quid veniat. 248

Inanitionis differentia. 249

Inanitio quomodo rectè instituenda. 253

Inanitio an repletio præter naturam periculosior. 254

Inanitionis præternaturalis incommoda. 255

Incantamentum. V. Fascinum.

Incarnativa ligatura quæ. 149

Indicantia tria, Urgens, causa principalis, & causa sine qua non, sive Impedimentum. 144

Indicans urgens est virium reparatio. *ibid.*

Inflammatiō vulneri accidens quo pacto curanda. 155. 165

Inflammationes cur frequentiores hyeme, quàm æstate. 186

Inflammatiō quid. 188

Inflammationis causæ externæ, & internæ. 189

Inflammatiō Erysipelatodes, Oedematodes, Scirrodes. *ibid.*

Inflammationis curatio. 191

Inflammatiō an, & quomodo Venæ sectione curetur. 191. 192

Inflammatiō an cathartico curetur. 192

Ingenium quid, & quid denotet. 41. 42

Insalubre quid, & ejus differentia. 7. 8

T 3

Insal-

Insalubre corpus quid , & ejus differentia .

20

Insalubre simpliciter corpus , diapantos , & epitopoly .

20. 21

Insalubre Corpus ut nunc .

21

Insalubria signa quænam .

25

Insalubrium Corporum signa .

105

Instrumentariarum partium signa . 101. V. Organica .

Intemperierum simplicium , & compositarum curationes ex Galeno .

134. 145

Intemperiei morbi alteratione curantur , causa verò intemperiei evacuatione .

135.

145

Intentio prima , & secunda in unione solutionis & continuitatis quid .

147

Intestinorum obstructio quibus tollenda .

169.

173

Ira est ebullitio sanguinis circa cor .

67

Ira an à Corde humidior .

70

Ira natura , & incommoda .

266

Ira remedia .

267

Irascibilis Appetitus quid .

262

Iustitialis Temperies ad sanitatem constituendam requiritur .

13

L

L *Abor quomodo à Motu , & Exercitio distinguatur .*

238

Lac aureum ad combustiones .

158

Lacrymæ cur ex dolore , & letitia æquè proficiant .

61

Lacrymæ aridæ quid .

62

Lacrymæ cur ex mœstitia prodeant .

271

Letitiæ commoda , & incommoda .

269

Levitatis , & Asperitatis morbi .

180

Lamiæ an verè sint .

277. 278

Lapidis è Vesica extractio quo peragatur modo .

174. 169

Lapidem in Vesica frangentia medicamenta .

174

Lassitudo quid .

271

Lassitudo Tensiva , Phlegmonosa , & Ulcerosa .

251

Lassitudines quæ morbos prænunciant .

252

Lassitudo quomodo dolorem inferat .

ibid.

Lassitudinis remedia .

253

Laxitas viarum quæ mala pariat .

172

Lieteria quibus ex causis fiat .

183

Ligatura in vulneribus quotuplex .

149

Linimentum Plateri ad combustiones .

158

Linimenta ad cicatrices delendas .

166

Lithotomia quæ tempore Hippocratis periculosissima erat , nunc felicissimè peragitur .

174

Liquor Stypticus Meber , seu Anchora sciatorum .

155

Luxationis ossium tres species .

167

Luxationes curandi methodus .

168

Luxationes in pueris facilius curantur .

168

Luxata ossa malè reposita quomodo sint restituenda .

ibid.

Lymphica vasa obstructionem pati possunt , & febres malignas parere .

171

M

M *Agica morborum curatio an exequi possit .*

286

Maleficio exorti morbi quibus indicibus dignoscantur .

284. 285

Maleficium quibus remediis vitari possit .

287

Medicinæ definitio .

67

Medicina Ars ne sit an Scientia .

7. 8

Medicina est scientia qualium , & quomodo id sit intelligendum .

9. 11

Medicamentum quid .

218

Medicamentorum vis haud ab ipsorum colore deprehendi potest . 136. Sed potius ex sapore .

138

Medicamentorum secundæ qualitates non semper respondent primis .

136

Medicamentorum vis melius ex chymica illorum analysi deprehendi potest .

137

Medicamentorum vis in morbis quomodo ad augenda , vel minuenda .

135. 145

Medicamenta evacuantia electiva nulla sunt .

178

Medicamentorum inventio pendet ab affectibus , & locis affectis .

180

Medi-

Medicamina in morbis à maleficio ortis. 287
Melancholici an ingeniosi , & prudentes.

270

Meliceris quid. 198
Memorię diversitas unde , & quomodò cerebri diversam constitutionem significet.

41. 44

Memoria minimè valent senes , & quare.
ibid.

Menstruorum provocatio in febribus prodesse potest. 134

Metastasis quid. 250

Methodi disciplinarum tradendarum quot.
5. 6.

Misturæ ad Inflammationes. 192

Mærentes cur lacrymentur. 271

Mæstitiæ natura , & incommoda. 270

Mæstitiæ remedia. *ibid.*

Morborum secundum numerum curatio.
200

Morborum secundum magnitudinem curatio. 201

Morborum secundum situm curatio. *ibid.*

Mortis , aut salutis in ægrotantibus signa.
113

Mortis inevitabilis causæ. 283

Motus , & Quies ad causas naturales , an ad nonnaturales referenda. 120

Motus , & Quietis commoda , & incommoda. 117. 127. 239

Motus , & Quietis recta institutio. 118.
125

Motus differentiæ ex Galeno. 237

Motus , an Quies conferat ad ciborum confectionem. 241

N

N *Asus abscissus à Tagliacotio regeneratus.* 148

Natura subitas mutationes non patitur.
127

Naturales causæ quæ. 119

Nervi punctura quomodò curanda. 160.
165

Nervi punctura cur periculosissima. 161

Nervi punctura cur afferat convulsionem.
ibid.

Nervi puncturam sequentia symptomata.
162

Nervi punctura periculosior est integra ejusdem resectione , & quare. 162

Nervi rescissionem sequentia symptomata.
ibid.

Nervi vulnerati quandoque absque dolore.
163

Nervis denudatis oleosa , & frigida non sunt applicanda. 164

Nervi contusio quomodò curanda. *ibid.*

Nervi obstructionem pati possunt. 171

Neutrum quid , & ejus differentia. 7. 8

Neutrum tripliciter dici potest. 9. 11. 21. 22

Neutra corpora an sint. 11

Neutrum corpus quid , & ejus differentia.
21. 22

Neutrum Corpus simpliciter , semper , & ut multum. *ibid.*

Neutrum Corpus ut Nunc. 22. 23

Neutra signa quænam. 25

Neutrorum Corporum signa. 109. 111

Neutra Decidentia , & Convalescentia. *ibid.*

Neutrorum Corporum signa secundum naturam , & præter naturam. 111. 112

Nonnaturales causæ quæ. 119

Nonnaturales causæ cur dicantur à Galeno Conservatrices. *ibid.*

Nonnaturales causæ an plures quàm sex.
119. 120

Nonnaturales causæ quomodò salubres , vel insalubres reddi possunt. 117. 123

Nonnaturales res quæ dicantur à Medicis , & fusæ de iis tractatio. 207

Nunc quid importet apud Galenum. 9. 10

O

O *Bstructionis variæ species , & causæ.*
169

Obstructio an à multitudine humorum fieri possit. 170

Obstructionis indicationes curativæ. 169. 179

Obstructionem tollentia medicamenta. 170
Obstru-

- Obstructiones ubinam propriè fiant. 171
 Obstructiones etiam in vasis majoribus fa-
 ctæ. ibid.
 Obstructiones lymphicorum vasorum quan-
 doque malignas febres parere solent. ibid.
 Obstructiones nervorum quæ mala pariant.
 172
 Obstructiones quandoque immodicas egestio-
 nes pariunt, & quomodò. 173
 Obstructio intestinorum quibus tollenda.
 169. 173
 Occipitis figura varia quid denotet. 39. 40
 Oculorum venæ turgidæ cerebrum calidum
 significant. 50. 52. & contrà. 54
 Oculorum temperamenti signa. 61
 Oculorum magnitudo varia quid denotet.
 62
 Oculorum colores quot, eorumque causa. 63
 Oculi glauci quibus ex causis fiant. 64
 Oculi nigri quare quibusdam fiant. ibid.
 Oculorum glaucorum varii gradus. ibid.
 Odii natura, & incommoda. 266
 Odores si caput gravent, cerebrum calidum
 significatur. 50. 52. Quare. 53
 Oedema quid. 196
 Oedematis differentia; & causæ. ibid.
 Oedematis curatio. 197
 Oleum ex floribus sambuci ad combustiones
 sclopeto factas. 158
 Opiata quem usum habeant in renum dolori-
 bus. 174
 Opinionis mutatio quamnam cerebri consti-
 tutionem designet. 41. 45
 Operationes tripliciter lædi possunt, aboli-
 tæ, minutæ, & depravatæ. 108
 Organicarum partium signa. 102
 Organicarum partium causæ conservantes.
 130
 Organicarum partium vitia quot, & quo-
 modò corrigi possint. 131
 Organicæ partes solutæ uniri nequeunt. 145.
 146. an semper verum. 148
 Ossis fractura in vulnere quomodò tractanda.
 156. V. Fractura.
 Ossa an coalescere possint per primam inten-
 tionem. 157
 Ossa luxari quot modis possint. 167. V. Lu-
 xatio.
 Ossa aspera quomodò læviganda. 180. 183
 Otii damna. 240
- P**
- Panis an carnis pejor repletio. 234
 Pane non utitur nobilis quædam Nea-
 politana familia. 235
 Panis azymus cur ventriculo gravis. 236
 Paracentesis Empyematicorum. 176
 Partium corporis differentia. 31
 Passiones Animi. V. Animi pathemata.
 Perspirationis insensibilis emolumenta. 125
 Pestilentia crasso, & fumido reddito aere
 extincta. 213
 Pestilentia ope vermiculorum per aerem vo-
 litantium grassatur ex Kircherò. 218
 Phlegmones, & Plogoseos discrimen. 189
 V. Inflammatio.
 Pilulæ tartaræ Bontii. 170. aliæ ex
 Schrædero. ibid.
 Pituitosus homo quomodò potest bilem exo-
 mere. 104
 Plenitudo quoad vires, & quoad vasa,
 earumq; differentia, & indicia. 250
 Plethorica repletio quid. 251
 Pneumaticorum secta quæ. 6
 Pomum ligni vitalis an immortales ho-
 mines reddere potuisset. 284
 Ponderalis Temperies improbabilis ex Ga-
 leno. 13
 Potus calidi calidum cerebrum lædunt. 52
 & quare. 53
 Potu parco cur contenti sint ii, qui sicco ven-
 triculo sunt præditi. 88
 Potu cur citius reficiamur quàm cibo. 95
 Potus assumpti commoda, & incommoda.
 220
 Potus recta administratio. 218
 Potus quid propriè. 220
 Potus differentia. 221
 Prænunciativa signa quænam. 25
 Præservativæ causæ. 146
 Præternaturales causæ quæ. 119

Principes partes quæ, & quot.	31
Principis partis conditiones.	32
Principatum obtinentes facultates quæ.	35
Prognostica signa quænam.	25
Prophylactica Medicinæ pars quæ.	105
Puerorum cerebrum ad simulacra recipien- da, & retinenda magis aptum.	44
Pulmonis frigidi signa.	96
Pulmonis calidi signa.	95
Pulmonis sicci signa.	97
Pulmonis humidi signa.	ibid.
Pulsuum velocitas, & frequentia cor ca- lidum significat. 67. & contra.	68
Pulsus Amantium.	265
Pulveris Sympathetici præparatio, & u- sus.	152
Pulveris Sympathetici usus haud supersti- tiosus.	153
Pulveris Sympathetici vis physicè explica- ta.	154
Pulvis tartareus compositus.	170
Punctura in quo differat à Vulnere, & Fractura.	172
Pustula quid apud Antiquos.	187
Putredo humorum in inflammationibus nul- la.	186

Q

Qualitates secundæ dictæ minimè pri- mis respondent.	136
Quies & Motus ad causas naturales, an ad nonnaturales referri debeant.	120
Quietis, & Motus commoda, & incom- moda.	117. 123
Quietis, & Motus recta institutio.	118.
	125. 238. 241.

R

Recentiorum studio facultates omnes, & artes incrementum sumpsere.	15
Recentiores cum antiquis comparantur.	16
Reductio quomodo fiat per contraria, & in quo à curatione differat.	129. 130

Regiones maximè faciunt ad corporis tem- periem.	80
Regio temperata quænam.	81
Rememorativa signa.	25. 26.
Repletionis nomine quid veniat,	250
Repletionis differentia.	ibid.
Repletio quomodo sit instituenda.	254
Repletio an Inanitio præternaturam pericu- losior.	ibid.
Resolutiva methodus quæ.	6
Respiratio magna cor calidum denotat.	66.
& contra.	68
Respiratio, & motus pulmonis non idem.	97.
Respiratio propriè ad thoracem, & dia- phragma pertinet.	ibid.
Respiratio quomodo in forti apoplexia, vi- ta permanente, intercipi possit.	98
Respiratio aeris usus juxta varios A. A.	98. 210.
Respirati aeris usus juxta Authorem.	98
	99.
Retentiva Ligatura quæ.	149
Retentivæ sutura quæ.	149.
Retentionis præternaturalis incommoda.	256.
Retentorum variæ conditiones.	ibid.
Revulsio an admittenda post sanguinis de- tectum circuitum.	143
Risu quidam perierunt.	269.

S

Agarum narrationes an mera figmen- ta.	278
Salubre quid, & ejus differentia.	7. 8.
Salubre corpus quid, & ejus differentia.	12.
Salubre simpliciter corpus an ab ipso na- turæ ortu tale esse debeat.	18
Salubre simpliciter corpus diapantos, & epitopoly.	19
Salubre corpus ut Nunc.	ibid.
Salubria signa quænam dicantur, eorumque differentia.	25.
Salubrium signorum fontes.	26. 28

Salubris Corporis signa. 26. 29
Salubris Corporis ut Multum signa. 27.
 29
Salubris Corporis ut Semper signa. *ibid.*
*Saluberrimum Corpus quomodo à causis
 nonnaturalibus conservetur.* 118. 124
Salutis, aut mortis in ægrotantibus signa.
 113.
*Sanguis duplici imprimis pollet substantia,
 vivificante scilicet, & nutriente.* 55
Sanguinis missio. V. Venæ sectio.
*Sanguinis evacuationes sponte naturæ fa-
 ctæ quandoque salubres, quandoque non,
 & quare.* 140
Sanguinis fluxus. V. Hemorrhagia.
*Sanguis in cavitatibus restagnans corrup-
 pitur.* 169. 177
*Sanguis quibus ex causis restagnationem
 pati possit.* 185
Sanguis putrescere nequit vita superstite.
 186.
*Sanguis sola restagnatione haud in pus ver-
 titur, nisi fermentatio accedat.* 190
Sanitas vera in quonam consistat. 12
Sanitatis latitudo in tres partes dividitur.
 27. 29.
Sarcotica medicamenta. 164
*Scirrhus quid, ejusque causæ, & diffe-
 rentiæ.* 189
*Scirrhus in Cancrum degenerat, & quo-
 modo.* 190
Scirrhi curatio. *ibid.*
Senectus circa caput quid dicatur à Galeno.
 60.
Senum salus quomodo conservanda. 204
*Sensuum perspicacitas à sicco cerebro ori-
 tur.* 55
*Sensuum perspicacia, vel hebetudo cere-
 bri variam constitutionem significare
 potest.* 59
Signum Salubre, Infalubre, & Neutrum.
 7. 8. ejusque differentiæ. 9. 25.
Signa optimæ constitutionis. 26
*Similares partes quandoque per primam,
 quandoque per secundam intentionem u-*

niuntur, multoties verò non uniuntur.
 145. 146.
Simpliciter quid importet apud Galenum. 9
*Simpliciter duobus dicitur modis, Semper
 nempe, & ut Multum.* 10.
Sitis cur Famem potius sequatur. 87
Sitis quid. 93
*Sitis non est appetitus frigidi, sed potius
 humidi.* 93
Sitis causa. 94
Siti quidam prorsus carent. 94
Sitis ne sit tolerabilior an Fames. *ibid.*
*Sitis quandoque à pulmone, & corde,
 quin & à jecore inflammato fieri potest.*
 96.
Somnus brevis cerebri calorem arguit.
 50 53. & contra. 54. 55
*Somnus, & Vigilia ad causas naturales,
 an ad nonnaturales referenda.* 120
*Somni, & Vigiliæ commoda, & incom-
 moda.* 117. 123
Somni & Vigiliæ recta institutio. 118. 125
Somnus quid. 243
Somni tempus congruentius. 244
Somnus ad quot horas extendi possit. 245
Somnus quo corporis situ sit naturalis. *ibid.*
Somnus quibus in morbis conveniat. 246
*Somnus post catharticum assumptum an
 permittendus.* 247
*Sordida Vulnera quibus medicamentis tra-
 ctanda.* 155
Sordida Ulcera quibus tractanda. 265
Spei natura, & commoda. 268. 269
Spina ventosa quid. 198
Steatoma quid. *ibid.*
Subluxatio quid. 168
Suppressoria sutura quæ. 149
Suppuratio ope acidi fermenti peragitur.
 190.
Suppurantia medicamenta. 192. 197
*Suturæ in vulneribus quot modis adhibean-
 tur.* 149
Symptomatis variæ acceptiones. 28
Syncipitis figura varia quid denotet. 39. 40.
Synthetica methodus quæ. 6

T

Temperamentorum natura juxta sanio-
rem philosophiam explanata . 13
Temperamenta non tam ex qualitatibus com-
plexu , quàm ex humoribus in sanguine
exundantibus resultare ait Galenus . 17
Temperamenti moderati signa . 81
Temperamenti calidi signa . 82
Temperamenti frigidi signa . 83
Temperamenti sicci signa . *ibid.*
Temperamenti humidi signa . 84
Temperamenti calidi, & sicci signa . *ibid.*
Temperamenti calidi, & humidi signa . *ibid.*
Temperamenti frigidi, & humidi signa . 85
Temperamenti frigidi, & sicci signa . 86
Tendinis punctura quomodo curanda . 160
Testes an sint partes principes . 33
Testium temperaturæ calidæ, frigidæ, hu-
midæ, & siccæ signa . 77
Testium calidorum, & siccorum signa . *ibid.*
Testium calidorum, & humidorum signa . 78
Testium frigidorum, & humidorum signa .
ibidem.
Testium frigidorum & siccorum signa . 79
Testium cum aspera Arteria . 101
Therapeutice Medicinæ pars quæ . 115
Thoracis amplitudo potest Cordis calorem
denotare . 67
Thoracis læsi signa . 107
Timoris natura . 267
Timoris commoda, & incommoda . *ibid.*
Timoris remedia . 268
Tracheæ cum Testibus consensus . 101. V.
Aspera arteria .
Tracheæ asperitas quibus tollenda . 180. 183
Transpirationis insensibilis emolumenta .
125.
Transpiratione febres tolli possunt . 142. 134
Transplantatio morborum an possibilis . 138
Traumatica Medicamenta . V. Vulneraria .
Tritemporea signa quænam . 26
Triticum maximè alibilem succum conti-
net . 236
Tumores ex affluxu sanguinis facti . 181

Tumorum natura fusè examinatur . 184
Tumoribus magis obnoxia partes quæ . 186
Tumoris definitio . 187
Tumorum differentia secundum Antiquos,
& Recentiores . 187
Tumores, vel affluxu, vel congestione
fiunt . 189
Tussis læsa trachea, & thorace fieri potest .
107.

V

Vena in vulnere secta quomodo clau-
datur . 154
Venæ sectio an, & quando in febris con-
veniat . 140
Venæ sectio an hæmorrhagiam sistere valeat .
151
Venæ sectio ad animi de seclum exolvit . 192
Venenum quid . 218
Venereorum usus an salubris . 126. 127
Venereorum usum Epicurus damnabat, &
quare . *ibid.*
Veneri quo tempore sit indulgendum . 128
Veneris usus quæ commoda, quæque incom-
moda pariat . 254
Ventriculi sicci signa . 87
Ventriculi humidi signa . 89
Ventriculi calidi signa . *ibid.*
Ventriculi frigidi signa . 90
Ventriculi appetitus feratur ad similia, an
ad opposita . 91
Ventriculi intemperierum compositarum si-
gna . 95
Ventriculi moles in quodam ita extuberans,
ut extrinsecus conspici potuerit . 102
Ventriculi læsi signa . 107
Ventriculi cum diaphragmate consensus . 162
Vesica urinaria adeò parva, & exposita &
Galeno observata, ut in tumorem sensi-
bilem assurgeret . 103
Victus ratio . V. Cibus . Potus .
Victus ratio in sanis . 228
Victus ratio in ægris . 230
Vigilia, & somnus ad causas naturales an
ad nonnaturales referenda . 120

Vigi-

Vigilia, & somni commoda, & incommoda. 117. 123. 144.
Vigilia, & somni recte institutio. 118. 125.
Vigilia quid. 243
Vigilia in quibus morbis conveniat. 246
Vini potus commoda, & incommoda. 224
Vinorum differentia, eorumque vires. 225
Vinum oligophorum quid. 224
Vinum calidum ne, an frigidum. 225
Vinum siccum est Fracastorio. 226
Vini potus quibus in morbis conveniat, vel noceat. 226. 227
Vinum, an aqua pro potu eligenda. 226
Vinum an febricitantibus concedendum. 228
Vinum an hypochondriacis competat. *ibid.*
Vinum colatum an noxium. *ibid.*
Vires sunt indicans urgens. 144
Vita an in perpetuum produci potuisset ex usu fructus ligni vitalis. 282
Ulcerum complicatorum curatio. 160. 164
Ulcera Cacoethica, & Dysepulota. 165
Unguenti armarii descriptio, & usus. 154
Unguentum ad puncturas Nervorum. 163
Vomitibus bilis in corpore pituitoso quomodo fieri possit. 104
Vomitoriis educuntur quæ sunt in ventre superiori, hoc est in epigastrio. 173. 169

Vox clara siccitatem pulmonum significat, & contra. 97
Vocis instrumenta, differentia, & causa. 99.
Vocis mutatio cur in pubertate fiat. 101
Vulnerum curatio. 145. 146
Vulneris curandi indicationes quatuor. 148
Vulnera felicissime balsamicis applicatis curantur. 150
Vulnerariorum medicamentorum catalogus. 150. 152.
Vulnus coalescere nequit, si aliquid in illius labia sit delapsum. 145. 150
Vulnera haud recte oleis, unguentis, & frondibus herbarum delaxantium curantur. *ibid.*
Vulnera suctu sanata & quomodo. 151
Vulneri superveniens hæmorrhagia quomodo sistenda. *ibid.*
Vulneraria potiones ex quibus paranda. 152
Vulneribus supervenientia symptomata quomodo tollantur. 155
Vulneri convulsio superveniens lethalis. 162
Vulnerum complicatorum curatio. 160. 164

Z

Zona torrida maxime temperata & habitabilis. 81

F I N I S.

